


I Fiyowe Uret



New Testament in Tiruray

I Fiyowe Uret New Testament in Tiruray

copyright © 2002 Wycliffe Bible Translators, Inc.

Language: Tiruray

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9718260234

The New Testament

in Tiruray

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 22 Feb 2024 from source files dated 29 Jan 2022
b0fb0c95-f209-5a97-9de8-b336c1289708

Contents

Mateo	1
Markos	51
Lukas	82
Juan	132
Rénigoy de Apostol	169
Roma	218
1 Korinto	240
2 Korinto	262
Galasia	276
Efeso	284
Filipos	292
Kolosas	298
1 Tesalonika	304
2 Tesalonika	309
1 Timoteo	312
2 Timoteo	318
Tito	323
Filemon	326
De Judio	328
Santiago	345
1 Pedro	351
2 Pedro	358
1 Juan	362
2 Juan	368
3 Juan	369
Judas	370
Kéfégétigan	372

I Fiyowe Uret Sénulat Mateowe

Been i niy Fiyowe Uret sénulat Mateowe fantag bé Jesu Kristowe. Sénulat Mateowey de ténero Jesus, sani Nga i Tuluse, brab de mékégaif do rénigo no. Sénulat Mateowe soy Jesuse, Been i "Kristowe". I atag i "Kristowe", sani fénémili i Tuluse méguléw. Bé do gétah, ménongot-ongot i de Judio bé kégumah i fénémili i Tuluse méguléw. Ménongot-ongot ro non bé do gétah wén i de sénarigoy Tuluse muret bé kébérén ne, bénréh roy wén i gérumahe ségétew fénémili i Tuluse méguléw bé de Judio. Féngétiga Mateowey ni étew bé Beeney Jesuse, sani "Kristowe".

Endob i de odoroy de Judio, méndaléw ro fo bé Jesuse brab ménrarék ro de. Mélaw nongot ro bé de gémamak kukuman, sani méguléwe tidew dob ingéde Roma, bé féléhuén i Jesuse. Endob amun ménléhuén i Jesuse dob kruse, brab amun ménlébéngén, méntébule. Mélaw tintu gétiga tom bé i Jesuse Beene foy tintuwe Nga i Tuluse.

I Mateowe, sani séménulate bé ni Fiyo Uret, ségétew so bé de kuyug Jesus amun ménbati sénay Jesuse dob duniyae ni. Mélaw gétiga tom bé i kéluhanay do sénulatén toow fo toow.

I de katufua Jesu Kristowe

¹ Ay niy de dawét i de katufua Jesu Kristo, sani ségétewe séfu Datu Dabide séfu Abraham. ² I Abrahamey boh Isake. Atin i Isakey boh Jakobe. Atin i Jakobey boh Judahe brab de dumo no sétiman boh. ³ Atin i Judahey boh Farese brab Sarawe. (Tamar i idéng ruwe.) Atin i Faresey boh Esrome. Atin i Esromey boh Rame. ⁴ Atin i Ramey boh Aminadabe. Atin i Aminadabey boh Nasone. Atin i Nasoney boh Salmone. ⁵ Atin i Salmoney boh Boose. (Rahab i idéng ne.) Atin i Boosey boh Obede. (Rut i idéng ne.) Atin i Obedey boh Jesewe.

⁶ Atin i Jesewey boh Datu Dabide. Atin i Dabidey boh Solomone. (Idéng ne been i bawag Uriase bé do gétah.) ⁷ Atin i Solomoney boh Roboame. Atin i Roboamey boh Abiase. Atin Abias i boh Asawe. ⁸ Atin i Asawey boh Josefate. Atin i Josefatey boh Jorame. Atin i Joramey boh Osiase. ⁹ Atin i Osiasey boh Jotame. Atin i Jotamey boh Akase. Atin i Akasey boh Esekayawe. ¹⁰ Atin i Esekayawey boh Manasese. Atin i Manasesey boh Amone. Atin i Amoney boh Josiase. ¹¹ Atin i Josiasey boh Jekoniase brab de dumo no sétiman boh. Kéluhana ro mén-uwit mangéy dob méravue ingéd féndawét Babilonia amun ténavanan i karowe ingéd bé girawe. ¹² Amun diyo ron bati dob Babilonia, i Jekoniase wén i ngaén féndawét Salatiel. Atin i Salatieley boh Sorobabele. ¹³ Atin i Sorobabeley boh Abiude. Atin i Abiudey boh Eliakime. Atin i Eliakimey boh Asore. ¹⁴ Atin i Asorey boh Sadoke. Atin i Sadokey boh Akime. Atin i Akimey boh Eliude. ¹⁵ Atin i Eliudey boh Eleasare. Atin i Eleasarey boh Matane. Atin i Mataney boh Jakobe. ¹⁶ Atin i Jakobey boh Josehe, sani bawag Mariahe. Atin i Mariawey idéng Jesuse féndawét Kristo non Been i fénémili i Tuluse méguléw. ¹⁷ Mélaw folo bra fot gékansad i de katufuan tidew dob Abrahame taman dob Dabide. Atin tidew dob Dabide taman dob gaiwe mén-uwit i de Judio mangéy Babilonia folo bra fot so gékansad i de katufuan. Atin tidew béno taman bé kéumah Kristowe folo bra fot so gékansad i de katufuan.

I kéumah Jesu Kristowe

¹⁸ Ay ni urete fantag bé kéumah Jesu Kristowe. I idéng ne Maria. Atin i Mariahe ténaana néen fébawagén dob ségétewe lagéy féndawét Jose. Endob amun énda séna sébawag ro de, ménwaléy obor i Mariahe non fénobor i Rémodor i Tuluse. Enggétiga Mari-ahay ni. ¹⁹ Atin i Josehe, métintu

étew, mélaw ménika sébawag bé Mari-ahe non oborén. Endob fiyo étew i Josehe, mélaw mikä de ké kémalan i Mariahe. Mélaw ménuyot i Josehe de ké sérontos bé Mariahe sékémén saén. ²⁰ Dob lala Josehe mégitung fantag bé de ni, méntefégitoy téakiwe tidew dob Kadnane dob téginéf ne. Ménbéréh i téakiwe ni mano, “O Jose, séfu Datu Dabid, kago magalang-galang mawag bé Mariahe, non i funa nuwe mén-obor sabaf bé barakat i Rémogor i Tuluse. ²¹ Mégéngé moso i Mariahe ségétew nga lagéy. Atin fédawétém Jesus, non Been i mémukase bé de étewén dob de sala ro.” Been i bénréh i téakiwe.

²² I funane ménrigoy kéluhanay de ni inok métuman i fénbéréh i Kadnane bé sénarigo nuwe étew mano, ²³ “I kénogone waléy obor, brab mégéngé nga lagéy, atin fédawétén Emanuel.” (I atag i dawéte Emanuel “Bati i Tuluse dob betome.”)

²⁴ Tidew béno, énggétékénal i Josehe, atin nunuro noy fémandu i téakiwe de, mélaw bénawagén i Mariahe. ²⁵ Endob énda ménsétifon ro fidong taman énda séna mumah i nga ne. Brab amun ménmahén, féndawétén Jesus.

2

I kégumah i de gétuwan étew

¹ I Jesuse ménmah dob ingéde féndawét Betlehem dob sakuf i dakéle ingéd féndawét Judea, amun Herod sénay méguléwe de. Atin énda mérugayén tidew bé kékumah Jesuse, wén i de gétuwan do étew tidew dob mérayue ingéd dob sébangan ménagéw ro mangéy dob ingéde Jerusalem. I de ni dolagéy furung gésobut bé de tanda dob de gitoon. ² Atin amun énggumah ro dob Jerusalem, ménenginsa ro maro, “Hon i gonoy Ngae, sani waléye moso Datu i de Judio? Non énggito gey i gitoone dob sébangan tanda i kékumah ne. Atin mélaw angéyé key féngadafén.”

³ Atin i Herode méguléw, amun énggélungoo noy fantage bé ni ségiyo datu, toow fo ménbuku, brab beroy de

kéluhanay de étew bat i dob Jerusalem.

⁴ Mélaw lénimud Herodey kéluhanay de odoroy de fadi brab de témo i de Judio, atin ménenginsa dob berowe mano, “Hon i gonoy umaha Kristowe de, sani fénemili i Tuluse méguléw?”

⁵ Atin séménumbul ro maro, “Fatut mumah i Kristowe dob ingéde Betlehem dob sakuf i dakéle ni ingéd Judea. Non been i niy sénulat i sénarigoy Tuluse muret bé kékéhé ne mano, ⁶ ‘I beeme, o Betlehem, dob dakéle ingéd Judawe, tintu békén go toow na fo gérifantad bé kéluhanay de ingéd dob Juda. Non tidew dob beeme moso i odorone méguléw bé de étew gu do Judio.’”

⁷ Tidew béno, féntawag Herodey de ni gétuwan do étew tidew dob sébangan mangéy sélimud dob beene énda i ségiyo étew de gétigan. Atin fénenginsaa no bero ké ati tintuwe gai énggito roy gitoone ni. Amun énggétiga Herode, ⁸ sénuguén bero mangéy Betlehem mano, “Agéw gom, toow gom fo séléd i Ngao no. Atin buluk gito gom, fégétiga kom begén inok angéyé ku so féngadafén.”

⁹⁻¹⁰ Tidew béno, amun énggélungoo roy bénréh Datu Herode, ménagéw ro. Atin énggito ro man i gitoone ni, sani gitoone so énggito ro dob sébangane bé gétahé. Toow ro fo ménoror amun énggito ro. Atin i gitoone ni ménagéw métah bero taman témenréni dob gatagay gonoy Ngae ni. Atin ménfuray ro bé gitoone ni taman dob no lawi. ¹¹ Amun énggumah ro diyo, ménahur ro brab énggito roy Ngae ni brab Mariahe idéngén. Atin ménlingkuwéni dob adafay Ngae ni ménagadaf de. Tidew béno, bénungkal roy de balilaga tamuk nuwit ro do bélowan, do dukah, brab do fégéfamut féndawét mira. Atin niray ro dob Jesuse.

¹² Tidew béno, i Tuluse féningatén bero dob téginéf ruwe bé békénén séfule ro mangéy dob Datu Herode. Mélaw ménule ro mangéy dob karowe ingéd dob ségiyowe aguwon.

I kékéféraréy ruwe mangéy Egipto

¹³ Amun ménagéw i de ni gétuwan do étew, méntefégito télakiy Kadnane dob Josehe dob téginéf ne. Atin bénréhén dob Josehe mano, “Tek go, brab uwitém i Ngae brab idéng ne méraréy mangéy dob ingéde Egipto. Atin bati gom diyo taman béréréh ku beem ké fakay gomén mule. Non i Datu Herode sélédé noy Ngae ni inok féléhué no.”

¹⁴ Mélaw méntek i Josehe fiyon fo ké kérara kélungonon, atin nuvitén i Ngae ni brab idéng ne mangéy Egipto.

¹⁵ Atin ménbati ro diyo taman bé kéléhu Herode. Ménrigoy ni inok métuman i fénbéréh i Kadnane bé sénarigo nuwe mano, “Ténawag guy Nga guwe inok mésut tidéw Egipto.”

¹⁶ Endob i Herode, amun énggétiga noy fénggakaray de gétuwan do étew tidéw sébangan, toow fo ménkérít. Mélaw sénuguén i de sundalo mangéy Betlehem brab dob de ingéd géliwé de, inok féléhué roy kéluhanay de nga lagéy tidéw ruwo gébélantuwa i idad ne mangéy fantad. I Herode énggétiga noy idad i Ngae ni sabaf bé kékérén i de gétuwan do étew bé gaiwe ménuts i gitoo no.

¹⁷ Mélaw métuman i ménrugayén kékérén i ségétewe sénarigoy Tuluse muret bé kékérén ne fénawé Jeremias mano, ¹⁸ “Wén i émbéréh énggelingoon dob ingéde Rama, kémérew brab rémuung. Non kémérew i Rakele sabaf bé de ngaén. Enda i géféror de non i kéluhanay de ngaén ménléhu.”

I késéfule ruwe mangéy Nasaret

¹⁹ Amun ménléhu i Datu Herode, i télakiy Kadnane méntefégi dob Josehe dob Egipto dob téginéf ne.

²⁰ Atin ménbéréh i télakiwe ni mano, “Tek go brab uwitém i Ngae ni brab idéng ne mule mangéy dob ingéde Israel. Non ménléhuén i de méméléhu damén bé Ngae ni.” ²¹ Mélaw méntek i Josehe atin nuvitén i Ngae brab idéng ne mule mangéy Israel.

²² Endob énda ménbati ro dob Judea non ménggilak i Josehe non

énggelingoo noy Arkelaowe ménwaléy méguléw amun ménléhu i boh ne Datu Herod. Atin féningatén man i Josehe dob téginéf ne, mélaw métants ro mangéy dob sakuf i dakéle ingéd fénawé Galilea. ²³ Atin ménbati ro diyo dob ingéde fénawé Nasaret. Mélaw métuman i ménrugayén kékérén i de sénarigoy Tuluse muret bé kékérén ne maro, “Fédawétén i Kristowe ‘ségétew tidéw dob Nasaret.’ ”

3

I kékéuret Juan Bautistawe

¹ Bé no do gai, amun ménifus i firoye gébélantuwa, i Juan Bautistawe énggumah dob gonone énda i étew de batu dob sakuf i dakéle ingéd Judea. Atin nureténo mano, ² “Kailanga kom gésénule bé de sala gom brab témagak bé de tete adat gom non gédétén gumah i gaiwe méguléw i Tuluse dob de étewén.” ³ I Juane ni, been i bénréh i métélate sénarigoy Tuluse muret bé kékérén ne fénawé Isaias mano, “Wén i ségétewe mékes dob gonone énda i étew de batu mano, ‘Tafay gom i aguwoy Kadnane. Fééntang gom i aguwo nuwe.’ ”

⁴ Atin kéménagal i Juane nawél buk dakél binatang fénawé kameliyo, brab kulit binatang i légét ne. Atin i amaé nuwe kasuk brab téne. ⁵ Atin ménangéy dob beeney médoowe do étew tidéw Jerusalem, brab tidéw dob kéluhanay de ingéd sakuf Judeawe, brab de étew batu dob de ingéd gédét dob wayége Jordan. ⁶ Atin amun fénayag roy de sala ro, bénautis Juane bero dob wayége Jordan.

⁷ Atin médooy soy de Fariseo brab de Saduseo ménangéy dob Juane inok fénautis ro. Endob amun énggito no bero, ménbéréh i Juane mano, “I begome maak do ulé gom non tete i de rigoné kom. Sedek mangéy gom dini? Enda géféraréy gom tidéw dob kékukum i Tuluse moso ké fénautis gom saén.” ⁸ Buluk toow gomén gésénule bé de sala gom brab téngagak gom i de tete adat gom, fétengteng

gom i kégésénule gome bé de fiyo ulané kom. ⁹ Atin kagom fégitungén de ké i Tuluse fukasé no begom dob de sala gom sabaf bé begom i de séfu Abraham. Béréhé ku begom, fakay géfewaléyoy Tuluse séfu Abrahamey de batéw ni. ¹⁰ Béleewe ni, gédétén i kékukum i Tuluse bé de tete étew. Ségiléw bé falakule méntafayén ménténa dob darir i kayéwe inok i de kayéw énda mégonok ro fiyo, tuwongén atin ibérén dob aféye inok métuwé. ¹¹ I begéne, bautiso ku begom bé wayége inok fégito gom énggésénule gom bé de sala gom. Endob wén nay gérumah gétundug begén brab bautisé no begom bé Rémogor i Tuluse brab aféye. Toow na fo gérotor bé begéne. Fiyon foy safatos ne, énda médaitu de mibit. ¹² Féganané noy de fiyo étew bé de tete étew ségiléw bé ségetéwe métof. I fégéetof ne diyo dob kémér ne inok fégéetofén bé énrek ne brab fégétimuén bé faréye dob kiwot ne. I de ukofén tuwégé no dob aféye énda émfandaén.”

I kékautise bé Jesuse

¹³ Bé no do gai, ménagéw i Jesuse tidew Galilea mangéy dob wayége ni Jordan. Atin ménfégédét dob Juane inok fébautis de. ¹⁴ Endob géléé Juane damén mano, “Begéney fatute bautiso mo, sedek Beem uman i mangéy fébautis begén?”

¹⁵ Endob séménumbul i Jesuse mano, “Fédayáém saén béleewe ni. Non fatut rigoné toy kéluhanay kétayay Tuluse.” Mélaw ménagayun i Juane.

¹⁶ Atin amun ménbautisén i Jesuse, géménaun tidew dob wayége. Sonom béno, ménungka i lawayo, brab énggito noy Rémogor i Tuluse ménlus maak marafati brab méntérimféna dob Beene. ¹⁷ Atin wén i ménbéréhé tidew dob lawayo mano, “Been i niy Nga guwe. Toow fo kégédawa ku brab tintu késuwata ku.”

¹ Tidew béno, i Rémogor i Tuluse fénanangguvitén i Jesuse mangéy dob gonone énda i étew de bati, inok i odoroy de saitan féndawét Satanas gétengkada noy Jesuse rémigo tete. ² Atin amun diyo i Jesuse, énda ménamaén bé rugay i ménfote folo gétérésangan. Mélaw toow fo ménlayaf. ³ Atin énggumah i Satanase dob Beene brab ménbéréh mano, “Amuk Beemey Nga i Tuluse, féwaléyém amaén i de batéw ni.”

⁴ Endob séménumbul i Jesuse mano, “Wén i Ménsulate Kébéréh i Tuluse mano, ‘Békén amaén saén i funay étewe méuyag. Yamula kailangay étewey kéluhanay kékéréh i Tuluse.’”

⁵ Tidew béno, nuwit Satanasey Jesuse mangéy dob Jerusalem brab nuwitén mangéy dob toowe fo gérotor bérungoy lawi i Tuluse. ⁶ Atin ménsebéréh man bé Jesuse mano, “Amuk Beemey Nga i Tuluse, antéfor go. Non wén i Ménsulate Kébéréh i Tuluse mano, ‘Suguéy Tulusey de télaki no démiyaga Beem. Brab sakémé ro Beem inok énda émfali go bé de batéw, fiyon i de sékéyém.’”

⁷ Tidew béno, séménumbul i Jesuse mano, “Endob wén soy Ménsulate Kébéréh i Tuluse mano, ‘Kago téngkadén i Kadnane Tulusém rémigo bé kétaya muwe rigonén.’”

⁸ Tidew béno, nuwit Satanasey Jesuse mangéy dob uruk i gératore fo tuduk. Brab fénténgténgén dey kéluhanay de ingéd dob duniyae ni brab kéluhanay de ungangéy de ni.

⁹ Atin ménbéréh man i Satanase mano, “Buluk lingkuwédo mo begén brab féngadafé mo begén, iray gu Beem i kéluhanay de ni.”

¹⁰ Endob séménumbul i Jesuse mano, “Féraréy gon Satanas! Enda féngadafé ku beem non wén i Ménsulate Kébéréh i Tuluse mano, ‘Lingkuwédo go saén dob adafay Kadnane Tulusém. Been saén i féngadafé muwe.’”

¹¹ Tidew béno, i Satanasey téngakén i Jesuse. Atin énggumah i de télaki brab ténalima roy Jesuse.

Féngganay Jesusey galbék ne

¹² Atin i Herode fénférésu noy Juan Bautistawe. Atin amun énggelingoo Jesuse, ménule mangéy Galilea. ¹³ Atin téménara saén dob ingéd ne Nasaret, brab ménangéy bati dob Kafernaum dob féedoror i dogote Galilea, fingé dob ingéde Sabuton brab Neftali. ¹⁴ Ménrigoy ni inok métuman i kébéréh i sénarigoy Tuluse féndawét Isaias mano, ¹⁵ “I de étew bati dob de ingéd Sabuton brab Neftali, brab fingé dob dogote, brab dob difar i wayége Jordan, brab de étew békén Judio bati dob Galilea, ¹⁶ fiyon fo ké i de ni étew maak bati ro dob délémone non békén ro do méngintulus, gérito ro dakél solo. Atin fiyon fo ké maak kélungonon dob berowe non mégilak ro bé kéléhue, rémendaw i soloe ni dob berowe.”

¹⁷ Atin tidew bé no gai, féngganaya Jesusey kéuret ne mano, “Fatut gésénule gom bé de sala gom brab tagak gom i de tete adat gom, non gédétén i gaiwe féguléwoy Tulusey de étewén.”

Ténawag Jesusey de fot gétew fatatugés

¹⁸ Wén i no sébaan fuweh, ménagéw i Jesuse dob doror i dogote Galilea. Atin bé lala ne magéw, énggito noy ruwowe gétew lagéy sétiman idéng. I dawét ruwe Andres brab Simon (féndawét so Pedro). Nibér roy biyala ruwe dob dogote non fatatugés ro. ¹⁹ Ménbéréh i Jesuse dob berowe mano, “Enggomén, odor gom Begén, atin kagomén séméléd sédo. Tidew béléewe ni, fésélédé ku begom étew, inok modor ro so Begén.” ²⁰ Sonom bénou, téngak roy de biyala ro atin ménodor ro bé Jesuse. ²¹ Bé lala ruwe magéw, énggito Jesusey de ségiyo lagéy do sétiman idéng. I dawét ruwe Santiago brab Juan. Diyo ro dob awang ruwe beroy boh ruwe féndawét Sebedeo. Fégimué roy biyala ruwe. Atin ténabar Jesuse bero. ²² Atin sonom bénou, téngak roy boh ruwe dob awange atin ménodor ro bé Jesuse.

Nuwa Jesusey de médo do étew

²³ Atin i Jesuse séménugud mangéy dob kéluhanay de ingéd dob Galilea. Atin téménoro dob de lawi féngadafan kay de Judio, brab nureténi Fiyowe Uret fantag bé kéguléw i Tuluse, brab nuwaén i de démeruun do séségiyo-giyo do déruun. ²⁴ Atin, ménslalag i bantuga Jesuse dob kéluhanay de ingéd dob Siria. Mélaw i de étew nuwit ro mangéy dob Beeney kéluhanay de démeruun bé séségiyo-giye do déruun, do démawét, brab do rénahuko saitan, brab do rebengén, brab do kimoyén. Atin énggféadi-adino Jesuse bero kéluhanan. ²⁵ Atin toow fo médooy de étew ménfuray bé Jesuse, do tidew Galilea, brab do tidew Dekapolis (i atag i Dekapolis “Do Folo Ingéd”), brab tidew Jerusalem, brab tidew Judea, brab tidew dob difar i wayége Jordan.

5

I urete dob burure

¹ Atin i Jesuse amun énggito noy médoowe do étew ménlimud, ménénagé mangéy dob burure, atin ménstar diyo. Atin i de kuyugén ménfégédét ro dob Beene. ² Atin ténero Jesuse bero mano, ³ “Moror i de étew gétiga ro énda gérigo ro fiyo saliyu ké tabangay Tuluse bero, non féguléwoy Tuluse bero. ⁴ Moror i de étew rémuung, non i Tuluse féfiyoné noy de fédew ro. ⁵ Moror i de térfifantad étew non gédoté roy ati fénasad i Tuluse. ⁶ Moror i de étew toow fo méuyot ro rémigo bé kétayay Tuluse, non tabangay Tuluse de bero inok gérígono ro. ⁷ Moror i de étew mégédaw bé de ségiyo étew, non mégédaw i Tuluse bero. ⁸ Moror i de étew malinis i de fédew ro dob adafay Tuluse, non gito roy Tuluse moso. ⁹ Moror i de étew do gémélé bé de sétiboh étew, non fédawétén ro do nga i Tuluse. ¹⁰ Moror i de étew ferasayén sabaf bé kétintuy adat ruwe dob adafay Tuluse, non féguléwoy Tuluse bero.

11 “Moror gom ké féngirasén gom brab férasayén gom brab béréhon gom tete bé kéluhanay tugie sabaf bé kéunur gome Begén. **12** Féguyaya gom bé no gai gégumah, non i baras gome toow fo médo diyo dob lawayo. Non loo so bé niy kéférasay i de étew bé do énggétah do sénarigoy Tuluse muret bé kékérhé ne.”

13 Atin féntaus Jesusey kétoro ne mano, “I begome ségiléw gom bé timuse lénawék dob amaéne inok fiyoy nonom ne. Non sabaf bé begome, waléy fiyoy de étew dob duniyae ni. Endob amuk mékédan i kétasik i timuse, éndaén géséfule i kétasik ne. Endaén i lagaén, brab fatut ibérén brab gédáay de étew ké témaro.

14 “Atin i begome ségiléw gom bé soloe réméndaw dob délémone ni duniya. Loo so bé ni, i ingéde féntindég dob uruk i burure, énda móbunéyén. **15** Atin énda i ségétew tumumon solo inok ahuré no dob fénléngkébé kuréng. Yamula fédioyé no dob fédongone de inok réméndaw dob lawie. Mélaw gégitoy kéluhanay de étew diyo. **16** Mélaw ségiléw gom bé de solo, non fatut rigo gom i fiyowe sénga tékélid, inok i de étew gito ro, atin dayéwé ro mélaw i Abay gome Tuluse dob lawayo.”

Fantag bé kitabé

17 Atin féntaus Jesusey kétoro ne mano, “Kagom fégitungén de ké ménangéyu dini inok kédané kuy kitabé niray Moisese taloo noy de kétoro i de sénarigoy Tuluse muret bé kékérhé ne. Non énda ménangéyu dini inok kédané ku, yamula ménangéyu dini inok tumané ku. **18** Béréhé ku begom i toowe, taman énda méalfé i duniyae ni brab lawayo, énda so mékédan i kitabe, fiyon kloh saén, taman énda métuman i kéluhanane. **19** Mélaw i étewe mémélis bé kitabé fiyon fo ké toow saén fo kloh sugu, brab toroé no so dob de étew i éndaén kailanga no odoron, toow na fo gérifantad bé de étew féguléwoy Tuluse. Endob i étewe modor bé kitabé brab toroé noy de étew bé

fatut odoro ro, toow fo gérotor bé de étew féguléwoy Tuluse. **20** Béréhé ku begom, amuk énda toow na fo métintuy de rigoné kom bé de rigonéy de Fariseo brab de témore bá kitabe, énda géahur gom dob káféguléw i Tuluse.”

Fantag bé kékérite

21 Atin féntaus Jesusey kétoro ne mano, “Enggélingoo kom i ténero i de katufua kom maro, ‘Kagom méméléhu, atin i méméléhue fatut mékukum.’ **22** Endob toroé ku begom béléewe ni; I étewe mékérít bá dumo nuwe, mékukum. Atin amuk wén i étew béréhé no, ‘Léngléngén go’ dob dumo nuwe, fatut mékukum dob adafay de káfédéwan. Atin amuk wén i étew émbéréh dob dumo nuwe mano, ‘Dufang go’, médaït mangéy dob gonoy aféye dob uleono emferno. **23** Mélaw amuk diyo go dob féngadafane témulak dob Tuluse, atin gétédémo mo wén i rénigo mo sala dob dumo muwe, **24** tagakém nay tulaké muwe dob adafay ahayane tulakan, atin fagayas go angéy dob dumo muwe brab séfiyo gom inok éndaén tete i de fédew gom. Tidéw béo, séfule go brab irayém i tulak me dob Tuluse.

25 “Atin buluk wén i dumo mo sébanil beem, atin uwité no beem dob kémukume inok sétiyawan gom, buluk diyo gom séna dob de aguwon, béréh go fiyo inok géséfagayun gom, brab éndaén mélaw kailanga kom i, mangéye dob adafay kémukume. Non amuk Enda, atéé no beem dob kémukume, brab i kémukume atéé no beem dob de sundalo, brab i de sundalo férisoné ro beem. **26** Atin béréhé kuy toowe, énda moso géésut go tidéw dob férisonone taman énda gébayada moy kéluhanay késalaa muwe.”

Fantag bé kélamfae

27 Atin féntaus Jesusey kétoro ne mano, “Enggélingoo kom i kétoroé mano, ‘Kago sétyan saliyu bá bawag me.’ **28** Endob toroé ku begom béléewe, bá fiyon fo ké ténéngténg i lagéye saén i libune brab mingar

de sétayan, énggésalaén non maak léménamfa i fédew ne.²⁹ Mélaw amuk i funa muwe mésala i moto muwe fingé kuwonon, lésitém atin ibérém. Non mas na fiyo ké kulang i réfa i lowoh me ké ganaf i lowoh me atin géangéy go dob uleono emferno.³⁰ Atin amuk i funa muwe mésala i kuwonone kémérém, kélengém, atin ibérém. Non mas na fiyo ké kulang i réfa i lowoh me ké ganaf i lowoh me atin géangéy go dob uleono emferno.”

Fantag bé késégélake

³¹ Atin fentaus Jesusey kétoro ne mano, “Wén soy kétoroe mano, ‘I lagéye gémélak bé bawag ne fatut iraya no bé sulate émbéréh ménségélak ron.’³² Endob toroé ku begom béléewe, amuk wén i ségetéw lagéy gélaké noy bawag ne éndob énda mon bigaén i nilibun, toow fo ménsala i nan lagéy. Non been i ménfélamfae bé libuno no ké mawag man ségiyo lagéy. Atin énggélamfa soy lagéye ménawag bé libune gélak loo bé nan.”

³³ Atin fentaus Jesusey kétoro ne mano, “Enggélungoo kom soy ténero i katufua tome mano, ‘Amuk sémafa go dob Kadnane, tintu kailanga mo tumanén i safá me ni.’³⁴ Endob toroé ku begom béléewe, amuk rémigo gom fasad, kagom sémafa. Kagom fégésafa i lawayo non been i niy saray Tuluse.³⁵ Atin kagom fégésafa i duniyae ni non been i niy ténaa nuwe bé de sékéyén. Atin kagom fégésafa i ingéde Jerusalem non been i niy gonoy barakatane Datu bati moso.³⁶ Atin kagom sémafa ké makom, ‘Méléhuu na dob ni.’ Non énda géféluteo kom taloo no géfélita kom i fiyon suwaréw bé de buk gom.³⁷ Béréh gom saén, ‘Hoo’, taloo no ‘Enda.’ Amuk umana kom i nan bé de safá, tidew dob Satanasey nan kóbéréh gom.”

Fantag bé késulie

³⁸ Atin fentaus Jesusey kétoro ne mano, “Enggélungoo kom i kétoroe mano, ‘Fatut séfésuliém i motowe bé motowe, brab i kiféne bé kiféne’

³⁹ Endob toroé ku begom béléewe ni, kagom sulion i étewe réménigo tete dob begome. Ufama, amuk wén i téménamfiling bé fiféy me fingé kuwonon, fédayaém de témamfiling so bé ségbalae de.⁴⁰ Atin amuk wén i muwit beem dob adafay kémukume inok gédoté noy kégal me irayém soy kamisita muwe de.⁴¹ Atin amuk wén i sundalo fégésé no beem mobo bé de uwitén bé ségékilomitrowe saén, oboém taman ruwo gékilomitro.⁴² Atin iraya moy mongote dob beeme. Atin amuk wén i méuyot mélét dob beeme, fééléto mo.”

Fantag bé késébanile

⁴³ Atin fentaus Jesusey kétoro ne mano, “Atin énggélungoo kom i kétoroe mano, ‘Fégédaw go bé de dumo mo séloyuk, atin férarék go bé de sébanil beem.’⁴⁴ Endob ay niy kagéne kétoro begom: Fégédaw gom bé de sébanil begom. Atin dasala kom i de émférasay begom,⁴⁵ inok waléy gom do nga i Abay gome Tulus dob lawayo. Non i Tuluse féréndawé no soy térsange dob de fiyo étew loo so dob de tete étew. Atin féranaay Tuluse soy de étew rémigo fiyo loo soy de étew rémigo tete.⁴⁶ Amuk mégédaw gom saén bé de étew mégédaw begom, énda i baras i Tuluse de begom. I de lémiful kémubra buwis rigoné roy nan, fiyon fo ké énda fiyo ro étew.⁴⁷ Atin amuk sébéréh gom saén bé de dumo gom séloyuk, énda i funa kom médayew. Non fiyon i de békén méngintulus rigoné roy nan.⁴⁸ I Abay gome Tulus dob lawayo, rigoné no saén i fiyowe. Brab i begome fatut so rigoné kom saén i fiyowe.”

6

¹ Atin fentaus Jesusey kétoro ne mano, “Kagom rémigo bé fiyowe émfésuwat bé Tuluse dob téngaangay de étew saén inok dayewéy de étew begom. Non amuk rigoné kom i ni, énda i ségiyo baras gédoté kom tidew dob Abay gome Tulus dob lawayo.

2 “Mélaw amuk tabanga moy ségétéwe méskinan bé kéiraya muwe de limus, kago fégétuwan de dob de ségiyo loo bé de étew do ubo-ubo saén méngintulus rigoné ro dob de lawi féngadafan brab dob de aguwon. Rigoné roy ni inok dayewéy de étew bero. Mélaw bérhéé ku begom i toowe, énggédot roy kéluhanay de baras ro, atin énda i baras i Tuluse de bero. **3-4** Endob amuk tabanga moy ségétéwe méskinan, kago fégítotoy kérigo muwe de inok fiyon i de dumo mo do séloyuk énda gétiga ro de. Endob fiyon fo ké énda gitoy de étew de, i Abay me Tulus gito noy rénigo muwe brab Been i marasane beem.”

Fantag bé kédasale

5 Atin féntaus Jesusey kétoro ne mano, “Buluk démasal gom, kagom iringén i de étew do ubo-ubo saén méngintulus. Méuyot ro témidégi démasal dob de lawi féngadafan brab dob de aguwon inok gitoy de étew bero. Bérhéé ku begom i toowe, i gédoté ruwe saén bé nan rigoné roy kédawéy i de dumo étew bero. **6** Endob buluk démasal gom, angéy gom dob sibéy gome brab fintu gom, atin dasal gom dob Tuluse Abay gom dob lawayo énda gito gom de. Amuk rigoné kom i ni, gédoté kom i baras gome tidéw dob Tuluse Abay gom. Beene saén i gégitowé bé kéluhanay rigoné kome.

7 “Buluk démasal gom, kagom dulién i kédasale énda i atagén. I de étew énda gétiga roy Tuluse rigoné roy ni non maro ké fégélingoéy Tuluse bero ké mérugay i kédasal ruwe.

8 Kagom iringén bero. Enda kailanga kom i mérugaye kédasal non gégitay Abay gomey kailanga kome bé énda séna nongot gom de.

9 “Ay niy ufamawe de. Dasal gom loo bé ni, ‘Abay gey dob lawayo, kéluhanay étewe damén féngadafé ro Beem. **10** Féguléwo mo damén i kéluhanay de étew inok i kétaya muwe mérigo dob fantade ni loo so bé mérigowé dob lawayo. **11** Irayan gey

bé amaé keye bé ni gai. **12** Fésagada mo begey bé de sala gey loo so bé kékésagad geye bé de énggésala begey. **13** Kago fidayaén begey météngkad rémigo sala. Brab diyaga mo begey bé Satanase.’

14 “Buluk fésagada kom i de étew réménigo tete dob begome, i Boh gome dob lawayo fésagada no so begom. **15** Endob buluk énda fésagada kom i de ménsala dob begome, i Abay gome Tulus énda so fésagada no begom.”

16 Atin féntaus Jesusey kétoro ne mano, “Atin amuk fuwasa gom inok tintu méngintulus, kagom féélumén i falas gome loo bé rigonéy de ubo-ubo saén méngintulus. Féélumé roy falas ruwe inok fégétiga ro bé de étew bé mélawayaf ro non fuwasa ro. Bérhéé ku begom i toowe, énda i ségiyo baras gédoté ro saliyu bé kédawéy i de étew. **17** Endob amuk fuwasa gom, furauf gom brab suwat gom, **18** inok i de ségiyo étew, énda gétiga ro de ké fuwasa gom. Atin mélaw i Abay gome Tulus énda gitono, Been saén i gégitowé bé rigoné kome, atin barasa no begom.

19 “Atin kagom mitong kurta brab do languntaman dob duniiae ni, non mébinasa ro. Non i de tamuk dob duniiae ni keke i de ifés taloo no tangisén taloo no fénakawén non géahur i de ménakaw dob de lawi gom.

20 Endob fatut itong gom i de baras gom dob lawayo non énda i ifés de méminasa taloo no tangisén taloo no fénakawén. **21** Non i gonoy de tamuk gom, been soy gulaané kome.

22 “I motowe maak solo i lowohe. Buluk fiyyo moto muwe, maak géfekaya i kéluhanay lowoh me non gérito go. **23** Endob buluk ménsadil i de moto mo, maak délémon i lowoh me non énda gérito go. Mélaw buluk i solo me waléy délémon, toow fo délémon mon.

24 “Enda i sugu-suguén fakay galbéko no séréngan i ruwowe gétew amu. Non amuk mágédaw bé ségétéwe de, mérarék bé ségétéwe de. Taloo no

odoro noy kétayay ségétéwe de, brab siyawé noy ségétéwe de. Mélaw énda fakay gom modor bé Tuluse amuk fégitungé kom saén i kurtae.

²⁵ “Mélaw bérhéhé ku begom, kagom émbuku fantag bé kéuyag gome, bé ati amaé kome look inémé kome, taloo noy lowoh gome, bé ati kégale kome. Non wén nay labi na fo mélaga bé amaéne funa kom méuyag, brab wén nay labi na mélaga bé kégale kay de lowoh gom. ²⁶ Fégitung gom i de kloh manok. Enda mohok ro taloo no kémétew ro, brab énda mitong ro amaén dob de kiwot. Endob i Abay gome Tulus féamaé no so bero. Atin mas gom na balilaga bé de kloh manok! ²⁷ Enda i étew gégétaah bé umul ne bé kébuku ne, fiyon ségéuras saén.

²⁸ “Enda soy funa kom émbuku fantag bé kégale. Fégitung gom i de flores. Méruk ro fiyon fo ké énda gémalbék ro taloo no rémigo ro do kégal ro. ²⁹ Endob bérhéhé ku begom, fiyon i Solomone toow fo kawasa datu, énda i kégalén loo bé de fiyo do falasén do flores. ³⁰ Endob buluk loo bé nan i kéfégégal i Tuluse bé de kéeroon méuyag ro saén singkow, atin bé démoe ibérén ro brab inohén, békén ba fékégalé no so begom? Toow fo kloh i kéfeginugut gome.

³¹ “Mélaw kagom émbuku bé amaé kome brab inémé kome brab kégale kome. ³² Non i de étew énda méngrintulus ro, been i nan i fégitungé ruwe taman émbuku ro. Endob i Abay gome Tulus gétiga noy kéluhanay kailanga kome. ³³ Mélaw kagom émbuku. Yamula fatut kétaya kom ké méguléw i Tuluse dob begome brab kétaya kom rémigo bé métintuwe, atin mélaw irayay Tuluse begom bé kéluhanay de étingayén kailanga kom. ³⁴ Atin mélaw kagom émbuku béléewe ni fantag bé ati mérigowe démo, fégitung gom fo ké gégumahén. Kagomén umanan i kékérégéna kome béléewe bé kébukue fantag bé démoe.”

Kagom kémukum

¹ Atin féntaus Jesusey kétoro ne mano, “Kagom kukumén i de étew, inok i Tuluse énda so kukumé no begom. ² Non i kékukum gome bé de ségiyo étew, iringéy Tuluse so ké kukumé no begom. Atin i kérigo gome bé de ségiyo étew, rigonéy Tuluse so dob begome. ³ Sedek gito moy klohe sala i dumo muwe, éndob énda gito moy kaame sala toow na fo dakél? ⁴ Atin bérhéhé mo dob dumo muwe mamo, ‘Adih, téréno moy nan salaém.’ Endob wén i kaame sala toow na fo dakél. ⁵ Fédayéw-dayéw go, éndob békén go fiyo étew. Téréno mo na métah i kaame sala toow na fo dakél, inok gétabanga moy dumo muwe émfétérén bé kaane kloh sala.

⁶ “Atin kagom iray i méméfuwe dob de itu. Non amuk rigoné kom, kekeé ro saén begom. Atin kagom iray i balilagae fégonoén perlas dob de babuy. Non amuk rigoné kom, daa ro saén. Mélaw kagom téromo bé Fiyowe Uret dob de étew mika mégélingo.”

Ongot gom dob Tuluse

⁷ Atin féntaus Jesusey kétoro ne mano, “Ongot gom dob Tuluse atin irayén begom. Séléd gom, atin gito gom. Tawag gom dob bengawane, atin i fintue ungkaén inok géahur gom.

⁸ Non i kéluhanay de mongot dob Tuluse, gédoté ro. Atin i kéluhanay de séméléd, gito ro. Atin i kéluhanay de témauwag dob bengawane, géahur ro.

⁹ Ufama, ségétéw go boh, atin i nga me mongot fan, énda iraya mo de batéw. ¹⁰ Taloo no mongot sédo, énda iraya mo de ulé. ¹¹ Fiyon fo ké tete gom étew, gétiga kom soy miraye bé étingayéne fiyo dob de nga gom. Labi nay Tuluse toow fo fiyo, gétiga noy miraye fiyo na dob begome. Beeney Boh gome dob lawayo, brab irayén i de fiyo do étingayén dob de étew mongot dob Beene.

¹² “Buluy kétaya kome rigonéy de étew dob begome, rigo gom so dob berowe. Non been i atag i kéluhanay de sugu dob kitabé niray Moisese

brab de kétoro i de sénarigoy Tuluse muret bé kékérén ne.”

I imératé bengawan

13 Atin fentaus Jesusey kétoro ne mano, “Ahur gom dob mérata bengawan mangey dob lawayo. Non toow fo buka i bengawane mangéy dob uleone emferno atin médooy de étew muntul de non magad i kagéw ruwe diyo. **14** Endob i mérata bengawan mangéy dob umule magufusa, mérégén i kékuntule de. Mélaw énda médooy étewé géuntul de.

15 “Atin ingat gom inok énda géunur gom bé de ubo-ubo sénarigoy Tuluse muret bé kékérén ne. Non fiyon fo ké ubo-ubo ro mégédaw maak do ménorom ayam, tintu tete i adat ruwe brab binasané ro begom. Non i toowe, ségiléw ro bé de mérayar do binatang. **16-18** Endob gélolo gom bero sabaf bé de rigoné ro. Ufama, énda i fiyo kayéw mégonok bé tete onok, taloo no tete kayéw mégonok bé fiyowe onok. I sulu-suluwe énda mégonokén bé manggæ. Brab i kayéwe suwaran énda mégonokén saging. I fiyowe kayéw mégonok saén fiyo, atin i tete kayéw mégonok saén tete. **19** Atin i kayéwe énda mégonokén fiyo, tuwongén brab ibérén dob aféye inok inohén. **20** Mélaw gélolo gom i de ubo-ubo sénarigoy Tuluse sabaf bé de tete rigoné ro.

21 “Enda kéluhanay de étew témawag Begén maro, ‘Kadnan, o Kadnan,’ géangéy ro dob lawayo. Endob i de étew rémigo bé kétayay Abay guwe Tulus, bero saén i géangéy dob lawayo.

22 Bé gaiwe géumah i kékukum i Tuluse, médooy de étew émbéréh dob Begéne maro, ‘Kadnan, o Kadnan, nuret gey i kékérén i Tuluse nusar gey i dawéti me. Atin nusar gey soy dawéti me fégédédél bé de saitan tidew dob de étew rénahuko ro, brab rénigo gey i de médooy do mékégaif dob dawéti me.’

23 Endob bérhéku bero maku, ‘Enda gélolo gu begom. Férayu gom dob Begéne. Begom i de étew do rémigo tete.’

24 “Bérhéku begom i fantage bé de mégélingo bé kékérén guwe brab odoro ro. Berowey ségiléwe bé ségétewé métiletdé réménigo lawi brab féntindégén i de liléyén dob émbagére batéw. **25** Amun mérégés i ranae brab énggégumah i dunuke brab énggóbela diyo i émbagére réfuruh, énda méntuwongén non féntindég dob rotor i batéwe.

26 “Endob i étewé énggélingo bé de kékérén gu éndob énda odoro no de, ségiléw bé dufange étew féntindégén i lawi ne dob faréke saén. **27** Mélaw amun ménrégés i ranae brab énggumah i dunuke brab énggóbela diyo i émbagére réfuruh, méntuwong brab toow fo ménbinasa.”

28 Amun énggilid i Jesuse téromo bé de ni, ménggaif i de médooy do étew bé kétoro ne. **29** Non békén ségiléw i kétoro ne bé de maistéroy kitab i de Judio. Non énda saén téneroén i kékégitung i de ségiyo étew. Yamula téneroén i kaane kékégitung.

8

Nuwa Jesusey ségétewé fémuteén

1 Tidew béo, léménudug i Jesuse tidew dob burure ni. Atin ménfuray i de médooy do étew. **2** Tidew béo, wén i ségétewé étew fémuteén ménangéy dob Beene brab léméningkuwéd dob adafa nuwe. Atin ménbérén i fémuteéne ni étew mano, “Kadnan, buluk méuyot go, géféadi-adino mo begén.”

3 Atin i Jesuse bénérén i kémér ne brab kénuwahén, brab ménbérén mano, “Méuyotu. Adi-adi go.” Sonom béo, ménkédan i fémute ne brab ménadi-adi. **4** Atin bénréh Jesuse dob beene bé békén ureté no dob de ségiyo étew, brab sénuguén mano, “Ay go dob fadie inok féténgténgém ménadi-adi gon. Tidew béo, tulak go, loo bé ménbérénhe dob kitabé tidew dob Moisese inok gétigay kéluhanay de étew ménadi-adi gon.”

Nuwa Jesusey sugu-suguéy sundalowe

⁵ Amun énggumah i Jesuse dob ingéde Kafernaum, wén i ségétewe Romano kafitay de sundalo ménangéy dob Beene. Atin ménongot tabang dob Jesuse mano, ⁶ “Maistéro, wén i sugu-sugué kuwe toow fo fasang démeruun béni. Diyo dob lawi guwe énda gélékutohén.”

⁷ Atin ménbéréh i Jesuse mano, “Na, mangéy diyaan atin uwaé ku.”

⁸ Endob bang i kafitane, “Kagonén damén mangéy dob lawi guwe. Non toow go fo gérotor étew atin mélaw énda médaitu témanggaf Beem dob lawi guwe. Endob toow go fo barakatan, mélaw béréhém saén i sugu me mamo, ‘Adi-adi gon,’ atin gétiga kuy waléy adi-adiy sugu-sugué kuwe. ⁹ Gétiga kuy ni non wén i mas gérotor sundalo mémanduon begén. Brab wén soy do sundalo fémanduo ku. Atin buluk béréhé ku dob ségétewe de, ‘Angéy go diyoo,’ mangéy diyo. Brab buluk maku dob ségétewe de, ‘Enggon,’ témingé. Brab buluk béréhé ku dob sugu-sugué kuwe, ‘Rigo moy ni,’ rigoné no.”

¹⁰ Amun énggelingoo Jesusey ni, ménngaif de. Atin ménbéréh dob de étew furay dob Beene mano, “Béréhé ku begom i toowe, fiyon foy de Judio, énda i ségétew énggito gu loo bé ni kéfengintoowén étew. ¹¹ Béréhé ku begom, bé gaiwe gégumah méguléw i Tuluse, médooy de étew gégumah tidéw dob kéluhanay sugud i duniyae, fiyon i de békén Judio. Atin i Tuluse féguléwo no bero beroy de katufua tom ro Abraham, Isak, brab Jakob. ¹² Endob wén i de Judio diyo ro so damén éndob kénda no bero mangéy dob délémone gonon dob liyuwe. Diyo ro kémérew brab kémigét i de kifé ro.” ¹³ Atin ménbéréh i Jesuse dob kafitane ni mano, “Ule gon, ménadi-adinén i sugu-sugué muwe loo bé kéunur me mérigo.”

Atin i sugu-sugué nuwe, ménadi-adi bé no so uras.

Nuwa Jesusey de médooy do étew

¹⁴ Tidéw béo, méntaus i Jesuse mangéy dob lawi Pedrowe. Diyo énggito noy térima Pedrowe libun démeruun gara-gara toow fo méduf. ¹⁵ Atin i Jesuse kénuwahén i kémér i libune ni. Atin sonom béo, ménkédan i kééduf ne brab ménadi-adi. Atin méntek dénuwoto no bero.

¹⁶ Amun mélédén i térsange, i de étew nuwit roy de médooy do sénaitanan ménangéy dob Jesuse. Ménbéréh saén i Jesuse atin fénféraréyén i de saitan. Atin nuwa Jesusey kéluhanay de démeruun diyo. ¹⁷ Rénigo noy ni inok tumané noy kékéréh i sénarigoy Tuluse muret bé kékéréh ne féndawét Isaias mano, “Uwaé noy de déruu tom, atin kédané noy de tete tom.”

¹⁸ Atin amun énggito Jesusey de médooy étew géliwét de, sénuguén i de kuyugén mifar dob dogote. ¹⁹ Tidéw béo, wén i témoree bé kitabé ménfégédét dob Jesuse brab ménbéréh mano, “Maistéro, modoru Beem fiyon udenén ayo mo.”

²⁰ Endob ménbéréh i Jesuse mano, “I de kufés, wén i tosong ahuro ro. Brab i de kloh manok, wén i salag ro. Endob i Nga i Kéilawane, sani Begéne, énda i gono ku témérén taloo no fidong. Mélaw toow go fo kérégénan amuk modor go Begén.”

²¹ Atin wén i ségétewe kuyugén ménbéréh dob Jesuse mano, “Maistéro, modoru Beem. Endob tungkasém na begén métah mangéy lémbéng bé boh guwe.”

²² Endob séménumbul i Jesuse mano, “Félébéngém bé de étew énda munur Begén i de ménléhu ro. Endob i beeme, odor go Begén.”

Féntéré Jesusey défuke

²³ Tidéw béo, i Jesuse brab de kuyugén ménada ro awang mifar dob dogote. ²⁴ Atin téménékow méngeumah i émbagére défuk. Atin séndamfa-damfaay de bagél i awange, taman gédét mééléd. Endob i Jesuse énggfidong. ²⁵ Atin ménangéy i de kuyugén dob Beene, brab nulég ro

maro, "Kadnan, tabangén gey! Gédét tom méléhu!"

²⁶ Séménumbul i Jesuse mano, "Sedek mégilak gom? Toow fo kloh i kéunur gome." Tidéw béno, téménindég i Jesuse brab ménbéréh dob réfuruhe brab dob de bagél mano, "Térén gom!" Sonom béno, téménréni défuke brab méntinanék i dogote.

²⁷ Ménggaifi kéluhanay de kuyug Jesus. Atin ménsebéréh-béréh ro maro, "Ati keeyén i Jesuse ni? Fiyon i réfuruhe brab de bagél modor ro bé sugu ne."

Dénédél Jesusey de saitan

²⁸ Amun énggumah i ro Jesuse dob difar i dogote dob ingéde Gerasa, bénalak i de ruwo gétew lagéy rénahukoy de saitan. Bati ro dob de takub do léléng atin toow ro fo émbaraw. Mélaw énda i do étew gétara diyo. ²⁹ Atin ménkes ro maro, "Nga i Tuluse, ati rigoné muwe dob begeye? Aw ménangéy go ba dini inok kukumé mo begey fiyon fo ké énda séna gégumah i fatute gai?"

³⁰ Enda mérayuén dob no gonon, diyo i médoowe do babuy tétabtab.

³¹ Atin nongot i de saitan dob Jesuse maro, "Amuk féraréyé mo begey, féahurém begey dob do babuy diyo."

³² Atin bang Jesuse, "Agéw gom." Mélaw ménsut i de saitan tidéw dob do étew no brab ménahur ro dob de babuy ni. Sonom béno, i kéluhanay de babuy ni, ménraréy ro mangéy dob fingase brab ménantéfor ro mangéy dob dogote atin ménléné ro.

³³ Atin i de étew témalima bé de babuy ni amun énggito roy ni ménrigo, ménsegéta ro mangéy dob ingéde brab nuret roy kéluhanay de rénigo Jesus brab ati ménrigowé dob de lagéy sénaitanan bé gétahe. ³⁴ Mélaw ménangéy diyo i kéluhanay de étew dob ingéde ni inok malak bé Jesuse. Atin amun énggito ro, nongot roy Jesuse ké tékédan dob no gono ro.

9

Nuwa Jesusey ségétéwe kimoyén

¹ Tidéw béno, ménda i Jesuse dob awange atin ménsefule mifar dob

dogote brab ménule mangéy dob ingéd ne. ² Diyo, énggumah i de étew ménuwit bé ségétéwe kimoyén ténanggung ro mangéy dob Jesuse. Amun énggito Jesusey kéfengintoow ruwe, ménbéréh dob ni étew kimoyén mano, "Adih, kago émbuku! I de salaém ménfésagadén."

³ Tidéw béno, wén i de témoiro bé kitabé ménsebéréh ro dob de fédéw ro maro, "Embéréh mémurka i ni étew, non réfengé noy Tuluse."

⁴ Edob i Jesuse gésobuto noy de itunga ro. Mélaw ménbéréh mano, "Sedek tete i kéfégitung gome loo bé nan? ⁵ Toow na fo mélému ké béréhén, 'I de salaém ménfésagadén.' Non énda gito no ké wén i barakat gu de rémigo. Endob toow fo mérégén ké béréhén. 'Tindég go brab agéw go.' Non giton ké wén i barakat gu de rémigo.

⁶ Endob fefégétiga ku begom i fantage bé Nga i Kéilawane, sani Begéne. Wén i barakat gu brab kuwagib gu dob duniiae ni émfésagad bé de sala." Tidéw béno, bénréhén dob ni kimoyén mano. "Tindég go brab ule go unwitém mule i iroo muwa nan."

⁷ Sonom béno, téménindég i kimoyéne ni brab ménagéw mule. ⁸ I de médo do ménlimud do étew diyo, amun énggito roy ni, ménngilak ro, atin dénayéw roy Tuluse non nirayén dob Jesusey kuwagibé émfésagad bé de sala.

I kétawage bé Mateowe

⁹ Tidéw béno, méntékédan i Jesuse dob no gonon. Atin i lala ne magéw, énggito noy ségétéwe étew kémubra buwis fénawé Mateo, ménstar dob de kubranan buwis. Atin ménbéréh i Jesuse mano, "Odor go Begén." Atin téménindég i Mateowe brab ménodor de.

¹⁰ Tidéw béno, i Jesuse beroy de kuyugén ménama ro dob lawi Mateowe séréngan bé de médo do kémubra buwis brab de ségiyo so do tete étew.

¹¹ Atin amun énggitoy de Fariseoy ni, ménenginsa ro dob de kuyug Jesus maro, "Sedek ménslawék i Maistéro

gome mama bé de kémubra buwis
brab de ségiyo tete étew?”

¹² Endob i Jesuse énggelingoo no
brab ménbéréd mano, “I de fiyo
kégelowoho no, énda kailanga roy
muwae, éndob kailangay de wén
déruu no. ¹³ Enda ménangéyu dini
inok tabaré kuy de métintu étew,
éndob ménangéyu dini inok tabaré
kuy de wén salaén inok gésénule ro.
Basa gom brab tantu gom fégitung i ni
Ménsulat Kébéréh i Tuluse mano, ‘Mas
méuyotu de ké ségédaw gom bé kétulak
gome.’”

Fantag bé kfufuwasawe

¹⁴ Tidéw béno, wén i de kuyug Juan
Bautista ménangéyu ro dob Jesuse brab
ménenginsa ro maro, “I begeye, sénga
téklid fuwasa gey. Loo so bé de
Fariseo. Sedek énda fuwasay de kaam
kuyug?”

¹⁵ Atin sénumbulo Jesuse bero
mano, “Ufama, i de kana dob uyote
énda waléy tete i de fédew ro taman
énda tékédan i témérimeawe lagéy.
Endob amuk gégumah i gaiwe ké
édotén néni témérimeawe lagéy dob
berowe, been nay no fuwasa ro.
Ségiléw so bé de kagén kuyug, non
amuk diniwu séna, énda fuwasa ro.”

¹⁶ Tidéw béno, nuret Jesusey
sébaane binuwaya fantag bé sébidanay
mantuwe kétoroén brab tafaye kétoro
i de Judio. Ménbéréd mano, “Enda
i étew usaré noy mantuwe safut
fégétabungén bé tafaye kégal. Non
amuk rigoné no, kéménkén i man-
tuwe safut, atin méfendet i tafaye
cégal, atin minut gétimal i rédet ne.

¹⁷ Brab énda i étew mahur bé man-
tuwe arak dob tafaye ahuron arak
réningo bé kulit i ayame. Non amuk
rigoné no, mébétus i mantuwe arak
dob tafaye ahuron brab mébinasa
brab méitis i mantuwe arak. Yamula
fatut i mantuwe arak ahurén dob
mantuwe kulit fédéngon de, atin
métong kéluhanan.”

Nuwa Jesusey ruwowe gétew lan- gafén

¹⁸ I lala Jesuse émbéréd séna,
énggumah i ségétéwe odoroy de

Judio, brab ménlingkuwéd dob adafa
Jesuse brab ménbéréd mano, “I nga
guwe libun mantu séna ménléhu.
Endob amuk modor go begén brab
angéyé mo gamakén, gétiga kuy
tébule.” ¹⁹ Mélaw téménindég i Jesuse
brab ménodor bé ni lagéy. Ménodor
soy de kuyugén.

²⁰⁻²¹ Amun ménagéw ro, ménggéta
i ségétéwe libun bero. I ni libun
foloén bra ruwo gébélantuwa i kéranas
i adat ne. Amun ménfuray bé Jesuse,
ménggitung mano, “Amuk gékuwaha
ku saén i kégal ne, adi-adiwu.” Mélaw
ménangéy dob ségang Jesuse brab
kénuwahén i kégal ne.

²² Tidéw béno, séménling i Jesuse
brab amun énggito noy ni libun,
sénbérédho no mano, “Di, kago émbuku.
I kéféngintoow Mey funa muwe
ménadi-adi.” Sonom beno, i ni libun
ménadi-adi.

²³ Tidéw béno, méntaus i Jesuse
mangéy dob lawi i odoroy de Judio
ni. Amun énggumah, énggito noy de
médoo do étew diyo. Rémuung ro brab
selekén ro brab émbaat ro fo.

²⁴ Ménbéréd i Jesuse mano,
“Tékédan gom! Enda ménléhu i ngae
ni. Fidong saén.” Tidéw béno, sénbayat
roy Jesuse bé bénréh ne.

²⁵ Amun ménusut i de étew dob lawie,
ménahur i Jesuse dob sibéy i ngae ni
libun, brab génamakén dob kémér ne.
Bé béno so, méntek i ngae ni. ²⁶ Tidéw
béno, i urete fantag bé ni rénigo Je-
suse ménlegéb dob kéluhanay de ingéd
diyo.

Nuwa Jesusey ruwowe gétew lan- gafén

²⁷ Tidéw béno, méntékedan i Jesuse
tidéw diyo. Atin bé lala ne magéw,
ménfuray i ruwowe gétew lagéy do
langafén. Ménkes ro maro, “Séfu Datu
Dabid, fégédaw go begey!”

²⁸ Atin amun ménahur i Jesuse dob
lawie, ménfégédét i de langafén ni.
Atin fénénginsaa Jesuse bero mano,
“Aw munur gom ba ké géuwaa ku be-
gom?”

Atin séménumbul ro maro, “Hoo Maistéro, munur gey.”

²⁹ Tidéw béno, i Jesuse kénuwahén i de moto ro brab ménbérhé mano, “Mérigo dob begome loo bé kéunur gome de.” ³⁰ Atin sonom béno, énggítito ro. Atin ménégét i kékérhé Jesuse de bero mano, “Kagom ureténi ni dob de étew.”

³¹ Endob amun ménagéw ro, nuret roy ni rénigo Jesuse. Atin mélaw ménfélalag i bantuga nuwe dob kéluhanay de ingéd diyo.

Nuwa Jesusey ségétéwe mow

³² Lala ruwe magéw i de ni ruwo gétew do éndaén do langafén ro, énggumah i de étew nuwit ro dob Jesusey ségétéwe mow sabaf bé saitane rénahuko no. ³³ Atin dénédél Jesusey saitane ni. Atin sonom béno, énggérhé i lagéye ni non éndaén mowén. Atin i kéluhanay de étew diyo ménngaif ro, brab ménbérhé ro maro, “Enda séna énggítito gey bé mékégaife loo bé ni dob ingéd tome ni Israel.”

³⁴ Endob ménbérhé i de Fariseo maro, “I funa nuwe gédédél do saitan non wén i barakatén tidéw dob Satanase sani odoroy de saitan.”

³⁵ Tidéw béno, ménagéw i Jesuse mangéy sémugud dob kéluhanay de ingéd diyo. Atin téménoro dob de lawi féngadafan kay de Judio, brab nuretén i Fiyowe Uret fantag bé kékéguléw i Tuluse bé de étewén. Atin nuwaén soy de médo do étew bé ségiyo-giyowe do déruun. ³⁶ Atin amun énggito noy de médo do étew ménlimud dob Beene, ménuray i na nuwe bero, non ménbuku ro brab kailanga roy tabange. Maak do bili-bili énda i mifat bero. ³⁷ Mélaw ménbérhé dob de kuyugén mano, “I de ni do médo do étew méuyot munur dob Begéne, ségiléw ro bé bukae safad fatutén kétewén. Endob kloh saén i kémétéwe de, sani de témozo bero munur. ³⁸ Mélaw dasal gom dob Tuluse inok umana noy de gémalbék témabangan betom kémétéw.”

10

I de folo bra ruwo gétew kuyug Jesuse

¹ Atin i Jesuse ténawagén i de folo bra ruwo gétew kuyugén mangéy dob Beene. Atin niraya no bero barakat inok gédédél ro do saitan brab géuwa roy de kéluhanay de ségiyo-giyo do déruun. ² Ay niy de dawét i de Apostol, sani de sénugu: Simon (féndawétén so Pedro), brab Andres dumo no sétiman idéng, Santiago brab Juan sani de nga Sebedeo, ³ brab Filipi, brab Bartolome, brab Tomas, brab Mateo sani kémubrawe buwis, brab Santiago nga Alfeo, brab Tadeo, ⁴ brab Simon ségétew toow fo gulaané noy ingéd ne, brab Judas Iskariot sani ménfékéfoe bé Jesuse.

Sénugu Jesusey de folo bra ruwo gétew kuyugén

⁵ Atin sénugu Jesusey de ni folo bra ruwo gétew kuyugén mano, “Kagom mangéy dob de ingéd i de békén Judio taloo no dob de ingéd sakuf i dakélé ingéd Samaria. ⁶ Yamula, agéw gom mangéy dob de étew dob Israel non ségiléw ro bé de méntadin do bili-bili. ⁷ Agéw gom brab uret gom makom, ‘Gédétén i gaiwe féguléwoy Tulusey de étewén.’ ⁸ Atin uwa gom i de démuun, tébule gom i de ménléhu, féadi-adi gom i de fémuteén, féféraréy gom i de saitan. Atin kagom fébayadén i de étew, non énda fébayadé ku begom bé kéraya kuwe begom. ⁹ Atin kagom muwit kurta, fiyon bélowan look filak, taloo no do kloh kurta. ¹⁰ Atin kagom muwit réban, taloo no tugé, taloo no lékasa kom kégal look sinilas. Non i de tabanga kom fatut tabanga ro so begom bé atiy kailanga kome.

¹¹ “Atin amuk géumah gom dob sébaane ingéd, séléd gom i ségétéwe méuyot témayakuf begom. Atin bati gom diyo taman tékédan gom tidéw dob no ingéd. ¹² Atin buluk mahur gom dob lawie, bérhé gom bé féfiyonéy Tulusey de étew bati dob ni lawi, ¹³ Buluk i de étew dob nan lawi tayakufé ro begom, féfiyonéy Tuluse

bero. Endob buluk énda tayakufé ro begom, énda so féfiyonéy Tuluse bero. ¹⁴ Atin buluk géumah gom dob sébaane ingéd énda tayakufé ro begom taloo no énda fégélingoé ro begom, tékédan gom diyo. Atin tag-tag gom i de bubuk sébuwan dob de sékéy gom inok fégétiga kom bero bé kukuméy Tuluse bero. ¹⁵ Béréhé ku begom i toowe, bé gaiwe kémukum i Tuluse, toow na fo géttimal i kékukum ne bero bé de tete étew ménbati dob de ingéd Sodom brab Gomorah bé gétahe.

¹⁶ “Fégélingo gom, féuwit gu begom maak do bili-bili mangéy dob kérara i de itu talun. Mélaw ingat gom brab fatut rigo gom saén i fiyowe. ¹⁷ Ingat gom non wén i de étew kémfo begom brab uwité ro begom mangéy dob adafay kémukume. Atin badasé ro begom dob de lawi féngadafan kay de Judio. ¹⁸ Atin uwité ro begom dob adafay de méguléw begom brab de datu inok kukumé ro begom sabaf begom i do kuyug gu. Endob been i niy gaiwe uret gom i Fiyowe Uret dob berowe brab dob de békén Judio. ¹⁹ Atin amuk kéfoé ro begom brab kukumé ro begom, kagom émbuku fantag bé atiy béréhé kome bero look ati kékérén gome. Non bé no gai, iray begom i fatute kékérén fégésumbul gom bero. ²⁰ Non i kékérén békén tidéw dob itunga kome, yamula i Rémogor i Abay gome Tulus i émfébérén begom.

²¹ “Atin bé no gai, wén i de étew atéé roy de dumo ro sétiman idéng inok féléhuén. Loo soy rigonéy de abay dob de nga ro. Atin wén soy de nga waléy sébanil bé de lukés ro brab géféléhu ro. ²² Atin i kéluhanay de étew mérarék ro begom sabaf bé kéunur gome Begén. Endob ati fidaydaye munur taman dob tam-fadane, méfukas ro. ²³ Atin amuk férasayé ro begom dob sébaane ingéd, féraréy gom mangéy dob ségiyowe ingéd. Béréhé ku begom i toowe, énda séna géfégilido kom i galbék gome dob kéluhanay de ingéd dob Israel, séfuleun

mangéy dini, sani Nga i Kéilawane.

²⁴ I méganade békén gérotor na bé témoroe de. Atin i sugu-suguéne békén gérotor na bé amu ne. ²⁵ Mélaw i méganade fatut moror ké iringé noy témoroe de. Atin i sugu-suguéne fatut moror ké iringé noy amu ne. Atin amuk i uléw i ségekuréngé féndawét do étew Beelsebul sani Satanase, labi na fo tete i fédawét ruwe bé kuréngó nuwe. Mélaw amuk féngiras i de étew Begén, toow na fo géttimal i kékéngiras ruwe begom.

²⁶ “Mélaw kagom mégilak bé étewe. I kéluhanay rigonéy de étew do méntéléb, mébukeh so moso. Brab i kéluhanay de méntéléb, mébukeh so moso. Brab i kéluhanay de ménbunéy, giton so moso. ²⁷ Atin i béréhé kuwe ni dob begome saén, fatut béréhé gom so dob de médo do étew. Atin i ségurawé kuwe dob begome, fatut toro gom dob de médo do étew. ²⁸ Atin kagom mégilak bé de géféléhu bé lowoh gome, éndob énda géféléhu roy rémogor gome. Yamula fatut gom mégilak bé Tuluse non wén i barakatén méminasa bé de lowoh gom loo soy de rémogor gom dob uleono emferno. ²⁹ Ufama, i de kloh manok toow fo mélému yéféléhu bero dob fadiyane. Endob énda i sébaan mélawu bero dob fantade ké énda fidayaéy Abay tome de Tulus. ³⁰⁻³¹ Atin i begome mas gom na balilaga bé de kloh manok. Mélaw kagom mégilak, non i Tuluse tunganulé no begom. I Tuluse géttiga no fiyon i kédooy de buk gom dob de uléw gom.

³² “Atin ati murete fantag bé kéunur ne Begén dob de étew, ureté ku soy fantage bé kéunur ne dob Abay guwe Tulus dob lawayo. ³³ Endob ati démirunge bé kéunur ne Begén dob adafay de étew, dirungé ku so moso i kéunur ne dob adafay Abay guwe Tulus.

³⁴ “Atin kagom fégitungén de ké ménangéy dini inok kédané kuy késétihe dob duniyae ni. Békén. Yamula ménangéy dini inok sétiboh i de étew. Non i de étew munur Begén

brab de étew énda munur Begén waléy ro sébanil. ³⁵ Non ménangéyu dini inok fésébanilé kuy de boh brab de nga ro lagéy. Loo so bé de idéng brab de nga ro libun. Loo soy de libun bé de térima ro libun. ³⁶ Atin mélaw i toowe na fo sébanil i de étew, beroy de dumo no ségékuréng.

³⁷ “Atin i étewe mas nay kéimu ne bé de lukésén bé Begéne, énda médaítén waléy kuyug gu. Atin i étewe mas nay kéimu ne bé de ngaén bé Begéne, énda so médaítén waléy kuyug gu. ³⁸ Atin fiyon atiy étewe énda furayén Begén bé kénéfdayday ne bé de mérégén fiyon fo ké féléhuén dob kruse, énda médaítén waléy kuyug gu. ³⁹ Atin i étewe méuyot émféraru bé umul ne dob duniyae ni, méléhu. Endob i étewe méléhu bé kénéfuray ne Begén, gédoté noy umule magufusa.

⁴⁰ “I étewe témayakuf begom, tayakufé no so Begén. Atin i étewe témayakuf Begén, tayakufé no soy Tuluse ménfieuwit Begén. ⁴¹ Atin i étewe témayakuf bé sénarigoy Tuluse sabaf sénugu i Tuluse, gédoté noy barase ségiléw bé nan sarigon. Atin i étewe témayakuf bé métintuwe étew sabaf bé kétintuy adat ne, gédoté noy barase ségiléw bé nan métintu étew. ⁴² Atin béréhé ku begom i toowe, i étewe miray fiyon ségétabu saén mélégénéy wayég dob ségétéwe gérifantad kuyug gu sabaf bé been i kuyug gu, tintu gédoté noy barase.”

11

I kénéfinsa Juan Bautistawe

¹ Amun énggilid i kétoro Jesuse bé de folo bra ruwo gétew kuyugén, ménagéw mangéy dob de ingéd diyo inok téromo brab muret diyo.

² Bé beno do gai, ménférisu Juan Bautistawe. Atin amun énggelingoo noy fantage bé de rigoné Kristo, sénuguén i de dumo bé de kuyugén mangéy dob Beene inok ménginsa. ³ Atin fénénginsaa ro maro, “Beeme

bay no bénréh Juane gégumah ongot-ongoté key, taloo no ongot-ongot gey na ségiyo?”

⁴ Atin séménumbul i Jesuse mano, “Séfule gom mangéy dob Juane brab uret gom i de énggitó gom do rénigo gu brab de énggelingoo kom. ⁵ I de langafén énggégito ro, brab i de fikat énggéagéw ro, brab i de fémuteén ménadi-adi ro, brab i de bokongén énggégélingo ro, brab i de ménléhu mémentébule ro. Atin ureté kuy Fiyowe Uret dob de méskinan. ⁶ Atin béréh gom so dob Juane bé toow fo moror i étewe énda ruwo-ruwoy kénéfingintoow ne Begén.”

⁷ Amun ménsfule i de kuyug Juan, ménbéréh i Jesuse dob de médoó do étew fantag bé Juane mano, “Ati nangéy gome téngtengéng dob gonone énda i étew de batí? Ségétew maak kéroon faniréy réfurehe? Békén, non i kéunur Juane énda méfélukén loo bé kéroone. ⁸ Aw ménangéy gom diyo inok angéyé kom téngtengéng i ségétéwe lagéy toow fo fiyoy kégal ne? Békén, non i de étew kémégal ro fiyo batí ro dob de toow fo fiyo lawi kay de datu. ⁹ Ati nangéy gome téngtengéng? Ségétew étew sénarigoy Tuluse muret? Hoo, éndob béréhé ku begom, i Juane békén saén sénarigon muret bé kékéréh i Tuluse. ¹⁰ Non been i Juane niy fantage bé Ménsulate Kékéréh i Tuluse mano, ‘Sugué kuy sugu-sugué kuwe métah Beem. Been i témafaye bé kégumah me métah Beem.’”

¹¹ Atin fénautas Jesusey kékéréh ne mano, “Béréhé ku begom i toowe, énda i toow na fo gérator bé Juane bé kéluhanay de étew ménúmah. Endob dob gaiwe féguléwoy Tulusey de étewén, i kéluhanay de térfantad étew sakuf i Tuluse, toow ro na fo gérator bé Juane béléewe ni. ¹²⁻¹³ Bé énda séna téromo i Juane de, i Moisese brab de sénarigoy Tuluse nuret ron i fantage bé kénéfugéw i Tuluse bé de étewén. Atin tidéw dob gaiwe fénénginsa Juaney kékuret ne taman so béléewe ni, médooy de étew sétiboh inok fégésé ro mahur de. ¹⁴ Wén

i kékéréh i de énggétah do sénarigoy Tuluse muret bé gégumah Eliase inok ureté noy kégumah Kristowe. Atin Juan i téménumané bé nan kékéréh. Fiyo ké géunur gom bé ni. ¹⁵ Mélaw fétuntay gom fo toow amuk méuyot gom de ké gésobuto kom i de ni.

¹⁶ “Ati féségiléwo kuwe bé de étew méuyag bénii? Ségiléw gom bé de nga ménasar dob fadiyane brab mika ro mégérémét. Tabar i de dumo ro bero maro, ¹⁷ ‘I begeye ménsegagung gey, éndob énda ménsayaw gom. Brab léménninggéng gey linggéng ménléhuon, éndob énda kéménrew gom.’ ¹⁸ Non ménangéy diniy Juan Bautistawe ménfuwasa brab énda méninémén arak. Brab bénréh i de étew sénaitanan kun. ¹⁹ Endob i Nga i Kéilawane, sani Begéne, ménangéyu dini, brab mamau atin minému. Brab ménbéréh i de étew, ‘Ay niy ségetéwe étew arumén mama brab miném arak, brab wén i dumo no do lémiful kémubra buwis brab do tete étew.’ Endob i kégétigay Tuluse, énggiton toow fo métintu sabaf bé de rénigo no.”

²⁰ Tidéw bénii, dénowoy Jesusey de étew dob de ingéd gono no réménigo médooy do mékégaif. Non énda fo téenagak roy de sala ro fiyon fo ké énggitoy de mékégaif rénigo Jesuse.

²¹ Ménbéréh mano, “Mékégédaw-gédaw gom do étew bati dob Korasin, brab de begom do bati dob Betsaida. Buluk i de mékégaif rénigo gu do begome ménriko so dob de ingéd Tiro brab Sidon, ménrugayén damén i de étew diyo kéménégal do saku brab rénigono ro awéw i de lowoh ro inok fégétiga roy énggésénule ro bé de sala ro. ²² Mélaw bérhéh ku begom, dob gaiwe kémukum i Tuluse, toow na fo gétimal i kékukum ne begom bé kékukum ne bé de étew dob Tiro brab Sidon. ²³ Brab begome do étew bati dob Kafernaum, méuyot gom téfégérotor taman dob lawayo. Endob ibérén gom mangéy dob uleono emferno. Amuk i de mékégaif rénigo gu do begome ménriko so dob ingéde Sodom, énda damén ménbinasa no

non énggésénule ro damén. ²⁴ Bérhéh ku begom, dob gaiwe kémukum i Tuluse, toow na fo gétimal i kékukum ne begom bé kékukum ne bé de étew dob Sodom.”

²⁵ Bé bénii, i Jesuse déménasal mano, “Abay, Kadnay lawayo brab fantade, fésalamata ku Beem non féngétiga moy toowe dob de étew énda i féngganad ro, brab bénunéyém i toowe dob de étew do métileédtéd brab énggégéyanad. ²⁶ Hoo Abay, ménrigoy ni non kaam kétayan brab késuwatan.”

²⁷ Tidéw bénii, ménbéréh man i Jesuse dob de étew mano, “Sénarig i Abay guwey kéluhanane dob Begéne. Enda i gétigan bé atiy Ngae saliyu bé Abaye. Brab énda i gétigan bé atiy Abaye saliyu bé Ngae, brab fiyon atiy kétayay Ngae fégétiga no de.

²⁸ “I kéluhana kome do lugotén gémalbék bé kéfukas gome bé de lowoh gom dob de sala gom, angéy gom dob Begéne atin fétéréné ku begom non fukasé ku begom. ²⁹ Unur gom Begén brab iring gom Begén. Non térifantadu mégédaw begom brab fétéréné ku begom. ³⁰ Non i de sugu gu begom toow fo magad, brab énda mérégén i de férigo gu begom.”

12

Fantag bé gaiy kétéréné

¹ Enda mérugayén tidéw bénii, wén i no sébaan fuweh gai kétérén, i Jesuse brab de kuyugén téménara ro dob de médooy do faréy. Atin mélayah i de kuyugén, mélaw ménidot ro do faréy atin ménama ro. ² Endob i de Fariseo diyo, amun énggitoy de rénigo ro, ménbéréh ro dob Jesuse maro, “Téngténgém! I de kuyugém fénlis roy kitab tome fantag bé gaiwe kétérén.”

³ Séménumbul i Jesuse mano, “Aw énda ba énggébasana kom i rénigo Datu Dabide? Wén i no gai toow fo ménlayaf beroy de sundalo no. ⁴ Atin ménahur ro dob lawi i Tuluse brab namaén i fane niray dob Tuluse beroy de sundalo no. Rénigo noy ni fiyon fo ké dob kitabe, fadi saén i fakaye

mama bé ni fan. ⁵ Aw énda séna énggébasana kom i ni dob kitabé niray Moisese? Sénulatén bé fatut gémalbék i de fadi dob lawi i Tuluse sénga gai kétérén. Endob békén sala i ni. ⁶ Béréhé ku begom, wén i ségétewe étew dini mas na balilaga bé lawi i Tuluse. ⁷ Wén i Ménsulate Kébéréh i Tuluse mano, ‘Mas na méuyotu de ké ségédaw gom bé kétulak gome.’ Amuk énggésobuto kom i ni, énda damén kukumé kom i de étew énda i sala ro. ⁸ Non i Nga i Kéilawane, sani Begéne, wén i kuwagib gu fantag bé ati fakaye dob gaiy kétéréne.”

Nuwa Jesusey ségétewe étew ménsadil i kémér ne

⁹ Tidéw béno, méntékédan i Jesuse diyo atin ménagéw mangéy dob sébaane lawi féngadafan kay de Judio. ¹⁰ Atin diyo soy ségétewe lagéy ménsadil i ségébalae bé kémér ne. Atin diyo soy de étew méuyot témo bér Jesuse rémigo bé éndae fakay dob kitabe. Mélaw ménénginsa ro dob Jesuse maro, “Aw fakay ba dob kitab tomey muwae ké gai kétérén?”

¹¹ Atin séménumbul i Jesuse mano, “Ufama, buluk i bili-bili gome mélawu dob ménaléme kalut bé gai kétéréne, ati rigoné kome? Békén ba abangé kom inok géésut fiyon fo ké gai kétérén? ¹² Atin i étewe toow na fo balilaga bé bili-biliwe! Mélaw fakay dob kitab tomey tétabange fiyon fo ké gai kétérén.” ¹³ Tidéw béno, ménbéréh i Jesuse dob lagéye ni ménsadil i kémér ne mano, “Bétérém i kémér me.”

Atin béléterén i kémér ne, atin sonom béno ménadi-adi loo bé ségébalae de. ¹⁴ Tidéw béno, i de Fariseo ménsut ro, atin ménseuret-uret ro bé ati kéféléhu ruwe bé Jesuse.

¹⁵ Atin énggétiga Jesusey de rigoné ro, mélaw méntékédan diyo. Atin ménfuray dob Beeney de médooy do étew. Atin nuwaén i kéluhanay de démeruun bero. ¹⁶ Endob sénuguén bero bé békén ureté roy fantage bé Beene dob de ségiyo étew, ¹⁷ inok métuman i fénbéréh i Tuluse bé sénarigo nuwe muret féndawéti Isaias

mano, ¹⁸ “Beeney sugu-sugué kuwe fénémili gu. Toow fo kégédawa ku brab késuwata ku. Fédiyoé kuy Rémogor guwe dob Beene, atin ureté noy fantage bé kékukum guwe dob kéluhanay de étew. ¹⁹ Enda séédélén taloo no mégeng ké émbéréh, atin énda métanugén ké émbéréh dob de aguwon. ²⁰ Enda ikaa noy de étew do maak fénréku férébong taloo no lémat-lémat solo. Yamula tabanga no bero. Atin fédidayday taman géfétabana noy kétintuwe. ²¹ Atin médooy de étew dob séngae ingéd sémarig dob Beene.” Been i bénréh Isaiase.

Dénédél Jesusey saitane

²² Tidéw béno, wén i de étew nuwit ro dob Jesusey ségétewe langafén brab mow sabaf bé rénahukoy saitane. Atin nuwa Jesuse inok gérito brab gébéréh. ²³ Atin i kéluhanay de étew ménggaif ro brab ménfénginsa-ningsa ro maro, “Aw Been keeyén i séfu Datu Dabide, sani Kristowe ongot-ongoté tom?”

²⁴ Endob i de Fariseo, amun énggelingoo roy kékéréh i de étew ni, ménbéréh ro maro, “Beelsebul, sani Satanase, odoroy de saitan, i ménirayane de barakat inok gédédél bé de saitan.”

²⁵ Endob énggétiga Jesusey de itunga ro, mélaw ménbéréh dob berowe mano, “Ufama, amuk i de étew dob sébaane ingéd énda géséfagayun ro brab sétiboh ro, mébinasay nan ingéd. Taloo no i ségékuréngé étew dob sébaane lawi énda so géséfagayun ro brab sékérít ro, éndaén séko sétifon ro. ²⁶ Mélaw buluk i Satanase démédél bé saitane, mésébaad ro brab énda so gétindég i fangangatura nuwe. ²⁷ Bénréh guy ni non béréhé kom i démédélu saitan bé barakat i Satanase. Atin i fégédédél i de kuyug gom de, énda usaré roy barakat i Satanase. Mélaw fégítøy de kuyug gom békén ka Satanas i barakat guwe. ²⁸ Endob démédélu saitan bé barakat i Rémogor i Tuluse. Atin mélaw énggiton énggégumah dob

begomey gaiwe méguléw i Tuluse dob de étewén."

²⁹ Tidéw béno, fénggétiga Jesuse bero bé toow na fo barakatan i Beene bé Satanase mano, "Ufama, i Satanase ségiléw bé ségétewe émbagér étew mantay bé lawi ne. Enda i ségétew étew géahur dob lawi i émbagére ni étew atin tulisé noy tamuk ne taman énda na géikéto no de na métah. Tidéw béno, gétuliso noy kéluhanay tamuk ne.

³⁰ "I éndae modor Begén, sébanil Begén. Brab i éndae tétabangan Begén, alangé no Begén. ³¹ Mélaw bérhéku begom, i kéluhanay sala i de étew brab de tete kékérhé ro, gáfesagadan. Endob i émbérhéhe tete fantag bé Rémogor i Tuluse, énda gáfesagada no. ³² I émbérhéhe tete fantag bé Nga i Kéilawane, sani Begéne, émfésagadan. Endob i émbérhéhe tete fantag bé Rémogor i Tuluse, énda émfésagada no bé de ni gai taloo no dob de gai gégumah moso."

³³ Atin ménbérhé man i Jesuse mano, "Ufama, i fiyowe kayéw mégonok bé fiyowe onok, atin i tetee kayéw mégonok bé tetee onok. I de séségiyo-giyo do kayéw gélolon ro dob onok ruwe. ³⁴ I de begom maak do ulé gom. Enda gékérhé gom fiyo non toow gom fo tete. Non ati diyoe dob de fédéw gom, been soy nan i bérhéhé de ba gom. ³⁵ I métintuwe étew rémigo fiyo, non i diyoe dob fédéw ne fiyo. Atin i tetee étew rémigo tete non i diyoe dob fédéw ne tete.

³⁶ "Atin bérhéku begom, dob gaiwe kémukum i Tuluse, i séngae étew mékukum sabaf bé de kékérhéen énda i lantékén. ³⁷ Non i de kékérhé gom, been i nan i fégékukume begom. Amuk i kékérhé gome fiyo, énda mékukum gom. Endob amuk tete, mékukum gom."

³⁸ Tidéw béno, wén i de Fariseo brab do témoiro bé kitabé ménbérhéh dob Jesuse maro, "Maistéro, méuyot gey de ké gito gey Beem rémigo mékégaif."

³⁹ Atin ménbérhéh i Jesuse dob berowe mano, "I begome do étew

méuyag béléewe ni, toow gom fo do tete brab békén gom méngintulus. Mongot gom sébaan mékégaif. Endob énda i féteng-téng de begom saliyu bé mékégaife loo bé ménrigowe dob Jonase, sani énggétahe sénarigoy Tuluse. ⁴⁰ Non i Jonase, ménbati téléc gétérésangan dob sur i toowe fo dakél sédo. Atin loo bé nan i Nga i Kéilawane, sani Begéne, batiu moso téléc gétérésangan dob bukag i fantade. ⁴¹ Atin dob gaiwe kémukum i Tuluse, i de énggétah do étew dob Ninibé témindég ro témoiro begom do étew méuyag béri. Non ménunur ro brab énggésénule ro bé uret Jonase. Endob béléewe ni, wén i mas na gérotor bé Jonase ay ni. Gido loo énda gésénule gom. ⁴² Atin dob gaiwe kémukum i Tuluse, témindég i baiwe tidéw dob ingéde Seba, brab téboé no begom. Non séménugud tidéw dob mérayue inok fégélingoé noy kégétigay Datue Solomon. Endob béléewe ni wén i ségétewe mas na gérotor bé Solomone ay ni."

⁴³ Ménbérhéh man i Jesuse mano, "Buluk i saitané mésut tidéw dob étewé rénahuko no, sémuugud dob tikare gonon séméléd téréno no. Endob buluk énda i gito no téréno no, ⁴⁴ émbérhéh mano, 'Séfuleu dob étewé sungu gono ku téragak gu.' Tidéw béno, séfule brab gito noy tafaye ténidéwo no malinis brab métintu nén, non énda i saitan bati diyo. ⁴⁵ Tidéw man béno, mésut brab muwit fitew gétew mas na tete saitan dumo no mahur dob no étew brab bati ro diyo. Mélaw i no étew toow na fo kékasangan bé énggétahe goho no. Loo so bé nan i mérigowe dob de tete étew méuyag béri."

⁴⁶ I lala Jesuse émbérhéh séna dob de étew, énggumah i idéng ne brab de tuwaréyén lagéy. Atin téminindég ro dob liyuwe brab nongot ro ké géségito ro de. ⁴⁷ Mélaw wén i ménbérhéh dob Jesuse mano, "I idéng me brab do tuwaréyém diyo ro dob liyuwe. Méuyot ro géségito Beem."

⁴⁸ Sémenumbul i Jesuse mano,

“Bérhéé ku begom atiy idéng guwe brab do tuwaréy gu.” ⁴⁹ Tidéw béno, ténénduén i de kuyugén brab ménbéréh mano, “Ay niy maake idéng gu brab do tuwaréy gu.” ⁵⁰ Non i kéluhanay étewe rigoné roy kétayay Abay guwe Tulus, beroy maake idéng gu brab do tuwaréy gu.”

13

I binuwayaé fantag bé sémabuge

¹ Dob béno so gai, méntékédan i Jesuse tidéw dob lawie ni, brab ménangéy dob dogote atin ménasar dob dénsaane. ² Atin toow fo médooy étewe ménlimud géliwét de. Atin non médooy ro, ménada i Jesuse dob awange ménasar diyo bé lala i de étew diyo dob dénsaane. ³ Atin ténero Jesuse bero bé médoowe kétoro fén-agéw dob de binuwaya. Ménbéréh mano, “Wén i ségétéwe ménangéy sémabug bé béne ne. ⁴ Atin amun sémanabug, i dumoy de béneén ménbigodoy dob doror i aguwone. Atin énggumah i de kloh manok nama ro. ⁵ Atin i dumoy de béneén ménawér dob fantade médooy de batéw de, éndob kloh saén i fantade de. Atin magad téménunoh i de béne non énda ménalém i fantade de. ⁶ Endob amun sémbang i téresange, ménlaay i de nohokén brab ménléhu, non énda ménalém i darir ruwe. ⁷ Atin i dumoy de béneén ménawér dob fantade brab dob de duwaléy suwar énda séna témunoh ro. Ménruk mélaw i de suwar séréngan bé de nohok, atin ménléhu i de nohok non lénimfung i de suwar. ⁸ Endob i dumoy de béneén ménawér dob fiyowe fantad. Atin i de ni nohok méngonok ro médooy taman téléc folo takéf, ném folo takéf, brab mératu takéf i séngae sébaan béne.” ⁹ Atin féntaus Jesusey kékéréh ne mano, “Fégitung gom i fantage bé ni bénréh gu begom amuk ménuyot gom de kékésobuto kom.”

¹⁰ Tidéw béno, ménangéy i de kuyugén dob Jesuse atin fénénginsaa ro maro, “Sedek minuwaya go dob de étew kékésureto mo bero?”

¹¹ Séménumbul i Jesuse mano, “Dob begome do kuyug gu, Tulus i émfégétigane begom fantag bé kékésuléw ne bé de étewén. Endob i de ni éntingayén ménbunéy, énda émfayagén dob de ségiyo étew. ¹² Non i étewe munur bé kétoro guwe, umana kuy kétoro guwe de inok gésobut ro médoo. Endob i étewe énda munurén bé kétoro guwe, dotén dob beeney kétoroe. ¹³ I de ségiyo étew, bérého ku saén bero fén-agéw dob de binuwaya, inok fiyon fo kékésungténg ro, énda gito ro de. Brab fiyon fo kékésunglingo ro, énda gélingoo ro de brab énda gésobuto ro de. ¹⁴ Mélaw méntuman i Ménsulate Kékéréh i Tuluse nuret i sénarigo nuwe féndawé Isaias mano, ‘Fiyon fo kékésantu ro mágelingo, énda gésobuto ro de, brab fiyon fo kékésantu ro téméngténg, énda gito ro de. ¹⁵ Non i de ni étew, ménwaléy métégas i de fédéw ro, brab méntéléb i de kéklingo ro, brab méntéléfédéng i de moto ro. Amuk énda, gérito ro brab géalingo ro brab gésobuto ro. Atin waléy ro damén do munur dob Begéne atin mélaw fukasé ku damén bero dob de sala ro.’”

¹⁶ Atin féntaus Jesusey kékéréh ne mano, “Endob i begome, fatut moror gom, non gégitoy de moto gom brab géalingo i de kéklingo gom. Atin mélaw gésobuto kom. ¹⁷ Non béréhé ku begom i toowe, médooy de sénarigo Tuluse muret bé kékéréh ne brab de ségiyo métintu étew toow fo ménuyot gérito bé énggito gome do rénigo gu. Brab ménuyot ro fo géalingo bé énggelingoo kome do kétoro gu. Endob énda énggito ro de brab énda énggelingoo ro de.

¹⁸ “Fégitung gom i atag i binuwayaé fantag bé sémabuge. I atag i ni béne, been i kékéréh i Tuluse. Atin i de ségiyo-giyo gékelasi do fantad ségiléw bé de ségiyo-giyo gékelasi do étew. Atin i sémabuge ureté noy kékéréh i Tuluse dob de ségiyo-giyo do étew.

¹⁹ “Wén i do étew énggelingoo roy fantage bé kékésuléw i Tuluse, éndob énda gésobuto ro de. Enggumah i Sa-

tanase inok kédané noy de kékéréh énggelingoo ro. Fénggiring ro bé de béne ménbigodoy dob doror i aguwone brab nama i de kloh manok. ²⁰ Atin ay ni atag i de béne ménawér dob fantade médooy de batéw de. Fénggiring ro bé de étew énggelingoo roy kékéréh i Tuluse brab ménoror ro de témayakuf. ²¹ Endob énda méégét i kéunur ruwe. Mélaw amuk kérégénan ro loo ké mérassay ro sabaf bé kékéréhe ni, énda taus ro modor de. Ségiléw ro bé de nohok énda i do darir ro, non mélaay ro ké méduf i térsange. ²² Atin ay niy atag i de béne ménawér dob de duwaléy suwar. Fénggiring ro bé de étew énggelingoo roy kékéréh i Tuluse éndob ténaagak ro non ménangga ro saén bé de kébuku ro bé de kéfaguyag ro brab kéuyot ruwe waléy kawasa dob ni duniya. Ségiléw ro bé de nohok ménléhu non ménéfuk ro bé de suwar. Enda mélaw ménggonok ro. ²³ Endob ay niy atag i de béne ménawér dob fiyowe fantad. Fénggiring ro bé de étew énggelingoo roy kékéréh i Tuluse brab énggésobuto ro. Atin munur ro de, mélaw rénigo roy kétayay Tuluse ségiléw bé kékégonok i de nohok dob fiyowe fantad médooy de onok ro. I de dumō étew rénigo roy fiyowe, i de dumō bero rénigo roy médoowe fiyo, brab i de dumō bero rénigo roy toowe fo médooy fiyo.”

I binuwayae fantag bé de kéroon

²⁴ Atin ménuret man i Jesuse sébaan binuwaya mano, “Ikéféguléw i Tuluse loo bé ni. Wén i ségétéwe lagéy wén i safadén. Atin sénabugén i fiyowe béneén diyo. ²⁵ Endob wén i étewé sébanil bé ni lagéy. Mélaw wén i no sébaan kélungonon, ménangéy i sébanile de étew dob safad ne bé lala i kéluhanay de étew fidong. Atin séménabug so do onok kéroon dob safade ni. Tidéw béno, ménraréy. ²⁶ Mélaw amun téménunoh i de nohok brab ménggonok téménunoh soy de kéroon séréngan bero. ²⁷ Atin i de sugu-suguéy ni lagéy ménangéy ro dob beene brab ménénginsa

ro maro, ‘Amu, aw békén ba séménabug go fiyo béne dob safad me? Sedek ménslawék i de kéroon de?’ ²⁸ Atin séménumbul i gefee de mano, ‘Rénigoy ségétéwe sébanil begén.’ Atin ménénginsa man i de sugu-suguén ni maro, ‘Aw méuyot go de ké angéyé key randutén i de kéroon de?’ ²⁹ Séménumbul i gefee de mano, ‘Kagom. Non amuk randuté kom i de kéroon de, géranduto kom soy de dumō bé de nohok faréy. ³⁰ Fédaya gomén méruk i de kéroon séréngan bé de faréy taman bé gaiy kékétéwe de. Tidéw béno, bérhéhé ku bé de kémétew de maku, Randut gom sunguy de kéroon. Tidéw béno, timu gom brab raga gom inok tuwégén dob aféye. Tidéw béno, kétew gom i faréye brab fédiyo gom dob kiwot guwe.’ ”

³¹ Atin ménuret man i Jesuse sébaan binuwaya mano, “Ségiléw i kékéguléw i Tuluse bé sébaane toow fo kloh béne, éndot i étewé brab nohokén dob safad ne. ³² Fiyon fo ké toow fo kloh béne, amun téménunoh brab ménruk, ménwaléy toow fo dakél kayéw bé kéluhanay de nohokén. Atin fiyon i de kloh manok sémalag ro dob de fongo no.”

³³ Atin ménuret man i Jesuse sébaan binuwaya mano, “Atin i kékéguléw i Tuluse ségiléw bé fégéfééruke fan. Endot i libune brab sénlawékén dob télewe géasad arinah taman ménruk i kéluhana nuwe.”

³⁴ I de ni, téménoro i Jesuse dob de ménslimud do étew fén-agéw dob de binuwaya. Enda i sébaan uret bénréhén bero ké békén fén-agéw dob binuwayae. ³⁵ Réningoy ni inok métuman i Ménsulate Kékéréh i Tuluse nuret i sénarigo nuwe mano, “Ureto kuy de étew dob de binuwaya. Atin bérhéhé ku beroy de ménbunéy tidéw féganay bé kélémbag i duniyae.”

³⁶ Tidéw béno, i Jesuse ténaagakén i de ménlimud ni do étew atin ménahur dob lawie. Tidéw béno, i de kuyugén ménfégédét ro dob Beene brab ménbérhéh ro maro, “Bérhéhém begey i atag i binuwayae fantag bé de kéroon dob safade.”

³⁷ Atin séménumbul i Jesuse mano, “I lagéye séménabug bé béne ne dob safad ne, been i Begéne, sani Nga i Kéilawane. ³⁸ Atin i safade, been i duniyae ni. Atin i fiyowe do béne, beroy de munur bé Tuluse brab fédayaé roy Tuluse méguléw bero. Atin i de kéeroon, beroy de békén méngintulus. Satanas i méguléwone bero. ³⁹ Atin i sébanile étew séménabug bé de kéeroon, been i Satanase. Atin i kékétewe, been i tamfaday duniyae ni. Atin i de kémétew de, beroy de télaki. ⁴⁰ I de kéeroon timuén brab tuwégén dob aféye. Ségiléw so bé niy mérigowé dob tamfaday duniyae ni. ⁴¹ I Nga i Kéilawane, sani Begéne, sugué kuy de télaki gu. Atin timué roy de tete étew brab de ménfésala bé de dumo ro. Atin féganané no bero tidéw dob de étew fédayaé roy Tuluse méguléwon bero. ⁴² Atin ibéré ro bero dob uleono emferno. Diyo kémérew ro brab kémigét i de kifé ro. ⁴³ Tidéw béno, i de métintu do étew rémendaw ro maak téresang dob kéféguléw i Abay ruwe Tulus. Fétuntay gom i ni ké méuyot gom de ké gésobuto kom.”

⁴⁴ Atin ménuret man i Jesuse do binuwaya mano, “I kéféguléw i Tuluse loo bé ni. Wén i do bélouwon ménrugayén ménbunéy lénébengé dob fantade. Atin wén i ségétewe étew énggégito de. Tidéw béno, lénébengé man. Atin toow fo moror, ménule brab fénbéléyén i kéluhanay languntama nuwe. Tidéw béno, ménsefule brab bénléyén i fantado no.”

⁴⁵ “Atin i kéféguléw i Tuluse loo bé ni. Wén i ségétewe étew démagang brab séméléd bé toowe fo balilaga perias. ⁴⁶ Amuk gérito sébaan perlas toow fo balilaga, ménagéw brab fébéléyén i kéluhanay languntama nuwe brab bélényé noy perlaso no.”

⁴⁷ “Atin i kéféguléw i Tuluse loo bé ni. Wén i fukéte lénawu dob bukag i dogote. Atin médooy de séségiyogiyo do sédo géahur de. ⁴⁸ Atin amuk ménféno, i de fatatugés bégéngé ro mangéy dob fédoror i dogote. Tidéw béno, mésar ro inok féganané roy de

sédo. Ahuré roy de fiyo sédo dob baskete ahuron de. Endob ibéré roy de tete sédo. ⁴⁹ Loo so bé niy mérigowé dob tamfaday duniyae. I de télaki angéyé ro féganané i de tete étew bé de métintu étew. ⁵⁰ Atin ibéré roy de tete étew dob emfernowe. Diyo ro kémérew brab kémigét i de kifé ro.”

⁵¹ Tidéw béno, ménénginsa i Jesuse dob de kuyugén mano, “Aw gésobuto kom i de ni bénréh gu?”

Atin séménumbul ro maro, “Hoo.”

⁵² Atin ménbéréh man i Jesuse mano, “Mélaw i séngae téromo bé Ménsulate Kébéréh i Tuluse, féganadé ro soy kétoro guwe fantag bé kéféguléw i Tuluse, gétoro bé tafaye brab mantuwe kétoro. Ségiléw mélaw bé ségétewe étew usaré noy tafaye brab mantuwe insodén.”

⁵³ Amun énggilid i Jesuse muret bé de ni binuwaya, méntékédan diyo. ⁵⁴ Atin ménule mangéy dob ingéd ne. Atin diyo témenoro dob lawie féngadafan kay de Judio. Atin i kéluhanay de énggégélingo bé kétoro ne toow ro fo ménggaif. Atin ménsefenginsa ro maro, “Ati tidéwoy kégétigay ni étew téromo? Ati tidéwoy barakat ne rémigo bé de mékégaif ni?”

⁵⁵ Aw békén ba, Been i Nga i fandaye rémigo lawi? Aw békén ba Maria i idéng ne? Atin békén ba Santiago brab Jose brab Simon brab Judas i de tuwaréyén? ⁵⁶ Békén ba i de libu no bati so dini? Tidéwoy kégétiga nuwe de, loo soy barakat ne?” ⁵⁷ Mélaw ménika ro de.

Mélaw ménbéréh i Jesuse dob berowe mano, “I sarigoy Tuluse muret bé kékéréh ne, basanan dob kéluhanay de gonon saliyu saén dob kaane ingéd brab dob de kaan do samung brab dob de kaan do étew sétifon lawi.” ⁵⁸ Atin énda réménigo no do médoó mékégaif diyo non énda méginugut ro de.

14

I kéléhu Juan Bautistawe

¹ Bé béno, i Herode, sani méguléwe dob Galilea, énggelingoo noy de rénigo Jesus. ² Atin ménbéréh i Herode dob de sarigo no mano, “Been keeyén i Juan Bautistawe méntébule. Been keeyén i funa nuwe wén i barakatén rémigo do mékégaif.”

³ Bénréhén i ni non fénkéfoén i Juane, brab fénikétén, brab fénahurén dob férисunone. Rénigo noy ni sabaf bé ibo ne féndawét Herodiyas lénamfaén tidew dob dumo nuwe sétiman idéng féndawét Filipi. ⁴ I Herode fénférisu noy Juane non dénowoy Juane mano, “Fénlisém i kitabé non énda damén fatut bawagé moy bawag i dumo muwe.” ⁵ Mélaw i Herode ménuyot méméléhu bé Juane, éndob ménggilak bé de Judio non kénarang roy Juane ségétew sénarigoy Tuluse muret.

⁶ Endob amun réménigo karagiya i Herode fégétédémo no bé kéumahne, ménsyaw i kénogo Herodiyase dob adafay de médo do étew diyo. Atin toow fo ménsuat i Herode de. ⁷ Mélaw fénasada noy ni kénogon bé irayén dey atiy kétaya nuwe ongoté no. Atin rénigo noy safae dob beene.

⁸ Atin fénbéréh i idéng i kénogone ni mano, “Uwit gom diniy uléw Juan Bautistawe dob biléwe, atin irayém begén.”

⁹ Tidew béno, i Datu Herode toow fo ménntete i fédew ne non mikä damén rémigo bé ni. Endob non bé fasad ne rénigo no dob adafay de kana no, sénuguén bé iray dob kénogone ni.

¹⁰ Mélaw fénkéléngén i uléw Juane dob férисunone. ¹¹ Atin wén i ménuyit bé uléw ne dob biléwe brab nirayén dob kénogone ni. Tidew béno, nuwitén dob idéng ne. ¹² Atin i de kuyug Juan nangéy roy bangkay ne brab lénébéng ro. Tidew béno, ménangéy ro dob Je-suse brab féngéti ro de.

Fénwaléy Jesuse médooy klohe amaén

¹³ Atin amun énggelingoo Jesusey ni uret fantag bé kéléhu Juane, ménékédan diyo brab ménda dob awange mangéy dob géfélébue gonon. Endob amun énggelingoo de étew i

ayo Jesuse, ménékédan ro dob de ingéd ro atin ménémantad ro ménggéta ro bé Jesuse. ¹⁴ Amun téménéfadén i Jesuse, énggito noy de médo ni do étew ménlimud. Atin ménuray i na nuwe bero brab nuwaén i de démeruun bero.

¹⁵ Amun témégénén i de kuyugén ménangéy ro dob Beene brab ménbéréh ro maro, “Enda i lawi dini, atin témégénén béni. Féagéw mon bero inok mangéy ro dob de ingéd gédét dini. Diyo gébéléy ro amaé ro.”

¹⁶ Endob ménbéréh i Jesuse mano, “Enda kailanga roy magéwe. Iraya kom bero amaé ro.”

¹⁷ Endob séménumbul i de kuyugén maro, “Enda i amaén dini saliyu bé limowe timan fan brab ruwo timan sédo.”

¹⁸ Atin bang Jesuse, “Uwit gom dini.” ¹⁹ Atin sénuguén i de étew mésar dob de kéroon diyo. Tidew béno, éndot Jesusey limowe timan fan brab ruwowe timan sédo, atin léménéngag dob lawayo brab ménfésalamat dob Tuluse. Tidew béno, sénbaad-baadén i de fan brab nirayén dob de kuyugén. Atin sénaar ro dob de étew. ²⁰ Atin i kéluhanay de étew téménantu ro mama taman ménbésor ro. Tidew béno, ténimu i de kuyug Jesus i de sama i de amaén brab ménféno i foloe bra ruwo timan dakél biton. ²¹ I kédooy de étew ménama limo ngibu ro do lagéy saliyu bé de libun brab do nga.

Ménagéw i Jesuse dob rotor i wayége

²² Tidew béno, fénéda Jesusey de kuyugén dob awange, atin fentahén bero mangéy fingé difar bé dogote, bé lala ne émféule bé de médo ni do étew.

²³ Atin amun énggéfeuleo noy de étew, ménénagé dob burure énda i dumo no inok démasal. Amun kélungononén, diyo i Jesuse dob burure énda i dumo no. ²⁴ Bé béno, i awange diyoén dob kérara i dogote. Atin kérégénan i de kuyugén non énggébela i de bagél dob awang ruwe, non rumfakéy réfuruhe.

²⁵ Amun lingkuwog mangéy fuweh, ménangéy i Jesuse dob berowe ménagéw dob rotor i wayége. ²⁶ Atin i

de kuyugén, amun énggito roy Jesuse magéw dob rotor i wayége, toow ro fo ménggilak. Ménkes ro sabaf bé kégilak ruwe brab maro, "Ménayam!"

²⁷ Endob sonom béno, ménbéréh i Jesuse mano, "Kagom mégilak! Begén. Fétana gom i de fédew gom."

²⁸ Tidéw béno, ménbéréh i Pedrowe mano, "Kadnan, amuk tintu Beem, féagewém so begén dob rotor i dogote mangéy dob Beeme."

²⁹ Atin bang Jesuse, "Enggon." Mélaw méntéfor i Pedrowe tidéw dob awange atin ménagéw dob rotor i wayége saréw dob Jesuse. ³⁰ Endob amun énggétérédama noy émbagére réfuruuh, ménwaléy mégilak, atin minut méléd dob dogote. Atin ménkes mano, "Kadnan, tabangénu."

³¹ Sonom béno, bémenter Jesusey kémér ne atin génamakén i Pedrowe. Atin ménbéréh i Jesuse mano, "Toow fo kloh i kéunur me. Sedek ruwo ruwoy fédew me?"

³² Tidéw béno, ménda ro dob awange, atin téménrén i réfuruhe.

³³ Atin i de kuyugén dob awange fénéngadaf roy Jesuse brab ménbéréh ro maro, "Tintu fo Beem i Nga i Tuluse!"

Nuwa Jesusey de médo do démérueu

³⁴ Atin méntaus ro mifar dob dogote brab énggumah ro dob ingéde Génésaret. ³⁵ I de étew diyo énggélolo roy Jesuse. Mélaw fénksamfay roy kébérhéhe dob de démérueun dob de ingéd géliwét brab nuwit ro dob Jesuse. ³⁶ Atin nongot roy Jesuse bé tungkasé noy de démérueun fiyon gékuwaha ro saén damén i tamanay kégal ne. Atin i kéluhanay de énggékuwah de, ménadi-adi.

15

¹ Tidéw béno, wén i do Fariseo brab do téromo bé kitabé ménangéy dob Jesuse tidéw Jerusalem. Ménénginsa ro maro, ² "Sedek i de kuyugém énda odoro roy adat tome tidéw dob de katufua tom? Non énda méguse ro ké mama ro loo bé adat tome."

³ Atin séménumbul i Jesuse mano, "Sémuliú ménginsaan begom. Sedek félisé kom i de sugu i Tuluse inok odoro kom i kagome kétoro? ⁴ Non ménbéréh i Tuluse mano, 'Basana moy abay me brab idéng me.' Atin ménbéréh so mano, 'Buluk wén i ségétew émbéréh tete fantag bé abay ne look idéngén, fatut féléhuén.'

⁵ Endob i begome, téromo gom bé amuk wén i ségétew kérégénan i abay ne look idéngén, brab wén i fégétabangén irayén damén, fakay émbéréh mano, 'Kay Tulusey ni.'

⁶ Mélaw dob kétoro gome, éndaén kailangay de étew i masanane bé de lukés ro. Mélaw tétagak gom i kébéréh i Tuluse inok odoro kom i kagome kétoro. ⁷ Enda toow i kéunur gome bé Tuluse, ubo-ubo saén. Toow i kébéréh Isaiase, sani ségétewé sénarigoy Tuluse muret bé kébéréh ne, amun sénulatén i fantage bé begome mano, ⁸ 'Bang i Tuluse, basanay de ni do étew Begén dob kébéréh ruwe saén. Endob énda munur ro Begén dob de fédew ro. ⁹ Enda i atag i kéféngadaf ruwe Begén, non toroé roy de sugu rénigoy kéilawane brab bérhéhe ro tidéw dob Begéne.'

Fantag bé amaéne

¹⁰ Tidéw béno, ténawag Jesusey de étew mangéy dob Beene. Atin ménbéréh dob berowe mano, "Fégélingo gom Begén brab fégésobut gom. ¹¹ I funay de étew waléy mékérésik dob adafay Tuluse, békén sabaf bé atiy amaé ruwe. Yamula, i de tete kébéréh ro mésut tidéw dob de ba roy funa ruwe waléy mékérésik dob adafay Tuluse."

¹² Tidéw béno, ménfégédét i de kuyugén dob Jesuse, atin ménbéréh ro maro, "Gétiga mo, i de Fariseo méntete i de fédew ro sabaf bé kébéréh manan?"

¹³ Endob séménumbul i Jesuse mano, "Mékédan i de békén katabuwan kétoro ro békén tidéw dob Abay guwe Tulus, ségiléw bé ségétewé rémandut bé de kéroon géliwét bé de nohokén. ¹⁴ Fédaya gom bero. Maak

do langafén ro marak bé de dumo ro langafén. Atin amuk wén i langafén marak bé ségétéwe so langafén, ruwo ro mélawu dob kalute.”

¹⁵ Atin ménbéréh i Pedrowe mano, “Fékentayém dob begeyey nan binuwaya.”

¹⁶ Atin bang Jesuse, “Aw énda séna wayo gésobuto kom de? ¹⁷ I funay Tuluse énda mésuwat bé de étew békén sabaf bé de amaé ro. Non i amaéy étewe, mahur dob sur ne brab taus so mésut tidéw dob lowoh ne. ¹⁸ Endob i de tete kékéréh mésut tidéw dob ba i étewe, tintu fo tidéw dob fédew ne. Atin been i niy funay étewe waléy mékérésik dob adafay Tuluse. ¹⁹ Non tidéw dob tetee fédewén mésut i de tete kékéréh inok méméléhu, brab sétayan bé békéne bawagén, brab sébiga, brab ménakaw, brab témugi, brab témifu. ²⁰ Been i niy funay de étew waléy mékérésik dob adafay Tuluse. Endob fiyon fo ké énda méguse i étewe loo bé adat tome do Judio ké mama, énda waléyén mékérésik dob adafay Tuluse.”

²¹ Tidéw béno, ménékédan i Jesuse diyo brab ménangéy dob de ingéd gédét dob Tiro brab Sidon. ²² Atin wén i ségétéwe libun békén Judio bati diyo. Been i séfu i de étew tidéw Kanan. Atin ménfégédét dob Jesuse. Atin ménbéréh métanug mano, “Séfu Datu Dabid, fégédawanu! I kénogo kuwe rénahukoy saitane atin mélaw toow fo kéfasangan.”

²³ Endob ménantés i Jesuse brab énda sénumbulo noy libune ni. Tidéw béno, i de kuyugén ménangéy ro dob Jesuse brab nongot ro maro, “Féagéwém i ni libun non toow fo selekén furay betom.”

²⁴ Tidéw béno, bénréh Jesuse mano, “Sénuguu saén mangéy témabang bé de Judio non ségiléw ro bé de ménadin do bili-bili.”

²⁵ Tidéw béno, i libune ni ménfégédét brab léméningkuwéd dob adafa nuwe. Atin ménfégédaw-gédaw mano, “Maistéro, tabangénu.”

²⁶ Tidéw béno, nuret Jesusey sébaane binuwaya inok fégétiga no

de bé tabangé noy de Judio sungu, atin tidéw béno tabangé noy de békén Judio. Ménbéréh mano, “Enda fatutén ké dotén i amaéy de nga atin ibérén dob de itu.”

²⁷ Endob ménbéréh i libune ni mano, “Toow, Maistéro, éndob fiyon foy de itu géamaa roy de mumu mélawu tidéw dob amaéy gefee de.”

²⁸ Tidéw béno, ménbéréh i Jesuse mano, “Di, méégét i kéunur me fo toow. Mélaw rigoné kuy nan ongoté mo.” Atin bé no so uras i kénogo nuwe ménadi-adi.

Nuwa Jesusey de médo do étew

²⁹ Tidéw béno, ménagéw i Jesuse ménémantad mangéy bé doror i do-gote Galilea. Atin ménénagé dob burre brab ménasar diyo. ³⁰ Atin médooy de ménlimud do étew ménangéy ro dob Beene, atin nuwit roy de fikat, brab do langafén, brab do ménasril i de kémér ro brab de sékéy ro, brab do mow, brab do médooy so étew do démeruun. Atin féndiyo ro bero dob adafa Jesuse. Atin nuwa Jesuse bero.

³¹ Atin toow fo ménggaif i de étew amun énggitoy de mow énggabéréh, brab de ménasril do kémér ro ménadi-adi, brab de fikat énggagéw, brab de langafén énggégito. Atin dénayéw roy Tuluse fénadaféy de Judio.

Fénwaléy Jesuse médooy klohe amaén

³² Tidéw béno, ténavag Jesusey de kuyugén mangéy dob Beene. Atin ménbéréh dob berowe mano, “Méuray i na guwe bé de étew ni, non télewén gétérésangan ro dob Begéne, atin béléewe ni ménétéyén i de amaé ro. Atin mikau émféule bero ké mélafar ro non mésumba ro keeyén dob de aguwon.”

³³ Atin ménenginsa i de kuyugén maro, “Ati kékéfingé-fingé i kékéfama geye bé de médooy ni do étew dob ni gonon mérayu tidéw dob de lawi?”

³⁴ Atin i Jesuse fénenginsaa no bero mano, “Firoy timan i fa koman?”

Séménumbul ro maro, “Fitew timan brab wén soy koy kloh de kloh sédo.”

³⁵ Tidéw béno, i Jesuse sénuguén i de ménlimud do étew mésar dob fantaude. ³⁶ Atin éndotén i fitéwo no timan fan brab do sédo, brab ménfésalamat dob Tuluse. Tidéw béno, sénbaad-baadén, brab nirayén dob de kuyugén. Atin sénaar ro dob de étew. ³⁷ Atin i kéluhanay de étew téménantu ro mama taman ménbésor ro. Tidéw béno, i de kuyugén ténimu roy de sama i de amaén brab ménféno i de fitéw timan biton. ³⁸ I kédooruwe do ménama fot ro ngibu do lagéy saliyu bé de libun brab de nga.

³⁹ Tidéw béno, fénule Jesusey de ménlimud do étew. Tidéw man béno, ménda dob awange atin ménagéw mangéy dob ingéde Magadan.

16

¹ Wén i no sébaan fuweh, wén i do Fariseo brab do Saduseo ménangéy dob Jesuse. Ménuyot ro téméngkad bé Jesuse. Mélaw nongot ro dob Beene rémigo mékégaif inok fégito no tidéw dob Tuluse. ² Endob séménumbul i Jesuse mano, "Amuk gito gom furoy lawaye ké méléd i térsange, émbéréh gom makom, 'Enda rémanaén démo.' ³ Atin buluk gito gom furo brab délémon i lawaye ké sémbang i térsange, bérhé kom makom, 'Rémana séko.' Mélaw gétiga kom i atag i de tanda dob de rawén. Endob énda gétiga kom i atag i de tanda dob de ni do gai. ⁴ I begome do étew méuyag béni, toow gom fo tete brab békén gom méngintulus. Ongoté kom ké rémigowu mékégaif inok gétiga kom Begéney Kristowe. Endob énda i féténgténg gu begom saliyu bé sébaane mékégaif ségiléw bé ménrigowe dob Jonase bé do gétah." Tidéw béno, té nagak Jesuse bero brab ménagéw.

⁵ Tidéw béno, i de kuyug Jesuse ménifar ro dob dogote. Endob énggélifoto roy muwite fan. ⁶ Atin nuret Jesuse beroy sébaane binuwaya fantag bé de tete adatén do étew. Ménbéréh mano, "Ingat gom brab sénggila gom i fégéféruek fan kay de Fariseo brab kay de Saduseo."

⁷ Endob i de kuyugén, énda énggésobuto roy ni binuwaya. Marok bénréh Jesusey fantage bé tintuwe fégéféruek fan. Mélaw ménsgéno-géno ro falan saén bero maro, "Bénréhén i ni non énda i fa tom."

⁸ Endob i Jesuse énggétiga noy de kékéréh ro. Mélaw ménbéréh mano, "Sedek ségéno-géno gom fantag bé kékulang i fa tome? Toow fo kloh i kéunur gome. ⁹ Aw énda séna énggésobuto kom de? Aw énggélifoto kom i rénigo guwe? Amun sénbaad-baad guy de limo timan do fan dob de limo ngibu do lagéy, firoy gébiton i énggétimuo kome samaén? ¹⁰ Atin amun sénbaad-baad guy de fitéw timan do fan dob de fot ngibu lagéy, firoy gébiton i énggétimuo kome samaén? ¹¹ Sedek énda séna énggésobuto kom i békén fantag bé faney bénréh guwe? Ingat gom brab sénggila gom i fégéféruek i de Fariseo brab de Saduseo."

¹² Tidéw béno, i de kuyugén énggésobuto ro bé féingaté Jesuse bero bé kétoro i de Fariseo brab de Saduseo. Atin énggétiga ro békén nuretén i fantage bé tintuwe fégéféruek fan.

I kénéunur Pedrowe

¹³ Wén i no sébaan fuweh, i Jesuse ménagéw gédét dob ingéde Sesarea Filipo. Diyo fénénginsaa noy de kuyugén mano, "Ati kékéréh i de étew ké ati Begéne ni, sani Nga i Kéilawane?"

¹⁴ Séménumbul ro maro, "Wén i do ménbéréh maro, Juan Bautista go kun. I de dum de maro, Elias go kun. Brab i de dum de maro, Beemey Jeremiase kun, taloo no ségétew bé de gétah sénarigoy Tuluse."

¹⁵ Tidéw béno, ménenginsa i Jesuse man mano, "Dob begome, ati kékéréh gome fantag bé Begéne?"

¹⁶ I Simon Pedrowe séménumbul mano, "Beemey Kristowe, Nga i méuyage Tulus."

¹⁷ Atin bang Jesuse, "Simon, nga Juan, fénfiyoy Tuluse beem. Non békén kéilawan i ménfégétigane beem bé ni. Yamula i Abay guwe Tulus

i ménfégétigane de beem. ¹⁸ Atin béréhé ku beem, beem i Pedrowe, atin dob batéwe ni fétindégé kuy simbaa kuwe. Enda méléhu i de étew munur Begén loo bé kéunur me. ¹⁹ Atin iray gu beem i aturane bé de étew fégulewoy Tuluse. Mélaw ati sugué muwe énda fakayén rigonén dob fantade ni, énda so fakayén dob lawayo. Atin ati sugué muwe fakay rigonén dini dob fantade, fakay so dob lawayo.”

²⁰ Tidéw béno, sénugu Jesuse dob de kuyugén bé békén ureté ro dob de ségiyo étew ké Been i Kristowe.

I kéuret Jesuse fantag bé kéléhu ne

²¹ Tidéw bé no gai, i Jesuse fénkéntayén i kékérédé ne dob de kuyugén mano, “Kailanga kuy mangéye Jerusalem brab diyo i de odoroy de Judio brab de odoroy de fadi brab de témořo bé kitabé, ferasayé ro fo Begén toow. Atin wén soy do méméléhu Begén. Endob dob gétéléw ne gétérésangan, tábuleu.”

²² Sonom béno, i Pedrowe nuwitén i Jesuse mangéy dob géliyu-liyuwe inok bero saén, atin génléén mano, “Kadnan, énda damén fédayaéy Tuluse de mérigo dob Beemey ni bénréhém.”

²³ Endob sénaréw Jesusey Pedrowe atin ménbérédé mano, “Maak Satanás go! Férayu go Begén. Alangé mo Begén non i kékéfítung me békén tidéw dob Tuluse, yamula tidéw sa dob kékilawane.”

²⁴ Tidéw béno, bénréh Jesuse dob de kuyugén mano, “Buluk atiy méuyote furay Begén, kailanga no diguré noy kaane kétayan inok odoro noy kétayay Tuluse. Tidéw béno, kailanga no fédayday bé de kérégénon ségiléw bé Begéne, fiyon fo ké féléhuén dob kruse. ²⁵ Non atiy méuyote émféraru bé umul ne, méléhu. Endob i méléhue bé kékfuray ne Begén, gédoté noy umule magufusa. ²⁶ Ufama, fiyon fo ké i ségétéwe étew gédoté noy kéluhanay éntingayéne dob duniyae ni, énda i lagaén buluk méléhu atin géangéy dob uleono emferno. Enda

i fégébaliway étéwe de inok méuyag man. ²⁷ Non i Begéne, sani Nga i Kéilawane, séfuleu moso begey i de télaki gu, rémendawu bé barakat i Abay guwe Tulus. Atin bé bénno gai, barasa kuy de étew loo bé fatute sabaf bé de rénigo ro. ²⁸ Béréhé ku begom i toowe, wén i do dumo begom énda méléhu ro taman gito roy késéfule guwe inok méguléw.”

17

Enggiton i kéréndaw Jesuse

¹ Ném gétérésangan tidéw bé bénno, nuwit Jesusey Pedrowe brab Santagiwo brab Juane dumo Santagiwo sétiman idéng dob uruk i gérotore tuduk sébero-bero saén. ² Atin i falas Jesuse ménfégalin dob téngaanga ruwe. Réménéndaw i rangih ne maak téresang. Atin ménwaléy fute i kégal ne maak géfekaya. ³ Atin i de ni kuyugén, métékor énggito ro soy Moisese brab Eliase sébéréd-béréh ro bé Jesuse. ⁴ Ménbérédé i Pedrowe dob Jesuse mano, “Kadnan, toow fo fiyo non dob ni tom. Amuk kétaya mo, rémigouw téléc timan dung-dung. Sébaan i kaame de, sébaan i ka Moisese de, brab sébaan i ka Eliase de.”

⁵ Amun émbérédé sénay Pedrowe, ménfégalin dob berowey rémendawé rawén. Atin wén i ménbérédé tidéw dob rawéne mano, “Been i niy kénimuo kuwe Nga gu, toow fo kénswata ku. Fégélingo gom.”

⁶ Amun énggelingoo de kuyugén i ni, toow ro fo ménngilak. Mélaw ménfégéngkéb ro tédunsum. ⁷ Endob i Jesuse fenggédéto no bero brab kénwahén bero. Atin ménbérédé mano, “Tek gom brab kagom ménngilak.” ⁸ Amun léménéngag ro téméngteng, énda i saliyu énggito ro bé Jesuse saén.

⁹ Atin bé lala ruwe léménudug tidéw dob tuduko no, sénugu Jesuse bero mano, “Kagom ureté i fantage bé ni énggégito gom taman tábuleu, sani Nga i Kéilawane.”

¹⁰ Tidéw béno, i de ni kuyugén ménenginsa ro dob Jesuse maro,

“Sedek bénréh i de témo ro bé kitabé bé kailanga Eliasey séfulee, tidéw béno méguléw i Kristowe?”

¹¹ Atin séménumbul i Jesuse mano, “Toow i nan bé fatut séfule i Eliase sungu inok tafayé noy kéluhanane. ¹² Endob bérhé ku begom, énggumahén i Eliase, éndob énda énggéloloy de étew de. Yamula fénrasay ro loo bé kétaya ruwe. Atin loo so bé nan i kéférasay ruwe moso Begén.”

¹³ Tidéw béno, i de ni kuyugén énggésobuto roy bénréh Jesuse fantag bé Juan Bautistawe.

Dénédél Jesusey saitane

¹⁴ Amun ménfégédét i ségétéwe lagéy dob Jesuse brab léméningkuwéd dob adafa nuwe. ¹⁵ Atin ménbéréh mano, “Maistéro, fégédaw go bé nga guwe lagéy. Non rebengén brab toow fo kérasayan. Ségamét métuwar dob aféye brab mélawu dob wayége. ¹⁶ Nuwit gu dob de kuyugém, éndob énda géuwaa ro de.”

¹⁷ Atin ménbéréh i Jesuse dob de ménlimud do étew mano, “Enda sémarig gom bé Tuluse, brab toow gom fo do tete étew. Lugoténun sétafik begom. Enda gétuwa ku de ké ati nay kérugay i kétingkél guwe sétafik begom. Uwit gom diniy ngao no.” ¹⁸ Atin dénédél Jesusey saitane bé kékéréh ne. Mélaw ménraréy i saitane, atin sonom béno, ménadi-adiy ngae ni.

¹⁹ Tidéw béno, i de kuyugén ménangéy ro dob Jesuse sébero-bero saén. Atin ménénginsa ro maro, “Sedek énda géféraréyo key i no saitan?”

²⁰ Séménumbul i Jesuse mano, “Non kulang foy kéunur gome. Bérhé ku begom i toowe, amuk wén saén i kloh kéunur gom ségiléw bé kékloh i oloy sabie, gébéréh gom dob tuduke ni makom, ‘Ay go diyoo.’ Atin magéw ba. Atin mélaw amuk wén i kéunur gom, gérigono kom i kéluhanay éntingayéne. ²¹ Endob i ni klasi saitan, géféraréyo kom saén bé kédasal gome brab

kéfuwasá gome. Endaén i saliyu de fakay.”

I kékuret Jesuse fantag bé kéléhu ne

²² Amun ménlimud i de kuyug Jesus dob Galilea, bénréhén bero mano, “I Nga i Kéilawane, sani Begéne, fékéfo séko bé de étew sébanil Begén. ²³ Atin féléhué ro Begén. Endob dob gétéléw ne gétérésangan, tébuleu.”

Atin toow fo ménchte i de fédéw i de kuyugén amun énggelingoo roy ni.

²⁴ Amun énggumah i Jesuse beroy de kuyugén dob Kafernaum, ménangéy dob Pedrowey de kémubra kurta kay lawi i Tuluse dob Jerusalem. Atin ménénginsa ro maro, “Aw mayad ba kurta i Maistéro gome kay lawi i Tuluse?”

²⁵ Séménumbul i Pedrowe mano, “Hoo, mayad.”

Tidéw béno, amun ménahur i Pedrowe dob lawie, bénréh Jesuse sungu mano, “Simon, ati karang me de? Ati isuwe mayad buwis dob datue, do ngaén taloo no do ségiyo étew?”

²⁶ Séménumbul i Pedrowe mano, “I de ségiyo étew.”

Atin ménbéréh man i Jesuse mano, “Amuk loo, énda kailangay de ngaén i mayade buwis dob datue. Atin mélaw énda so kailanga kuy mayade kurta kay lawi i Abay guwe Tulus. ²⁷ Endob énda méuyotu de ké mérarék Beto de étew ni. Mélaw ay go dob dogote atin duray go. Edotém i sunguwe sédo géduraya mo. Atin fétenganga mo brab gito moy félatahe fakayén fégébayad i ruwowe gétew dob lawi i Tuluse. Dotém brab bayada moy katowe de.”

18

¹ Bé béno do gai, ménangéy i de kuyug Jesuse dob Beene brab ménénginsa ro maro, “Ati isuwe begey toow na fo gérotor dob kéféguléw i Tuluse?”

² Tidéw béno, ténavag Jesusey ségétéwe nga atin féntindégén dob téngaanga ruwe. ³ Atin bénréhén bero mano, “Bérhé ku begom i toowe, amuk énda émfégalin i de fédéw gom

inok iringé kom i kétérifantad i de nga, énda géahur gom dob kéféguléw i Tuluse. ⁴ Non i toowe na fo gérотор bé de étew féguléwoy Tuluse, been i gérifantade loo bé ngae. ⁵ Atin atiy étewe témayakuf bé ngae loo bé ni sabaf bé kéunur ne Begén, tayakufé no so Begén.

⁶ “Endob amuk wén i émfésala bé ségétewe mantu séna munur dob Begéne loo bé ni nga, toow fo mékégédaw-gédaw. Toow fo gétimal ké mékukum, mélaw mas na fiyo dob beene ké ibérén dob dogote nikéton dakél batéw i reer ne. ⁷ Mékégédaw-gédaw i de étew dob duniyae ni non wén i de éntingayén émfésala bero. Démoyun wén i do étew émfésala bé de dumo ro. Endob mékukum ro fo toow moso.

⁸ “Mélaw amuk been i kémér me taloo no sékéyém i funa muwe gésala, kélengém brab ibérém. Non mas na fiyo ké gédoté moy umule magufusa ménkéleng i bala i kémér me taloo no sékéyém, bé géangéy go dob uleono emferno énda i kulang bé lowoh me. Non diyo wén i aféye énda émfandaén taman sa taman. ⁹ Atin amuk i moto muwéy funa muwe gésala, lésitém brab ibérém. Non mas na fiyo ké gédoté moy umule magufusa énda i bala moto mo, bé géangéy go dob emfernove énda i kulang bé lowoh me.

¹⁰ “Atin kagom siyawén i de étew gérifantad segiléw bé ni nga. Non bérhéhé ku begom, wén i karo télaki démiyaga bero, atin bati ro dob lawayo beroy Abay guwe Tulus. ¹¹ Non i Nga i Kéilawane, sani Begéne, ménangéyu dini inok fukasé kuy de étew ménsala do maak do méntadin ro.

¹² “Fégitung gom i fantage bé ni ufama. Wén i ségétewe étew wén i mératu bili-bili no. Endob méntadin i sébaane de. Ati rigoné nuwe? Tagaké noy siyowe de folo bra siyow dob fétabtabane, atin angéyé no sélédén i sébaane de méntadin. ¹³ Tidéw bén, buluk énggito no, toow fo moror Bérhéhé ku begom, toow na fo moror sabaf bé nan sébaan méntadin bili-bili énggito no bé de siyow de folo bra

siyow énda méntadin ro. ¹⁴ Ségiléw so bé ni, i Abay gome Tulus dob lawayo toow fo mika de ké wén i sébaan bé de ni gérifantad do méngintulus mékukum.

¹⁵ “Amuk wén i ségétew dumo mo brab ménsala dob beeme, ay go dob beene inok sébegom-begom saén. Tidéw bén, toroém dey sala ne. Amuk gésénule de, tintu fo ténabanga mo séfule dob Tuluse. ¹⁶ Endob amuk énda gésénuleén de, uwitém i ségétewe taloo no ruwo gétew bé de dumo mo séfule mangéy dob beene. Mélaw wén i dumo mo émbéréh toow i kékéréh me fantag bé sala ne. ¹⁷ Endob amuk énda fo gésénuleén de, téboém dob kéluhanay de munur dob lawie féngadafan. Atin amuk énda na fo gésénuleén de, fiyon fo ké téboéy kéluhanay munure de, kagom séloyuk de maak ségétew békén méngintulus look ségétew lémisful kémubra buwis.

¹⁸ “Atin bérhéhé ku begom i toowe, amuk wén i sugué kom bé énda fakayén rigonén dob fantade ni, énda so fakayén dob lawayo diyo. Brab amuk wén soy sugué kom fakay rigonén dob fantade ni, fakay so dob lawayo diyo.

¹⁹ “Atin bérhéhé ku so begom, amuk wén i ruwo gétew begom dob duniyae ni séfagayun bé kédasal gome, i Abay guwe Tulus dob lawayo rigoné no. ²⁰ Non fiyon fo ké wén saén i ruwo taloo no télaw gétew sélimud méngadaf Begén, diyou so dob berowe.”

Fantag bé kífésagade

²¹ Tidéw bén, ménfégédét i Pedrowe brab ménénginsa mano, “Kadnan, amuk wén i dumo gu démoynén gésala dob begéne, firoy gule fatut fésagada ku? Aw fésagada ku taman fitew gule?”

²² Séménumbul i Jesuse mano, “Médoou na gule tidéw bé nan. Kago térenon i émfésagade. ²³ Ureté ku begom i sébaane binuwaya fantag bé kéféguléw i Tuluse. Wén i ségétewe datu méguléw, éntukén i de utong i de sugu-sugué no dob beene. ²⁴ Atin amun féngganaya no, nuwitén dob

beeney ségétewe bé de sugu-suguéno, laksaén i utong ne. ²⁵ I ni sugu-suguén énda gébayada noy utong ne. Mélaw i datue, fébéléyén i ni sugu-suguén brab bawag ne brab de ngaén, inok waléy ro do rifén. Brab i kéluhanay étingayéne kaan, fébéléyén so inok gébayada noy utong ne. ²⁶ Endob ménlingkuwéd i ni sugu-suguén dob adafay datue, brab ménfégédaw-gédaw mano, ‘Tingkélonuna. Enda sénay kurta gu, éndob bayada ku so beem ké wén i kurta gu.’ ²⁷ Ménuray i nay datue de. Mélaw fénsgada no, brab éndaén fénbayadén de. Tidew béno, fénuleén.

²⁸ “Tidew béno, i sunguwe ni sugu-suguén ménagéw brab énggabalaka noy ségétewe bé de dumo no sugu-suguén, énggutong dob beene kloh kurta. I ni sungu sugu-suguén génamakén i dumo nuwe ni dob reer ne brab kénrangén. Atin ménbéréh mano, ‘Bayadanu bé utong me begén!’ ²⁹ Tidew béno, ménlingkuwéd i gérwowe ni sugu-suguén, brab ménfégédaw-gédaw mano, ‘Tingkélonuna. Enda sénay kurta gu, éndob bayada ku so beem ké wén i kurta gu.’ ³⁰ Endob i sunguwe ni sugu-suguén énda fo fénggelingoén de. Yamula fénféri su no taman énda gébayada noy utong ne. ³¹ Amun i de dumo sugu-suguén énggito roy ni ménrigo, toow fo ménntete i fédew ruwe de. Atin ménangéy ro dob datue ménlolok, brab nuret roy kéluhanay ménrigowé. ³² Tidew béno, féntawag i datuey sunguwe ni sugu-suguén brab ménbéréh mano, ‘Toow go fo tete étew. Fénsgada ku beem bé kéluhanay utong me begén non ménfégédaw-gédaw go. ³³ Fégédaw go so damén bé dumo muwe sugu-suguén loo bé kégédaw guwe beem.’ ³⁴ Toow fo ménkérít i datue, mélaw fénféri su noy ni sugu-suguén taman énda gébayada noy kéluhanay utong ne.”

³⁵ Atin féntama Jesusey ni binuwaya bé ni kékérhéh mano, “Loo bé nan i kérigoy Boh guwe dob lawayo bé

séngae ségétew begom, buluk énda toow fo fésagada kom i de étew énggésala dob begome.”

19

Fantag bé ségélake

¹ Tidew béno, amun énggilid i Jesuse téromo bé de ni, ménagéw tidew Galilea brab ménangéy dob sakuf i dakéle ingéd Judea dob difar i wayége Jordan. ² Atin ménfuray i de médo do ménlimud do étew. Atin diyo fén-adi-adi noy de démérue bero.

³ Atin wén i de Fariseo ménangéy dob Beene inok téngkadé ro inok gésumbulo no bero bé békéne damén katabuwan. Ménenginsa ro maro, “Aw fakay dob kitab tome ké gélakéy lagéyey bawag ne sabaf bé de udenén do funa no?”

⁴ Atin séménumbul i Jesuse mano, “Aw énda séna énggébasana kom i Ménssulate Kékérhéh i Tuluse mano, ‘Dob féganaye, amun léménimbag i Tuluse, rénigo noy ségétewe lagéy brab ségétewe libun.’ ⁵ Atin bang i Tuluse, ‘Been i niy funay lagéye témagak bé boh ne brab idéng ne atin sétifon bé bawag ne. Atin mélaw i ruwowe gétew waléy ro ségétew.’ ”

⁶ Atin fentaus Jesusey kékérhéh ne mano, “Mélaw éndaén ruwo ro gétew non ménwaléy ron maak sébaan. Mélaw békén fatut ké fésesuwayéy kékilawane bero, non Tulus i ménféwaléy bero ségétew.”

⁷ Tidew béno, ménenginsa man i de Fariseo maro, “Sede mélaw ké ni-ray Moisesey sugue bé fakay gélakéy lagéyey bawag ne amuk iraya no sulat bé kégélak ne de, tidew béno fakayén féagéwé no?”

⁸ Sémenumbul i Jesuse mano, “Niray Moisesey nan sugu non toow fo métégas i de uléw gom. Endob bé gétaho, amun lénimbag i Tulusey de étew, énda ténungkas i Tulusey de ménssawag ségélak. ⁹ Mélaw bérhéh ku begom, ati lagéye gémélak bé bawag ne saliyu bé kékigae funa no de, atin mawag ségiyo libun, énggélamfa.”

10 Tidéw béno, ménbéréh i de kuyugén maro, “Amuk loo bé nan i késébawage, i ségétewe étew mas fiyo ké énda mawagén.”

11 Atin bang Jesuse, “I kétoroe ni békén kay kéluhanay de étew. Yamula kay do étew saén fénemili i Tuluse inok énda mawag ro. **12** Wén i de séségiyo-giyo do funay de étew énda mawag ro. Wén i de étew énda gébawag ro non ménsadil ro tidéw fanay kéumah ro. Wén soy do kafun de. Atin wén soy do étew énda mawag ro inok mégéror ro gémalbék téromo fantag bé kéféguléw i Tuluse bé de étewén. Mélaw amuk fénemili i Tuluse beem inok énda mawag go, odoro mo.”

13 Wén i no sébaan fuweh, wén i do étew ménuwit bé de nga ro dob Jesuse inok tégené no bero bé lala ne démasalan bero. Endob amun énggitoy de kuyugén, génlé roy de étew ni. **14** Endob ménbéréh i Jesuse mano, “Féangéy gom i de kloh nga dob Begéne. Brab kagom alangén bero, non i de étew sémarig loo bé késarig i de ni do nga, féguléwoy Tuluse bero.”

15 Atin ténégé noy de nga ni brab fénifiyo no bero. Tidéw béno, ménagéw i Jesuse.

Fantag bé kékawasawe

16 Wén i no sébaan fuweh, i ségétewe kénogo lagéy ménangéy dob Jesuse atin ménenginsa mano, “Maistéro, ati fiyowe rigoné ku inok gédoté kuy umule magufusa?”

17 Séménumbul i Jesuse mano, “Sedek fénginsaa mo Begén fantag bé ati fiyowe? Enda i ségiyo fiyo saliyu saén bé Tuluse. Amuk kétaya mo gédoté moy umule magufusa, odoro moy de sugu tidéw dob Moisese.”

18 Ménenginsa man i ni lagéy mano, “Ati isuwe de bé de sugu?”

Atin séménumbul i Jesuse mano, “Kago méméléhu, kago lémaamfa, kago ménakaw, kago uretén i dumo muwe bé békéne toow, **19** fégadata moy boh me brab idéng me, atin fégédaw go bé

de dumo mo étew loo bé kégédaw me bé kaame lowoh.”

20 Atin bang i lagéye ni, “I kéluhanay de ni nodoro ku. Ati nay fatute rigoné ku?”

21 Atin séménumbul i Jesuse mano, “Amuk kétaya moy waléye fo métintu dob adafay Tuluse, ule go brab féléléyém i kéluhanay éntingayéne kaam atin irayém i kurtae dob de méskinan. Atin mélaw kawasa go moso dob lawayo. Tidéw béno, énggonén, odor go Begén.”

22 Amun énggelingoooy étewe niy ni, toow fo méntete i fédew ne atin ménagéw non toow fo kawasa.

23 Tidéw béno, ménbéréh i Jesuse dob de kuyugén mano, “Béréhé ku begom i toowe, toow fo mérégén i kéahur i de kawasa dob kéféguléw i Tuluse. **24** Atin béréhé ku begom, mas mélému y kéahur i dakéle ayam dob tosong i darume bé kéahur i ségétewe étew kawasa dob kéféguléw i Tuluse.”

25 Amun énggelingoooy de kuyugén i ni, toow ro fo ménggaif. Atin ménenginsa ro maro, “Ati mélaw i de fakay méfukas?”

26 Atin ténéngténg Jesuse bero atin séménumbul mano, “Enda fakayén rigoné de étew, éndob i Tuluse fakay gérigo noy kéluhanane.”

27 Tidéw béno, ménbéréh i Pedrowe mano, “Ténagak gey i kéluhanane atin ménfuray gey Beem. Ati mélaw i gédoté keye de?”

28 Séménumbul i Jesuse mano, “Béréhé ku begom i toowe, dob mantuwe duniya amuk mésar i Nga i Kéilawane, sani Begéne, dob gérotore saray méguléwe, i de begom do kuyug gu mésar so dob de folo bra ruwo saray méguléwe inok féguléwo kom i de folo bra ruwo gétribo do Judío.

29 Atin atiy étewe téménagak bé lawi ne taloo no dumo no sétiman idéng, taloo no bohén brab idéngén, taloo no ngaén, taloo no fantadén inok ureté noy fantage bé kéunur ne Begén, gédot mératuh takéf bé de ténagakén brab gédoté no soy umule magufusa. **30** Endob médooy de étew gérotor

béni waléy do gérifantad moso. Atin médooy de gérifantad béni waléy do gérotor moso."

20

I binuwayaefantag bé de gémalbék

¹ Atin ménbéréh i Jesuse sébaan binuwaya mano, "Ikéféguléw i Tuluse bé de étewén ségiléw bé ni. Wén i ségétewe étew, wén i safadén. Wén i no sébaan fuweh ménagéw toow géfuwén séméléd do étew inok gémalbék dob safad ne. ² Atin ménagayun bayada no bero sébaan félatah loo bé fatute sahud bé ségétérésangane galbék. Tidéw béno, sénuguén bero mangéy gémalbék dob safad ne. ³ Amun géraraan lémowot i térsange, ménangéy man i gefee ni safad dob fadiyane. Diyo, énggito noy de étew téménindég énda i rigoné ro. ⁴ Mélaw ménbéréh dob berowe mano, 'Angéy gom so galbék dob safad guwe, atin bayada ku begom bé katabuwane.' ⁵ Mélaw ménagéw ro mangéy gémalbék. Tidéw béno, rénigo noy ni bé géutuhe de, atin rénigo no so man bé géraraan lémudug i térsange de. ⁶ Amun alas singko nén témégénén, ménangéy man dob fadiyane. Atin diyo énggito noy de lagéy téménindég énda i rigoné ro. Atin fénénginsaa no bero mano, 'Sedek énda gémalbék gom bé ni térsang?' ⁷ Séménumbul ro maro, 'Enda i galbék gey non énda i fégalbék begey.' Tidéw béno, bénréh i gefee ni safad mano, 'Angéy gom so galbék dob safad guwe.' Mélaw ménangéy ro gémalbék. ⁸ Amun sémingkufén, i gefee bé safade ni bénréhén dob sarigo nuwe mano, 'Tabarém i de gémalbék atin sukaya mo bero. Bayada mo sunguy de mantu séna gémalbék taman dob de énggétah de.' ⁹ Tidéw béno, i de gémalbék bé témégéne nén, énggédot roy sébaane félatah sénga ségétew bero fiyon fo ké gémalbék ro séguras saén. ¹⁰ Mélaw i de énggétah do gémalbék tidéw géfuwén taman sémingkuf, marok gégedot ro mas na médo kurta.

Endob amun bénayada no bero, niraya no so bero sébaan félatah. ¹¹ Tidéw béno, amun éndot roy sahud ruwe, ménbutég-butég ro dob gefee bé safade ni. ¹² Ménbéréh ro maro, 'I de étew énggéturay do gémalbék, séguras saén i kégalbék ruwe. Endob sénahudo mo bero ségiléw so bé begeye fiyon fo ké gémalbék gey ségétérésangan tidéw géfuwén taman sémingkuf. Fatut damén bayada mo begey mas gérotor non gémalbék gey ségétérésangan dob kénédu i térsange.' ¹³ Endob ménbéréh i gefee ni safad dob ségétewe bero mano, 'Adih, énda léniful gu begom. Ménagayun tom bé gémalbék gom ségétérésangan atin bayada ku begom sébaan félatah sénga ségétew. Mélaw rénigo guy ati fénasad guwe. ¹⁴ Mélaw dot gomén i sahud gome atin taus gom ule. I ni ségétew énggéturay gémalbék, méuyotu mirayan de ségiléw bé kéraya kuwe begom. ¹⁵ Békén ba wén i kuwagib gu rémigo ké udenén i kérigo gu bé kurta guwe loo bé kétaya kuwe de? Médaléw gom keeyén sabaf mégédawu bé de ségiyo étew.'

¹⁶ Tidéw béno, fénggilid Jesusey binuwaya ne mano, "Mélaw i de gérifantad béni, waléy ro moso do gérotor. Atin i de gérotor béni, waléy ro moso do gérifantad."

I kékuret Jesuse fantag bé kéléhu ne

¹⁷ Tidéw béno, i lala Jesuse ménagé mangéy Jerusalem, nuwitén i de folo bra ruwo gétew kuyugén inok sébero-bero ro saén. Atin ménbéréh dob berowe bé lala ruwe magéw mano, ¹⁸ "Na, magéw tom mangéy dob Jerusalem, sani Ingéd i Nga i Kílawane, sani Begéne, irayu dob de odoroy do fadi brab dob de téromo bé kitabé. Atin kukumé ro Begén féléhuén. ¹⁹ Atin atéé ro Begén dob de békén Judio. Atin i de békén Judio, diyangkaé ro Begén, brab tafésé ro Begén, brab féléhué ro Begén dob kruše. Endob amuk méifus i télewe géterésangan, tébuleu."

20 Tidéw béno, i bawag Sebedewe ménangéy dob Jesuse beroy de ngaén Juan brab Santiago. Atin léméningkuwéd dob adafa Jesuse atin wén i nongotén dob Beene.

21 Atin ménénginsa i Jesuse mano, “Ati kétaya muwe?”

Séménumbul i ni libun mano, “Suguém bé amuk Beem i méguléwe moso, i de nga gu ni géésar ro so fingé dob kuwono muwe brab i ségétéwe de fingé dob biwong me.”

22 Atin bang Jesuse, “Enda gétiga kom i nan ongoté kom. Aw géfédayday gom bé de kérégénon loo bé mérigowe séko dob Begéne?”

Séménumbul ro maro, “Hoo, gagané key.”

23 Atin ménbéréh man i Jesuse mano, “Toow mérigo dob begomey de kérégénon mérigowe dob Begéne. Gido loo, békén kagén kuwagib i mémilie bé ati mésare fingé dob kuwono kuwe brab fingé dob biwong guwe. I de ni saran kay de étew fénémili i Abay guwe Tulus mésar diyo.”

24 Tidéw béno, i de folo gétew dumoro do kuyugén amun énggelingoo roy ni nongot ro, ménkérít ro bé Juane brab Santiago. **25** Mélaw ténawag Jesuse bero kéluhanan mangéy dob Beene, atin ménbéréh dob berowe mano, “Gétiga kom i de méguléw dob de békén Judio, wén i kuwagib ro méguléw bero, atin démoyun sugué ro bero. **26-27** Endob békén fatut loo bé nan dob begome. Amuk wén i ségétew begom méuyot waléy odoron, fatut waléy sugu-suguéy de dumono. Atin amuk wén i ségétew begom méuyot waléy gérotor, fatut térifantad.

28 Fatut miring Begén, sani Nga i Kéilawane, non énda ménangéyu dini inok wén i do sugu-sugué ku. Yamula ménangéyu dob duniyae ni inok waléy sugu-suguén brab inok iray guy umul guwe fégéfukas bé médoowe étew dob de sala ro.”

Nuwa Jesusey ruwowe gétew langafén

29 Amun ténagak Jesusey ingéde Jeriko beroy de kuyugén, wén i de médoó do ménlimud do étew ménfuray de. **30** Atin wén i ruwowe gétew langafén ménasar dob doror i aguwone. Amun énggelingoo roy Jesuse témara, ménkes ro maro, “Séfu Datu Dabid, fégédawan gey!”

31 Endob i de ménlimud do étew génlé ro maro, “Kagom selekén!” Endob taus ro so mékes toow na fo métanug maro, “Séfu Datu Dabid, fégédawan gey!”

32 Tidéw béno, téménréni Jesuse atin ténawagén bero. Atin ménénginsa dob berowe mano, “Ati kétaya kome rigoné ku dob begome?”

33 Séménumbul ro maro, “Kadnan, méuyot gey de ké féadi-adiné mo begey inok gérito gey damén.”

34 Atin ménuray i na Jesuse bero atin kénuwahén i de moto ro. Sonom béno, énggégito ro néen. Atin ménfuray ro bé Jesuse.

21

I kéahur Jesusey dob Jerusalem

1 Atin méntaus i Jesuse beroy de kuyugén mangéy Jerusalem. Amun gédét ron dob Jerusalem, énggumah ro dob ingéde fénawet Betfage dob tuduke fénawet Olibo. Tidéw béno, sénugu Jesusey ruwowe gétew bé de kuyugén métah. **2** Ménbéréh dob berowe mano, “Taus gom agéw mangéy dob nan ingéd gésaréwo kom. Buluk gérumah gom diyo, gito gom i kudae fénawet ‘asno’ ménikét diyo beroy nati nuwe. Ukoh gom bero atin uwit gom bero dob Begéne. **3** Atin amuk wén i ménnginsa dob begome, béréh gom de makom, ‘Kailangay Kadnane bero.’ Atin i ménnginsae magad tungkasé no begom.”

4 I ni ménrigo inok métuman i kékéréh i sénarigoy Tuluse muret bé kékéréh ne mano, **5** “Béréh go dob de étew bati dob Jerusalem mamo, ‘Téngténg gom, gérumah i datu gome térifantad kémuda dob natiwe asno.’”

6 Tidéw béno, ménagéw i de ni ruwo gétew kuyugén brab nodoro roy sugu

Jesuse. ⁷ Atin ménséfule ro nuwit roy kudae féndawét asno brab nati nuwe. Tidéw béno, namféno roy natiwe bé de kégal ro brab kéménuda i Jesuse. ⁸ Diyo wén i de médoō do étew ménlimud. Bénékah roy de dumo bé de kégal ro dob aguwo Jesuse. Atin i de dumo bero kéménléng ro do dau bongo brab bénékah ro dob agéwone inok fégito roy kébasana ruwe de. ⁹ Atin i de médoō do étew magéw ro métah bé Jesuse brab i de médoō de furay ro bé Jesuse, ménkes ro maro, "Dayéwé tom i séfu Datu Dabide! Féfiyonéy Tuluse damén i ni étew gégumah tidéw dob Kadnane! Dayéwé tom i Tuluse!"

¹⁰ Amun énggumah i Jesuse dob Jerusalem, kélogoyan i kéluhanay de étew. Ménsébéréh ro maro, "Ati ni étew?"

¹¹ Atin i de médoō do étew ménodor bé Jesuse séménumbul ro maro, "Been i niy sarigoy Tuluse muret bé kékéréh ne féndawét Jesus tidéw Galilea."

Dénédél Jesusey de démagang dob lawi i Tuluse

¹² Tidéw béno, ménangéy i Jesuse dob lawi i Tuluse. Amun ménahur, dénédélén i de étew démagang brab do méléy-méléy diyo. Atin bénluweén i de ahayay de lémuluk kurta brab ténuwarén i de saray de émfébéléy do fégétulak do marafati. ¹³ Atin ménbéréh dob berowe mano, "Wén i Ménsulate Kékéréh i Tuluse mano, 'I lawi guwe féndawétén lawi gonon démasal!' Endob fénwaléy gom lawi i de ménakaw."

¹⁴ Tidéw béno, i de langafén brab de fikat ménangéy ro dob Jesuse dob lawi i Tuluse. Atin fén-adi-adi no bero. ¹⁵ Endob i de odoroy de fadi brab de téromo bé kitabé ménwaléy ro ménkérít amun énggito roy de ni fiyo rénigo Jesuse brab amun énggelingoo roy kéékes i de nga dob lawi i Tuluse maro, "Dayéwé tom i séfu Datu Dabide." ¹⁶ Mélaw ménbéréh i de ni odoron dob Jesuse maro, "Aw énggelingoo moy de kékéréh i de ni nga? Sedek énda fétéréné mo bero?"

Séménumbul i Jesuse mano, "Hoo, énggelingoo ku. Atin fiyo ké dayéwé ro Begén. Aw énda séna énggébasana kom i Ménsulate Kékéréh i Tuluse mano, 'Fédayéw i Kadnane bé de nga.' "

¹⁷ Tidéw béno, ténagak Jesuse bero atin méntékédan dob Jerusalem mangéy dob ingéde Betania. Diyo ménbati bé no kélungonon.

¹⁸ Bé géfwéne de, bé lala ne séfule mangéy Jerusalem, ménlayaf i Jesuse.

¹⁹ Atin énggito noy sébaane kayéw féndawét igos dob doror i aguwone. Mélaw fénggédéto no inok médot bé onok ne. Endob amun séménléde, énda i énggito no onokén saliyu bé de dau no. Tidéw béno, ménbéréh dob kayéwe ni mano, "Endaén damén mégonok go!" Sonom béno ménlaay i kayéwe ni.

²⁰ I de kuyugén, amun énggito roy ni, ménggaif ro. Atin ménénginsa ro maro, "Sedek ménagad ménlaay i kayéwo no?"

²¹ Atin séménumbul i Jesuse mano, "Béréhé ku begom i toowe, amuk tintu gom munur brab énda ruwo-ruwoy fédew gome, gérigono kom i loowe bé rénigo guwe dob kayéwe. Atin békén saén i ni, non gébérého kom dob tudukey ni makom, 'Angéy go dob dogote', atin mérigo ba. ²² Non amuk munur gom, gédoté kom i ati ongoté kome ké démasal gom dob Tuluse."

²³ Tidéw béno, ménangéy man i Jesuse dob lawi i Tuluse, atin diyo témenoro. Atin i de odoroy de fadi brab de odoroy de Judío ménangéy ro dob Jesuse atin ménénginsa ro maro, "Ati atura muwe rémigo bé de ni? Ati ménirayane Beem kuwagib bé ni?"

²⁴ Séménumbul i Jesuse mano, "Sémuliú ménginsaan begom. Amuk sumbulo kom Begén, sumbulo ku so begom ké ati kuwagib guwe rémigo bé de ni. ²⁵ Ati séménugue bé Juane inok mautis, Tulus loo ké étew saén?"

Atin séédél ro maro, "Amuk béréh tom 'Tidéw dob Tuluso', fénginsaa no betom sedek énda fénéngintoowo tom i Juane. ²⁶ Endob buluk béréhé tom,

“Tidéw dob étewé,’ kéluhanay de ni étew mékérít ro betom.” Ménggilak ro bé de étew non ménunur i de ménlimud bé Juaney ségétewe sénarigoy Tuluse. ²⁷ Mélaw séménumbul ro dob Jesuse maro, “Enda gétiga key de.”

Atin mélaw bénréh Jesus mano, “Enda so béréhé ku dob begome ké ati kuwagib guwe rémigo bé de ni rigoné ku.”

²⁸ Tidéw béno, nuret Jesusey sébaane binuwaya mano, “Fégitung gom i fantage bé ni. Wén i ségétewe lagéy wén i ruwo gétew ngaén lagéy. Ménangéy dob ofoe de atin ménbérédéh mano, ‘Adu, agéw go mangéy dob safade gémalbék béní.’ ²⁹ Endob i ni nga ménbérédéh mano, ‘Mikau.’ Endob énda mérugayén tidéw béno, ménagéw non ménfégalin i fédew ne. ³⁰ Atin ménangéy soy boh ne dob tuwaréye bé de ngaén. Atin ménbérédéh mano, ‘Adu, angéy go galbék dob safade béléewe ni.’ Atin bang i ni nga, ‘Hoo, magéwu.’ Endob énda fo ménagéwén. ³¹ Na, ati karang gome de, ati isuwe bé de ngaén i ménodorone bé kétayay boh ruwe?”

Séménumbul ro maro, “I ofoe de.”

Atin bang Jesuse man, “Hoo, atin béréhé ku begom i toowe, i de ménalsa étew loo bé de lémiful do kémubra buwis brab de sundal géahur dob kéféguléw i Tuluse géétah na begom. ³² Non i Juan Bautistawé ménangéy dob begome fégétiga no begom i métintuwe aguwon, éndob énda ménunur gom de. Endob i de lémiful kémubra buwis brab de sundal énggésénule ro ménunur ro de. Atin fiyon fo ké énggito gom i kégésénule ruwe, énda fo gésénule gom taloo no munur gom de.”

I binuwayae fantag bé de tete témalima

³³ Atin ménbérédéh man i Jesuse mano, “Fégélingo gom nay ni ségiyo binuwaya. Wén i ségétewe étew wén i safadén nohoko no do ubas. Atin fénlangkatén i lémiwéte de, atin kénélatén i fédongo nuwe bé fégékérése bé de onokén. Atin

réménigo so tambala. Tidéw béno, fentalimaén bé de ségiyo étew. Tidéw béno, ménagéw mangéy dob mérayue ingéd. ³⁴ Amun énggumah i gaiy kékétewe de, sénuguén i de sugu-sugué no inok doté roy kaane de baad bé de onokén. ³⁵ Endob i de témalima bé safade, génamak roy de ni sugu-suguén. Atin lénubag roy ségétewe de, atin fénléhu roy ségétewe de, atin nibéro ro batéw i gétéléwe de taman ménléhu. ³⁶ Tidéw béno, i gefee bé safade ni, sénuguén man i de ségiyo do sugu-sugué no éndob mas na médoo. Endob i de témalima bé safade, ségiléw soy rénigo ruwe dob berowe. ³⁷ Tidéw béno, i gefee bé safade ni, sénuguén i tintuwe ngaén non fénggitungén mano, ‘Fégadata roy nga guwe.’ ³⁸ Endob amun énggitoy de témalima bé safad ne, ménésbérédéh-bérédéh ro maro, ‘Been i niy nga i gefee bé ni safad. Féléhué tom inok gékatom i ni safad.’ ³⁹ Mélaw génamak ro, atin fénut ro dob liyuy safade. Tidéw béno, fénléhu ro.”

⁴⁰ Atin fentaus Jesusey kékérédéh ne mano, “Amuk gégumah i gefee bé safade ni, ati rigoné nuwe dob de témalima bé safad ne?”

⁴¹ Séménumbul ro maro, “Angéyé no féléhuén i de ni tete étew. Tidéw béno, irayén man dob ségiyowé témalima inok iray ro dey kaane baad bé de nohok ké gégumah i kékétewe de.”

⁴² Atin ménbérédéh i Jesuse dob berowe mano, “Aw énda séna énggébasana kom i Ménuslate Kékérédéh i Tuluse mano, ‘I batéwe nikaay de réménigo bé lawie, been i ménwaléye toow na fo balilaga fiyo batéw. I ni réningoy Kadnane ula-ula, atin mágaf tom de.’”

⁴³ Atin fentaus Jesusey kékérédéh ne mano, “Mélaw béréhé ku begom i Tuluse éndaén sarigé noy safad ne dob begome. Yamula sarigé no dob de ségiyo étew rigoné roy kétaya nuwe. I atag i ni, éndaén féguléwoy Tuluse begom. Yamula féguléwo noy de ségiyo étew munur dob Beene. ⁴⁴ Atin atiy mélawue dob nan batéw toow fo

mébinasa. Brab buluk i batéwe ni mélawu dob de étew, rénahé no bero maak bubuk sébuwan.”

⁴⁵ I de odoroy de fadi brab de Fariseo, énggelingoo roy de ni binuwaya nuret Jesuse. Atin gétiga ro beroy bénrého nuwe fantag bé de ni. ⁴⁶ Mélaw ténlama ro kénéfó i Jesuse, éndob énda gagane ro de non ménggilak ro bé de médoor do ménlimud do étew diyo. Non i de ni étew kénarang roy Jesuse ségétew sénarigoy Tuluse muret bé kékérén ne.

22

I binuwayae fantag bé uyote

¹ Atin ménuret man i Jesuse binuwaya dob de étew. ² Ménbérén mano, “I kéféguléw i Tuluse loo bé ni. Wén i ségétewé datu réménigo karagiya dob uyot i nga ne lagéy fébawagén.

³ Amun énggumah i gaiwe, sénuguén i de sugu-sugué no mangéy témaugéy bé de étew sénéngkat ro brab émbérén dob berowe bé énggumahén i gaiuyote brab fatut magéw ro mangéy dob lawine. Endob ménika ro magéw.

⁴ Mélaw i datue ni sénuguén man i de ségiyo sugu-sugué no mangéy mérén dob de ni do étew sénéngkat ro mano, ‘Méntafayén i karagiye béléewe ni. Ménsumbalién i de bobo ayam atin méntogohén i kéluhanane. Enggomén, angéy gomén dob uyote ni.’ ⁵ Endob i de étew sénéngkat ro, énda fo nifat ro de brab énda fo ménangéy ro dob uyote ni. Yamula i ségétewé de ménangéy dob safad ne, atin i ségétewé de ménangéy dob daganga nuwe. ⁶ Atin i de dumo bé de ni étew sénéngkat ro génamak roy de sugu-suguéy datue ni. Atin lénubag ro brab fénléhu ro bero.

⁷ Mélaw i datue ni toow fo ménkérít. Mélaw sénuguén i de sundalo no atin fénléhu roy de ni étew ménméléhu, atin ténuwég roy ingéd ruwe. ⁸ Tidéw bénoré, ménbérén dob de sugu-suguén mano, ‘Méntafayén i uyote, éndob i de sungu do étew sénéngkat gu énda fo médait ro mangéy dini. ⁹ Agéw gom mangéy dob de dakél aguwon atin

séngkat gom médoor do étew taman atiy gito gome de.’ ¹⁰ Mélaw i de sugu-suguén ménagéw ro dob de aguwon atin lénimud roy de médoor do étew, sani kéluhanay de énggito ro do fiyo étew brab do tete étew. Atin mélaw i gonoy uyote ni toow fo ménfénó bé étewé. ¹¹ Endob amun ménahur i datue inok téngténgé noy de kana, énggito noy ségétewé lagéy énda kéménégalén loo bé fatute dob uyote. ¹² Atin ménenginsa i datue mano, ‘Adih, sedek ménahur go dob ni uyot énda kéménégal go loo bé fatute?’ Endob énda séménumbul i lagéye ni.

¹³ Tidéw bénoré, bénréh i datue dob de sugu-sugué no mano, ‘Ikét gom i de kémérén brab de sékéyén, atin ibér gom dob liyuy lawie ni mangéy dob délémore. Diyo kémérew brab kémigéti de kifé no.’

¹⁴ Atin fénggilid Jesusey binuwayae ni mano, “Non fiyon fo ké médooy de étew sénéngkat i Tuluse, kloh saén i méfémilie de waléy do étewén.”

Fantag bé buwise

¹⁵ I de Fariseo, ménangéy ro sélimud sébero-bero saén. Atin ménésbérén bérén ro fantag bé ati kétengkad ro bé Jesuse inok gébérén bé békéne damén katabuwan. ¹⁶ Tidéw bénoré, sénugu roy de dumo bé de kuyug ro brab de dumo bé de kuyug Datu Herod mangéy ménenginsa dob Jesuse. Atin ménbérén i de ni étew dob Jesuse maro, “Maistéro, gétiga key toow i kétoro me. Brab métintu go, énda i isu ramigo mo bé de étew. Yamula toroé moy toowe fantag bé kétayay Tuluse toow. ¹⁷ Mélaw bérén bérén begey, ati karang me de, aw fatut gey ba mayad buwis dob Sesare, sani datue dob Roma taloo no énda?”

¹⁸ Endob i Jesuse énggétiga noy tetee kétaya ro brab bénréhén bero mano, “I de begom do ubo-ubo gom saén méngintulus. Sedek télamané kom Begén fagakaran? ¹⁹ Féténgténg gom Begén i félatahe kurta fégébuvis.”

Amun niraya ro de, ²⁰ ménenginsa i Jesuse dob berowe mano, “Ati gefee dawét brab falas gito gom dob nan?”

21 Séménumbul ro maro, “Ka Sesar.”

Tidéw béno, bénréh Jesuse mano, “Iray gom dob Sesarey ka Sesare. Brab iray gom dob Tulusey kay Tuluse.”

22 Amun énggelingoo roy ni, ménggaif ro bé késumbul Jesuse. Atin ménagéw ro téna gak roy Jesuse.

Fantag bé kétébulee

23 Bé no so téresang, wén i de Saduseo ménangéy ro dob Jesuse. (Been i berowey de énda méngintoow bé kétébulee i Tuluse bé de étew moso.)

24 Ménbérélh ro dob Jesuse maro, “Maistéro, bénréh Moisese bé buluk i ofo i ménléhue, brab énggélédo noy bawag ne, énda i nga ro, fatut bawagéy tuwaréy ne inok wén i séfu i ni étew bé tuwaréy ne. **25** Na, wén i fitew gétew sétuwaréy falan lagéy ménbati dini Brab i ofoe de ménawag. Tidéw béno, ménléhu énda i nga ro. Tidéw béno, i gétunduge de bénawagén soy bavage fénled i ofo ne. **26** Atin ménléhu so énda i nga ro. Atin i gétéléwe de bénawagén so taman dob géfitew ruwe. Endob ménléhu ro kéluhanan énda i nga ro. **27** Tidéw béno, ménléhu soy ni libun. **28** Mélaw bé gaiy kétébulee moso, ati isuwe bawag i ni libun bé de ni fitew gétew sétiman idéng? Non énggébawaga no bero kéluhanan bé méuyag ro de séna.”

29 Séménumbul i Jesuse mano, “Tintu békén katabuwan i kéfégitung gome. Non énda gétiga kom i Ménsulate Kébérélh i Tuluse taloo noy barakat ne. **30** Non amuk tébule i de étew, ségiléw ro bé de téaki dob lawayo atin énda sébawag ro. **31** Atin fantag bé kétébulee, aw énda séna énggébasana kom i Ménsulate Kébérélh i Tuluse dob begome? **32** Fiyon fo ké ménléhu i ro Abrahame, Isak, brab Jakob, bang i Tuluse, ‘Begéney Tuluse féngadafé Abrahame, Isake, brab Jakobe.’ I atag i ni, i Tuluse féngadaféy de méuyag do étew, békén i de ménléhu.”

33 Atin amun énggelingoo de étew i ni kétoro Jesuse, ménggaif ro.

I toowe na fo gérator sugu

34 I de Fariseo, amun énggelingoo roy fantage bé kéfántés Jesuse bé de Saduseo, ménsélimud ro. **35** Atin i ségétewe bero témo ro bé kitabe, téneungkadén i Jesuse inok énda damén katabuwan i késumbul ne. **36** Ménénginsa mano, “Maistéro, ati isuwe toow fo gérator bé de sugu dob kukumay Tuluse?”

37 Séménumbul i Jesuse mano, “Féimu go bé Kadnane Tulusém bé kéluhanay fédew me, brab kéluhanay kamatu me, brab kéluhanay itunga muwe. **38** Been i niy toow fo gérator sugu. **39** I géruiwowe toow fo gérator sugu ringon so bé sunguwe de. Féimu go bé dumo muwe ringon so bé kéimu me bé kaame lowoh. **40** I toow atag i kéluhanay de kukuman niray Moisese betom tidéw dob ni ruwo timan sugu. Tidéw so dob niy kéluhanay ténero i de sénarigoy Tuluse muret bé kékérélh ne.”

41 Amun ménlimud sénay de Fariseo, ménénginsa i Jesuse dob berowe mano, **42** “Ati antaf gom bé Kristowe? Ati katufua nuwe?”

Séménubul i de Fariseo maro, “Dabid i katufua Kristowe.”

43 Ménbérélh man i Jesuse mano, “Amuk loo, ati kéfanu-fanu nuwe ké fénbérélh i Rémogor i Tuluse bé Dabide bé fédawétén i Kristowe ‘Kadnan?’ Non ménbérélh i Dabide mano, **44** ‘I Kadnane ménbérélh dob Kadna kuwe, sar go dob kuwono kuwe taman témanan bé de sébanil Beem.’ **45** Amuk fénbérélh Dabide Kristowe ‘Kadnan’, ati kéfanu-fanu nuwe ké i Kristowe séfu Dabide saén?”

46 Endob énda i ségétew bero énggésumbul, ménantés ro. Atin tidéw bé no gai, éndaén i étew émbaraw ménnginsa dob Jesuse.

23

1 Tidéw béno, ménbérélh i Jesuse dob de ménsélimud étew brab dob de kuyugén mano, **2** “I de témo ro bé kitabe brab de Fariseo, beroy de étew sénarigon témo ro bé kitabé niray Moisese. **3** Mélaw fatut odoro

kom démoyun i kéluhanay kétoro ruwe begom. Endob kagom iringén i de rigoné ro non énda modor ro bé karowe kétoro. ⁴ Sugué roy de étew bé médoowe, maak féobo ro beroy de toow fo émbégat do obo, éndob énda témabang ro de. ⁵ Fédayéw-dayew ro saén dob téngaangay de étew. Féndakél roy de fédongo ro bé Ménsulate Kébérél i Tuluse ténaléy ro bé de kémér ro inok gitoy de étew. Atin féntah roy de kégal ro maak do tintu fo méngintulus. ⁶ Atin méuyot ro mésar dob de fiyo saran dob kandulie brab dob de lawi féngadafan. ⁷ Atin méuyot ro fégadatan ségifaén dob de fadiyan brab fédawét i de étew bero 'Maistéro.' ⁸ Endob kagom fédayaén i de étew fédawét ro begom 'Maistéro', non fantay-fantay gom sédumon atin ségétew saén i Maistéro gome. ⁹ Atin kagom fédawét i de étew dob duniyae ni 'Abay', non ségétew saén i Abay gome sani Tuluse dob lawayo. ¹⁰ Atin kagom so fédayaén i de étew fédawét ro begom 'Uléw', non ségétew saén i Uléw gome sani Begéne, Kristo. ¹¹ I toowe na fo gérotor dob begome fatut waléy sugu-suguén. ¹² Atiy étewe téfégérotor, fégérifantadén. Atin i étewe térifantad, fégérotorén.

¹³ "I begome do Fariseo brab do téromo bé kitabé, mékukum gom fo toow. Ubo-ubo saén i kéfengintulus gome. Alangé kom i de étew méuyot mahur dob kéféguléw i Tuluse. Mika gom mahur atin alangé kom i de étew méuyot mahur. ¹⁴ Mékukum gom fo toow do téromo bé kitabe brab begome so do Fariseo. Ubo-ubo saén i kéfengintulus gome. Lafisé kom i de libun baléw inok afasé kom i de lawi ro. Tidéw bén, démasal gom bé de métahad kédasal dob téngaangay de étew non makom ké médirung i de ni tete rigoné kom. Sabaf bé ni toow na fo gétimal ké mékukum gom moso.

¹⁵ "Mékukum gom fo toow do téromo bé kitabe brab begome do Fariseo. Ubo-ubo saén i kéfengintulus gome. Mégéror gom magéw émféunur bé

ségétewé étew dob Tuluse. Endob amuk munur, féwaléyé kom toow na fo tete bé begome, funa no toow na fo fatut mangéy dob uleono emferno.

¹⁶ "Mékukum gom fo toow. Maak do langafén gom éndob araké kom i de ségiyo étew. Ténoro gom bé fiyon fo ké wén i étew sémafa bé lawi i Tuluse, ulanden ké énda métuma no. Endob amuk wén i rémigo safa bé de bélwon dob lawi i Tuluse, béréhé kom tintu fo fatut tumané noy fasad ne. ¹⁷ Dufang gom brab maak langafén gom. Ati isuwe toow na fo gérotor, i de bélwon dob lawi i Tuluse look i mékétéfuwe lawi i Tuluse funay de bélwon mékétéfu? Toow na fo balilaga i lawi i Tuluse. ¹⁸ Atin téromo gom so bé amuk sémafa i étewe dob ahayane tulakan dob lawi i Tuluse, ulanden ké métuman i fasad ne. Endob amuk sémafa bé atiy tulake diyo dob no tulakan béréhé kom dob beene bé tintu fo fatut tumané noy fasad ne. ¹⁹ Toow gom fo maak do langafén! Ati isuwe toow na fo gérotor, i tulake look i mékétéfuwe tulakan funay tulake mékétéfu? Mas gérotor i ahayane tulakan. ²⁰ Mélaw amuk sémafa i ségétewé étew dob ahayane tulakan, énda saén sémafaén dob nan, yamula sémafa so dob kéluhanay de tulak féndiyo dob ahayane. ²¹ Atin amuk sémafa i ségétewé étew dob lawi i Tuluse, énda sémafaén saén dob nan, yamula sémafa so dob Tuluse batí diyo. ²² Atin amuk sémafa i ségétewé étew bé lawayo, sémafa so dob saray Tuluse brab dob Tuluse mésaran de.

²³ "Mékukum gom fo toow do téromo bé kitabé brab de begom do Fariseo. Ubo-ubo saén i kéfengintulus gome. Iray gom dob Tulusey géfoloe bé kéluhanay languntama kome fiyon i faninué nohok gom, éndob dénigur gom i de gérotor sugu dob kitabe loo bé kétintuwe, brab kégédawe, brab gésarigone adat. I de ni niray gom fatut rigoné kom éndob kagom digurén i de dumo de. ²⁴ Maak do langafén gom marak bé ségiyowé étew! Modor gom bé de kloh do sugu

éndob félisé kom i de gérotor do sugu. Ségiléw gom bé ségétewe étew kédané noy liféte tidew dob wayége inémé no, éndob inémé noy dakéle ayam.

²⁵ “Mékukum gom fo toow do téromo bé kitabe brab begome do Fariseo. Ubo-ubo gom saén métintu éndob i de fédew gom toow fo tete. Non toow gom fo arumén brab lémiful. Ségiléw gom bé ségétewe étew urahé noy tabue look biléwe fingé fuweh saén éndob dungisan fo toow dob bukag ne. ²⁶ Maak do langafén gom, begom do Fariseo, non énda gito gom i toowe. Féfiyo gom i de fédew gom loo bé ségétewe murah bé bukag i tabue. Tidew béo, tintu gom fiyo, brab métintuy adat gome so.

²⁷ “Mékukum gom fo toow do téromo bé kitabe brab de begom do Fariseo. Ubo-ubo gom saén fiyo éndob tete i de adat gom. Ségiléw gom bé de lébeng fiyoy de falas ro dob liyuwe, éndob dob bukage wén i do bukal de brab do mérénah do bangkay. ²⁸ Non ubo-ubo gom saén métintu inok i de étew karangé ro begom do fiyo étew. Endob i de fédew gom méfeno bé tugie brab sala.

²⁹ “Mékukum gom fo toow do téromo bé kitabe brab de begom do Fariseo. Ubo-ubo saén i kékengintulus gome. Rémigo gom do fiyo lawi lébengon kay de sénarigoy Tuluse, brab rémigo gom fiyo do lébengon kay de métintu étew ménrugayén ménléhu. ³⁰ Atin béréhé kom makom, ‘Amuk méuyag gey bé gaiwe méuyag i de ni sénarigoy Tuluse muret bé kékéréd ne, énda mamung gey bé de katufua key méméléhu bero.’ ³¹ Endob bé nan kékéréd gom, fégito gom bé begom i de séfu i de ménméléhu bé de ni sénarigoy Tuluse. ³² Mélaw fatut fétaus gom i de tete rénigoy de katufua kom. ³³ Maak do ulé gom non i de katufua kom maak do ulé ro. Mélaw kagom karangén de kékéréd gom bé kékukume begom mangéy dob uleono emferno. ³⁴ Mélaw sugué kuy de sénarigoy Tuluse muret, brab de gétigan étew, brab de téromo mangéy

dob begome. Endob féléléhué kom i de dumo bero, brab féléléhué kom i de dumo bero dob de krus, brab badasé kom i de dumo bero dob de lawi féngadafan, brab fégétaé kom i de dumo bero dob de ségiyo-giyo ingéd. ³⁵ Mélaw mékukum gom bé sala i de étew bé kékéléhu ruwe bé de métintu étew, tidew dob sunguwe métintu étew ménléhu féndawé Abel taman dob Sekariase sani nga Barakiase. Fénléhu dob lawi i Tuluse dob élét i ahayane tulakan brab mékétéfuwe sibéy. ³⁶ Béréhé ku begom i toowe, i de begom do étew méuyag béni mékukum gom sabaf bé de ni sala bé kékéléhue bé kéluhanay de ni.”

³⁷ Tidew béo, ménbéréd i Jesuse fantag bé adat i de étew dob Jerusalem mano, “I Begome do étew dob Jerusalem, tete i fédew guwe fantag bé begome. Non fénléhu gom i de sénarigoy Tuluse muret brab nibéro kom batéw i de sénugu dob begome taman ménléhu ro. Firoy gule i kétaya kuwe térimu begom loo bé kétimu i méritone manok télikub-kubo noy de fiyakén bé defafakén? Endob ménika gom de. ³⁸ I lawi gome métak brab mébinasa moso. ³⁹ Atin béréhé ku begom, tidew béléewe ni, éndaen gito gom Begén taman énda émbéréd gom moso, ‘Féfiyonéy Tuluse damén i gégunahe tidew dob Kadnane.’ ”

24

Fantag bé tamfaday duniyae

¹ Ilala Jesuse magéw tidew dob lawi i Tuluse, i de kuyugén ménfégédét ro dob Beene toroé roy de fiyo falasén do lawi bé lawi i Tuluse. ² Endob ménbéréd i Jesuse mano, “Gito gom i de ni? Béréhé ku begom i toowe, i kéluhanay de ni mébinasa, brab fiyon i de batéw fénggérigo de émbéragar ro.”

³ Amun ménasar i Jesuse dob tuduke féndawé Olibo, ménangéy i de kuyugén dob Beene sébero-bero saén. Atin ménbéréd ro maro, “Béréhém begey kédiron mérigoy de ni. Brab ati

fégéolonone de ké gédétén gégumah i késéfule me brab tamfaday de gai?”

4 Séménumbul i Jesuse mano, “In-gat gom inok énda méfagakaran gom.
5 Non médooy mosoy de étew gégumah usaré roy dawét guwe, brab béréhé ro maro, ‘Bégéney Kristowe.’ Atin médooy de géfagakara ro. **6** Atin gélingoo kom i kékérél i sétibohe brab gélingoo kom soy fantage bé de gira. Endob kagom mégilak de. I de ni kailangan mérigo éndob békén sénay ni tamana nuwe. **7** I de ingéd sétiboh ro bé de ségiyo ingéd. Brab i de sakuf fangangaturan sétiboh ro bé de ségiyo. Atin wén mosoy lénggob brab do luba dob de séségiyo-giyo do ingéd.
8 Endob i de ni féganaya no saén loo bé kékéganay i kékédawétay ségétéwe libun obor gédétén mégénga.

9 “Atin i kéluhanay de étew mérarék ro begom sabaf bé kénéur gome Begén. Atin mélaw kéfoén gom inok férasayé ro begom brab féléhué ro begom. **10** Atin bé beno, wén i médooy do étew témérén munur. Atin sékéfo ro brab mésérarék ro. **11** Tidéw beno, médooy de ubo-ubo sarigoy Tuluse muret bé kékérél ne gégumah brab fégakara roy de médooy do étew.
12 Atin sabaf bé kélégéb i tetee, éndaén ségdaw i de étew. **13** Endob ati géfedaydaye munur taman dob tamfadane, méfukas ro. **14** Atin i ni Fiyo Uret fantag bé kékékuléw i Tuluse ureténi dob kéluhanay de ingéd dob duniyae ni inok gétigay kéluhanay de étew. Tidéw beno, gégumah i tamanane.

15 “Atin gito gom i ‘Mékésirangsirange Surga’ bénréh i sénarigoy Tuluse féndawét Daniel bé do gétah. Atin témindég dob mékétéfuwe gonon.” (Fégésobutéy masawe.) **16** Atin fentaus Jesusey kékérél ne mano, “Bé beno gai, i de étew batí dob Judea fatut méraréy ro dob de tuduk. **17** Atin i étewe dob liyuy lawi ne, békénén fatut mahur dob lawi ne inok angéyé noy insod ne. Fatut magayasén méraréy.
18 Atin i étewe diyo dob safad ne, békénén fatut séfule dob lawi ne inok

angéyé noy géruijwe lafin kégalén.
19 Bé do no do gai, toow fo mékégédaw-gédaw i de libun obor brab de mériton do idéng. **20** Dasal gom dob Tuluse brab ongot gom dob Beene inok dob gaiwe kailanga kom i méraréye bé de gai mélégénéy taloo no gai kétérén.
21 Non toow na fo géttimal i kérégéy ni bé kéluhanay de ségiyo do kérégénon dob ségiyowe gai tidéw bé kélimbag i Tuluse bé duniyae taman so béléewe ni. Atin éndaén i kérégénon loo bé ni tidéw bé beno gai. **22** Endob i Tuluse fénfokoén i do no gai. Amuk énda rénigo noy ni, énda i ségétéw méuyag. Fefokoé noy de gai non ménuray i na nuwe bé de fénémilién étew.

23 “Bé beno gai, amuk wén i émbérél dob begome mano, ‘Téngténg gom, ay niy Kristowe,’ taloo no ‘Diyoo, ay nan,’ kagom munur de. **24** Non gégumah i de émbérél, ‘Begén i Kristowe,’ brab do ubo-ubo sénarigoy Tuluse. Atin gérigono roy de dakél mékégaif inok géfagakara roy de fénémili i Tuluse, amuk fakay.
25 Fétuntay gom i de ni. Béréhé ku dob begome lokut énda séna mérigo no.

26 “Atin amuk wén i émbérél dob begome mano, ‘Téngténg gom, diyo i Kristowe dob gonone énda i étew de batí,’ kagom mangéy diyo. Look amuk émbérél ro maro, ‘Téngténg gom, ay diyoo ménrékunéy,’ kagom munur de. **27** Non i Nga i Kéilawane, sani Begéne, giton i késéfule guwe ségiléw bé kégítone bé kilote rémendaw tidéw sébangan mangéy élédon.

28 “Fiyon atiy gonoy de ménléhu, diyo soy de uwak sétimu.

29 “Enda mérugayén tidéw bé de mérégén do gai, i térsange waléy délémon, brab i térsang kélungonone éndaén rémendawén, brab i de gitoon mélawu ro tidéw dob lawayo brab i de éntingayén dob lawayo mékuyung.
30 Tidéw beno, giton dob lawayoy fégéolonone bé kégumah guwe, sani Nga i Kéilawane. Atin i kéluhanay de étew dob duniyae ni kémérew ro bé kégilak ruwe. Tidéw beno,

gito ro Begén dob rawéne gégumah tidéw dob lawayo barakatan brab rémendaw. ³¹ Atin dob métanuge béréh i témburiwe, sugué kuy de télaki gu mangéy dob séngae gonon dob duniyae ni. Atin timué roy de fénémilién étew gu tidéw dob kéluhanay de ingéd.”

³² Tidéw béno, nuret Jesusey sébaane binuwaya mano, “Fétuntay gom i ni ufama fantag bé kayéwe. Dini dob betome ni, sonom lémbud i de fongo no brab émféantu daun, gétiga kom gédétén i basa médufe. ³³ Ségiléw so bé béno gai. Amuk gito gomén mérigo de ni bénréh gu, gétiga kom gédétén i késéfule guwe. ³⁴ Atin béréhé ku begom i toowe, i de étew méuyag béní, énda méléhu ro taman mérigo de ni. ³⁵ I lawayo diyo brab duniyae ni méalfa, éndob i kékéréh guwe énda méalfaén.

³⁶ “Endob énda i ségétew gétigan bé gaiy kégumah i no gai séfuleu. I de télaki dob lawayo énda gétiga ro de, brab fiyon i Begéne, sani Nga i Tuluse, énda so gétiga ku de. I Abay guwe saén Tulus i gétigane bé nan gai. ³⁷ I késéfule guwe ségiléw bé gai Noehe. ³⁸ Non bé gai Noehe, amun gédétén gégumah i dunuke, i de étew énda ménbuku ro. Yamula ménama ro, méniném ro, ménawag ro taman bé gaiy kéahur Noehe dob barkowe. ³⁹ Non i de étew énda énggétiga roy ati mérigowé séko. Endob tékow énggumah i dunuke atin ménléné ro kéluhanan saliyu bé Noehe brab de samungén. Ségiléw so bé niy kétékow i késéfule guwe. ⁴⁰ Bé béno gai, wén i ruwo gétew lagéy diyo gémalbék dob safade, atin i ségétewe de dotén brab i ségétewe de maféled. ⁴¹ Atin wén i ruwo gétew do libun géming, atin i ségétewe de dotén, brab i ségétewe de émféled. ⁴² Ingat gom mélaw, non énda gétiga kom i gaiy késéfule i Kadna kome, sani Begéne. ⁴³ Fétuntay gom i ni ufama. Amuk i gefee bé lawie gétiga noy gaiwe gégumah i ménakawe, énda fo

fidongén brab énda fédayaé no mahur i ménakawe. ⁴⁴ Mélaw fatut tafay gom sénga tékélid. Non séfuleu bé gaiwe énda karangé kom de.

⁴⁵ “Ati gésarigone brab gétuwane sugu-suguén? Been i sugu-suguéne sénarigoy amu ne méguléw bé de dumo no sugu-suguén, inok irayén i de amaén bé fatute gai. ⁴⁶ Toow fo moror i ni sugu-suguén ké séfule i amu ne brab gito no rémigo bé kaane galbék loo bé fatute. ⁴⁷ Béréhé ku begom i toowe, i amue ni sarigé noy kéluhanay de kaan do éntingayén dob ni sugu-suguén. ⁴⁸ Endob amuk tete i adat i ni sugu-suguén atin fégitungé no mano, ‘Mérugay sénay késéfule i amu guwe.’ ⁴⁹ Atin féganaya noy lémuage bé de dumo no sugu-suguén, atin mama brab miném séréngan bé de molon. ⁵⁰ Tidéw béno, séfule i amu ne bé gaiwe énda gétigay ni de sugu-suguén, atin kétékowan. ⁵¹ Mélaw i amu ne, kukumé noy ni sugu-suguén atin fidioé no dob gonoy de ubo-ubo étew. Diyo kémérew brab kémigét i de kifé no.”

25

Ibinuwayaefantag bé defolo gétew kénogon

¹ Atin nuret Jesuse man i sébaane binuwaya fantag bé késéfule ne mano, “I kénékuléw i Tuluse loo bé ni. Wén i do folo gétew kénogon. Nangéy ro bénalak i ségétewe témérime lagéy. I séngae kénogon wén i kaan solo nuwit. ² Endob i limowe de gétew do béngu brab i de limo de gétew do météldté. ³ Non i de limo de do béngu ménuwit ro do solo éndob énda i do wayégén. ⁴ Endob i de limo de gétew do météldté nuwit roy de solo brab de katiya ménfeno fitroliyo. ⁵ Tidéw béno, ménlis i témérime wéni lagéy. Atin mélaw ménwaleý manat i de ni folo gétew kénogon. Atin énggédong ro.

⁶ “Amun kérara kélungononén, wén i mékese mano, ‘Ay ni néni témérime wéni lagéy énggumahén! Enggomén, angéy

gom balak.’ ⁷ Sonom béno, méntek i de folo ni gétew kénogon, atin ténumo roy de solo ro. ⁸ Tidéw béno, i de béngu ni do kénogon bénréh ro dob de métiledtéd do kénogon maro, ‘Irayan gey bé fitroliyo goma nan, non ménfadéng i de solo gey.’ ⁹ Endob séménumbul i de métiledtéd do kénogon maro, ‘Enda fakayén non kulang i fitroliyo geye ké tukido key de begom. Fatut angéy gom de béléy kagom.’ ¹⁰ Mélaw ménagéw i de béngu ni do kénogon inok méléy ro do fitroliyo. Atin amun ménagéw ro, énggumahén i témérimeawe lagéy. Atin i limowe de do énggétafay, ménodor ro bé témérimeawe ni lagéy ménahur ro dob uyote. Tidéw béno, ménfintuén i béngawane.

¹¹ “Enda mérugayén tidéw béno, énggumah man i de béngu do kénogon. Atin téménawag ro maro, ‘Maistéro, féahurén gey.’ ¹² Endob séménumbul i témérimeawe ni lagéy mano, ‘Tintu fo énda gélolo gu begom.’”

¹³ Atin fénggilid Jesusey binuwayae ni mano, “Been i funa kome fatut mingat. Non énda gétiga kom i gai guwe séfule.”

¹⁴ Atin ménuret man i Jesuse sébaan binuwaya fantag bé kékéulgéw i Tuluse bé de étewén mano, “Wén i ségétéwe étew ménagéw mangéy dob mérayue ingéd. Amun énda séna magéwén de, ténawagén i de sugu-sugué no atin sénarigén i de languntama no dob berowe. ¹⁵ Nirayén dob séngae sugu-suguéen loo bé kétiletdéruwe. Dob sunguwe de niraya no limo ngibu kurta. Atin dob géruijwe de niraya no ruwo ngibu, atin dob gétéléwe de niraya no séngibukurta. Tidéw béno, ménagéwén i ni étew ménangéy dob mérayue ingéd. ¹⁶ Sonom so bé kékéuw i amu ruwe, i sunguwe sugu-suguéen méndagang-dagang. Atin énggéinség de limo ngibu kurta. ¹⁷ Atin loo so bé niy rénigoy géruijwe sugu-suguéen, atin énggéinség de ruwo ngibu kurta. ¹⁸ Endob i gétéléwe sugu-

suguén ménagéw brab kéménalut dob fantade, atin lénébengén i séngibuwekurta sénarig dob beene.

¹⁹ “Tidéw béno, amun ménrugayén, ménsefule i amu ruwe atin ténawagén i de sugu-sugué no inok étuké noy kurta ne. ²⁰ Atin i sunguwe sugu-suguéen, téméningé brab ménbéréh dob amu ne mano, ‘Amu, ay niy limowe ngibu kurta sénarigém dob begéne. Ay ni soy limowe ngibu kurta inségén.’ ²¹ Atin ménbéréh i amu ne mano, ‘Fiyo, mésarigon go brab fiyo go sugu-suguéen. Non mésarigon go bé klohe, mésarigon go so bé médoowe. Méuyotu ké moror go séréngan begén.’ ²² Tidéw béno, i géruijwe sugu-suguéen téméningé brab ménbéréh mano, ‘Amu, ay niy ruwowe ngibu kurta sénarigém dob begéne. Atin ay ni soy ruwowe ngibu inségén.’ ²³ Tidéw béno, ménbéréh i amu ne mano, ‘Fiyo, mésarigon go brab fiyo go sugu-suguéen. Non mésarigon go bé klohe, mésarigon go so bé médoowe. Méuyotu ké moror go séréngan begén.’ ²⁴ Tidéw béno, téméningé i gétéléwe sugu-suguéen. Atin ménbéréh mano, ‘Amu, gétiga ku beem métégas go fo étew. Edoté moy békéne kaam, brab kétewé moy békéne nohokém.’ ²⁵ Mélaw mágilaku fo beem. Atin mélaw, ménagéwu brab bénunéy guy kurta me dob fantade inok énda métadino. Atin téngténgém, ay niy séngibuwé kurta sénarigém dob begéne.’ ²⁶ Tidéw béno, ménkérit i amu ne, atin ménbéréh mano, ‘Tete go fo sugu-suguéen brab faukén go fo toow. Aw gétiga mo médotu kun bé békéne kagén, brab kétewé guy békéne nohok gu?’ ²⁷ Amuk kémarrang go loo bé nan, fatut damén féndiyoém i kurtae dob bangkue inok buluk séfuleu, fakay doté ku brab wén i inségén.’ ²⁸ Tidéw béno, bénréh i amue ni dob de étew dob sékulo ruwe téménindéh mano, ‘Dot gom i kurta ne atin iray gom dob ségétéwe wén i folo ngibu kurtaén. ²⁹ Non i de étew mésarigon ro, umanan irayan inok waléy médooy karowe

de. Endob i de étew énda mésarigon ro, fiyon i klohe dob berowe dotén so. ³⁰ Atin i ni tete sugu-suguén, ibér gom dob liyuwe dob délémone gonon. Diyo kémérew brab kémigét i de kifé no.”

I de bili-bili brab do kambing

³¹ Atin ménuret man i Jesuse ségiyo binuwaya mano, “I Nga i Kéilawane, sani Begéne, amuk séfuleu begey i de télaki gu inok méguléw, mésaru dob sarane kay méguléwe. ³² Atin mélimud dob adafa kuwéy kéluhanay de étew. Atin féganané kuy de fiyo étew bé de tete étew ségiléw bé kékéganay témalimae bili-bili bé de bili-bili no brab de kambing. ³³ Atin fédiyoé kuy de fiyo étew dob kuwono kuwe atin fédiyoé kuy de tete étew dob biwong guwe. ³⁴ Atin i Begéne, sani méguléwe, bérhéhe ku dob de fiyo étew dob kuwono kuwe maku, ‘Fénfiyoy Abay guwe Tulus begom. Enggomén, ahur gom dob kékégné i Tuluse loo bé kékantak ne de tidéw bé kélémbag ne bé duniyae ni. ³⁵ Non amun ménlayafu, fénama gom Begéne. Atin amun méntruménu, féniném gom Begéne. Atin amun énda séna gélolo gom Begéne, ténayakuf gom Begéne dob de lawi gom. ³⁶ Atin amun énda i kégal gu, fénkégal gom Begéne. Atin amun déménruunu, téralima gom Begéne. Atin amun ménfériwu, ténuak gom Begéne.’ ³⁷ Tidéw bén, i de ni fiyo étew émbéréh dob Begéne maro, ‘Kadnan, kédiron i kékito geye Beem mélayaf atin fénama gey Beem, taloo no térumén go atin féniném gey Beem? ³⁸ Brab kédiron i kétayakuf geye Beem dob de lawi gey fiyon fo ké énda séna gélolo gey Beem? Brab kédiron i kékito geye Beem félawas atin fénkégal gey Beem? ³⁹ Brab kédiron i kékito geye Beem déméruruun taloo no ménfériwu go atin ténuak gey Beem?’ ⁴⁰ Tidéw bén, bérhéhe ku bé de fiyo étew maku, ‘Bérhéhe ku begom i toowe, amun méngédaw gom bé ségétéwe gérifantad dumogu, maak méngédaw gom so Begéne.’

⁴¹ Tidéw bén, bérhéhe ku dob de étew dob biwong guwe maku, ‘I begome médaït gom mélukum, féravu gom tidéw dob Begéne. Angéy gom dob aféye énda émfandaén taman sa taman méntafayén ka Satanase brab de kaan do kuyug do saitan. ⁴² Non amun ménlayafu, énda fénama gom Begéne. Atin amun méntruménu, énda féniném gom Begéne. ⁴³ Atin amun énda gélolo gom Begéne, énda ténayakuf gom Begéne dob de lawi gom. Atin amun énda i kégal gu, énda fénkégal gom Begéne. Atin amun déménruunu brab amun ménfériwu, énda téralima gom Begéne.’ ⁴⁴ Tidéw bén, i de ni tete étew émbéréh ro maro, ‘Kadnan, kédiron wayoy kékito geye Beem mélayaf taloo no térumén, taloo no ségétéwe go énda gélolo gey de, taloo no énda i kégalém, taloo no déméruruun, taloo no ménfériwu, atin énda téralima gom Begéne?’ ⁴⁵ Atin i Begéne, sani méguléwe, sumbulo ku bero maku, ‘Bérhéhe ku begome i toowe, amun énda téralima gom i ségétéwe toow fo gérifantad kuyug gu, maak énda so téralima gom Begéne.’ ⁴⁶ Tidéw bén, i de ni do tete étew, féravu gom Begéne téralima gom Begéne.’

26

I bantak i de odoroy de Judío

¹ Amun énggilid i Jesuse téromo bé de ni, ménbéréh dob de kuyugén mano, ² “Gétiga kom amuk méifus i ruwowe gétérésangan, gégumah i gaiy kanduli tome do Judío féravu ‘Témara.’ Bé bén, i Begéne sani Nga i Kéilawane, atéénu inok féléhué ro Begéne dob kruse.”

³ Bé bén so, i de odoroy de fadi brab de odoroy de Judío, ménlimud ro dob lawi i gérotore fadi féravu Kayafas. ⁴ Diyo ménséfagayun ro kékito gey Beem inok féléhué. Endob bénantak ro rigonén kéké énda i ségiyo étew de gétigan. ⁵ Ménsébéréh ro maro, “Békén saén bé lala tome

kémanduli, kinok wén i mérimbur bé de étew.”

⁶ Atin diyo i Jesuse dob lawi i ségétéwe ménadi-adinén fémuteén féndawét Simon, dob ingéde Betania.

⁷ Atin bé lala Jesuse mama, énggumah i ségétéwe libun wén i fiyo katiyaén ménfeno bé balilagae nor fégféamut. Atin ménfégédét dob Jesuse, atin lénukaén dob uléw ne. ⁸ Endob i de kuyugén, amun énggito roy ni rénígoy libune ni, ménwaleý ro mékérit. Atin ménbéréh ro maro, “Sedek séninggula saén i nan fégféamut? ⁹ Non amuk fénbéléy damén i nan nor, wén i médoó kurta gédotén de brab iray damén dob de méskinan.”

¹⁰ Endob i Jesuse énggétiga noy kóbéréh ruwe, atin ménbéréh mano, “Kagom dowoyén i libune ni. Non toow fo fiyoy rénigo nuwe dob Begéne. ¹¹ I de méskinan taus ro bati dob begome sénga tékélid, éndob i Begéne énda démoyunu bati dob begome. ¹² Bé kéluka ne bé fégféamute dob Begéne, fégétafay bé lowoh guwe ké lóbengénu. ¹³ Atin bérhéh ku begom i toowe, dob séngae gonon dob duniyae ni uretén i Fiyowe Uret, uretén soy kérigo nuwe Begéne. Mélaw i de étew gétédémo roy ni libun.”

Irénigo Judase

¹⁴ Tidéw béno, i ségétéwe bé de folo bra ruwo kuyugén féndawét Judas Iskariot ménangéy dob de odoroy de fadi. ¹⁵ Atin ménénginsa dob berowe mano, “Firoy i iray gome begén ké fékéfo guy Jesuse dob begome?” Atin bénayada ro télew folo félatah. ¹⁶ Tidéw bé no gai, sénléd Judasey fiyowe gai fékéfoén i Jesuse.

¹⁷ Amun dob sunguwe fuweh bé kékanduli i de Judio féndawét “Fan énda i Fégfééruk de” look “Témara”, i de kuyugén ménangéy ro dob Jesuse atin ménénginsa ro maro, “Hon i kétaya muwe gono key témafay bé amaé muwe bé ni kanduli?”

¹⁸ Atin séménumbul i Jesuse mano, “Angéy gom Jerusalem atin bérhéh gom dob étewe diyo makom, ‘Engumahén kun i uras i Maistérowe.

Mélaw mamung bé kékandulie “Témara” begey i de kuyugén dob lawi me.”

¹⁹ Mélaw i de kuyugén nodoro roy kóbéréh Jesuse, atin ténafoy roy amaé ruwe kay kandulie féndawét “Témara” dob no lawi.

²⁰ Amun kélungononén, i Jesuse ménasar mama séréngan bé de folo bra ruwo gétew kuyugén. ²¹ Bé lala ruwe mama, bénréh Jesuse mano, “Bérhéh ku begom i toowe, wén sékoy ségétéwe begom émfékéfo Begén.”

²² Tidéw béno, toow fo méntete i de fédew i de kuyugén, atin ménénginsa i séngae ségétew bero dob Jesuse maro, “Kadnan, békén begén, hay?”

²³ Séménumbul i Jesuse mano, “I ségétéwe séréngan Begén mérém fan, beeney émfékéfo séko Begén. ²⁴ I Nga i Kéilawane, sani Begéne, méléhuu loo bé kóbéréh i Ménslate Kóbéréh i Tuluse. Endob toow fo mékégédawgédaw i émfékéfo Begén. Mas na fiyo dob beene ké énda damén ménúmah i ni étew, non mékukum fo toow.”

²⁵ Tidéw béno, ménbéréh i Judase sani ménfékéfo de mano, “Maistéro, békén begén, hay?”

Atin séménumbul i Jesuse mano, “Hoo, beem.”

I kéama i Kadnan

²⁶ I lala ruwe mama, éndot Jesusey fane brab ménfésalamat dob Tuluse. Tidéw béno, sénkébeng-kébengén, brab sénaarén dob de kuyugén. Atin ménbéréh mano, “Ay niylowoh guwe. Dot gom brab ama gom.”

²⁷ Tidéw béno, éndot Jesusey tabue wén i arak de atin ménfésalamat dob Tuluse. Atin nirayén dob berowe mano, “Iném gom de, kéluhana kom.”

²⁸ Non been i niy dara guwe, sani tandaé bé fasad i Tuluse, réménanas inok ménfésagan i de sala i de médoó do étew. ²⁹ Bérhéh ku begom, éndaén minému arak taman dob gaiwe minému mantu arak séréngan begom amuk máguléw i Abay guwe Tulus dob de étewén.”

³⁰ Tidéw béno, kéménanta ro sébaan kanta démayéw bé Tuluse. Tidéw

béno, ménagéw ro mangéy dob tuduke féndawét Olibo.

Nuret Jesusey fantage bé Pedrowe

³¹ Atin ménbérélh i Jesuse dob de kuyugén mano, “Kino séko bé ni kélungonon méraréy gom kéluhanan tagaké kom Begén non wén i Ménsulate Kébérélh i Tuluse mano, ‘Féléhué kuy témalimae bé de bili-bili, atin i de bili-bili no émbéragar ro.’ ”
³² Atin féntaus Jesusey kébérélh me mano, “Endob amuk tébuleu, magéwu métah begom mangéy Galilea.”

³³ Tidéw béno, ménbérélh i Pedrowe dob Jesuse mano, “I begéne, énda fo tagaké ku Beem, fiyon fo ké méraréy i kéluhanay de dumo gu.”

³⁴ Endob ménbérélh man i Jesuse mano, “Béréhé ku beem i toowe, bé énda séna ukoro i férufete bé ni kélungonon, dirungé mo Begén télén gule bé énda gélolo mo Begén.”

³⁵ Ménbérélh man i Pedrowe mano, “Enda fo dirungé ku Beem, fiyon fo ké méléhuu séréngan Beem.”

Atin loo so bé niy kékéföh i de kéluhanay de dumo kuyugén.

³⁶ Tidéw béno, ménagéw i Jesuse beroy de kuyugén dob gonone féndawét Getsemani. Amun énggumah ro diyo, ménbérélh i Jesuse dob berowe mano, “Sar gom dob ni bé lala guwe mangéy démasal dob diyoo.” ³⁷ Atin nuwitén i Pedrowe brab de ruwo gétew lagéy nga Sebedeowe, sani Santiagowe brab Juane. Atin méntete i fédew Jesuse brab ménbuku fo toow. ³⁸ Atin ménbérélh dob de ni télén gétew kuyugén mano, “I fédew guwe toow fo ménbuku taman toow fo démawét. Bati gom dini, brab tulik gom.”

³⁹ Tidéw béno, ménagéw i Jesuse gumaha téabar. Atin méntéléngkéb méntéunsum brab déménasal mano, “Abay, amuk fakay saén, kago fédayaén Begén mérasay. Endob i kaame saén kétayan i mérigowe damén, békén kagén kétayan.”

⁴⁰ Tidéw béno, ménsefule dob de télén ni gétew kuyugén. Atin énggito no bero énggfidong. Ménbérélh dob

Pedrowe mano, “Aw énda wayo gétulik go fiyon ségeuras saén?” ⁴¹ Atin ménbérélh dob berowe télén gétew mano, “Tulik gom, atin dasal gom inok énda métukawan gom. Méuyot gom rémigo bé kétaya kuwe, éndob i de lowoh gom mélubay brab magad géfélis bé de sugu gu.”

⁴² Tidéw béno, ténagak Jesuse man bero, atin déménasal mano, “Abay, amuk énda fakayén ké gésélyahu bé ni kérasay, mérigo damén i kétaya muwe.” ⁴³ Tidéw béno, ménsefule man i Jesuse mangéy dob de télén ni gétew kuyugén. Atin énggito no bero énggfidong non toow ro fo manat.

⁴⁴ Tidéw béno, ténagak Jesuse man bero bé gétéléwe gule inok démasal. Atin déménasal ségiléw so bé énggéétahe de. ⁴⁵ Tidéw béno, ménsefule man mangéy dob de télén ni gétew kuyugén atin ménbérélh dob berowe mano, “Aw tafay gom so fidong brab témérén? Téngténg gom! Enggumahén i urasse fékéfo i Nga i Kéilawane, sani Begéne, atin atéénu dob de ménasala étew. ⁴⁶ Na, tek gom, magéw tomén. Téngténg gom, ay nan nén gégumah i émfékéfoe Begén!”

I kékéföh bé Jesuse

⁴⁷ Amun émbérélh sénay Jesuse, énggumah i Judase sani ségétéwe bé de folo bra ruwo gétew kuyugén. Atin wén i dakéle ménlimud étew dob beene énggumah. Non sénugu i de odoroy de fadi brab de odoroy de Judio bero. Atin ménuwit ro do sundang brab do bastun. ⁴⁸ Atin énggétiga roy ati fégélolono ruwe bé Jesuse, non amun énda séna gégumah ro diyo, bénréh Judase bero mano, “I étewe aréké ku, kéro gom non Been.”

⁴⁹ Mélaw sonom so bé kégumah Judase, ménfégédét dob Jesuse brab ménbérélh mano, “Fiyo kélungonon, Maistéro.” Tidéw béno, narék Judasey Jesuse.

⁵⁰ Tidéw béno, ménbérélh i Jesuse dob Judase mano, “Adih, fétausém i kérigo muwe bé rigoné muwe.”

Tidéw béno, i de étew ménodor bé Judase, ménfégédét ro dob Jesuse brab kénéfo ro. ⁵¹ Atin wén i ségettéwe kuyug Jesuse bénindasén i sundang ne atin téni bohén i ségettéwe riféy gérotore fadi brab ménsilaf i ségébalae bé kelingo ne. ⁵² Endob ménbérélh i Jesuse mano, “Rumaém i sundang ma nan. Non i kéluhanay de témi boh, méléhu ro so bé sundange. ⁵³ Aw énda ba gétiga mo de? Amuk kétaya ku, gétawagu mongot tabang dob Abay guwe Tulus, atin sugué noy laksaéne do télaki no téma bang Begén matuhon bé de ni étew. ⁵⁴ Endob amuk rigoné kuy nan, énda métuman i de Ménsulat Kébérélh i Tuluse fantag bé ati mérigowe dob Begéne.”

⁵⁵ Tidéw béno, ménbérélh i Jesuse dob de ménlimud do étew mano, “Sedek ménuwit gom do sundang brab do bastun, inok kéfoé kom Begén maak ségettéwu tulisan kéfoé kom? Sénga fuweh diyou dob lawi i Tuluse témo, éndob énda kénéfo gom Begén. ⁵⁶ Endob ménrigoy kéluhanay de ni inok métuman i Ménsulate Kébérélh i Tuluse sénulat i de sénarigo no.”

Tidéw béno, kéluhanay de kuyugén ménraréy téragak roy Jesuse.

I kékukume bé Jesuse

⁵⁷ Atin i de étew kéménéfo bé Jesuse nuwit ro dob lawi i gérotore fadi féndawét Kayafas. Diyo ménlimud i de témo, bé kitabé brab de odoroy de Judio. ⁵⁸ Atin i Pedrowe ménfuray ro bero éndob énda ménfégédétén, métaman saén dob fésayaway lawi i gérotore ni fadi. Atin ménahur dob fésayawane ni brab ménasar diyo beroy de guwardiya inok gétiga noy ati mérigowe dob Jesuse. ⁵⁹ Atin i odoroy de fadi brab kéluhanay de ménlimud do odoron séménléed ro do tugi kétébo bé Jesuse inok kukumé ro méléhu. ⁶⁰ Endob énda i énggelingoo ro funa ro de méméléhu, fiyon fo ké médooy de téminindég brab ménbérélh do tugién kétébo bé Jesuse. Tidéw béno, wén i ruwowe gétew lagéy téminindég brab ténebo roy Jesuse. ⁶¹ Ménbérélh ro maro, “Ménbérélh i ni

étew mano, ‘Gébinasana kuy lawi i Tuluse atin fétindégé ku man bé téléwe gétérésangan.’”

⁶² Tidéw béno, i gérotore fadi téminindég brab ménbérélh dob Jesuse mano, “Ati késumbul me bé ni kétébo ro Beem?” ⁶³ Endob ménantés i Jesuse. Tidéw béno, ménbérélh man i gérotore ni fadi mano, “Sugué ku Beem sémafa dob adafay méuyage Tulus, aw Beeme bay Kristowe Nga i Tuluse?”

⁶⁴ Atin sémenumbul i Jesuse mano, “Toow i nan bénréhém bé Nga i Tuluse Begén. Atin bérélhé ku begom i toowe, gito gom i Nga i Kéilawane, sani Begéne, mésar moso dob ku-wonoy barakatane Tulus brab gito gom Begén dob de rawén séfuleu tidéw dob lawayo.”

⁶⁵ Sonom béno, i gérotore ni fadi amun énggelingoo noy ni kékérélh Jesuse, kénusien i kégal ne inok fégito noy kékérít ne de. Atin ménbérélh mano, “Mékémurka fo toow i kékérélh ne non réféngé noy Tuluse! Endaén kailanga tom i témeboe de dob betome. Non énggelingoo tomén i mémurkae kékérélhén béléewe ni. ⁶⁶ Ati karang gome de fatut rigoné tom?”

Atin sémenumbul i de odoron maro, “Fatut mémukum méléhu.”

⁶⁷ Tidéw béno, dénuraa roy rangih Jesuse atin lénubag ro. Atin wén soy do témenamfiling bé Jesuse. ⁶⁸ Atin ténléb roy de moto no bé munsalawe brab ménbérélh ro maro, “Amuk Beem i Kristowe, antukém ké ati témenamfilinge Beem.”

Dénirung Pedrowey Jesuse

⁶⁹ I lala i de ni mérigo, i Pedrowe diyo ménasar dob fésayawane. Atin ménfégédét i ségettéwe kénogon sugu-suguéy gérotore fadi. Atin ménbérélh dob Pedrowe mano, “Beem soy dumo Jesuse tidéw Galilea.”

⁷⁰ Endob dénirung Pedrowe dob téngaaingay de étew diyo mano, “Enda gétiga kuy nan bérélhé mo.” ⁷¹ Tidéw béno, ménangéy i Pedrowe dob bengaway fésayawane. Diyo wén i

ségiyowe kénogon sugu-suguén énggito noy Pedrowe. Atin ménbéréh dob de lagéy diyo mano, "Ay niy ségétewe dumo Jesuse tidew Nasaret."

⁷² Atin dénirung Pedrowe man mano, "Méléhhu so dob ni, énda gélolo guy nan lagéy."

⁷³ Enda ménrugayén tidew béno, i de lagéy téménindég diyo ménfégédét ro dob Pedrowe. Atin ménbéréh ro maro, "Tintu fo beem i ségétewe bero. Non dob kébéréh me énggololo gey beem ségétew go so tidew Galilea."

⁷⁴ Tidew béno, sémenafa foy Pedrowe dob berowe mano, "Amuk tugio ku begom, kukuméy Tuluse begén. Enda gélolo guy nan étew!"

Sonom béno, ménukoro i férufete.

⁷⁵ Atin énggétédémo Pedrowey kébéréh Jesuse mano, "Bé énda séna ukoro i férufete, dirungé mo Begén télew gule bé énda gélolo mo Begén." Mélaw i Pedrowe, ménusut tidew diyo atin kéménrew fo toow.

27

¹ Amun toow géfuwén, i kéluhanay de odoroy de fadi brab de odoroy de Judio, ménlimud ro inok bantaké roy kéféléhu ruwe bé Jesuse. ² Atin nikét roy Jesuse brab nangéy ro naté dob Pilatowe sani méguléwe tidew Roma.

I kéléhu Judase

³ I Judase, sani ménfékéfoe de, amun énggito noy kékukume bé Jesuse, énggésénule. Mélaw nuwitén séfule i télwe folo félatah mangéy dob de odoroy de fadi brab dob de odoroy de Judio. ⁴ Atin ménbéréh mano, "Ménsalau non fénkéfo gu inok féléhuén i ni ségétew étew énda i rénigo no tete."

Endob sémenumbul i de odoron maro, "Ulanden dob begeye. Kaam saén sala i nan."

⁵ Tidew béno, i Judase nibérén i de kurta ni dob lawi i Tuluse, atin ménagéw tidew diyo. Atin ménfétoyo ménitébitin.

⁶ I de odoroy de fadi ténimu roy de félatah ni brab ménbéréh ro maro, "I ni kurta fénggáféléhu bé étewe, mélaw énda fakayén dob kitab tome

itongén dob tulakane dob lawi i Tuluse." ⁷ Atin amun ménagayun ro, nusar roy kurtae ni fégébéléy bé fantad i ségétewe rémigo binangga, inok wén i fantad lébengon bé de étew énda batí ro dob Jerusalem. ⁸ Been i funay fantade ni féndawét "Démara Fantad" taman béleewe ni.

⁹ Mélaw ménuman i kébéréh i sénarigoy Tuluse muret bé kébéréh ne bé do gétah féndawét Jeremias mano, "Endot roy télwe folo félatah, sani kurtae ménagayun i de Judio fénggábéléy de. ¹⁰ Atin nusar roy ni kurta fénggábéléy bé fantad i ségétewe rémigo do binangga, loo bé sugu i Kadnane Begén." Been i niy kébéréh Jeremiase bé gétahé.

I kékukume bé Jesuse

¹¹ Atin i Jesuse téménindég dob adafay méguléwe tidew Roma féndawét Pilato. Atin fénénginsaa noy Jesuse mano, "Aw Beem i Datu i de Judio?"

Atin sémenumbul i Jesuse mano, "Beem i ménbéréh de." ¹² Endob amun ténebo i de odoroy de fadi brab de odoroy de Judio, ménantés saén i Jesuse.

¹³ Mélaw ménbéréh i Pilatowe dob Jesuse mano, "Sedek énda sumbulo moy kéluhanay de kétobo ro ni Beem?"

¹⁴ Endob énda sémenumbul i Jesuse, ménantés saén. Mélaw ménggaif fo toow i méguléwe.

¹⁵ I ni ménrigowe bé gaiy kékandulie Témara. Atin i adat i méguléwe, sénga kanduli ro Témara témangéy ségétew féri su fémiliéy de ménlimud do Judio. ¹⁶ Bé no gai, wén soy ségétewe bantugén féri su féndawét Barabas.

¹⁷ Mélaw amun ménlimud i de étew, ménénginsa i Pilatowe dob berowe mano, "Ati isuwe kétaya kom tangéyé ku inok géésut dob begome? Barabas loo ké Jesuse féndawét so Kristo?"

¹⁸ Rénigo noy ni non énggétiga no i de odoroy de Judio, naté roy Jesuse non ménadaléw ro de.

¹⁹ Amun diyo ménasar i Pilatowe dob saray kémukume, fénksamfay i bawag ney sébaane kébéréh mano, "Kago

rigonén i éntingayéne dob ni étew énda i salaén. Non wén i énggétéginefó kuwe na kélungonono atin toowu fo ménbuku fantag bé Beene.”

²⁰ Endob i de odoroy de fadi brab de odoroy de Judio, fénfagayu roy de ménlimud do étew bé ongoté ro dob Pilatowey tangéyé noy Barabase, atin féléhuén i Jesuse. ²¹ Endob i Pilatowe ménénginsa mano, “Aw ati isuwe wayo kétaya kom tangéyén inok géésut dob begome?”

Atin séménumbul i de étew maro, “Barabas.”

²² Atin ménénginsa i Pilatowe mano, “Ati mélaw i rigoné kuwe dob Jesuse féndawét so Kristo?”

Séménumbul ro kéluhanan maro, “Féléhuén dob kruse!”

²³ Endob ménénginsa man i Pilatowe mano, “Endob ati tetee rénigo no?”

Tidéw béno, ménkes i de étew minut métanug maro, “Féléhuén dob kruse!”

²⁴ Amun énggétiga Pilatowe énda fo magayun i de étew atin sérimbur ro séko, éndotén i wayége atin méngguse dob téngaangay de étew. Atin ménbéréh dob berowe mano, “Békén kagén sala i kéléhu i ni étew énda i salaén. Kagom saén aturan.”

²⁵ Atin ménbéréh i kéluhanay de étew maro, “Kagey aturan i kéléhu ne brab aturay de séfu gey so.”

²⁶ Tidéw béno, ténangéy Pilatowey Barabase mésut mangéy dob de étew. Atin fentafésen i Jesuse. Tidéw béno, natéén dob de sundalo inok kélabo ro dob kruse.

²⁷ Tidéw béno, i de sundalo Pilato nuwit roy Jesuse mahur dob lawi Pilatowe. Atin i kéluhanay de dumoro sundalo ségbataliyon ménlimud ro géliwét bé Jesuse. ²⁸ Atin lénékas roy de kégalén brab fénkégal ro bé furowe kégal maak datu. ²⁹ Tidéw béno, lénuku roy suwarane kélég atin fénsayaf ro bé Jesuse, atin fendiyo roy kayéwe dob kuwonone kémérén ubo-ubo maak datu. Tidéw béno, ménlingkuwéd ro dob adafa nuwe brab déniyangka ro. Atin ménbéréh ro maro, “Méraru damén i datu i de

Judio.” ³⁰ Atin dénuraa ro, brab éndot roy ni kayéw tidéw dob kémér ne brab bénadas roy uléw ne. ³¹ Amun énggilid ro déniyangka, lénékas roy furowe ni kégalén brab fénkégal ro man bé kaane kégal. Tidéw béno, nuwit ro mésut inok kélaboné ro dob kruse.

Kénlabo roy Jesuse dob kruse

³² I lala ruwe magéw tidéw Jerusalem, énggébalaka roy étewe féndawét Simon tidéw dob ingéde Siren. Atin i de sundalo fénégés ro démuwal bé krus Jesuse. ³³ Atin énggumah ro dob sébaane gonon féndawét Golgota (i atag ne “gonoy kulobong uléwe.”) ³⁴ Diyo niray roy arake sénlawék bé uwae fégékédan démawét féniném ro bé Jesuse. Endob amun éngétemtemo no, ménika de miném.

³⁵ Tidéw béno, kénlabo ro dob kruse. Atin sénbaad roy de kégalén bé késékungkungo ruwe de. ³⁶ Tidéw béno, ménasar ro diyo ténéngténg roy Jesuse. ³⁷ Atin fendiyo roy sénulat ruwe fingé rotor bé uléw Jesuse bé kétébo ruwe de mano, “Ay niy Jesuse, sani datu i de Judio.” ³⁸ Tidéw béno, kénlabo ro dob de krus i ruwowe gétew tulisan, i ségetéwe de fingé dob kuwono nuwe brab i ségetéwe de fingé dob biwong ne.

³⁹ Atin i de étew, téménara ro dob adafa Jesuse atin déniyangka ro brab dénangu-danguo ro inok dowoyé ro.

⁴⁰ Atin ménbéréh ro dob Jesuse maro, “Bénréhém bé binasané moy lawi i Tuluse atin fétindégé mo man bé téléwe gétérésangan. Amuk tintu Nga i Tuluse Beem, tabangém i lowoh me atin lus go tidéw dob krusa nan inok énda méléhu go.”

⁴¹ Atin ségiléw so bé ni, i de odoroy de fadi brab de téromo bé kitabe brab de odoroy de Judio déniyangka ro.

⁴² Ménbéréh ro maro, “Ténabangén i de ségiyo étew inok énda méléhu ro, éndob énda gétabanga noy lowoh ne inok énda méléhuén. Amuk Beeney datu tome do Judio, fatut mélus tidéw dob krusa nan inok géunur tom de.

43 Sémarig bé Tuluse brab bénréhén bé Been kun i Nga i Tuluse. Na, énténgé tom ké féimuéy Tuluse brab tabangé no béleewe ni inok énda méléhuén.”

44 Atin fiyon i de tulisan séréngan bé Jesuse kénlabo dob de krus, déniyangka ro so.

I kélébénge bé Jesuse

45 Amun géutuhén, ménwaléy délémon i kéluhanay fantade taman ménifus i télwe géuras. **46** Amun géraraan lémudug i térsange de, ménkes i Jesuse mano, “Eli, Eli, lama sabaktani?” I atag ne, “Tulus gu, Tulus gu, sedek téragakém Begén?”

47 Atin i de dumo bé de étew témindég diyo, énggelingoo roy ni kékérhén, atin ménbérh ro maro, “Tawagé noy Eliase.” **48** Atin wén i ségetéwe bero ménagayas éndotén i maake gafas, nérémén dob mélémuwe arak, féndiyoén dob kayéwe, brab ténunggulén dob ba Jesuse inok fééséfén de damén.

49 Endob i de dumo bé de étew téméngteng, ménbérh ro maro, “Fédayáém mon, non méuyot gey de téméngteng ké géumah i Eliase témabangan de inok énda méléhuén.”

50 Tidéw béo, ménkes man i Jesuse atin ménléhuén.

51 Tidéw béo, i rindunge dob lawi i Tuluse ruwoy ménrésédaya nuwe tidéw rotor mangéy fantad. Atin wén i émbagére luba brab wén i de dakél batéw ménseufak. **52** Atin wén i de takub do lébénge ménungka brab médooy de ménléhu do étew i Tuluse méntébule ro. **53** Ménagéw ro tidéw dob de lébénge ro. Atin amun méntébule i Jesuse, ménangéy ro mahur dob mékétéfuwe ingéd Jerusalem brab méntéfégito dob médoowe do étew.

54 I odoroy de sundalo brab de sundalo no ténulik roy Jesuse, amun énggito roy ni luba brab kéluhanay de ni ménrigo, toow fo ménngilak ro. Atin ménbérh ro maro, “Tintu fo Been i Nga i Tuluse.”

55 Diyo soy de médooy do libun, kémulay ro tidéw dob gétangkæ. Beroy

de libun ménfuray bé Jesuse tidéw Galilea brab tétabang ro. **56** Bero ro Maria tidéw Magdala, brab Maria idéng Santiagowe brab Jose, brab idéng Juane brab Santiagowe sani de nga Sebedeo.

I kélébénge bé Jesuse

57 Amun témégénén, énggumah i ségetéwe lagéy kawasa tidéw Arimatea. I dawét ne Jose atin been soy ségetéwe kuyug Jesuse.

58 Ménangéy dob Pilatowe, atin nongotén i bangkay Jesuse. Atin sénuguén i Pilatowe ké fakay ro iray i bangkay Jesuse dob Josehe ni.

59 Mélaw éndot Josehe, atin bénausén bé mantuwe fute safut. **60** Tidéw béo, féndiyoén dob kaane lébénge, mantu séna ténosong dob rangih i fingase. Tidéw béo, kénriringén i dakéle batéw fénggétélén bé bengaway lébénge ni. Atin tidéw béo, ménagéw i Josehe tidéw diyo. **61** Atin diyo i Mariahe tidéw Magdala brab dumo nuwe féndawét so Maria. Ménstar ro dob saréwoy lébénge.

62 Bé gétunduge de fuweh, Sabado. Atin i de odoroy de fadi brab de Fariseo ménlimud ro bero ro Pilato.

63 Atin ménbérh ro maro, “Datu, gétédémo key bé méuyag sénay nan étew ubo-ubo datu gey, bénréhén bé tébule kun ké méifus i télwe gétérésangan. **64** Mélaw fiyo ké sugo go bé de guwardiya inok tintu bantayan i lébénge ne taman bé gétéléwe gétérésangan, inok i de kuyugén énda géahur ro témulis bé bangkay ne atin béréhé ro dob de étew bé méntébule. Non toow na fo gétimal i nan tugi bé sunguwe de.”

65 Séménumbul i Pilatowe mano, “Dot gom bé de sundalo gu mantay bé lébénge ne inok énda i géahur diyo.”

66 Mélaw ménagéw ro atin rénigo roy tandae dob bengaway lébénge inok gito ro ké wén i mahur de. Tidéw béo, féndiyo roy de guwardiya mantayan de.

¹ Amun ménifus i Sabadowe de, toow géfuwén bé Duminggue de, i Mariahe tidéw Magdala ménagéw mangéy dob lébénge Jesuse beroy dumo nuwe libun fénawéti so Maria inok angéyé ro téngténgén i lébénge ni. ² Atin méntékow wén i émbagér luba, atin i télakiy Kadnane ménlus tidéw dob lawayo. Kénriringén i dakéle batéw tidéw dob bengaway lébénge, atin ménasar diyo dob batéwo no. ³ I falas ne maak kilot atin toow fo fute i kégal ne. ⁴ Sonom béno, i de guwardiya diyo ménwaléy ro toow fo ménggilak, brab léménukub ro. Atin méntéléngkéb ro maak do ménléhu ro.

⁵ Atin i télakiwe ni ménbéréh dob de libun ni mano, "Kagom mégilak, Gétiga ku sélédé kom i Jesuse, sani fénléhu ruwe dob kruse. ⁶ Endob éndaén dini no, non méntébuleén loo bé bénréh ne mérigo. Enggomén ahur gom, téngténg gom i gono nuwe méniro. ⁷ Na, fagayas gom agéw mangéy dob de kuyugén atin uret gom dob berowe makom, 'Méntébuleén i Jesuse. Atin mangéy béri Galilea métah begom. Gito gom diyo.' Na, taus gom brab fégétédém gom i ni bénréh gu begom."

⁸ Mélaw ménagayas ro ménagéw tidéw dob lébénge ni. Atin fiyon fo ké ménggilak ro, ménoror ro so. Atin léménéntu ro mangéy dob de kuyugén inok ureté ro dob berowe.

⁹ Atin tékow bénalak Jesusey de libun ni atin ménbéréh dob berowe mano, "Fiyo térésang." Tidéw béno, ménfégédét ro dob Beene brab génamak roy sékéy ne atin fénéngadaf ro. ¹⁰ Atin ménbéréh i Jesuse dob berowe mano, "Kagom mégilak. Agéw gom atin béréh gom dob de kuyug gu bé fatut magéw ro mangéy Galilea, atin gito ro Begén diyo."

¹¹ Amun ménagéw i de ni libun, i de dumo bé de sundalo mantay bé lébénge ni ménsefule ro mangéy Jerusalem atin nuret ro dob de odoroy de fadi i kéluhanay ménrigowe.

¹² Mélaw i de odoroy de fadi brab de odoroy de Judío, ménslimud ro.

Atin ménagayun ro ké ati rigoné ruwe. Niraya ro médo kurta i de sundalo. ¹³ Atin bénréh ro bero maro, "Béréh gom bé nangéy i de kuyugén i bangkay ne bé kélunganone atin fénénakaw ro bé lala gome fidong. ¹⁴ Atin amuk énggelingoooy méguléwey fantage bé ni, bérhé key dob beene inok énda mékéritén begom atin mélaw énda i funa kom mégilak."

¹⁵ Tidéw béno, i de guwardiya, éndot roy kurtae ni atin nodoro roy sugi i de odoroy de Judío ni. Atin mélaw, taman so béleeve ni, wén i do Judío muret bé ni uret.

Méntéfégito man i Jesuse

¹⁶ Tidéw béno, i de folo bra sébaan kuyugén ménagéw ro mangéy Galilea dob sébaane tuduk bénréh Jesuse fatut ayo ro. ¹⁷ Atin amun énggito roy Jesuse, fénéngadaf ro, fiyon fo ké wén i de dumo bero ruwo-ruwoy de fédew ro munur de. ¹⁸ Atin ménfégédét i Jesuse dob berowe atin ménbéréh mano, "I kéluhanay kuwagibé méguléw dob lawayo brab dob fantade niray dob Begéne. ¹⁹ Mélaw angéy gom dob kéluhanay de ingéd dob duniiae ni atin féunur gom i kéluhanay de étew bé Begéne. Bautis gom bero dob dawét i Abaye Tulus, brab Nga i Tuluse, brab Rémogor i Tuluse. ²⁰ Atin toro gom bero bé fatut odoro roy kéluhanay de sugu gu begom. Atin fégétédém gom i ni, diniwu dob begome sénga tékélid taman dob tamfaday duniiae ni."

I Fiyowe Uret Sénulat Markose

Been i niy Fiyowe Uret sénulat Markose fantag bé Jesu Kristowe. Sénulat Markosey médoowe do mékégaif rénigo Jesuse amun ménbati séna dob duniyae ni. Sénulat Markose soy dumoy de ténero Jesus.

I Markose ni, sani séménulate bé ni Fiyo Uret, beeney dumo Pedrowe ménangéy muret fantag bé Jesuse. Ségétew so bé de kuyug Jesus i Pedrowe ni, amun ménbati sénay Jesuse dob duniyae ni. Mélaw gétiga tom i kéluhanay de sénulat Markos toow fo toow.

I kékautise bé Jesuse

¹ Ay niy Fiyowe Uret fantag bé Jesu Kristowe, sani Nga i Tuluse. ² Bé gétaho, wén i ségétewe sénarigoy Tuluse muret bé kékéréd ne féndawét Isaias. Sénulatén mano, “Bang i Tuluse, ‘Sugué kuy sarigo kuwe métah Beem inok tafayé noy aguwo muwe.’ ³ Diyo dob gonone énda i étew de bati, brab mékes mano, ‘Gégumah i Kad-nane! Tafay gom i aguwo nuwe, brab fééntang gom i de aguwo no.’” Been i bénréh Isaiase.

⁴ Mélaw énggumah i Juane dob gonone énda i étew de bati. Mautis bé de étew brab ménuret mano, “Fatut gom gésénule bé de sala gom brab féka gom i de tete adat gom. Tidew béno, fébautis gom inok fégito gom i kégésénule gome. Atin, i Tuluse fésagadé noy de sala gom.” ⁵ Atin médooy de étew dob Judea brab dob ingéde Jerusalem ménangéy ro dob Juane. Fénayag roy de sala ro brab bénautisén bero dob lowoh i wayége Jordan.

⁶ I Juane ni kéménégal nawél buk dakél ayam féndawét kamelyo, brab kulit binatang i légét ne. Atin i amaé nuwe kasuk brab téne. ⁷ Atin ménuret i Juane mano, “Wén i ségétewe témundug begén. Toow na fo gérotor begén. Fiyon foy ikét i safatos ne,

énda métororu de mukoh. ⁸ Wayég i fégébautis guwe begom, éndob i Beene, bautisé no moso begom bé Rémogor i Tuluse.”

I kékautise bé Jesuse

⁹ Bé no do gai, énggégumah i Jesuse tidew dob Nasaret dob sakuf i dakéle ingéd Galilea. Atin bénautis Juane so dob wayégo no Jordan.

¹⁰ Amun géménaunén i Jesuse tidew dob wayége, sonom béno énggito noy lawaye ménungka brab i Rémogor i Tuluse ménlus maak marafati brab méntérimféná dob Beene. ¹¹ Brab wén i ménbéréhe tidew dob lawayo mano, “Beem i Nga guwe. Toow fo mégédawu de brab mésuwatu de.”

¹² Tidew béno, fénagéw i Rémogor i Tulusey Jesuse mangéy dob gonone énda i do étew de bati. ¹³ Atin ménbati diyo fot folo gétérésangan. Bé béno, sénga tékéliid ténenéngkad Satanasey Jesuse rémigo tete damén. Diyo soy de mérayar do binatang, éndob énggumah i de télaki brab tétabanga ro.

I kékéganay i galbék Jesuse dob Galilea

¹⁴ Amun ménférisonén i Juane, ménsefule i Jesuse mangéy Galilea, brab nureté i Fiyowe Uret tidew dob Tuluse. ¹⁵ Ménbéréh mano, “Enggumahén i fatute gai. Endaén mérugayén taman gégumah i kékégnéw i Tuluse bé de étewén. Fatut gésénule gom bé de sala gom brab féka gom i de tete adat gom, brab unur gom dob Fiyowe Uret.”

¹⁶ Wén i no sébaan fuweh ménagéw i Jesuse dob doror i dogote féndawét Galilea. Atin énggito noy ruwowe gétew fatatugés féndawét Simon brab Andrese tuwaréyén. Ibéré roy de biyala ro dob dogote. ¹⁷ Atin béréd Jesuse bero mano, “Odor gom Begén. Kagogén séméléd sédo. Tidew béléewe, fésélédé ku begom étew inok modor ro so Begén.” ¹⁸ Sonom béno, tétagak roy de biyala ro brab ménodor ro bé Jesuse.

¹⁹ Atin amun méntaus magéw i Jesuse kloh, énggito noy Santiago

brab Juane sani de nga Sebedeo. Diyo ro dob awang ruwe sékafété roy de biyala ro. ²⁰ Sonom béno, ténawagén bero. Atin téngak roy boh ruwe Sebedeo dob awange beroy de témabang do sukayan do fatatugés, atin ménodor ro bé Jesuse.

Dénédél Jesusey saitane

²¹ Atin i Jesuse beroy de kuyugén ménangéy ro dob ingéde Kafernaum. Amun gai kétérén, ménahur i Jesuse dob lawie fénégadafay de Judio, brab téménoro. ²² Atin i de étew do mégélingo de, toow ro fo ménggaif bé kétoro ne. Non békén ségiléw i kétoro ne bé de Judio témoro bé kitab ruwe. Non i berowe, ténero ro say de kékégitung i de ségiyo étew. Endob ténero Jesusey kaane kékégitung.

²³ Amun téménoro i Jesuse, tékow ménahur dob lawie fénégadafan i ségétéwe étew rénahukoy saitané.

²⁴ Amun énggito noy Jesuse, ménkes mano, “Ati amungé muwe begey, Jesus tidéw Nasaret? Ménangéy go ba dini inok binasané mo begey? Enggétiga ku ké ati Beeme. Beem i Mékétéfuwe tidéw dob Tuluse.”

²⁵ Endob génlé Jesusey saitane ni mano, “Kago selekén, brab tékédan go tidéw dob beena nan!”

²⁶ Tidéw béno, i saitane, toow fo fénkikilén i étewo no brab ménkes métanug, atin ménkédan. ²⁷ Atin toow fo ménggaif i de étew bé ni. Ménsébéréh ro maro, “Ati ni? Mantu keey kétoro. I ni étew wén i kuwagibén sémugu bé de saitan, brab odoro roy késugu ne!”

²⁸ Mélaw i kéurete fantag bé Jesuse magad ménégéb dob kéluhanay de gonon dob dakélé ingéde Galilea.

Nuwa Jesusey de médoe étew

²⁹ Tidéw béno, téngak roy lawie ni fénégadafan, brab ménagéw ro mangéy dob lawi Simone brab Andrese. Atin ménodor soy Santiagowe brab Juane.

³⁰ Atin diyo gara-gara i térima Simone libun non démeruun toow fo méduf. Amun énggumah i Jesuse dob ni lawi, bénréh ro dey fantage bé ni démeruun.

³¹ Atin i Jesuse ménangéy dob tébing

ne atin génamakén i kémér ne brab fénétekén. Sonom béno, ménkédan i kéeduf ne brab ménadi-adiy libune ni. Tidéw béno, dénuwoto no bero.

³² Bé no kélungonon, amun ménléd i térsange, i de étew nuwit ro mangéy dob Jesusey kéluhanay de démeruun brab de étew rénahukoy de saitan.

³³ Atin médooy de étew dob no ingéd ménlimud ro dob fésaway lawie ni. ³⁴ Atin i Jesuse énggféadi-adino noy médoowe déruunan bé médoowe gékelasi déruun, brab fénféraréyén i médoowe saitan. Atin i de ni saitan, énda fénbéréhén bero non gétiga roy ati Beene.

³⁵ Amun lingkuwog mangéy fuweh bé sébaane de géfuwén, méntek i Jesuse brab ménusut dob lawie ménangéy dob géfélébue gonon dob liyuy ingéde. Atin diyo déménasal. ³⁶ Mélaw i Simone brab de dumo no, nangéy ro sénléd i Jesuse. ³⁷ Amun énggito ro, ménbéréh ro maro, “Sélédéy kéluhanay de étew Beem.”

³⁸ Endob séménumbul i Jesuse mano, “Fatut taus tom magéw mangéy dob de dumo ingéd gédét dini inok géuretu so diyo, non been i niy funa kuwe ménangéy dini.”

³⁹ Mélaw lénégébén sénugudon i séngae gonon dob Galilea. Atin ménuret dob de lawi fénégadafay de Judio, brab fénféraréyén i de saitan.

Nuwa Jesusey ségétéwe fémuteén

⁴⁰ Wén i no sébaan fuweh, i ségétéwe fémuteén ménangéy dob Jesuse, brab léméningkuwé dob adafa nuwe mongot tabang. Ménbéréh mano, “Amuk kétaya mo, géféadi-adino mo begén.”

⁴¹ Atin toow fo ménuray i na Jesuse de. Mélaw bénér Jesusey kémér ne brab kénuwahén. Atin ménbéréh mano, “Kétaya ku. Adiadi go.” ⁴² Sonom béno, ménkédan i fémute ne, brab ménfiyoy lowoh ne. ⁴³ Tidéw béno, i Jesuse fénagéwén brab ménbagér i kékérén ne de mano,

⁴⁴ “Fégélingoém, kago béréhén i fantage bé ni rénigo gu dob fiyon udenén étew. Endob taus go agéw mangéy

dob fadie brab féténgténgém i lowoh me inok gétiga no adi-adi gon. Tidéw béno, irayém i tulake loo bé sénugu i kitabe tidéw dob Moisese inok fégito moy kéadi-adi muwe dob kéluhanay de étew.”

⁴⁵ Ménagéw bangnoor i ni étew, éndob nureténi dob séngae étew énggabalaka no, tidéw béno ménséfélalag foy ni uret. Mélaw éndaén géréngkay-réngkay i Jesuse rémahur dob kéluhanay de ingéd. Yamula ménbati saén dob de liyu. Atin i de étew tidéw dob de kéluhanay de gonon ménangéy ro dob Beene.

2

Nuwa Jesusey ségétéwe kimoyén

¹ Amun ménifus i firoye gétérésangan tidéw béno, ménséfule i Jesuse mangéy Kafernaum. Atin ménlégéb i urete bé ménule mangéy diyo. ² Mélaw toow fo médooy de étew ménangéy sélimud dob lawie batio Jesuse. Atin non toow ro fo médooy, éndaén i gonon de fiyon fo dob fésayawane. Atin nuret Jesuse beroy kékérén i Tuluse. ³ Bé lala ne témodo, énggumah i foto gétew lagéy ténanggung roy ségétéwe kimoyén, uwité ro damén mangéy dob Beene. ⁴ Endob énda i fiyo kélawang ro dob Jesuse, non bé médoowe do étew. Mélaw ménénik ro dob atéf i lawie. Tidéw béno, ténosong roy atéfe dob gataga Jesuse. Amun ménitosongén, ténuntu roy ténanggunge ni kimoyén. ⁵ Amun énggito Jesusey kékéngintoow ruwe, ménbérén dob ni étew kimoyén mano, “Adih, i de salaém ménfésagadén.”

⁶ Tidéw béno, i de témodo bé kitab i de Judio ménasar diyo, séfénginsangsinsa i de fédeuw ro maro, ⁷ “Sedek émbérén mémurka i ni étew? Enda i gáfésagad bé de sala ké bekén i Tuluse saén!”

⁸ Endob bé béno so, énggétiga Jesusey de itunga ro. Mélaw ménbérén dob berowe mano, “Sedek sébérén gom loo bé nan dob de fédeuw gom?

⁹ Toow na fo mélému bérén, ‘I de salaém ménfésagadén.’ Non énda gito

no ké wén i barakat gu de rémigo. Endob toow fo mérégén bérén, ‘Tindég go, furutém i iroo muwa nan, brab agéw go.’ Non giton ké wén i barakat gu de rémigo. ¹⁰ Endob fefégtiga ku begom i fantage bé Nga i Kéilawane, sani Begéne. Wén i barakat gu brab kuwagib gu dob duniyae ni émfésagad bé de sala.” Tidéw béno, bénréhén dob kimoyéne ni mano, ¹¹ “Béréhé ku beem, tindég go, furutém i iroo muwa nan, brab ule go.”

¹² Sonom béno, téménindég i kimoyéne ni dob téngaanga ruwe, brab fénurutén i iroo nuwe, brab ménagéw. Atin i kéluhanay de étew diyo, toow ro fo ménggaif brab dénayéw roy Tuluse maro, “Enda nay énggito tom tidéw féganay loo bé ni.”

¹³ Tidéw béno, i Jesuse ménangéy man dob fédoror i dogote Galilea. Atin énggumah i de médooy do étew brab ménlimud ro dob Beene. Atin féngganaya noy témoree bero. ¹⁴ Tidéw béno, méntaus i Jesuse magéw. Atin énggito noy ségétéwe étew kémubra buwis fénawé Lebi, nga Alfeo ménasar dob de kubranan buwis. Brab ménbérén i Jesuse dob beene mano, “Odor go Begén.” Tidéw béno, téménindég brab ménodor bé Jesuse.

¹⁵ Enda mérugayén tidéw béno, diyo i Jesuse mama dob lawi Lebiwe. Atin diyo soy médoowe do étew kémubra buwis brab médooy do ménasa étew ménasar mama séréngan bé Jesuse brab de kuyugén, non médooy ro ménfuray bé Jesuse. ¹⁶ Atin i de témodo bé kitab i de Judio do Fariseo, amun énggito roy Jesuse mama séréngan bé de ménasa étew brab de kémubra buwis, ménenginsa ro dob de kuyug Jesus maro, “Sedek ménslawék i Jesuse mama bé de kémubra buwis brab de ségiyo tete étew?”

¹⁷ Endob i Jesuse énggelingoo noy ni brab séménumbul mano, “I de fiyo kégelowoho no, énda kailanga roy muwae, éndob kailangay de wén déruu no. Enda ménangéyu dini inok tabaré kuy de métintu étew, éndob

ménangéyu dini inok tabaré kuy de wén salaén inok gésénule ro.”

¹⁸ Wén i no sébaan fuweh, ménfuwasay de kuyug Juan Bautista brab de Fariseo. Atin wén i de étew ménangéy dob Jesuse brab ménenginsa ro maro, “I de kuyug Juan brab de kuyug i de Fariseo, fuwasa ro. Sedek i de kaam do kuyug énda fuwasa ro?”

¹⁹ Séménumbul i Jesuse mano, “Ufama, i de kana dob uyote, énda fuwasa ro ké diyo soy témérimeawé lagéy. Taman diyo sénay témérimeawé lagéy, énda fuwasa ro. ²⁰ Endob gérumah i gaiwe, ké méédot dob berowey témérimeawé lagéy. Atin been nay noy gaiwe fuwasa ro. Ségiléw so bé de kagén kuyug, non amuk diniwu séna, énda fuwasa ro.”

²¹ Tidéw béno, nuret Jesusey sébaane binuwaya fantag bé sébidanay mantuwe kétoroén brab tafaye kétoro i de Judio. Ménbéréh mano, “Enda i ségetéw étew fégétabungén i mantuwe safut dob tafaye kégal. Non amuk rigoné no, kéménkén i mantuwe safut, atin mífendet i tafaye kégal, atin minut géttimal i rédet ne. ²² Brab énda i étew mérowo bé mantuwe arak dob tafaye ahuron arak rénigo bé kulit i ayame. Non amuk rigoné no, bétus i mantuwe arak i tafaye ahuron brab mébinasa méitis i mantuwe arak. Endob fatut i mantuwe arak ahurén dob mantuwe kulit ayam fédéngon de.”

Fantag bé gaiy kétérén

²³ Wén i no sébaan fuweh gai kétérén, i Jesuse brab de kuyugén téménara ro dob de médoó do faréy. Atin amun ménagéw ro, i de kuyugén ménodot ro bé de onok faréy. ²⁴ Tidéw béno, i de Fariseo ménbéréh ro dob Jesuse maro, “Sedek rigoné roy ni, non dob kitab tome énda fatut i gémalbéké ké gai kétérén?”

²⁵ Séménumbul i Jesuse mano, “Aw énda ba énggébasana kom i rénigo Datu Dabide? Wén i no gai toow fo mélayaheroy de sundalo no. ²⁶ Mélaw ménahur ro dob lawi i Tuluse brab

ménodot bé ténu lake fan brab namaén, atin niraya no soy de dumo no de. Rénigo noy ni fiyon fo ké dob kitabe fadi saén i fakaye mama bé ni fan. Rénigo noy ni dob gaiwe Abitar sénay gératore fadi.”

²⁷ Atin féntaus Jesusey kéréh ne mano, “Rénigoy gai kétérén kay de étew, békén i étewey rénigowé kay gai kétérén. ²⁸ Mélaw i Nga i Kéilawane, sani Begéne, wén i kuwagib gu fantag bé atiy fakaye rigonén bé gaiwe kétérén.”

3

Nuwa Jesusey étewe ménadil i kémér ne

¹ Tidéw béno, ménangéy i Jesuse man dob lawie féngadafay de Judio. Diyo soy ségetéwe lagéy ménadil i kémér ne. ² Endob diyo soy de Fariseo méuyot témbo bé Jesuse. Mélaw ténu lik ro, inok gito ro ké muwa bé no gai kétérén. ³ Atin ménbéréh i Jesuse dob lagéye ni ménadil i kémér ne mano, “Ay go dini dob téngaangay de étew ni.”

⁴ Tidéw béno, fénénginsaa noy de étew mano, “Ati karang gome de, ati isuwe fakay dob kitabe bé gaiwe kétérén? Rémigo fiyo, loo ké tete? Témabang bé étewe inok énda méléhuén, loo ké féléhuén?”

Endob ménantés ro. ⁵ Atin ménkérít i Jesuse bé lala ne téméngténg bé de étew géliwé de. Endob tete soy fédéw ne non bé de kétégas i de atura ro énda fo ménuray i na ruwe bé ni lagéy. Tidéw béno, ménbéréh dob lagéye ni mano, “Bétérém i kémér ma nan.” Atin bénérén i kémér ne atin sonom béno, ménadi-adi. ⁶ Tidéw béno, i de Fariseo toow ro fo ménkérít atin ménadil ro tidéw dob lawie féngadafan. Atin ménadil ro bé de étew do modor bé Datu Herode brab ménadil ro bé féléhué roy Jesuse brab rénigo roy bantak fédéw ruwe.

⁷ Atin i Jesuse brab de kuyugén ménagéw ro man mangéy dob dogote Galilea, brab médooy de étew ménfuray de. Tidéw ro Galilea brab Judea, ⁸ brab tidéw Jerusalem, brab Idumea, brab tidéw fingé sébangay

wayége Jordan, brab tidéw dob géliwéte bé Tirowe brab Sidone. I de ni do médoou étew ménangéy ro dob Jesuse non énggelingoo roy kéluhanay de rénigo no do mékégaif. ⁹ Atin non toow fo dakél i de ménlimud do étew, i Jesuse bénréhén bé de kuyugén bé témafay ro sébaan awang édaa no inok énda mérasékén. ¹⁰ Non énggféadi-adino noy de médoou do étew. Mélaw i kéluhanay de wén do déruuno sédéri ro fégédét dob Jesuse inok gékuwaha ro. ¹¹ Atin i kéluhanay de étew rénahukoy de saitan, amun énggito roy Jesuse, méntéléngkéb ro dob adafa nuwe brab mékes ro maro, “Beemey Nga i Tuluse.”

¹² Endob i Jesuse génléén bero bé énda fégétiga ro de dob de ségiyo.

Fénémili Jesusey de folo bra ruwo gétew apostol

¹³ Tidéw béno, i Jesuse ménénagé mangéy dob burure brab ténawagén mangéy dob Beeney de fénémilién do waléy do sarigo no. Atin ménangéy ro dob Beene. ¹⁴ Atin fénémilién i de folo bra ruwo gétew, atin féndawétén bero do apostol (i atag ne “do sénugu”). Non fénodorén bero dob Beene, brab sugué no bero muret. ¹⁵ Atin niraya no bero barakat inok gédédél ro do saitan rémahuk dob de étew.

¹⁶ Ay niy de dawét i de apostol do fénémilién: Simon (féndawét Jesuse Pedro so), ¹⁷ Santiago brab Juan, sani de nga Sebedeo. I Jesuse féndawétén so bero Boanerges (i atag ne “do nga dégu”), ¹⁸ brab Andres, Filipi, Bartolome, Mateo, Tomas, Santiago nga Alfeo, Tadeo, Simon sani ségétéwe toow fo gulaané noy ingéd ne, ¹⁹ brab Judas Iskariot, sani ménfékéfo bé Jesuse.

²⁰ Tidéw béno, i Jesuse ménule. Atin ménlimud man i médoowe étew dob Beene. Mélaw i Jesuse brab de kuyugén, énda i uras ro mama. ²¹ Atin i de samungén, amun énggelingoo roy ni, nangéy ro kénéfo, non bénréh i de étew bunég kun.

²² Atin wén i de témoreo bé kitab i de Judio énggumah ro tidéw Jerusalem.

Ménbéréh ro maro, “I Jesuse ni rénahuko Beelsebule, sani Satanase, i odoroy de saitan. Been i funa nuwe wén i barakatén démédél bé de saitan.”

²³ Mélaw i Jesuse ténawagén i de ni étew mangéy dob Beene, brab nuretéen beroy de binuwaya mano, “Enda fakayén ké feféfaréyé Satanasey de dumo no saitan. ²⁴ Ufama, amuk wén i ingéd énda géséfagayun ro brab sétiboh ro, mébinasa. ²⁵ Taloo no i ségékuréngé étew dob sébaane lawi amuk énda so géséfagayun ro brab sékrit ro, waléy mébinasa. ²⁶ Ségiléw so bé Satanase. Buluk i de sugu-sugué no mésébaad énda géséfagayun ro, énda so gétindég i fangangatura nuwe, brab mébinasa.

²⁷ “I Begéne, ténabana kun i Satanase. Been i niy funa kuwe géfeféfaréyo kuy de kuyugén sani de saitan. Ufama, énda i ségétew étew géahur dob lawi i émbagére étew atin tulisé noy tamuk ne taman énda na géikéto no de métah.

²⁸ “Béréhé ku begom i toowe, i kéluhanay de sala brab de tete kóbéréh i de étew fakay émfésagad. ²⁹ Endob i émbéréhe tete fantag bé Rémogor i Tuluse énggérigo sala énda émfésagada no non énda mékédan i nan sala taman sa taman.” ³⁰ Bénréh Jesusey ni non wén i de ménbéréh maro, “Rénahuko saitan i Jesuse, funa no géfeféfaréyé bé de saitan.” Endob i toowe, Rémogor i Tulusey manangguwite bé Jesuse.

³¹ Tidéw béno, énggumah i idéng Jesuse brab de tuwaréyén lagéy. Téménindég ro dob liyuy lawie, brab fén-uwito ro kóbéréh bé tawagé roy Jesuse. ³² Wén i de médoou do étew ménlimud ménsar géliwét bé Jesuse, atin ménbéréh ro maro, “I idéng me brab de tuwaréyém diyo ro dob liyuwe. Méuyot ro géségitó Beem.”

³³ Atin séménumbul i Jesuse mano, “Wén i ségiyo idéng gu brab do tuwaréy gu.” ³⁴ Atin iling-ilong dob de étew ménsar géliwét de brab ménbéréh mano, “Téngténg gom, ay niy de maak idéng gu brab do tuwaréy gu. ³⁵ Non

i de étew rémigo bé kétayay Tuluse, beroy do maak idéng gu brab do tuwaréy gu.”

4

Ibinuwayae fantag bé sémabuge

¹ Wén i no sébaan fuweh, téménoro man i Jesuse diyo dob dogote Galilea. Atin toow fo dakél i ménlimude do étew géliwét de. Mélaw ménda dob awange brab ménsar diyo gédét dob dénsaane, bé lala i de étew téménindég dob dénsaane. ² Atin médooy de téneroén bero fénagéwén dob de binuwaya.

³ Ménbéréh mano, “Fégélingo gom. Wén i ségétéwe étew ménangéy sémabug bé béne ne. ⁴ Amun sénabugén i béne ne, i de dumo bé béne ne ménbigodoy dob doror i aguwone. Diyo énggumah i de kloh manok, atin nama ro. ⁵ I de dumoy de béneén ménsawér dob fantade médooy de batéw de, éndob kloh saén i fantade médooy de batéw de, éndob kloh saén i fantade de. Tidéw béo, ménagad téménunoh non énda ménalém i fantade de. ⁶ Endob amun sémbang i térsange, atin démawét foy médufe, ménlaay i nohoke brab ménléhu, non énda toow ménalém i de kédarir ro. ⁷ I de dumoy de béneén ménsawér dob fantade wén i do suwar de énda séna téménunoh ro. Atin ménseréngan téménunoh i de suwar brab de nohok. Mélaw ménéfuk i de nohok brab énda énggéfogonok ro. ⁸ Endob i de dumo bé de béne ménsawér dob fiyowe fantad, brab témunoh ro brab ménruk ro brab ménggonok ro médooy taman télew folo takéf, ném folo takéf brab mératu takéf i séngae sébaan béne.”

⁹ Atin féntaus Jesusey kéréréh ne mano, “Fégitung gom i fantage bé ni bénréh gu begom amuk méuyot gom de ké gésobuto kom.”

¹⁰ Tidéw béo, amun sébaa Je-suse séden, i de dumo bé de étew énggégélingo bé ni binuwaya, beroy de folo bra ruwo gétew do kuyugén ménangéy fégédét dob Beene. Atin ménenginsa ro fantag bé atag i de ni binuwaya. ¹¹ Atin séménumbul

i Jesuse mano, “Dob begome do kuyug gu, fégésobutéy Tuluse begom i de ménbunéy fantag bé kékéulgéw i Tuluse bé de étewén. Endob dob de ségiyo étew, énggelingoo ro saén i de ni fén-agéw dob de binuwaya, ¹² inok fiyon fo ké téngténgé ro fo toow, énda gito ro de. Brab fiyon fo ké gélingoo ro fo toow, énda gésobuto ro de. Non amuk gésobuto ro, gésénule ro bé de tete adat ro brab munur ro bé Tuluse, atin fésagada no bero.”

¹³ Atin féntaus Jesusey kéréréh ne mano, “Aw énda gésobuto kom i ni binuwaya? Ati mélaw i kégésobut gome bé de ségiyo kétoro gu fén-agéw dob de binuwaya? ¹⁴ Ay niy atag i ni binuwaya énggelingoo kom. I atag i ni béne, been i kéréréh i Tuluse. Atin i de séségiyo-giyo gékélasí do fantad ségiléw bé de séségiyo-giyo gékélasí do étew. Atin i sémabuge ureté noy kéréréh i Tuluse dob de séségiyo-giyo do étew. ¹⁵ I de dumoy de bé de béne ménlawu dob doror i aguwone. Diyo nama i de kloh manok. I atag i ni, wén i do étew énggelingoo roy uret i Tuluse, éndob énggégumah i Satanase, atin kénda noy ni uret énggelingoo ro. ¹⁶ I dumoy de béne ménsawér dob fantade médooy de batéw de. I atag i ni, wén i do étew énggelingoo roy uret i Tuluse brab tényakuf ro brab ménoror ro de. ¹⁷ Endob loo bé de nohok énda ménalém i darir ruwe, énda so méeget i kékéulgéw. Sémarig ro bé Tuluse singkow saén. Endob amuk kérégénan ron taloo no férasyén ro sabaf bé uret i Tuluse, magad ménoror i kékéulgéw. ¹⁸ I de dumoy de béne ménsawér ro dob de duwaléy suwar. I atag i ni, wén i do étew énggelingoo roy uret i Tuluse, ¹⁹ éndob non bé de bukué ro fantag bé de kékéulgéw, brab kékéulgéw waléy kawasa, brab kékéulgéw ruwe bé de ségiyo do languntaman, been i niy funa ruwe gélfoto roy uret i Tuluse brab énda gérigono roy fatute kétayay Tuluse rigoné ro. ²⁰ Atin i de dumoy de béne ménsawér ro dob fiyowe fantad. I atag i ni, wén i de étew

énggelingoo roy uret i Tuluse brab toow fo nunuro ro. Mélaw rigoné roy kétayay Tuluse rigoné ro. I de dumō bero gérigono roy de fiyo, brab i de dumō bero gérigono ro na foy médoowe do fiyo, brab i de dumō bero toow na fo gérigo ro do médoō do fiyo.”

²¹ Atin ménbéréh man i Jesuse mano, “Enda i témumon solo inok bunéyé no dob bukag i kurénge fénléngkéb, taloo no fédiyoé no dob fantad i katriwe. Yamula fédiyoé no dob féggonone de.” ²² Ségiléw so bé ni, i de kétoro gu ménbunéy béléewe, giton moso. Atin i kéluhanay éndae gésobuton béní, gésobuton moso. ²³ Komon fégitung gom fantag bé ni bénréh gu begom amuk méuyot gom de ké gésobuto kom.”

²⁴ Atin ménbéréh man i Jesuse mano, “Fétuntay gom i gélingoo kome. Non i kékukum gome bé de dumō gom do étew, iringéy Tuluse so ké kukumé no begom, éndob toow na fo géttimal. ²⁵ Atin i étewe mégélingo brab munur, méumanan nay kégésobut ne. Endob i étewe énda munurén, fiyon foy klohe fégitungé no gésobuto no, dotén dob beene.”

²⁶ Atin ménbéréh man i Jesuse mano, “I kédakél i kéféguléw i Tuluse bé de étewén ségiléw bé kéeruk i de béne sénabug i ségétewe étew dob fantade.” ²⁷ Tidéw bénó, témunoh i de béne fiyon fo ké énda gésobutoy sémabugey funay de nohok témunoh. Méruk i de nohok fiyon fo ké fuweh ké gémalbék taloo no kélungonon ké fidong. ²⁸ Non i fantade fétunohé noy de nohok brab fefégonoké no. Dob sunguwe de, démaun. Tidéw bénó, musu. Tidéw man bénó, kémifénén. ²⁹ Atin amuk lagasén, fakayén kétéwé no non énggumahén i gaiy kékétewé de.”

³⁰ Atin ménbéréh man i Jesuse mano, “Ati fégiringo tom bé kéféguléw i Tuluse bé de étewén? Ati binuwayae ureté tom?” ³¹ Ségiléw na bé toowe fo kloh béne, éndot i étewe brab nohokén dob fantade.” ³² Tidéw

bénó, téménunoh brab ménruk taman ménwaléy toow fo dakél nohok. Atin ménongo dakél fongo, inok i de kloh manok salaga ro.”

³³ I uret i Tuluse nuret Jesuse dob de étew fén-agéw dob de médoō do binuwaya loo bé ni. Nureté bero taman énggésobuto ro. ³⁴ Enda i no kétoroén bero ké békén binuwaya. Endob amuk beroy de kuyugén saén brab énda i do ségiyo étew diyo, fégétiga no beroy de atag i de binuwaya.

Féntéré Jesusey défuke

³⁵ Bé bénó gai, amun sémingkufén, bénréh Jesuse dob de kuyugén mano, “Mifar tom mangéy dob difar i dogote ni.” ³⁶ Mélaw tétagak roy de ménlimud do étew, brab i de kuyugén ménda ro dob awange énsara Jesuse. Tidéw bénó, ménifar ro. Wén soy do ségiyo awang ménodor bero. ³⁷ Tidéw bénó, amun diyo ron dob kérara i dogote, tékow énggumah i émbagére défuk. Atin nahuroy de bagél i awang ruwe taman gédét ménfénó bé wayége. ³⁸ Endob i Jesuse diyo dob ulinay awange, ménfidong déménanan. Atin téningé i de kuyugén atin nulég ro maro, “Maistéro, aw énda i ula mé de ké mégra tom?”

³⁹ Tidéw bénó, méntek i Jesuse brab génléén i réfuruhe brab de bagél mano, “Fétinanék gom!” Sonom bénó, téménréh i réfuruhe, atin ménlingénngén i dogote. ⁴⁰ Atin ménbéréh i Jesuse dob de kuyugén mano, “Sedek mégilak gom? Aw énda séna sémarig gom?”

⁴¹ Endob toow ro fo ménggilak atin ménbéréh-béréh ro maro, “Ati néni mon i ni étew? Fiyon i défuke brab de bagél géfétéréno no!”

5

Dénédél Jesusey de saitan

¹ Atin ménlaus ro taman énggumah ro dob difar i dogote, dob ingéde Gerasa. ² Amun téménfad i Jesuse, bénalak i étewe rénahukoy saitane. Tidéw dob de takub do lébeng, ³ non batí diyo. Brab éndaén fo

méikétén, fiyon fo ké sangkali. ⁴ Non médoonén gule nikét bé sangkaliéy de sékéyén brab de kémérén. Endob i de sangkali sékétusé no, brab de futow fénggéfatung bé de sékéyén séfindasé no. Atin énda nay ségétew étew émbagér ménggífifit de. ⁵ Fuweh na kélunganon i kéagéw ne dob de duwaléy lébéng brab dob de tuduk. Diyo mékes brab falié noy lowoh ne bé de batéw.

⁶ Atin amun énggito noy Jesuse dob mérayue, léménéntu mangéy fégédét brab ménlingkuwéd dob adafa nuwe.

⁷⁻⁸ Atin i Jesuse sénuguén i saitane mano, “Saitan, sut go tidéw dob beena nan!”

Tidéw béno, ménkes métanug i étewe rénahukoy saitane ni. Ménbéréh i saitane mano, “Jesus, Nga i toowe fo gérotor Tulus, ati kérigo muwe begén? Ongoté ku Beem, fasad go dob Tuluse bé kago fédawéton begén.”

⁹ Atin fénénginsaa Jesuse mano, “Ati dawét me?”

Atin séménumbul mano, “Laksaén i dawét guwe non bé médooy gey do saitan dob ni étew.” ¹⁰ Atin fentausén i kékégedaw-gédaw ne dob Jesuse bé békén damén dédélé Jesuse bero mangéy dob mérayue.

¹¹ Enda mérayuén dob no gonon, diyo i médoowe do babuy témastab dob méngulandige. ¹² Atin nongot i de saitan dob Jesuse maro, “féangéyén gey dob do babuy diyo, brab fédayaém begey mahur dob berowe.” ¹³ Atin ténungkas Jesuse bero. Mélaw i de saitan ménsut ro dob étewe ni brab ménahur ro dob de babuy ni. Wén i ruwo ngibu kédooy de ni babuy, brab kéluhana ro ménraréy ro ménangéy dob fingase brab ménantéfor ro mangéy dob dogote, atin ménléné ro.

¹⁴ I de étew témalima bé de babuy ni, amun énggito roy ni ménrigo, ménsegéta ro brab nuret roy ni dob ingéde brab dob de ségiyo gonon géliwét. Atin ménangéy diyo i de étew inok susiné roy ni ménrigo.

¹⁵ Ménfégédét ro dob Jesuse brab énggito roy étewe ni bé gétaho

rénahukoy de médooy do saitan. Ménsar diyo, kéménagal brab métintunén i kékégitung ne. Atin kéluhana ro mágilak ro de. ¹⁶ Nuret i kéluhanay de énggégito de ké ati ménrigowé dob étewe ni bé gétaho sénaitanan brab ati ménrigowé dob de babuy.

¹⁷ Mélaw i de étew nongot roy Jesuse tékédan dob ingéd ruwe ni.

¹⁸ I lala Jesuse ménada dob awange, i lagéyo no ténkédanay de saitan non-gotén dob Jesuse mano, “Modoru Beem.”

¹⁹ Endob énda ténungkas Jesuse de. Yamula ménbéréh mano, “Ule go brab uretéy dob de samungém i kéluhanay fiyowe rénígoy Kadnane Tulus dob beeme brab kékégedaw ne beem.”

²⁰ Mélaw ménagéw brab ménsgud-sugud dob gonone diyo fédawét “Do Folo Ingéd”, brab nuretén i kéluhanay rénígo Jesuse dob beene. Atin i kéluhanay de étew énggégélingo de, ménngaif ro de.

Nuwa Jesusey ruwowe gétew libun

²¹ Tidéw béno, ménsefule i Jesuse mifar dob dogote. Amun énggumah dob difare, diyo dob fédoror i dogote ménlimud i médoowe étew géliwét de. ²² Atin énggumah i ségétewé étew fédawét Jairo, ségétew odoron dob lawie féngadafan kay de Judio. Amun énggito noy Jesuse, ménfégédét dob Beene brab ménléngkéb dob adafa nuwe. ²³ Atin toow fo nongotén dob Jesuse mano, “I klohe kénogo ku toow fo kétimalan démeruun. Enggonén angéyém gamak inok adi-adi brab inok énda méléhuén.”

²⁴ Mélaw ménodor i Jesuse de. Atin ménodor i médoowe étew brab méserasék ro lémiwét bé Jesuse.

²⁵ Diyo soy ségétewé libun kékfasangan non foloén bra ruwo gébélantuwa i kéranas i adat ne. ²⁶ Brab ménétényen i kurta ne fénggébayadén bé de doktor, éndob énda foy ségétew géuwa de. Yamula minut géttimal i déruu nuwe. ²⁷ Enggélingoo noy de uret fantag bé Jesuse, mélaw ménfuray so bé de médooy ni do étew

ménlimud inok gékuwaha noy kégal Jesuse. ²⁸ Non fénggitungén mano, “Amuk gékuwaha ku saén i kégal ne, adi-adiwu.”

²⁹ Mélaw kénuwahén i kégal Jesuse. Sonom béno, téménréni i kérana i adat ne, atin énggétérédama no ménadidi bé déruu nuwe. ³⁰ Endob bé béno so, énggétiga Jesuse bé ménusut i barakat ne tidéw dob Beene. Mélaw ménékélid brab ménénginsa dob de ménlimud do étew mano, “Ati kéménuwahe bé kégal guwe?”

³¹ Atin séménumbul i de kuyugén maro, “Gito moy médoowe ni étew géliwét Beem brab séendantélo ro Beem. Sedek fénginsaé moy ati kéménuwahe Beem?”

³² Endob i Jesuse féntausén i kéiling-iling ne téméngténg ké atiy kéménuwahe de. ³³ Tidéw béno, i libune ni énggétiga no atiy ménrigowé dob beene. Mélaw ménfégédét lémukub bé kégilak ne, atin ménélengkéb dob adafa Jesuse. Brab bénréhén i kéluhanay toowe. ³⁴ Tidéw béno, bénréh Jesuse de mano, “Di, i kéfengintoow mey funa muwe ménadi-adi. Taus go ule brab kagonén émbuku. Endaén démeruun go bé ni déruun.”

³⁵ Amun béréhé Jesusey ni, énggumah i de étew tidéw dob lawi Jairowe. Ménbéréh ro dob Jairowe maro, “Déménigurén i nga me. Endaén kailanga mo féangéyé mo diyo i Maistérowa nan.”

³⁶ Endob i Jesuse, énda ténula noy kéréréh ruwe ni, yamula bénréhén dob Jairowe mano, “Kago mégilak. Féginugut go saén.” ³⁷ Atin i Jesuse, énda i ségetéw fénodorén saliyu bé ro Pedrowe, Santiago, brab Juane dumo Santiago sétiman idéng.

³⁸ Amun énggumah ro dob lawi i odorono no, énggito Jesusey ménribuke, atin énggelingoo noy de ni médoow étew toow fo selekén non kémérew ro brab rémuung ro. ³⁹ Tidéw béno, ménahur i Jesuse brab bénréhén mano, “Sedek ménribuk gom brab selekén gom kémérew? Non i ngae

ni énda ménléhuén, éndob ménfidong saén.”

⁴⁰ Mélaw sénbayat roy Jesuse. Tidéw béno fénsutén bero kéluhanan, atin nuwitén i abay i ngae ni brab idéng ne brab de téléc gétew kuyugén ménodor de, atin ménahur ro mangéy dob sibéye gonoy ngae ni méniro. ⁴¹ Tidéw béno, génamak Jesusey kémér ne brab ménbéréh mano, “Talita kumi.” (I atag ne “Di, tek go!”)

⁴² Sonom béno, méntek i ngae ni atin ménagéw. Folo bra ruwo gébélantuwa i idad ne. Toow ro fo ménngaif bé ni rénigo Jesuse. ⁴³ Endob i Jesuse fénégétén i kéréréh nuwe bero bé békén ureté ro dob ségiyowey ni ménrigo. Atin sénuguén bero émféama bé ni nga.

6

¹ Tidéw béno, ménagéw man i Jesuse tidéw diyo atin ménule mangéy dob kaane ingéd. Atin ménodor i de kuyugén so. ² Atin bé gaiy kétéréne, ménangéy témore dob lawie féngadafan kay de Judio. Médooy de étew diyo, atin amun énggelingoo roy kétoro Jesuse, ménngaif ro. Mélaw ménfenginsa ro maro, “Ati ni dakél kégétawan, brab tidéwo nuwe de? Sedek gérigono noy mémégaife galbék?

³ Aw békén ba Beeney fandaye rémigo lawi nga Maria brab ofo Santiago, Jose, Judas brab Simon? Brab aw békén ba dini dob betomey de libu no?” Mélaw ménika ro de.

⁴ Atin ménbéréh i Jesuse dob berowe mano, “I ségetéwe sarigoy Tuluse muret bé kéréréh ne, basanan dob kéluhanay de gonon saliyu saén dob kaane ingéd brab dob de kaan do samung brab dob de kaan do étew sétifon lawi.”

⁵ Atin énda i gérigono no mémégaif galbék saliyu saén bé gémamake bé firoye démeruun atin géfadi-adino no bero. ⁶ Atin ménngaif i Jesuse non énda ménunur ro dob Beene.

Sénugu Jesusey de folo bra ruwo gétew kuyugén

Tidéw béno, ménagéw i Jesuse sémugud témo ro dob de ingéd gédét diyo. ⁷ Atin ténavag Jesuse mangéy sélimud dob Beeney de folo bra ruwo gétew do kuyugén. Tidéw béno, sénuguén bero sémugud séruwo-ruwo gétew. Atin niraya no bero barakat inok géféraréyo roy de saitan. ⁸ Atin bénréhén bero mano, “Kagom muwit éntingayén saliyu saén bé tugée. Kagom muwit amaén, taloo no réban, taloo no kurta. ⁹ Fatut séminilas gom, éndob kagom muwit lékasa kom kégal.” ¹⁰ Atin bénréhén so bero mano, “Fyon atiy lawie témayakuf begom, bati gom diyo taman tagaké kom i nan ingéd. ¹¹ Buluk wén i no ingéd énda tayakuféy de étew begom, tékédan gom diyo, brab tag-tag gom i de bubuk sébuwan dob de sékéy gom émfégétigan bé kukuméy Tuluse bero.”

¹² Tidéw béno, ménagéw i de kuyugén ni brab nuret roy fatut gésénule i de étew bé de sala ro brab tagaké roy de tete adat ro. ¹³ Atin énggáféraréy ro do médo saitan, brab lénulawa ro nor i de médo do déruunan atin ménadi-adi ro.

I kéléhu Juan Bautistawe

¹⁴ Bé béno, i Herode, sani méguléwe dob Galilea, énggélungoo noy de rénigo Jesus non ménbantug dob kéluhanay de gonon. Wén i do étew ménbéréh ro bé i Juan Bautistawe méntébule non maro ké Juan i Jesuse. Been kun i niy funa nuwe wén i barakatén gérigo do mékégaif.

¹⁵ Brab i de dumo de béréhé roy Elias kun i Jesuse, sani ménélatae sarigoy Tuluse bé do gétah. Brab i de dumo de béréhé roy Jesus kun i toowe fo énggétah sénarigoy Tuluse muret.

¹⁶ I Herode, amun énggélungoo noy de ni, ménbéréh mano, “Beeney Juan Bautistawe fénkéleng guy uléw ne, éndob méntébule.” ¹⁷⁻¹⁸ Ay niy funa Herode ménfékéleng bé uléw Juane. I Herode lénamfaén i bawag i tuwaréy ne Filipi. I dawét i ni libun Herodiyas. Tidéw béno, bénréh

Juane dob Herodey ménalsa non énda fakayén dob kitab i de Judio ké bawagén i iboe. Tidéw béno, i Herode fénkéfoén i Juane brab fénférisu no.

¹⁹ Mélaw i Herodiyase ménkérit bé Juane brab ménuyot de méméléhu, éndob énda féndaya Herode de. ²⁰ Non i Herode ménggilak bé Juane non gétiga noy métintu étew i Juane brab fiyoy adat ne. Mélaw déniyaga no. Atin méuyot de mégélingo, fiyon fo ké ménriyarah de ké fégélingoé noy Juane.

²¹ Endob énggumah i gaiwe rigoné Herodiyasey tetee dob Juane. Non réménigo karagiya i Herode fégétédémo no bé kéumah ne. Atin sénéngkatén i médoowe do odoron brab de sarigo datu Herode brab de odoroy de sundalo, brab de gérotor do étew dob ingéde Galilea. ²² Atin i kénogo Herodiyase ménahur dob karagiye ni, atin ménsayaw. Mélaw ménfiyoy fédew Herode beroy de kana no. Atin bénréh Herode dob kénogone ni mano, “Ongotém dob begéney atiy kétaya muwe, brab iray gu.” ²³ Atin séménafa mano, “Fasada ku beem, iray gu dob beemey atiy ongoté muwe dob begéne, fiyon fo ké ségébala bé ni ingéd féguléwo ku.”

²⁴ Mélaw ménusut brab ménénginsa dob idéng ne mano, “Ati ongoté kuwe?”

Atin séménumbul i Herodiyase mano, “Ongotém i uléw Juan Bautistawe.”

²⁵ Tidéw béno, ménagayas séfule mangéy dob datu Herode brab ménongot mano, “Kétaya ku ké béléewe ni irayém begén i uléw Juan Bautistawe dob biléwe.”

²⁶ Atin toow fo méntete i fédew datu Herode, non mika rémigo bé ni. Endob sabaf bé méégeté fasadén rénigo no dob téngaangay de kana no, ménika ké énda magayun no bé ni ongotén. ²⁷ Mélaw fénagayasén sénugu i ségétéwe guwardiya mangéy dob férisonone inok kélengé noy uléw Juane brab uwité no séfule. Tidéw béno, i guwardiyawé ni, ménagéw dob férisonone brab kénléngén i uléw

Juane. ²⁸ Atin nuwitén i uléw ne dob biléwe, brab nirayén dob ni kénogon. Atin niray i kénogone ni dob idéng ne. ²⁹ I de kuyug Juan, amun énggelingoo roy ni, nangéy roy bangkay ne, atin lénébeng ro.

Fénwaléy Jesuse médooy klohe amaén

³⁰ Amun ménséfuleén i de apostol mangéy dob Jesuse, bénréh roy kéluhanay de rénigo ro brab de ténero ro. ³¹ Atin toow fo médooy de étew ménangéy ségitó bé Jesuse, mélaw énda i uras Jesuse brab de kuyugén mama. Mélaw bénréh Jesuse dob de kuyugén mano, “Enggomén, magéw tom dob géfélébue gonon inok gétérén tom singkow.” ³² Mélaw ménda ro dob awange inok mangéy ro dob géfélébue gonon.

³³ Endob médooy de étew énggégito bero magéw, brab énggétiga ro bero. Mélaw ménagayas i de étew tidéw dob kéluhanay de ingéd léméntu mangéy dob ayo Jesuse beroy de kuyugén. Atin énggétah ro na énggégumah bé Jesuse. ³⁴ Amun déménunggu i awange ni brab ménlus i Jesuse dob dénsaane, énggito noy de médooy do étew ménlimud. Atin ménuray i na nuwe bero, non géségiléw ro bé de bili-bili énda i témalima bero. Mélaw féngganayén i kétoro ne bero bé médoowe kétoroén. ³⁵ Amun témégénén, i de kuyug Jesus ménangéy ro dob Beene brab ménbéréh ro maro, “Témégénén, atin i ni gonon mérayu dob dakéle ingéd. ³⁶ Mélaw féagéwém i de étew ni inok mangéy ro dob de ingéd gédét dini. Diyo gébéléy ro amaé ro.”

³⁷ Endob i Jesuse ménbéréh dob de kuyugén mano, “Iraya kom bero amaé ro.”

Atin ménbéréh ro maro, “Ay ababa, aw méuyot go de ké méléy gey amaén kay de médoowe ni étew? Labi ruwo ngibu filak i nan!”

³⁸ Atin fénénginsaa Jesuse bero mano, “Firoj timan i fa tome? Ay gom ta langu.”

Amun gétiga ro, séménumbul ro maro, “Limo timan fan brab ruwo timan sédo.”

³⁹ Tidéw béo, ménbéréh i Jesuse dob de kuyugén mano, “Féésar gom i de étew sésélumfuk-lumfuk dob de mélunéw kéroon.” ⁴⁰ Mélaw i de étew, ménasar ro ménslumfuk-lumfuk, sémératuh-ratuh brab sélimo-limo folo.

⁴¹ Tidéw béo, éndot Jesusey limowe timan fan brab ruwowe timan sédo, atin léménéngag saréw dob lawayo brab ménfésalamat dob Tuluse. Tidéw béo, sénbaad-baadén i de fan, brab nirayén dob de kuyugén inok saaré ro dob de étew. Atin loo so bé niy rénigo nuwe bé ruwowe timan sédo. ⁴² Atin i kéluhanay de étew, téménantu ro mama taman ménbésor ro. ⁴³ Tidéw béo, ténimu i de kuyug Jesus i de sama i de fan brab sédo brab ménfénó i foloe bra ruwo timan biton. ⁴⁴ I kédooy de ménama, limo ro ngibu do lagéy saliyu na bé de libun brab de nga.

Ménagéw i Jesuse dob rotor i dogote

⁴⁵ Tidéw béo, fenda Jesusey de kuyugén dob awange atin fénétahén bero mangéy fingé difar bé dogote dob ingéde Betsaida, bé lala ne émféule bé de étew ménlimud.

⁴⁶ Atin amun ménggétawén dob berowe, ménangéy i Jesuse dob sébaane burur inok démasal. ⁴⁷ Atin amun sémingkufén, i awange diyoén dob kérara i dogote. Atin i Jesuse ségétewén saén dob fantade.

⁴⁸ Atin énggito no kérégénan i de kuyugén mémurah bé awang ruwe, non gérumpaka roy réfuruhe. Mélaw amun lingkuwogén mangéy fuweh, ménangéy i Jesuse dob berowe magéw dob rotor i dogote. Géfédéw damén gélamfasa no bero, ⁴⁹ éndob énggito ro magéw dob rotor i wayége. Atin maro ké ménayam. Mélaw ménkes ro. ⁵⁰ Non kéluhana ro ménggilak amun énggito ro.

Endob sonom béo, i Jesuse ménbéréh dob berowe mano, “Kagom mágilak! Begén. Fétana gom i de fédew gom.” ⁵¹ Tidéw béo, ménanda dob awang ruwe. Atin téménrén i réfuruhe. Atin toow fo ménngaif

i de kuyugén, ⁵² non fiyon fo ké énggito roy mékégaife rénigo Jesuse dob de amaén, énda gésobuto ro de non métégas i de atur ro.

⁵³ Atin amun énggifar ro, déménunggu ro dob ingéde Genesaret, atin ménamfil ro féedoror. ⁵⁴ Atin amun téménéfad ron dob awange, sonom béno énggiloy de étew bati diyo i Jesuse. ⁵⁵ Mélaw ménagayas ro léméntu dob séngae ingéd diyo inok fégétiga ro dob de étew. Tidéw béno, nuwit roy de démérueun ténganggung ro mangéy dob énggelingoo ruwe gono Jesuse. ⁵⁶ Atin dob séngae nayo no, fiyon fo ké kloh ingéd taloo no dakél, nuwit roy de démérueun dob de fadiyan, atin nongot ro dob Beeney kuwahé ro saén i férung-fung i kégal ne. Atin i séngae gékuwah de adi-adi.

7

I kétoroe fantag bé adat i de Judio

¹ Wén i no sébaan fuweh, i de Fariseo brab de témodo bé kitab i de Judio, do tidéw Jerusalem, téningé roy Jesuse. ² Atin énggito roy dumoy de kuyugén mama énda méngguse ro loo bé adat i de Judio.

³ Non i de Fariseo, brab kéluhanay de Judio, énda mama ro taman énda gégénguse ro non odoro roy adate tidéw dob de katufua ro bé do gétah.

⁴ Brab buluk méléy ro amaén dob fadiyane, énda amaé ro de taman énda méurahén. Atin médooy nay de dumoy adat ro loo bé kéurahe bé de tabu brab de kuréng brab de galang ahur-ahuron brab de katri.

⁵ Mélaw i de Fariseo brab de témodo bé kitabe, ménénginsa ro dob Jesuse maro, "Sedek i de kuyugém énda odoro roy adat tome tidéw dob de katufua tom, non énda méguse ro ké mama ro?"

⁶ Atin séménumbul i Jesuse mano, "Enda toow i kénur gome bé Tuluse, ubo-ubo saén. Toow i kétéréh Isaiase, sani ségétewe méntélata sénarigoy Tuluse muret bé kétéréh ne, amun sénulatén i fantage bé begome mano, 'Bang i Tuluse, basanay de ni étew

Bégén dob kétéréh ruwe saén. Endob énda munur ro Begén dob de fédéw ro. ⁷ Enda i atag i kétéréh ruwe Begén, non toroé roy de sugu rénigoy kétawane brab bérhé ro tidéw dob Begéne."

⁸ Atin féntaus Jesusey kétéréh ne mano, "Mélaw téngak gom i de sugu i Tuluse inok odoro kom i adat i kétawane saén. ⁹ Furung gom mika bé de sugu i Tuluse inok modor gom bé kagome kétoro. ¹⁰ Non wén i sugu i Tuluse niray Moisese bé do gétah mano, 'Basana moy abay me brab idéng me.' Atin bénréhén so mano, 'Buluk wén i ségétew émbéréh tete fantag bé abay ne look idéng ne, fatut féléhuén.' ¹¹ Endob i begome, témodo gom bé amuk wén i ségétew étew émfasang i abay ne look idéng ne, brab wén i tabang irayén damén, tungkasé kom de émbéréh 'Korban'. ¹² Mélaw éndaén tungkasé kom de témbang bé de lukésén. ¹³ Mélaw téngak gom i kétéréh i Tuluse inok modor gom bé adate toroé kom. Brab do médooy nay de rigoné kom ula-ula loo bé ni."

I kétoroe fantag bé amaén

¹⁴ Tidéw béno, ténavag Jesuse man i de étew mangéy dob Beene. Atin ménbéréh dob berowe mano, "Fégélingo gom Begén, kéluhana kom, brab fégésobut gom. ¹⁵ I funay de étew waléy mékérésik dob adafay Tuluse, békén non bé atiy amaé ruwe. Yamula, i de tete kétéréh mésut tidéw dob de ba ro, been i funay de étew waléy mékérésik dob adafay Tuluse. ¹⁶ Fétuntay gom i ni bénréh gu."

¹⁷ Tidéw béno, amun téngak Jesusey de médooy do étew ménlimud brab énggerahur doblawie, ménénginsa i de kuyugén dob Beene fantag bé atag i ni kétéréhén. ¹⁸ Atin séménumbul Jesuse bero mano, "Ségléw gom bé kéluhanay de ségiyo étew, non énda gésobuto kom i ni kétoro gu. I funay Tuluse énda mésuwatén bé de étew békén sabaf bé de amaé ro. ¹⁹ Non i amaé étew, mahur dob

sur ne brab mésut so dob lowoh ne. Enda mahurén dob fédew ne.” Bé ni kékérél Jesuse, ténororéni bé i kéléhanay amaéne fiyo, fakay amaéy de étew.

²⁰ Atin féntaus Jesusey kékérél ne mano, “I géésute tidew dob étewe, been i funa nuwe mékérésik. ²¹ Non tidew dob fédewe, gégumah i tete kékégitung, brab sébiga, brab ménakaw, brab méméléhu, ²² brab sétayan bé bawag i ségiyowe, brab arumén, brab lémifil, brab tete i rigonéy de lowoh ro, brab mingar, brab témbé bá éndae toow, brab félangka-langka, brab du-fang, brab kéléhanay de tete rigonén. ²³ I kéléhanay de ni tete tidew dob fédewi étewe brab funa no mékérésik.”

²⁴ Tidew báno, ménagéw i Jesuse tidew diyo mangéy dob de ingéd gédét dob ingéde Tiro. Diyo réménahur dob lawie, atin ménuyot ké énda gétigay de étew i gono nuwe. Gido loo, ménslalag i Jesuse diyo bat. ²⁵ Atin diyo i libune wén i klohe kénogo no rénahukoy saitane. Atin énggelingoo noy fantage bé Jesuse. Mélaw ménagayas ménangéy dob Beene brab ménélengkéb dob adafa nuwe. ²⁶ Atin nongotén dob Jesuse bé feféralréyé noy saitane tidew dob kénogo nuwe ni. Endob i ni libun, békén Judio. Yamula, tidew dob ségiyowe ingéd fédawét Fenisia dob Siro. ²⁷ Mélaw nuret Jesusey sébaane binuwaya inok fégétiga no de bé tabangé noy de Judio sungu, atin tidew báno tabangé noy de békén Judio. Ménbérél mano, “Féamaén na métah i de nga. Non énda fatutén ké dotén i amaéy de nga atin ibérén dob de itu.”

²⁸ Endob ménbérél i libune ni mano, “Toow, Maistéro, éndob foyon foy de itu géamaa roy de momu mélawu tidew dob amaéy de nga.”

²⁹ Mélaw séménbul i Jesuse mano, “Fiyoy nan kékérélém. Mélaw ule go non ménutén i saitane tidew dob nga me.”

³⁰ Tidew báno, ménule i ni libun, brab énggito noy nga ne méniro, brab i saitane éndaén rénahuko no de.

Nuwa Jesusey ségétéwe bokongén brab mow

³¹ Tidew báno, ménagéw i Jesuse tidew dob de ingéd gédét dob Tiro brab ménémanték mangéy bá ingéde Sidon atin ménlaus dob dogote Galilea. Atin témenara dob gonone fédawét “Do Folo Ingéd”. ³² Atin wén i de étew nuwit ro mangéy dob Jesusey lagéye bokongén brab énda toowén gékérél fiyo. Atin nongot ro dob Beeney gamaké no inok adi-adi. ³³ Mélaw i Jesuse, nuwitén féraru tidew dob de ménlimud do étew. Tidew báno, fendiyoén i de dau kémérén dob de kéklingo i bokongéné ni, brab fénreén i dau kémér ne brab kénuwahén i dila ne. ³⁴ Tidew báno, léménengag i Jesuse saréw dob lawayo, brab fénénaréni kékérénawa nuwe, atin ménbérél dob beene mano, “Ifata”. (I atag ne “Méungka go.”)

³⁵ Sonom báno, i de kéklingoén ménadi-adi brab énggégélingo, atin i kékérél ne ménadi-adi so. Mélaw ménnganay ménbérél fiyo. ³⁶ Tidew báno, i Jesuse sénuguén i de étew diyo bá békén bérélhé roy ni rénigo no dob de ségiyo. Endob amun sénuguén bero bá békén ureté ro, ménlabi na foy kékuret ruwe de. ³⁷ Atin i kéléhanay de énggégélingo de toow ro fo ménngaif. Ménbérél ro maro, “Fiyoy kéléhanay de rigoné no ula-ula. Géfégélingoo noy de bokongén brab géférél noy de mow.”

8

Fénwaléy Jesuse médooy klohe amaén

¹ Enda mérugayén tidew báno, ménlimud man i de médooy étew. Amun méntréy i de amaé ro, ténavag Jesusey de kuyugén mangéy dob Beene, brab ménbérél dob berowe mano, ² “Méuray i na guwe bá de ménlimud ni do étew, non ménélémén gétérésangan i kédini ruwe ni dob Begéne, atin béléewe méntréy i amaé ruwe. ³ Atin amuk féuleé ku bero mélawayaf ro, mésumba ro dob de lowoh

aguwon, non i de dumo bero mérayu i de kétidew ro.”

⁴ Atin ménbérélh i de kuyugén mano, “Ati kéfingé-fingé i kéfámae bé de médo ni étew dob ni gonon mérayu tidew dob de lawi?”

⁵ Atin i Jesuse fénénginsaa no bero mano, “Firoy timan i fa koman?”

Séménumbul ro maro, “Fitew timan.”

⁶ Tidew béo, sénuguén i de ménlimud ni do étew bé mésar ro dob fantade. Atin éndotén i fitewe timan fan brab ménfésalamat dob Tuluse. Tidew béo, sénbaad-baadén, brab nirayén dob de kuyugén inok saaré ro dob de étew. Atin rénigo roy ni.

⁷ Brab wén soy do kloh sédo ro, éndob énda médo no. Atin ménfésalamatén man dob Tuluse brab bénréhén bé de kuyugén bé saaré ro so. ⁸ Atin i kéluhanay de étew, téménantu ro mama taman ménbésor ro. Fot ngibuy kédo ruwe. ⁹ Tidew béo, i de kuyugén ténimu roy de sama ro brab ménféno i fitewe timan biton. Tidew béo, fénule Jesusey de ménlimud ni do étew. ¹⁰ Sonom béo, menda dob awange beroy de kuyugén, atin ménangéy ro dob ingéde Dalmanuta.

¹¹ Wén i no sébaan fuweh, i de Fariseo ménangéy ro dob Jesuse brab ménsséédél ro de. Ménuyot ro téméngkad bé Jesuse, mélaw nongot ro bé rigono no bero sébaan mékégaif galbék inok fégito no bero tidew dob Tuluse. ¹² Endob i Jesuse fénsénarén i kéférénawa nuwe sabaf bé kétete i fédew ne. Brab ménbérélh mano, “I de begom do étew méuyag béleewe ni, sedek ongoté kom i mékégaife? Béréhé ku begom i toowe, énda rigoné kuy mékégaife inok ménintoow gom.”

¹³ Tidew béo, i Jesuse beroy de kuyugén téragak roy de étew ni, atin menda ro man dob awange mifar dob dogote.

¹⁴ Atin i de kuyugén énggélifo roy muwite fan saliyu bé sébaane saén fan dob awange. ¹⁵ Atin nuret Jesuse beroy sébaane binuwaya fantag bé de tete adatén do étew. Ménbérélh mano, “Ingata kom brab sénggila gom

i fégféréuke fan kay de Fariseo brab datu Herode brab de kuyugén.”

¹⁶ Endob i de kuyug Jesus, énda énggésobuto roy ni binuwaya. Marok bénréh Jesusey fantage bé tintuwe fégféréuk fan. Mélaw ménsgéno-géno ro maro, “Bénréhén i ni non énda i fa tom.”

¹⁷ Endob i Jesuse énggétiga noy kéfégitung ruwe. Mélaw ménbérélh mano, “Sedek ségén-géno gom fantag bé kékulang i fa tome? Aw énda séna gésobuto kom de? Maak do léngléngén gom. ¹⁸ Wén i do moto gom éndob maak do langafén gom. Wén soy do kelingo gom éndob maak do bokongén gom. Aw énggélifo kom i rénigo guwe? ¹⁹ Amun sénbaad-baad guy de limo timan fan dob de limo ngibu étew, firoy gébiton i énggétimuo kome samaén?”

Atin séménumbul ro maro, “Folo bra ruwo.”

²⁰ Atin ménénginsa i Jesuse man mano, “Atin amun sénbaad-baad guy de fitew timan fan dob de fot ngibu étew, firoy gébiton i énggétimuo kome samaén?”

Atin séménumbul ro maro, “Fitew.”

²¹ Atin ménbérélh man i Jesuse mano, “Aw énda séna fo gésobuto kom de?”

Nuwa Jesusey ségétéwe langafén

²² Wén i no sébaan fuweh, énggumah i Jesuse beroy de kuyugén dob ingéde Betsaida. Atin wén i de étew nuwit ro mangéy dob Beeney ségétéwe langafén lagéy, brab nongot roy gamaké no inok adi-adi. ²³ Atin i Jesuse, narakan i ni langafén brab ménusut ro kloh dob no ingéd. Tidew béo, dénuraa noy de moto no brab ténégé noy langaféne ni. Tidew béo, ménénginsa i Jesuse mano, “Aw wén i gito mo?”

²⁴ Atin iling-ililing i lagéye ni brab séménumbul mano, “Hoo, gégitowu do étew éndob maak do kayew magéw.”

²⁵ Tidew béo, i Jesuse ténégé no man féruman i de moto no. Sonom béo, téménéngténg i ni lagéye brab énggégitonén fiyo non ménadi-adinén i

de moto no. ²⁶ Atin i Jesuse sénuguén mule brab bénréhén mano, “Kago mawét dob nan ingéd.”

I kéunur Pedrowe

²⁷ Tidéw béno, méntaus i Jesuse brab de kuyugén mangéy dob de ingéd gédét dob ingéde Sisarea Filipo. Brab amun diyo ro séna dob de lowoh aguwon, fénénginsaa Jesuse bero mano, “Ati kébéréh i de étew ké ati Begéne?”

²⁸ Séménumbul ro maro, “Wén i de émbéréh maro, Juan Bautista go kun. I de dumo maro, Elias go kun. Brab i de dumo maro, Beem kun i énggétahe sénarigoy Tuluse muret.”

²⁹ Tidéw béno, ménénginsa i Jesuse man mano, “Dob begome, ati kébéréh gome fantag bé Begéne?”

I Pedrowe séménumbul mano, “Beemey Kristowe sénugu i Tuluse inok méguléw go dob de étew.”

³⁰ Tidéw béno, bénréh Jesuse bero mano, “Kagom béréhén i ni fantag bé Begéne dob de ségiyo.”

I kéuret Jesuse fantag bé kéléhu ne

³¹ Tidéw béno, i Jesuse féngganayén i kétoro ne bero fantag bé mérigowé dob Beene. Ménbéréh mano, “I Nga i Kéilawane, sani Begéne, médooy rasayé kuwe. Brab i de odoro tom do Judio brab de odoroy de fadi brab de témořo bé kitabe ikaa ro Begén. Atin féléhué ro Begén. Endob dob gétéléwo nuwe gétérésangan tébuleu.” ³² Ménkéntay i kébéréh ne bé ni dob berowe. Mélaw i Pedrowe nuwitén i Jesuse inok ruwo ro saén, atin génléen. ³³ Endob séménling i Jesuse brab téneqténgén i de kuyugén. Atin génléen i Pedrowe mano, “Férayu go dob Begéne, non maak Satanas go. Non énda mégitung go loo bé Tuluse, éndob mégitung go loo bé kéilawane.”

³⁴ Tidéw béno, ténavag Jesusey de ménlimud do étew brab de kuyugén inok mangéy ro dob Beene. Atin ménbéréh dob berowe mano, “I étewe méuyot furay Begén, kailangan diguré noy kaane kétayan inok odoro noy kétayay Tuluse. Tidéw béno, kailanga no gédayday bé de kérégénon ségiléw

bé Begéne, fiyon fo ké féléhuén dob kruse. ³⁵ Non i étewe méuyot émféraru bé umul ne, méléhu. Endob i méléhue bé kéfuray ne Begén brab sabaf bé Fiyowe Uret, gédoté noy umule magufusa. ³⁶ Ufama, fiyon fo ké i ségétewé étew gédoté noy kéluhanay éntingayéne dob duniyae ni, énda i atagén buluk méléhu atin mangéy dob emfernowe. ³⁷ Enda i tamuk fakay fégéluluk i étewe inok gédoté no saén i umule magufusa. ³⁸ Mélaw buluk wén i mémala muret fantag bé kéunur ne Begén brab de kétoro gu dob duniyae ni méfeno bé de énda méngintulus béléewe ni, i Begéne, sani Nga i Kéilawane, malané ku so buluk séfuleu moso begey i de télakiy Tuluse. Bé béno, rémendawu loo bé Abay guwe Tulus.”

9

¹ Atin féntaus Jesusey kébéréh ne mano, “Béréhé ku begom i toowe, wén i do dumo begom énda méléhu ro taman énda gito roy kékéfugléw i Tuluse bé de étewén, gégumah darabayay barakat ne.”

Enggiton i kéréndaw Jesuse

² Amun ménifus i néme gétérésangan, nuwit Jesusey Pedrowe brab Santigowe brab Juane, atin ménangéy ro dob uruk i gérotore tuduk, énda i ségiyo étew diyo. Atin i lala ruwe téneqténg bé Jesuse, i falas ne ménfégalin. ³ Brab i kégal ne ménwaléy fute rémendaw. Enda nay étew dob duniyae ni gétumaka noy kégale inok fute loo bé ni. ⁴ Sonom béno, méntefégitoy Eliase brab Moisese brab ménbéréh ro bé Jesuse. ⁵ Atin i Pedrowe ménbéréh dob Jesuse mano, “Maistéro, toow fo fiyo non dob ni tom. Rémigo gey téléc timan dung-dung. Sébaan i kaame de, sébaan i ka Moisese de, brab sébaan i ka Eliase de.” ⁶ Enda gétiga Pedrowey fiyowe béréhé no non toow ro fo ménggilak.

⁷ Tidéw béno, wén i rawéne ténggalungo no bero. Atin wén i ménbéréh tidéw dob rawéne ni mano, “Been i niy toowe fo kénimuo ku Nga

gu. Fégélingo gom.” ⁸ Sonom béno, méniling-ilng i de kuyugén éndob énda i énggito ro saliyu saén bé Jesuse.

⁹ Amun léménudug ro tidew dob tuduko no, i Jesuse fénégétén i kékéréh ne dob berowe mano, “Kagom génoén dob ségiyowey ni énggito gom taman i Nga i Kéilawane, sani Begéne tébule.”

¹⁰ Atin nodoro roy sugu Jesuse ni éndob séfénginsa ro sébero-bero saén maro, “Ati keey i atag i kékéréh ne mano, ‘Tébuleu?’ ” ¹¹ Atin fénénginsa ro dob Jesuse maro, “Sedek i de téromo bé kitabe émbéréh ro bé kailangan géétah na gégumah i Eliase, atin tidew béno gégumah i Kristowe kun?”

¹² Atin séménumbul i Jesuse mano, “Toow, géétah gégumah i Eliase inok tafayé noy kéluhanane. Endob sedek ménsulat i kékéréh i Tuluse bé i Nga i Kéilawane mérasay médoob brab ikaay de étew? ¹³ Endob bérhéhe ku begom, i Eliase énggégumahén, éndob i de étew fénrasay ro loo bé kétaya ruwe. Been soy ménbéréhe dob Ménslate Kékéréh i Tuluse mérigo dob beene.”

Dénédél Jesusey saitane

¹⁴ Atin amun énggumaha ro Jesusey de ségiyo kuyugén, énggito roy dakélé ménlimud do étew diyo so. Atin wén i de téromo bé kitab i de Judio séédél bé de kuyugén. ¹⁵ I kéluhanay de étew do ménlimud, amun énggito roy Jesuse, toow fo ménggaif ro, atin ménségéta ro mangéy dob Beene atin séngifa ro. ¹⁶ Atin fénénginsaa Jesusey de kuyugén mano, “Ati no funa kom séédél bé do étew diyo?”

¹⁷ Atin wén i ségétewe lagéy dob de étew ni ménlimud séménumbul mano, “Maistéro, nuwit guy nga guwe lagéy mangéy dob Beeme, non rénahukoy saitane funa no mow. ¹⁸ Atin wén i no férasayéy saitane, atin tuwaré no dob fantade. Atin rémbew i ba ne, brab kémigét i de kifé no, brab waléy de témingkog. Nongot gu bé de kuyugém bé feféraréyé roy saitane, éndob énda gagané ro de.”

¹⁹ Atin ménbéréh i Jesuse dob berowe mano, “Enda sémarig gom bé Tuluse. Lugoténun sétafik begom. Enda gétiga ku ké ati nay kérugay i kétinkél guwe sétafik begom. Uwit gom diniy ngaa nan.” ²⁰ Mélaw nuwit roy ngae dob Beene.

Atin i saitane ni amun énggito noy Jesuse, ténuwarén i ngae ni dob fantade brab ménkériring, rémbew i ba ne so. ²¹ Atin fénénginsaa Jesusey abay ne mano, “Ménfiroyén i kégédam ne bé ni?”

Atin séménumbul mano, “Tidew na fo kékélohén. ²² Brab médoonén gule féléhuéy saitane damén méibér dob aféye brab dob wayége. Mélaw amuk wén i fiyo gérigono mo, fégédawan gey brab tabangéy gey.”

²³ Atin séménumbul i Jesuse mano, “Sedek fénginsaa mo Begén ké wén i fiyo gérigono ku? Fakay i kéluhanane dob étew munur dob Tuluse.”

²⁴ Sonom béno, ménbéréh métanug i boh i ngae ni mano, “Munuru, éndob kulang i kéunur guwe. Féegétém i kéunur guwe.”

²⁵ Tidew béno, énggito Jesusey médoowe do étew ségéta fégédét dob berowe. Mélaw sénuguén i saitane mano, “I beeme saitan émfémow brab émfébokong bé étew. Sugué ku beem, sut go tidew dob ni nga, brab kagonén séfuleon de!”

²⁶ Sonom béno, i saitane ni ménkes, brab gétimal i kéfekikil ne de. Tidew béno, ménsut i saitane atin i ngae ni maak ménléhuén non éndaén lékutohén. Mélaw médooy de étew ménbéréh ro maro, “Ménléhuén.”

²⁷ Endob i Jesuse génamakén i kémér ne brab fentekén, atin téménindég i ngae ni.

²⁸ Tidew béno, i Jesuse brab de kuyugén ménule ro. Atin amun ménahur ro dob lawie, brab énda i ségiyo étew diyo, ménénginsa i de kuyugén dob Jesuse maro, “Sedek énda gagané key i émféféraréyé bé no saitan?”

²⁹ Séménumbul i Jesuse mano, “I ni klase saitan, énda médédélén bé fiyon

udenén fégédédél de, saliyu saén bé kédasale."

I kéuret Jesuse fantag bé kéléhu ne

³⁰ Tidéw béno, ménagéw ro man tidéw diyo atin téménara ro dob ingéde Galilea. Atin ménika i Jesuse ké gétigay de étew i gono nuwe. ³¹ Non téneroén i de kuyugén mano, "I Nga i Kéilawane, sani Begéne, fékéfo dob de étew moso sani de sébanil Begén. Atin féléhué ro Begén. Endob amuk méifus i télewe gétérésangan, tébuleu."

³² Endob bé béno gai, i de kuyugén énda énggésobuto roy béréhé Jesuse. Atin mégilak ro de ménginsa ké ati atag ne.

³³ Atin méntaus ro taman énggumah ro dob ingéde Kafernaum. Atin amun énggerahur ro dob lawie diyo, i Jesuse ménénginsa dob de kuyugén mano, "Ati funa kome séédél dob de lowoh aguwon?"

³⁴ Endob mémala ro sémumbul non amun diyo ro séna lowoh aguwon, ménséédél ro ké ati isuwe bero toow fo gérotor. ³⁵ Tidéw béno, i Jesuse ménasar brab ténawagén i de folo bra ruwo gétew do kuyugén mangéy dob Beene. Atin ménbéréh dob berowe mano, "Amuk wén i ségétew témayan toow fo gérotor, ay niy fatute rigoné no. Fatut térifantad brab waléy ségétew sugu-suguéy kéluhanay de dumo no." ³⁶ Tidéw béno, éndot Jesusey ségétewé nga brab féndiyoén dob adafa ruwe. Atin sénfifi Jesuse brab ménbéréh dob berowe mano, ³⁷ "Fiyon atiy étewé témayakuf bé ngae loo bé ni sabaf bé kéunur ne Begén, tayakufé no so Begén. Brab atiy témayakufe Begén, tayakufé no soy Tuluse ménféuwit Begén."

³⁸ Atin ménbéréh i Juane mano, "Maistéro, énggitó gey i ségétewé étew démédél do saitan nusarén i dawét me. Endob génlé gey non békén dumotom."

³⁹ Bang Jesuse, "Kagom géléen de. Non amuk wén i rémigo mékégaif usaré noy dawét guwe, énda magadén émbéréh tete fantag bé Begéne. ⁴⁰ Non i békéne sébanil betom, dumotom."

⁴¹ Béréhé ku begom i toowe, buluk

wén i témabang begom, fiyon iraya no saén begom ségétabu wayég inémén sabaf begomey de kuyug gu, tintu gédoté noy barase moso.

⁴² "Endob amuk wén i émfésala bé ségétewé loo bé ni nga munur dob Begéne, toow fo géttimal i kékukume de. Mélaw mas na fiyo dob beene ké ibérén dob dogote ikéton dakél batéw i reer ne. ⁴³⁻⁴⁴ Mélaw amuk sébaan bé kémér mey émfésalae beem, kéléngém. Non mas na fiyo ké gédoté moy umule magufusa ségébala saén i kémér me, bé géangéy go dob uleono emferno ké ruwoy kémér me. Non diyo dob emfernnowoy de sofot énda méléhu ro, brab i aféye énda mífandaén. ⁴⁵ Atin amuk i funa muwe mésala i sébaane bé sékéy me, kéléngém. ⁴⁶ Non mas na fiyo ké gédoté moy umule magufusa ségébala saén i sékéy me, bé géangéy go dob emfernovo, ruwoy de sékéyém. ⁴⁷ Atin amuk ségébala bé moto muwey funa muwe mésala, lésitém. Non mas fiyo ké géahur go dob kéguléw i Tuluse ségébala saén i moto muwe, bé géangéy go dob emfernovo ruwoy de moto mo. ⁴⁸ Non diyo dob emfernnowoy de sofot énda méléhu ro, brab i aféye énda mífandaén.

⁴⁹ "Atin i aféye fédiyoén moso dob kéluhanane ségiléw bé timuse fédiyoén dob amaéne.

⁵⁰ "I timuse fiyo, non émféfiyo bé amaéne. Endob buluk mékédan i kétasik ne, éndaén i nonomén brab éndaén géséfule i kétasik ne. Atin ségiléw so bé ni, i de rigoné kom fatut géiring bé timuse inok émféfiyo gom bé de étew. Atin békén fatut sékérít gom."

10

Fantag bé késégélake

¹ Tidéw béno, ménagéw i Jesuse tidéw Kafernaum mangéy dob sakuf i dakéle ingéd Judea brab dob difar i wayége Jordan. Atin diyo médooy de ménangéy sélimud man dob Beene. Atin téneroén bero loo bé adat ne.

² Atin wén i de Fariseo ménangéy dob Jesuse inok téngkadé ro inok

gébérého noy békéne katabuwan. Mélaw fénenginsaa ro maro, "Aw fakay dob kitab tome ké i lagéye gélaké noy bawag ne?"

³ Atin séménumbul i Jesuse mano, "Ati sugu Moisese dob kitabe fantag bé késégélake?"

⁴ Atin séménumbul i de Fariseo maro, "Ténungkas Moisesey lagéye gémélak bé bawag ne amuk irayén i sulate bé késégélake."

⁵ Endob ménbérélh i Jesuse dob berowe mano, "I funa Moisese ténungkasén begom ségélak non métégas i de atur gom. ⁶ Endob dob féganayo bé kélémbage bé kéilawane, rénigoy Tulusey ségétewe lagéye brab ségétewe libun. ⁷ Atin been i niy funay lagéye tagaké noy abay ne brab idéng ne atin sétafik bé bawag ne. ⁸ Atin i ruwowe ni gétew waléy sébaan. Mélaw éndaén ruwo ro gétew, éndob ségétew saén. ⁹ Mélaw buluy fénwaléy i Tuluse sébaan, énda fakayén séfériyaséy étewe."

¹⁰ Atin i de kuyug Jesus, amun ménule ro ménahur ro dob lawie bero Jesuse, ménenginsa ro dob Beene fantag bé késégélake. ¹¹ Atin séménumbul mano, "Fyon atiy lagéye gémélak bé bawag ne atin mawag man ségiyo libun, léménamfa, brab ménalsa dob sunguwe bawagén. ¹² Atin amuk wén i libun génlakén i bawag ne atin mawag ségiyo lagéy, léménamfa."

¹³ Wén i no sébaan fuweh, wén i do étew nuwit roy de nga ro dob Jesuse inok féfiyoné no bero. Endob i de kuyugén génlé roy de étew ni, non marok énda fiyo no ké félugotén i Maistérowe. ¹⁴ Endob amun énggitoy rénigoy de kuyugén, ménkérít i Jesuse. Atin ménbérélh dob de kuyugén mano, "Fédaya gom i de nga mangéy dob Begéne. Brab kagom alangén bero non i de étew sémarig loo bé késarig i de ni nga, féguléwoy Tuluse bero. ¹⁵ Béréhé ku begom i toowe, buluk i késarig i ségétewe békén loo bé késarig i ngae, énda féguléwoy Tuluse de." ¹⁶ Tidéw béo, sénfifi noy de nga

brab téngé noy de uléw ro féfiyoné no bero.

I Kawasawe étew

¹⁷ Atin amun i ro Jesuse méntaus ro magéw, wén i ségétewe lagéy ménfégéta mangéy dob Jesuse brab ménlingkuwéd dob adafa nuwe. Atin ménenginsa mano, "Fiyo Maistéro, ati rigoné kuwe inok gédoté kuy umule magufusa?"

¹⁸ Séménumbul i Jesuse mano, "Sedek fédawété mo Begén fiyo? Enda i ségiyo fiyo saliyu saén bé Tuluse. ¹⁹ Gétiga moy de sugu. Kago méméléhu, kago lémamfa, kago ménakaw, kago uretén i dumo muwe bé békéne toow, kago lémiful, brab fégadata moy boh me brab idéng me."

²⁰ Séménumbul i lagéye ni mano, "Maistéro, i kéluhanay de ni nodoro ku tidéw féganay klohu de séna."

²¹ Atin ténéngténg Jesuse brab ménimu de. Atin ménbérélh mano, "Sébaan i kulange beem. Ule go brab fébéléyém i kéluhanay éntingayéne kaam atin irayém i kurtae dob de méskinan. Atin mélaw kawasa go moso dob lawayo. Tidéw béo, énggonén, odor go Begén." ²² Amun énggelingooj étewe niy ni, énggiton ménwaléy tete i fédew ne. Atin ménagéw loo bé nan, non toow fo kawasa.

²³ Tidéw béo, i Jesuse méniling-iling dob de kuyugén brab ménbérélh dob berowe mano, "Toow fo mérégén i kéahur i de kawasa dob kéguléw i Tuluse."

²⁴ Atin i de kuyugén ménagaif ro bé ni bénréh Jesuse. Gido loo, fentaus Jesusey kékérélh ne mano, "Do kuyug gu, toow fo mérégén i kéahure dob kéguléw i Tuluse. ²⁵ Mas na mélémuy kéahur i dakéle ayam dob tosong i darume bé ségétewe étew kawasa dob kéguléw i Tuluse."

²⁶ Tidéw béo, ménumanan i kégai i de kuyugén brab ménbérélh ro maro, "Ati mélaw i de fakay méfukas?"

²⁷ Atin ténéngténg Jesuse bero brab séménumbul mano, "Amuk dob rigonéy kéilawane saén, énda fo

fakayén. Endob i Tuluse gérigono no, non fakay gérigonoy Tulusey kéluhanane.”

²⁸ Tidéw béno, ménbéréh i Pedrowe mano, “Ténagak gey i kéluhanane atin ménfuray gey Beem.”

²⁹ Atin bang Jesuse, “Béréhé ku begom i toowe, i ségétewé témagak bé lawi ne, taloo no de dumo no sétiman idéng, taloo no do lukésén, taloo no do ngaén, taloo no fantadén inok ureté noy Fiyowe Uret fantag bé Begéne, ³⁰ gégédot toow na fo médoobé de ni do gai. Gégédot mératuh takéf bé de lawi, brab dumonosétiman idéng, brab do lukésén, brab do ngaén, brab do fantadén. Atin saliyu na bé nan, gédoté noy umule magufusa dob de gai moso. Endob amuk dini séna, ferasayén sabaf bé Fiyowe Uret. ³¹ Endob i de médoobé do énggéetah béléewe ni, do géfuray moso. Atin i de médoobé do énggéfuray béléewe, waléy do géétah moso.”

Nuret Jesusey fantage bé kéléhu ne

³² Atin i Jesuse beroy de kuyugén, amun diyo ro dob aguwone mangéy dob Jerusalem, ménagéw i Jesuse dob métah ruwe. Atin ménngaif i de kuyugén brab ménngilak i de ménfuray bero, non magéw ro mangéy dob Jerusalem. Atin i Jesuse nuwitén man i de folo bra ruwo gétew do kuyugén, inok sébero-bero saén, brab bénréhén beroy ati mérigowemoso dob Beene.

³³ Ménbéréh mano, “Fégélingo gom, mangéy tom Jerusalem. Diyo, i Begéne, sani Nga i Kéilawane, irayu dob de odoroy de fadi brab dob de téromo bé kitabe. Atin kukumé ro Begén méléhu. Tidéw béno, atéé ro Begén dob de békén Judio. ³⁴ Atin i de békén Judio, diyangkaé ro Begén, brab duraa ro Begén, brab basadé ro Begén, brab féléhué ro Begén. Endob amuk méifus i télewe gétérésangan, tébuleu.”

I ongoté ro Santiagowe brab Juane

³⁵ Tidéw béno, i Santiagowe brab Juane, sani de nga Sebedeo, téningé roy Jesuse. Atin ménbéréh ro maro,

“Maistéro, wén i ongoté keye dob Beeme rigoné mo.”

³⁶ Atin bang Jesuse, “Ati kétaya kome rigoné ku begom?”

³⁷ Atin séménumbul ro maro, “Amuk Beem i méguléwe moso brab mésar go dob saray méguléwe, tungkasém so begey mésar dob sékulo muwe ségétew i fingée dob kuwono muwe brab ségétew i fingée dob biwong me.”

³⁸ Endob ménbéréh i Jesuse dob berowe mano, “Enda gétiga kom i ongoté kome. Aw gagané kom i de émfasang mérigo dob Begéne séko? Aw gagané kom i kéléhue loo bé mérigowebegéne?”

³⁹ Atin séménumbul ro maro, “Hoo, gagané key.”

Atin bang Jesuse bero, “Toow, mérasayu fo séko toow, atin mérasay gom so. Atin féléhuénu, atin féléhuén gom so. ⁴⁰ Endob békén Begén i mémilie bé ati mésare fingé dob kuwono kuwe taloo no fingé dob biwong guwe. I de ni saran kay de étew fénémili i Abay guwe Tulus mésar diyo.”

⁴¹ Atin i de folo gétew dumodokuyugén, amun énggelingoo roy ni ongoté ro Santiagowe brab Juane, ménkérit ro bero. ⁴² Mélaw ténawag Jesusey kéluhana ruwe inok sélimud ro, brab ménbéréh dob berowe mano, “Gétiga kom i de étew kun odoron, wén i atura ro bé de étew brab méguléwon bero. ⁴³ Endob békén loo bé niy begome. Amuk wén i ségétew begom méuyot waléy odoron, fatut waléy sugu-suguéy kéluhanay dedumo no. ⁴⁴ Atin amuk wén i ségétew begom méuyot waléy gérotor, fatut térifantad. ⁴⁵ Non fiyon i Begéne sani Nga i Kéilawane, énda ménangéyudini inok wén i do sugu-sugué ku. Yamula ménangéyudob duniyae ni inok waléy sugu-suguén brab inok iray guy umul guwe fégéfukas bé médoowee étew dob de sala ro.”

Nuwa Jesusey langaféne

⁴⁶ Atin énggumah i ro Jesuse dob ingéde Jeriko. Atin amun méntaus ro

ménagéw tidéw diyo beroy dakéle do ménlimud étew, ténaraa roy ségétewe étew langafén ménsar dob doror i aguwone mongot limus. I dawét ne Bartimeo, nga Timeo. ⁴⁷ Atin amun énggelingoo noy Been i Jesuse tidéw Nasaret témara, téménawag métanug mano, “Jesus, séfu Datu Dabid, fégédaw go begén!”

⁴⁸ Médooy de étew génlé ro maro, “Kago selekén!” Endob taus so mékes toow na fo métanug mano, “Séfu Datu Dabid, fégédaw go begén!”

⁴⁹ Atin téménrén i Jesuse brab ménbéréh mano, “Tawag gom i étewa nan.”

Mélaw ménbéréh ro dob langaféne ni maro, “Oror go! Tindég go non tawagé Jesuse beem.”

⁵⁰ Mélaw kénda noy géruwowe lafin bé kégal ne brab ménagayas téménindég brab ménagéw mangéy dob Jesuse.

⁵¹ Atin fénénginsaa Jesuse mano, “Ati kétaya muwe rigoné ku dob beeme?”

Séménumbul i langaféne ni mano, “Maistéro, méuyotu ké gégitowu damén.”

⁵² Atin ménbéréh i Jesus mano, “I kéfeginugut mey funa muwe ménadi-adi. Na, ule gon.” Sonom béno, énggégito nén i lagéye ni, atin ménfuray bé Jesuse dob aguwone.

11

I kéahur Jesuse dob Jerusalem

¹ Amun i Jesuse brab de kuyugén gédét ron dob ingéde Jerusalem, énggégumah ro dob sébaane tuduk féndawét Olibo, gédét dob de ingéd féndawét Betfage brab Betania. Atin sénugu Jesusey ruwowe gétew bé de kuyugén inok métah ro magéw. ² Atin ménbéréh dob berowe mano, “Taus gom agéw mangéy dob nan ingéd gésaréwo kom. Buluk gérumah gom diyo, gito gom i native kuda nikét, énda sénay énggékuda de. Ukoh gom brab uwit gom dini. ³ Buluk wén i ménginsa dob begome, ‘Sedek rigoné kom i ni?’ béréh gom de, ‘Kailangay

Kadna tome, atin féséfuleén so magad.’”

⁴ Mélaw ménagéw ro brab énggito roy natwe ni kuda dob no ingéd, diyo dob aguwone nikét dob bengaway sébaane lawi. Amun nukoh ron, ⁵ i de étew diyo ménénginsa ro maro, “Sedek ukohé kom i kudaa nan?”

⁶ Atin séménumbul ro loo bé kékéréh Jesuse de bero. Mélaw fénagéw i de étew bero muwit bé natwe ni kuda.

⁷ Atin nuwit ro mangéy dob Jesuse. Brab namféno ro bé de kégal ro. Atin kénudaa Jesuse. ⁸ Atin médooy de étew bénékah roy de dumo bé de kégal ro dob aguwo Jesuse fégito roy kékásana ruwe de. Atin wén soy de étew bénékah roy de daun kénléng ro dob de kayéw dob de safad.

⁹ Atin i de méntah do étew brab de ménfuray, ménkes ro maro, “Dayewé tom i Tuluse! Féfiyonéy Tuluse damén i ni étew gérumah tidéw dob Kadnane. ¹⁰ Féfiyonéy Tuluse damén i kékéguléw ne émfétaus bé kékéguléw i séfu tome Datu Dabid. Dayewé tom i Tuluse!”

¹¹ Atin méntaus i ro Jesuse mangéy Jerusalem. Amun énggumah ro diyo, ménangéy i Jesuse dob lawi i Tuluse. Atin amun énggilidén ténéngténgén i kéluhanay de languntaman diyo, ménuts atin ménsefule mangéy Betania beroy de folo bra ruwo gétew kuyugén, non témégénén.

¹² Atin dob sébaane de fuweh, bé lala ruwe magéw tidéw Betania mangéy Jerusalem, mélafay i Jesuse.

¹³ Atin énggékulaya no tidéw mérayu i kayéwe fénadawét igos mérampung i dau nuwe. Mélaw nangéyén lénangu kinok wén i onokén. Endob amun énggumah, énda i ségiyo énggito no saliyu bé de dau no, non békén séna gaiy no do kayéw igos mégonok. ¹⁴ Atin ménbéréh dob ni kayéw mano, “Tidéw béléewe ni, éndaén i géama bé onok me féruman.” Atin énggelingoo de kuyugén.

Dénédél Jesusey de démagang dob lawi i Tuluse

¹⁵ Amun énggumah i ro Jesuse dob Jerusalem, méntaus so dob lawi i Tuluse. Amun ménahur, dénédelén i de étew démagang brab do méléy-méléy diyo. Atin bénluweén i de ahayay de lémuluk kurta brab ténuwarén i de saray de émfébéléy do fégétulak do marafati. ¹⁶ Atin énda fédayáé no de ké wén i étew muwit do éntingayén témara dob fésawayaw lawi i Tuluse ni. ¹⁷ Atin téneroén i de étew mano, “Ménsulat dob Ménsulate Kébérhé i Tuluse mano, ‘I lawi guwe, fédawétén lawi gonon démasal kay kéluhanay de étew.’ Endob fénwaléy gom lawi i de ménakaw.”

¹⁸ Atin i de odoroy de fadi brab de téromo bé kitabe énggelingoo roy ni. Mélaw sénalikél roy fiyowe kékéféléhu ro de. Non ménggilak ro bé Jesuse non ménggaif i de ni médoor do étew bé kétoro ne.

¹⁹ Atin amun sémingkufén, ménékédan i Jesuse brab de kuyugén tidew dob Jerusalem.

²⁰ Atin bé géfuwéne de, bé lala ruwe magéw dob aguwone, énggito roy kayéwo no féndawét igos ménggangu taman dob de darirén. ²¹ Atin i Pedrowe, énggétédémo noy ati ménrigowe. Mélaw ménbérhé dob Jesuse mano, “Maistéro, téngténgém. I kayéwo diyo fénémulaém, ménggangu.”

²² Atin bang Jesuse, “Sarig gom dob Tuluse. ²³ Bérhé ku begom i toowe, fiyon udenén méréhon bé tuduke ni mano, ‘Angéy go dob dogote’, atin énda ruwo-ruwoy fédew ne, éndob méginugut bé kékébérhé ne méagéwon, méagéwon ba. ²⁴ Mélaw bérhé ku begom, fiyon udenén ongoté kom ké démasal gom, féginugut gom bé gédoté kom, atin gédoté kom ba. ²⁵ Atin amuk démasal gom, fésagada kom i étewe ménasala dob begome, inok i Abay gome Tulus fésagada no soy de sala gom. ²⁶ Non amuk énda fésagada kom i de dumo gom, i Abay gome dob lawayo, énda so mon fésagada no begom bé de sala gom.”

²⁷ Atin ménfélule man i ro Jesuse dob Jerusalem. Atin amun diyo

séménugud i Jesuse dob lawi i Tuluse, i de odoroy de fadi brab de téromo bé kitabe brab de odoroy de Judio, ménfégédét ro dob Jesuse. ²⁸ Atin fénénginsaa ro maro, “Bérhéhém begey ké ati atura muwe rémigo bé de ni? Ati méniraye Beem kuwagib?”

²⁹ Sénumbulo Jesuse bero mano, “Sémuliú ménginsa dob begome. Amuk sémumbul gom, sémumbulu so ké ati tidéwoy kuwagib guwe rémigo bé de ni. ³⁰ Bérhéh gom Begén, ati séménugue bé Juane inok mautis, Tulus loo ké étew saén?”

³¹ Atin i de odoroy de Judio séédél ro maro, “Amuk bérhéh tom ‘Tidéw dob Tuluse’, fénginsaa no betom ké sedek énda fénéngintoow tom i Juane.

³² Endob buluk bérhéh tom, ‘Tidéw dob étewe’, mékérit i de étew betom.” Non mégilak ro bé de étew non féngintoowy de étew i Juane sénarigoy Tuluse muret bé kékébérhé ne.

³³ Mélaw séménumbul ro dob Jesuse maro, “Enda gétiga key de.”

Mélaw bénréh Jesuse mano, “Enda so bérhéh ku de begom ké ati ménirayane Begén kuwagib rémigo bé de ni rigoné ku.”

12

I binuwayae fantag bé de tete témalima

¹ Tidéw bénoréh man i Jesuse binuwaya. Ménbérhéh mano, “Wén i ségetéwe étew wén i safadén nohoko no do ubas. Atin bénunsudo no kayéw fénggélangkatén de lémiwét, brab kéménalut fédéngon bé fégékérése bé wayég i de onokén. Brab réménigo tambala. Tidéw bénoréh, fentalimaén bé de ségiyo étew, brab ménagéw mangéy dob mérayue ingéd. ² Amun énggégumah i gaiy kékétewe de, séménugu ségetéw sugu-sugué no inok gédoté noy kaane de baad bé de onokén. ³ Endob i de témalima bé ni safad génamak ro brab lénubag roy ni sugu-suguén. Brab fénule ro énda i suwaréw nuwitén. ⁴ Tidéw bénoréh, i gefee bé safade sénugu non man i géreruwowe sugu-sugué no. Endob i de

témalima bé safad ne, fénali roy uléw ne brab fénémala ro. ⁵ Tidéw bénou, i gefee sénugu non man i gétéléwe sugusué no. Endob i de témalima bé safad ne, fénléhu ro. Loo so bé noy kérigo ruwe bé de médo do sugusué gefee bé safade ni. Wén i do lénubag ro de, wén soy dob fénléhu ro de. ⁶ Tidéw bénou, i gefee bé ni safad, wén nay ségettéwe sénuguén, sani kénimuo nuwe ngaén lagéy. Mélaw sénuguén mangéy dob berowe non fénggitungén mano, ‘Fégadata roy nga guwe.’ ⁷ Endob amun énggitoy de témalima bé safad ne, ménsebéréh-béréh ro maro, ‘Been i niy nga i gefee bé ni safad. Félehu tom inok gékatom i ni safad.’ ⁸ Mélaw génamak ro atin fénléhu ro, brab nibér ro dob liyuy safade ni.’

⁹ Atin fentaus Jesusey kékéréh ne mano, “Ati rigonéy gefee bé safade ni dob de ni téménalima bé safad ne? Angéyé no féléhuén bero. Brab irayén man dob ségiyowe témalima. ¹⁰ Aw énggébasana kom i ni Ménsulat Kékéréh i Tuluse mano, ‘I batéwe nikaay de réménigo bé lawie, been i ménwaléye toow na fo balilaga fiyo batéw. ¹¹ I ni rénigoy Kadnane ula-ula, atin mégaif tom de.’”

¹² Atin i de odoroy de Judio, ténulama ro kénéfo i Jesuse non énggébela dob berowey ni binuwaya. Endob énda fakayén non mégilak ro bé de médo do étew. Mélaw téngak roy Jesuse brab ménagéw ro.

Fantag bé buwise

¹³ Tidéw bénou, i de odoroy de Judio sénugu roy de Fariseo brab de kuyug Herod mangéy dob Jesuse inok téngkadé ro émbéréh bé bekéne katabawan. ¹⁴ Mélaw ménangéy ro dob Jesuse ménenginsa maro, “Maistéro, gétiga key toow i kétoro me. Brab métintu go, énda i isu ramigo mo bé de étew. Endob toroé moy toowe fantag bé kétayay Tuluse toow. Mélaw bérhéhém begey, aw fatut ba mayad gey buwis dob Sesare sani datue dob Roma taloo no énda?”

¹⁵ Endob énggétiga Jesusey akar ruwe, mélaw bénréhén bero mano, “Sedek férudio kom Begén? Uwitou sélafin félatah, brab féténgténg gom Begén.”

¹⁶ Amun niraya ro de, ménenginsa i Jesuse mano, “Ati gefee dawét brab falas gito gom dob nan?”

Séménumbul ro maro, “Ka Sesar.”

¹⁷ Tidéw bénou, bénréh Jesuse mano, “Iray gom dob Sesarey ka Sesare. Atin iray gom dob Tulusey kay Tuluse.” Atin toow ro fo ménngaif bé kékéréh Jesuse ni.

Fantag bé kétébulee

¹⁸ Atin wén i de Saduseo ménangéy ro dob Jesuse. I de Saduseo do étew énda ménngintoow ro bé kétébule i Tuluse bé de étew moso. ¹⁹ Atin ménenginsa ro dob Jesuse maro, “Maistéro, sénulat Moisese betom i kükumane bé buluk i ofo i étewé ménléhu, brab énggfélelo noy bawag ne, énda i nga ro, fatut bawagéy tuwaréy ne inok wén i séfu i ni étew bé tuwaréy ne. ²⁰ Ufama, wén i fitew gétew sétuwaréy falan lagéy. Brab i ofoe de ménawag. Tidéw bénou, ménléhu énda i nga ro. ²¹ Tidéw bénou, i géruwowe de bénawagén soy bawage fénled i ofo ne. Atin ménléhu so énda soy nga ro. Ségiléw soy ménrigowé dob gétéléwo ruwe. ²² Atin ségiléw so dob kéluhana ruwe. I fitew no gétew énggébawaga roy ni libun éndob ménléhu ro kéluhanan énda i nga ro. Tidéw bénou, ménléhu soy ni libun.

²³ Mélaw bé gaiy kétébule i kéluhanan de étew moso, ati isuwe bawag i ni libun bé ni fitew gétew sétiman idéng? Non énggébawaga no bero kéluhanan bé méuyag ro de séna?”

²⁴ Séménumbul i Jesuse mano, “Toow fo békén katabawan i kékégitung goma nan, non énda gétiga kom i de Ménsulat Kékéréh i Tuluse taloo noy barakat ne. ²⁵ Non amuk tébule i de étew, éndaén sébawag ro. Non ségiléw ro bé de télaki diyo dob lawayo. ²⁶ Atin i fantage bé kétébulee, aw énda énggébasana kom de dob librowe sénulat Moisese fantag bé

mérinoe kayéw? Non diyo ménsulat i bénréh i Tuluse dob Moisese mano, ‘Bégén i Tuluse féngadafé Abrahame, Isake, brab Jakobe.’ ²⁷ I atag i ni, i Tuluse féngadaféy de méuyag étew, békén do ménléhu. Mélaw tintu békén katabuwan i kénéfítung gome.”

I toowe na fo gérotor sugu

²⁸ Diyo soy ségétewe téromo bé kitabe brab énggelingoo noy de ni do étew séédél bé Jesuse. Atin amun énggétiga noy toow fo fiyoy késumbulo Jesuse bé de Saduseo, ménfégédét dob Jesuse brab ménénginsa mano, “Ati isuwe bé de sugu dob kitabe toow na fo mélaga?”

²⁹ Atin séménumbul i Jesuse mano, “Ay niy toowe na fo mélaga sugu: ‘Fégélingo gom do Judio, i Kadna kome Tulus sébaan saén. ³⁰ Féimu go bé Kadnane Tulusém bé kéléuhanay fédew me, brab bé kéléuhanay kamatu me, brab bé kéléuhanay itunga muwe, brab bé kéléuhanay bagér me.’ ³¹ Atin ay niy géruiwowe sugu: ‘Féimu go bé de dumo mo ringon so bé kéimu me bé kaame lowoh.’ Enda i ségiyo sugu gérotor na bé de ni.”

³² Atin ménbéréh i témoree bé kitabe dob Jesuse mano, “Fiyoy kénébéréh manan, Maistéro. Toow i no bénréhém sébaan saén i Tuluse brab énda i ségiyo saliyu bé Beene. ³³ Atin fatut féimu tom bé Tuluse bé kéléuhanay fédew tome, brab bé kéléuhanay itunga tome, brab bé kéléuhanay bagér tome, brab fatut féimu tom bé de dumo tom ringon so bé kéimu tome bé de katome lowoh. Toow na mélaga i de ni ruwo sugu bé kéléuhanay ténuwége ténulak do ayam brab do nirayén dob Tuluse.”

³⁴ Atin énggétiga Jesusey fiyoy késumbul i ni lagéy. Mélaw ménbéréh dob ni lagéy mano, “Magad saén i kénéfugléwoy Tuluse beem.” Atin tidéw béno, énda nay ségétew ménbaraw ménénginsa dob Beene.

³⁵ Amun témenoro i Jesuse dob lawi i Tuluse, ménénginsa mano, “Ati kénéfanu-fanu nuwe kénébéréh i de téromo bé kitabey Kristowe séfu Dabid saén?”

³⁶ Non fénbéréh i Rémodor i Tuluse bé Dabide mano, ‘I Kadnane ménbéréh dob Kadna kuwe, sar go dob kuwono kuwe, taman témanbanu bé de sébanil Beem.’ ” ³⁷ Atin fentaus Jesusey kénébéréh ne mano, “Amuk féndawét Dabidey Kristowe ‘Kadnan’, ati kénéfanu-fanu Kristowe séfu Dabide saén?”

Atin i dakéle ménlimud do étew ménoror ro mágélingo bé kétoro Jesuse. ³⁸ Atin téneroén bero mano, “Ingat gom bé de téromo bé kitabe non méuyot ro sugud-sugud bé de toow fo fiyo kégal ro, brab méuyot ro fégadatan ségifaén dob de fadiyan. ³⁹ Brab méuyot ro mésar dob de fiyo saran dob de lawi féngadafan brab dob de kanduli. ⁴⁰ Endob lafisé roy de libun baléw inok afasé roy de lawi ro. Tidéw béno, démasal ro bé de métah kédasal dob téngaangay de étew non marok médirung i de ni tete rigoné ro. Endob i ni do étew toow na fo géttimal kénékukum ro moso.”

⁴¹ Wén i no sébaan fuweh, amun diyo i Jesuse dob lawi i Tuluse, ménar gédét dob ahurone kurta. Atin téneungténgén i de étew lémawu bé kurta ruwe. Médooy de kawasa do étew léménawu ro médooy kurta. ⁴² Tidéw béno, énggito no soy ségétewe libun baléw méskinan. Enggumah i ni baléw brab méniray saén ruwo lafin furo kurta tintu énda balilagaén. ⁴³ Atin i Jesuse ténavagén i de kuyugén mangéy dob Beene, brab mano bero, “Béréhé ku begom i toowe, i ni méskinan libun baléw maak mas na médooy niray ne bé kéléuhanay de dumo étew kawasa. ⁴⁴ Non i de ni étew do kawasa, méniray ro saén kloh tidéw dob de médooy kurta ro. Endob i ni baléw éntéyén i kéléuhanay kurta ne fégéfaguyagén.”

13

Fantag bé tamfaday duniye

¹ I lala Jesuse mésut tidéw dob lawi i Tuluse, i ségétewe bé de kuyugén ménbéréh dob Beene mano, “Téngténgém, Maistéro. Toow fo dakél i de ni batéw fénggérigo bé de lawi i

Tuluse ni, mélaw toow fo fiyoy de ni lawi.”

² Endob ménbéréh i Jesuse mano, “I de dakél ni do lawi, gégumah mosoy gaiwe i kéluhanane gito gom mébinasa. Brab fyon i de batéw féngérigo de, émbéragar ro.”

³ Atin amun diyo i ro Jesuse ménsar dob Tuduke Olibo, dob gatagay lawi i Tuluse, fénénginsaa ro Pedrowe brab Santiagowe brab Juane brab Andrese sébero-bero saén. ⁴ Ménénginsa ro dob Jesuse maro, “Kédiron mérigoy de ni, sani kébinasay lawi i Tuluse? Brab ati fégélonone de bé ni gai ké gédétén gégumah?”

⁵ Atin séménumbul i Jesuse mano, “Ingat gom inok énda i méfagakaran begom. ⁶ Non médooy de étew gégumah usaré roy dawét guwe, brab émbéréh ro maro, ‘Bégéney Kristowe’. Atin médooy de géfagakara ro. ⁷ Atin kagom mégilak ké gélingoo kom i de sétiboh brab fantag bé de gira. I kéluhanay de ni mérigo, éndob békén sénay niy tamana nuwe. ⁸ I de ségiyo ingéd sétiboh ro bé de ségiyo ingéd. Brab i de ségiyo sakuf fangangatran sétiboh ro bé de ségiyo. Atin wén mosoy do luba dob de médooy do gonon, brab lénggob. I de ni mérigo ségiléw bé ségétewe obor libun kéararan non been sénay niy féganay rasay ne.

⁹ “Endob ingat gom, non kéfoén gom moso brab uwitén gom dob adafay de kémukum. Atin mébadas gom moso dob de lawi féngadafan kay de Judio. Brab uwitén gom dob adafay de datu brab do méguléw inok kukumén gom sabaf begom i do kuyug gu. Endob been i niy gaiy kéuret gome bé Fiyowe Uret dob berowe. ¹⁰ Atin bé énda séna gégumah i tamanane, i Fiyowe Uret kailangan ureténi na métah dob kéluhanay ingéde. ¹¹ Atin amuk kéfoé ro begom brab uwitén gom dob adafay kémukume, kagom émbuku fantag bé atiy késumbul gome. Non amuk diyo gomén, béréh gom saén i atiy iraye dob begome fatut késumbul gom. Non

i kékéréh gome bé béno, békén tidéw dob de itunga kom. Yamula fébéréh i Rémogor i Tuluse begom. ¹² Atin bé béno, wén i do étew iray roy de dumoro sétiman idéng inok féléhuén. Loo so bé niy rigonéy de lukés, feféléhu roy de nga ro. Loo soy de nga feféléhu roy de lukés ro. ¹³ Atin i kéluhanay de étew mérarék begom sabaf bé kéunur gome Begén, éndob ati fédidaye munur taman dob tamfadane, beeney méfukase.

¹⁴ “Atin gito gom i ‘Mékésirang-sirange Surga’ diyo dob mékétéfuwe gonon békén fatut gonon. (Fégésobut i masawe.) Amuk mérigoy ni, i de étew bati dob Judea, fatut ro méraréy dob de tuduk. ¹⁵ Atin bé béno, i étewe diyoén dob liyuy lawi ne, éndaén fatutén séminggula bé urase mahur dob lawie inok uwité noy de tamukén. ¹⁶ Atin bé béno, i étewe diyo dob safad ne, éndaén fatutén mule inok angéyé noy géruwowe lafin kégalén. ¹⁷ Bé do no do gai, toow fo mékégédaw-gédaw i de libun obor brab de libun mériton. ¹⁸ Dasala kom inok énda mérigoy de ni dob gaiwe mélégénéy. ¹⁹ Non bé no do gai, toow na fo géttimal i kérasay i de étew, sani kérasaye énda sénay énggéagéw de tidéw féganay bé kélimbag i Tuluse bé duniyae taman so béléewe ni. Atin énda na moso i gériféng de. ²⁰ Atin amuk énda féfokoéy Kadnaney do no gai, énda nay kéilawan méuyag. Endob sabaf bé de fénémilién do étewén, féfokoé noy do no gai.

²¹ “Atin amuk wén i émbéréh dob begome mano, ‘Téngténg gom, ay niy Kristowe!’ look ‘Téngténg gom, ay diyoo!’ kagom unuron de. ²² Non wén i do tugién do étew gégumah brab bérhé ro bero kun i Kristowe taloo no sarigoy Tuluse. Atin gérigo ro do mékégaif brab do tanda, inok fégakara roy de fénémili i Tuluse do étew ké fakay. ²³ Mélaw ingat gom. Bénréh gun begom i kéluhanay de ni bé énda séna mérigo no.

²⁴ “Bé do no gai moso, amuk gilid i dakéle ni késélibug, waléy délémon

i térsange brab éndaén réméndaw i térsang kélunganone. ²⁵ Atin i de gitoon médagdag ro tidéw dob lawayo, brab i de éntingayén dob lawayo mékuyung. ²⁶ Tidéw béno, i Nga i Kéilawane, sani Begéne, téfégítowu tidéw dob lawayo dob de rawén toow fo barakatan brab réméndaw. ²⁷ Atin sugué kuy de télaki gu mangéy dob séngae gonon dob duniyae ni. Atin séfélimudé kuy de fénémili i Tuluse do étew tidéw dob tamanay fantade brab dob lawayo.”

²⁸ Tidéw béno, nuret Jesuse beroy ni binuwaya mano, “Fégitung gom i de kayéw. Dini dob betome ni, sonom lémbud i de fongoy kayéwe brab émféantu daun, gétiga kom gédétén i basa médufe. ²⁹ Loo so bé ni amuk gito gom i de ni bénréh gu bé gétahe mérigo, gétiga kom gédétén i késéfule guwe. ³⁰ Béréhé ku begom i toowe, i de étew méuyag béri, énda méléhu ro taman mérigoy de ni. ³¹ I lawaye brab fantade méalfa, éndob i kékéréh guwe énda méalfaén.

³² “Endob i gaiwe mérigoy de ni, énda i gétigan de, fiyon foy de télaki dob lawayo, fiyon i Begéne, sani Nga i Tuluse. I Abaye Tulus saén i gétigane de. ³³ Ingat gom, brab tulik gom, non énda gétiga kom de ké kédiron i kégumah i ni gai. ³⁴ Ségiléw bé ségétewe ménagéw tidéw dob lawi ne mangéy dob ségiyowe ingéd. Atin sénarigén i lawi ne dob de sugu-sugué no. Mélaw wén i galbék fatut rigonéy de sugu-sugué no. Atin bénréhén dob sugu-sugué nuwe dob bengawane mantay brab békén fidong. ³⁵ Mélaw ingat gom, non énda gétiga kom i gaiwe séfuleu, ségiléw bé de sugu-suguén énda gétiga roy gaiwe séfule i gefee bé lawie, ké témégén, look kérara kélunganon, look ukoro i de manok, look géfuwen. ³⁶ Kinok métékow i kégumah ne atin gito no bero fidong. Enda fatut mérigo no dob begome. ³⁷ Mélaw béréhé ku begom brab dob de kéluhanay de étew so: Tulik gom.”

14

¹ Bé béno gai, ruwo séden gétérésangan i méifuse tidéw béno gégumah i kékanduli i de Judio féndawét “Témara”. Bé no kanduli, amaé roy fane énda i fénggfééruk de. Atin i de odoroy de fadi brab de téromo bé kitabe sélédé roy ati kékéfo ruwe bé Jesuse brab félhéué ro. Endob méuyot ro de rémigo ké énda gétigay de ségiyo de étew. ² Ménsébéréh ro maro, “Enda fakayén ké rigoné tom ké kanduli tom, kinok mésélibug i de étew.”

³ Wén i no sébaan fuweh, diyo i Jesuse dob Betania dob lawi i ségétewe lagéy féndawét Simon. I ni lagéy ménadi-adi bé déruune fémute. Amun mama ro, énggumah i ségétewe libun nuwitén i fiyowe katiya ménféno bé mamute nor toow fo balilaga féndawét nardo. Atin ménfégédét dob Jesuse brab rénébeén i reer i katiyae ni atin lénukaén i nore ni dob uléw Jesuse. ⁴ Atin i de dumo bé de étew diyo, amun énggito roy ni, ménkérít ro brab ménsébéréh ro maro, “Sedek séninggula saén i nan fégéféamut? ⁵ Non amuk fénbélén damén i nan nor, wén i médoor kurta gédotén de brab iray damén dob de méskinan.” Atin nugar roy ni libun.

⁶ Endob ménbéréh i Jesuse mano, “Fédaya gom i ni libun. Sedek dowoyé kom? Toow fo fiyoy ni rénigo no dob Begéne. ⁷ Démoyn gom gésébegom i de méskinan, atin fakay gom téma bang bero dob gaiwe kétaya kom. Endob i Begéne, éndaén mérugayu batí dini dob begome. ⁸ I ni libun, rénigo noy gagane nuwe. Lénulawa no fégéféamut i lowoh guwe inok métafayan i kélébénge Begén. ⁹ Béréhé ku begom i toowe, fiyon udenén gonon dob duniyae ureténi Fiyowe Uret, i rénigo nuwe dob Begéne méuret so funa no métédém.”

I rénigo Judase

¹⁰ Tidéw béno, i Judas Iskariote, sani ségétewe bé de folo bra ruwo kuyug Jesuse, ménangéy dob de odoroy de fadi inok sébéréh bero bé ati kékéfoe bé Jesuse dob berowe. ¹¹ Atin toow ro

de fo ménoror, brab fénasada ro iraya ro kurta i Judase. Mélaw sénlédén i fiyowe gai kékéfo de.

¹² Dob sunguwe gai bé kandulie féndawét “Témara” taloo no “Kéama bé Fane Enda i Fénggfééruk de”, bé béno gai fatut ro sémumbali nati bili-bili fégékanduli ro. Mélaw i de kuyugén ménénginsa ro dob Jesuse maro, “Hon i gonone kétaya mo tafayé key i amaé muwe bé ni kanduli ‘Témara’?”

¹³ Tidéw béno, sénugu Jesusey ruwowe bé de kuyugén mano, “Agéw gom mangéy Jerusalem. Diyo wén i ségetéwe lagéy ménuwit ségebinangga wayég gébalaka no begom. Furay gom de. ¹⁴ Atin amuk mahur dob lawie, ahur gom so. Brab béréh gom dob gefee bé lawie makom, ‘Méuyot i Maistérowe de ké gétiga no hon i sibéye de gono no mama beroy de kuyugén bé ni kékanduli.’ ¹⁵ Atin i gefee bé lawie toroé no begom i dakéle sibéy wén i do ténafoy do kasangkafan dob rotor i lawie. Diyo tafay gom i kéluhanay amaé tome.”

¹⁶ Tidéw béno, ménagéw i de ruwo ni gétew do kuyugén brab ménahur ro dob Jerusalem. Atin énggito roy kéluhanane loo bé kékéréh Jesuse de bero. Tidéw béno, ténafoy roy de amaé ro kay kandulie “Témara”.

¹⁷ Atin amun sémingkufén, énggumah diyo i Jesuse beroy de folo bra ruwo gétew kuyugén. ¹⁸ Amun ménasar ro mama dob doror i ahayane, ménbéréh i Jesuse mano, “Bérhéku begom i toowe, wén sékoy ségétew begom émfékéfo Begén, sani ségétew séréngan Begén mama.”

¹⁹ Tidéw béno, ménwaléy tete i fédew i de kuyugén. Atin ménsétundug-tundug i séngae ségétew bero ménénginsa dob Jesuse mano, “Békén begén, hay?”

²⁰ Atin sénumbulo Jesuse bero mano, “I beene ségétew begom do folo bra ruwo gétew kuyug gu, sani ségétew begom séréngan Begén mérém bé fa nuwe dob biléwe. ²¹ I Begéne, sani Nga i Kéilawane, méléhuu loo bé Ménsulate Kékéréh i Tuluse

fantag bé Begéne. Endob toow fo mékégédaw-gédaw i étew ni émfékéfo Begén. I nan étew, mas na fiyo dob beene ké énda damén ménúmahén, non mékukum fo toow.”

I kékéma i Kadnane

²² Atin bé lala ruwe mama, éndot Jesusey fane, brab ménfésalamat dob Tuluse, brab sénkébeng-kébengén, brab sénaarén dob de kuyugén. Atin ménbéréh mano, “Ay niy fane. Been i lowoh guwe. Ama gom.”

²³ Tidéw béno, éndotén i tabue, brab ménfésalamat dob Tuluse, brab ni-rayén bero. Atin kéluhanana ro méniném de. ²⁴ Atin ménbéréh i Jesuse mano, “I ni arak, been i dara guwe réménanas sabaf bé médoowe étew. Been i niy tanda i fasad i Tuluse bé de étewén. ²⁵ Bérhéku begom i toowe, éndaén minému arak taman géinému mantu arak dob gaiwe féguléwoy Tulusey de étewén.”

²⁶ Tidéw béno, kéménanta ro sébaan kanta démayéw bé Tuluse. Tidéw béno, ménagéw ro mangéy dob tuduke Olibo.

Nuret Jesusey fantage bé Pedrowe

²⁷ Atin bang Jesuse dob de kuyugén, “I kéluhanana kome méraréy séko tagaké kom Begén. Non wén i Ménsulate Kékéréh i Tuluse mano, ‘Féléhué kuy témalimae bé de bili-bili, atin mélaw mésébéragar i de bili-bili.’ ” ²⁸ Atin fentaus Jesusey kékéréh ne mano, “Endob amuk tébuleu, métahu magéw begom mangéy dob Galilea.”

²⁹ Atin bang Pedrowe, “Enda fo tagaké ku Beem, fiyon fo ké i kéluhanay de ségiyo kuyugém méraréy ro tagaké ro Beem.”

³⁰ Endob ménbéréh i Jesuse dob Pedrowe mano, “Bérhéku beem i toowe, bé ni kélunganon, bé énda séna ukoro i férufete ruwo gule, dirungé mo Begén télew gule bé énda gélolo mo Begén.”

³¹ Atin ménbéréh man i Pedrowe toow na fo méégét mano, “Fiyon fo ké géodoru Beem méléhu, énda dirungé ku Beem.” Atin i kéluhanay de dumo

no do kuyug ménbéréh loo bé nan dob Jesuse.

³² Tidéw béno, ménagéw i ro Jesuse dob gonone féndawét Getsemani. Amun énggumah ro, ménbéréh i Jesuse dob de kuyugén mano, "Sar gom dob ni bé lala guwe démasal." ³³ Tidéw béno, nuwit Jesusey ro Pedrowe, Santiago, brab Juane, atin méntaus ro magéw kloh. Atin ménwaléy toow fo tete i fédew Jesuse brab ménbuku. ³⁴ Atin ménbéréh dob de ni télew kuyugén mano, "I fédew guwe toow fo ménbuku taman toow fo démawét. Bati gom dini, brab tulik gom."

³⁵ Tidéw béno, ménférayu dob berowe gumaha téabar. Atin méntélengkéb dob fantade brab déménasal mongot bé amuk fakay saén, énda damén mérigoy ni kérasay dob Beene. ³⁶ Déménasal mano, "Abay, fakay gérigono moy kéluhanane. Mélaw kago fédayaén Begén mérasay séko. Endob i kaame kétayan i mérigowe damén, békén i kagéne kétayan."

³⁷ Tidéw béno, ménfélue mangéy dob de télew ni gétew kuyugén, atin énggito no bero énggfidong. Atin ménbéréh dob Simon Pedrowe mano, "Simon, géfidong go? Aw énda wayo gétulik go fiyon ségéuras saén?" ³⁸ Atin ménbéréh dob berowe télew gétew mano, "Tulik gom, brab dasal gom inok énda métukawan gom. Méuyot gom rémigo bé kétaya kuwe, éndob mélubay i de lowoh gom, brab magad géfélis bé de sugu gu."

³⁹ Tidéw béno, ménagéw man i Jesuse, brab déménasal so loo bé énggétahe de. ⁴⁰ Tidéw béno, ménfélue man, brab énggito no bero énggfidong man, non toow ro fo manat. Atin énda gétiga roy ati fiyowe kékéréh ro dob Jesuse.

⁴¹ Atin ménagéw man i Jesuse atin énda mérugayén tidéw béno, ménfélue dob gétéléw ne gule, brab ménbéréh dob berowe mano, "Aw tafay gom séna fidong brab témérén? Na, énggumahén i urase. Téngténg gom, i Nga i Kéilawane, sani Begéne fékéfo

dob de ménalsa étew. ⁴² Na tek gom, magéw tomén. Téngténg gom, ay nan nén gégumah i émfékéfoe Begén."

I kékéfoe bé Jesuse

⁴³ Amun émbéréh sénay Jesuse, énggégumah i Judase, sani ségétéwe bé de folo bra ruwo gétew kuyugén. Atin ménodor i de médo do étew sénugu i de odoroy de fadi brab de témoreo bé kitabe brab de odoroy de Judio. Ménuwit ro do sundang brab do bastun. ⁴⁴ Atin i ménfékéfoe de, sani Judase, bé gétahé niraya noy de étew fégétigana ro de non bénréhén bero mano, "I étewe aréké ku, been i no. Kéfo gom brab toow gom fo bantayan bé lala gome de muwit."

⁴⁵ Mélaw amun énggégumah i Judase, ménfégédét dob Jesuse brab ménbéréh mano, "Maistéro." Atin narékén. ⁴⁶ Mélaw i de étew kénéfo roy Jesuse. ⁴⁷ Endob i ségétéwe bé de kuyug Jesus diyo, rénau noy sundang ne brab téniyahén i riféy gérotore fadi brab ménasilaf i ségébae bé kelingo ne.

⁴⁸ Tidéw béno, ménbéréh i Jesuse dob de kénéfo de mano, "Sedek ménuwit gom do sundang brab do bastun, maak ségétéwu tulisan kéfoé kom?

⁴⁹ Sénga fuweh diyou dob lawi i Tuluse témoreo. Diyo gom so, éndob énda kénéfo gom Begén. Endob mérigoy ni inok métuman i Ménsulate Kékéréh i Tuluse."

⁵⁰ Tidéw béno, i kéluhanay de kuyugén tétagak roy Jesuse brab ménraréy ro.

⁵¹ Wén i ségétéwe kénégo lagéy ménfuray bé Jesuse. I ni kénégo lagéy énda i kégalén, ménfélue mut. Atin ténlama ro so kénéfo. ⁵² Endob ménraréy ménfélawas non énggétagaka noy mut ne bé kífagayas ne.

I kékukume bé Jesuse

⁵³ Tidéw béno, nuwit roy Jesuse dob lawi i gérotore fadi. Diyo ménlimud i kéluhanay de odoroy de fadi brab de odoroy de Judio brab de témoreo bé kitabe. ⁵⁴ Atin ménfuray i Pedrowe éndob ménférayu kloh. Brab ménahur dob fésayaway lawi i gérotore ni fadi.

Diyo ménsar beroy de guwardiya géliwét dob aféye télagang ro.

⁵⁵ Atin i de odoroy de fadi brab kéluhanay de kéfédewan, salkélé roy gétimale kétébo ro bé Jesuse inok wén i funa ro de méméléhu, éndob énda gérigono ro de. ⁵⁶ Médooy de tugién do étew téménébo bé Jesuse bé békéne toow, éndob i de kékéréh ro énda géséodorén.

⁵⁷ Tidéw béno, wén i do téménindég émbéréh bé ni tugién kétébo maro, ⁵⁸ "Enggelingoo key i kékéréh ne mano, 'Binasané kuy lawi i Tuluse ni rénigoy de kéilawan, brab amuk méifus i télewe gétérésangan, rémigou man ségiyo lawi i Tuluse békén rénigoy kéilawane.' " ⁵⁹ Gido loo, énda géséfagayun i kékéréh i de ni étew tugién.

⁶⁰ Tidéw béno, i gérotore fadi téménindég dob téngaangay de ménlimud do odoron brab ménénginsa dob Jesuse mano, "Ati késumbul me bé ni kétébo ro Beem?"

⁶¹ Endob énda séménumbul i Jesuse, ménantés saén. Atin ménénginsa man i gérotore fadi mano, "Aw Beemey Kris-towe, Nga i ménbantuge Tulus?"

⁶² Atin séménumbul i Jesuse mano, "Hoo, Begén. Atin gito gom moso Begén, sani Nga i Kéilawane, mésar fingé dob kuwonoy barakatane Tulus. Atin gito gom Begén dob de rawén séfuleu tidéw dob lawayo."

⁶³ Tidéw béno, i gérotore ni fadi kénusién i kégal ne émfétengténg bé kékérit ne bé kékéréh Jesuse ni. Atin ménbéréh mano, "Endaén kailanga tom i téméboe de dob betome. ⁶⁴ Non enggelingoo tomén i mémémurkae kékéréhén. Ati karang gome de fatut rigoné tom?"

Atin kéluhana ro kénukum ro bé fatut féléhuén.

⁶⁵ Tidéw béno, i de dumo bero dénuraa roy Jesuse. Atin ténléb roy de moto no bé munsalawe brab ténafés ro brab fén-antuk ro de ké ati téménafése de. Atin i de guwardiya, génamak ro brab lénubag ro.

Dénirung Pedrowey Jesuse

⁶⁶ Atin amun diyo sénay Pedrowe dob fésaway lawie ni, téménara i ségetéwe kénogon sugu-suguéy gérotore fadi. ⁶⁷ Amun énggitoy noy Pedrowe télagang, fénandangén brab ménbéréh mano, "Beem soy dumo Jesuse tidéw Nasaret."

⁶⁸ Endob dénirung Pedrowe mano, "Enda gétiya ku de brab énda gésobuto kuy nan béréhé mo." Amun bénréhén i ni, ménagéw mangéy dob bengawane. Atin sonom béno, ménukoro i férufete.

⁶⁹ Atin i kénogone ni sugu-suguén, amun énggitoy no man i Pedrowe diyo dob bengawane, bénréhén man dob de étew diyo mano, "Beeney lagéye dumo Jesuse." ⁷⁰ Endob dénirung Pedrowe man.

Enda mérugayén tidéw béno, i de étew diyo ténebo roy Pedrowe man maro, "Tintu go dumo no, non ségétew go so tidéw Galilea."

⁷¹ Tidéw béno, toow fo séménafa i Pedrowe mano, "Kukuméy Tuluse damén begén ké tugiénu. Toow fo énda gétiya kuy nan étew béréhé kom."

⁷² Sonom béno, ménukoro i férufete bé géruwo nuwe gule. Bé béno so, énggétédémo Pedrowey bénréh Jesuse dob beene mano, "Enda séna ukoro i manoke bé géruwo nuwe gule, dirungé mo Begén télew gule bé énda gélolo mo Begén." Mélaw toow fo kéménrew i Pedrowe.

15

I kékukume bé Jesuse

¹ Atin modor géfuwén, i de odoroy de fadi ménslimud ro beroy de odoroy de Judio brab de téromo bé kitabe brab kéluhanay de kéfédéway de Judio. Atin ménagayun ro. Mélaw nikét roy Jesuse bé de sangkali brab narak ro nuwit ro mangéy dob Pilatowe, sani méguléwe tidéw Roma, atin naté ro dob beene. ² Atin fénénginsaa Pilatowey Jesuse mano, "Aw Beem i Datu i de Judio?"

Atin séménumbul i Jesuse mano, "Beem i ménbéréh de."

³ Atin i de odoroy de fadi ténebo roy Jesuse bé médoowe kétébo ro de.

⁴ Mélaw ménénginsa man i Pilatowe mano, "Sedek énda sémumbul go? Non énggelingoo moy de médo do kétébo ro Beem."

⁵ Endob énda fo séménumbul i Je-suse. Atin mélaw ménggaif i Pilatowe.

⁶ Ménrigoy ni dob gaiwe kanduli ro féndawét Témara. Atin i adat Pilatowe, sénga kanduli Témara, témangéy ségétew férisu, been i niy ongoté de étew de. ⁷ Atin bé béno gai, wén i ségétewé férisu féndawét Barabas. Ménférisu beroy de dumo no ménstiboh bé de gémamak kukuman. Ménméléhu étew bé no késétiboh ro. ⁸ Mélaw amun ménlimud i de étew ménfégédét ro dob Pilatowe ongoté ro ké témangéy ségétew férisu, ⁹ ménénginsa i Pilatowe mano, "Kétaya kom ké fésuté kuy datu gome do Judio?" ¹⁰ Rénigo noy ni non énggétiga noy funay de odoroy de fadi ménaté bé Jesuse non ménhaléw ro de.

¹¹ Endob i de odoroy de fadi fénkérít roy de ménlimud do étew atin mélaw nongot ro dob Pilatowe ké tangéyé noy Barabase mangéy dob berowe. ¹² Atin ménbéréh man i Pilatowe dob de étew mano, "Ati mélaw i kérigo gu bé ni lagéy féndawét gom 'Datu i de Judio'?"

¹³ Endob i de étew ménkes ro maro, "Kélabo gom dob kruse!"

¹⁴ Atin ménénginsa i Pilatowe mano, "Sede? Ati teteé rénigo no ula-ula?" Endob i de étew ménkes ro man minut fo métanug bé i Jesuse kélabonén dob kruse.

¹⁵ Tidéw béno, ménuyot i Pilatowe ké fiyoy de fédew i de ménlimud do étew. Mélaw fentangéyén i Barabase, atin fénbadasén i Jesuse brab fénatéen dob berowe inok kélaboné ro dob kruse.

¹⁶ Tidéw béno, i de sundalo nuwit roy Jesuse mangéy mahur dob fésaway lawi i odorone tidéw Roma. Atin lénimud roy kéluhanay de dumo ro sundalo ségébataliyon. ¹⁷ Atin

fénkégal roy Jesuse bé furowe métaah kégal maak datu, brab lénuku roy suwarane kélég atin fénsayaf ro bé Jesuse. ¹⁸ Tidéw béno, ubo-ubo

basana ro maro, "Méraru damén i Datu i de Judio!" ¹⁹ Atin bénadas roy uléw ne bé kayéwe brab dénuraa ro, brab léningkuwédo ro ubo-ubo basana ro. ²⁰ Atin amun énggilid ro déniyangka, kenda roy furowe kégal brab fénkégal ro dey kaane insod. Tidéw béno, nuwit ro mésut dob Jerusalem atin nangéy ro kénlabo dob kruse.

Kénlabo roy Jesuse dob kruse

²¹ Atin amun diyo ro séna dob de aguwon, énggébalaka roy étewé féndawét Simon tidéw dob ingéde Siren, abay Alejandrowe brab Rufo. Béno sénay kégumah ne dob no ingéd tidéw dob de safadén. Atin fénégés ro démuwal bé krus Jesuse. ²² Atin nuwit roy Jesuse mangéy dob gonone féndawét Golgota (i atag ne "gonoy kulobong uléwe"). ²³ Atin niraya roy Jesuse arak lénawékon uwa, éndob énda éndotén de. ²⁴ Tidéw béno, i de sundalo kénlabo roy Jesuse dob kruse brab sénsaar-saar roy de kégalén, sénkungkungo roy ati gégedote bé séngae de sélafin. ²⁵ Géraraan lémowot i térsange bé kékélabo ruwe bé Jesuse dob kruse. ²⁶ Atin diyo dob kruse wén i ménénénae sulat bé kétébo ruwe de mano, "Datu i de Judio". ²⁷ Kénlabo ro soy ruwowe gétew ménakaw dob de krus. I sébaane de fingé dob kuwono Jesuse, brab i sébaane de fingé dob biwong Jesuse. ²⁸ Mélaw ménuman i Ménsulate Kébéréh i Tuluse mano, "Kénarang roy Beene ségétew bé de ménsla étew."

²⁹ Atin i de témara dob no, déniyangka roy Jesuse brab dangu-danguo ro inok duwoyé ro, brab maro, "Hoy! Aw békén ba Beem i ménbéréhe bé binasané moy lawi i Tuluse brab rigoné mo man bé télewe gétérésangan? ³⁰ Lus go mélaw dob krusa nan brab tabanga moy kaame lowoh."

³¹ Atin ségiléw so bé niy kédiyangka i de odoroy de fadi de brab de téromo bé kitabe. Ménsébéréh-béréh ro maro, "Ténabangén i de ségiyo étew inok énda méléhu ro, éndob énda gétabanga noy

kaane lowoh inok énda méléhuén.
³² Amuk Beeney Kristowe, sani datu tome do Judio, fatut mélus béeleewe ni tidéw dob kruse ni inok gito tom brab géfeginugut tom de.”

Atin i de ruwo gétew énggéséréngan de ménklabo dob de krus, déniyangka ro soy Jesuse.

I kéléhu Jesuse

³³ Amun géutuhén, ménwaléy délémon i kéluhanay de gonon dob duniyae taman géraraan lémudug i térsange de. ³⁴ Atin amun géraraan lémudug i térsange de, téménawag i Jesuse métanug mano, “Eloi, Eloi, lama sabaktani?” I atag ne “Tulus gu, Tulus gu, sedek té nagakém Begén?”

³⁵ Atin i de dumoy de étew diyo énggégélingo de, ménbéréh ro maro, “Fégélingo gom, tawagé noy Eliase.” ³⁶ Atin i ségétéwe bero diyo, ménagayas éndotén i maake gafas brab nérémén dob mélémuwe arak. Tidéw béno, féndiyoén dob kayéwe brab féndiyoén dob ba Jesuse inok éséfe no. Atin ménbéréh i ni étew mano, “Fédaya gomén. Tuliké tom ké géumah i Eliase émfélus de.”

³⁷ Tidéw béno, ségule man ménkes i Jesuse, atin ménléhuén.

³⁸ Sonom béno, i rindunge dob lawi i Tuluse ruwoy mén sésédaya nuwe, ménkusi tidéw rotor mangéy fantad. ³⁹ Atin i odoroy de sundalo téménindég dob adafay krus Jesuse, énggelingoo noy keékes Jesuse brab énggito noy kéléhu ne. Ménbéréh i ni sundalo mano, “Tintu fo Nga i Tulusey ni lagéy.”

⁴⁰ Atin diyo soy de libun kémulay gétangka tidéw dob no, ro Maria Magdalena, brab Maria idéng Jose brab ménguwéde séna Santiago, brab diyo soy libune Salome. ⁴¹ I de ni do libun, ménfuray ro bé Jesuse brab té nabang ro amun diyo de séna dob Galilea. Atin diyo soy de médo na do libun mén dor de mangéy Jerusalem.

I kélébénge bé Jesuse

⁴² Bé béno gai, témégénén i térsange bé két afay ruwe bé gétunduge de

fuweh, sani gai kétéréne. ⁴³ Mélaw énggumah i ségétéwe lagéy féndawéti Jose, tidéw Arimatea. Beeney ségétéwe bé de kéfédéway de Judio, brab toow fo fégadatan. Brab ongotongoté noy kégumah i kéké guléw i Tuluse. Atin i Josehe ménbaraw ménangéy dob Pilatowe nongotén i bangkay Jesuse. ⁴⁴ Atin i Pilatowe, mén gaif non magad i kéléhu Jesuse. Mélaw fentawagén i odoroy de sundalo brab ménenginsa ké ménrugayén i kéléhu Jesuse. ⁴⁵ Amun énggelingoo noy kéké réh i odoroy de sundalo bé tintu fo ménléhuén i Jesuse, téungkasén i Josehe médot de. ⁴⁶ Mélaw i Josehe, bénleyén i futee safut brab amun ménkédanén i bangkay Jesuse dob kruse, bén auséen bé safuto no. Atin féndiyoén dob lébénge té nosong dob rangih i fingasse. Tidéw béno, kénringén i dakéle batéw mangéy dob bengaway lébénge ni féngé télénbén de. ⁴⁷ I Maria Magdalene brab Mariahe idéng Josehe té néngteng ro brab énggito roy lébénge fénggonon bé bangkay Jesuse.

16

I kétébule Jesuse

¹ Amun ménifus i gaiy kétéréne, i Maria Magdalene, brab Mariahe idéng Santiago, brab Salomewe, ménley ro do fégéféamut inok fédiyoé ro dob bangkay Jesuse. ² Atin toow séna fo géfuwén bé no Duminggu, amun sémbang i térsange, ménangéy ro dob lébénge. ³⁻⁴ Atin amun diyo ro dob de aguwon, mén séuret uret ro maro, “Ati sékoy kémériringé bé batéwe tidéw dob bengaway lébénge no inok géahur tom?” Non toow fo dakél i batéwo no. Endob amun énggumah ro, brab té néngteng ro, énggito roy batéwe féngé télénbé bén bengawane ménkériring. ⁵ Amun ménahur ro dob lébénge ni, énggito roy ségétéwe kénogo lagéy mén sar fingé kuwonon, brab kéménagal fute. Atin toow ro fo mén gaif.

6 Atin ménbéréh i ni lagéy mano, "Kagom mégaif. Gétiga ku sélédé kom i Jesuse tidéw Nasaret, sani fénléhue dob kruse. Endob éndaén dini no, non méntébuleén. Téngténg gom, ay ni féniroo ruwe de. **7** Na, agéw gom, brab uret gom i ni kékéréh dob de kuyugén labi na fo dob Pedrowe, bé métah begom i Jesuse mangéy Galilea. Diyo gito gom, loo bé kékéréh ne de dob begome bé do gétah."

8 Tidéw béno, i de ni libun, ménusut ro tidéw dob lébénge ni brab léménantu ro magéw. Non toow ro fo ménggilak brab ménggaif. Atin énda énggéureto roy ni dob de ségiyo non ménggilak ro.

I de kétéfégito Jesus

9 Amun méntébule i Jesuse bé toowe géfuwén bé no Duminggu, méntéfégito sungu dob Maria Magdalenawe, sani libune fénféraréy Jesusey de fitéw gétew saitan tidéw dob beene.

10 Atin i Mariahe ni, ménangéy dob de kuyug Jesus, bé lala ruwe rémuung brab kémérew fantag bé kéléhu Jesuse. Atin nureten dob berowey fantage bé kétébule Jesuse. **11** Endob amun énggelingoo roy kékéréh ne bé méntébule i Jesuse brab énggito no, énda ménunur ro de.

12 Amun énggilid i ni, méntéfégito man i Jesuse bé ségiyowe falasén dob ruwowe gétew bé de kuyugén bé lala ruwe magéw dob de aguwon mangéy dob de safad. **13** Atin ménsefule ro mangéy Jerusalem brab nuret roy ni dob de dumo ro do kuyug. Endob énda ménunur ro bero.

14 Atin tidéw béno, méntéfégito man i Jesuse dob de folo bra sébaan gétew do kuyugén bé lala ruwe mama. Atin nugarén bero sabaf bé kulang i kéunur ruwe, brab sabaf métégas i de uléw ro funa ro énda munur bé kéuret i de énggégito de tidéw bé kétébule ne.

15 Atin ménbéréh i Jesuse dob berowe mano, "Angéy gom dob kéluhanay de gonon dob duniyae ni, brab uret gom i Fiyowe Uret dob kéluhanay de étew. **16** Atin i kéluhanay de munur brab mébautis, méfukas ro. Atin i

kéluhanay de énda munur, mékukum ro. **17** Atin i de munur géféténgténg ro bé de ni do tanda bé barakat guwe: Géféraréy ro do saitan, usaré roy dawét guwe. Atin gésébéréh ro bé de ségiyo késébéréh énda gétiga ro de. **18** Atin amuk géfurut ro do ulé, taloo no géném ro udenén bisa, énda gésugsug ro. Atin tégéné roy de uléw i de démériun brab géfáadi-adino ro bero."

Ikédiyat Jesuse

19 Atin amun énggilid i Kadnane Jesus bé kékéréh ne dob berowe, fénféraréy i Tuluse mangéy dob lawayo brab ménasar fingé dob kuwonoy Tuluse. **20** Atin i de kuyugén ménagéw ro mangéy muret dob kéluhanay de ingéd. Atin i Kadnane tétabanga no bero brab fénggito noy toow i kéuret ruwe bé kékérigo nuwe bero bé de mékégaif galbék.

I Fiyowe Uret Sénulat Lukase

Been i niy Fiyowe Uret sénulat Lukase fantag bé Jesu Kristowe. Sénulat Lukasey médoowe bé de mékégaif rénigo Jesuse brab de téneroén. Fénggito Lukasey Jesuse, sani Nga i Tuluse, ménwaléy kéilawan brab féndawét “Nga i Kéilawane”. I funa Jesuse ménwaléy kéilawan inok fukasé noy de étew tidéw dob de sala ro. Fukasé noy de étew bé kéléhu ne dob kruse.

I Lukase, sani séménulate bé ni Fiyo Uret, ségétew doktor, mélaw toow fo métileédéd. Fénénginsaa noy médoowe bé de kuyug Jesus inok gésulata noy de toow fo rénigo Jesuse brab de bénréhén brab ati toowe fo ménrigo dob Beene. Mélaw gétiga tom bé i kéléhanay de sénulat Lukas toow fo toow. Sénulat Lukasey ni Fiyo Uret dob gérotore étew féndawét Teofilo.

¹ Teofilo,

Wénén i médoor séménulat fantag bé kéléhanay ménrigowé fantag bé Jesuse dob kérara geye. ² Sénulat roy tintuwe ségiléw bé kéuret i de ménuret de betom fantag bé Jesuse, sani de énggégito de tidéw féganay. ³ Atin fiyon i begéne, toow gu féngganad i kéléhanay de ni ménrigo tidéw féganay. Mélaw fatutu so sémulat bé mékéntaye mangéy dob beeme bé urete fantag bé Jesuse. ⁴ Rigoné kuy ni inok gétiga moy toowe bé ténoroe nén beem.

I kóbéréh i télakiwe fantag bé Juan Bautistawe

⁵ Brab i ni sulaté ku beem tafayén tidéw féganay bé Herod i méguléwe séna dob Judea. Bé bénó, wén i ségétewe lagéy féndawét Sakarias, ménamung dob ségéklasiwe fadi féndawét Abias. I Sakariase ni, wén i bawagén féndawét Elisabet. Tidéw so dob katufua Aarone ségétew fadi. ⁶ Atin i Sakariase brab Elisabete bawagén, métintu ro dob adafay Tuluse. Odoro ro brab tumané roy

kéléhanay sugu i Tuluse. ⁷ Endob énda i nga ro, non i Elisabete atir, brab do lukés ro nén.

⁸ Amun énggégumah i gaiwe gémalbék i ni ségéklasi fadi féndawét Abias, ménamung soy Sakariase diyo dob lawi i Tuluse beroy de dumo no. ⁹ Atin sénbunuto ro loo bé adat ruwe do fadi ké mémili ro ségétew dumo ro mangéy témuwéy dukah dob lawi i Tuluse. Atin Sakarias i ménfémilie. ¹⁰ Amun tuwégé Sakariase nén i dukahe dob lawi i Tuluse, i kéléhanay de ménlimud do méngadaf déménasal ro dob liyuwe. ¹¹ Tidéw bénó, i télakiwe tidéw dob Kadnane méntéfégito téménindég fingé dob kuwonoy ahayne féngadafan tuwégon bé dukahe. ¹² Amun énggito Sakariasey ni, toow fo ménggaif brab ménggilak. ¹³ Endob i télakiwe ménbéréh mano, “Kago mágilak Sakarias. Enggélingooy Tulusey kédasal me. Mélaw i bawag me Elisabet gégéngéga ségétew nga lagéy. Atin fédawétém Juan. ¹⁴ Atin waléy go méror brab méror soy de médoor étew ké mumah. ¹⁵ Non waléy moso gérotor dob adafay Tuluse brab énda minémén éntingayén arak mécéolon. Atin énda séna ménfégéngéaén, i Rémogor i Tulusey mémantuone de. ¹⁶ Atin sabaf bé kétoro i nga me, médooy de Judío gésénule brab munur bé Kadnane Tulus ro. ¹⁷ Beeney géétahe bé Kadnane brab fémantuoy Rémogor i Tuluse brab iraya no barakat rémigo do mékégaif loo bé rénigo Eliase bé do gétah. Brab beeney émféséulite bé de ménsebanil do lukés bé de nga ro. Brab i de étew énggésala, gésénule ro sabaf bé kétoro ne, brab máginugut ro dob Tuluse, brab waléy ro man métintu. Atin mélaw waléy médooy étewe géingat ongot-ongot bé kégégumah i Kadnane,” bang i télakiwe ni.

¹⁸ Tidéw bénó, ménbéréh i Sakariase mano, “Endob ati kégétiga kuwe de ké toow i ni bénréhém? Non i begéne brab bawag guwe toow geyén fo lukés.”

19 Séménumbul i télakiwe mano, “Bégéney Gabriele, sugu-suguéy Tuluse démoyun dob adafa nuwe. Sénugu i Tuluse begén inok béréréh ku dob beemey ni fiyo uret. **20** Atin béléewe waléy go émow. Enda gébéréh go taman énda métuman i ni bénréh gu, non énda munur go bé de bénréh gu beem, sani kékéréhé métuman dob gaiwe kétayay Tuluse métuman.”

21 Bé bénou, i de étew dob liyuy lawi i Tuluse, ongot-ongoté roy Sakariase ké mésut, brab ménggaif ro de non ménrugay dob bukag i lawi i Tuluse.

22 Amun ménut, énda gésébéréhén bero. Atin énggétiga roy wén i ménteférito de dob bukag i lawi i Tuluse, non séniniyasa no sa bero bé de kémérén, non émowén.

23 Amun énggilidén i galbék Sakariase ni dob lawi i Tuluse, ménule.

24 Enda mérugayén tidéw bénou, i bawag ne Elisabet ménwaléy obor. Atin ménbati i Elisabete dob bukag i lawie, énda ménut-sutén bé ménlimowe gétérésang kélungonon. **25** Bang Elisabete, “Toow fo mégédaw i Tuluse begén, non géfégéngau. Rénigoy Tulusey ni inok éndaén kékmalananu dob de étew.”

I kékéréh i télakiwe fantag bé Jesuse

26 Dob géeném ne gétérésang kélungonon bé kéobor Elisabete, sénugu i Tulusey télakiwe féndawét Gabriel mangéy dob sébaane ingéd dob Galilea féndawét Nasaret. **27** Wén i nuwitén kékéréh fénsamfayén dob ségétewe kénogon féndawét Maria. I Mariahe ténlanaa nén fébawagén dob ségétewe lagéy féndawét Jose. Beeney séfu i ségétewe méntelata datu i de Ju-dio féndawét Dabid. **28** Ménggégumah i télakiwe dob Mariahe brab ménbéréh mano, “Oror go! I Kadnaney dumo muwe, brab niraya no beem dakél bantugan.”

29 Toow fo ménbuku i Mariahe bénréh i télakiwe ni, brab fénggitungén ké ati atag i ni bénréhén. **30** Atin ménbéréh man i télakiwe mano, “Kago mágilak, Maria. Been i niy dakéle bantugan niray i Tuluse beem.

31 Waléy go obor, brab mégéngä go ségétew nga lagéy, atin fédawétém Jesus. **32** Waléy mélantug lagéy brab i fédawét i de étew de Nga i Toowe Gérotor Tulus. Féwaléyéy Kadnane Tulus datu ségiléw bé katufua nuwe Dabid. **33** Waléy datu dob de étew Israel taman sa taman. I kékéguléw ne énda métamano.”

34 Atin ménbéréh i Mariahe dob télakiwe mano, “Endob kénogonu séna, énda i bawag gu, non énda séna ménstifonu bé mawage begén. Ati kékifingé-fingé i ni mérigo?”

35 Séménumbul i télakiwe mano, “I Rémoor i Tuluse mangéy dob beeme brab i barakat i Tuluse dob beeme. Been i niy funay mékétéfuwe nga fédawétén Nga i Tuluse. **36** Fégitungém i Elisabete samungém. Bénréh i de étew éndaén kun fakayén géfégéngä, non toowén fo lukés. Endob fiyon fo ké loo bé nan, mén-énémén gétérésang kélungonon obor. **37** Non gérigonoy Tulusey kéluhanay étingayéne.”

38 Atin bang Mariahe, “Bégéney sugu-suguéy Tuluse. Mérigo dam i ni kéluhanan loo bé bénréh manan.” Tidéw bénou, ménkédan i télakiwe.

Ténukaw Mariahey Elisabete

39 Tidéw bénou, i Mariahe ménagayas ménagéw ménangéy dob sébaane ingéd dob de tuduk dob de sakuf Juda.

40 Ménangéy dob lawi Sakariase brab ténu-kawén i Elisabete. **41** Amun i Elisabete énggelingoo noy béréh Mariahe sémégifa, i ngae dob ésur ne énggékédu, atin i Rémoor i Tuluse fénémanduo noy Elisabete. **42** Amun toow fo méoror i Elisabete, méntanug i kékéréh ne mano, “Bé kéluhanay de libun, toow fo féniyoy Tuluse beem, brab toow so fo féniyoy noy ngae oboré mo. **43** Endob mégaifu non begéne soy féniyoy Tuluse, non i idéng i Kadna kuwe nangéyén ténu-kaw begén ségétew gérifantad. **44** Gétiga kuy de ni non amun énggelingoo kuy béréh me sémégifa, i ngae dob ésur guwe ni énggékédu bé kéroror ne. **45** Féniyoy Kadnane damén beem non nunuro mo métuman i kékéréh ne.”

⁴⁶ Tidéw béno, ménbérél i Mariahe mano, “Dayéwéy rémogor guwey Kadnane, ⁴⁷ brab toow fo méororu fantag bé Tuluse sani Mémukase begén. ⁴⁸ Non fénggétédémén begén ségettew térfantad sugu-sugué no. Tidéw béléewe tabaréy de étew begén fénggédawan. ⁴⁹ Non i barakatane Tuluse rénigo noy mékégaife dob begéne. Mékétéfuy dawét ne. ⁵⁰ Tidéw féganay taman béléewe, toow fo mégédaw bé de étew mégadatan de. ⁵¹ Rénigo noy de mékégaif galbék bé barakat ne. I de étew téfégérotor, bigodoyéy Tuluse bero inok énda mégulit i de tete bantak ro. ⁵² Kédané noy de datu dob de gono ro, brab fégérotoré noy de étew térfantad. ⁵³ I de méskinan fégédét dob Tuluse, fábésoré no bero bé de fiyo. Endob i de kawasa énda fégédétén dob Beene, énda i iray i Tuluse bero. ⁵⁴⁻⁵⁵ Ténabanga no betom do étewén do Judio, non gétédémo noy fasad ne dob katufua tome Abraham bé mégédaw de brab kéluhanay de séfuén taman sa taman,” bang Mariahe.

⁵⁶ Tidéw béno, ménbati i Mariahe dob ro Elisabete télén gétérésang kélungonon, atin béno na ménule.

I kékumah Juan Bautistawe

⁵⁷ Atin amun énggumahén i gaiwe kékumahan i Elisabete, ménggenga ségettew nga lagéy. ⁵⁸ I de dumon no ségédét brab do samungén, énggelingoo ro toow fo mégédaw i Tuluse de, atin mélaw kéluhana ro ménoror.

⁵⁹ Atin amun waléwén gétérésangan i ngae ni, ténuma roy adat i de Judio, mélaw ténuli ro. Atin sébérél-bérél i de étew bé fédawétén Sakarias, ségiléw bé dawét i boh ne. ⁶⁰ Endob ménbérél i idéng ne mano, “Békén Sakarias i dawét ne. Fédawété tom Juan.”

⁶¹ Tidéw béno, séménumbul ro maro, “Endob énda i dumon no bé nan dawét.” ⁶² Tidéw béno, séniniyasa roy boh ne non énda gégélingoén. Fénénginsaa ro ké ati dawét i ngae kétaya no fédawét de.

⁶³ Atin ménongot i Sakariase sulatan brab sénulatén, “I dawét ne Juan.” Tidéw béno ménggaif i de étew. ⁶⁴ Sonom béno, énggérél i Sakariase, atin méngganay démayéw bé Tuluse. ⁶⁵ I de dumon ro ségédét toow ro fo ménggaif. Brab i urete fantag bé ni ménrigo, ménlégéb dob kéluhanay de ingéd dob de tuduk sakuf i Judeawe. ⁶⁶ Atin i kéluhanay énggégélingoe bé ni uret fégitungé ro brab ménenginsa ro maro, “Ati keeyén i kewaléyoy ni nga?” Non gétiga ro Kadnan i mémanduone de.

⁶⁷ Atin i boh ne Sakarias fénémanduoy Rémogor i Tuluse, mélaw ménuret bé kékérél i Tuluse mano, ⁶⁸ “Dayéwé tom i Tuluse Kadna tom do Judio, non énggégumahén inok maun émfésagad bé de étewén. ⁶⁹ Niraya no betom barakatan Mémukas tidéw dob de séfu i sugu-sugué nuwe Datu Dabid. ⁷⁰ Been i Mémukase bénréh i de sénarigo no muret bé de kékérélén bé do gétah. ⁷¹ Réménigo fasadén dob betome bé sugué no dob betomey Mémukase inok témaban tom bé de sébanil betom brab de mérarék betom. ⁷² Bé késugu ne de, ténuma noy fasad ne mégédaw bé de katufua tom. Mélaw gétédémo noy fasad ne, ⁷³ ténlaa no bé katufua tome Abraham, ⁷⁴ bé fukasé no betom dob de sébanil betom inok rigoné tom i kétaya nuwe, énda i gilak tom. ⁷⁵ Atin fakay tom méngintulus bé toowe brab fiyowe dob adafa nuwe sénga fuweh taman méuyag tom.” ⁷⁶ Tidéw béno, bénréh Sakariase dob nga ne mano, “I beeme nga gu fédawétén go sarigon muret bé kékérél i Toowe Fo Gérotor Tulus. Métah go bé Kadnane inok tafayé moy aguwo nuwe. ⁷⁷ Embérél go dob de étew bé méfukas ro bé kékésagad i Tuluse bero. ⁷⁸ Non toow fo mégédaw i Tuluse betom. I kékufkas ne betom ségiléw bé réndaw i téresange dob sébangane. ⁷⁹ Non i kégédaw i Kadnane betom do étew mégilak méléhu, ségiléw bé kéréndaw i téresange dob délémone, inok fémanduo no betom

dob aguwone énda i bukuén de." Been i bénréh Sakariase.

⁸⁰ Atin i ngae ni ménruk émbagér brab ménwaléy métintu. Atin amun dakélén, ménbati dob sébaane gonon énda i étew de bati, taman bé gaiwe ménuret dob de étew Judio.

2

I kékumah Jesuse

¹ Dob de gai bé beno, wén i ségétéwe méngguléw dob Roma féndawét Augusto. Méniray sugu dob kéléhanay de étew félista ro inok iraya ro buwis.

² Been i niy sunguwe kéfélista bé de étew, atin ménrigoy ni amun Kireniowey méguléwe dob Siria.

³ Atin mélaw i kéléhanay étewe ménule ménangéy dob de karo ingéd, sani de gonoy de katufua ro, inok émfélista ro.

⁴ Mélaw i Josehe ménagéw tidew Nasaret sakuf i dakéle ingéd Galilea, mangéy dob ingéd ne féndawét Betlehem sakuf i dakéle ingéd Judea. I Betleheme ni, been i niy ingéde numahay ménélatae Datu Dabid. Ménangéy diyo i Josehe non beeney séfu Dabide. ⁵ Ménangéy diyo bero Mariahe ténlana no bawagé no moso. Bé beno gai, gédétén kékumahan i Mariahe. ⁶ Amun diyo ron dob Betlehem, ménggégumah i gaiy kékumaha nuwe. ⁷ Endob éndaén i gono ro dob de lawi kay de kana diyo. Mélaw ménangéy ro dob kayab i de ayam. Atin diyo ménkumahan i Mariahe bé ngae lagéy sungu ngaén. Atin bénausén bé de safut brab féndiyoén dob amaay de ayam.

⁸ Bé no so kélungonon, énda mérayuén tidew diyo wén i do témalima bé de bili-bili dob de fétabtaban. ⁹ I télakiwe tidew dob Kadnane ménfélito dob berowe. Brab i géfekayae réndaw tidew dob Kadnane réménéndaw dob berowe. Toow ro fo ménggilak. ¹⁰ Endob ménbéréh i télakiwe mano, "Kagom mégilak. Wén i fiyowe uret gu funay kéléhanay étewe méoror. ¹¹ Béleewe ni, i Mémukase begom ménunah dob Betlehem. Been i Kristowe Kadnan.

¹² Gito gom bénaus bé de safut, féniro dob amaay de ayam. Been i nan i funa kome gétigan bé uret guwe ni toow."

¹³ Atin bé beno so, ménékow ménfélito de médoob dumo no télaki brab kémanta ro dayewé roy Tuluse maro, ¹⁴ "I kéléhanay de étew damén démayew bé Tuluse diyo dob toowe fo gérotor laway. Irayén damén i fiyowe kékati énda i bukuén de, loo bé fasad ne dob de étew dob duniiae ni mésuwat i Tuluse bero."

¹⁵ Amun ménfélule i de télaki mangéy dob lawayo, ménféléréh-béréh i de témalima bé de bili-bili maro, "Féngétingay Kadnane betom i fantage bé ménrigowe dob ingéde Betlehem. Magéw tom angéyé tom téngténgén."

¹⁶ Mélaw ménagayas ro magéw brab énggito roy Mariahe brab Josehe brab énggito roy klohe nga fén-iro dob amaay de ayam. ¹⁷ Amun énggito ro, bénréh ro dob Mariahe brab Josehey kékéréh i télakiwe fantag bé ni kloh nga. ¹⁸ Atin nuret i de témalima bé de bili-bili dob de ségiyo étew gébalaka ro, atin ménngaif i kéléhanay énggégélingoe de. ¹⁹ Enggétédémo Mariahey kéléhanay ni ménrigo brab sénga tékélid fégitungé no. ²⁰ I de témalima bé de bili-bili ménfélule ro kémanta dayewé roy Tuluse, non bé de énggito ro brab de énggelingoo ro. Ménrigoy kéléhanane loo bé kékéréh i télakiwe de bero.

²¹ Amun énggégumah i géwaléwe gétérésangan, i ngae ni téuli, brab niraya ro dawéti Jesus, sani dawéti niraya i télakiwe de bé énda séna obor i Mariahe de.

²² Amun énggégumah i gaiwe bé kétuma ruwe bé sugu Moisese fantag bé kékéréh i Josehe brab Mariahe nuwit roy ngae ni dob lawi i Tuluse dob ingéde Jerusalem. ²³⁻²⁴ Atin i Mariahe brab Josehe témenulak ro loo bé ménslate dob Kukumay Tuluse ruwo timan lémugén inok félinis i Mariahe dob adafay Tuluse. I funa ruwe ménuit bé ngae ni inok odoro

roy ménsulate dob Kukumay Tuluse mano, "Fatut iray dob Kadnaney sun-guwe nga lagéy."

²⁵ Bé béno so, wén i ségétewé lukés lagéy dob Jerusalem féndawét Simeon. Ségétew métintu étew brab toow fo modor bé kukumay Tuluse. Atin sénga téklid ongot-ongoté noy kéfukase bé de Judio. Brab i Simeone ni sénga téklid fémanduoy Rémogor i Tuluse. ²⁶ Fénggétigay Rémogor i Tuluse de bé énda méléhuén taman énda gito noy Kristowe, sani fénasad i Kadnane sugué no Mémukas.

²⁷ Fénémanduoy Rémogor i Tulusey Simeone mangéy dob lawi i Tuluse bé kéuwit i de lukés Jesus de inok rigoné roy adate dob Ménsulate Kébéréh i Tuluse. ²⁸ Tidew béno, éndot Simeoney Jesuse brab sénfifi no brab ménfésalamat bé Tuluse mano, ²⁹ "Barakatan Kadnan, ténuma moy fasad me begén, brab fakayén méléhuu. ³⁰ Non énggitó gun i Mémukase sénuguém, ³¹ sani ténafoy me inok i kéluhanay de étew gito ro. ³² Ségétew maak solo rémendaw dob de étew békén Judio inok fégétiga no beroy fantag bé Beeme. Brab Been i funay de étew démayéw so begey do Judio."

³³ Tidew béno, ménggaif i de lukés Jesus bé ni kébéréh Simeone fantag bé Jesuse. ³⁴⁻³⁵ Atin déménasal i Simeone dob Tuluse inok féfyioné no bero, brab bénréhén dob Mariahe idéng Jesus mano, "I ni nga fénemili i Tuluse émféingat bé de étew dini dob Israel inok i itungay médoowe émfayag. Médooy de étew mika bé nga me ni moso, brab funa mo tete i fédew me. Endob mékukum i de énda de munur, brab méfukas i de munur de." Been i niy bénréh Simeone.

³⁶ Atin wén soy ségétewe libun muret bé kékébéréh i Tuluse, féndawét Anah, nga Fanuel tidew dob katufua ro Asere. Toowén fo lukés brab ménsétifon bé bawag ne fitew gébélantuwa tidew fanay ménsébawag ro. ³⁷ Endob ménbaléw taman waléw folo bra éfot gébélantuwa i kélukés

ne. Brab énda fo méntékéda no dob lawi i Tuluse non fuweh na kélunganon i kéfengadaf ne démasal brab fuwasa. ³⁸ Atin amun diyo sénay lukés Jesuse dob lawi i Tuluse, énggégumah i ni lukés libun. Sonom béno, ménfésalamat dob Tuluso, atin nureténi fantage bé Jesuse bé Beeney ongot-ongoté ruwe tidew dob Tuluse. Nureténi dob de étew diyo dob Jerusalem ongot-ongoté ro soy kéfukase bero.

³⁹ Atin i Josehe brab Mariahe, amun énggédoro ron i kéluhanay sénugue dob Kukumay Tuluse, ménule ro mangéy dob Nasaret dob sakuf i Galileawe. ⁴⁰ Atin ménruk i ngae ni, brab ménwaléy émbagér brab toow fo métiledtéd. Atin toow fo mégédaw i Tuluse de.

I Jesuse beroy de maistéro

⁴¹ Sénga bélantuwa i idéng Jesuse brab boh ne mangéy Jerusalem inok mamung ro kanduli féndawét "Témara". ⁴² Amun folo bra ruwo gébélantuwa i idad Jesuse, ménodor bero, loo bé adat i de Judio. ⁴³ Amun gilid i kékanduli ruwe, i de lukés Jesus ménule ro tidew Jerusalem. Enda gétiga ro de ké méntéféléd i Jesuse. ⁴⁴ Maro ké ménodor so bé kédoono ruwe ménule. Amun ménsegétérésangan ron magéw, sénléed roy Jesuse dob de samung ro brab dob de dumo ro. ⁴⁵ Endob énda énggitó ré de. Mélaw dob géruwowe de gai, ménsefule ro mangéy Jerusalem sélédé ro. ⁴⁶ Dob gétéléw ne géterésangan, énggitó ro dob lawi i Tuluse. Ménstar beroy de maistéroy de Judio, fégélingoé no bero brab féninsaa no bero. ⁴⁷ I kéluhanay de mégélingo de, ménggaif ro bé de fiyo féninsaé no brab de katabuwan késumbulén. ⁴⁸ Atin i de lukés Jesus ménggaif ro bé kégito ruwe de diyo. I idéng ne ménsegétérésangan ron magéw, sénléed roy Jesuse dob de samung ro brab dob de dumo ro. ⁴⁹ Endob séménumbul i Jesuse mano, "Enda kailanga no sélédé kom

Begén. Gétiga kom damén ay niwu dob lawi i Boh guwe.” ⁵⁰ Endob i de lukés Jesus énda énggésobuto roy atag i bénréh Jesuse.

⁵¹ Tidéw béno, ménodor i Jesuse mule bé de lukésén mangéy Nasaret, brab nunuro no bero bé kéluhanay rigoné nuwe ula-ula. Enggétédémoy idéng ney kéluhanay de ni, atin sénga tékélid fégitungé no. ⁵² Amun ménruk i Jesuse, ménwaléy émbagér brab métiledétd. Atin kéluhanay de étew méuyot ré de, brab i Tuluse toow fo ménoror de.

3

I kéuret Juan Bautistawe

¹ Dob géfolo ne bra limo gébélintuwa bé kéféguléw Tiberiowe, atin Ponsio Pilato sénay méguléwe bé Judeawe, brab Herod i méguléwe bé Galileawe, brab i Filipiwe dumo no sétiman idéng i méguléwe bé Itureawe brab Trakanite, brab Lisaniasey méguléwe bé Abiliniawe, ² atin i de toow do gérotor fadi ro Anas brab Kaifas dob Jerusalem, ménsébérh i Tuluse bé Juane nga Sakarias. Bé béno gai, ménbati i Juane dob gonone énda i étew de bati. ³ I kéluhanay de ingéd gédét dob wayége Jordan sénugudo no muret mano, “Kailanga kom gésénule bé de sala gom brab fébautis gom. Atin fésagaday Tuluse begom.” ⁴ I rénigo Juane diyo loo bé sénulat i méntelatae sénarigoy Tuluse muret féndawét Isaias mano, “Wéniségétéwe mékes dob gonone énda i étew de bati mano, ‘Tafay gom i aguwoy Kadnane. Fééntang gom i aguwo nuwe. ⁵ Tamfurén i kéluhanay de géléna, brab fédataréni kéluhanay de tuduk brab do buntud fédataréni, brab féntangén i de aguwon bingkug, brab i de kémérih fédosoén. ⁶ Brab i kéluhanay de étew gégito bé Mémukase tidéw dob Tulusó.’”

⁷ Atin médooy étewe ménangéy dob Juane inok fébautis ro. Endob i Juane ménbérh mano, “I begome maak do ulé gom non tete i de rigoné kom. Sedek mangéy gom

dini? Enda gégéraléy gom tidéw dob kékukum i Tuluse ké fébautis gom saén. ⁸ Buluk toow gomén gésénule bé de sala gom, féténgténg gom i de fiyo ulauané kom. Atin kagom fégitungén i Tuluse fukasé no begom dob de sala gom sabaf bé begom i de séfu Abraham. Bérhéku begom, fakay géféaléy i Tuluse séfu Abrahame tidéw dob de batéw. ⁹ Béleewe ni, gédétén i kékukum i Tuluse bé de tete étew. Ségiléw bé falakule méntafayén ménténa dob darir i kayéwe inok i de kayéw énda mégonok ro fiyo, tu-wongén atin ibérén dob aféye inok métuwégi.

¹⁰ Atin i de médooy étew fénénginsa ro dob beene maro, “Ati fatute rigoné key?”

¹¹ Atin séménumbul i Juane mano, “Ati wéne ruwo lafin kégalén, fatut iraya noy éndae de. Brab ati wéne amaé no, fatut témukid de so.”

¹² Enggégumah soy de kémubra buwis inok fébautis ro. Atin ménbérh ro maro, “Maistéro, ati fatute rigoné key?”

¹³ Séménumbul i Juane mano, “Amuk kémubra gom, kagom lifulén i de étew. Yamula édot gom saén i katabuwane.”

¹⁴ Atin i de sundalo ménénginsa ro so dob beene maro, “I begeye, ati fatute rigoné key?”

Atin séménumbul i Juane mano, “Kagomén médot kurta fénagéw dob kégégyé. Taloo no témébo gom bé békéne toow. Kasukudan gomén bé sukay gome.”

¹⁵ Atin i de médooy étew amun énggelingoo roy kétoro Juane, kékmarang ro brab mégitung ro ké beeney Kristowe ménggumah dob duniyae. ¹⁶ Mélaw i Juane ménbérh dob bero mano, “I begéne, bautiso ku begom bé wayége, éndob wén nay gégunahe mas na gérotor begén. Fiyon foy ikét i safatos ne, énda métotororu de mukoh. Brab bautiso no begom bé Rémogor i Tuluse brab aféy. ¹⁷ Féganané noy de fiyo étew bé de tete étew ségiléw bé ségétéwe

métof. I fégéétotf ne diyo dob kémér ne inok fégéétotfén bé énrek ne brab fégétimuén bé faréye dob kiwot ne. Brab i de ukofén tuwégé no dob aféye énda émfandaén.”

¹⁸ Brab wén soy médoowe gékelasi kéuret Juane bé de étew fantag bé Fiy-owe Uret.

¹⁹⁻²² Amun médooy de étew ménbautisén, i Jesuse bénautis Juane so. Amun ménbautis i Jesuse, déménasal, brab i lala ne démasal, ménungka i lawaye. Atin i Rémodor i Tuluse ménlus maak marafati brab mémentrimféna dob Jesuse. Atin wén i ménbéréhe tidéw dob lawayo mano, “Beem i Nga guwe. Toow fo kégédawa ku brab késuwata ku.”

Atin i Herode datu, dénowoy Juane fantag bé Herodiyase lénamfaén bawag i dumo nuwe sétiman idéng brab fantag bé de médooy na do tete rénigo Herode. Tidéw bénou, numana no nay sala ne bé kékéférisu nuwe bé Juane.

I de katufua Jesus

²³ Bé kékéganay Jesuse bé galbék ne, télew folo gébélantuwa i kélukés ne. Brab i de étew maro ké Jesusey nga Josehe. Been i nga Elihe. ²⁴ Been i nga Batate. Been i nga Lebihe. Been i nga Melkihe. Been i nga Janahe. Been i nga Josehe. ²⁵ Been i nga Matatiase. Been i nga Amose. Been i nga Nahume. Been i nga Eshihe. Been i nga Nagehe. ²⁶ Been i nga Maate. Been i nga Matatiase. Been i nga Semeihe. Been i nga Josehe. Been i nga Judahe. ²⁷ Been i nga Joanahe. Been i nga Resahe. Been i nga Sorababele. Been i nga Salatiele. Been i nga Nerihe. ²⁸ Been i nga Melkihe. Been i nga Adie. Been i nga Kosame. Been i nga Elmodame. Been i nga Ere. ²⁹ Been i nga Josuehe. Been i nga Eliesere. Been i nga Jorime. Been i nga Mataate. Been i nga Lebihe. ³⁰ Been i nga Simeone. Been i nga Judahe. Been i nga Josehe. Been i nga Jonane. Been i nga Eliakime. ³¹ Been i nga Meleawe. Been i nga Mainane. Been i nga Matatawe. Been i nga

Natane. Been i nga Dabide. ³² Been i nga Jessehe. Been i nga Obede. Been i nga Boose. Been i nga Salmone. Been i nga Naasone. ³³ Been i nga Amianadabe. Been i nga Admine. Been i nga Arniwe. Been i nga Esrome. Been i nga Farese. Been i nga Judahe. ³⁴ Been i nga Jakobe. Been i nga Isake. Been i nga Abrahame. Been i nga Tarehe. Been i nga Nakore. ³⁵ Been i nga Seruge. Been i nga Ragauwe. Been i nga Pelege. Been i nga Hebere. Been i nga Salae. ³⁶ Been i nga Kainane. Been i nga Arfakade. Been i nga Seme. Been i nga Noehe. Been i nga Lameke. ³⁷ Been i nga Matuseleme. Been i nga Enoke. Been i nga Jaredé. Been i nga Mahalaleele. Been i nga Kainane. ³⁸ Been i nga Enoke. Been i nga Sete. Been i nga Adame. Been i nga i Tuluse.

4

Ténéngkad Satanasey Jesuse

¹ Atin i Jesuse fénémanduoy Rémodor i Tuluse, ménule tidéw dob wayége Jordan, brab fénanangguwit i Rémodor i Tuluse mangéy dob de gonon énda i étew de batí. ² Amun diyoén i Jesuse, ménggégumah i odoroy de satan féndawéti Satanas inok téngkade noy Jesuse rémigo tete. I kérugay i ni éfot folo gétérésangan. Bé do no gai, énda ménama i Jesuse, atin toow fo ménlayaf.

³ Ménggégumah i Satanase dob Beene brab ménbéréh mano, “Amuk Beemey Nga i Tuluse, féwaléyém amaén i de batéw ni.”

⁴ Endob séménumbul i Jesuse mano, “Wén i Ménsulate Kébéréh i Tuluse mano, ‘Békén’ amaén saén i funay étewe méuyag.”

⁵ Tidéw bénou, méntékow nuwit Satanasey Jesuse mangéy dob gérotore gonon. Brab fenténgténgén dey kéluhanay de ingéd dob duniyae.

⁶ Atin ménbéréh i Satanase mano, “Buluk lingkuwédo mo begén brab féngadafé mo begén, iray gu beem i kéluhanay ature méguléw bé de ni inok médayéw go. Géiraya ku kuwagib i

étéwe fémilié ku magatur bé kéluhanay de ni, non begéney wéne atura no bé de ni béleewe. ⁷ Lingkuwédonu brab féngadafénu, atin kéluhanay de ni gédoté mo.”

⁸ Endob séménumbul i Jesuse mano, “Wén i Ménsulate Kébéréh i Tuluse mano, ‘Lingkuwéd go saén dob adafay Kadnane Tulusém. Been saén i féngadafé muwe.’”

⁹ Tidéw béno, nuwit Satanase mangéy dob ingéde Jerusalem, brab nuvitén mangéy dob toowe gérotor bérungoy lawi i Tuluse. Atin ménsébéréh man bé Jesuse mano, “Amuk Beemey Nga i Tuluse, antéfor go. ¹⁰ Non wén i Ménsulate Kébéréh i Tuluse mano, ‘Suguéy Tulusey de télaki no démiyaga Beem, ¹¹ brab sakémé ro Beem inok énda émfali go bé de batéw dob fantade, fiyon i de sékéyém.’”

¹² I Jesuse séménumbul mano, “Endob wén soy Ménsulate Kébéréh i Tulus mano, ‘Kago téngkadén i Kadnane Tulusém rémigo bé kétaya muwe rígonén.’”

¹³ Atin i Satanas téngkadén i Jesuse rémigo tete bé médoowe ségiyo-giyo kétengkadén de. Endob énda génaga né de. Tidéw béno, téngakén i Jesuse singkow.

I kéféganay i galbék Jesuse dob Galilea

¹⁴ Tidéw béno, ménséfule i Jesuse mangéy Galilea, brab i barakat i Rémogor i Tuluse dob Beene. Atin i urete fantag bé Jesuse méraan ménlegéb dob de ingéd diyo.

¹⁵ Atin téménoro i Jesuse dob de lawi féngadafan kay de Judio brab kéluhanay de étew dénatéw ro.

¹⁶ Tidéw béno, énggégumah i Jesuse dob Nasaret, sani gono nuwe ménruk. Atin bé gaiwe kétérén, ménahur dob lawie féngadafan loo bé adat ne, atin téménindég inok basané noy Ménsulate Kébéréh i Tuluse. ¹⁷ Brab wén i niraye de basanén sénulat i Mémentatae sarigoy Tuluse muret féndawét Isaias, brab amun nukabén,

énggébasa na noy ménsulate diyo mano, ¹⁸ “I Rémogor i Tuluse ay ni dob Begéne, non fénémilién Begén inok muret bé Fiyowe Uret dob de méskinan. Sénuguén Begén inok muretu fantag bé kétangéye bé de ménkalabusu, brab émféséfule bé de fiyo kétengténg i de langafén, brab témabang bé de kéfasangan. ¹⁹ Atin sénuguén Begén muret fantag bé bélintuwae fégétigay Tulusey kégédaw ne bé de kéilawan.”

²⁰ Tidéw béno, amun énggilid i kóbasa nuwe de, dénili noy ni basanén, atin fénséfuleén dob sugu-suguéne gémalbék dob féngadafane. Atin ménsar i Jesuse inok témoro. Atin téngténg i kéluhanay de étew diyo. ²¹ Atin ménbéréh mano, “Bé ni gai, i ni ménsulat méntuman dob adafa kome.”

²² Tidéw béno, i kéluhanay de étew diyo énggédáyéwo roy Jesuse, brab ménggaif ro bé kéfiyoy de kóbéréhén. Mélaw ménséfenginsa ro maro, “Aw békén bay ni nga Josehe saén?”

²³ Atin ménbéréh i Jesuse mano, “Bérhé kom sékoy sébaane binuwaya mano, ‘Amuk beemey muwae, uwaém i lowoh me. Non amuk beemey ségétewé tintu sarigoy Tuluse, rigo moy de mékégaif galbék dini dob kaame ingéd ségiléw bé de rénigo mo kun dob Kafernaum.’”

²⁴ Féntaus Jesusey kóbéréh ne mano, “I toowe bérhé ku begom, énda i ségétewé sarigoy Tuluse tayakufén dob kaane gonon. ²⁵ Endob bérhé ku begom i toowe fantag bé gai Eliase. Enda fénrana i Tuluse de bé téléwe gébélintuwa brab éném gétérésang kélungonon. Atin énggégumah i lénggobé dob de ni gonon. Bé béno gai, médooy de baléw do libun Judio. ²⁶ Endob fiyon ségétewé bé no do baléw dumo tom Judio dob Israel, énda fénfégédét i Tulusey Eliase dob berowe. Yamula sénugu i Tuluse mangéy dob ségétewé libun baléw békén Judio dob sébaane ingéd féndawét Sarepta dob Sidon. ²⁷ Loo so bé gai Eliseawe ségétewé so sarigoy Tuluse. Wén i do médooy étew démeruun

fémute bé de dumo tom Judio. Endob énda i ségétew bero fén-adi-adi saliyu bé ségétéwe étew békén Judio féndawét Naaman tidew Siria.” ²⁸ Atin i de kéluhanay de étew diyo dob lawie féngadafan toow ro fo ménkérit bé kégélingo ruwe bé ni bénréh Jesuse. ²⁹ Mélaw dénedél ro taman dob uruk i tuduke diyo, sani fentindégo ro bé karowe ingéd, inok dérié ro damén dob fingase inok mélawu. ³⁰ Endob ménagéw i Jesuse témara dob kérara ruwe atin méntaus magéw téngakén bero.

Dénédél Jesusey de saitan

³¹ Atin méntaus i Jesuse léménudug mangéy Kafernaum sani sébaane ingéd sakuf i Galileawe. Diyo bé gaiy kétéréne, téménoro dob de étew dob lawie féngadafan. ³² Atin éngkéségiyonan i de étew bé de kétoroén non énda saén téneroén i kéfégitung i de ségiyo étew. Yamula téneroén i kaane kéfégitung. ³³ Atin diyo dob lawie féngadafan, wén i étewe rénahukoy saitane. Brab ménkes toow fo métanug mano, ³⁴ “Adéhoyoy! Ati amungé muwe begey, Jesus tidew Nasaret? Ménangéy go ba dini inok binasané mo begey? Enggétiga key ké ati Beeme. Beem i Mékétéfuwe tidew dob Tuluse.”

³⁵ Endob génlé Jesusey saitane ni mano, “Kago selekén, brab tékédan go.” Sonom bénó, tenuwar i saitaney étewe ni rénahuko no. Atin méntékédan brab énda ménkaid i étewe ni.

³⁶ Atin éngkéségiyonan ro kéluhanan. Brab ménsebéréh-béréh ro maro, “Ati ni kékéréh? Dob kékéréh ne saén wén i barakatén. Sugué noy saitane tékédan atin modor tékédan.” ³⁷ Atin i urete fantag bé Jesuse ménlegéb dob de kéluhanay de ingéd diyo.

Nuwa Jesusey de médoó étew

³⁸ Tidew bénó, méntékédan i Jesuse tidew dob lawie féngadafan brab ménangéy dob lawi Simone, atin diyo i térima Simone libun démérueen toow fo méduf. Atin nongot roy Jesuse bé uwaé no. ³⁹ Atin téménindég i Jesuse

dob tébing i libune ni, atin fentekéda noy kékéduf ne. Sonom bénó, ménadi-adiy libune ni. Atin méntek dénuwoto no bero.

⁴⁰ Amun mélédén i térsange, i de médoó do étew wén i démérue ro, nuwit ro dob Jesuse inok uwaé no bero. Atin kénuwah Jesuse bero brab ménadi-adi ro kéluhanan.

⁴¹ Fénféraréyén soy médoowe saitan. Brab ménkes ro maro, “Beemey Nga i Tuluse.” Endob génléen bero inok métanék ro, non énggétiga roy Beeney Kristowe.

⁴² Amun géfuwénén, méntékédan i Jesuse ménangéy dob sébaane gonon énda i étew de bat. Endob i de étew sélédé ro brab ménangéy ro dob Beene brab nongot ro kékéréh damén tagaké no bero. ⁴³ Endob bénréhén bero mano, “I funa kuwe sénugu mangéy dini inok ureté ku dob de dumo ingéd i Fiyowe Uret fantag bé kéféguléw i Tuluse dob de étewén. Mélaw fatut ureté ku dob de dumo ingéd.”

⁴⁴ Atin i Jesuse ménagéw ménuret dob de féngadafan dob Judea.

5

Ténawag Jesusey de sungu kuyugén

¹ Wén i no sébaan fuweh, diyo i Jesuse dob doror i dogote féndawét Genesaret. Ménfégédét i de médoó do étew sédantélo ro inok mégélingo ro békéréh i Tuluse ureté Jesuse.

² Atin i Jesuse énggitó noy ruwowe do awang diyo dob doror i dogote. Brab i de gefe de méntéfor ro non urahé roy de fukét ro. ³ Amun i Jesuse méná dob sébaane békéréh ne awang ni ka Simon, nongotén békéréh ne kloh dob ménaléme de. Brab diyo ménas ménuret békéréh i Tuluse dob de étew diyo ménribuk dob doror i dogote.

⁴ Amun énggilid téromo i Jesuse, bénréhén békéréh ne Simone mano, “Fékérara tom dob ménaléme de brab lawu gom i da fukét goma nan inok gégédot gom do sédo.”

⁵ Endob i Simone séménumbul mano, “Maistéro, ménterasay gey

ségékélungonon brab énda foy énggédot gey de. Endob amun bénréhém, lawué key de fukét gey.”

6 Amun ménunur ro bé lénawu roy de fukét ro, énggédot ro toow fo médoosédo, brab i de fukét ro gédét mémusi.

7 Tidéw béno, nabit roy de dumo ro dob ségiyowe awang, inok téma bang ro médot bé de sédo. Brab amun énggumah ro, fénéno roy ruwowe timan awang taman gédét ro méeléed.

8 Amun énggito Simon Pedrowey ni fénrigo Jesuse ula-ula, ménlingkuwéed dob adafa nuwe brab ménbéréh mano, “Kadnan, kago fégédét begén, non ségétewu étew ménnsala.”

9 I funa nuwe énggóbéréh loo bé ni non toow fo ménggaif i Simone brab de dumo no bé kédooy de sédo énggédot ro. **10** Fiyon foy de nga Sebedeo, ro Santiago brab Juan dumo Simone gémalbék, ménggaif ro so. Atin ménbéréh i Jesuse dob Simone mano, “Kago mágilak. Brab éndaén séméléd gom sédo. Tidéw béléewe, fésélédé ku begom étew inok furay ro so Begén.”

11 Amun féndunggu roy de awang ro, fénled roy kéluhanane, atin ménodor ro bé Jesuse.

Nuwa Jesusey ségétewé fémuteén

12 Wén i no sébaan fuweh dob sébaane ingéd, énggabalaka Jesusey ségétewé étew fémuteén. Atin bé kégito nuwe bé Jesuse, ménédunsum dob fantade brab ménfégédaw-gédaw bé Jesuse mano, “Kadnan, buluk méuyot go, géféadi-adino mo begén.”

13 Atin i Jesuse béntréen i kémérne brab kénwahén, brab ménbéréh mano, “Méuyotu. Adi-adi go!” Sonom béno, ménkédan i fémute ne brab ménadi-adi. **14** Atin bénréh Jesuse bé békén ureté no dob ségiyowe étew brab sénuguén mano, “Ay go dob fadie inok, fétengtengém i ménadi-adi gon. Tidéw béno, tulak go loo bé ménbéréhe dob Kitabé tidéw dob Moisese inok gétigay kéluhanay de étew ménadi-adi gon.”

15 Endob i urete fantag bé Jesuse ménlégéb mangéy mérayu. Mélaw wén i toow fo médoosédo étew ménangéy dob

Beene inok mégélingo ro bé uret ne brab féuwa ro bé de déruu ro. **16** Wén i no do gai, i Jesuse ménangéy dob sébaane gonon énda i étew de batí inok félébu brab démasal diyo.

Nuwa Jesusey ségétewé kimoyén

17 Wén i no sébaan fuweh, téménoro i Jesuse. Atin diyo i de odoroy de Judio féndawét Fariseo ménasar beroy de témoro bé kitabe. Tidéw ro dob de sakuf Galilea brab Judea brab tidéw dob ingéde Jerusalem. Atin i barakat i Tuluse ménдиyo dob Jesuse inok uwaé noy de déméruruun bé de étew. **18** Atin énggumah i de étew ménuit bé kimoyéne ténggung ro. Kétaya ro uwitén mahur inok fédiyoé ro dob téngaanga Jesuse. **19** Endob énda i fiyo kénélawang ro de, non bé médoowe do étew. Mélaw ménénik ro dob atéf i lawie. Tidéw béno, ténosongo ro féagéwo ro de témuntun mangéy fantad dob kérara i de étew dob adafa Jesuse. **20** Amun énggito Jesusey kénéfingintoow ruwe, ménbéréh dob ni étew kimoyén mano, “Adih, i de salaém ménfésagadén.”

21 Tidéw béno, i de Fariseo brab de témoro bé kitabé fénggitung ro maro, “Sedek émbéréh mémurka i ni étew? Enda i géfésagad bé de sala ké békén i Tuluse saén!”

22 Endob i Jesuse gésobuto noy de itunga ro. Mélaw séménumbul mano, “Sedek séfenginsa gom dob de fédew gom fantag bé kénéhé guwe? **23** Toow na fo mélému béréhén, ‘I de salaém ménfésagadén.’ Non énda gito no ké wén i barakat gu de rémigo. Endob toow fo mérégén béréhén, ‘Tindég go brab agéw go.’ Non giton ké wén i barakat gu de rémigo. **24** Endob féfégétiga ku begom i fantage bé Nga i Kéilawane, sani Begéne. Wén i barakat gu brab kuwagib gu dob duniyae ni émfésagad bé de sala.” Tidéw béno, bénréhén dob kimoyéne mano, “Béréhé ku beem, tindég go brab agéw go uwitém i iroo muwe mule mangéy dob lawi me.”

25 Sonom béno, téménindég i kimoyéne ni dob téngaanga ruwe brab

ménagéw nuwitén i iroo nuwe brab ménule mangéy dob lawi ne démayéw bé Tuluse.²⁶ Atin i kéluhanay de étew diyo, toow ro fo ménkéségyionan brab ménggilak ro. Atin dénayéw roy Tuluse maro, “Enggégito tom do mékégaif bé ni gai.”

²⁷ Amun énggilidén ni de rénigo Jesus, ménagéw brab énggito noy ségétéwe étew kémubra buwis féndawét Lebi, ménasar dob de kubranan buwis. Brab ménésbéréh i Jesuse de mano, “Odor go Begén.”²⁸ Tidéw béno, i Lebiwe fénledén i kéluhanane brab téménindég ménodor bé Jesuse.

²⁹ Atin rénigo Lebiwey sébaane dakél karagiya dob lawi ne. Brab diyo i médoowe do étew kémubra buwis brab médo na étew ménasar mama brab miném bero Jesuse.³⁰ Atin i de téromo bé kitabé brab de Fariseo, ménbutég-butég ro brab ménbéréh ro dob de kuyug Jesus maro, “Sedek ménéslawék gom mama bé de kémubra buwis brab de ségiyo tete étew?”

³¹ Endob séménumbul i Jesuse mano, “I de fiyo kégelowoho no, énda kailanga roy muwae, éndob kailangay de wén déruu no.³² Enda ménangéyu dini inok tabaré kuy de métintu étew. Yamula ménangéyu dini inok tabaré kuy de wén salaén inok gésénule ro.”

³³ Atin wén i de ménénginsa dob Jesuse maro, “I de kuyug Juan sénga tékélid démasal ro brab fuwasa. Loo so bé de kuyug i de Fariseo. Endob i de kaam do kuyug mama brab miném ro.”

³⁴ Endob i Jesuse sénumbul no bero mano, “Ufama, i de kana dob uyote énda waléy tete i de fédew ro taman énda tékedan i témérimawe lagéy.³⁵ Endob gégumah i gaiwe ké édotén néni témérimawe lagéy dob berowe, brab been nay no fuwasa ro bé do no gai. Ségiléw so bé de kagén kuyug, non amuk diniwu séna, énda fuwasa ro.”

³⁶ Tidéw béno, nuret Jesusey sébaane binuwaya fantag bé sébidanay mantuwe kétoroén brab tafaye kétoro

i de Judio. Ménbéréh mano, “Enda i étew rémiyas bé mantuwe kégal inok fégétabung bé tafaye kégal. Non amuk rigoné no, mésinggula i mantuwe kégal, brab énda fo médait féséraén i mantuwe bé tafaye de.³⁷ Brab énda i étew mahur bé mantuwe arak dob tafaye ahuron arak rénigo bé kulit ayame, non mébétus i mantuwe arak dob tafaye ahuron brab mébinasa brab méitis i mantuwe arak.³⁸ Endob fatut i mantuwe arak ahurén dob mantuwe kulit fédéngon de.³⁹ Brab énda i étew buluk géiném bé tafaye arak méuyot bé mantuwe de non mano, ‘I tafaye arak mas na fiyo.’”

6

Fantag bé gaiy kétérén

¹ Wén i no sébaan fuweh gai kétérén, i Jesuse brab de kuyugén téménara ro dob de médo do faréy. Atin i de kuyugén ménidot ro de brab kénugut ro. Tidéw béno, ménama ro.² Endob i de Fariseo diyo ménbéréh ro maro, “Sedek rigoné roy ni, non békén fatut rigonén galbék bé gaiwe kétérén?”

³ Séménumbul i Jesuse mano, “Aw énda ba énggébasana kom i rénigo Datu Dabide? Wén i no gai toowén fo mélayah beroy de sundalo no.⁴ Atin ménahur ro dob lawi i Tuluse brab ménidot bé ténu lake fan brab namaén, atin niraya no soy de dumo no de. Rénigo noy ni fiyon fo ké dob kitabe, do fadi saén i fakaye mama bé ni fan.”

⁵ Atin féntaus Jesusey kébéréh ne mano, “I Nga i Kéilawane, sani Begéne, wén i kuwagib gu fantag bé ati fakaye bé gaiwe kétérén.”

Nuwa Jesusey ménasdile kémérén

⁶ Bé sébaane man gai kétérén, ménahur i Jesuse dob lawi i de Judio féngadafan inok téromo. Atin diyo soy ségétéwe lagéy ménasdil i kuwonone bé kémér ne.⁷ Atin i de Fariseo, sani de odoroy de Judio, diyo so beroy de téromo bé de kitab. Atin ténu lik roy Jesuse inok gito roy funa ruwe de témo rémigo énda fakayén dob kitabe. Mélaw téneqténg ro inok gito ro ké muwa i Jesuse bé gaiwe kétérén.

⁸ Endob i Jesuse, gétuwa noy de itunga ro. Atin ménbéréh dob lagéye ni ménasdil i kémér ne mano, "Ay go dini, tindég go dob adafay kéluhanay de étew ni." Mélaw téménindég brab ménagéw mangéy diyo. ⁹ Tidéw béno, ménbéréh i Jesuse dob de Fariseo brab dob de maistéro mano, "Ati karang gome de, ati isuwe fakay dob kitabé bé gaiwe kétérén? Rémigo fiyo loo ké tete? Témabang bé étewe loo ké féléhuén?" ¹⁰ Atin iling-iling i Jesuse brab ménbéréh dob lagéye ni mano, "Bétérém i kémér me." Atin bénétérén i kémér ne atin sonom béno ménadi-adi.

¹¹ Tidéw béno, toow fo ménkérít i de Fariseo brab de téromo. Atin méniséuret-uret ro bé ati rigoné ruwe bé Jesuse.

Fénémili Jesusey de folo bra ruwo Apostol

¹² Atin ménagéw i Jesuse bé béno gai ménangéy dob burure inok démasal, atin déménasal diyo dob Tuluse ségékélungonon. ¹³ Amun géfuwénén, ténabarén i de kuyugén, atin ménémili folo bra ruwo féndawét do Apostol, sani de sénugu. ¹⁴ Fénémilién i Simone (féndawétén so Pedro), brab Andrese dumo no sétiman idéng, brab Santiago, brab Juan, brab Filipi, brab Bartolome, ¹⁵ brab Mateo, brab Tomas, brab Santiagowe nga Alfeo, brab Simone ségétew toow fo gulaané noy ingéd ne, ¹⁶ brab Judase nga Santiago, brab Judas Iskariote beeney ménfékéfoe bé Jesuse.

Nuwa Jesusey de médoó étew

¹⁷ Atin léménudug i Jesuse beroy de Apostolén, brab téménindég dob sébaane gonon datar. Diyo soy médoowe do étew do kuyugén brab do étew tidéw Judea brab Jerusalem brab tidéw dob Tiro brab Sidon gédét dob dogote. ¹⁸ Ménangéy ro diyo inok mégélingo bé kékérén Jesuse brab féuwa bé de déruu ro. Atin nuwa Jesusey de démérueen brab de rénahukoy saitane, atin ménadi-adi ro. ¹⁹ Atin i kédoonoy de étew magafas ro inok gékuwaha ro, non i barakat

ne ménasut tidéw dob Beene funay kéluhanane ménfiyo.

²⁰ Tidéw béno, ténéngténg Jesusey de kuyugén, atin ménbéréh mano, "Méoror gom do méskinan, non féguléwoy Tuluse begom. ²¹ Méoror gom do mélawayaf béni, non félésorén gom moso. Méoror gom do kémérew béni, non gébayat gom moso.

²² "Méoror gom amuk wén i mérarék begom sabaf bé kéunur gome Begén. Brab méoror gom amuk wén i sémiyaw begom brab bérého ro begom tete fémalanén gom sabaf bé kéunur gome Begén, sani Nga i Kéilawane. ²³ Féguaya gom bé béno gai non i baras gome toow fo médoó diyo dob lawayo. Non loo so bé niy rénigoy de katufua tom bé de gétah sénarigoy Tuluse muret bé kékérén ne.

²⁴ "Endob mékégédaw-gédaw gom do kawasa, non énggétéy gomén i de funa kom méguyaya. ²⁵ Mékégédaw-gédaw gom do bésor béléewe ni, non félawayaf gom moso. Brab mékégédaw-gédaw gom do gébat béléewe, non félakuén brab fékérewén gom moso.

²⁶ "Mékégédaw-gédaw gom amuk kéluhanay de étew émbéréh do fiyo fantag bé begome, non loo bé niy kérigoy de katufua tom bé de gétah tugién do ubo-ubo sénarigoy Tuluse muret."

Fantag bé kégédawe

²⁷ Atin fentaus Jesusey kétoro ne mano, "Endob béréhé ku begom, fégédaw gom bé de sébanil begom brab rigo gom i fiyowe dob de mékérít begom. ²⁸ Béréh gom i fiyowe dob de mingon begom brab dasala kom i de démufang begom. ²⁹ Amuk wén i témamfiling bé fiféy me, fédayaém de témamfiling so bé ségébalae de. Brab buluk wén i mafas bé de kégal gom, iray gom soy kamisita gome. ³⁰ I kéluhanay mongote dob begome, iraya kom. Brab i de médot bé de étingayén kagom, kagom étukén de. ³¹ Brab buluy kétaya kome rigonéy de

étéw dob begome, rigo gom so dob berowe.

³² “Amuk mégédaw gom bé de mégédaw begom saén, énda médait gom médot baras. Non fiyon foy de énda do métintu étew mégédaw ro so bé de mégédaw bero. ³³ Brab amuk rémigo gom fiyo dob de rémigo fiyo dob begome saén énda médait gom médot baras. Non fiyon foy de énda métintu do étew rigoné roy loowe bé nan. ³⁴ Atin amuk émféélét gom dob de wén fégébayadén de, énda médait gom médot baras. Non fiyon foy de tete étew émféutong ro so dob de dumo ro tete étew inok géséfule so kéléuhanan. ³⁵ Endob fégédaw gom bé de sébanil begom, brab rigo gom i fiyowe dob berowe. Atin féélét gom brab kagom ongot-ongotén i baliwa nuwe. Atin i baras gome dakél brab waléy gom do nga i Toowe Gérotor Tulus, non ségiléw gom bé Tuluse mégédaw bé de énda gétigan émfésalamat brab de tete étew. ³⁶ Komon fégédaw gom loo bé kégédaw i Boh gome dob lawayo.

³⁷ “Kagom kémukum bé de dumo gom, inok i Tuluse énda so kukumé no begom. Atin i de dumo gom ménalsa, kagom dusanén bero, inok énda so dusanéy Tuluse begom. Fésagada kom i de dumo gom atin mélaw fésagaday Tuluse begom. ³⁸ Iray gom dob de dumo gom étew, atin irayay Tuluse begom. I kédooy iray gome ségiléw bé kédooy iray i Tuluse begom. Atin toow fo médooy iray i Tuluse taman gaba-gaba.”

³⁹ Brab ménbéréh man i Jesuse sébaan binuwaya mano, “Fakay bay langaféne marak bé dumo nuwe so langafén? Békén ba mélawu ro dob kalute? ⁴⁰ I ménagade békén gérotor na bé témore de. Endob i ségétewe étew amun énggáfeganadén fo toow, ségiléwén bé témenoroe de.

⁴¹ “Sedek gito moy klohe sala i dumo muwe, éndob énda gito moy kaame sala toow na fo dakél? ⁴² Atin bérhé mo dob dumo muwe mamo, ‘Adih, téreño moy nan salaém.’ Endob wén i kaame sala toow na fo dakél.

Fédayéw-dayéw go, éndob békén go fiyo étew. Téréno mo na métah i kaame sala toow na fo dakél, inok gétabanga moy dumo muwe témérén bé kaane kloh sala.”

Fantag béfiyowe brab tetee étew

⁴³ Féntaus Jesusey kékéréh ne mano, “Enda i fiyo kayéw mégonok bé tetee onok, taloo no tete kayéw mégonok bé fiyowe onok. ⁴⁴ I ségiyo-giyowe kayéw gélolon bé onok ne. Ufama, i sulu-suluwe énda mégonokén bé mangae. Brab i kayéwe suwaran énda mégonokén saging. ⁴⁵ Ségiléw so bé étewe. I métintuwe étew rémigo fiyo, non tidéw dob fédéw ne fiyo. Atin i tetee étew rémigo tete, non tidéw dob fédéw ne tete. Non i bae émbéréh bé atiy diyoe dob fédéwe.

⁴⁶ “Sedek fédawété kom Begén ‘Kadnan’, éndob énda rigoné kom i de bérhé ku begom? ⁴⁷ Atiy méuyote fégédét Begén brab mégélingo bé bérhé kuwe brab odoro noy de kéto gu, fégétiga ku begom ké ati kélasi nuwe étew. ⁴⁸ Beeney ségiléwe bé étewe réménigo lawi brab féntindégén i liléy ne dob émbagére batéw. Atin énggégumah i dunuke brab énggábela. Endob énda méntruwongén non féntindég dob rotor i batéwe. ⁴⁹ Endob i étewe énggégélingo bé de kékéréh gu éndob énda odoro no de, ségiléw bé étewe émfétindég lawi dob fantade énda i batéw féntindégo no bé de liléyén. Atin énggégumah i dunuke brab énggábela dob nan lawi. Atin méntruwong brab toow fo ménbinasa.”

7

Nuwa Jesusey sugu-sugué sundalowe

¹ Amun énggilidén i Jesuse témo bér de étew, ménagéw mangéy Kafer-naum. ² Atin diyo i ségétewe Romano kafitay de sundalo. Wén i sugu-sugué nuwe démeruun gédétén méléhu. Toow fo mégédaw i kafitane de. ³ Mélaw amun énggelingoo noy fantage bé Jesuse, séménugu bé de

dumo bé de odoroy de Judio mngot bé Jesuse témukaw damén dob lawi ne inok méuwa i sugu-sugué nuwe. ⁴ Amun ménangéy ro dob Jesuse, ménfégédaw-gédaw ro de maro, “I ni étew médait ké tabanga mo damén. ⁵ Non mégédaw betom do Judio, brab beeney ménférigowe bé lawi geye féngadafan dini.”

⁶ Mélaw ménodor i Jesuse bero. Amun éndaén mérayuén dob lawie ni ayo ro, i kafitane ni séménugu bé de dumo no malak bé Jesuse inok méréh de bé éndaén tausén, non énda médait kun i kafitane témanggaf bé Jesuse. ⁷ Fénbéréh i kafitane mano, “Toow go fo gérotor étew, atin mélaw énda métotoru malak Beem. Toow go fo barakatan, mélaw fyon fo ké béréhé mo saén, ‘Adi-adi’, gétuwa kuy waléy adi-adiy sugu-sugué kuwe. ⁸ Gétuwa kuy ni non wén i mas gérotor sundalo sémugu begén. Brab wén soy do sundalo sugué ku. Atin buluk béréhé ku, ‘Angéy go diyoo’, mangéy diyo. Brab buluk maku, ‘Enggomén’, témingé ro. Brab buluk béréhé ku dob de sugu-sugué ku, ‘Rigo gom i ni’, rigoné ro.”

⁹ Amun énggelingoo Jesusey ni, ménggaif de. Brab séménling dob de étew furay dob Beene brab ménbéréh mano, “Béréhé ku begom, fyon fo ké dob de Judio, énda i énggito gu kékéngintoow loo bé ni étew.”

¹⁰ Tidéw béno, amun ménséfule i de sénugu dob lawi i kafitane, énggito roy sugu-suguéne ni adi-adi nén.

Ténébule Jesusey kénogo lagéye

¹¹ Enda mérugayén tidéw béno, ménagéw i Jesuse dob ingéde féndawét Nain. Ménodor i de kuyugén brab médoowe do étew. ¹² Atin amun méngumah ro dob bengaway no ingéd, ménggébalaka roy de étew méntidéw dob no ingéd. Ténanggung roy bangkaye, mangéy ro lémbéng. I bangkaye ni buntung nga lagéy i libune baléw. Wén i médoowe étew tidéw dob no ingéd ménodor ro may lémbéng bé no kénogo lagéy.

¹³ Atin amun énggitoy Kadnane Jesus i baléwo no, ménuray i éna nuwe de. Atin ménbéréh mano, “Ina, kago kémérew.” ¹⁴ Atin ménangéy i Jesuse dob niroo nuwe. Tidéw béno, kénuwahén atin méntétudoy i de ménuwit de. Atin ménbéréh i Jesuse mano, “Adih, tek go!” ¹⁵ Sonom béno, méntek i kénogo lagéye brab ménbéréh. Atin niray Jesuse dob idéng ne.

¹⁶ Toow fo ménggaif i de étew de diyo atin dénayéw roy Tuluse maro, “Ay niy toowe fo gérotor sarigoy Tuluse muret bé kékéngintoow, méngumah dob betome. Ménlus i Tuluse mangéy dob begeye inok tabanga no begey do fénemilién.”

¹⁷ Atin mélaw i urete fantag bé Jesuse ménlégéb dob Judea, brab dob de ségiyo-giyo ingéd géliwét de.

I kékénginsa Juan Bautistawe

¹⁸ Brab i de kuyug Juan nuret ro dob beeney kéluhanay ni rénigo Jesuse. ¹⁹ Atin sénugu Juaney ruwowe bé de kuyugén mangéy ménginsa dob Jesuse maro, “Beeme bay no bénréh Juane géngumah ongot-ongoté key, taloo no fatut ongot-ongot gey na ségiyo?”

²⁰ Amun énggumahay de étew niy Jesuse, fénénginsaa ro maro, “Sénugu Juan Bautistawe begey mangéy ménginsa ké Beeme bay Kristowe bénréh Juane géngumah ongot-ongoté key, taloo no fatut ongot-ongot gey na ségiyo?”

²¹ Bé béno so, fén-adi-adi Jesusey de médoe déruunan brab do rénahuko saitan, brab nuwaén soy médoowe do langafén inok gérito ro. ²² Atin sénumbulo Jesusey de sénugu Juan mano, “Séfule gom brab uret gom dob Juaney de énggito gom rénigo gu brab de énggelingoo kom. I de langafén énggégito, brab de fikat énggéagéw, brab de bokongén énggégélingo, brab de fémuteén ménadi-adi, brab de ménléhu méntébule. Brab ureté key i Fiyowe Uret dob de méskinan. ²³ Atin

toow fo méoror i étewe énda ruwo-ruwoy kéfengintoow ne Begén.”

²⁴ Amun ménuleén i de kuyug Juan, ménbéréh i Jesuse dob de médoó étew fantag bé Juane mano, “Ati nangéy gome ténéngténg dob gonone énda i étew de bati? Ségétew maak kéroon faniréy réfuruhe? Békén, non i kéunur Juane énda méfélukén loo bé kéroone. ²⁵ Aw ménangéy gom diyo inok téméngténg gom ségétew étew toow fo fiyoy kégal ne? Békén, non i de étew kémégal ro fiyo brab do kawasa, énda bati ro dob de gonon énda i étew de bati. Yamula bati ro dob de toow fo fiyo lawi kay de datu. ²⁶ Ati nangéy gome ténéngténg? Ségétew étew sénarigoy Tuluse muret? Hoo, éndob bérhéhé ku begom, i Juane békén saén sénarigon muret bé kékéréh i Tuluse. ²⁷ I Juane niy fantage bé ni Ménusat Kébéréh i Tuluse amun bénréh i Tuluse Begén mano, ‘Sugué kuy sugu-sugué kuwe métah Beem. Been i témafaye bé kégumah me métah Beem.’ ” ²⁸ Atin fíntaus Jesusey kékéréh ne mano, “Bérhéhé ku begom, énda i toow na fo gérotor bé Juane bé kéluhanay de étew ménumlah. Endob bé gaiy kéguléw i Tuluse bé de étewén, i kéluhanay de térfantad étew sakuf i Tuluse, toow ro na fo gérotor bé Juane béléewe ni.”

²⁹ Amun énggelingoo roy kékéréh Jesuse, i kéluhanay de étew fiyon foy de lémiful kémubra do buwis, énggélolo roy aguwoy Tuluse katabuwan. Beroy de bénautiso Juan. ³⁰ Endob i de Fariseo brab de témoře bé kitabe, ménika ro rémigo bé kétayay Tuluse. Atin berowey de énda bénautis Juan.

³¹ Atin ménbéréh i Jesuse man mano, “Ati féségiléwo kuwe bé de étew méuyag béléewe ni? Ati ségiléwo ruwe? ³² Ségiléw ro bé de nga ménasar dob fadiyane brab mika ro mégérémét. Tabar i de dumo ro bero maro, ‘I begeye ménsegagung gey, éndob énda ménsayaw gom. Brab léméninggéng gey linggéng ménléhuon, éndob énda kéménrew gom.’ ³³ Non ménangéy diniy Juan Bautistawe

ménfuwasa brab énda méninémén arak. Brab bénréh gom, ‘Sénaitanan.’

³⁴ Endob i Nga i Kéilawane, sani Begéne, ménangéy dini, brab mamau atin minému. Brab ménbéréh gom, ‘Ay niy ségétew étew arumén mama brab miném arak, brab wén i dumo no do lémiful kémubra buwis brab do tete étew.’ ³⁵ Endob fégétigay Tulusey métintuwe dob kéluhanay de ngaén.”

I kégédaw i tetee libun

³⁶ Atin wén i ségétewé Fariseo, fíndawé Simon, séménéngkat bé Jesuse mangéy dob lawi ne mama. Mélaw ménodor i Jesuse ménangéy diyo brab ménasar ro mama. ³⁷ Brab wén i ségétewé tete libun dob no ingéd. Amun énggétiga noy Jesuse ménangéy mama dob no lawi, ménangéy so diyo ménuwit katiya toow fo fiyo, ménfeno mamut nor balilaga. ³⁸ Amun ménfégédét dob Jesuse, téménindégi gédét dob de sékéyén kémérew. Atin i de énloén léménuyut dob de sékéy Jesus. Brab térrafo no bé buk ne brab narékén i de sékéyén. Brab lénulawa no bé mamute nor. ³⁹ Amun énggito Simoney ni, ménbéréh dob fédew ne mano, “Buluk Jesusey ségétewé sarigoy Tuluse muret bé kékéréh ne, gélolo no damén ké atiy ni libun mémiraw de, ségétew libun tete.”

⁴⁰ Endob ménbéréh i Jesuse mano, “Simon, wén i bérhéhé kuwe Beem.”

Séménumbul i Simone mano, “Maistéro, bérhéhém begén.”

⁴¹ Atin bénréh Jesusey ni binuwaya mano, “Wén i ruwowe étew énggétong dob ségétewé émféélét kurta. I ségétewé de énggétong limo ratuh, brab i ségétewé de limo folo saén. ⁴² Amun énda i fégébayad ro de, fén sagada no bero, inok éndaén kailanga roy mayade. Na fénginsaa ku beem, ati isuwe toow na fo méimu bé étewe ni ménfétong bero?”

⁴³ Séménumbul i Simone mano, “Karangé ku, i toowe de méimu, been i énggétong médoó.”

Atin bang Jesuse, “Katabuwan i nan sumbulém.” ⁴⁴ Tidéw béo,

séménling i Jesuse dob libune ni, brab ménbéréh man dob Simone mano, "Enggitoy rénigoy ni libun? Ménahuru dob lawi me, éndob énda méniray go wayég fégéurah gu bé de sékéy gu, loo bé adat tome do Judío fatut rigoné mo damén. Endob i ni libun fénreén i de sékéy gu bé de énloén, brab ténafo no bé buk ne. ⁴⁵ I beeme, énda narékém Begén loo bé adat tome témayakuf bé de kana. Endob i ni libun, tidew fanay kégumah gu, énda téménréno marék bé de sékéy gu. ⁴⁶ Enda so lénulawa moy uléw guwe nor. Endob i ni libun, lénulaw noy sékéy guwe bé mamute nor. ⁴⁷ Mélaw bérhéhé ku beem, giton i dakéle kéimuén non i de médoó do salaén ménfésagadén. Endob i étewé kloh saén fénsagadan, kloh soy kéimu ne."

⁴⁸ Atin bénréhén bé libune ni mano, "Di, i kéléuhanay de salaém fénsagadanén."

⁴⁹ Atin i de étew bero ménama diyo ménsebéréh-bérhéh i de fédew ro maro, "Ati keeyén i ni étew gáfésagad do sala?"

⁵⁰ Atin bénréh Jesuse man dob libune ni mano, "I káfengintoow mey funay Tuluse ménukas beem. Taus go mule, atin kago émbuku."

8

¹ Brab énda ménrugayén tidew bénó, ménangéy i Jesuse dob de ségiyo-giyo ingéd ménuret bé Fiyowe Uret fantag bé káféguléw i Tuluse bé de étewén. Brab ménodor i de folobra ruwo kuyugén. ² Ménodor soy de libun fén-adi-adi no rénahukoy de saitan brab do démeruun. Ségetéw beroy Mariahe tidew Magdala, dob beeney ménékédan i fitéwe timan saitan. ³ Ménodor soy Juanawe bawag Kusawe sénarigo Datu Herode, brab Susanawe, brab médoó na do dumo libun. I ni do libun, témabang ro miray bé de kailanga ro Jesus.

I binuwayae fantag bé sémabuge

⁴ Wén i no sébaan fuweh, wén i médoowe étew tidew dob ségiyo-giyo ingéd ménangéy ro dob Jesuse mégélingo. Amun médoó ro ménslimud, nuret Jesusey ni binuwaya mano, ⁵ "Wén i ségetéwe étew ménangéy sémabug bé béné ne. Amun sabugé noy béné ne, i de dumo bé béné ne ménbégodoy dob doror i aguwone. Diyo gédaay de étew taloo no nama i de kloh manok. ⁶ I de dumoy de bénéen ménawér dob fantade wén i do batéw de. Tidew bénó, amun ménanayén témunoh, ménlaay ro non tikar i fantade de. ⁷ I de dumoy de bénéen ménawér dob fantade wén i do suwar de énda séna témunoh ro. Ménruk mélaw i de suwar séréngan bé de nohok, atin ménléhu i de nohok non lénimfung i de suwar. ⁸ Endob i de dumo bé de béné ménawér dob fiyowe fantad, brab téménunoh ro brab méngegonok ro médoó taman mératu takéf sénga sébaan béné." Atin fentaus Jesusey kóbéréh ne mano, "Fégitung gom fantag bé ni bénréh gu begom amuk méuyot gom de ké gésobuto kom."

⁹ Tidew bénó, fénénginsaay de kuyugén ké ati atag i nan binuwaya. ¹⁰ Sénumbulo no bero mano, "Dob begome do kuyug gu, Tuluse i émfégétigane de begom fantag bé káféguléw ne bé de étewén. Endob i de ni éntingayén ménbunéy, brab énda émfayagén dob ségiyo. Enggelingoo ro say de ni fén-agéw dob de binuwaya, inok fiyon fo ké téngténgé ro, énda gito ro de. Brab fiyon fo ké gélingoo ro, énda gésobuto ro de.

¹¹ "Ay niy atag i ni binuwaya énggelingoo kom. I atag i ni béné, been i kóbéréh i Tuluse. Atin i ségiyo-giyo klasi fantad ségiléw bé de ségiyo-giyo klasi étew. ¹² I de dumoy de béné ménlawu dob doror i aguwone. I atag i ni, wén i de étew énggelingoo roy kóbéréh i Tuluse, éndob énggégumah i odoroy de saitan brab kénda noy ni kóbéréh dob de fédew ro. Been i nan i funa ruwe énda sémarij ro bé Tuluse. Brab énda mélaw gédoté roy mantuwe

umul. ¹³ I dumoy de béne ménsawér dob fantade, wén i do batéw de. I atag i ni, wén i de étew énggélungoo roy kébéréh i Tuluse brab tényakuf ro brab ménoror ro de. Endob énda ménbatién dob fédew ruwe. Sémarig ro bé Tuluse singkow saén. Endob buluk kérégénan ron, éndaén sémarig ro bé Tuluse. ¹⁴ I dumoy de béne ménsawér ro dob de duwaléy suwar. I atag i ni, wén i de étew énggélungoo roy kébéréh i Tuluse, éndob sabaf bé de kébuku ro fantag bé de kéuyag ro, brab kéuyot ruwe waléy kawasa, brab de kéuyot ro méguyaya, been i noy funa ruwe énda gérigo ro bé fatute kétayay Tuluse rigoné ro. ¹⁵ Atin i de dumoy de béne ménsawér ro dob fiyowe fantad. I atag i ni, wén i de étew énggélungoo roy kébéréh i Tuluse, brab toow fo nunuro ro. Féntaus roy késarig ruwe bé Tuluse atin rigoné roy kétayay Tuluse rigoné ro.”

¹⁶ Atin ménbéréh man i Jesuse mano, “Enda i témumon solo inok bunéyé no dob bukag i kurénge fénléngkéb, taloo no fédiyoé no dob fantad i katriwe. Yamula fédiyoé no dob fégongone de inok atiy mahure gito noy réndaw ne. ¹⁷ I kéluhanay bénunéye, giton moso. Brab i kéluhanay dirungéne, gétigan moso. Mélaw atiy éndae gésobuto kom béni, gésobuto kom moso.

¹⁸ “Komon féfiyo gom i kékéngélingo gome. Non i étewe mégélingo brab munur, méumanan nay kégésobut ne de. Endob i étewe énda munur, fiyon foy klohe fégitungé no gésobuto no, dotén dob beene.”

¹⁹ Tidew béno, ménangéy dob Jesusey idéng ne brab de tuwaréyén, éndob énda gégégedet ro non bé médoowe étew géliwét de. ²⁰ Brab wén i ménbéréhe dob Jesuse mano, “I idéng me brab de tuwaréyém diyo ro dob liyuwe. Méuyot ro géségit Beem.”

²¹ Endob séménumbul i Jesuse mano, “Wén i ségiyo idéng gu brab do tuwaréy gu, non bé kéluhanay étewe mégélingo bé de uret i Tuluse brab

munur de, beroy de maak idéng gu brab do tuwaréy gu.”

Féntéré Jesusey défuke

²² Sébaane de fuweh, ménda i Jesuse awang beroy de kuyugén atin bénréhén bero mano, “Mifar tom.” Mélaw ménangéy ro dob dogote ni. ²³ Amun diyo ro dob kérarae, énggfidong i Jesuse. Atin amun énggfidong, énggumah i émbagére défuk. Atin ménahuron wayég i awange, brab toow fo ménkakaidan ro. ²⁴ Tidew béno, téningé i de kuyugén i Jesuse atin nulég ro maro, “Kadnan, gédét tomén mééléd.” Mémentek i Jesuse brab nélénoy défuke atin féntanékén i de bagél. Tidew béno, ménlingénngén. ²⁵ Atin ménbéréh i Jesuse dob de kuyugén mano, “Hon i kékéngintoow gome de?”

Atin éngkéségyonan ro brab mágilak ro. Brab ménbéréh-béréh ro maro, “Ati ni étew Jesus? Fiyon i défuke brab de bagél gáfétérén no.”

Dénédél Jesusey de saitan

²⁶ Mélaw ménauts ro mifar démunggu mangéy dob fantade Geraseno, dob difar i Galileawe. ²⁷ Amun téménéfad i Jesuse, bénalak i étewe rénahukoy de saitan tidew dob sébaane ingéd diyo. I ni étew énda batién dob lawie, éndob ménrugayén félawas diyo bati dob de takub do lébéng. ²⁸⁻²⁹ Médoo gule i ni étew géméndam fiyon fo ké férisonén brab ikétén bé sangkaliey de sékéyén brab de kémérén. Been so ménfántud brab uwitéy de saitan mangéy dob gonone énda i étew de. Amun énggito noy Jesuse, ménkes toow fo métanug, brab ménélengkéb dob téngaanga Jesuse brab ménbéréh toow fo métanug mano, “Jesus, Nga i toowe fo gérotor Tulus, fégédaw-gédawu Beem. Kago fédawéton begén.” Bénréhén i no non féngganaya Jesusey démédéle bé de saitan réménahukon de.

³⁰ Fénénginsaa Jesuse mano, “Ati dawéti me?”

Atin séménumbul mano, “Laksaén i dawéti guwe.” Non toow fo médooy de

saitan ménahur dob beene. ³¹ Tidéw béno, ménfégédaw-gédaw i de saitan bé Jesuse bé békén damén dédélé no bero mangéy dob emfernowe.

³² Enda mérayuén dob no gonon, diyo i médoowe do babuy témastab dob méngulandige. Nongot i de saitan bé Jesuse ké fakay mahur ro dob de babuy. Atin ténungkas Jesuse bero. ³³ Sonom béno, i de saitan ménasut ro dob étewe brab ménahur ro dob de babuy ni. Atin i kéluhanay de babuy ni, ménraréy ro ménangéy dob fingase brab ménantéfor ro ménangéy dob dogote, atin ménléne ro.

³⁴ I de étew témalima bé de babuy ni, amun énggito roy ni ménrigo, ménsegéta ro brab nuret roy ni dob de dakél ingéd brab dob de ségiyo ingéd géliwét. ³⁵ Mélaw ménangéy diyo i de étew inok susiné roy ni ménrigo. Ménfégédét ro dob Jesuse brab énggito roy étewe bé gétaho félawas sénaitanan, ménasar gédét dob sékéy Jesuse wénén i kégalén, brab métintunén. Atin kéluhana ro mégilak ro de. ³⁶ Nuret i kéluhanay de énggégito de ké ati kêuwa Jesuse bé étewe ni gétaho sénaitanan. ³⁷ Tidéw béno, i kéluhanay de étew tidéw dob ingéde Geraseno, nongot roy Jesuse tékédan, non toow ro fo mégilak. Mélaw, ménada i Jesuse dob awange, atin ménékédan. ³⁸ I ségétewe ni étew ténkédanay de saitan, nongotén bé Jesuse mano, “Modoru Beem.”

Endob bénréh Jesuse de mano, ³⁹ “Ule go brab uretém i fiyowe rénigoy Tuluse dob beeme.” Mélaw ménule brab ménugud-sugud dob kéluhanay gonone dob ni ingéd brab nuretén i kéluhanay rénigo Jesuse dob beene.

Nuwa Jesusey ruwowe gétew libun

⁴⁰ Amun ménfégumah i Jesuse mifar, toow fo méoror i de étew de, non ongot-ongoté ro diyo. ⁴¹ Brab diyo wén i ségétewe étew fédawétén Jairo, ségétew sarigon dob lawie féngadafan kay de Judio. Ménélengkéb dob adafa

Jesuse bé ongoté noy mangéy i Jesuse dob lawi ne. ⁴² Non i buntunge ngaén libun folo bra ruwo gébelintuwa, gédétén méléhu. Mélaw ménagéw i Jesuse modor de.

Amun magéw i Jesuse sénribukoy de médoó étew. ⁴³ Diyo soy ségétewe libun kéfasangan non foloén bra ruwo gébelintuwa i kéranas i adat ne. Brab méntréy i kurta ne fénggabayadén bé de doktor, éndob énda foy ségétew géuwa de. ⁴⁴ Tidéw béno, ménfégédét dob ségang Jesuse, atin kénuwahén i kégal ne. Sonom béno, témenréni kéranas i adat ne. ⁴⁵ Tidéw béno, ménénginsa i Jesuse mano, “Ati kéménuhah Begén?”

Endob ménngidih i kéluhanane. Atin ménbéréh i Pedrowe mano, “Maistéro, toow fo médooy étewe géliwét Beem, brab sédantélo ro Beem.”

⁴⁶ Endob ménbéréh man i Jesuse mano, “Wén i kéménuhah Begén, non énggétérédama kuy barakat guwe ménasut tidéw dob Begéne.”

⁴⁷ Amun énggétigay libune ni énggétiga Jesuse, ménfégédét lémukub atin ménélengkéb dob adafa Jesuse brab dob téngaangay médoowe étew, brab bénréhén dob Jesuse sedek kénuwahén, brab bé béno so ménékow adi-adi. ⁴⁸ Tidéw béno, bénréh Jesuse de mano, “Di, i kéfengintoow mey funa muwe ménadi-adi. Taus go ule, brab kagonén émbuku.”

⁴⁹ Amun bérhéh Jesusey ni, énggégumah i sugu-sugué Jairowe. Ménbéréh mano, “Amu, déménigurén i nga me. Endaén kailanga no anggaén i Maistérōwa nan.”

⁵⁰ Endob amun énggelingoo Jesusey ni, bénréhén dob Jairowe ni mano, “Kago émbuku. Sarig go saén atin adi-adiy nga me.”

⁵¹ Amun énggégumah i ro Jesuse dob lawi Jairowe, énda i nuwitén mahur taus saliyu bé Pedrowe, brab Juane, brab Santiagowe, brab de lukés i ngae ni. ⁵² Atin i kéluhanay de étew ni dob lawie ni kémérew so brab ruungé roy ngae ni. Ménbéréh i Jesuse mano,

"Kagom kémérew. Non i ngae ni énda ménléhuén, éndob ménfidong saén."

⁵³ Tidéw béno, sénbayat ro saén i Jesuse non gétiga roy ngae ni ménléhuén. ⁵⁴ Endob génamak Jesusey kémér i ngae ni brab téabarén mano, "Di, tek go!" ⁵⁵ Sonom béno, i ngae ni méntébule brab tékow méntek. Atin sénugu Jesuse bero bé iraya ro amaé no. ⁵⁶ Toow fo ménggaif i de lukés i ngae ni. Endob bénréh Jesuse bero bé békén ureté ro dob de étew i ni ménrigo.

9

Sénugu Jesusey de folo bra ruwo kuyugén

¹ Fénsélimud Jesusey de folo bra ruwo kuyugén. Atin niraya no bero barakat inok géuwa roy de démeruun brab géféraréyo roy de saitan. ² Brab sénugu Jesuse bero muret fantag bé kéguléw i Tuluse bé de étewén, brab muwa bé de démeruun. ³ Atin bénréhén bero mano, "Kagom muwit éntingayén, fiyon fo ké tugé, taloo no réban, fiyon amaén, brab kurta, taloo no lékasa kom kégal. ⁴ Fiyon atiy lawie témayakuf begom, bati gom diyo taman tagaké kom i nan ingéd. ⁵ Buluk wén no ingéd énda tayakuféy de étew begom, tékédan gom diyo, brab tag-tag gom i de bubuk sébuwan dob de sékéy gom émfégétigan bé kukuméy Tuluse bero."

⁶ Tidéw béno, ménagéw i de kuyugén ni ménangéy dob de ségiyo-giyo ingéd muret bé Fiyowe Uret, brab muwa ro do démeruun diyo.

⁷ Bé béno, i Herode, sani méguléwe dob Galilea, énggelingoo noy de rigoné Jesuse. Toow fo ménggaif brab énda gésobuto no de, non wén i de étew ménréh ro bé Juan Bautistawé méntébule non maro ké Juan i Jesuse.

⁸ Brab i de dumo béréhé roy Jesuse Elias méntéfígito. Brab i de dumo béréhé roy Jesusey toowe fo énggétah sénarigoy Tuluse muret méntébule.

⁹ Endob ménréh i Herode mano, "Fénkéleng guy uléw Juane. Endob

ati ni gélingoo ku fantag bé de ni?" Méuyot de ké gito noy Jesuse.

Fénwaléy Jesuse médooy klohe amaén.

¹⁰ Amun énggéséfule i de apostol Jesus, bénréh roy de rénigo ro. Tidéw béno, nuvitén bero saén mangéy dob sébaane ingéd féndawét Betsaida. ¹¹ Médooy de étew énggégélingo fantag bé ni brab ménfuray ro bero. Méoror i Jesuse bérégito nuwe bero, brab nureté bero fantage bé kéguléw i Tuluse bé de étewén. Fén-adi-adi né soy de démeruun bero.

¹² Amun sémingkufén, i de folo bra ruwo gétew kuyug Jesuse ménangéy ro dob Beene brab ménbérén ro maro, "Enda i batioy de étew ni dini. Féagéwém bero inok mangéy ro dob de ingéd gédét dini. Diyo gébéléy ro amaé ro brab diyo ro so fidong."

¹³ Endob ménbérén i Jesuse dob de kuyugén mano, "Iraya kom bero amaé ro."

Endob séminumbul ro maro, "Enda i amaén dini saliyu bé limowe timan fan brab ruwo timan sédo. Hon i ayo tome de méléy amaén bé ni kédoo étew?" ¹⁴ (Wén i limo ngibu do lagéy diyo.)

Atin bénréh Jesuse bérégito de kuyugén mano, "Féésar gom i de étew sélimo folo sénga sélumfuk."

¹⁵ Atin nodoroy de kuyugén i bénréh Jesuse bero. ¹⁶ Tidéw béno, édot Jesusey limowe timan fan brab ruwowe timan sédo, atin léménéngag dob lawayo brab ménfésalamat dob Tuluse. Tidéw béno, sénbaad-baadén i de fan brab de sédo, brab nirayén dob de kuyugén inok saaré ro dob de étew. ¹⁷ I kéluhanay de étew ménama ro médooy taman ménbésor ro. Tidéw béno, térimu i de kuyug Jesusey de sama i de amaén brab ménfeno i foloe bra ruwo timan dakél biton.

Ikéunur Pedrowe

¹⁸ Wén i no, i Jesuse ségétewén saén démasal ménfélébu. Brab i de kuyugén ménangéy ro dob Beene. Atin fénénginsaa Jesuse bero mano,

“Ati kékéréh i de médoó étew ké ati Begéne ni?”

¹⁹ Séménumbul ro maro, “Wén i de émbéréh maro, Juan Bautista go kun. I de dumo maro, Elias go kun. Brab i de dumo maro, Beemey énggétahe sénarigoy Tuluse kun méntébule.”

²⁰ Tidéw béno, ménénginsa i Jesuse man mano, “Dob begome, ati kékéréh gome ‘fantag bé Begéne?’ ”

I Pedrowe séménumbul mano, “Beemey Kristowe sénugu i Tuluse inok méguléw go bé de étew.”

²¹ Atin bénréh Jesuse bero mano, “Kagom bérhéhni i ni dob ségiyowe.”

I kékuret Jesuse fantag bé kéléhu ne

²² Atin féntaus Jesusey kékéréh ne mano, “I Nga i Kéilawane, sani Begéne, médooy rasayé kuwe. Brab ikaay de odoroy de Judio brab de odoroy de fadi brab de témore bá kitabe, brab féléhué ro Begén. Endob dob gétéléwo nuwe gétérésangan, tébuleu.”

²³ Atin ménbéréh man i Jesuse mano, “Buluk atiy méuyote furay Begén, kailangan diguré noy kaane kétayan inok odoro noy kétay Tuluse. Tidéw béno, kailanga no fédayday bá de kérégénon ségiléw bá Begéne, fiyon fo ké féléhuén dob kruse. ²⁴ Non atiy méuyote émféraru bá kéuyag ne, méléhu. Endob i méléhue bá kéfuray ne Begén, gédoté noy umule magufusa. ²⁵ Ufama, fiyon fo ké i ségétewe étew gédoté noy kéluhanay éntingayéne dob duniyae ni, énda i atagén buluk méléhu atin mangéy dob emfernouwe. ²⁶ Buluk atiy mémalawe muret fantag bá kénur ne Begén, brab mémala so fantag bá de kékéréh gu, malané ku so buluk séfuleu moso réméndawu brab réméndaw i Boh guwe brab de téliko no. ²⁷ Bérhéh ku begom i toowe, wén i do dumo begom énda méléhu ro taman gégiton bá kékéguléw i Tuluse bá de étewén.”

Enggiton i réndaw Jesuse.

²⁸ Waléw gétérésangan tidéw bá kékéréh Jesuse bá de ni, nuwitén

i Pedrowe, brab Juane, brab Santigowe, atin ménangéy ro dob rotor i tuduke démasal. ²⁹ I lala Jesuse démasal, i falas ne ménfégalin, brab i kégal ne ménwaléy fute réméndaw. ³⁰ Sonom béno, méntékow méntefigitoy ruwowe gétew lagéy ménsébéréh bá Jesuse. I ni do étew, been i Moisese brab Eliase, sani do méntelataén sénarigoy Tuluse muret bá kékéréh ne. ³¹ Réméndaw soy de falas ro. Atin sébéréh-béréh ro bá Jesuse fantag bá kéléhu ne dob Jerusalem moso sabaf been i funay Tuluse séménugu de dob duniyae. ³² I Pedrowe brab dumo nuwe énggfidong. Endob amun énggétékénal ro, énggito roy kéréndaw Jesuse brab de ruwo gétew dumo no téménindég. ³³ Amun féganayén tagak i de ruwo gétew étew i Jesuse, sénbérého Pedrowe mano, “Maistéro, toow fo fiyo non dob ni tom. Rémi gey télew timan dung-dung. Sébaan i kaame de, sébaan i ka Moisese de, brab sébaan i ka Eliase de.” (Enda gétiga noy bérhéh nuwe ni.)

³⁴ Amun émbéréh sénay Pedrowe, méntékow i rawéne méntégalung dob berowe. Brab ménggilak i de kuyugén ké météléb ro bá rawéne. ³⁵ Atin wén i bérhéhe tidéw dob rawéne ni mano, “Been i niy Nga guwe fénemili gu. Fégélingo gom.”

³⁶ Amun téménréni i bérhéhe ni, énggito roy sébaa Jesuse saén. I de kuyugén méntanék ro fantag bá ni, brab bá béno énda i ségétew nureto ro bá de énggito ro.

³⁷ Bé sébaane de fuweh, léménudug ro tidéw dob tuduke, atin bénalak i médoowe étew i Jesuse. ³⁸ Wén i ségétewe lagéy dob kérara ruwe téménabar mano, “Maistéro, téngténgém i nga guwe. Been i buntunge nga gu lagéy. Ongoté ku dob Beeme uwaé mo damén. ³⁹ Wén i no rahukoy saitane, atin tékow gékes. Atin i lowoh ne témingkog brab rémbew i ba ne. Sénga tékélid gémédam, fédawéto no, brab mérugay na fo tékédanay saitane. ⁴⁰ Nongot gu bá de kuyugém

ké feféraréyé roy saitane, éndob énda gagané ro de.”

⁴¹ Ménbéréh i Jesuse dob de ménlimud mano, “Enda sémarig gom bé Tuluse, brab toow gom do tete étew. Lugoténun sétafik begom. Enda gétiga ku ké ati nay kérugay i kétungkél guwe sétafik begom.” Atin bénréh Jesuse dob ni lagéy mano, “Uwitém diniy nga ma nan.”

⁴² Amun fégédét i ngae ni dob Jesuse, rénahukoy saitane man brab méntuwar fulad-fulad. Tidéw béno téméningkog man. Atin fénféraréy Jesusey saitane, brab i ngae ni ménadi-adi. Tidéw béno, fénséfule Jesuse man mangéy dob boh ne. ⁴³ Ménggaif i kéluhanay de étew bé barakat i Tuluse. Atin amun kéluhanay de étew ménggaif ro bé no rénigo Jesuse, ménbéréh dob de kuyugén mano, ⁴⁴ “Kagom lifotén i béréhé kuwe ni begom. I Nga i Kéilawane, sani Begéne, fékéfo séko bé de étew sébanil Begén.” ⁴⁵ Endob bé béno gai, i de kuyugén énda énggésobuto roy béréhé nuwe. Bénunéyén bero inok énda gétiga roy atag ne. Atin mémala ro de ménginsa ké ati atag ne.

⁴⁶ Wén i no sébaan fuweh, méniséédél i de kuyugén ké ati isuwe bero toow gérotor. ⁴⁷ Enggésobuto Jesuse ké atiy diyoe dob itunga ruwe. Mélaw éndotén i ségétewe nga atin féntindégén dob tébing ne. ⁴⁸ Atin bénréhén bero mano, “Fiyon atiy étewe témayakuf bé ngae loo bé ni sabaf bé kéunur ne Begén, tayakufé no so Begén. Brab atiy témayakufe Begén, tayakufé no soy Tuluse ménféuwt Begén. Non atiy toowe térfantad bé begome, beeney toowe gérotor.”

⁴⁹ Tidéw béno, ménbéréh i Juane mano, “Maistéro, énggito gey i ségétewe étew démédél do saitan nusarén i dawét me fégéféraréyén. Endob génlé gey non békén dumotom.”

⁵⁰ Bang Jesuse, “Kagom géléén de. Non i békéne sébanil betom, dumotom.”

I kénégo Jesuse mangéy Jerusalem

⁵¹ Amun gédétén i Jesuse démiyat dob lawayo, bénabaén fo ménasaréw mangéy Jerusalem. ⁵² Mémentah i Jesuse séménugu bé de kuyugén mangéy dob sébaane ingéd dob sakuf i Samari-awe inok tafaya ro gono no diyo.

⁵³ Endob i de étew diyo dob Samaria, énda témayakuf ro de non gétiga ro ségétew Judio mangéy Jerusalem. ⁵⁴ I Santiagowe brab Juane, amun énggito roy ni, ménbéréh ro maro, “Kadnan, méuyot go de ké mongot gey aféy tidéw dob lawayo inok métuwégo?”

⁵⁵ Endob séménling i Jesuse atin génléen bero. ⁵⁶ Tidéw béno, mémentau ro mangéy dob ségiyowe gonon.

⁵⁷ Amun taus ro néen, i ségétewe étew ménésbéréh bé Jesuse mano, “Modoru Beem, fiyon fo ké ati ayo muwe de.”

⁵⁸ Séménumbul i Jesuse mano, “I de kufés, wén i tosong ahuro ro. Brab i de kloh manok, wén i salag ro. Endob i Nga i Kéilawane, sani Begéne, énda i gono ku témérén. Mélaw toow go fo kérégénan amuk modor go Begén.”

⁵⁹ Atin bénréhén dob ségiyowe étew mano, “Furay go Begén.”

Endob séménumbul i ni étew mano, “Kadnan, tungkasém na begén métah mangéy lémbéng bé boh guwe.”

⁶⁰ Séménumbul i Jesuse mano, “Félébéngém bé de étew énda munur ro Begén i de ménléhu ro. Endob i beeme, agéw go mangéy muret fantag bé kéféguléw i Tuluse bé de étewén.”

⁶¹ Wén man i ségiyowe étew ménbéréh mano, “Kadnan, modoru Beem. Endob tungkasénu na mangéy mégétaw dob de lukés gu.”

⁶² Séménumbul i Jesuse mano, “Enda i ségétew étew démadu atin sémeling. Loo so bé de kuyug gu. Buluk sémeling ro, énda métotor ro ké féguléwoy Tuluse bero.”

10

Sénugu Jesusey de étew

¹ Tidéw béno, ménémili i Jesuse fitéw folo bra ruwo gétew do lagéy. Atin sénuguén bero séruwo-ruwo métah dob

de ingéd ayo no so. ² Atin bénréhén bero mano, "Wén i médo do étew méuyot munur bé Fiyowe Uret. Ségiléw ro bé de buka kétewén. Endob kloh saén i begome do kémétew. Dasal gom dob Kadnane inok émféuwt médo na do kémétew dob kaane ni kétewén. ³ Amuk magéw gom, ingat gom. Non féuwt gu begom maak do bili-bili mangéy dob kérara i de itu talun. ⁴ Kagom muwit réban, taloo no talufi, taloo no ségiyo sinilas. Brab kagom mérugay séuret-uret bé atiy étewe gébalaka kom dob de aguwon. ⁵ Buluk mahur gom dob de lawi, béréh gom féfiyonéy Tulusey de étew bati dob ni lawi. ⁶ Buluk i de étew dob no bati fiyo, brab tayakufé ro begom do sénugu gu, féfiyonéy Tuluse bero. Endob buluk énda fiyo ro étew, brab énda tayakufé ro begom do sénugu gu, énda so féfiyonéy Tuluse bero. ⁷ Bati gom dob no lawi témayakuf begom. Atiy amaéne brab inéméne iray ro begom, tanggaf gom. Non i begome do gémalbék kailanga kom i sukay gome. Brab kagom téfégalin tidew dob sébaane lawi mangéy dob sébaane de. ⁸ Buluk mahur gom dob sébaane ingéd, brab témayakuf ro begom, ama gom i éntingayéne iray ro begom. ⁹ Uwa gom i de démériun dob no ingéd brab béréh gom dob de étew diyo makom, 'Endaén mérugayén taman bé gaiwe féguléwoy Tuluse begom.' ¹⁰ Endob buluk mangéy gom dob sébaane ingéd brab énda tayakufé ro begom, angéy gom dob de aguwon dob no ingéd brab béréh gom makom, ¹¹ 'Fiyon foy de bubuk sébuwan dob de sékéy gey, tag-tagé key so inok gétuwa kom i kukuméy Tuluse begom non nuret gey dob begomey fantage bé kékéfugléw i Tuluse éndob mika gom de.' ¹² Atin béréhé ku begom, bé no gai, toow na fo géttimal i kékukum i Tuluse bé de étew dob no ingéd bé kékukum ne bé de tete étew dob ingéde Sodom.

¹³ "Mékégédaw-gédaw gom do étew bati dob Korasin, brab begome dob Betsaida. Buluk i de mékégaif rénigo

gu dob begome ménrigo so dob de ingéd Tiro brab Sidon, ménrugayén i de étew diyo mésar ro brab kéménégal ro do saku brab rénigono ro do awéw i de lowoh ro inok fégétuwa ro énggésénule ro bé de sala ro. ¹⁴ Endob toow na fo géttimal i kékukum i Tuluse begom moso bé kékukum ne bé de étew dob Tiro brab Sidon. ¹⁵ Brab i begome do étew dob Kafernaum, méuyot gom téfégérotor taman dob lawayo. Endob ibérén gom mangéy dob uleone emferno."

¹⁶ Tidew béo, bénréh Jesuse dob de kuyugén mano, "Atiy mégélingoe begom, fégelingoe no so Begén. Brab atiy mikae begom, mika so Begén. Brab atiy mikae Begén, mika so bé Ménfieuwite Begén."

¹⁷ Tidew béo, i fitéwe folo bra ruwo gétew ménagéw ro mangéy muret dob de ségiyo-giyo ingéd. Atin ménséfule ro toow fo moror brab ménbéréh ro maro, "Kadnan, fiyon foy de saitan odoro roy de béréhé key buluk labité key i dawét me."

¹⁸ Atin bénréh Jesuse bero mano, "Enggit guy Satanase ménlawu tidew dob lawayo maak kilot. ¹⁹ Niraya ku begom barakat inok fiyon fo ké gédaa kom i de ulé brab do sifitan, énda i kaid gom de. Brab i kéluhanay barakat Satanase sébanil betom énda i kaid tom de. ²⁰ Endob kagom méoror sabaf sa bé i de saitan unuro ro begom. Yamula oror gom sabaf ménslatén i de dawét gom dob lawayo."

²¹ Bé béo so, fénoror i Rémogor i Tulusey Jesuse. Déménasal mano, "Abay Kadnay lawayo brab fantade, fésalamata ku Beem non fénggétiga moy ni dob de étew énda i féngganad ro, éndob bénunéyém dob de métileédé brab énggégéganad. Hoo Abay, ménrigoy ni non kaam kétayan brab késuwanan."

²² Tidew béo, ménbéréh man i Jesuse dob de étew mano, "Sénarig i Abaye Begén i kéluhanane. Enda i géttigan bé atiy Ngae saliyu bé Abaye. Brab énda i géttigan bé atiy

Abaye saliyu bé Ngae, brab fiyon atiy kétayay Ngae fégétigan no de.”

²³ Tidéw béno, séménling i Jesuse dob de kuyugén ménsébéréh bero énda i ségiyo dumo ro mano, “Toow fo fénfiyoy Tuluse begom bé énggégito gom. ²⁴ Béréhé ku begom, dob gétaho médoor do datu brab do sénarigon muret bé kékéréh i Tuluse ménuyot ké gito roy énggito gome, éndob énda énggito ro de. Brab ménuyot ro mégélingo bé énggelingoo kome, éndob énda énggelingoo ro de.”

I binuwayaé fantag bé mágédawé étew

²⁵ Wén i no sébaan fuweh, i ségétewe téromo bé kitabé ménangéy dob Jesuse. Atin ténukawa no fénénginsaan i Jesus mano, “Maistéro, ati fatute rigoné ku inok gédoté kuy toowe umul magufusa?”

²⁶ Séménumbul i Jesuse mano, “Ati énggito muwe dob Ménslate Kékéréh i Tuluse? Ati kégésobut me de?”

²⁷ Séménumbul i ni lagéy mano, “Féimu go bé Kadnane Tulusém bé kéluhanay fédéw me, brab bé kéluhanay kamatu me, brab bé kéluhanay itunga muwe, brab bé kéluhanay bagér me. Brab féimu go bé kéluhanay de dumo mo ringon so bé kéimu me bé kaame lowoh.”

²⁸ I Jesuse ménbéréh mano, “Katabuwan i nan késumbulém. Rigo moy ni inok gédoté moy tintuwe umul.”

²⁹ Endob i ni lagéy miká kékalan. Mélaw ségiyo néen man i fénénginsa ne mano, “Endob ati dumo guwe fatut féimué ku?”

³⁰ Atin séménumbul i Jesuse bé ni binuwaya mano, “Wén i no sébaan fuweh, i ségétewe lagéy bé de Judio ménagéw tidéw Jerusalem léménudug mangéy dob ingéde fédawét Jeriko. Amun diyoén dob de agéwon, ténulis i de tulisan. Lénubag ro, brab éndot roy éntingayéne kaan loo soy kégal ne. Brab ténagak ro gédétén méléhu.

³¹ Tidéw béno, ménagumah i ségétewe fadi bé de Judio. Amun énggito noy

ni lagéy, ténaraa no saén, atin méntau magéw. ³² Tidéw béno, ménagumah i ségétewe témabang dob de fénadafan, brab i beene Judio so. Amun énggito noy ni lagéy, fénagédéto no brab ténéngténgén singkow, atin méntau so magéw. ³³ Tidéw béno, i gétéléwe étew ménagumah. Endob békén Judio ni étew. Beeney étew tidéw dob ségiyowé ingéd fénadawét Samaria. Amun énggito noy ni lagéy ménfali, ménuray i éna nuwe de. ³⁴ Fénagédéto no brab nuwaén i de falién brab bénauén. Atin fénkudaén i ni lagéy dob kuda ne brab nuwitén dob sébaane lawi kay de kana inok diyo fétausé noy kékagifat ne de. ³⁵ Dob gétunduge de fuweh, niraya no kurta i gefee bé ni lawi, brab bénréhén de mano, ‘Fagifatém i ni lagéy. Buluk kulang i ni kurta, bayada ku beem ké séfuleu.’”

Amun énggilid Jesuse nuret i ni binuwaya, fénénginsaa noy ségétewe ni téromo bé kitabé mano,

³⁶ “Ati karang me de, ati isuwe bé de télaw ni gétew étew i tintuwe dumoy ni lagéy ténulis?” ³⁷ Séménumbul i ni maistéro mano, “I ségétewe ménagédaw de.”

Atin i Jesuse bénréhén dob ni lagéy mano, “Rigo mo loo bé rénigoy ni étew ménagédaw.”

³⁸ Amun diyo i Jesuse brab de kuyugén dob de aguwo ro, énggégumah ro dob sébaane ingéd. Diyo i ségétewe libun fédawétén Martah. Atin ténayakufén bero dob lawi ne. ³⁹ Wén i tuwaréy ne so libun fédawétén Maria. Ménstar gédét dob sékéy Jesuse brab mégélingo bé de toroé no. ⁴⁰ Ménbuku i Martahe bé kéluhanay de galbékén témogoh, mélaw ménfégédét dob Jesuse ménbéréh mano, “Kadnan, émbuku go damén non i tuwaréy guwa nan fédayaé no begén gémalbék. Suguém inok tabanga no begén.”

⁴¹ Séménumbul i Jesuse mano, “Martah, toow fo ménbuku go bé médoowe galbékém. ⁴² Endob sébaan saén i fiyowe kailangan rigonén. Fénemili

Mariawey fiyowe de. Brab énda médotén dob beene."

11

I dasal i Kadnane

¹ Wén i no sébaan fuweh, amun énggilid i Jesuse démasal, i ségétewe bé de kuyugén ménbérél mano, "Kadnan, i Juan Bautistawe téneroén i de kuyugén démasal. Toroén gey so démasal."

² Séménumbul i Jesuse mano, "Amuk démasal gom, dasal gom loo bé ni: 'Abay, kéluhanay étewé damén féngadafé ro Beem. Féguléwo mo damén i kéluhanay de étew. ³ Irayan gey amaé key sénga fuweh. ⁴ Fésagada mo begey bé de sala gey loo so bé káfesagada keye bé de énggésala begey. Atin kago fédayaén begey météngkad rémigo sala.' " ⁵ Féntaus Jesusey kékérél ne mano, "Ufama, i ségétewe begom wén i dumō no brab ménangéy go diyo bé kérara kélungonone brab ménbérél go mamo, 'Adih, fégédawanu. Irayanu télén timan fan. ⁶ Non wén i kana gu mantu séna ménggumah brab énda i féama gu de.' ⁷ Atin sémumbul i ni dumō mo mano, 'Kago anggaén begén. Ménfintuén i de bengawa key, brab fidongén i de nga gey. Enda gééteku brab iray gu beem i nan ongoté mo.' " ⁸ Féntaus Jesusey kékérél ne mano, "Gétiga ku amuk démayday go mongot, iraya no beem bé ongoté muwe. Békén miray sabaf bé dumō muwe, yamula sabaf bé énda mémala go mongot. ⁹ Mélaw bérélhé ku begom, ongot gom dob Tuluse, atin irayén begom. Ay gom dob Tuluse amuk wén i kailanga kom, atin tabanga no begom. Dasal gom dob Tuluse atin sumbulo no begom, non buluk wén i mongot dob Tuluse bé éntingayéne, iray i Tuluse. ¹⁰ Buluk wén i fégédét dob Tuluse bé de kailanga no, tabangay Tuluse de. Buluk wén i démasal dob Tuluse, sumbulo no. ¹¹ Ufama, ségétew go boh, atin i nga me mongot sédo, énda iraya mo de ulé. ¹² Taloo no mongot

onok manok, énda iraya mo de sifitan.

¹³ Fiyon fo ké tete gom étew, gétiga kom soy miraye bé éntingayéne fiyo dob de nga gom. Labi nay Tuluse toow fo fiyo, gétiga noy miraye fiyo na begom. Beeney Boh gome dob lawayo, brab irayén i Rémogor ne dob de étew mongot de."

¹⁴ Wén i no sébaan fuweh, dénedél Jesusey saitane mow ménahur dob ségétewe étew. Amun i saitane ni méntékédan, énggérél i étewé ni rénahuko no. Atin i de ménlimud do étew ménggaif ro de. ¹⁵ Endob i de dumō bé de ménlimud ménbérél ro maro, "Beelsebul, sani Satanasse, i odoroy de saitan, i ménirayane de barakat inok tékédan."

¹⁶ Brab i de dumō bé de étew ténu kawa roy Jesuse bé kéongot ruwe de bé féténgtengén i fégélonone de tidew dob lawayo, inok gétiga ro tidew dob Tuluse. ¹⁷ Endob énggétiga Jesusey de itunga ro, mélaw ménbérél mano, "Ufama, i ingéde énda séfagayun ro brab sétiboh ro, mébinasa. Taloo no i ségékuréngé étew dob sébaane lawi énda so séfagayun ro brab sékérít ro, waléy mébinasa. ¹⁸ Buluk i de sugu-sugué Satanas mésébaad énda géséfagayun ro, énda so gétindég i fangangatura nuwe. Bénréh guy ni non bérélhé kom i démédélu saitan bé barakat Satanase. ¹⁹ Atin i fégédédél i de kuyug gom de, énda usaré roy barakat Satanase. Mélaw fégítot de kuyug gom békén ka Satanas i barakat guwe. ²⁰ Endob démédélu saitan bé barakat i Tuluse. Atin mélaw énggiton énggumah dob begomey gaiwe méguléw i Tuluse bé de étewén."

²¹ Tidew béno, féngétiga Jesuse bero bé toow na fo barakatan bé Satanase mano, "Ufama, i Satanase ségiléw bé ségétewe mantay bé lawi ne. Buluk i émbagére étew bantaya noy lawi ne, brab wén i kulangé no, i de insodén énda i géfénakaw de. ²² Endob buluk gérumah i ségiyowé étew toow na fo émbagér bé gefee lawi, gédoté noy kulangé nuwe sarigoy gefee de. Atin gédoté no soy

kéluhanay languntamane dob lawi ne brab baade noy kéluhanay de éndotén.

²³ “I éndae modor Begén, sébanil Begén. Brab i mikae sétabang Begén, alangé no Begén.

²⁴ “Buluk i saitane mésut tidéw dob étewe rénahuko no, sémugud dob tikare gonon séméléd téreño no. Endob buluk énda i gito no téreño no, émbéréh mano, ‘Séfuleu dob étewe sungu gono ku té nagak gu.’ ²⁵ Tidéw béno, séfule brab gito noy tafaye ténidéwo no mélinis brab métintu nén. ²⁶ Tidéw man béno, mésut brab muwit fitew gétew mas na tete saitan dumo no mahur dob no étew. Mélaw i no étew toow na fo méfasang bé féganaye goho no.”

²⁷ Amun bénréh Jesusey ni, i ségétewe libun tidéw dob de ménslimud ménbérédh mano, “Toow fo méoror i libune ménggenga Beem brab réméniton Beem.”

²⁸ Endob ménbérédh i Jesuse mano, “Toow na fo méoror i de mégelingo bé kékérédh i Tuluse brab odoro ro.”

I fégéolonone niray Jonase

²⁹ Amun i de étew minut ro mèdoo ménlimud géliwé bér Jesuse, ménbérédh mano, “Toow fo tete i de étew bé ni gai. Mongot ro do mèkégaif inok fégéoloné ro kér Begén i Kristowe, sani fénémili i Tulus méguléw. Endob énda i méiray de bero saliyu bé mèkégaife loo bé ménrigowe bé Jonase. ³⁰ Loo bé fégéolonone nirayén dob de étew dob Ninibé amun ménusut i Jonase méuyag tidéw dob sur i dakéle sédo, iraya ku séko fégéolonon i de étew bé ni gai. ³¹ Bé gaiwe kémukum i Tuluse, témbo i baiwe tidéw dob ingéde Séba bé de étew méuyag béri. Non sénugudén tidéw dob tamanay duniyae mégelingo bé kégétiga Solomone. Endob béléewe ni wén i ségétewe mas na gétigan bé Solomone ay ni, been i Begéne, éndob énda munur gom Begén. ³² Atin bé gaiy kékukum i Tuluse, i de énggétah étew dob Ninibé témindégi ro so témbo bé de étew méuyag béléewe. Non ménunur ro brab énggésénule ro bé

uret Jonase. Endob béléewe wén i mas na gérator bé Jonase ay ni.

³³ “Enda i ségétew témumon solo atin fédioé no dob énggébunéye taloo no dob fantad i kuréngé fénléngkéb. Yamula fédioé no dob fégone de inok atiy gégumahe étew gito noy réndaw ne. ³⁴ I moto muwe maak solo i lowoh me. Buluk fiyoy moto muwe, maak gégékaya non gégito go. Endob buluk i moto muwe ménasdi, maak délémon non énda gégito go. ³⁵ Ingat gom mélaw inok i réndawe dob beeme békén waléy délémon. ³⁶ Mélaw buluk tintu munur go, i lowoh me maféno bé gégékaya, brab énda i délémon de, non maak rémendaw i soloe dob beeme.”

Fantag bé de Fariseo

³⁷ Amun énggilid i Jesuse émbéréh, i ségétewe Fariseo sénéngkatén mangéy mama. Mélaw ménodor i Jesuse mangéy dob lawi ne brab ménas diyo mama. ³⁸ Amun énggito noy Jesuse énda méngguseén loo bé adat i de Judio, mènggaif i Fariseowe ni.

³⁹ Bé bér so, ménbérédh i Jesuse mano, “I de begom do Fariseo, urahé kom i lowoh gome fingé fuweh saén. Endob dob de fédew gom ménfeno bé tetee itungan brab do sala. Ségiléw gom bé de tabu ménlinis fingé fuweh saén, éndob dungisan dob bukag ne. ⁴⁰ Dufang gom do étew. Békén ba rénigoy Tulusey de fédew gom loo soy de lowoh gom? ⁴¹ Mélaw iray gom do limus bé éntingayéne kagom atin waléy gom mélins dob bukage so.

⁴² “Endob mèkégédaw-gédaw gom do Fariseo non niraya kom i Tuluse fiyon bé géfoloe bé de faninu nohok gom, éndob dénígur gom i métintuwe brab kémue bé Tuluse. I ni niray gom fatut rigoné kom éndob kagom digurén i sébaane de.

⁴³ “Mèkégédaw-gédaw gom do Fariseo non méuyot gom bé fiyowe do saran dob lawie fengadafan. Brab méuyot gom ségifaén fégadatan dob de fadiyan. ⁴⁴ Mèkégédaw-gédaw gom non i de étew marok waléy ro fiyo

bé kéfuray ruwe begom, éndob been i funa ruwe waléy tete. I begome maak do lébéng énda i tandaén, gédáay de étew énda gétiga ro de, funa ro gélyén.”

45 Atin i ségétewe bero téromo bé de kukuman ménbérél mano, “Maistéro, bé kékérél me bé nan, fénémala mo so begey.”

46 Séménumbul i Jesuse mano, “I begome téromo bé kitabe, mékégédaw-gédaw gom, non sugué kom i de étew bé médoowe. Maak féoboé kom bero do toow fo émbégaat, éndob énda tétabang gom de. **47** Mékégédaw-gédaw gom non ségiléw gom bé de katufua kom énda munur ro bé de sénarigoy Tuluse muret. Rémigo gom fiyo do lébengon kay de fénléhu i de katufua kom. **48** Mélaw fénggétiga kom i ménagayun gom bé rénigoy de katufua kom non beroy do ménméléhu brab begom i do rémigo do lébengon.

49 Been i funane ménbérél i Tuluse bé kégétiga nuwe mano, ‘Fén-uwito ku bero do muret fantag Begén, brab i de dumo de fénrasay ro bero.’

50 “Been i funa kome mékukum, non ménamung gom bé kékélhue bé de kéluhanay sénarigoy Tuluse muret tidew bé kéklimbag i duniyae. **51** Tidew bé kékélhue Abele taman bé kékélhue Sakariase, fénléhu dob élét i ahayane féngadafan tulakan brab mékétéfuwe sibéy. Hoo, béréhé ku begom i de étew méuyag béri, mékukum ro sabaf bé de ni.

52 “Mékégédaw-gédaw gom do téromo bé kitabe, non bénunéy gom i toowe dob de méuyot gétigan de. Brab mika gom munur bé toowe, atin anggaé kom i de méuyot munur.”

53 Amun énggilid i Jesuse bé kékérél ne, méntékédan dob no gonon, éndob i de Fariseo brab de téromo bé kitabé nangga ro bé de mékérít kéríklamo ro brab médoó éntingayén fénginsaé ro **54** tukawa ro téngkadén inok sumbulo no bero bé bekéne damén katabawan.

12

1 Amun i ngibunéne do étew

ménsélimud géséeda ro do sékéy, féngganay Jesusey béréné nuwe bé de kuyugén sungu mano, “Ingat gom inok énda miring gom bé kénur i de Fariseo ubo-ubo saén. **2** I kéluhanane rénigoy de étew maak ténléb, mébukeh séko. Brab i kéluhanane dirungén, émfayag séko. **3** Atiy béréné muwe dob kélungonone, gélingoon so dob fuwehe. Brab atiy ségurawé muwe dob gonone fénintu, been so gélingoon dob médoowe do étew.

4 “Béréné ku begom do dumo gu, kagom mégilak bé géfélhue bé lowoh gome, éndob saliyu bé ni éndaén i gérigono no. **5** Béréné ku begom i ati fatute kégilaka kom. Fégilak gom bé Tuluse non géféléhu noy lowoh gome brab wén soy barakatén émféangéy begom dob emfernowe. Hoo, béréhé ku begom fégilak gom de.”

6 Atin ménbérél man i Jesuse mano, “Ufama, i de kloh manok toow fo mélému kékébéléye bero dob fadiyane. Endob énda i sébaan de lénifot i Tuluse. **7** Atin i begome mas gom na balilaga bé de kloh manok. I Tuluse énggétuwa no fiyon firoy i de buk gom dob de uléw gom. Mélaw kagom mégilak.

8 “Béréné ku begom, ati murete fantag bé kénur ne Begén dob de étew, ureté ku soy fantage bé kénur ne dob adafay de télikiy Tuluse. **9** Endob atiy démirunge Begén dob adafay de étew, dirungé ku so moso dob adafay de télikiy Tuluse.

10 “Atiy émbéréhe tete fantag bé Nga i Kéilawane, sani Begéne, émfésagadan. Endob i émbéréhe tete fantag bé Rémogor i Tuluse énda émfésagada no.

11 “I de sébanil Begén, buluk uwité ro begom dob de féngadafan taloo no dob de gémamak kukuman, inok métébo gom sabaf bé kénur gome Begén, kagom mégilak taloo no émbuku ké ati késumbul gome. **12** Non i Rémogor i Tuluse toroé no begom ké atiy fatute béréné kom.”

*I binuwayaé fantag bé kawasawe
étew*

¹³ Wén i médoowe ménslimud géiwét bé Jesuse. Ménbéréh i ségétéwe de dob Jesuse mano, “Maistéro, béréméh bé ofo guwe, irayén begén i baad guwe bé de languntaman fénled i boh geye begey bé kéléhu ne.”

¹⁴ Séménumbul i Jesuse mano, “Enda i atura ku de maad ké ati séfiroy begom.” ¹⁵ Atin ménbéréh i Jesuse dob de étew mano, “Kagom arumén! Békén bé kékawasawey funay étewe fiyoy kéuyag ne.”

¹⁶ Atin nureto Jesuse bero sébaan binuwaya fantag bé ségétéwe étew kawasa mano, “Wén i safadén, fiyoy kéeruk i de nohok-nohokén.” ¹⁷ I kawasawe étew ménngitung, ‘Enda i fégono ku bé kéluhanay kentew guwe. Ati rigoné kuwe? ¹⁸ Gétuwa ku, ay ni rigoné kuwe. Gébaé kuy kiwot guwe, brab rémigowu bé dakéle de, inok gétimuo kuy de kentew gu brab de éntingayén kagén.’ ¹⁹ Tidew bénou, ménngitungu, Ségetéwu bagian. Wén i kagéne bé éntingayéne fiyo kailanga ku bé firoye gébelintuwa. Témérénu. Mamau, minému, brab ménugayau.’ ²⁰ Endob i Tuluse bénrého noy ni étew mano, ‘Dufang go! Bé ni kélungonon, méléhu go. Mélaw békénén kaam i éntingayéne nitongém.’”

²¹ Atin féntama Jesusey ni binuwaya mano, “Ségiléw bé niy aruméne kawasa étew énda modorén bé kétayay Tuluse.”

²² Atin bénréh Jesuse dob de kuyugén mano, “Kagom émbuku fantag bé kéuyag gome, bé ati amaé kome, taloo no bé lowoh gome, bé ati kégalé kome.” ²³ Wén nay labi mélaga bé amaéne funa kom méuyag, brab wén nay labi mélaga bé kégale kay lowoh gome. ²⁴ Fégitung gom i de kloh manok. Enda mohok ro taloo no kémétew ro, brab énda i kiwot ro. Endob féamaéy Tuluse so bero. Atin mas gom na balilaga bé klohe manok. Mélaw toow na fo féamaé no begom.

²⁵ Enda i étew géfetaah bé kéuyag ne

bé kékuku ne, fiyon fo ké ségéuras saén. ²⁶ Amun énda gérigono kom i ni kloh éntingayén, sedek émbuku gom bé de ségiyo? ²⁷ Fégitung gom i de flores. Méruk ro fiyon fo ké énda gémalbék ro, taloo no rémigo ro do kégal ro. Endob béréméh ku begom, fiyon i Solomone toow fo kawasa datu, énda i kégalén loo bé de fiyo do falasén do flores. ²⁸ Endob buluk loo bé nan i kékégal i Tuluse bé de kéroon bé singkowe ay nan méuyag, atin bé démoe ibérén inohén, békén ba fékégalé no so begom? Toow fo kloh i kékéginugut gome. ²⁹ Kagomén démoyun émbuku bé amaé kome brab inémé kome. ³⁰ Non i de étew énda ménngintulus ro, been i niy fégitungé ruwe taman émbuku ro. Endob i Abay gome dob lawayo gétila noy kailanga kome. ³¹ Mélaw fédaya gom i Tuluse ménakaw begom, atin iraya no begom éntingayén kailanga kom.

³² “Do kuyug gu, kagom ménakaw fiyon fo ké énda ménngitungu, non kétayay Abay gome Tulus ké begom soy ménakaw beroy Tuluse. ³³ Fébeléy gom i languntama kome, brab iray gom dob de méskinan inok kawasa gom dob lawayo. Non dob lawayo, i de éntingayé kom énda i réménég de, taloo no ménakaw de, brab énda i ifés minasa de. ³⁴ Non hon i gonoy tamuk me de, diyo soy itunga muwe brab fédew me.”

Fantag bé késéfule Jesuse

³⁵⁻³⁶ Atin ménuret man i Jesuse sébaan binuwaya fantag bé késéfule ne mano, “Ingrat gom bé késéfule guwe loo bé de sugu-suguén ongot-ongot bé amu ruwe. Iring gom bé de ni sugu-suguén, mingat ro ongot-ongot bé amu ruwe séfule tidew dob sébaane uyot. Maginsod ro, brab férédawé roy solo ruwe inok géingat ro. Buluk géumah, magad saén géungkaa roy bengawane.” ³⁷ Toow fo moror i de ni sugu-suguén bé kégumah i amu ruwe, non énggéingat ro ongot-ongot bé késéfule ne. Béréméh ku begom, i ni amu kémégal inok

kémana brab fésaré noy de sugu-sugué no brab duwoto no bero.³⁸ Toow ro fo moror buluk énggito no bero énggéingat ongot-ongot fiyon fo ké gégumah kérara kélungonon, taloo no ménalém kélungonon.³⁹ Atin fégétédém gom i ni, buluk i gefee bé lawie gétiga noy ati urase gégumah i ménakawe dob lawi ne, ingata no brab énda fédayaé no de ké ahuroy ménakawey lawi ne.⁴⁰ Brab i begome so, fatut mingat gom non i Nga i Kéilawane gégumah dob gaiwe énda karangé kom de gégumah."

⁴¹ Ménénginsa i Pedrowe mano, "Kadnan, béréhé moy ni binuwaya dob begeye saén do kuyugém, taloo no kay kéluhanane?"

⁴² Atin i Kadnane séménumbul mano, "Atiy mégérore brab météldéde sugu-suguén, been i sénarigoy amu ne méguléw bé kéluhanay galbéke brab iraya noy de dumo no sugu-suguén bé de karo baad bé de amaén bé katabuwane gai.⁴³ Toow fo méoror i nan sugu-suguén ké gitoy amu ne gémalbék bé késéfule ne.⁴⁴ Béréhé ku begom, i amu i nan sugu-suguén sarigé no dob beeney kéluhanay languntama nuwe.⁴⁵ Endob mékégédaw-gédaw i ni sugu-suguén buluk mégitung mano, 'Mérugay nay késéfule i amu guwe.' Tidéw bénou, féganayé no tafésén i de dumo no sugu-suguén do lagéy brab libun, atin mama brab miném taman molon.⁴⁶ Ati keeyén i mérigowé amuk i amu i nan tete sugu-suguén gégumah bé gaiwe békén karangé no, brab énda gétiga no de? I ni amu, amuk gito noy tete rigoné no, tor-toré noy ni sugu-suguén atin fédioyé no dob gonone emferno beroy de kéluhanay de énda munur.

⁴⁷ "I ni sugu-suguén gétiga no fo toow i kétayay amu ne rigonén, éndob énda rigoné no de. Mélaw i ni sugu-suguén mékukum moso toow fo gétimal.⁴⁸ Endob i sugu-suguéne énda gétiga noy kétayay amu ne rigonén, atin réménigo énda fiyo no, mékukum éndob énda toowén gétimal.

I sénarigone bé médoowe, médooy soy ongoténe de. Atin i nirayane médooy, médooy soy ongoténe de.

⁴⁹ "Ménangéyu dini inok muwit maak aféy dob duniyae ni, brab méuyotu de damén ké mérinoén.⁵⁰ Kéfasanganu séko, brab tete i fédéw guwe ni taman gilid mérigoy ni.⁵¹ Ati karangé kome funa ku ménangéy dini? Inok éndaén i sékérít dob ni duniya? Békén. Ménangéyu dini inok mésébaad i de étew.⁵² Tidéw béléewe, i de limo gétew dob ségékuréngé, mésébaad ro sabaf bé ati Begéne ni. I téléwe de énda magayun ro bé ruwowe de, taloo no i ruwowe de énda magayun ro bé téléwe de.⁵³ Mésébaad ro sabaf bé kéunur ruwe. I bohe brab de ngaén lagéy énda séfagayun ro. Loo so bé idéngé brab de ngaén libun, énda séfagayun ro."

⁵⁴ Ménbéréh soy Jesuse dob de médooy étew mano, "Dob ni gonon, buluk gégito gom bé rawéne dob élédon, magad i kékéréh gome, 'Rémana séko.' Atin rémana ba.⁵⁵ Atin buluk wén i réfuruh tidéw déligdigan, béréhé kom, 'Méduf sékoy gaiwe ni.' Atin méduf ba.⁵⁶ Gétiga kom i méréhe bé atag i éntingayéne dob fantade ni brab dob lawayo. Sedek énda gétiga kom i atag i de rigonéy Tuluse bé béléewe? Non mikä gom munur.

⁵⁷ "Atin sedek énda mégitung gom bé atiy fiyowe rigoné kom inok énda mékukum gom moso?⁵⁸ Buluk wén i dumo mo sébanil, atin uwité no beem dob de kékukum inok sétiyawan, buluk diyo gom séna dob de agéwon, béréhé go fiyo inok séfagayun gom bé énda séna gégumahén dob adafay de kékukum. Non i de kékukum séko irayén beem dob de sundalo, brab i de sundalo férisuné ro séko beem.⁵⁹ Béréhé ku begom, énda séko géésut go tidéw dob férisunone taman énda gébayada moy kéluhanay késalaa muwe."

13

¹ Bé bénou so, i médoowe do étew bénréh ro dob Jesusey fantage bé de étew tidéw Galilea. Fénféléhu i Datue

Pilato bero bé lala ruwe témulak dob Tuluse. ² Séménumbul i Jesuse mano, “Amun i do no étew tidéw Galilea fénléhu loo bé no, makom ké toow ro na fo wén i sala ro bé de dumo ro bati dob Galilea, brab been i funa ruwe ménléhu. ³ Bérhéhé ku begom, békén. Endob saliyu ké gésénule gom témagak bé teteet adat gom, méléhu gom so ségiléw bé berowe. ⁴ Atin fantag bé de folo bra waléw ménléhu dob Siloe bé kétuwongoy tambalae bero, makom ké mas na wén i sala ro bé de dumo ro bati dob Jerusalem? ⁵ Bérhéhé ku begom, békén. Endob saliyu ké gésénule gom témagak bé teteet adat gom, méléhu gom so ségiléw bero.”

⁶ Atin bénréh Jesuse beroy ni binuwaya mano, “Wén i ségétewe étew, wén i safadén. Nohokén i sébaane kayéw méama i onok ne. Nangéyén ténéngténg ké wén i onokén, éndob énda i énggito no de. ⁷ Tidéw bénou, bénréhén dob étewe témalima, bé safad ne ni mano, ‘Bé rugay i télewe gébélantuwa démoyunu séfule séméléd ké wén i onok i ni kayéw, éndob énda foy énggito gu de. Mélaw tuwongém, non ransiné no saén usarén i ni fantad.’ ⁸ Endob séménumbul i étewe ni témalima de mano, ‘Fédayaén na bé rugay i ségbélantuwa atin kaluto ku géliwét de. Brab rigono ku abuno funa no bobo. ⁹ Buluk bé sébaano bélantuwa géumah mégonok, fiyo. Buluk énda, been nay no tuwongén.’”

Nuwa Jesusey libune

¹⁰ Wén i no gai kéténgadaf i de Ju-dio, sani gaiwe kétérén. Dob no gai, téménoro i Jesuse dob sébaane lawi féngadafa ro. ¹¹ Wén i ségétewe libun diyo békutén non féndéruuy saitane. Been i funa nuwe ménfoloén bra waléw gébélantuwa énda géfée-tangén témindég fiyon kloh. ¹² Amun énggito Jesuse, sénbérého no métanug mano, “Adi-adi gon!” ¹³ Brab nahay Jesusey de kémérén dob libune ni, brab bé bénou so énggétindég mééntang. Atin dénayéw i libune niy Tuluse.

¹⁴ Endob i uléwe bé no lawi féngadafan toow fo ménkérít non fén-adi-adi Jesusey ni libun bé gaiwe kétérén. Mélaw ménbéréd i ni lagéy dob de étew mano, “Wén i ném gétérésangan bé ségéfadiyane gémalbék tom, mélaw ay gom dini féuwa bé ni ném gétérésangan. Endob kagom mangéy dini féuwa bé gaiwe kétérén.”

¹⁵ Endob ménbéréd i Jesuse mano, “Enda toow gom munur dob Tuluse, ubo-ubo say kéténgintoow gome. Buluk i safi gome taloo noy kuda gome térumén, ukohé kom so dob nikéto kome de brab angéyé kom féinémén fiyon fo ké gai kétérén. ¹⁶ I libune ni ségétew dumo tom Judio non séfu Abraham so, brab féndéruuy saitane foloén bra waléw gébélantuwa. Fatut uwaén fiyon fo ké gai kétérén.” ¹⁷ I de étew diyo énda ménuyot ro bé Jesuse, ménmala ro bé kékéréd ne. Endob i de dumo de, toow ro fo méoror non bé kéluhanay de mékégaif rénigo Jesuse.

¹⁸ Atin ménbéréd i Jesuse mano, “Ati ségiléwoy kéténguléw i Tuluse bé de étewén? Ati fégiringo kuwe de? ¹⁹ Ségiléw na bé toowe fo kloh bénou, éndot i étewe brab nohokén. Atin téménunoh brab mérük taman ménwaléy dakél kayéw. Brab salagay de kloh manok i de fongo no.”

²⁰ Tidéw bénou, ménbéréd man i Jesuse mano, “Ati fégiringo kuwe bé kéténguléw i Tuluse bé de étewén? ²¹ Ségiléw bé fégéférueke fan éndot i libune brab sénlawékén bé télewe géasad bé arinahe taman mérük i kéluhanane brab ménwaléy médo.”

Imérate bengawan

²² Atin amun ménagéw i Jesuse mangéy Jerusalem, ménawét dob de ségiyo-giyo do ingéd brab téménoro diyo. ²³ Atin wén i ségétewe étew ménenginsaan de mano, “Kadnan, kloh saén i de étew fukaséy Tuluse?”

Séménumbul i Jesuse manó, ²⁴ “Rigo moy tamay gagané muwe mahur bé mérate bengawan mangéy dob lawayo, non bérhéhé ku beem, médo do étew i témélamawe mahur, éndob énda gagané ro de. ²⁵ Non i

gefee de témindég brab fintué noy bengawane. Atin amuk diyo gom dob liyuwe, témuktuk gom, fégédaw-gédaw émbéréh makom, ‘Kadnan, ungkaém i fintue ni inok géahur gey.’ Endob sémumbul mano, ‘Enda gélolo gu begom. Brab énda gétiga kuy tidéwo kome de.’²⁶ Tidéw béno, émbéréh gom makom, ‘Ménama gey brab méniném gey sétifon Beem. Brab téménoro go dob de ingéd gey.’²⁷ Atin sémumbul mano, ‘Enda gélolo gu begom. Brab énda gétiga kuy tidéwo kome de. Begom i de démoyun rémigo tete. Férayu gom Begén.’²⁸ Atin i begome moso kémérew gom brab kémigét i de kifé kom buluk gito gom i katufua kome Abraham brab Isake, brab Jakobe, brab i kéluhanay sénarigoy Tuluse muret diyo ron dob lawayo. Endob i begome énda géahur gom diyo.²⁹ Wén soy de médoor étew békén Judio tidéw déligdigan, sébangan, tégonon, brab élédon, diyo ro géésar mama beroy Tuluse ké féguléwo no bero.³⁰ Atin bé béno, i de énggétah béní waléy ro moso do géfuray. Brab i de énggétah béní waléy ro moso géétah.”

³¹ Bé béno so, i de dumo Fariseo bénréh ro dob Jesuse maro, “Tagakém i ni gonon brab angéy go dob ségiyowe gonon non méuyot i Datue Herod méméléhu Beem.”

³² Endob séménumbul i Jesuse mano, “Agéw gom brab béréh gom bé Herode mégakar étew, fétausé kuy kéféraréy guwe bé de saitan brab kieuwa guwe bé de étew béléewe ni brab démo. Atin dob gétéléwo nuwe gai, géfélido kuy galbék guwe dini.³³ Endob i Begéne kailangan tausu béléewe brab démo brab dob télewe. Non i toowe, énda i sénarigoy Tuluse muret bé de kékéhéhén féléhuén saliyu dob Jerusalem.”

³⁴ Tidéw béno, ménbéréh i Jesuse fantag bé adat i de étew dob Jerusalem mano, “Do étew dob Jerusalem, tete i fédéw guwe fantag bé begome non fénléhu gom i de sénarigoy Tuluse muret brab nibéro

kom batéw i de sénugu dob begome taman ménléhu ro. Firogule i kétaya kuwe térimu begom loo bé kétimu i mérítone manok télikub-kubo noy de fiyakén bé de fafakén? Endob ménika gom de.³⁵ I lawi gome métak moso. Endaén gito mo Begén taman bé gaiwe gégumah ké béréhé mo moso, ‘Féfiyonéy Tuluse damén i gégumahe tidéw dob Kadnane.’”

14

Nuwa Jesusey lagéye

¹ Wén i no sébaan fuweh gai kétérén, ménangéy i Jesuse mama dob lawi i ségétéwe odoroy de Fariseo. Atin i de sébanil bé Jesuse ténulik ro inok gito roy funa ruwe de témebo.² Diyo soy ségétéwe rémambuk. Atin ménfégédét dob Jesuse.³ Atin fénénginsaa Jesusey de Fariseo brab de témore bé kitabé mano, “Fakay ba dob kitab tomey muwae bé gaiwe kétérén?”

⁴ Endob ménantés ro. Mélaw génamak Jesusey étew démeruun atin nuwaén brab ménadi-adi. Tidéw béno, fénagéwén.⁵ Atin fénénginsaa Jesusey de étew témulik mano, “Buluk wén i nga gom taloo no safi gom ménlawu dob kalute ménalém wén i wayég de bé gaiwe kétérén, békén ba fagayasé kom bégéngén mésut dob kalute fiyon fo ké gaiwe kétérén?”

⁶ Endob ménantés ro non énda i étingayén késumbul ro de.

⁷ Atin wén i de étew sénéngkat ro mama diyo ménuyot ro mésar dob de fiyo saran kay de gérotor étew. Amun énggitó Jesusey ni, nureténi beroy ni binuwaya mano,⁸ “Amuk wén i séménéngkat begom déménagéan bé sébaane uyot, kagom mésar dob de fiyo saran, non amuk wén i do étew toow na fo gérotor sénéngkat, karoy de fiyo saran.⁹ Tidéw béno, i séménéngkate begom fégédét inok kédané no begom dob de sara kom brab fégaliné no begom mangéy dob mase na gérfantad gonon. Atin been i funa kome mémala.¹⁰ Yamula, buluk sénéngkat gom, angéy gom sar dob de gérfantad saran inok i séménéngkate

mangéy fégédét dob begome brab émbéréh mano, ‘Do adih, énggomén, diyo gom dob de fiyo ni saran.’ I ni géiray begom fiyo kéfégadat dob téngaangay de médoō étew. ¹¹ Non i kéluhanay de étew félangka-langka waléy ro gérifantad. Brab i kéluhanay de étew térifantad waléy ro gérotor.”

¹² Tidéw béno, ménbéréh i Jesuse dob gefee ni karagiya mano, “Buluk rémigo go karagiya, kago séngkatén say de gélolo mo, do dumo mo, brab do samungém, brab do étew kawasa dumo mo ségédét. Buluk rigoné moy ni, sémuli ro so séméngkat beem inok gésulio ro beem. ¹³ Yamula, amuk rémigo go karagiya, séngkatén i de méskinan, de fikat, de kimoyén, brab do langafén. ¹⁴ Mélaw féfioney Tuluse beem fiyon fo ké énda gésulio ro beem. Sulioy Tuluse beem bé gaiwe kétébule i de métintu étew.”

I binuwayaefantag bé karagiya

¹⁵ I ségétewe bé de ménasar mama, ménbéréh mano, “Toow fo méoror i de étew mama beroy Tuluse dob kéféguléw ne.”

¹⁶ Amun énggelingoo Jesusey ni, nuretén i sébaane binuwaya mano, “Wén i ségétewe étew lagéy réménigo dakél karagiya brab séménéngkat médoō étew. ¹⁷ Amun énggégumah i gaiy ni karagiya, i ni étew sénuguén i sugu-sugué nuwe mangéy méréh dob de étew sénéngkat ro, ‘Méntafayén i kéluhanane. Enggomén, angéy gomén dob karagiye ni.’ ¹⁸ Endob énda ménangéy ro diyo. Yamula bénréh roy de funa ro énda géangéy diyo. I sébaane de mano, ‘Bukué ku, énda géangéyu diyoan, non mantuwu séna ménléy fantad, angéyé ku téngténgén.’

¹⁹ I géruwowe de ménbéréh mano, ‘Bukué ku, énda géangéyu diyoan, non mantuwu séna ménléy folo timan safi brab magéwu angéyé ku bero langunén.’ ²⁰ I gétéléwe de ménbéréh mano, ‘Bukué ku, énda géangéyu diyoan, non mantuwu séna ménawag.’

²¹ I sugu-suguéne ni ménule brab bénréhén dob lagéye gefe karagiya

i kéluhanay de ni. Mélaw toow fo ménkérit i ni gefe karagiya. Tidéw béno, bénréhén dob sugu-sugué nuwe mano, ‘Fagayas go, angéy go dob de agéwon brab dob de kalsada, brab uwitém diniy de méskinan do étew, do kimoyén, do langafén, brab do fikat.’ ²² Atin ménagéw i ni sugu-suguén. Tidéw béno, ménsefule mangéy dob gefee ni karagiya, brab bénréhén de mano, ‘Rénigo guy sénugu me begén, éndob énda séna feno i lawie bé étewe.’ ²³ Atin i gefee ni karagiya bénréhén dob sugu-sugué nuwe mano, ‘Agéw go mangéy dob de agéwon mangéy dob de kloh ingéd brab fiyon dob de tuduk, brab uwitém i de étew diyo mangéy dini, méuyotu de ké méfeno étew i lawi guwe ni. ²⁴ Endob i de étew sénéngkat gu sungu, énda gétem-tem ro bé de amaén térafay gu.’ ”

²⁵ Wén i no sébaan fuweh, amun ménagéw i Jesuse, ménodor i de médoō do étew géliwét de. Atin sénlingén bero mano, ²⁶ “Fiyon atiy méuyote modor Begén, éndob mas nay kéimu ne bé de lukésén, brab bawag ne, brab de ngaén, brab de dumo no sétiman idéng, brab i kaane lowoh, énda médaitén waléy kuyug gu. ²⁷ Atin fiyon atiy étewe énda fédaydayén bé de kérégénon fiyon fo ké féléhuén dob kruse, énda médaitén waléy kuyug gu. ²⁸ Ufama, buluk wén i méuyot rémigo lawi, békén ba mésar na métah inok fégitungé no ké firoy i laga i kérigowe de, inok gétiga no ké wén i katabuwan kurtaén fégéfégilidén de? ²⁹ Buluk féngganayén saén i kérigo nuwe de, atin énda géfégilidén de, waléy sébayat i de étew gérito de. ³⁰ Maro, ‘Dufang i ni étew. Féngganayén saén i kérigo nuwe de, éndob énda géfégilidén de.’ ³¹ Taloo no, i ségétewe datu mangéy sétiboh bé sébanile de datu. Békén ba mésar na métah brab fégitungé no ké gagané no bé foloé ngibu sundalo no kuntra bé ruwowe folo ngibu sundaloy sébanile de? ³² Buluk gékarangay datue ni bé énda gétagay kaane sundalo, émféuwt sarigo no mangéy malak bé sébanile de datu

amuk mérayu séna inok méréh bé éndaén sétiboh ro.” ³³ Féntaus Jesusey kékéréh ne mano, “Ségiléw so bé begome. Amuk méuyot gom waléy kuyug gu, kailangan tagak gom i kéluhanay gulaané kome.”

³⁴ Tidéw béno, nuret Jesusey sébaane binuwaya fantag bé késégiléw i timuse bé de kuyugén mano, “I timuse fiyo. Endob buluk mékédan i kétasik ne, éndaén i nonomén brab éndaén géséfule i kétasik ne. ³⁵ Enda fiyo no bé fantade taloo no bé abunowe. Fatut ibérén saén. Tuntay gom i ni énggelingoo kom.”

15

I métadine bili-bili

¹ Wén i no sébaan fuweh, amun ténero Jesusey de étew, ménggégumah i de médoor lémiful kubrador brab de tete étew mangéy mégélingo. ² Wén soy do Fariseo brab do téromo bé kitabé diyo. Atin sabaf bé kéika ruwe bé de tete étew, ménriklamo ro maro, “I ni lagéy méuyot témayakuf bé de tete étew brab séréngan na bero mama.”

³ Mélaw nureto Jesuse bero do binuwaya mano,

⁴ “Amuk i ségétewe begom wén i mératu bili-bili no brab méntadin i sébaane de, ati rigoné muwe? Békén ba tagaké moy siyowe de folo bra siyow dob fétabtabane, atin angéyé mo sélédén i sébaane de méntadin taman gito mo? ⁵ Tidéw béno, buluk gito mo, duwalé mo mule toow fo méoror. ⁶ Brab tabaré moy de dumo mo brab bérhé mo dob berowe, ‘Toowu fo méoror non énggito guy méntadine bili-bili gu. Enggomén, rémigo tom karagiya.’ ” ⁷ Atin féntaus Jesusey kékéréh ne mano, “Loo so bé niy Tuluse. Toow fo méoror amuk wén i ségétew tete étew gésénule brab tagaké noy tete adatén, atin rigoné noy kétayay Tuluse. Mas méoror i Tuluse bé ni ségétew étew ménggésénule bé kéoror ne bé de siyow folo bra siyow fiyo étew énda kailanga roy gésénulee.”

⁸ Ménuret man i Jesuse ségiyo binuwaya mano, “Wén i ségétewe libun wén i folo timan balilaga félatahén. Atin méntadin i sébaane de. Ati rigoné nuwe? Témumon solo brab kodosé noy lawi ne sélédé no taman gito noy ni sébaan félata méntadin.

⁹ Tidéw béno, tabaré noy de dumo no brab bérhé no bero mano, ‘Toow fo méororu non énggito guy félata guwe méntadin. Enggomén, rémigo tom karagiya.’ ” ¹⁰ Féntaus Jesusey kékéréh ne mano, “Bérhé ku begom man, i de télakiy Tuluse toow ro fo méoror amuk wén i ségétew tete étew gésénule brab tagaké noy tete adatén atin rigoné noy kétayay Tuluse.”

I dufange nga

¹¹ Atin nuret Jesusey gétéléwe binuwaya mano, “Wén i ségétewe étew lagéy wén i ngaén ruwo gétew lagéy.

¹² Wén i no sébaan fuweh i tuwaréye bé de ngaén ménangéy dob boh ne mano, ‘Boh, irayém begén i baad guwe bé de languntaman katom.’ Mélaw i boh ne bénadén i kéluhanay languntama ruwe dob ruwowe gétew ngaén. ¹³ Enda mérugayén tidéw béno, i tuwaréye bé de ngaén fénbéléyén i kéluhanay kaane baad. Atin ménagéw ménangéy dob mérayue ingéd, brab nuwitén i kurta ne. Diyo séninggulaén i kéluhanay kurta ne bé kédufang ne.

¹⁴ Tidéw béno, ménggumah i dakélé lénggob dob kéluhanay sugud i no dakél ingéd. Atin toow fo mélayah i dufange ni étew, non éndaén i kurtaén. ¹⁵ Mélaw ménahur dob sébaane galbék kay ségétewe bat diyo. Sénuguén dob fantad ne émféama babuy. Non bé toowén fo mélayah,

¹⁶ ménigar bé amaéy de babuy. Endob énda i mirayan de kéama. ¹⁷ Tidéw béno, énggétiga noy kédufang ne atin ménggitung mano, ‘I kéluhanay de sugu-suguéy boh guwe, gabagabay de amaé ro. Endob ay niwu méléhu mélayah. ¹⁸ Séfuleu mangéy dob boh guwe brab bérhé ku diyo, Boh, ménusalau dob Tuluse brab dob beeme. ¹⁹ Endaén médaitu fédawété

mo ngaém. Endob fégédaw go begén. Rigo mo begén sébaan bé de sugu-sugué mo.' " ²⁰"Mélaw ménule. Amun mérayu séna dob lawi ruwe, énggitoy boh ne brab mén-ray i éna nuwe de. Léménéntu bénalakén i nga ne nékéfén brab narékén. ²¹ Atin ménbéréh i nga ne mano, 'Boh, ménusalau dob Tuluse brab dob beeme. Endaén médaítu fédawéto mo ngaém.' ²²Endob i boh ne ténawagén i de sugu-sugué no brab bénréhén bero mano, 'Féraan gom. Uwit gom i toowe fo fiyo kégal brab fékégal gom de. Fétisingo kom brab fésafatoso kom. ²³Atin sumbalí gom i kagéne toow fo bobo nati safi. Rémigo tom dakél karagiya. ²⁴Non i nga guwe maak ménléhu, éndob béléewe ni méuyag. Maak méntadin, éndob béléewe ni énggiton.' Tidéw béo, rénigo roy dakéle karagiya.

²⁵ "Endob béo so, ménggégumah i ofoe ngaén lagéy tidéw dob de galbéko no. Amun gédétén dob lawie, ménggaif bé énggelingoo noy kantawe brab énggito noy de étew mésayaw. ²⁶Mélaw ténabarén i ségétewe bé de sugu-sugué ro brab ménénginsa ké ati rigoné ruwe. ²⁷Séménumbul i ni sugu-suguén mano, 'Ménséfule i tuwaréy me. Sénugu i boh me begey séménumbali bobo nati safi, non i tuwaréy me ménséfule énda i sugsugén.' ²⁸Tidéw béo, toow fo ménkérít i ofo ne lagéy, brab énda ménlausén dob lawie. Mélaw i boh ne ménusut brab ménfégédaw-gédaw inok mahur dob lawie. ²⁹Endob bénréhén dob boh ne mano, 'Géménalbékú bé firoye gébélantuwa brab énda fénlis guy fénrigo muwe begén. Endob énda foy nirayém begén fiyon sébaan kambing inok rémigowu karagiya begey i de dumo gu. ³⁰Endob i ni ngaém ménraréy, brab séninggulaén i éntingayéne nirayém de bé de kédufanga no. Endob amun ménule, sénumbalio mo bé boboe nati safi.' ³¹Séménumbul i boh ne mano, 'Adu, bati go dini sénga tékélid brab i éntingayéne kagén, kaam so. ³²Endob fatut rémigo tom karagiya inok

féténgténg tom i kéoror tome non i tuwaréy me maak ménléhu, éndob béléewe méuyag. Brab maak méntadin, éndob béléewe énggiton.' "

16

¹ Atin nuret Jesuse bé de kuyugén i ni binuwaya mano, "Wén i ségétewe kawasa étew, wén i sénarigo nuwe lémiful. ² Amun énggelingoo amu nuwey ni, ténabarén i sénarigo nuwe ni brab ménénginsa mano, 'Ati ni énggelingoo ku fantag beem? Fénakawa mo begén? Bérhéhém begén i kéluhanay kérigo muwe bé kagéne kurta. Non éndaén fakayén sarigo ku beem. Mélaw kédané ku beem dob ni galbék.' ³ Tidéw béo, i sénarigone ni ménggitung mano, 'Ati rigoné kuwe, ké kédané no begén dob ni galbék? Enda émbagéru gémalbék mérégén loo bé kémalute. Atin mémalawu mongot limus. ⁴Gétiga kuy ati rigoné kuwe inok buluk mékédanun dob galbék guwe ni, tayakuféy de étew so begén dob de lawi ro.' ⁵ Tidéw béo, ténabarén i kéluhanay de étew énggéutong dob amu nuwe ni. Atin bénréhén dob sunguwe de mano, 'Firoy i utong me bé amu guwe?' ⁶Séménumbul i ni étew mano, 'Mératu dakél latah nor.' Atin ménbéréh i sénarigone ni mano, 'Ay ni sulate bé utong me. Sar go brab sulatém bé limo folo saén dakél latah nor.' ⁷Tidéw béo, fénénginsaa noy géreruwé ni étew énggéutong mano, 'Firoy i utong me bé amu guwe?' Séménumbul mano, 'Séngibu gésaku faréy.' Atin bang i sénarigone ni, 'Ay ni sulate bé utong me. Sar go brab sulatém bé waléw ratu gésaku saén.' ⁸Tidéw béo, amun i amu nuwe ni énggelingoo noy kéluhanay rénigoy sénarigo nuwe ni, dénayéwén mano, 'Toow fo métiledtéd i ni étew lémiful.' " Atin fentaus Jesusey kékéréh ne mano, "I de étew dob duniyae ni mas na furung ro maguyag bé de ménintulus. Non tafayé roy kékaguyag ruwe dob de géfuray gai moso. Atin i de étew ménintulus fatut so tafayé

roy kéfaguyag ruwe dob de géfuray gai moso dob lawayo.

⁹ “Mélaw béréhé ku begom, usar gom i kurta gome fégétabang bé de étew méskinan. Atin i Boh gome dob lawayo tayakufé no begom diyo. ¹⁰ Buluk mésarigon go bé klohe, mésarigon go so bé médoowe. Endob buluk énda mésarigon go bé klohe, énda so mésarigon go bé médoowe. ¹¹ Atin amuk énda mésarigon gom bé de funan méungangén dob duniyae, énda so mésarigon gom bé toowe fo funan méungangén dob lawayo. ¹² Buluk énda mésarigon gom bé tamuk i dumo gome étew bénii, énda so sémarig i Tuluse begom bé tamuke dob lawayo.”

¹³ Atin ménbéréh man i Jesuse mano, “Enda i sugu-suguén fakay galbéko no séréngan i ruwowe gétew amu. Non amuk mégédaw bé ségétewe de, mérarék bé ségétewe de. Taloo no odoro noy kétayay ségétewe de, siyawé noy ségétewe de. Mélaw énda fakay go modor bé Tuluse amuk fégitungé mo saén i kurtae.”

¹⁴ Diyo soy de Fariseo do toow fo méuyot bé kurtae. Amun énggelingoo roy ni kétoro, déniyangka roy Jesuse.

¹⁵ Mélaw bénrého Jesuse bero mano, “I begome maak métintu do étew, éndob ubo-ubo saén i de ula-ulane kom dob adafay de étew. Endob i Tuluse gétiga noy fédew gome. Ati médayewe dob de étew, toow fo mikä i Tuluse de.”

¹⁶ “Wén i do tafay ménusat kuman niray Moisese bé gétahe tidew dob Tuluse, brab wén soy do sénusat i de sénarigoi Tuluse muret bé kékéréh ne bé gétahe. I de sulat ni fatut nodoron taman sa bé kégumah Juan Bautistawe. Tidew bénii, fatut uretéen i Fiyowe Uret fantag bé kékéfugléw i Tuluse. Brab kéluhanay de étew fégésé roy mahure. ¹⁷ Endob énda fakayén ké wén i mékédan bé kukumane, fiyon kloh saén. Mas na magad mékédan i duniyae brab lawaye, éndob i kukumane énda mékéda no.”

¹⁸ Atin bang Jesuse man, “Fiyon atiy gémélake bé bawag ne atin

mawag man ségiyo libun, énggélamfa. Brab i lagéye bawagé noy libune génlak, énggélamfa so.”

Ikawasawe brab Lasarowe

¹⁹ Ménbéréh man i Jesuse mano, “Wén i ségétewe kawasa étew kéménégal toow fo fiyo kégal, brab maguyag bé toowe fo fiyo kéfaguyag sénga fuweh. ²⁰ Wén soy ségétewe étew toow fo méskinan féndawét Lasaro. Ménfeno békukang i lowoh ne. Sénga fuweh uwitén dob bengaway lawi i étewe ni kawasa, ²¹ non ménuyot damén ké géama fiyon do kloh sama saén ménlawu tidew dob amaéy ségétewe ni kawasa. Atin fégédét i de itu dob beene inok dilaé roy de békukangén. ²² Tidew bénii, i Lasarowe ni méskinan ménléhu. Atin nuwit i de télikiy Tuluse mangéy dob tébing i katufuay de Judio féndawét Abraham dob lawayo. Brab i étewe ni kawasa ménléhu so brab lénébeng.

²³ I ni étew kawasa, énggéangéy dob uleone emferno mérasy. Brab amun léménéngag, énggito no dob mérayuey miskinane Lasaro dob tébing Abrahame. ²⁴ Tidew bénii, téménabar mano, ‘Bebe Abraham, fégédaw go begén. Suguém i Lasarowa nan angéyé no élédén i tuko ténero ne dob wayége brab féluyuté no dob dila guwe ni inok fégéfélégénéy gu. Non ay niwu dob rinoe ni mérasy.’

²⁵ Endob séménumbul i Abrahame mano, ‘Adu, fégétédémém i kéuyag mo séna, gédoté moy éntingayéne fiyo atin i Lasarowe kérégénan mérasy. Béleewe ay niy Lasarowe mésésaya brab ay nan go mérasy kérégénan.

²⁶ Brab saliyu na bé de ni, wén i sébaane léfak toow fo ménalém dob élét tome inok i méuyote mifar mangéy diyoan tidew dini taloo no tidew diyoan mangéy dini énda géifaren.’ ²⁷ I kawasawe ni ménbéréh man mano, ‘Bebe, suguém i Lasarowe mangéy dob lawi i boh guwe. ²⁸ Non wén i limowe gétew do dumo gu sétiman idéng diyo. Brab ureté no émféingat bero inok énda mangéy ro dob ni gonon mérasy.’ ²⁹ Atin

séménumbul i Abrahame mano, ‘Diyo soy de sénulat Moises brab de sénarigoy Tuluse muret bé gétaho. Gébasana roy de ménsulat diyo inok géingat ro.’ ³⁰ Endob ménbérélh i kawasawe ni mano, ‘Enda fo munur ro bé de ménsulat. Endob buluk wén i ségétew tidéw dob de ménléhu tébule mangéy diyo, fakay munur ro, brab gésénule ro bé de sala ro.’ ³¹ Endob séménumbul i Abrahame mano, ‘Buluk énda munur ro bé de sénulat Moises brab de sénarigoy Tuluse muret, énda so munur ro fiyon fo ké wén i ségétew tébule tidéw dob de ménléhu.’”

17

¹ Atin ménbérélh i Jesuse dob de kuyugén mano, “I de éntingayén funay de étew gésala gégumah, éndob mékégédaw-gédaw i étewe muwit de. ² Toow fo gétimal ké mékukum, mélaw mas na fiyo ké ibérén dob dogote nikéton bé dakéle batéw i reer ne ké beeney funay ségétewe mantu séna méngintulus gésala. ³ Mélaw ingat gom. Atin buluk énggésala i dumo gome, gélé gom. Brab buluk gésénule, fésagada kom. ⁴ Fiyon fo ké énggésala dob beeme fitéw gule bé ségétérésange, atin séfule so fitéw gule mongot fasinsiya, fésagada mo.”

⁵ Tidéw béo, i de kuyug Jesus ménbérélh ro maro, “Kadnan, umana moy kéféngintoow geye.”

⁶ Atin séménumbul i Jesuse mano, “Buluk wén i kéféngintoow gom loo bé kédaqué i oloy sabie, gembérého kom dob kayéwe ni makom, ‘Térandut go, brab angéy go téohok dob dogoto’, atin unuro no begom.”

⁷ Atin ménbérélh i Jesuse man mano, “Ufama, buluk i ségétewe begom wén i sugu-sugué no démadu taloo no témalima bé de ayamém, buluk gégumah i ni sugu-suguén tidéw dob de galbéko no, énda béréhé mo de, ‘Enggon, ama go néen.’ ⁸ Yamula béréhé mo de, ‘Lékas go, tafayém i amaé kuwe, atin duwoto mo begén, brab ongot-ongotém ké gilidu mama.

Tidéw béo, mama go so kaam.’ ” ⁹ Atin fentaus Jesusey kékérélh ne mano, “I nan ségétew sugu-suguén, énda fatutén ongot-ongot bé kékésalamate bé kérigo nuwe bé fatute. ¹⁰ Ségiléw so bé begomey ni sugu-suguén. Buluk énggilid gomén bé galbéké sénugu i Tuluse rigoné kom, fégétédém gom i ni, begom saén i de sugu-suguén, mélaw kagom ongot-ongotén i kékésalamate. Rénigo gom saén i fatute rigoné kom.”

Nuwa Jesusey foloe gétew fémuteén

¹¹ Amun i Jesuse ménangéy Jerusalem, ménagéw mangéy bé élét i de sakuf Samaria brab Galilea. ¹² Amun mahur dob sébaane ingéd, énggébalakay de folo gétew lagéy. Wén i déruu ro fémute. Atin non fémuteén ro, téménindég ro dob mérayue. ¹³ Brab mékes ro maro, “Jesus! Maistéro! Fégedaw go Begey!”

¹⁴ Amun énggito Jesuse bero, ménbérélh mano, “Agéw gom mangéy fétengteng dob de fadi inok gétiga ro ménadi-adi gom.” ¹⁵ Amun ménagéw ro mangéy dob de fadi, ménadi-adi ro dob aguwone. Atin amun i ségétewe bero énggito noy ménadi-adi, ménagéw ménangéy dob Jesuse, mékes dayéwé noy Tuluse. ¹⁶ Atin ménélengkéb dob adafa Jesuse fésalamat. I nilagéy békén Judío, éndob tidéw dob sakuf i ingéde féndawé Samaria. ¹⁷ Ménbérélh i Jesuse dob de étew mano, “Folo gétew i ménadi-adi. Hon i de siyow de?”

¹⁸ Endob ségétew saén i ménagéw mangéy fésalamat bé Tuluse, sani ségétewe tidéw dob ségiyowe ingéd.” ¹⁹ Atin sénbérélh Jesusey ni lagéy mano, “Tindég go brab taus go dob ayo muwe. Ménadi-adi gon non méngginugut go Begén.”

Fantag bé kékénguléw i Tuluse

²⁰ I de dumo do Fariseo fénénginsa ro dob Jesuse ké kédiron i kégumah i gaiy kékénguléw i Tuluse bé de étewén. Séménumbul i Jesuse mano, “I kégumah i kékénguléw i Tuluse énda gitono. ²¹ Enda i ségétew de gembéréh

begom, ‘Ay ninén, téngténgém!’ Taloo no, ‘Diyoonén.’ Non i kékékuléw i Tuluse diyo dob de fédew gom.”

²² Tidéw béno, bénréh Jesuse dob de kuyugén mano, “Gégumah i gaiwe féngonoyé kom i gito gom i gaiy késéfule i Nga i Kéilawane, sani Begéne. Endob énda gito gom de. ²³ Atin bérhéhé de étew begom maro, ‘Ay diyoonén.’ Taloo no, ‘Ay ninén.’ Endob kagom munur de taloo no mangéy gom diyo inok téngténgé kom. ²⁴ Non i késéfule guwe maak kilot métékow rémendaw brab géfekaya i kéluhanay lawayo. ²⁵ Endob bé sunguwe, kamarasayanu, brab i de étew méuyag béní, ikaa ro Begén. ²⁶ Loo so bé gai Noehe, i gaiy késéfule guwe. ²⁷ Bé gai Noehe, méguaya i de étew, mama ro, miném ro, mawag ro taman bé kéahur Noehe dob barkowe. Tidéw béno, i dunuke énggégumah atin ménléne ro kéluhanan saliyu bé Noehe beroy de samungén. ²⁸ Ségiléw so bé gai Lote bé gétaho. Bé béno, i de étew mama ro, miném ro, sébéléy ro, mohok ro, brab rémigo ro do lawi. ²⁹ Endob bé gai kékéled Lote bé ingéd ne Sodom, i rinoe brab do bara ménlawu maak rana tidéw dob lawayo méninasa bero kéluhanan do ménféled. ³⁰ Loo so moso bé niy gai guwe séfule.

³¹ “Bé béno gai, i de étew diyo ro dob liyuy lawi ruwe, éndaén fatut ro mahur angéyé roy de insod ro. Loo so bé niy étewe diyo dob de galbékono, énda so fatutén séfule mangéy dob lawi ne. ³² Fégetédém gom i bawag Lote non séménling inok téngténgé noy de insod ro ménféled, mélaw i lowoh ne ménwaléy égas timus.

³³ Atiy méuyote émféraru bé kéuyag ne, méléhu. Endob i méléhue bé kékfuray ne Begén, gédoté noy umule magufusa. ³⁴ Bérhéhé ku begom, bé béno kélunganon bé késéfule guwe, wén i ruwo gétew séurir fidong, atin i ségétewe de dotén, brab i ségétewe de émféled. ³⁵ Atin wén i ruwowe gétew do libun géming, atin i ségétewe de dotén, brab i ségétewe de émféled. ³⁶ Atin ruwo gétew diyo dob galbéko

ruwe, atin i ségétewe de dotén, brab i ségétewe de émféled.”

³⁷ Tidéw béno, fénénginsaay de kuyugén maro, “Kadnan, hon i gonoy de ni de mérigo?”

Séménumbul i Jesuse mano, “Hon i gonoy wéne de ménléhu, diyo soy de uwak sétimu. Loo so bé toowe tete étew, gégumah dob berowey kékukum i Tuluse.”

18

¹ Tidéw béno, nuret Jesuse bé de kuyugén i ni binuwaya inok démoyun ro démasal brab énda mécédan i inam ruwe. ² Ménbéréh mano, “Wén i ségétewe kémukum dob sébaane ingéd, énda fo mégilakén bé Tuluse taloo no énda fo fégadata noy étewe. ³ Brab wén soy ségétewe libun baléw dob no ingéd. Démoyun mangéy dob ni étew kémukum fégédaw-gédaw bé tabanga no bé tiyawa nuwe bé fétabana no damén i sébanile de. ⁴ Bé sunguwe de, miká i kémukume tétabang. Endob tidéw béno, fénngitungén mano, ‘Fiyon fo ké énda mégilaku bé Tuluse brab énda fégadata kuy de étew, ⁵ éndob talawanu bé késéfule-fule ne mongot tabang. Mélaw tabanga kuy baléwe ni, inok éndaén séfuleén taman kérégénanu.”

⁶ Atin féntaus Jesusey kékéhé ne mano, “Tuntay gom i bérhéhé kémukume ni fiyon fo ké békén métintu étew. ⁷ Toow na fo tabangay Tuluse begom do fénémilién amuk démasal gom fuweh na kélunganon. Brab énda métana i kétabang ne begom. ⁸ Bérhéhé ku begom, magad tabangay Tuluse begom. Endob buluk gégumah i gaiwe séfuleu, kloh saén i de munur Begén.”

⁹ Atin nuret Jesuse man i sébaane binuwaya dob de étew fénngitungé roy métintu ro éndob siyawé roy de dumo étew. ¹⁰ Bang Jesuse, “Wén i ruwowe gétew étew ménangéy dob lawi i Tuluse inok démasal ro. I ségétewe de Fariseo brab i ségétewe de kémubra buwis. ¹¹ I Fariseowe ni témenindégi atin déménasal mano, ‘Fésalamata ku Beem Tulus non békén

ségiléwu bé de dumo gu étew, do ménakaw, do arumén ro, do lémamfa ro. Fésalamata ku Beem non békén ségiléwu bé diyoo étew lémisful kémubra buwis. ¹² Fuwasawu ruwo gule bé ségéfadiyane, brab iray gu dob Beemey géfoloe bé kéluhanay sahudé kuwe.’ ¹³ Endob i ségétewe ni kémubra buwis téménindég dob mérayue, brab mémala énda gétengangén dob lawayo, brab éntungén i kuméng ne bé kétete i fédew ne. Atin déménasal mano, ‘Tulus, fégédaw go begén ségétewu ménasala.’ ¹⁴ Atin féntaus Jesusey kékérén ne mano, “Béréhé ku begom, i ni étew kémubra buwis, amun ménule, fénsagaday Tuluse bé de salaén. Endob i Fariseowe ni, énda fénsagaday Tuluse de. Non i de étew téfégérator, fégérifantadén ro. Brab i de étew térifantad, fégérotorén ro.”

¹⁵ Wén i no sébaan fuweh, wén i médoowe do étew ménuwit bé de nga ro dob Jesuse inok féfyoné no bero. Endob amun énggitoy de kuyugén, génlé roy de étew ni. ¹⁶ Endob téabar Jesusey de nga mangéy dob Beene, brab bénréhén dob de kuyugén mano, “Féangéy gom i de nga dob Begéne. Brab kagom alangén bero non i de étew sémarig loo bé késarig i de ni nga, féguléwoy Tuluse bero. ¹⁷ Béréhé ku begom i towe, buluk i késarig i ségétewe békén loo bé késarig i ngae, énda so féguléwoy Tuluse de.”

I kawasawe étew

¹⁸ Atin i ségétewe uléw i de Judío ménénginsa dob Jesuse mano, “Fiyo maistéro, ati rigoné kuwe inok gédoté kuy umule magufusa?”

¹⁹ Séménumbul i Jesuse mano, “Sedek fédawété mo Begén fiyo? Enda i ségiyo fiyo saliyu saén bé Tuluse.

²⁰ Gétiga moy de sugu. Kago lémamfa, kago méméléhu, kago ménakaw, kago uretén i dumo muwe bé békéne toow, fégadata moy boh me brab idéng me.”

²¹ Séménumbul i uléwe ni mano, “I kéluhanay de ni, nodoro ku tidéw féganay klohu de séna.”

²² Amun énggelingoo Jesusey ni, bénréhén de mano, “Sébaan i külange beem. Fébéléyém i kéluhanay étingayéne kaam atin irayém i kurtae dob de méskinan. Atin mélaw kawasa go moso dob lawayo. Tidéw béo, énggonén, odor go Begén.” ²³ Amun énggelingoo étewe niy ni, toow fo tete i fédew ne, non toow fo kawasa. ²⁴ Amun énggito Jesuse ni tete i fédew ne, bénréhén mano, “Toow fo mérégén i kéahur i de kawasa dob kékéguléw i Tuluse. ²⁵ Mas na mélémuy kéahur i dakéle ayam dob tosong i darume bé kéahur i ségétewe étew kawasa dob kékéguléw i Tuluse.”

²⁶ I de énggégélingo bé de ni, fénénginsa ro maro, “Ati mélaw i de fakay mífukas?”

²⁷ Séménumbul i Jesuse mano, “I de békén fakay rigoné étewe, fakay gérigonoy Tuluse.”

²⁸ I Pedrowe ménbérén mano, “Ténagak gey i de lawi gey inok furay gey Beem.”

²⁹ Atin bang Jesuse, “Béréhé ku begom i towe, i ségétewe téménagak bé lawi ne, bawag ne, taloo no dumo no sétiman idéng, do lukésén, taloo no do ngaén inok ureté noy fantag bé kékéguléw i Tuluse, ³⁰ gégédot toow na fo médoob de ni do gai. Brab dob de gai gégumah, gédoté noy umule magufusa.”

Nuret Jesusey fantag bé kéléhu ne

³¹ Wén i no sébaan fuweh, téabar Jesusey de folo bra ruwo gétew kuyugén sébero-bero saén, atin bénréhén dob berowe mano, “Fégélingo gom, mangéy tom Jerusalem. I Jerusalemey ingéde mérigo kéluhanay ménulate bé gétaho sénulat i de étew sénarigoy Tuluse muret bé kékérén ne fantag bé Begéne. ³² I Begéne sani Nga i Kéilawane, irayu dob de békén Judío. Atin diyangkaé ro Begén brab fémalané ro Begén, brab duraa ro Begén, ³³ brab basadé ro Begén, brab féléhué ro Begén. Endob amuk méifus i télewe gétérésangan, tébuleu.”

³⁴ Endob i de kuyug Jesus, énda énggésobuto roy de ni bénréh Jesuse. I atag i de ni kékéréh ménbunéy dob berowe, brab énda gésobuto ro de.

Nuwa Jesusey langaféne

³⁵ Amun gégumah i Jesuse dob ingéde Jeriko, diyo i ségétewe étew langafén ménsar dob dorori aguwone mongot limus. ³⁶ Amun énggelingoo noy médoowe do étew téménara, ménenginsa ké ati ni gérigonon.

³⁷ Wén i séménumbule mano, “I Jesuse tidéw Nasaret témara.”

³⁸ Tidéw béno, téménabar métanug mano, “Jesus, séfu Datu Dabid, fégédaw go begén!”

³⁹ I de étew métah bé Jesuse géléé ro maro, “Kago selekén!” Endob taus so mékes toow na fo métanug mano, “Jesus, séfu Datu Dabid, fégédaw go begén!”

⁴⁰ Atin téménrén i Jesuse brab nongotén i étewe ni uwitén mangéy dob Beene. Amun énggégéfégédétén, fénénginsaa Jesuse mano, ⁴¹ “Ati kétaya muwe rigoné ku dob beeme.”

Séménumbul i langaféne ni mano, “Kadnan, méuyotu gérito damén.”

⁴² Atin bénréh Jesuse de mano, “Gérito gon. Adi-adi gon, non méngintoow go.”

⁴³ Sonom béno, énggégito néni lan-

gaféne ni, atin ménfuray bé Jesuse démayéw bé Tuluse. Amun énggitoy de étew i ni ménrigo, dénayéw ro soy Tuluse.

19

Jesus brab Sakeo

¹ Atin méntaus i Jesuse bé kéagéw ne, atin ménahur dob ingéde féndawét Jeriko. ² Wén i ségétewe kawasa féndawét Sakeo diyo bati. Beeney lémifule kémubra buwis dob de dumono Judio kay de Romano. ³ Amun énggelingoo noy Jesuse témara, méuyot i Sakeowe téméngténg inok gétiga no ké ati Jesuse ni étew. Endob énda gito no de, non bé médoowe étew géliwét bé Jesuse brab i Sakeowe foko lagéy. ⁴ Mélaw léménéntu mangéy

dob métaho, brab ménénik dob kayéwe inok gito noy Jesuse témara.

⁵ Amun gédétén i Jesuse dob kayéwe ni, léménéngag brab ménsébéréh bé Sakeowe mano, “Sakeo, fagayas go élus. Fatut mangéy dob lawi me béléewe ni.”

⁶ Atin ménagayas i Sakeowe mélus tidéw dob kayéwe ni brab méoror ténayakufén i Jesuse dob lawi ne.

⁷ Amun i de étew énggégito bé ni, ménséguraw ro maro, “I Jesuse ni sugud-sugud mangéy dob tetee étew.”

⁸ Endob i Sakeowe téménindég brab ménsébéréh bé Jesuse mano, “Kadnan, iray gu dob de méskinan i ténga i éntingayéne kagén. Brab buluk wén i léniful gu, bayada ku fot takéf bé éndot guwe dob berowe.”

⁹ Atin ménbéréh i Jesuse dob beene mano, “Béleewe ni, i Tuluse fénukasén beem brab kéluhana kom dob ni lawi, non munur go ségiléw bé kéunur Abrahame. ¹⁰ Non i Nga i Kéilawane, sani Begéne, ménangéy dob ni duniya inok fukasé kuy de étew ménala non maak méntadin ro.”

¹¹ Amun mégélingo ro séna, féntaus Jesusey kékéréh ne bé sébaane binuwaya non gédét ron dob Jerusalem, atin non i de étew maro ké béno so gégumah i kéféguléw i Tuluse.

¹² Ménbéréh mano, “Wén i ségétewe gérotor étew ménangéy dob mérayue ingéd inok rigonén datu diyo. Tidéw béno, bantaké noy séfule. ¹³ Amun énda séna magéwén, ténabarén i foloe gétew bé de sugu-sugué no brab niraya no dob séngae ségétew sébaan bélowan félatah. Brab bénréhén bero mano, ‘Féinség gom i ni taman késéfule gu.’ ¹⁴ Endob i do étew dob no gonon mika ro de. Mélaw séménugu ro de étew émbéréh maro, ‘Mika gey bé ni étew waléy datu gey.’

¹⁵ “Endob fiyon fo ké loo bé nan, ménwaléy datu. Mélaw ménsefule brab fénsguo noy de sénarigo no bé de bélowan félatah inok susiné no ké wén i inségén. ¹⁶ I sunguwe de ménbéréh mano, ‘Maistéro, i de nirayém begén félatah, énggéinség gu

de na folo timan.’ ¹⁷ Tidéw béno, bang i datue, ‘Fiyo, mégéror go suguén. Non gésarigon go bé klohe, sarigo ku beem méguléw bé foloe do ingéd do sakuf gu.’ ¹⁸ Atin i géruwowe bé de sugu-suguén ménbérél mano, ‘Maistéro, i de nirayém begén félatah, énggéinség gu de na limo timan.’ ¹⁹ Tidéw béno, séménumbul i datue ni mano, ‘Féguléw go bé limowe do ingéd do sakuf gu.’ ²⁰ Tidéw béno, i gétéléwe bé de sugu-sugué no ménbérél mano, ‘Maistéro, ay niy kurtae nirayém begén. Bénunéy gu brab nitong gu ténaléy dob munsalawe. ²¹ Non mégilaku beem non métégas go étew. Médot go bé békéne kaam. Brab kémétew go dob békéne nohokém.’ ²² Séménumbul i datue ni mano, ‘Tete go fo sugu-suguén. Kukumé ku beem bé de bénréhém. Gétiga mo kun médoto bé békéne kagén, brab kémétewu bé békéne nohok gu.’ ²³ Amuk kémarang go loo bé nan, sedek énda féndiyoém dob bangkuey kurta guwe inok buluk séfuleu, fakay doté ku brab wén i inségén?’ ²⁴ Tidéw béno, bénréh i datue ni dob de étew dob sékulo ruwe téménindég mano, ‘Dot gom i kurta ne ni atin iray gom dob ségétéwe énggéinség folo timan.’ ²⁵ Endob séménumbul ro maro, ‘Maistéro, wénén i kaan folo kurta.’ ²⁶ Ménbérél man i datue mano, ‘Béréhé ku begom, buluy wéne den médo, méirayén de na uman. Brab i étewe de wén i kulang de, fiyon foy klohe dob beene dotén so.’ ²⁷ Atin fentaus i datuey ni kékérél mano, ‘Atin fantag bé de sébanil begén, mika ro de ké waléyu datu ro, uwit gom bero dini brab féléhu gom bero dob téngaanga kuwe ni.’ ”

I kéahur Jesuse dob Jerusalem

²⁸ Amun i Jesuse brab de kuyugén gédét ron dob dakéle ingéd Jerusalem, ²⁹ énggégumah ro dob sébaane tuduk féndawét Olibo, gédét dob de ingéd féndawét Betfage brab Betania. Ténabar Jesusey ruwowe bé de kuyugén, ³⁰ brab ménbérél bero

mano, “Etah gom mangéy dob nan ingéd. Buluk gégumah gom diyo, gito gom i natiwe kuda diyo, énda sénay énggékuda de. Ukoh gom brab uwit gom dini. ³¹ Buluk wén i ménginsa dob begome, ‘Sedek ukohé kom?’ bérél gom de, ‘Kailangay Kadna tome.’ ”

³² Nodoroy de ruwo ni gétew kuyugén i bénréh ne. Atin énggito roy natiwe ni kuda loo bé bénréh Jesuse. ³³ Amun nukoh ron, énggitoy de gefe de bero brab ménénginsa ro maro, “Sedek ukohé kom i kuda geya nan?”

³⁴ Séménumbul ro maro, “Kailangay Kadna tome.” ³⁵ Atin nuwit roy kudae mangéy dob Jesuse. Brab namféno ro bé de kégal ro brab fénkuda roy Jesuse diyo. ³⁶ Amun méntaus i Jesuse dob Jerusalem, i de étew bénékah roy de dumo bé de kégal ro dob aguwo Jesuse fégito roy kébasana ruwe de.

³⁷ Amun énggégumah i Jesuse dob gonone lémudug dob tuduke Olibo, i kéluhanay de médo kuyugén ménfésalamat ro dob Tuluse brab ménoror ro démayéw métanug, non bé kéluhanay de mékégaif énggito ro. ³⁸ Ménkes ro maro, “Dayéwé tom i Tuluse. Féfiyonéy Tuluse damén i ni datu méngumah tidéw dob Kadnane. Endaén damén i bukuén dob lawayo.”

³⁹ I de dumo bé de Fariseo diyo do ménribuk, ménbérél ro dob Jesuse maro, “Maistéro, féantésém i de kuyugém nan.”

⁴⁰ Endob bang Jesuse ni, “Béréhé ku begom, buluk fén-antés ro, i de batéw ni mékes dayéwé ro Begén.”

⁴¹ Amun taus ron gédét dob Jerusalem, gékulaya Jesusey ni ingéd. Amun énggito no, kénrewo no bé kúray i na nuwe de. ⁴² Brab ménbérél mano, “Méuyotu damén gétiga kom béléewe ni ké atiy kékédane bé bukuéne brab késétibohe, éndob béléewe ni énda gétiga kom de.

⁴³ Gégumah i gaiwe dob begome, géséliwétoy de sébanil begom brab langkaté ro begom inok énda géléfas gom géliwé. ⁴⁴ Féléhué ro begom kéluhanan fiyon foy de kéluhanay de

dumo gom, brab do nga gom. Atin binasané roy de lawi taman énda i sébaan batéw mésama dob rotor i sébaane de. Non énda fénggélolo gom i gaiwe bé kéangéy i Tuluse begom mémukas.”

Dénédél Jesusey de démagang dob lawi i Tuluse

⁴⁵ Amun énggégumah i Jesuse dob Jerusalem, méntaus dob lawi i Tuluse. Amun ménahur, dénédélén i de étew démagang diyo. ⁴⁶ Atin bénréhén beroy ni mano, “Wén i Ménsulate Kébérén i Tuluse mano, ‘I lawi guwe, lawi gonon démasal.’ Endob fénwaléy gom lawi i de ménakaw.”

⁴⁷ Atin sénga fuweh diyo i Jesuse téromo dob Lawi i Tuluse. Endob i de uléw i de fadi, brab de téromo bé kitabe, brab i de méguléw bé de étew, ténulama ro féléhuén. ⁴⁸ Endob énda gérigono ro de non i de médoor étew énda fo séféka ro de, non ménuyot ro mégélingo bé kéluhanay de béréhé no.

20

¹ Wén i no sébaan fuweh, amun diyo i Jesuse téromo dob lawi i Tuluse, brab ureté noy Fiyowe Uret, i de uléw i de fadi brab de téromo bé kitabé brab de odoroy de Judio, ménfégédét ro dob Jesuse. ² Atin fénénginsaa ro maro, “Béréhém begey ké ati atura muwe rémigo bé de ni? Ati ménirayane Beem kuwagib?”

³ Sénumbulo Jesuse bero mano, “Sémuliu ménnginsaan begom. Béréh gom Begén, ⁴ ati séménugue bé Juane inok mautis, Tulus loo ké étew saén?”

⁵ Atin séédél ro maro, “Amuk béréhé tom ‘Tidéw dob Tuluso’, fénénginsaa no betom ké sedek énda fénéngintoowo tom i Juane. ⁶ Endob buluk béréhé tom ‘Tidéw dob étewe’, kéluhanay de ni étew ménlimud, ibéro ro betom batéw taman méléhu tom, non fénéngintoowo roy Juane sénarigoy Tuluse muret bé kékérén ne.” ⁷ Mélaw séménumbul ro maro, “Enda gétinga key ati kétidéw ne de.”

⁸ Mélaw bénréh Jesuse mano, “Enda so béréhé ku de begom ati ménirayane

Bégén kuwagib rémigo bé de ni rigoné ku.”

I binuwayae fantag bé de tete témalima

⁹ Atin nuret Jesusey ni binuwaya mano, “Wén i ségétéwe étew wén i safadén nohoko no. Brab fentalimaén bé de ségiyo étew. Tidéw bénó, ténagakén ménangéy dob mérayue ingéd bé ménrugaye gai. ¹⁰ Amun énggégumah i gaiy kékétéwe de, séménugu ségétew bé de sugu-sugué no inok mongot bé kaane de baad bé de onokén. Endob i ni étew lénubag i de témalima bé ni safad. Brab fénule ro énda i suwaréw nuwitén. ¹¹ Tidéw bénó, séménugu man bé géruwowe bé de sugu-sugué no. Endob lénubag ro so brab fénémala ro brab fénule ro énda i suwaréw nuwitén. ¹² Tidéw bénó, fénuitén soy gételewe bé de sugu-sugué no. Endob fénawéto ro so taman ménfali. Brab dénédél ro. ¹³ Tidéw bénó, i gefee bé ni safad ménbéréh mano, ‘Ati rigoné kuwe? Gétuwa ku. Féuwt guy tintuwe nga gu kégédawa ku. Fégadata roy nga guwe.’ ¹⁴ Endob amun énggitoy de témalima, ménshérén-bérén ro maro, ‘Been i niy nga i gefee bé ni safad. Féléhué tom inok gékatom i ni safad.’ ¹⁵ Tidéw bénó, dénédél ro mésut tidéw dob safade brab fénléhu ro.” Atin fentaus Jesusey kékérén ne mano, “Ati rigoné gefee safad dob de ni témalima bé safad ne? ¹⁶ Angéyé no féléhuén bero. Brab irayén man dob de ségiyo témalima de.” Amun énggelingoooy de étew i ni kékérén Jesuse, ménbéréh ro maro, “Békén damén mérigo nan.”

¹⁷ Tidéw bénó, ténéngténg Jesuse bero atin ménnginsa mano, “Amuk békén, ati atag i ni Ménsulat Kébérén i Tuluse mano ‘I batéwe nikaay de réménigo bé lawie, been i ménwaléye toow na fo balilaga fiyo batéw?’ ¹⁸ Fiyon atiy mélawue dob nan batéw mélawina. Brab buluk i batéwe ni mélawu dob de étew, rénahé no bero maak bubuk sébuwan.”

¹⁹ Atin i de téromo bé kitabé brab do uléw i de fadi, ténulama ro kénéfo

i Jesuse bé béno gai, non gébela dob berowey ni binuwaya. Endob énda fakayén non mégilak ro bé de médo do étew. ²⁰ Mélaw ténulik ro. Atin sénarigo roy de étew ménginsaan de inok buluk békén katabuwan i késumbul ne, wén i funa ro de témebo brab uwité ro dob de étew gémamak bé de kukuman. ²¹ Tidéw béno, i de étew ni fénginsaa ro maro, "Maistéro, gétiga key toow i kétoro me. Brab métintu go, énda i isu ramigo mo bé de étew. Yamula toroé moy toowe fantag bé kétayay Tuluse toow. ²² Mélaw bérhéhém begey, aw fatut ba mayad gey buwis dob Sesare sani datue dob Roma taloo no énda?"

²³ Endob énggétiga Jesusey akar ruwe brab bénréhén bero mano, ²⁴ "Irayanu félatah." Amun niraya ro de, ménénginsa i Jesuse mano, "Ati gefee dawét brab falas gito gom dob nan?"

Séménumbul ro maro, "Ka Sesar."

²⁵ Tidéw béno, bénréh Jesuse mano, "Iray gom dob Sesarey ka Sesare. Brab iray gom dob Tulusey kay Tuluse."

²⁶ I de étew ténulama ro fégakaran i Jesuse, toow ro fo ménggaif, non toow fo fiyoy késumbul ne de. Mélaw énda i funa ro témebo bé Jesuse. Komon ménantés ro.

Fantag bé kétébulee

²⁷ Atin wén i do Saduseo diyo, sani de énda méngintoow bé kétébulee i Tuluse bé de étew moso. Mélaw ménfégédét ro dob Jesuse ménginsa maro, ²⁸ "Maistéro, sénulat Moisese betom i kukumane bé buluk i ofo i étewe ménléhu, brab énggfélelo noy bawag ne, énda i nga ro, fatut bawagéy tuwaréy ne inok wén i séfu i ni étew bé tuwaréy ne. ²⁹ Ufama, wén i fitew gétew sétuwaréy falan lagéy. Brab i ofoe de ménawag. Tidéw béno, ménléhu énda i nga ro. ³⁰ Tidéw béno, i gétunduge de bénawagén soy bawage fénled i ofo ne. Atin ménléhu so énda i nga ro. ³¹ Atin i gétéléwe de bénawagén so taman dob géfitew ruwe. Endob ménléhu ro kéluhanan énda i nga ro. ³² Tidéw béno, ménléhu soy ni

libun. ³³ Mélaw bé gaiy kétébulee moso, ati isuwe bawag i ni libun bé ni fitew gétew sétiman idéng? Non énggébawaga ro kéluhanan bé méuyag ro de séna."

³⁴ Séménumbul i Jesuse mano, "I de étew béléewe, sébawag ro. ³⁵ Endob i de étew métoror tébuleen géangéy dob lawayo, éndaén sébawag ro. ³⁶ Non ségiléw ro bé de télaki brab énda méléhu ro. Beroy de nga i Tuluse non méntébule ro. ³⁷ Atin fantag bé kétébulee, fiyon i Moisese féngétuwa noy wén i kétébule. Non dob mérinoe kayéw, féndawétén i Kadnane 'Tuluse féngadafé Abrahame, Isake, brab Jakobe.' ³⁸ I atag i ni, i Tuluse féngadaféy de méuyag étew, békén do ménléhu. Non i kéluhanay ménléhue, méuyag séna dob karang i Tuluse."

³⁹ Atin i de dumo bé de témoiro bé kitabé ménbérh ro maro, "Fiyoy késumbul me Maistéro." ⁴⁰ Tidéw béno, énda ménbaraw ro de ménginsaan man.

⁴¹ Atin bénréh Jesuse dob berowe mano, "Ati kéfakay ne ké bérh i de étew i Kristowe séfu Dabid? ⁴² Non fiyon i Dabide bénréhén dob kaane libro féndawét 'De Kanta' mano, 'I Kadnane ménbérh dob Kadna kuwe, sar go dob kuwono kuwe, ⁴³ taman témanbanu bé de sébanil Beem.'"

⁴⁴ Atin féntaus Jesusey kékérh ne mano, "Amuk féndawét Dabidey Kristowe 'Kadnan', ati kéfakay Kristowe séfu Dabid?"

⁴⁵ Amun dob téngaangay de kéluhanay de étew mégélingo, bénréh Jesuse dob de kuyugén mano, ⁴⁶ "Ingat gom bé de maistéroy de kukuman non méuyot ro sugud-sugud bé de toow fo fiyo kégal ro, brab méuyot ro fégadatan ségifaén dob de fadiyan, brab méuyot ro mésar dob de fiyo saran dob de lawi féngadafan brab dob de karagiya. ⁴⁷ Endob lafisé roy de libun baléw inok afasé roy de lawi ro. Tidéw béno, démasal ro bé de métaah kédasal dob téngaangay de étew non marok médirung i de ni tete rigoné ro. Endob i ni do étew toow na fo géttimal ké mékukum ro moso."

21

¹ Amun diyo i Jesuse dob lawi i Tuluse, énggito noy de kawasa étew lémawu ro kurta dob ahurone kurta. ² Atin énggito no soy ségettéwe libun baléw méskinan, méniray saén ruwo lafin furo kurta tintu énda balilagaén. ³ Atin bénréh Jesuse mano, “Béréréh ku begom i toowe, i ni méskinan libun baléw maak mas na médooy niray ne bé de dumo étew kawasa. ⁴ Non i de ni étew kawasa, méniray ro saén kloh tidéw dob de médooy kurta ro. Endob i ni baléw éntéyén i kéluhanay kurta ne fégafaguyagén.”

Fantag bé tamfaday duniiae

⁵ Atin i de dumō bé de étew diyo séuret-uret ro fantag bé lawi i Tuluse rénigo bé de batéw toow fo fiyo brab de toow fo fiyo falasén balilaga éntingayén niray i de étew dob Tuluse. Endob ménbéréh i Jesuse mano, ⁶ “Gégumah mosoy gaiwe, i kéluhanane gito gom mébinasa. Brab fiyon i de batéw fénggérigo de émbéragar ro.”

⁷ Atin ménénginsa ro maro, “Maistéro, kédiron mérigoy de ni? Brab ati fégélononone de bé ni gai ké gédétén gumah?”

⁸ Atin séménumbul i Jesuse mano, “Ingat gom inok énda géfagakaran gom. Non médooy mosoy de étew gégumah usaré roy dawéti guwe, brab émbéréh ro maro, ‘Begéney Kristowe, brab i gai guwe ay ni nén.’ Endob kagom unuron bero loo ké furay gom bero. ⁹ Atin kagom mégilak ké gélingoo kom i kékéréh i sétibohe brab gélingoo kom soy fantage bé de gira. I kéluhanay de ni mérigo éndob békén sénay niy tamanane.”

¹⁰ Bénréh Jesuse man mano, “I de ingéd sétiboh ro bé de ségiyo ingéd. Brab i de sakuf fangangaturan sétiboh ro bé de ségiyo. ¹¹ Atin wén mosoy do émbagér luba, brab lénggob, brab do médooy mégilak kérégénon dob de ségiyo-giyo ingéd. Brab wén mosoy téfégito fégélononon de tidéw dob lawayo. ¹² Endob bé énda séna mérigoy de ni, kéfoén gom

brab kérégénan gom sabaf bé kéunur gome. Brab uwitén gom dob de lawi féngadafan inok kukumén gom brab férissunén gom. Brab uwitén gom dob adafay de datu inok kukumén gom sabaf begom i do kuyug gu. ¹³ Endob amuk mérigoy de ni dob begome, been i niy gaiy kéuret gome bé Fiyowe Uret dob berowe. ¹⁴ Fégétédém gom i ni, amuk mérigoy de ni dob begome, kagom émbuku fantag bé ati késumbul gome. ¹⁵ Non iraya ku begom kégétigan brab do kékéréh inok i de sébanil begom énda i fiyo késumbulo ro begom. ¹⁶ Fiyon i de lukés gom brab do dumō gom sétiman idéng brab de samung gom brab do dumō gom, iray ro begom dob de gémamak kukuman inok féléhué roy de dumō begom. ¹⁷ Atin i kéluhanay de étew méraréy ro begom sabaf bé Begéne. ¹⁸ Endob fiyon fo ké méléhu gom, maak énda gébinasana roy fiyon sébaan buk dob de uléw gom. ¹⁹ Fédayday gom munur Begén bé nan gai fefasangén gom non been i funa kome mífukas.

²⁰ “Atin buluk gito gom i Jerusaleme séliwétoy de sundalo néen, émfégétigan begom bé gédétén i kékina nuwe. ²¹ Atin i de étew bati dob sakuf Judeawe fatut ro méraréy dob de tuduk. Brab de étew dob Jerusalem fatut ro so méraréy. Brab i de étew gélyi de, békén fatut ro mahur. ²² Non been i niy gaiwe kémukum i Tuluse inok métuman i Ménslate Kékéréh i Tuluse. ²³ Toow fo mékégédaw-gédaw i de libun obor brab de libun mériton non gégumah i gaiwe toow fo mékégilak atin i Tuluse kukumé noy de ni do étew Judio. ²⁴ Atin i de dumō étew féléhuén tibohén bé sundange, brab i de dumō de férissunén dob de ségiyo-giyo ingéd. Brab i de étew békén Judio daa roy Jerusaleme inok mébinasa taman gilid i karowe gai.

²⁵ “Wén so mosoy fégélononon de dob téresange brab téresang kélunganone brab de gitoon, brab dob duniiae niy kéluhanay de ingéd kégilakan non bé késelekéy émbagére

bagél dob dogote. ²⁶ I de étew mésumba ro funowén bé kégilak ruwe ongot-ongot bé ati mérigowe dob duniyae ni, atin non i de étingayén dob lawayo mékuyung. ²⁷ Tidéw béno, i Nga i Kéilawane, sani Begéne, téfégítowu tidéw dob lawayo gégumah dob rawéne toow fo barakatan brab rémendaw. ²⁸ Buluk mérigoy de ni, tindég gom brab léngag gom non gédétén gumah i gaiwe méfukas gom.”

²⁹ Tidéw béno, nuret Jesuse beroy ni binuwaya mano, “Fégitung gom i de kayéw. ³⁰ Dini dob betome ni, buluk gito gom i de dau ro mégalin, gétiga kom gédétén i gaiwe méduf. ³¹ Loo so bé ni amuk gito gom i de ni mérigo, gétiga kom gédétén i kéumah i kéféguléw i Tuluse.

³² “Béréhé ku begom i toowe, i de étew méuyag béni, énda méléhu ro taman mérigoy de ni. ³³ Ilawaye brab duniyae méalfa ro, éndob i kékéreh guwe énda méalfaén.

³⁴ “Ingat gom. Kagom démoyun fégitungén i kéfaguyaya brab téolonolone, brab kagom toowén fégitungén i kéuyaga kome, non i nan gai séfuleu gégumah bé gaiwe békén karangé kom. ³⁵ Non tékow gégumah i ni gai dob kéluhanay de étew dob duniyae ni. ³⁶ Ingat gom brab sénga tékélid gom dasal inok émbagér gom énda mékaid gom bé kéluhanay de ni mérigo. Atin gétindég gom dob adafa kuwe énda mémala gom.”

³⁷ Bé béno do gai, sénga fuweh mangéy i Jesuse téromo dob lawi i Tuluse, brab sénga kélunganon ménangéy dob tuduke Olibo. ³⁸ Brab i kéluhanay de étew dob no gonon, sénga toow géfuwén mangéy ro dob lawi i Tuluse inok fégélingoé roy Jesuse muret.

22

I rénigo Judase

¹ Bé béno gai, i kékanduli i de Judio féndawét “Témara” gédétén. Bé no kanduli, amaé roy fane énda fénrukén.

² Atin i de odoroy de fadi brab de téromo bé kitabé séméléd ro bé ati

kéféléhu ruwe bé Jesuse. Endob sékémén saén, non mégilak ro bé de étew.

³ Tidéw béno, i Satanase rénahuko noy Judas Iskariote ségétew bé de folo bra ruwo kuyug Jesuse. ⁴ Atin ménangéy i Judase dob de uléw i de fadi brab de méguléw bé lawi i Tuluse brab sénbéréh roy ati kékéfo ro bé Jesuse. ⁵ Toow ro de fo ménoror brab ménuyot ro de ké iraya ro kurta i Judase. ⁶ Tidéw béno, ménagayun i Judase, brab sénlédén i gaiwe ké énda i dumo Jesuse médoó étew inok fékéfoén.

⁷ Amun ménifus i firoye gétérésangan, ménangéy i gaiwe fatut i de Judio sémumbali nati bili-bili kay kékandulie féndawét “Témara”. ⁸ Mélaw sénugu Jesusey ruwowe bé de kuyugén ro Pedro brab Juan. Brab ménésbéréh bero mano, “Agéw gom brab tafay gom i amaé tome kay kandulie ni ‘Témara’.”

⁹ Ménénginsa ro dob Jesuse maro, “Hon i kétaya muwe de gono key té mogoh?”

¹⁰ Séménumbul i Jesuse mano, “Dob Jerusalem. Amuk gumah gomén diyo gébalaka kom i ségétewe étew lagéy ménuit binangga ménféno wayé. Furay gom de mangéy dob lawie ayo no. ¹¹ Tidéw béno, béréh gom dob gefee bé lawie makom, ‘Méuyot i Maistérowe ké gétiga no hon i sibéye de gono no mama beroy de kuyugén bé ni kékanduli.’ ¹² Atin i gefee bé lawie toroé no begom i dakéle sibéy wén i de kagamitan de dob rotor i lawie. Diyo i kéluhanay gamité kome. Diyo tafay gom i kéluhanay amaé tome.”

¹³ I Pedrowe brab Juane ménangéy ro dob no ingéd. Atin énggito roy kéluhanane loo bé kékéreh Jesuse de bero. Tidéw béno, térafay roy de amaé ro kay kandulie “Témara”.

I kékama i Kadnane

¹⁴ Amun ménahur i Jesuse dob lawie, atin amun gumahén i urase, ménasor dob doror i ahayane beroy de kuyugén. ¹⁵ Atin ménbéréh i Jesuse

mano, “Toow fo méuyotu mama séréngan begom bé ni kéama kanduli ‘Témara’ non éndaén mérugayén taman méukumu. ¹⁶ Béréhé ku begom i toowe, éndaén mamau bé ni kéama bé kékandulie ‘Témara’ taman gégumah i gaiy kéféguléw i Tuluse bé de étewén. Bé no gai, wén i mantu atag i ni kanduli.”

¹⁷ Tidéw béno, éndot Jesusey tabu i arake brab ménfésalamat dob Tuluse. Atin nirayén i tabue dob de kuyugén. Atin bénréhén dob berowe mano, “Edot gom i ni brab sétkido kom i arake ni. ¹⁸ Béréhé ku begom, éndaén minému arak loo bé ni taman gégumah i gaiy kéféguléw i Tuluse bé de étewén.”

¹⁹ Tidéw béno, éndotén i fane, brab ménfésalamat dob Tuluse brab sénkébeng-kébengén, brab sénaarén dob de kuyugén. Atin ménbéréh mano, “Ay ni fane. Been i lowoh guwe, niray fégéfukas begom. Ama gom i ni inok gétédémo kom Begén.”

²⁰ Amun énggilid i kéama ruwe, éndotén i tabue brab ménbéréh mano, “I tabue ni been i niy dara guwe rémanas, fégéfukas begom, sani tan-dae bé mantuwe fasad i Tuluse bé de étewén.

²¹ “Endob téngténg gom. I émfékéfoe séko Begén dini dob Begéne ni mama.

²² I Nga i Kéilawane, sani Begéne, féléhuén loo bé kétayay Tuluse mérigo. Endob mékégédaw-gédaw i étewe ni émfékéfo, non méukum fo toow.”

²³ Tidéw béno, i de kuyugén séfenginsa ro ké ati isuwe bero rémigo bé ni.

²⁴ Tidéw béno, ménséédél de kuyugén ké ati isuwe bero toow na fo gérotor. ²⁵ Atin bang Jesuse dob berowe, “I de étew datu dob ni duniya wén i atura ro dob de étew ro, brab i de uléw tabarén ‘Dumoy de étew.’” ²⁶ Endob békén fatut loo bé ni dob begome. I toowe gérotor bé begomey fatute fénggiring bé toowe tuwaréy begom. Brab i méguléwe géiring bé sugu-suguéne. ²⁷ Ufama, ati isuwe mas na gérotor, i étewe duwoton ménsar mama, taloo no i

étéwe démuwoton de? Békén ba i étewe ménsar mama? Endob i Begéne, ay niwu dob kérara gome loo bé ségétewé sugu-suguén.

²⁸ “Atin i begome do méntaus ménodor Begén fiyon fo ké bé de gai kérégénanu. ²⁹ Atin loo bé kériray i Boh guwe Begén bé kuwagibé méguléw, iraya ku so begom kuwagib loo bé ni. ³⁰ Bé gaiwe méguléwu, mama gom brab miném gom séréngan Begén. Brab géésar gom dob de saran kay de datu inok kémukum gom bé foloe brab ruwo do sakuf i de Judio.”

Nuret Jesusey fantag bé Pedrowe

³¹ Atin ménbéréh i Jesuse dob Simon Pedrowe mano, “Simon, fégélingoém. I Satanase méntungkas bé tukawa no begom kéluhanan, loo bé kéfanire bé faréye inok féganané noy fiyowe bégas bé ukofe. ³² Endob i Begéne, dénasala ku beem inok i káfengintoow me méégét. Brab amuk séfule go mangéy dob Begéne, féeégétém i káfengintoow i dumo muwe.”

³³ Endob bang Pedrowe, “Kadnan, modoru Beem fiyon fo ké dob kalabusuono taloo no fiyon fo ké dob léhuone.”

³⁴ Séménumbul i Jesuse mano, “Pedro, énda séna ukoro i férufete béléewe, dirungé mo Begén télén gule bé énda gélolo mo Begén.”

³⁵ Tidéw béno, fénénginsaa Jesuse bero mano, “Bé késugu guwe begom bé kagom muwit kurta taloo no amaén, brab safatos, wén bay kulang dob begome?”

Séménumbul ro maro, “Enda.”

³⁶ “Endob béléewe,” bang Jesuse, “buluy wéne kurtaén brab amaén, uwité no, brab buluy éndae sundangén, féléléyén i géruwowe lafin kégalén inok fégébéléyén sundang.”

³⁷ Non béréhé ku begom i ni, métuman i Ménsulate Kébéréh i Tuluse fantag bé Begéne mano, ‘I ni étew méukum maak ségétew énda ménodorén bé kitab i gémamake kukuman.’ Hoo, i métuman fantag bé Begéne féganayén métuman béri.”

38 Tidéw béno, i de kuyugén maro, “Kadnan, wén i ruwo timan sundang dob ni.”

Atin séménumbul i Jesuse mano, “Békén tintu sundang i bénréh guwe begom! Témérén tomén séuret-uret!”

39 Tidéw béno, ménagéw i Jesuse loo bé adat ne rigoné no mangéy dob tuduke Olibo. Atin ménodor i de kuyugén de. **40** Amun gégumah ro dob no gonon, bang Jesuse, “Dasal gom inok énda métukawan gom.”

41 Tidéw béno, ménférayu bero gumaha téabar. Atin ménlingkuwé brab déménasal, **42** mano, “Abay, buluk méuyot go de, kago fédayaén Begén mérasay. Endob i kaame kétayan i mérigowe damén, békén kagén kétayan.” **43** Tidéw béno, i télakiwe tidéw dob lawayo méntéfégito dob Beene brab fénbagérén. **44** Bé béno uras, toow fo ménbuku i Jesuse. Brab toow fo émbagér i kédasal ne. Atin ménénét fo toow, brab léménuyut i énét ne dob fantade maak dara.

45 Amun énggilid démasal, téménindégi ménagéw ménangéy dob de kuyugén. Endob énggito no bero énggfidong ro non lugotén ro non émbuku ro. **46** Mélaw nulégén bero mano, “Sedek fidong gom? Tek gom brab dasal gom inok énda métukawan gom.”

I kékéfoe bé Jesuse

47 Amun émbéréh sénay Jesuse, énggumah i médoowe étew, brab Judasey ségétewe bé de folo bra ruwo gétew kuyugén i méngguléwe bero. Féngédéto noy Jesuse inok aréké no. **48** Fénénginsaa Jesuse mano, “Judas, fékéfoém i Nga i Kéilawane béraréké me?”

49 Amun énggitoy de kuyug Jesus i ni ménrigo, ménbéréh ro maro, “Kadnan, sétiboh gey béraréké de sundang gey?”

50 Atin i ségétewe béraréké de kuyugén ténibohén i riféy gérotore fadi brab ménsilaf i kuwonone kélingoén.

51 Endob bang Jesuse, “Ngaén i nan!” Brab génamakén i kélingoéne ménfali, atin ménwuwa.

52 Atin ménbéréh i Jesuse dob de odoroy de fadi, brab de odoroy de mantay béraréké lawi i Tuluse, brab de odoroy de Judio mangéy de kéméfo mano, “Sedek ménuit gom do sundang brab do tafés, maak ségétewu tulisan kéfoé kom? **53** Sénga fuweh Betom dob lawi i Tuluse, éndob énda kénéfo gom Begén. Endob méuyot gom rigoné kom i ni béri, non délémon, brab énda i gérito begom.”

Dénirung Pedrowe

54 Tidéw béno, kénéfo roy Jesuse, brab nuwit ro dob lawi i gérotore fadi. Brab i Pedrowe ménfuray bero, éndob ménférayu kloh. **55** Atin wén i aféye nuyag diyo dob kérara i fésayawane brab wén i de ménasar géliwét. Ménasar so diyo i Pedrowe. **56** Enggitoy ségétewe kénogon sugusuquéen i Pedrowe brab bénréhén mano, “I étewé ni dumo no.”

57 Endob dénirung Pedrowe mano, “Di, énda gélolo guy nan étew ménkéfo.”

58 Enda ménrugayén, ségétew man i énggégéloloué béraréké bero, “Beem soy ségétewe bero.”

Endob séménumbul i Pedrowe mano, “Békén! Békén dumo no begén!”

59 Amun ségéuras man tidéw béno, ségétew man i ménbéréhe mano, “I ni étew tintu dumo no, non ségétew étew so tidéw Galilea.”

60 Séménumbul man i Pedrowe mano, “Adih, énda gétiga kuy béraréké muwa nan.” Atin sonom béraréké, i férufete ménukoro béraréké sénay Pedrowe. **61** Atin i Kadnane Jesus séménling brab ténéngténgén i Pedrowe. Bé béraréké so énggétédémo Pedrowey bénréh Jesuse mano, “Enda séna ukoro i férufete béraréké, dirungé mo Begén télaw gule béraréké gélolo mo Begén.” **62** Tidéw béraréké, ménusut i Pedrowe ménangéy dob fuwehe brab toow fo kéménrew.

I kékukume bé Jesuse

63 Atin i de étew mantayan béraréké Jesuse féganayé ron tafésén brab diyangkaén. **64** Tidéw béraréké, ténléb

roy de moto no bé munsalawe brab féantuk ro de ké ati téménafése de. **65** Brab toow ro fo fénémalay Jesuse bé tetee kékéréd ro.

66 Amun géfuwénén, i de odoroy de Judio, brab de odoroy de fadi, brab do témo ro bé kitabe, ménsélimud ro, brab fén-uwit roy Jesuse dob téngaanga ruwe. **67** Atin fénénginsaa roy Jesuse maro, "Buluk Beem i Kristowe, sani fénémili i Tuluse méguléw, bérhéhém begey."

Atin séménumbul i Jesuse mano, "Fiyon fo ké bérhéhé ku begom, énda méginugut gom de. **68** Atin buluk wén i fénginsaé ku begom, énda sumbulu kom de. **69** Endob tidew béléewe, i Nga i Kéilawane fésarén dob kuwonoy barakatane Tulus."

70 Mélaw fénénginsaa roy Jesuse maro, "Aw Nga i Tuluse Beem?"

Atin séménumbul i Jesuse mano, "Toow i nan bénréh gom bé Nga i Tuluse Begén."

71 Tidew bénó, ménbérhéh ro maro, "Endaén kailanga tom i témbœ de dob betome. Non énggelingoo tomén tidew dob Beene."

23

1 Tidew bénó, i kéluhanay ruwe ménlimud, nuwit roy Jesuse mangéy dob Pilatowe sani méguléwe tidew Roma. **2** Nuret ro dob Pilatowey kéluhanay de tete rénigo Jesuse kun. Bénréh ro maro, "Enggitoy gey i ni étew fanangguvité noy de étew inok sébanil ro begom do gémamak kukuman. Enda fébayade no bero buwis dob toowe fo gérotor datu féndawét Sesar dob Roma. Bénréhén so bé Beene kun i Kristowe sani ségetéwe datu."

3 Tidew bénó, fénénginsaa Pilatowey Jesus mano, "Aw Beem i Datu i de Judio?"

Séménumbul i Jesuse mano, "Beemey ménbérhéhe de."

4 Atin bang Pilatowe dob de odoroy de Judio brab dob kéluhanay de étew diyo, "Karangé ku, énda i funa no fatut mémukum."

5 Endob fétausé ro soy kétébo ruwe de maro, "I ni étew téménoro dob kéluhanay sugud i de ingéd dob Judea fanangguvité noy de étew sétiboh begom do gémamak kukuman. Féngganayén rénigoy ni dob Galilea, atin ménangéy dini inok rigoné no so."

6 Amun énggelingoo Pilatowey ni, ménénginsa mano, "Aw tidew Galilea i ni étew?" **7** Amun énggétiga no tidew diyo, sénugu Pilatowey Jesuse mangéy dob Herode, sani datue dob Galilea, non diyo dob Jerusalem bé no gai. **8** Ménoror i Herode bé kégito nuwe bé Jesuse. Non médooy énggelingoo nuwe fantag bé Jesuse, brab ménrugayén i kéuyot ne de gésérito. Témayan de damén ké gito noy Jesuse rémigo mémégaif. **9** Mélaw médooy fénénginsa ne bé Jesuse. Endob énda séménumbul i Jesuse. **10** Diyo soy de odoroy de fadi brab de témo ro bé kitabe. Atin toow ro fo ténebo i Jesuse. Endob énda soy sumbul Jesuse de. **11** Mélaw i Herode brab de sundalo no, déniyangka ro brab fénémala ro. Tidew bénó, fénkégala roy Jesuse bé toowe fo fiyo métaah kégal maak datu brab fénséfule ro mangéy dob Pilatowe. **12** Tidew bénó, i Herode brab Pilatowe ménwaléy ro sékélayaman, fiyon fo ké sébanil ro mémétaén.

13 Ténawag Pilatowey de odoroy de Judio, brab de odoroy de fadi, brab de ségiyo-giyo étew. **14** Atin bénréhén bero mano, "Nuwit gom i ni étew Jesus dob begéne, brab bénréh gom fanangguvité noy de étew gom sétiboh begey do gémamak kukuman. Endob béléewe fénénginsaa ku dob adafa kome, atin énggétiga ku énda i toow bé kéluhanay bénréh gome. **15** I datu Herode énggétiga no so énda i salaén loo bé de bénréh gom, mélaw fénséfuleen so mangéy dini. I ni étew énda i rénigo no tete. Békén fatut féléhuén. **16** Mélaw fébadas gu saén, tidew bénó fétangéy gu."

17 I ni ménrigo bé gaiy kékandulie "Témara". Atin i adat i méguléwe

tidéw Roma sénga kanduli “Témara” témangéy ségétew ménkalabusu inok fiyoy fédew i de Judio de. ¹⁸ Mélaw non énda kukumé Pilatowey Jesuse féléhuén, i de étew ménsélimud ménkes maro, “Féléhu gom, brab tangéy gom i Barabase.” ¹⁹ (I Barabase ni étew ménférisu non ménamung sétiboh dob Jerusalem bé de gémamak kukuman. Ménméléhu so do étew.)

²⁰ I Pilatowe ménbéréh man ségule dob de étew ménsélimud bé i kétaya nuwey Jesusey tangéyéne. ²¹ Endob ménkes i de étew maro, “Féléhu gom! Kélabo gom dob kruse!”

²² Endob ménbéréh i Pilatowe bé gétéléw ne gule mano, “Ati rénigoy ni étew? Enda i gétiga ku funa tom de méméléhu. Fétafés gu sa atin tangéyén.”

²³ Endob i de étew ménkes ro man minut métanug i Jesuse kélabonén dob kruse. ²⁴ Tidéw béno, sabaf bé kéekes ruwe, ménagayun i Pilatowe bé kéongot ruwe kémukum bé Jesuse.

²⁵ Atin loo bé kétaya ruwe, téngayén i Barabase, sani étewe férisu sabaf bé beeney ségétewe méméléhu brab fénséti hén i de étew sébanil bé de gémamak kukuman. Atin i Pilatowe nirayén i Jesuse dob de étew ménsélimud inok rigoné roy ati kétaya ruwe rigonén dob Jesuse.

Kélabo roy Jesuse dob kruse

²⁶ Nuwit i de étew i Jesuse mésut dob Jerusalem inok kélaboné ro dob kruse. Atin dob de aguwon, énggabalaka roy étewe féndawé Simon tidéw dob ingéde Siren. Béno sénay kégumah ne dob no ingéd. Fénodor ro inok fégésé ro démuwal bé kruse furay bé Jesuse.

²⁷ I médoowe étew furay bé Jesuse. I de dumo bero do libun kémérew ro brab rémuung non bé kérigo ruwe bé Jesuse. ²⁸ Sénling Jesuse bero mano, “Do libun tidéw Jerusalem, kagom kéréwon Begén. Kérewo kom i de lowoh gom brab de nga gom. ²⁹ Non gégumah i gaiwe mérégén brab émbéréh i de étew maro, ‘Méoror i de libun énda mén-obor ro, énda i do nga

ro, brab énda i féntutu ro do nga.’ ³⁰ Bé no gai, émbéréh i de étew dob de tuduk maro, ‘Tamfurén gey!’ brab dob de burur, ‘Bunéyén gey!’ ³¹ Non buluk rigonéy de étew i ni dob ségétewe étew énda i rénigo no tete, toow na fo mas gétimal dob de étew réménigo tete.”

³² Atin ménuit ro so ruwo gétew férisu inok séréngan ro féléhuén bé Jesuse. ³³ Amun ménggégumah ro dob no gonon féndawé “kulobong uléw”, kénlabo ro diyo i Jesuse dob kruse ni. Kénlabo ro soy ruwowe gétew férisu dob de krus. I sébaane de fingé dob kuwono Jesuse, brab i sébaane de dob fingé biwong Jesuse. ³⁴ Tidéw béno, déménasal i Jesuse mano, “Abay, fésagada mo bero non énda gétiga roy rigoné ruwe.” Atin i de sundalo sénkungkungo roy ati gégédote bé kégal Jesuse. ³⁵ I lala i de étew téménindég diyo témanud, i de odoroy de Judio déniyangka roy Jesuse maro, “Ténabangén i de ségiyo étew inok énda méléhu ro. Mélaw, buluk Beeney Kristowe tintu Mémukas fénemili i Tuluse, sedek énda gétabanga noy lowoh ne inok énda méléhuén?”

³⁶ Déniyangka i de sundalo so. Atin téningé ro brab niraya ro bé mélémuwe arak brab ménbéréh ro maro, ³⁷ “Buluk Beemey datu i de Judio, tabangém i lowoh me.”

³⁸ Brab wén i ménsulate dob rotor i uléw Jesuse mano, “Ay niy datu i de Judio.”

³⁹ Atin i ségétewe bé de férisu ménbitin diyo bero Jesuse, diyangkaé no soy Jesuse mano, “Aw békén ba Beemey Kristowe Mémukas? Mélaw tabangém begey brab i kaame lowoh.”

⁴⁰ Endob i dumo nuwe férisu ménbéréh dob sunguwe de mano, “Kago émbéréh loo bé nan! Aw énda mégilak go bé Tuluse? I betome télén gétew ménkukum féléhuén. ⁴¹ Atin i betowe fatut féléhuén non bé de tete rénigo to. Endob i ni étew énda foy tete rénigo no.” ⁴² Tidéw béno, ménbéréh dob Jesuse mano, “O

Jesus, fégétédéménu amuk Beemén i méguléwe."

⁴³ Séménumbul i Jesuse mano, "Bérhéhe ku beem i toowe, béleewe séko diyo go dob Begéne dob bélwono fantad."

I kéléhu Jesuse

⁴⁴ Amun géutuhén, éndaén réméndaw i térsange. Déménlémon i fantade taman ménifus i télewe géuras.

⁴⁵ Tidew béno, i rindunge bénitin dob mékétéfuwe sibey dob lawi i Tuluse, ruwoy ménsédaya nuwe. ⁴⁶ Atin i Jesuse ménkes métanug mano, "Abay, sarigé kuy kamatu guwe dob Beeme." Amun énggabérého noy ni, ménléhu i Jesuse.

⁴⁷ Wén i ségetéwe gérotor odoroy de sundalo énggito noy ni ménrigo, atin dénayéwén i Tuluse mano, "Toow fo métintuy ni étew!"

⁴⁸ I de étew ménsélimud diyo, amun énggito roy ni ménrigo, ménule ro ménmala brab tete i de fédew ro.

⁴⁹ Atin i kéluhanay de étew énggébalaka roy Jesuse, fiyon i médoowe bé de libun tidew Galilea ménodor de, téménindég ro dob mérayue téméngténg brab énggito ro soy kéluhanay ni ménrigo.

I kélébénge bé Jesuse

⁵⁰ Wén i ségetéwe lagéy féndawét Jose tidew Arimatea sébaan ingéd dob Judea. Ségetéw fiyo étew brab ménunur bé de kukumay de Judio.

⁵¹ Fiyon fo ké beeney ségetéwe bé de kéfédéway de Judio, énda ménagayu no bé rénigo ruwe bé Jesuse. Ongot-ongoté no soy gaiy kékéfugé i Tuluse bé de étewén. ⁵² Ménangéy dob Pilatowe brab nongotén i bangkay Jesuse. ⁵³ Atin éndotén i bangkay Jesuse tidew dob kruse brab bénausén bé fiyowe safut, brab nahurén dob lébénge ténosong dob rangih i fingase.

I ni lébénge énda séna ménlébéno no.

⁵⁴ Igaiwe béno témégén Biyarnes brab gédétén i gaiwe Sabado sani gaiwe kétéréy de Judio.

⁵⁵ I de libun ménodor bé Jesuse tidew Galilea, ménfuray ro bé Josehe

brab énggito roy lébénge brab ati kéahure bé bangkay Jesuse diyo.

⁵⁶ Tidew béno, ménule ro brab téménafay ro fégéfamut brab do mamut daun kay bangkay Jesuse. Endob bé gaiwe kétérén, téménréni ro loo bé kékébéréh i de kukuman nodoro ro.

24

I kétébule Jesuse

¹ Amun toow fo géfuwén bé no Duminggu, i de libun ménodor bé Jesuse tidew Galilea, ménangéy ro dob lébénge Jesuse. Nuwit roy mamute daun ténafeay ro. ² Amun énggégumah ro dob lébénge ne, énggito roy batéwe fénggétéléb bé bengaway lébénge ni ménkériring. ³ Tidew béno, ménahur ro, éndob i bangkay Jesuse éndaén diyoén. ⁴ I lala ruwe témindég mégaif, ménékow ménfégíttoy ruwowe gétew lagéy, sémelinang i de kégal ro.

⁵ Toow fo ménggilak i de ni libun, mélaw déménungul ro. Tidew béno, ménbéréh i de lagéy ni maro, "Sedek mangéy gom dob lébénge séméléd bé ségetéwe étew méuyag? ⁶ Endaén dini no, non ténebule i Tuluse nén. Fégétédém gom i de kékébéréh begom diyo de séna dob Galilea mano, ⁷ I Nga i Kéilawane iray dob de tete étew atin kélaboné ro dob kruse. Endob dob gétéléw ne gétérésang, tébule."

⁸ Tidew béno, i de libun ni, énggétédémo roy bénréh Jesuse.

⁹ Mélaw ménagéw ro tidew dob lébénge brab nuret ro dob de folo bra sébaan kuyug Jesuse brab dob kéluhanay de dumo étew i kéluhanay énggito ruwe brab énggelingoo ruwe. ¹⁰ (I ni do libun ro Maria Magdalena, Juana, brab Mariawe idéng Santiago, brab de dumo libun, nuret roy de ni dob de apostol.) ¹¹ Endob i de kuyug Jesus, énda ménunur ro bé bénréh i de libun ni, non maro ké dufang saén i kékébéréh ruwe de. ¹² Endob i Pedrowe ni ségetéw bé de kuyug Jesus téménindég brab léménéntu mangéy dob lébénge.

Amun énggégumah diyo, sénarirén ténéngténg, atin énggito no say de

safut féngébaus bé bangkay Jesuse, ménféled. Mélaw ménule ménggaif bé no ménrigo.

I de kétéfégito Jesus

¹³ Atin bé béo gai, wén i ruwo gétew bé de kuyugén ménangéy dob sébaane ingéd fédawétén Emaus, folo bra ruwo gékilometroy kérayu ne tidéw Jerusalem. ¹⁴ Amun diyo ron dob de aguwon, ménseuret-uret ro fantag bé kéluhanay de ménrigo bé Jesuse. ¹⁵ I lala ruwe séuret-uret magéw so, bé béo soy Jesuse ménggégumah séodor béro magéw. ¹⁶ Endob nalang ro fégéoloné ro ké Been i Jesuse. ¹⁷ Atin fénénginsaa Jesuse bero mano, “Ati nan ureté kom bé lala goma nan magéw?”

Tidéw béo, téménréne ro magéw brab ménbuku i falas ruwe. ¹⁸ Ségétew bero féndawét Kleopas ménbéréh dob Jesuse mano, “Beem saén keeyén i étewe bati dob Jerusalem, énda géttiga moy atiy ménrigowe diyo bé de ni gai.”

¹⁹ Ménénginsa i Jesus mano, “Ati no ménrigo?”

Séménumbul i de kuyugén maro, “Fantag bé Jesuse tidéw Nasaret, ségétew sénarigoy Tuluse muret. Barakatan i de kékéréhén brab de rénigo no dob téngaangay de étew brab dob Tulusu. ²⁰ I uléwoy de fadi gey brab de odoro key fénkéfo roy Jesuse inok kukumén brab féléhuén kélalonén dob kruse. ²¹ Wénén i inam gey bé Beene damén i mémukase betom do Judio. Atin béléewe niy gétéléwo nuwe géterésangan tidéw bé no ménrigo. ²² Brab wén i de dumogey do libun, fénggaif ro begey non ménangéy ro dob lébénge toow fo gino géfuwén. ²³ Endob amun sénléd roy bangkay ne, énda énggito ro de. Atin ménsefule ro, brab bénréh ro bé wén i de télaki méntefégito émbéréh bé Jesuse méntébule. ²⁴ Tidéw béo, i de dumogey do kuyug Jesus ménangéy ro so dob lébénge Jesuse ni, brab énggito roy kéluhanane toow ménrigo loo bé kékéréh i de libun ni, éndob énda gito roy bangkay Jesuse.”

²⁵ Tidéw béo, bénréh Jesuse bero mano, “Toow gom fo dufang, brab énda munur gom bé bénréh i sénarigoy Tuluse muret bé kékéréh ne. ²⁶ Békén ba kailangan mérasy i Kristowe atin tidéw béo médayéw fo toow?” ²⁷ Tidéw béo, fénggétiga Jesuse dob berowe ké atiy ménslate dob libro Moisese brab i sénulat i kéluhanay sénarigoy Tuluse fantag bé Beene.

²⁸ Amun gédét ro nén dob ayo ruwe ni, i Jesuse ni fénténgtengén bé maak taus magéw mangéy féravy.

²⁹ Endob nongot ro bé Jesuse maro, “Odor go begey témérén non gédétén sémingkuf.” Mélaw ménodor i Jesuse bero mahur dob lawie. ³⁰ Amun diyo ron ménasar dob doror i ahayane, ménidot i Jesuse fan brab fénslamata no. Tidéw béo, sénkébeng-kékengén, atin sénaarén dob berowe. ³¹ Tidéw béo, énggélolo roy Jesuse, éndob tékow ménalfa dob téngaanga ruwe.

³² Tidéw béo, ménsebéréh-béréh ro maro, “Been i funa tuwe toow fo fiyoy de fédew to brab toow fo méoror to bé késébéréh-béréh ne beto amun diyo to dob de aguwon atin bé lala ne mureton beto fantag bé Ménslate Kékéréh i Tuluse.”

³³ Bé béo so, téménindég ro brab ménsefule ro mangéy Jerusalem. Diyo énggito roy de folo bra sébaan ménselimud beroy de dumogey kuyugén.

³⁴ Atin séuret-uret ro maro, “I Kadna tome toow méntébule, non méntefégito dob Simone.” ³⁵ Tidéw béo, nuret i ruwowe gétew dumogey ménrigowe dob de aguwon, brab ati kégélolo ruwe de bé de sékébeng-kékengén fan.

³⁶ Ilala ruwe séuret-uret, méntefégito y Jesuse téménindég dob kérara ruwe ménsebéréh bero.

³⁷ Endob toow fo mégilak ro non maro ké ménayam i Jesuse. ³⁸ Mélaw ménbéréh man i Jesuse mano, “Sedek mégilak gom? Aw mérégén i kénéur gome ké méuyagu? ³⁹ Téngteng gom i de kémér gu ni brab de sékéy gu ni. Gito gom? Toow, Begén. Gamakénu inok gétuwa kom békénu ménayam. I

ménayame énda i ungéén brab énda i bukalén. Endob gito gom, wén i kagén de.”

⁴⁰ Tidéw béno, fenténgténg Jesusey de kémérén brab de sékéyén. ⁴¹ Toow ro fo ménggaif brab énda géfengintoow ro de, non toow fo fiyo damén ké toow. Mélaw i Jesuse fénénginsaa no bero mano, “Wén i féama gom Begén?” ⁴² Atin niraya ro sébaan sédo, ⁴³ atin éndotén brab namaén dob adafa ruwe.

⁴⁴ Atin bénréhén bero mano, “Been soy ni mérigowe bénréh gu begom amun diyou dob begome séna bé énda séna méléhuu. Nuret guy métuman i kéluhanane fantag bé Begéne dob de sénulat Moises brab de sénulat i de sénarigoy Tuluse muret, brab dob de sénulatén kanta dob Ménsulate Kébérén i Tuluse.”

⁴⁵ Tidéw béno, fénggétiga Jesuse dob berowe inok gésobuto roy Ménsulate Kébérén i Tulus. ⁴⁶ Bénréhén man bero mano, “Wén i Ménsulate Kébérén i Tuluse bé i Kristowe mékukum, éndob dob gétéléw ne gétérésang tébule.

⁴⁷ Atin sabaf bé atura kuwe fatut ureté kom dob kéluhanay de étew bé kailanga ro gésénule bé de sala ro brab rigoné roy kétayay Tuluse inok fésagaday Tuluse bero. Uret gom étah dob de étew dob Jerusalem, tidéw béno dob kéluhanay de étew dob duniyae ni. ⁴⁸ Fatut ureté kom non begomey de énggégito bé de ni ménrigo. ⁴⁹ Sugué ku mangéy dob begomey ati fénasad i Abay guwe. Endob ongot-ongot gom dob Jerusalem taman gégumah i barakate dob begome.”

I kédiyat Jesuse

⁵⁰ Tidéw béno, nuwit Jesusey de kuyugén ménsut dob no ingéd taman Betania. Amun ménggumah ro diyo, ténunggulén i de kémérén brab déménasal dob Tuluse inok féfiyoné no bero. ⁵¹ I lala ne rémigo bé ni, déméniyat mangéy dob lawayo.

⁵² Atin fénéngadaf roy Jesuse, brab ménoror ro séfule mangéy Jerusalem.

⁵³ Atin diyo ménangéy ro sénga tékélid dob lawi i Tuluse fésalamat bé Tuluse.

I Fiyowe Uret Sénulat Juane

Been i niy Fiyowe Uret sénulat Juane fantag bé Jesu Kristowe. Sénulat Juaney dumoy de mékégaif do rénigo Jesuse sani de galbék ménfégélolo bé i Beene, Nga i Tuluse. Sénulat Juaney Jesuse ménléhu génantino noy de kéilawan. Jesusey tulake fénléhu inok i sala i de étew mékédan. Sénulat Juane so dob ni sulat bé amuk munur i de étew dob Jesuse, iray i Tuluse beroy umule magufusa.

I Juane, sani séménulate bé ni Fiyo Uret, ségétew bé de kuyug Jesus amundi sénay Jesuse dob duniyae ni. Endob békén saén kuyug Jesus i Juane, non been soy toowe fo kégédawa Jesuse dumou no séloyuk dob duniyae ni. Mélaw énggito noy de rénigo Jesuse brab énggelingoo noy kékérén. Mélaw gétiga tom toow fo toow i kéluhanay de ni sénulat Juane.

I Kristowe ménwaléy kéilawan

¹ Dob féganaye wénén i féndawéte “Kékérén i Tuluse”, sani Kristowe. Atin i Beene beroy Tuluse. Brab Beeney Tuluse. ² Beroy Tuluse bé féganaye. ³ Atin fénlimbag i Tuluse bé Kristowey kéluhanay éntingayéne. Enda i éntingayén ménlimbag ké békén Kristowey léménimbage de. ⁴ Dob Beeney umule brab i nan umul maak Solo réméndaw dob de kéilawan. ⁵ I ni Solo réméndaw dob délémone brab énda géfandaay délémone de.

⁶ Wén i ségétewe étew sénugu i Tuluse, i dawét ne Juan Bautista. ⁷ Ménangéy dini muret fantag bé nan Solo inok i kéluhanane mégélingo de brab munur bé nan Solo sani Kristowe. ⁸ Békén Juaney Soloe, endob ménangéy saén dini muret fantag bé nan Solo. ⁹ Tidéw béno, i toowe Solo énggégumah dob duniyae inok réméndaw dob kéluhanay kéilawane.

¹⁰ Mélaw i Kristowe dininén dob duniyae. Endob fiyon fo ké Beeney

léménimbage de, énda géloy de kéilawan de. ¹¹ Ménangéy dob kaane ingéd, éndob i de kaan étew énda ténayakuf ro de. ¹² Endob i kéluhanay téménayakufe de brab ménunure dob Beene, niraya no bero kuwagib waléy nga i Tuluse. ¹³ Ménwaléy ro nga i Tuluse békén sabaf bé rénigoy de étew taloo no aturay kéilawane mumah ro, yamula sabaf bé aturay Tuluse saén.

¹⁴ I Kristowe ménwaléy kéilawan, ménbati sétifon betom. Enggito gey i barakat ne tidéw dob Abayo Tulus, non been i buntunge Ngaén, toow fo mégédaw brab toow fo toow i kékérén ne.

¹⁵ Ménuret i Juan Bautistawe fantag bé Kristowe. Ménbérén métanug mano, “Been i niy bénréh guwo begom gégumah témundug begén, éndob gérotor na begén, non bé énda séna ménumahu de, ménwénén.” Been i bénréh Juane.

¹⁶ Tidéw dob toowe kégédawén betom, énda téméré no miray do kéfiyonon dob betome kéluhanan.

¹⁷ Non i Tuluse nirayén i kukumane fén-uwitén bé Moisese, endob i gédawe brab toowe kétoro fén-uwitén bé Jesu Kristowe. ¹⁸ Enda i ségétew énggégito bé Tuluse. Endob i Buntunge Ngaén, fénggétiga noy fantage bé Abay ne non sédumon ro. Brab i Ngae, Tulus so.

I uret Juan Bautistawe

¹⁹ I de odoroy de Judio dob Jerusalem, séménugu ro do fadi brab do téma bang bé de fadi féndawét do Lebita mangéy ménginsa dob Juane, ké ati beene.

²⁰ I Juane, bénréhén i mékéntaye brab toowe mano, “Békén begéney Kristowe, sani fénémili i Tuluse méguléw.”

²¹ Atin fénénginsaa ro man maro, “Ati mélaw i beeme ni? Aw méntelata Elias go?”

Séménumbul man i Juane mano, “Békén.”

Atin ménénginsa ro man maro, “Aw beemey nan sarigon muret bé kékérén i Tuluse?”

Atin séménumbul man i Juane mano, "Békén."

²² Atin ménbérélh ro man maro, "Béréhém begey ké ati beeme ni, inok gébérého key dob de séménugu begey. Ati gébérého muwe fantag bé beeme?"

²³ I Juane séménumbul niringén i kékérélh Isaiase sani méntelatae sénarigoy Tuluse muret bé kékérélh ne mano, "Begéney ségétewe dob gonone énda i étew de bati, mékes maku, 'Fééntang gom i aguwoy Kadnane.'"

²⁴ Atin i de sénugu tidew dob de Fariseo, ménenginsa ro man maro,

²⁵ "Amuk békén go Kristo, taloo no Elias, taloo no sarigon muret, sedek mautis go?"

²⁶ Séménumbul i Juane mano, "Wayég i fégébautis guwe, éndob wén i ségétewe étew ménggélawék begom énda gélolo gom de. ²⁷ Been i gérumahé témundug begén, éndob toow na fo gérotor begén. Mélaw énda médaitu fiyon mukoh bé ikét i safatos ne."

²⁸ Ménrigoy ni dob Betania, diyo dob sébangay wayége féndawét Jordan, gono Juane mautis.

I inatiwe bili-biliy Tuluse

²⁹ Dob sébaane de fuweh, énggito Juaney Jesuse mangéy dob beene, brab ménbérélh dob de étew mano, "Téngténg gom, ay ni nén i maake fégétulak nati bili-bili niray i Tuluse non féléhuén inok mékédan i de sala i de étew dob duniya. ³⁰ Been i niy bénréh guwo maku, 'Wén i ségétewe étew gérumah témundug begén, éndob gérotor na begén, non bé énda séna ménunahu de, ménwénén.' ³¹ Bé gétahe de, énda gélolo gu de, éndob i funa kuwe ménangéy dini mautis bé wayége inok émfayag i Beene dob begome do dumo gu Judio."

³² Atin ménbérélh man i Juane mano, "Enggito guy Rémogor i Tuluse ménlus tidew dob lawayo maak marafati méntrimfena mangéy dob Beene. ³³ Enda damén gétiga ku de saliyu bé Tuluse, sani séménugue begén mautis bé wayége, ménbérélh dob begéne mano, 'I étewe gito mo

térimfenaay Rémogor guwe, Beeney mautise bé Rémogor guwe.' " ³⁴ Atin fentaus Juaney kékérélh ne mano, "Enggito gu, brab gébérého kuy Beeney Nga i Tuluse."

I de sungu kuyug Jesuse

³⁵ Dob sébaane de fuweh, diyo man i Juane beroy de ruwo gétew kuyugén.

³⁶ Amun énggito noy Jesuse témara, ménbérélh mano, "Téngténg gom, ay nan i natife bili-biliy Tuluse."

³⁷ Amun énggelingoo de ruwo gétew kuyugén i ni bénréhén, ménfuray ro bé Jesuse. ³⁸ Atin séménling i Jesuse brab énggito no bero furay dob Beene. Atin fénenginsaa no bero mano, "Ati kétaya kome?"

Tidew bénó ménbérélh ro maro, "Hon i batio muwe de, Rabi?" (I atag i Rabiwe Maistéro.)

³⁹ "Enggomén, inok gito gom," bang Jesuse. Atin ménodor ro, brab énggito roy batio nuwe. I urase bénó, témégénén. Mélaw énda ménule ro taman kélungonon.

⁴⁰ I ségétewe bé de ruwo ni gétew lagéy énggelingo bé bénréh Juaney brab ménodor bé Jesuse, sani fédawéténe Andres dumo Simon Pedrowe sétiman idéng. ⁴¹ I sungu-sunguwe rénigo Andrese, sénlédén i Pedrowe brab nureto no mano, "Enggito gey i Kristowe." (I atag i Kristowe fénémili i Tuluse méguléw.) ⁴² Tidew bénó, nuwitén i Simone mangéy dob Jesuse.

Atin téngténg Jesuse brab bénréhén mano, "Beemey Simone, nga Jonas. Fédawété ku beem Sefas." (I Sefase ségiléw bé dawéte Pedro, atin i atag ne batéw.)

⁴³ Dob sébaane de fuweh, bénaba Jesusey mangéye Galilea. Brab énggito noy Filipiwe, atin ménbérélh dob beene mano, "Odor go Begén."

⁴⁴ I Filipiwe, ségiléw bé Andrese brab Pedro, tidew ro dob ingéde féndawét Betsaida. ⁴⁵ Atin i Filipiwe, ménangéy dob Natanaele atin bénréhén dob beene mano, "Enggito gey i étewe, sani étewe sénulat Moisesey fantage

bé Beene dob kukumane bé do gétah, brab sénulat i de sénarigoy Tuluse so muret bé kékérél ne. Beeney Jesuse, nga Jose, tidéw Nasaret.”

⁴⁶ Atin ménenginsa i Natanaele dob Filipiwe mano, “Aw wén wayoy éntingayén fiyo tidéw Nasaret?”

Bang Filipiwe, “Enggonén, angéyém téngténg.”

⁴⁷ Amun énggito Jesusey Natanaele mangéy dob Beene, ménbérél mano, “Ay niy métintuwe étew Judio. Enda i tugi dob adat ne.”

⁴⁸ “Ati kégétiga muwe begén?” bang Natanael.

Séménumbul i Jesuse mano, “Enggito gu beem dob fantad i kayéwe féndawét igos bé énda séna ténavag Filipiwe beem.”

⁴⁹ Tidéw bénou, fénayag Natanaele mano, “Maistéro, Beemey Nga i Tuluse brab Datu gey do Judio.”

⁵⁰ Ménbérél i Jesuse mano, “Aw ménunur go saén sabaf bé bénréh guwe beem énggito gu beem dob fantad i kayéwe igos? Gégitgo na médoó éntingayén rigoné ku toow fo mékégaif na tidéw bé ni. ⁵¹ Bérhéku begom i toowe, gito gom moso i lawaye émbukeh brab i de télaiki Tuluse ménik brab mélus dob Begéne, sani Nga i Kéilawane.”

2

I Jesuse dob uyote

¹ Ménruwo gétérésangan tidéw bénou, wén i uyot dob Kana, sébaan ingéd dob Galilea. Atin i idéng Jesuse diyo dob uyote ni. ² Diyo soy Jesuse brab de kuyugén non sénéngkat ro so bero dob ni uyot. ³ Amun ménétéyén i arake, ménbérél i idéng Jesuse dob Beene mano, “Endaén i arak ro.”

⁴ Endob séménumbul i Jesuse mano, “Iday, kago suguén Begén. Enda séna énggumah i gai guwe émfégito bé barakat guwe.”

⁵ Tidéw bénou, i idéng Jesuse ménbérél dob de sugu-suguén mano, “Rigo gom i kéluhanay bérhé nuwe begom.”

⁶ Wén i ném timan do dakél binangga diyo, usaréy de Judio ahuron wayég fégéféguse ro loo bé adat ruwe. (Labi télew folo gélaya i kédakél i séngae binangga.) ⁷ Bénréh Jesuse dob de sugu-suguén mano, “Féno gom wayég i de binangga.” Mélaw fénéno ro wayég i de binangga démengér ké toow fo féno. ⁸ Tidéw bénou, bénréh bero mano, “Sakug gom de kloh, brab uwit gom dob méguléwe bé ni uyot.” Atin rénigo ro.

⁹ Amun i méguléwe bé uyote ménggétemtem de, békénén wayég, non ménwaléyén arak. Atin énda énggétiga noy ténidéwoy ni de arak. Endob gétigay de sugu-suguén séménakug de. Tidéw bénou, i méguléwe ni téabarén i témerimawe lagéy.

¹⁰ Brab ménbérél mano, “Dob de dumo do karagiya, i de étew duwoté ro métah i fiyowe arak, brab buluk énggénémén témantuy kéluhanay kanawe, tidéw bénou duwoté roy mélémuwe de. Endob i beeme dénuotém wayoy toowe balilaga arak géfuray bénou!” Been i bénréh i uléwe.

¹¹ Réningo Jesusey ni sungu mékégaif dob Kana, ingéd dob Galilea. Fénggito noy barakat ne diyo, atin i de kuyugén ménunur dob Beene.

¹² Amun énggilidén i uyote, i Jesuse brab idéng ne, brab de tuwaréyén, brab de kuyugén, ménagéw ro mangéy Kapernaum. Atin ménbati ro diyo bé ménfiroye gétérésangan.

I Jesuse dob lawi i Tuluse

¹³ Gédétén i kandulie féndawét “Témara” kay de Judio, mélaw ménénagé i Jesuse mangéy Jerusalem.

¹⁴ Dob fésaway lawi i Tuluse, énggito noy de étew émfébéléy do fégétulak safi, bili-bili, marafati. Brab énggito no soy de lémuluk kurta ménas do sékuloy de ahaya ro.

¹⁵ Mélaw réménigo fégéfésén taléy brab dénédéléni bero tidéw dob lawi i Tuluse. Dénedéléni soy de safi brab do bili-bili. Atin bénluweén i de ahayay de lémuluk kurta brab sénawarén i de félatah ro. ¹⁶ Atin ménbérél dob

de émfébéléy marafati mano, "Uwit gom tékédan i de ni. Kagom rigonén fadiyan i lawi i Boh guwe!" ¹⁷ Atin énggétédémoy de kuyugén i Ménsulate Kébéréh i Tuluse mano, "O Tulus, i kéimu guwe bé lawi me, maak aféy dob fédew guwe."

¹⁸ Atin i de odoroy de Judio ménénginsa ro dob Jesuse maro, "Amuk wén i kuwagibém tidéw dob Tuluse bé ni rénigo mo, fégitonon gey mékégaif émféfengintoow de."

¹⁹ Sénumbulo Jesuse bero mano, "Rundas gom i lawi i Tuluse ni, atin fétindégé ku man bé téléwe gétérésangan."

²⁰ Séménumbul i de Judio maro, "I ni lawi Tulus, mén-fot folo bra ném gébélintuwa i kéfétindége de, atin fétindégé mo man bé téléwe gétérésangan saén?"

²¹ Endob i lawi i Tuluse bérhé Jesuse, been i lowoh ne. ²² Amun gilid méntébule i Jesuse, énggétédémoy de kuyugén i bénréh ne. Atin ménunur ro bé Ménsulate Kébéréh i Tuluse brab de bénréh Jesus.

²³ Bé kédiyo Jesuse dob Jerusalem, bé gaiy kékanduli i de Judio féndawét "Témara", médooy méngginugute bé Jesuse non énggito roy médoowe mékégaif rénigo no. ²⁴ Endob énda séménarig i Jesuse bero non gétiga noy kéluhanay étew. ²⁵ Enda kailanga no ureton fantag bé étew non gétiga noy fédew i kéilawane.

3

I Jesuse brab Nikodemowe

¹ Wén i ségétew étew féndawét Nikodemo, ségétew bé de Fariseo sani de tintu modor bé adat i de Judio. Brab i Nikodemowe odoroy de Judio. ² Wén i no sébaan kélungonon, ménangéy dob Jesuse atin ménbéréh mano, "Maistéro, gétiga key ségétew go téromo tidéw dob Tuluse. Non énda i ségétew gérigo bé de rigoné mo mékégaif ké békén tidéw dob Tulusey barakat ne."

³ Séménumbul i Jesuse mano, "Bérhé ku beem i toowe, énda i ségétew géahur dob féguléwoy Tuluse, saliyu ké mumah na féruman."

⁴ Endob ménénginsa i Nikodemowe mano, "Ati kéfingé-fingé i kéumah i étew féruman ké lukésén? Endaén géahurén séruman dob sur i idéng ne atin mumah man!"

⁵ Séménumbul i Jesuse mano, "Bérhé ku beem i toowe, saliyu ké i étew mumah bé wayége brab bé Rémogor i Tuluse, énda géahurén dob féguléwoy Tuluse. ⁶ I kéluhanay étew mumah dob kéilawane brab gédoté roy lowohe. Endob i de étew mumah bé Rémogor i Tuluse, bati i Rémogor i Tuluse dob de fédew ro. ⁷ Mélaw kago mégaif bé kébéréh guwe, 'Fatut go mumah féruman.' ⁸ Non ségiléw so bé réfuruhe. I réfuruhe mangéy dob kétaya nuwe ayo no. Gélingoo mo éndob énda gétiga moy hon i tidéwo nuwe de taloo no hon i ayo nuwe de. Loo so bé nan, énda gésobuto kom i kéumahe dob Rémogor i Tuluse."

⁹ I Nikodemowe ménénginsa mano, "Ati kérigowe bé ni?"

¹⁰ Séménumbul i Jesuse mano, "I beeme ménbantug go téromo dob Israël, éndob énda gésobuto moy ni?

¹¹ Bérhé ku beem i toowe, bérhé key i gétiga keye, brab ureté key i énggito geye, éndob énda i munur de begom.

¹² Amuk énda munur go Begén bé ureté kuwe ni beem fantag bé de éntingayén dob duniyae ni, toow na fo énda munur go ké ureté kuy fantage bé de éntingayén dob lawayo. ¹³ Atin énda i ségétew énggéangéy dob lawayo, saliyu bé Begéne, sani Nga i Kéilawane méntidew diyo."

¹⁴ Bé gétahé de, amun diyo i de Judio dob gonone énda i étew de bati, kénéke i de ulé bero. Mélaw réménigoy Moisese kéninontow maak falas ulé brab féndiyoén dob kayéwe brab ténungkulén inok i kéluhanay de témeingténg de, énda méléhu ro. Ségiléw so bé niy Nga i Kéilawane fatut tungkulén dob kayéwe, ¹⁵ inok i kéluhanay munure dob Beene énda

méléhu ro, yamula gédoté roy umule magufusa. ¹⁶ I Tuluse toow fo mégédaw bé kéluhanay de étew dob duniyae, mélaw nirayén i buntunge Ngaén inok i kéluhanay munure dob Beene, énda méléhu ro, yamula gédoté roy umule magufusa. ¹⁷ Non békén sénugu i Tulusey Nga ne dob duniyae ni inok kukumé noy kéilawane. Yamula inok fukasé noy kéilawane dob de sala ro.

¹⁸ I munure dob Jesuse énda mékukumén. Endob i éndae munur dob Beene mékukum non énda munurén bé buntunge Nga i Tuluse.

¹⁹ Been i funay Tuluse kémukum: I Soloe, sani Kristowe, ménangéy dob duniyae, éndob i de étew méuyot ro bé délemone, brab mika ro bé Soloe non bé de tete rigoné ro. ²⁰ I kéluhanay rémigowe tete mika ro bé Soloe brab énda fégédét ro de non mégilak ro ké giton i de tete rigoné ro dob géfékayae. ²¹ Endob i de métintu do étew fégédét ro dob Soloe inok giton rénigo roy kétayay Tuluse.

I kékuret Juan Bautistawe

²² Tidéw béno, i Jesuse brab de kuyugén ménangéy ro dob ingéde Judea brab ménbati ro diyo bé ménfiroye gétérésangan, brab ménautis ro diyo. ²³ Atin i Juane ménautis so, éndob dob ingéde Enon, gédét dob ingéde Salim non médooy wayége diyo. Atin i de étew ménangéy dob beene inok bautiso no bero. ²⁴ I ni ménrigo bé énda séna ménbilanggu i Juane de.

²⁵ Bé béno, wén i ségétéwe Ju-dio ménsséédél bé de dumo kuyug Juan fantag bé kélifiyowe dob adafay Tuluse. ²⁶ Mélaw i de kuyug Juan, ménangéy ro dob Juane, brab ménbéréh ro maro, “Maistéro, énggétédémo moy dumo muwo ménta dob sébangay wayége Jordan, sani étewe nureté? Mautis béni atin kéluhanay étewe mangéy dob Beene.”

²⁷ Endob séménumbul i Juane mano, “I étewe gédoté no saén i iray i Tuluse dob beene. ²⁸ Enggélingoo kom i bénréh guwe bé békén begén

i Kristowe, éndob énggétahu sénugu bé Beene. ²⁹ I Kristowe ségiléw bé témérimawe lagéy brab begéney maake sémégunung bé témérimawe lagéy. Atin i de kuyugén ségiléw ro bé térimawe libun. I témérimawe libun kay témérimawe lagéy, békén kay sémégununge. Mélaw i sémégununge ongot-ongot brab fégélingoé no atin méoror de ké gélingoo noy béréh i témérimawe lagéy. Loo bé nan i kagéne kéoror énggumah béleewe, non médooy de étew furay bé Jesuse. ³⁰ Beeney fatute waléy gérotor, atin i begéne fatut waléy gérifantad.”

³¹ Non i Jesuse tidéw dob lawayo, mélaw gérotor na bé kéluhanane. Endob i de kéilawan, tidéw ro dob fantade ni saén. Mélaw gébéréh ro saén fantag bé duniyae. Endob i tidéwe dob lawayo, toow na fo gérotor bé kéluhanane. ³² Ureté noy énggito nuwe brab énggélingoo nuwe dob lawayo. Endob kloh saén i munure de. ³³ Endob i étewe munur bé uret ne, émfayag bé toow i Tuluse. ³⁴ Non i sénugu i Tuluse, ureté noy kékéréh i Tuluse, non iray i Tulusey Rémogor ne énda i tamana no. ³⁵ Atin i Abaye Tulus mégédaw bé Nga ne brab i kéluhanay ature sénarigén dob Beene. ³⁶ I munure dob Nga i Tuluse, gédoté noy umule magufusa. Endob i éndae munur dob Beene, énda gédoté noy umule magufusa, non énda mékédan i kérít i Tuluse dob beene.

4

I libune dob Samaria

¹ Enggélingoo de Fariseoy urete bé labi na médooy gédoté Jesuse kuyugén brab toow na médooy bautisé Jesuse étew bé Juane de. ² Endob i toowe, do kuyug Jesus i mautise, békén Jesus. ³ Amun énggélingoo Jesusey ni uret, mémentédan dob Judea, atin ménsséfule mangéy Galilea. ⁴ Mélaw dob kéagéw ro Jesuse, kailanga roy témarae dob sakufi ingéde féndawét Samaria.

⁵ Atin, énggégumah ro dob sébaane ingéd dob Samaria féndawét Sikar, gédét dob fantade niray Jakobé bé

nga ne Jose bé gétaho. ⁶ Diyo, wén i kalute wén i wayég de, rénigo Jakobe. Atin i Jesuse ménasar diyo dob sékuloy kalute. Non ménlugotén bé kéagéw ne brab géutuh térésang i kégumah ne diyo.

⁷⁻⁸ Bé bénó, énda diyo i de kuyug Jesus non ménangéy ro dob fadiyane méléy amaén. Atin i ségétew libun tidéw Samaria énggégumah mangéy wayég. Atin ménbérén i Jesuse dob libune ni mano, “Aw fakay géiraya mo Begén wayég inémén?”

⁹ I libune ni séménumbul mano, “I Beeme ségétew go Judio atin i begéne tidéwu Samaria. Sedek mongot go miném dob begéne?” (Bénréhén i ni non i de Judio karangé ro mékérésik i de étew tidéw Samaria, atin mélaw énda sélawék ro bero.)

¹⁰ Sénumbulo Jesuse mano, “Amuk gétiga mo damén ké ati iray i Tuluse brab gélolo mo Begén sani mongote wayég, i beeme mongot so dob Begéne brab iraya ku beem bé wayége miray umul.”

¹¹ “Maistéro,” bang i libune ni, “énda i fégésakugém brab i kalute ni ménalém. Hon i gédoto muwe de bé wayége miray umul? ¹² I katufua tome Jakob i kéménalute bé ni kalut. I beene brab de ngaén dob ni so méniném loo soy de ayamén. Aw toow na gérotor go bé beene?”

¹³ Séménumbul i Jesuse mano, “I minéme bé wayége dob ni kalut waléy so man térumén. ¹⁴ Endob i minéme bé wayége iray gu, éndaén térumé no. Non i wayége iray gu dob beene waléy séfut wayég dob fédéw ne miray umul magufusa.”

¹⁵ Atin ménbérén man i libune ni dob Jesuse mano, “Maistéro, irayanu bé nan wayég, inok éndaén téruméno, brab éndaén kailanga kuy mangéye dini médot wayég.”

¹⁶ Tidéw bénó, bénréh Jesuse man dob ni libun mano, “Angéyém i bawag me brab séfule go mangéy dini.”

¹⁷ I ni libun séménumbul mano, “Enda i bawag gu.”

Atin ménbérén i Jesuse man mano, “Toow i kékérén me, énda i bawagém. ¹⁸ Non wénén i limo gétew ménawag beem brab i ségétew dumo mo sétifon béní békén tintu bawagém. Bénréhén Begén i toowe.”

¹⁹ “Maistéro,” bang i ni libun, “Enggélolo gu béní bé Beemey sarigone muret bé kékérén i Tuluse.”

²⁰ Mélaw ménénginsa dob Jesuse mano, “I de katufua key do tidéw Samaria ménéngadaf ro dob ni tuduk, éndob i begome do Judio, bérhé kom, Jerusalem i fatute ayoy de étew méngadaf bé Tuluse. Mélaw ati isuwe toow fatut rigonéy de étew?”

²¹ Séménumbul i Jesuse mano, “Di, féngintoowonu. Gégumah mosoy gaiwe, i kékéngadafé bé Abaye Tulus, békén saén dob ni tuduk taloo no dob Jerusalem saén. ²² I begome

tidéw Samaria, féngadafé kom i éndae gétiga kom, éndob i begeye do Judio féngadafé key i gétiga keye, sani Tuluse. Non usaréy Tulusey de Judio mémukas bé de kélawan. ²³ Atin gégumah i nan gai brab énggumahén béleewe, i de tintu méngadaf, féngadafé roy Abaye bé de rémogor ro brab fatut munur ro bé toowe fantag bé Tuluse. Non i Abaye, been i niy kétaya nuwe kékéngadaf de. ²⁴ I Tuluse, Rémogor, békén lowoh. Komon i méngadafé de, fatut féngadafé no dob rémogore brab dob toowe.”

²⁵ Bang i libune ni, “Gétiga ku gégumah i fénémili i Tuluse méguléw féndawét Kristo. Buluk gégumah, feféguwa no betom i kéluhanay éntingayéne.”

²⁶ Atin ménbérén i Jesuse mano, “Bégéney Kristowe, sani émbéréhe dob beeme.”

²⁷ Bé bénó so, énggumah i de kuyug Jesus, brab ménggaif ro bé kégito ruwe de séuret-uret roy libune ni. Endob énda i ségétew bero ménénginsa bé ati kétaya nuwe taloo no sedek séuret-uret bé libune ni.

²⁸ Tidéw bénó, i libune ni fénledén i binangga ne, brab ménséfule mangéy dob ingéde. Atin diyo bénréhén dob

de étew mano, ²⁹ “Enggomén, angéy gom téngténg i étewe bénréhén begén i kéluhanay rénigo guwe. Békén ba keeyén Been i Kristowe?” ³⁰ Mélaw i de étew ménusut ro dob no ingéd ménangéy dob Jesuse.

³¹ Amun énda séna gumah ro, ménongot i de kuyugén mano, “Maistéro, ama go na.”

³² Endob sénumbulo no bero mano, “Wén i amaé ku énda gétiga kom de.”

³³ Tidéw béno ménésbéréh-béréh i de kuyugén maro, “Wén bay ménuwiton de amaén?”

³⁴ Tidéw béno, bénréh Jesuse dob berowe mano, “I kérigo guwe bé kétayay Tuluse ménféuwit Begén, brab bé kégéfilide bé galbéke férigo no Begén, been i maake amaé ku. ³⁵ Wén i bénréh gom, ‘Fot na gétérésang kélunganon, atin kémétewén.’ Endob béréhé ku begom, téngténg gom i de ni étew mangéy dini, non maak do nohok toghén, fakayén kétewén béeleewe. Non ay ninén i gaiwe munur ro Begén. ³⁶ I de étew kémétew sémahud brab timué roy de kentew ro. Ségiléw ro bé de émféunur bé de dumo étew inok gédoté roy umule magufusa. Atin i de étew muret fantag bé Tuluse, maak beroy de mohok. Mélaw i de mohok brab de kémétew séoror ro. ³⁷ Toow i kékéréhe mano, ‘Ségétew i mohoke, ségiyoy kémétewé de.’ ³⁸ Fénuit gu begom mangéy kémétew bé békéne génalbéko kom, ségiyoy géménalbéke de atin ménangéy gom saén kémétew bé génalbéko ruwe.”

³⁹ Médooy de étew tidéw Samaria dob no ingéd ménunur bé Jesuse non bé kékéréh i libune mano, “Bénréhén begén i kéluhanay rénigo guwe.”

⁴⁰ Mélaw amun ménangéy i de étew tidéw Samaria dob Jesuse, nongot ro fébatié roy Jesuse dob berowe. Atin ménbati i Jesuse diyo ruwo gétérésangan.

⁴¹ Atin sabaf bé kéureto nuwe bero, ménuman i kédooy ménunure dob Beene. ⁴² Atin bénréh ro dob libune ni maro, “Munur geyén békén sabaf

saén bé bénréh me begey. Béleewe énggelingoo key i kékéréh ne, mélaw gétiga key tintu Beeney mémukase bé kékławane dob de sala ro.”

Nuwa Jesusey nga i ségétewé odoron

⁴³ Amun énggilid i ruwowe gétérésangan, i Jesuse ménule ménangéy Galilea. ⁴⁴ Wén soy kékéréh Jesuse mano, “I sarigoy Tuluse muret bé kékéréh ne, énda fégadata no dob kaane ingéd.” ⁴⁵ Endob amun énggumah dob Galilea, ténayakuf i de étew diyo, non énggitó roy kéluhanay rénigo nuwe mékégaif dob kékandulie féndawét “Témara” dob Jerusalem, non diyo ro so.

⁴⁶ Tidéw béno, ménésfule i Jesuse mangéy Kana, sébaan ingéd dob Galilea, sani ingéde fénwaléyén arak i wayége. Atin wén i ségétewé gémamak kukuman wén i ngaén lagéy démérüun dob ingéde Kafernaum.

⁴⁷ Amun énggelingoo noy Jesuse énggumah dob Galilea tidéw Judea, ménangéy dob Jesuse brab nongotén dob Jesuse angéyé no uwaén i nga ne gédétén méléhu. ⁴⁸ Atin bénréh Jesuse dob beene mano, “I begome, taman énda gégito gom do mékégaif, énda fo munur gom Begén.”

⁴⁹ Bang i ni odoron, “Maistéro, énggonén, lokut énda séna méléhuén.”

⁵⁰ Atin bénréh Jesuse dob ni odoron mano, “Ule gon, adi-adinén i nga me.” I ni étew ménunur bé kékéréh Jesuse brab ménule.

⁵¹ Amun diyo séna lowoh agéwon, bénalak i de sugu-sugué no brab bénréh ro maro, “Ménadi-adinén i nga me.”

⁵² Atin fénénginsaa no bero mano, “Ati urase bé kékadi-adi nuwe?”

Atin sémenumbul ro maro, “Ménkédan i kékéduf ne fuli natémégéno.”

⁵³ Brab énggétédémoy boh ne been i noy urase bé kékéréh Jesuse dob beene mano, “I nga me adi-adinén.” Mélaw tidéw béno, kéluhana ro ségékuréng ménunur.

54 Been i niy gérugwore mékégaif rénigo Jesuse dob Galilea bé kétidéw ne Judea.

5

I kékwa Jesuse dob Betesda

1 Wén i no sébaan fuweh, ménangéy i Jesuse dob Jerusalem non wén i kanduli diyo kay de Judio. **2** Atin diyo dob Jerusalem gédét dob bengawane kay de bili-bili, wén i kérigéwe de féndawét Betesda dob Hebreowe, sani késébéréh i de Judio. Wén i limo timan fésayawa no wén i do atéfén. **3** Diyo méniro i médoowe do étew déméruruun, do langafén, do fikat, brab do kimoyén. Atin ongot-ongoté roy késékuyo i wayége ni. **4** Non wén i gai gégumah i télaiki Kadnane, angéyé no sekuyoén i wayége ni. Atin i géétahe mangéy tééléd dob ni wayég ké mésékuyo, waléy adi-adi fiyon fo ké atiy déruu nuwe. **5** Wén i ségétewe lagéy diyo, méntéléwén folo bra waléw gébélintuwa i kédéruu nuwe. **6** Amun énggito Jesusey ni lagéy méniro diyo brab énggétiga noy kérugay i kédéruu nuwe, fénénginsaa no mano, "Aw méuyot go adi-adi?"

7 Séménumbul i ni lagéy déméruruun mano, "Maistéro, énda i témabangan begén mangéy tééléd dob wayége ké mésékuyo. Buluk féganayu séna fégédét, wénén i gégumah gétah begén."

8 Tidéw béno, ménbéréh i Jesuse dob beene mano, "Tindég go, furutém i ikam muwa nan, brab agéw go." **9** Sonom béno, ménadi-adiy ni lagéy. Atin fénurutén i ikam ne brab ménagéw.

I no gai kékéadi-adi Jesuse bé ni lagéy Sabado, gai kétérén kay de Judio. **10** Mélaw i de odoroy de Judio ménbéréh ro dob ni lagéy ménadi-adi maro, "Béleewe Sabado, gai kétérén. Enda fakayén dob kitab tome ké uwité moy ikam muwa nan."

11 Endob séménumbul i lagéyé ni ménadi-adi mano, "Endob bénréh i lagéye ni ménféadi-adi begén, furuté kuy ikam guwe brab magéwu."

12 Atin ménénginsa i de odoron maro, "Ati no lagéy ménbéréh de dob beeme, ké furuté moy ikam muwe brab magéw go?"

13 Endob énda énggétigay ni lagéy ké ati no étew ménféadi-adi de, non ménangéy i Jesuse dob de ménribuk do étew.

14 Enda ménrugayén tidéw béno, énggito Jesusey ni lagéy dob lawi i Tuluse. Atin ménbéréh i Jesuse dob beene mano, "Téngtengém, ménadi-adi gon. Kagon rémigo sala inok énda toow géttimal i kékéfasanga muwe."

15 Tidéw béno, ménagéw i ni lagéy brab bénréhén dob de odoroy de Judio bé Jesus i ménféadi-adiwe de.

16 Mélaw i de odoroy de Judio, féngganay roy kékérasay ruwe bé Jesuse, non ménua bé gai kétéréné.

17 Endob bénréh Jesuse dob berowe mano, "I Abay guwe Tulus énda téméréno gémalbék fiyon fo ké gai kétérén, atin i Begéne fatut gémalbék so sénga tékélid."

18 Been i niy funay de odoroy de Judio ménuman i kékérit ruwe bé Jesuse, atin toow na fo sarintaé ro féléhuén. Békén saén sabaf bé kékéralbék ne ké gai kétérén, éndob sabaf so bé fédawété noy Tuluse Abayén, ula-ula réfengé noy Tuluse béno.

19 Atin sénumbulo Jesuse bero mano, "Bérhéhé ku begom i toowe, i Begéne Ngaén, brab énda i gérigono ku ké tidéw dob Begéne saén. Rigoné kuy gito guwe rigonéy Abay guwe Tulus. Udenén rigonéy Abay guwe, rigoné ku so. **20** Non i Abay guwe méimu Begén brab fégétiga no Begén i kéluhanay galbék ne. Atin méuman i férigo nuwe Begén toow na fo mékégaif galbék funa kom mégaif.

21 Non loo bé Abay guwe tébuleé noy de ménléhu brab iraya no bero umul, Begéne ni so, iraya ku umul i de étew kétaya ku iraya ku de. **22** Atin békén i Abay guwey kémukume bé de étew. Yamula niraya no Begén kuwagib kémukum bé kéluhanay étewe, **23** inok basanay kéluhanay étewe Begén loo so bé kékasana ruwe bé Abay guwe. I

éndae masanan Begén, énda so basana noy Abay guwe séménugu Begén.

²⁴ “Béréhé ku begom i toowe, i mégélingoe bé kékéréd guwe brab munur bé Tuluse séménugu Begén, wén i umulén magufusa. Atin énda mékukumén moso bé de salaén. Non éndaén méléhuén non fiyon fo ké méléhu i lowoh ne, gédoté noy umule magufusa. ²⁵ Béréhé ku begom i toowe, gégumah i gaiwe brab ménggumahén béléewe ni, bé gélingoo de ménléhu i béréd guwe, atin i de mégélingo de, gédoté roy umule. ²⁶ Non i umule tidéw dob Abaye, brab loo bé ni niraya no Begén, sani Nga ne, barakat inok wén i umul tidéw dob Begéne. ²⁷ Atin i Abay guwe Tulus, niraya no so Begén kuwagib kémukum bé de kéilawan kagulan Begén i Nga i Kéilawane. ²⁸ Kagom mégaif bé de ni, non gégumah i gaiwe i kéluhanay de étew ménléhu dob de lébéng ro, gélingoo roy béréd guwe. ²⁹ Atin mésut ro tidéw dob de lébéng ro, atin i de réménigo fiyo métébule inok gédoté roy umule magufusa. Endob i de réménigo tete métébule inok mékukum ro.

³⁰ “I Begéne, énda i kagén gérigonon saliyu bé Abay guwe saén. Kémukumu loo bé kékémandu i Tuluse de Begén. Mélaw i kékukum guwe métintu non békén kagén kétayan éndob kétayay Abay guwe séménugu Begén.

³¹ “Amuk ureté ku saén i fantage bé lowoh guwe, énda i géunur de. ³² Endob wén i ségiyowe muret fantag bé Begéne brab gétiga kuy uret ne fantag bé Begéne toow fo toow. ³³ Séménugu gom mangéy dob Juane Mautis atin nureténi i toowe fantag bé Begéne. ³⁴ Endob énda kailanga kuy kéuret i kéilawane fantag bé Begéne, éndob énggélabito ku émfégétédém begom i uret Juane fantag bé Begéne, inok munur gom Begén funa kom mífukas dob de sala gom. ³⁵ I Juane maak solo, mérino brab réméndaw kagulan téneroén begom, brab ménoror gom témayakuf bé kétoro ne begom éndob singkow

saén. ³⁶ Endob wén i labi na fo fiyo funa kom munur Begén bé de nuret Juan. Fégitung gom i galbéké rigoné ku, non been i galbéké niray i Abay guwe Begén. Mélaw i de galbék gu, been i émfégétigane bé sénugu i Abaye Tulus Begén. ³⁷ Atin i Abaye séménugu Begén, fégétiga no soy fantage bé Begéne. Enda énggélungoo kom i béréd ne taloo no énggito gom i falas ne. ³⁸ Atin énda fénbati gom dob de fédéw gom i kékéréd ne. Gétiga kuy ni non énda munur gom Begén, sani sénugu i Abaye Tulus. ³⁹ Tantu gom féganad i Ménsulate Kékéréd i Tuluse, non gékaranga kom dob de ni gédoté kom i umule magufusa. Endob been i niy de ménsumat uret fantag bé Begéne. ⁴⁰ Mélaw amuk munur gom dob Begéne, gédoté kom i umule magufusa, éndob mika gom munur Begén.

⁴¹ “Enda sélédé kuy kédayéw i kéilawane. ⁴² Endob gétiga kuy de fédéw gom, énda méimu gom bé Tuluse. ⁴³ Sénugu i Tuluse Begén, atin Begén i sarigo nuwe. Gido loo énda tényakuf gom Begén. Endob buluk wén i ségitew gégumah énda sénugu i Tuluse de, tayakufé kom. ⁴⁴ Enda munur gom non sélédé kom i kédayéw i de dumo gom étew éndob énda sélédé kom i kédayéwe tidéw dob sébaane tintu Tulus. ⁴⁵ Endob kagom fégitungén de ké Begén i témboe begom dob Abay guwe Tulus. Békén Begén. Sénarigo kom i kitabé niray Moisese, éndob been i témboe begom. ⁴⁶ Endob amuk tintu gom munur bé kétoro Moisese, munur gom so Begén, non sénulatén i fantage bé Begéne. ⁴⁷ Endob amun énda munur gom bé sénulat Moisese, énda so géunur gom dob Begéne.”

6

Fénwaléy Jesuse médooy klohe amaén

¹ Tidéw béno, ménifar i Jesuse dob dogote féndawét Galilea taloo no Tiberias. ² Atin toow fo médooy de

étew ménfuray de non énggito roy de mékégaif galbék rénigo no bé kéuwa ne bé de démérueen.³ Atin ménénagé i Jesuse beroy de kuyugén mangéy dob burure atin diyo ro ménasar.⁴ Bé bénô gai, éndaén mérugay i kékanduli i de Judio féndawét ro “Témara”.⁵ Amun iling-ilong i Jesuse, énggito noy médoowe étew démangkub mangéy dob Beene. Mélaw ménénginsa dob Filipihe mano, “Ayo tome de méléy amaén féama bé de étew ni?”⁶ (I funa Jesuse ménénginsa, téngkadé no saén i Filipihe. Endob gétiga Jesuse nén i rigoné nuwe.)

⁷ Atin séménumbul i Filipihe mano, “Fiyon fo ké wén i labi séngibu filak tom, kulang na fégébeléy amaéy médoowe ni étew, fiyon fo ké sékélohkélohen dob séngae ségétew.”

⁸ Endob ménbérêh i ségiyowé kuyugén féndawét Andres (sani dumo Simon Pedrowe sétiman idéng) mano,⁹ “Wén i ségétew kénogo lagéy dob ni, wén i nuwitén limo timan mélému fan brab ruwo timan sédo. Endob toow fo kulang i ni féama bé médoowe ni étew.”

¹⁰ Tidew bénô, ménbérêh i Jesuse dob de kuyugén mano, “Féésar gom i de étew.” Mélaw ménasar i de étew diyo dob bukae gonon wén i do kéroon de. Wén i limo ngibu do lagéy saliyu na bé de libun brab do nga.¹¹ Atin éndot Jesusey fane brab ménfésalamat dob Tuluse. Tidew bénô, sénaarén dob de médoow étew ménasar diyo. Loo so bé niy rénigo Jesuse bé de sédo de. Atin téménantu ro mama taman kétaya ro.¹² Amun énggéama ro nén taman ménbésor ro kéluhanan, ménbérêh i Jesuse dob de kuyugén mano, “Timu gom i kéluhanay de sama amaén inok énda mésinggulaén.”¹³ Mélaw ténimu roy de sama amaén. Atin ménfeno i foloe bra ruwo timan dakél biton bé de sama i de limo timan fan.

¹⁴ Amun énggitoy de étew i ni mékégaif galbék rénigo Jesuse, ménbérêh ro maro, “Tintu Been i niy toowe sarigoy Tuluse muret bé kékérêh ne, sani suguéy Tuluse dob duniiae ni.”¹⁵ Atin gétiga Jesusey

fégésé ro féwaléyé ro datu ro, mélaw ténagakén bero man brab ménangéy félébu dob de burur.

Ménagéw i Jesuse dob rotor i wayége

¹⁶ Amun témégénén, ménangéy i de kuyugén dob dogote.¹⁷ Atin ménda ro awang mifar bé dogote mangéy Kafernaum, non kélungononén, atin énda séna énggumah i Jesuse dob berowe.¹⁸ Bé bénô uras, émbagér i réfuruhe brab dakél i bagéle dob dogote.¹⁹ Amun ménggufura ro ném gékilomitro tidew dob dénsaane, énggito roy Jesuse magéw dob rotor i dogote mangéy dob berowe. Mélaw toow ro fo ménggilak.²⁰ Endob ménbérêh i Jesuse mano, “Begén, kagom mégilak!”²¹ Atin ménoror ro brab féneda ro dob awange, brab sonom bénô énggégumah ro dob dénsaane ayo ro.

²² Amun géfuwénén, i de étew ménbati séna dob difar i dogote, énggétiga ro sébaan saén i awange diyo bénô kélungonon. Atin énggétiga ro énda ménodor i Jesuse bé de kuyugén méda dob awange mifar dob dogote. Brab gétiga ro énda i ségiyo awang diyo.²³ Tidew bénô, énggumah i de awang tidew dob ingéde Tiberias, déménunggu gédét dob gonoy de étew ménama fan amun énggilid fénalamatay Kadnane Jesus.²⁴ Atin amun gétuway de étew énda diyo i Jesuse loo soy de kuyugén, menda ro bé de awang mangéy Kafernaum inok sélédé roy Jesuse.

²⁵ Atin amun énggito roy Jesuse dob difar i dogote, fénénginsaa ro maro, “Maistéro, ménfiroyén i kégumah me dini?”

²⁶ Sénumbulo Jesuse bero mano, “Bérhéku begom i toowe, békén i kégésobut gome bé de mékégaif galbék rénigo guy funa kome séméléd Begén, éndob non bé de fénama gu begom atin ménbésor gom.²⁷ Kagom séméléd bé amaéne kay de sur gom saén non waléy waréy i nan amaén. Endob séléd gom bé amaéne kay de fédew gom funa kom méraru taman sa

taman. I Nga i Kéilawane, sani Begéne, iray guy nan amaén non i Abaye Tulus fénggétiga no Been i sémenugue Begén.”

²⁸ Atin ménenginsa ro dob Jesuse maro, “Ati fiyowe rigoné key inok rigoné key i kétayay Tuluse?”

²⁹ Sémenumbul i Jesuse mano, “Ay niy kétayay Tuluse rigoné kom: Unur gom Begén non Begén i sénugu i Tuluse.”

³⁰ Atin ménenginsa ro maro, “Ati mékégaife galbék féténgténgém begey inok munur gey dob Beeme? ³¹ I de katufua key bé do gétah, ménama ro fan féndawét ‘mana’ dob gonone énda i nohok do témunoh diyo, loo bé Ménslate Kébérél i Tuluse mano, ‘Niraya no bero amaén tidew dob lawayo inok géama ro.’”

³² Sémenumbul i Jesuse mano, “Béréhé ku begom i toowe, békén Moises i ménféamae bero fan tidew dob lawayo, éndob i ménféama bero been i Abay guwe Tulus. Atin i Abay guwe, irayén so begom i tintuwe amaén tidew dob lawayo kay de fédew gom. ³³ Non i amaéne iray i Tuluse, been i énggégumahe tidew dob lawayo inok miray umul dob de kéilawan.”

³⁴ Ménbérél ro dob Jesuse maro, “Maistéro, irayan gey démoyun bé nan amaén.”

³⁵ Sémenumbul i Jesuse mano, “Bégéney amaéne miray umul. I kéluhanay étewe mangéy dob Begéne éndaén mélayah ro, brab i kéluhanay munure Begén éndaén térumén ro.

³⁶ Endob fiyon fo ké énggito gomén Begén, éndob énda séna munur gom Begén. Bénréh gun i nan dob begome bé gétaho. ³⁷ Mangéy dob Begéney kéluhanay de étew niray i Abaye Begén. Brab énda dudulé kuy étewe mangéy dob Begéne. ³⁸ Non ménlusu tidew dob lawayo inok rigoné kuy kétayay Tuluse sémenugu Begén, békén inok rigoné kuy kagéne kétayan.

³⁹ Atin ay niy kétayay Tuluse: énda fédayáé ku métadin i de nirayén Begén étew, fiyon ségétew. Yamula tébuleé ku bero kéluhanan dob tamfaday

gaiwe. ⁴⁰ Non been i niy kétayay Abay guwe: i kéluhanay gétigane Begén brab munure Begén, gédoté roy umule magufusa. Atin tébuleé ku bero dob tamfaday gaiwe.”

⁴¹ Atin i de Judío amun énggelingoo roy bénréh Jesuse, mundég-mundég ro non bénréhén bé Beeney amaéne tidew dob lawayo. ⁴² Brab ménbérél ro maro, “Ati Jesuse ni, aw békén ba Beeney nga Josehe saén? Sedek bénréhén ménlus kun tidew dob lawayo, non gétiga tom i boh ne brab idéng ne?”

⁴³ Endob bénréh Jesuse mano, “Kagom mundég-mundég. ⁴⁴ Enda i ségétew géangéy dob Begéne, saliyu ké fefégédétény Abaye sémenugu Begén. Atin dob tamfaday gaiwe, tébuleé kuy kéluhanay mangéye dob Begéne.

⁴⁵ Sénulat i de sénarigoy Tuluse muret bé kékérél ne maro, ‘I de kéilawan toroéy Tuluse moso.’ Mélaw i séngae mégélingo bé Abaye brab modor bé kétoro ne, mangéy dob Begéne.

⁴⁶ Endob énda i ségétew énggégito bé Abaye, saliyu bé Begéne non tidewu dob Tuluse. Mélaw Begéne say énggégítowé bé Abaye Tulus. ⁴⁷ Béréhé ku begom i toowe, i de méginugut dob Begéne méuyag ro taman sa taman.

⁴⁸ Begéney maake amaén miray umul.

⁴⁹ I de katufua kom amun diyo ro dob gonone énda i nohok do témunoh diyo, ménama ro amaén féndawét ‘mana’, gido ménléhu ro so. ⁵⁰ Endob Begéney amaéne tidew dob lawayo. Atin i kéluhanay géamae bé ni amaén, énda méléhu ro. ⁵¹ Begéney amaéne miray umul ménlus tidew dob lawayo. Atin amuk i ségétewé géama de, méuyag taman sa taman. I amaéne iray gu funay de kéilawan méuyag, sani lowoh guwe.”

⁵² Atin amun énggelingoo de Judío ni bénréh Jesuse, méniséédél ro maro, “Ati kékéngé-fingé i kéray i ni étew bé lowoh ne inok amaé tom?”

⁵³ Mélaw ménbérél i Jesuse mano, “Béréhé ku begom i toowe, amuk énda amaé kom i lowoh i Nga i Kéilawane sani lowoh guwe, brab énda inémé

kom i dara guwe, énda gédoté kom i umule magufusa. ⁵⁴ Endob i de mama bé lowoh guwe brab miném bé dara guwe, wén i umul ro magufusa, atin tébuleé ku bero dob tamfaday de gai. ⁵⁵ Non i lowoh guwe been i nan i tintuwe amaén, atin i dara guwe been i nan i tintuwe inémén. ⁵⁶ I kéluhanay mamae bé lowoh guwe brab minéme bé dara guwe diyou bati dob berowe atin dini ro bati dob Begéne. ⁵⁷ Méuyag i Abaye sémenugu Begén, atin i Begéne méuyagu sabaf bé Beene. Mélaw i kéluhanay mamae Begén méuyag so sabaf bé Begéne. ⁵⁸ Begéney amaéne tidéw dob lawayo. I de katufua kom ménama ro amaén féndawét ‘mana’, gido ménléhu ro so. Endob i de mama bé ni amaén sani lowoh guwe méuyag ro taman sa taman.”

⁵⁹ Bénréh Jesusey ni bé kétoro ne dob lawie féngadafay de Judio dob ingéde Kafernaum. ⁶⁰ Amun énggelingoo de kuyugén i ni kétoro, ménbéréh i de kédoono ro maro, “Toow fo ménalém i ni kétoro, ati mélaw i géfégélingoe de?”

⁶¹ Endob énggétiga Jesuse dob fédéw ney funay de kuyugén mundég-mundég. Mélaw bénréhén bero mano, “Aw toow fo mika gom bé bénréh guwe? ⁶² Ati béréhé kome ké gito gom Begén, sani Nga i Kéilawane, démiyat mule dob gonone tidéwo ku? ⁶³ I miraye bé umule been i Ré mogor i Tuluse. Endob i kéilawane, énda i barakatén miray umul. I nuret guwe begom tidéw dob Ré mogor i Tuluse brab miray bé umule magufusa. ⁶⁴ Endob gétiga kuy wén i de dumo begom énda munur ro Begén.” (Bénréh Jesusey nan non gétiga non i de énda de munur tidéw féganay brab i étewé émfékéfo de.) ⁶⁵ Atin sénumfata noy kéréh ne mano, “Been i nan i funa kuwe ménbéréh bé énda i géangéy dob Begéne saliyu ké féfégédétay Abaye.”

⁶⁶ Tidéw béno, médoo bé de kuyugén i téménagake de brab éndaén ménodor ro de. ⁶⁷ Mélaw fénénginsaa Jesusey de

folo bra ruwo gétew kuyugén mano, “Aw méuyot gom so témagak Begén?”

⁶⁸ Séménumbul i Simon Pedrowe mano, “Kadnan ati nay odoro keye? I de kaam saén kéréh i géiraye bé umule magufusa. ⁶⁹ Munur gey brab gétiga key Beemey Mékétéfuwe Etéw tidéw dob Tuluse.”

⁷⁰ Atin ménbéréh i Jesuse mano, “Aw békén ba begom i foloe bra ruwo gétew fénemili gu? Endob saitan i ségétewe begom!” ⁷¹ I téndédu i de kéréh Jesus, been i Judase nga Simon Iskariot. Been i émfékéfo de fiyon fo ké been i ségétewe bé de folo bra ruwo gétew kuyugén.

7

¹ Tidéw béno, i Jesuse diyo ménsgud-sugud dob Galilea. Ménika mangéy sugud-sugud dob Judea non méuyot i de odoroy de Judio de méméléhu. ² Bé béno, gédétén i kékanduli i de Judio féndawét ro “Dung-dung.” ³ Mélaw ménbéréh i de tuwaréy Jesus do lagéy dob Beene maro, “Ay go Judea inok gitoy de kuyugém i de mékégaif galbékém.

⁴ Amuk i étewé méuyot mélbangtug, énda bunéyé noy de rigoné no. Amuk gérigono moy de mékégaif, rigoné mo dob adafay médoowe étew.” ⁵ (Loo bé niy kéréh i de tuwaréyén non fiyon foy berowe énda séna munur ro dob Beene.)

⁶ Séménumbul i Jesuse mano, “Enda séna gumah i fatute gai rigoné kuy galbék guwe. Endob i begome fakay rigoné kom i kagome galbék bé de udenén gai. ⁷ I de tete étew énda mérarék ro begom, éndob mérarék ro Begén non dowoyé kuy kéluhanay tetee rigoné ro. ⁸ Ay gom dob kandulie, éndob i Begéne énda séna mangéyu diyo non békén sénay niy gaiwe fatut mangéyu diyo.” ⁹ Amun énggilid bénréhén i ni, ménbati saén dob Galilea.

¹⁰ Endob amun ménagéwén i de tuwaréyén mangéy dob kandulie dob Jerusalem, ménfuray soy Jesuse, éndob énda i énggétigan de non ménagéw

nékémén saén. ¹¹ Sélédéy de odoroy de Judioy Jesuse dob kandulie atin fénénginsa ro maro, “Hon i gono Jesuse de?”

¹² Atin médooy de étew ménlimud diyo séméguraw séuret-ureté roy fantage bé Jesuse. Embéréh i de dumo de maro, “Fiyo étew i Jesuse.” Endob bang i de dumo de, “Enda fiyo étew i Jesuse, fégakara noy de étew.”

¹³ Endob énda i ségétew ménfóbensag muret fantag bé Jesuse non mégilak ro bé de odoroy de Judio.

¹⁴ Amun gékérara ron bé kékanduli ruwe, ménangéy i Jesuse dob lawi i Tuluse brab téménoro. ¹⁵ Ménggaif foy de odoroy de Judio brab ménbérélh ro maro, “Sedek toow fo mon gétigan i ni étew, énda taén ménrugay i késékuwelah ne?”

¹⁶ Séménumbul i Jesuse mano, “I kagéne kétoro békén tidéw dob Begéne saén, éndob tidéw dob Tuluse séménugu Begén. ¹⁷ I de étew méuyot ro rémigo bé kétayay Tuluse, gétiga ro ké i kagéne kétoro tidéw dob Tuluse taloo no tidéw saén dob Begéne. ¹⁸ I étewe muret saén bé kaane kétoro, méuyot saén mélantug. Endob i étewe méuyot rémigo bé funay séménugue de émbantug, been i nan i métintuwe étew brab énda témugién. ¹⁹ Békén ba niray Moisesey kitabe? Endob énda i ségétew begom modor de, non amuk odoro kom, énda damén télamané kom féléhuén Begén.”

²⁰ Séménumbul i de étew maro, “Sénaitanan go! Ati étewe méuyot méméléhu Beem?”

²¹ Ménbérélh man i Jesuse mano, “Amun rénigo guy sébaane saén mélgaif galbék, ménkéségyionan gom de non gai kétérén béno. ²² Endob wén i sébaane kitab fantag bé kétulie niray Moisese bé gétaho. (Endob i toowe, tidéw i ni kitab dob de katufua tom.) No mélawén fiyon fo ké gai kétérén, tulié kom soy de nga gom. ²³ Amuk tulié kom i ségétewé nga lagéy fiyon fo ké gai kétérén inok odoro kom i kitabé tidéw dob Moisese, sedek

mékérít gom Begén sabaf bé kénéadi-adi guwe bé ségétewé étew ké gai kétérén? ²⁴ Kagom kukumén i de énggit gom saén. Yamula fégitung gom fiyo brab kukum gom métintu.”

²⁵ Tidéw béno, i de dumo bé de étew tidéw Jerusalem ménbérélh ro maro, “Aw békén bay niy lagéye sélédéy de odoro tom inok féléhuén? ²⁶ Téngténg gom, ay ni émbéréh dob adafa tome brab énda mon i gérérého ro sébanil de. I de odoro key, gélolo ron keey Beeney Kristowe sani ongot-ongoté tome. ²⁷ Endob amuk gégumah kun i Kristowe, énda i gétigan de ké hon i tidéwo nuwe de. Endob gétiga tom i tidéwoy ni étew.”

²⁸ Tidéw béno, amun diyo téménoro dob lawi i Tuluse ménfóbensag i Jesuse émbéréh mano, “Aw tintu gélolo gom ba Begén brab gétiga kom i tidéwo kuwe? Enda ménangéy dini ké dob kagéne saén aturan. I toowe Tulus i séménugue Begén, éndob énda gélolo gom de. ²⁹ Endob gélolo guy Beene, non tidéwu dob Beene brab Beeney séménugue Begén.”

³⁰ Tidéw béno, ténlama ro kénéfo i Jesuse éndob énda i ségétew énggékéfo de non énda séna énggumah i gaiwe fénémili Tuluse. ³¹ Endob médooy de étew dob de ménlimud ménunur de, brab ménbérélh ro maro, “Beeney Kristowe, sani fénémili i Tuluse mélawén, non énda i ségétew gérigo bé de mélgaif galbék rénigo no ké békén i Kristowe.”

³² Enggélingooy de Fariseoy ni késébérélh-bérélh i de étew sécuraw fantag bé Jesuse. Mélaw i berowe brab de odoroy de fadi, séménugu ro do mantay bé lawi i Tuluse inok kémfo bé Jesuse. ³³ Atin ménbérélh i Jesuse dob de étew mano, “Endaén mérugay i kétati guwe dob begome non séfuleu mangéy dob Tuluse séménugu Begén. ³⁴ Sélédé kom Begén éndob éndaén gito gom Begén, non énda géangéy gom dob batio kuwe.”

³⁵ Ménbérélh-bérélh i de Judio maro, “Hon keey i ayo nuwe de, ké énda gito tom de? Aw mangéy keey

dob mérayue ingéd i de Griego batioy de Judio so, atin toroé noy de Griego?

³⁶ Ati keey i atag i bénréh ne mano, ‘Sélédé kom Begén, éndob énda gito gom Begén, brab énda géangéy gom dob batio kuwe?’ ”

³⁷ Amun dob tamfaday gaiwe bé kékanduli ruwe sani toowe na fo balilaga gai, téménindég i Jesuse brab ménbéréh métanug mano, “Do étew térumén, ay gom dob Begéne, brab miném.” ³⁸ Non wén i Ménsulate Kébéréh i Tuluse mano, ‘I étewe munur dob Begéne, tidéw dob fédew ne rémégés i wayége miray bé umule magufusa.’ ” ³⁹ I atag i bénréh Jesuse, ay ni: i Rémogor i Tuluse mangéy dob de munur bé Jesuse atin bati dob de fédew ro. Endob énda séna nirayén i Rémogor i Tuluse non énda séna ménléhu i Jesuse brab tébule atin mule mangéy dob lawayo.

⁴⁰ Médooy de étew énggégélingo de, ménbéréh ro maro, “Tintu Beeney sarigoy Tuluse muret bé kékéréh ne, sani sarigone ongot-ongoté tom.”

⁴¹ Bang i de dumo étew, “Beeney Kristowe ongot-ongoté tom.”

Endob séménumbul i de dumo de maro, “Ati kéfingé-fingé ne ké i Kristowe tidéw Galilea?” ⁴² Non bang i Ménsulate Kébéréh i Tuluse, i Kristowe séfu Dabid. Mélaw fatut i Kristowe mumah dob ingéde Betlehem non i Dabide bati dob Betlehem.” ⁴³ Mélaw énda géséfagayun i de antaf fédew ro fantag bé Jesuse. ⁴⁴ Atin ménuyot i de dumo de kémfo, éndob énda i ségétew réménigo de.

⁴⁵ Tidéw béno, i de guwardiya ménsefule ro mangéy dob de odoroy de fadi brab do Fariseo. Atin fénénginsaa roy de guwardiya maro, “Sedek énda kénéfo gom i Jesuse inok géuwito kom mangéy dini?”

⁴⁶ Séménumbul ro maro, “Enda kénéfo gey de non ménggaif gey bé kétoro ne. Non ségiyo bé kéluhanay kétoroé énggélingoo key.”

⁴⁷ Atin ménbéréh i de Fariseo maro, “Aw fiyon i begome, énggáfégakara no begom so? ” ⁴⁸ Enda sénay ségétew begey do odoro kom taloo no do

Fariseo ménunur de. ⁴⁹ I de munur dob Beene, beroy de gérifantad étew saén, sani énda gétiga roy kitab tome. Mélaw kukuméy Tuluse bero.”

⁵⁰ Atin diyo soy Nikodemowe sani ségétewé so Fariseo. Been i ménangéye dob Jesuse bé gétahe de. Brab ménbéréh mano, ⁵¹ “Enda fakay dob kitab tomey kémukume ké énda séna énggésusinon i rénigo nuwe, brab énggelingoon i kékéréh ne.”

⁵² Séménumbul ro maro, “Aw tidéw go so Galilea? Basa moy Ménsulate Kébéréh i Tuluse, inok gétiga mo énda i sarigoy Tuluse tidéw Galilea.”

8

I libune mén sala

¹ Tidéw béno, i kéluhana ruwe ménule. Endob i Jesuse ménangéy dob tuduke féndawét Olibo. ² Dob gétunduge de fuweh, amun toow géfuwén, ménangéy man i Jesuse dob lawi i Tuluse. Amun ménangéy i kéluhanay de étew dob Beene, ménar i Jesuse brab téneroén bero. ³ Bé no gai, i de Fariseo brab do téromo kitab, nuwit roy libune énggétékasan ménbuwah. Atin féntindég ro dob adafa Jesuse brab de médo ni étew. ⁴ Atin bénréh ro dob Jesuse maro, “Maistéro, énggétékasan i ni libun ménbuwah. ⁵ Dob kitab tome niray Moisese, fatut ibéron batéw taman méléhu i étewe mén sala loo bé ni. Ati kékéréh me fantag bé ni?” ⁶ Fénénginsa ro dob Jesusey ni inok tukawa ro saén i Beene inok amuk békén damén katabuwan i késumbul ne, wén i funa ro témo de.

Endob ménkudung-kudung i Jesuse brab séménulat dob fantade bé tuko ténero ne. ⁷ Amun énda fo témerén ro méninsa, téménindég i Jesuse brab bénréhén bero mano, “Ati endae salaén begom, been i sunguwe de mibéron batéw.” ⁸ Tidéw béno, ménkudung-kudung man i Jesuse brab féntausén i késulat ne dob fantade. ⁹ Tidéw béno, amun énggélingoo roy bénréh Jesuse, ménule ro séségétew-gétew, i sunguwe ménule do lukés. Atin énda i ségétew ménféled ké békén

i Jesuse saén brab ni libun. ¹⁰ Atin téménindég i Jesuse brab ménénginsa mano, “Di, nayo ruwe de? Aw énda i ségétew témbo beem?”

¹¹ Séménumbul i ni libun mano, “Enda, Maistéro.”

Atin bénréh Jesuse mano, “Enda so téboé ku beem. Ule go brab kagonén mésala féruman.”

¹² Atin téménoroén man i Jesuse dob de étew mano, “Begéney maake solo réméndaw dob kéilawane. I furaye Begén éndaén magéwén dob délémons, yamula magéw dob géfékayaé brab gédoté noy umule magufusa.”

¹³ Ménbéréh i de Fariseo maro, “Beeme soy murete fantag bé lowoh me, mélaw énda i lantékén.”

¹⁴ Séménumbul i Jesuse mano, “Fiyon fo ké Begén i murete fantag bé Begéne, toow i bérhéhé kuwe non gétiga kuy tidéwo kuwe brab ayo kuwe. Endob i begome, énda gétiga kom i tidéwo kuwe taloo no ayo kuwe.

¹⁵ Kukumé kom i énggito gome saén non do kéilawan gom saén. Endob i Begéne, énda kémukumu. ¹⁶ Endob amuk kémukumu, métintuy kagéne kékukum non békén saén Begén i kémukume, éndob Begey i Abaye Tulus séménugu Begén. ¹⁷ Ménusat dob kitab gome, amuk ségiléw i uret i ruwowe gétew, giton toow i urete. ¹⁸ Ruwo gey gétew muret fantag bé Begéne. Begén brab Abaye séménugu Begén.”

¹⁹ Tidéw bénoré, fénénginsaa roy Jesuse maro, “Hon i gonoy Abay me de?”

Séménumbul i Jesuse mano, “Enda gétiga kom Begén taloo no Abay guwe. Amuk gétiga kom Begén, gétiga kom soy Abay guwe.” ²⁰ Bénréh Jesusey ni bé kétoro ne dob lawi i Tuluse gédét dob fégono ruwe limus. Endob énda i ségétew kéménéfo de non énda séna gumah i gaiwe fénemili i Tuluse.

²¹ Ménbéréh man i Jesuse dob berowe mano, “Tagaké kun begom, atin sélédé kom Begén. Endob méléhu gom énda émfésagad i de sala gom,

brab énda géangéy gom dob ayo kuwe.”

²² Been i niy funay de odoroy de Judio méniséfenginsa maro, “Aw féttoyé moso? Aw been i nan i funa nuwe ménbéréh mano, ‘Enda géangéy gom dob ayo kuwe?’ ”

²³ Atin ménbéréh man i Jesuse mano, “I begome, tidéw gom fantad, éndob i Begéne tidéwu rotor. I begome, tidéw gom dob duniyae, éndob i Begéne tidéwu dob lawayo. ²⁴ Komon bénréh gu begom buluk méléhu gom moso, énda émfésagadan i de sala gom. Toow, amuk énda munur gom de ké Begéney Beene bénréh gu, énda émfésagadan i de sala gom.”

²⁵ Atin ménénginsa ro maro, “Ati mélaw i Beeme ni?”

Séménumbul i Jesuse mano, “Tidéw bé féganaye de séna bé kétoro guwe, nuret gun begom ké ati Begéne.

²⁶ Atin médooy sénay de bérhéhé ku fantag bé de rénigo gom do tete funa kom mémukum. Toow i bénréh i séménugue Begén, komon ureté ku dob de étew i énggelingoo kuwe saén tidéw dob Beene.”

²⁷ Endob i de étew diyo, énda énggésobuto ro de ké ureté noy fantage bé Abaye Tulus. ²⁸ Mélaw ménbéréh i Jesuse mano, “Buluk tungkulé komén Begén, sani Nga i Kéilawane, bénoré na gétiga kom Begéney Beene bénréh gu. Atin gétiga kom so bé énda i rigoné ku ké tidéw saén dob Begéne, éndob bérhéhé ku saén i ténero i Abaye Begén. ²⁹ Brab dumoguy séménugue Begén. Enda téragakén Begén non démoyun rigoné kuy késuwata nuwe.”

³⁰ Atin médooy de étew énggégélingo bé de ni, ménunur ro dob Beene.

³¹ Mélaw bénréh Jesuse dob de Judio ménunur de mano, “Amuk modor gom bé ténero guwe, begom i de tintu kuyug gu, ³² atin gétiga kom i toowe kétoro, atin i toowe kétoro i témangéye begom.”

³³ Sénumbulo ro maro, “I begeye ni do séfu Abraham gey brab énda

ménrifén gey, atin sede mélaw ké béréhé mo fétangéy gey?”

³⁴ Séménumbul i Jesuse mano, “Béréhé ku begom i toowe, i kéluhanay étewe rémigo tete maak riféy salae.

³⁵ I riféne, fakay dédélén tidéw dob lawie. Endob i nga i gefee lawi, gébati dob nan lawi taman sa taman. ³⁶ Mélaw amuk Nga i Tulusey témangéye begom, tintu gom békénén rifén. ³⁷ Gétiga ku do onok Abraham gom. Endob méuyot gom méméléhu Begén, non énda tayakufé kom i kétoro guwe. ³⁸ Béréhé kuy ati fénggitoy Abay guwe Begén, éndob rigoné kom mon i énggelingoo kome dob kagome abay.”

³⁹ Séménumbul ro maro, “Abraham i kageye katufuan.”

Atin bénréh Jesuse bero mano, “Amuk do tintu onok Abraham gom damén, rigoné kom soy loo bé rénigo Abrahame. ⁴⁰ Bénréh gu begom i toowe énggelingoo ku tidéw dob Tuluse, éndob méuyot gom Begén méméléhu. Endob békén loo bé nan i rénigo Abrahame. ⁴¹ Rigoné kom i ségiléwe bé rénigoy abay gome.”

Endob ménkérít i de Judio maro, “Békén gey nga dob liyuwe, Tulus saén i Abay geye.”

⁴² Atin bénréh Jesuse bero mano, “Amuk toow fo Abay gom i Tuluse, méimu gom damén Begén, non tidéwu dob Tuluse. Enda ménangéyu dini dob kagéne aturan, éndob Tulusey séménugue Begén. ⁴³ Sedek énda gésobuto kom i béréhé kuwe ni? Non mikä gom keeyén munur bé toroé kuwe. ⁴⁴ Satanas i abay gome atin rigoné kom i kétayay Satanase. Méméléhu étew tidéw féganay brab tugién non énda i toow dob beene. Atin amuk témugi, rigoné no say adat ne non beeney bebe i kéluhanay tugiéne.

⁴⁵ Endob toow i kagéne kékéréh, mélaw énda unuro kom Begén. ⁴⁶ Ati géféténgténgé de begom ké wén i sala gu? Enda. Atin amuk toow i béréhé kuwe, sedek énda munur gom Begén? ⁴⁷ I tidéwe dob Tuluse fégélingoé noy kékéréh i Tuluse. Endob békén gom tidéw dob

Tuluse, mélaw énda fégélingoé kom i kékéréh i Tuluse.”

⁴⁸ Tidéw bénó, fénénginsaay de Judio maro, “Aw békén ba toow i bénréh geye ségitew go tidéw Samaria brab sénaitanan go?”

⁴⁹ Séménumbul i Jesuse mano, “Békén sénaitanan. I toowe, basana kuy Abay guwe éndob énda basana kom Begén. ⁵⁰ Enda fébantug-bantugu, éndob i Tuluse kétaya no ké basananu, atin Been i gétigane bé ati fatute. ⁵¹ Béréhé ku begom i toowe, i de modor bé kétoro guwe, énda méléhu ro.”

⁵² Atin ménbéréh i de Judio maro, “Béleewe ni gétiga keyén sénaitanan go. I Abrahame ménléhu, brab do sénarigoy Tuluse muret bé kékéréh ne, ménléhu ro so. Endob bénréhém i modore bé kétoro me énda méléhuén. ⁵³ Aw toow go na fo gérotor bé Abrahame katufua key? Ménléhu i Abrahame brab de sénarigoy Tuluse so. Ati kénégitung me bé Beeme?”

⁵⁴ Séménumbul i Jesuse mano, “Amuk bantugé kuy lowoh guwe so, énda i lanték i bantuga kuwe. Endob i Abay guwe Tulus, Been i mirayane Begén bantugan. Béréhé kom féngadafé kom i Tuluse. ⁵⁵ Endob énda gélolo gom de. Endob i Begéne, gélolo gu. Amuk béréhé ku énda gélolo gu de, waléyu témugi ségiléw bé begome. Endob i toowe, gélolo guy Beene, brab modoru bé kékéréh ne. ⁵⁶ I katufua kome Abraham moror de bé kégito nuwe bé kégumah guwe. Enggit no, komon moror béri.”

⁵⁷ Sabaf bé ni, ménbéréh i de Judio maro, “Enda séna ménlimo go folo gébélintuwa, éndob bénréhém bé énggit mon i Abrahame?”

⁵⁸ Séménumbul i Jesuse mano, “Béréhé ku begom i toowe, énda séna ménnumah i Abrahame de, i Begéne ménwénén.”

⁵⁹ Sonom bénó, ménémurut ro batéw inok ibéré ro dob Jesuse damén taman méléhu, éndob ménrékunéy i Jesuse brab méméchédan dob lawi i Tuluse.

9

Nuwa Jesusey langaféne

¹ Atin amun ménagéw i Jesuse, énggito noy ségétewe lagéy langafén tidéw fanay kéumahén. ² Atin i de kuyug Jesus ménenginsa ro maro, “Maistéro, ati funa nuwe ménumah langafén? Non bé sala ne loo ké sala i de lukésén?”

³ Atin séménumbul i Jesuse mano, “Békén sabaf bé sala ne taloo no sala i de lukésén. Endob i funa nuwe langafén inok giton i barakat i Tuluse mérigo dob beene. ⁴ Fatut rigoné tom i fegalbék i Tuluse séménugu Begén, lokut fuweh séna. Gégumah i kélungonone, bé béo éndaén i ségétew gégalbék. ⁵ Amun diniwu dob duniyae, maak gégékaya non Begén i Soloë rémendaw dob kéilawane.”

⁶ Amun énggilid i Jesuse émbéréh, déménura dob fantade brab fénlémbuweken i sébuwane bé dura ne. Tidéw béo, dénuletén dob de motoy ni lagéy langafén. ⁷ Atin ménbéréh i Jesuse mano, “Ay go dob kérigéwe féndawét Siloam, brab furauf go diyo.” (I atag i Siloame “sénugu”.) Mélaw ménagéw i langaféne ni brab rénigo noy férigowe de. Atin amun ménséfule, énggégitonén.

⁸ Tidéw béo, i de dumro ségedét lawi brab de étew énggérito de mongot limus, ménséfenginsa ro maro, “Aw békén ba beeney étewe déménoyun mésar mongot limus?”

⁹ Atin séménumbul i de dumro de maro, “Been bay nan.” Endob bang i de dumro de, “Békén been i nan, ségiléw ro sa keey falas.”

Tidéw béo, i ni lagéy ménbéréh mano, “Begén bay no étew langafén bé gétaho.”

¹⁰ Atin ménenginsa ro maro, “Sedek énggérito gon béléewe?”

¹¹ Atin séménumbul i ni lagéy mano, “I lagéye féndawét Jesus, fénlémbuweken i sébuwane atin dénuletén dob de moto gu. Atin sénuguén begén mangéy mérauf dob Siloam. Tidéw béo, ménagéwu

brab ménuraufu, atin sonom béo énggégitowun.”

¹² Atin ménenginsa ro maro, “Hon i gonoy nan de lagéy béléewe ni?”

Endob séménumbul mano, “Enda gétiga ku de.”

¹³ Tidéw béo, nuwit roy ni lagéy éndaén langaféno mangéy dob de Fariseo. ¹⁴ Gai kétérén i kékéfélémbuwek Jesuse bé sébuwane brab kieuwa ne béo motoy ni lagéy. ¹⁵ Fénenginsaay de Fariseo ké ati kékéfélémbuwek i ni lagéy mano, “I Jesuse, fénlémbuweken i sébuwane brab dénuletén dob de moto gu. Tidéw béo ménuraufu, atin sonom béo énggégitowu.”

¹⁶ Tidéw béo, i de dumro de Fariseo ménbéréh ro maro, “I Jesuse békén tidéw dob Tuluse non énda modorén béo ménbéréhe dob kitabé béo énda fakay i gémalbéké ké gai kétérén.” Endob i de dumro de ménbéréh ro maro, “Amuk i Jesuse ségétew ménsala, énda fo gérigo no béo mékégaife.” Mélaw énda géséodor i de antaf fédéw ro.

¹⁷ Mélaw ménenginsa man i de Fariseo dob lagéye ni maro, “Ati karang me béo Jesuse ni étew, non énggéfadi-adino no kun i de moto mo?”

Atin séménumbul i ni lagéy mano, “Beeney sarigoy Tuluse muret béo kékéfélémbuweken.”

¹⁸ Endob i de odoroy de Judío énda fo munur ro de kékéfélémbuweken i ni lagéy tidéw béo do gétah, mélaw féntawag roy de lukésén. ¹⁹ Atin fénenginsaa ro bero maro, “Aw nga gom i ni? Aw langafén ba tidéw fanay kéumahén? Sedek énggégitonén béléewe ni?”

²⁰ Séménumbul i de lukésén maro, “Gétiga key beeney nga geye brab langafén tidéw fanay kéumahén. ²¹ Endob énda énggétiga key de kékéfélémbuweken i kékéfélémbuweken nuwe béléewe, taloo no ati ménuaue de. Endob fénginsaa kom i beeney, non métawanén san brab been i sémumbulone begom.”

²² Ménbéréh i boh ne brab idéng ne loo béo ni non mégilak ro béo de odoroy de Judío. Non sénfagayunoy de odoron éndaén féahurén dob de

lawi féngadafan i étewe ké bérhéé noy Jesusey Kristowe tidéw dob Tuluse. ²³ Been i niy funay boh i ni lagéy brab idéng ne séménumbul maro, “Métuwanén i nga geye, been i fénginsaa kome.”

²⁴ Mélaw i de Fariseo fíntawag ron man i lagéye ni éndaén langaféno brab ménbéréh ro maro, “Bérhéém i toowe dob adafay Tuluse. Gétiga key i Jesuse ni ségtéw ménsala.”

²⁵ Mélaw séménumbul mano, “Enda gétiga ku de ké i Jesuse wén i salaén loo ké énda. Ni saén i kagéne gétigan, bé gétaho langafénu éndob béleewe énggégítowun.”

²⁶ Fénénginsaa ron man maro, “Ati rénigo nuwe dob beeme? Ati kéfingé-fingé i kéféadi-adi nuwe bé de moto mo?”

²⁷ Séménumbul mano, “Bénréh gun begom, éndob énda fo fégélingoé kom de. Sede méuyot gom de man mégélingo ségule? Aw méuyot gom de ké waléy gom do kuyugén so?”

²⁸ Tidéw béno, fénéngiras ro, brab bénrého ro maro, “Beem say kuyugén. Endob i begeye kuyug Moises gey.

²⁹ Gétiga key ménésbéréh i Tuluse bé Moisese bé do gétah. Endob i ni étew, énda gétiga key de ké hon i kétidéw ne de.”

³⁰ Séménumbul i ni lagéy mano, “Toow fo mékégaif i nan. Enda gétiga kom wayoy tidéwo nuwe de, éndob fén-adi-adi noy de moto gu. ³¹ Gétiga tom i Tuluse, énda fégélingoé noy de ménsala. Endob fégélingoé noy de étew méngintulus, rémigo bé kétaya nuwe. ³² Tidéw féganay kélémbag

bé duniyae ni énda sénay ségtéw géféadi-adi ségétéw langafén tidéw fanay kéumahén inok waléy gégito. ³³ Mélaw i Jesuse, amuk békén tidéw dob Tuluse, énda gérigono no de.”

³⁴ Tidéw béno, ménkérít ro brab séménumbul ro maro, “I beeme féngéngä go toow fo ménsala, sedek beeme nay témoree begey?” Tidéw béno éndaén, fénrahur ro de dob lawie féngadafan.

³⁵ Amun énggelingoo Jesusey kénrigó ruwe bé ni lagéy, ménangéy dob beene. Amun énggitó no, ménésbéréh i Jesuse de mano, “Aw munur go bé Nga i Kéilawane?”

³⁶ Séménumbul i ni lagéy mano, “Maistéro, bérhéém begén ké ati no étew inok géunuru de.”

³⁷ Séménumbul i Jesuse mano, “Enggito mon, non Been i Begéne sébéréh beem.”

³⁸ Tidéw béno, ménbéréh i ni lagéy mano, “Kadnan, munuru Beem.” Atin fénéngadafén i Jesuse.

³⁹ Atin ménbéréh i Jesuse mano, “Kékukum i funa kuwe ménangéy dob duniyae ni. I Begéne maak solo i de maak langafén inok waléy ro gégito amuk munur ro Begén. Atin i de gégito, sani de gétigan étew, waléy ro maak langafén amuk énda munur ro Begén.”

⁴⁰ Wén i de Fariseo énggégélingo bé kékéréh Jesuse, atin ménénginsa ro maro, “Sede? Aw do langafén gey so?”

⁴¹ Séménumbul i Jesuse mano, “Amuk maak do langafén gom, énda damén i sala gom, éndob béleewe ni makom ké do gégito gomén, non makom ké toow gomén gétigan. Been i nan i funa nuwe i de sala gom énda mékedano.”

10

I binuwayae fantag bé témalimae bé de bili-bili

¹ I Jesuse, ménuret sébaan binuwaya mano, “Bérhéé ku begom i toowe, i étewe mahur dob rugéy de bili-bili énda mangéyén bé bengawane atin mangéy man bé de ségiyo agéwon, i nan étew ménakaw brab tulisan.

² Endob i étewe mahur mangéy bé bengaway rugéy de bili-bili, beeney témalimae bé de bili-bili. ³ I mantaye dob fintue ungkaé noy bengaway rugéne inok géahur i témalimae bé de bili-bili. Brab i de bili-bili gélolo roy bérhéé ne. Brab tawagé noy de kaan do bili-bili bé de dawét ro. Tidéw béno, fanangguvité no bero mésut

tidéw dob rugéne mangéy dob de fétabtaban. ⁴ Atin amuk mésut ro, métah bero brab i de bili-bili furay ro de non gélolo roy béréh ne. ⁵ Enda furay ro bé ségiyowe étew, yamula féraréyo ro non énda gélolo roy béréh ne.” ⁶ Bénréh Jesuse beroy ni binuwaya éndob énda fo énggésobuto ro de.

⁷ Mélaw i Jesuse ménbéréh man mano, “Béréhé ku begom i toowe, Begéney maake bengawan ahuroy de bili-bili. ⁸ I de énggéétah Begén do tugién téromo, beroy maake do ménakaw brab do tulisan. Endob i de kagén do étew, beroy maake bili-bili, énda fo fénggélingo ro bero. ⁹ Begéney bengawane. I kéluhanay mahure dob Begéne, méfukas ro dob de sala ro. Ségiléw ro bé de bili-bili, mahur ro brab mésut ro atin géagéw ro dob fiyowe tabtabén non talimaé ku bero. ¹⁰ I tulisane, sani tugiéne téromo mangéy sa dini inok ménakaw brab méméléhu brab méminasa. Endob i funa kuwe ménangéy dini inok iray gu dob de kéilawan i umule énda i kulang de taman sa taman.

¹¹ “Begéney fiyowe témalima bé de bili-bili, non iray guy férénawa guwe inok méfukas i de kuyug gu. ¹² I ségétéwe étew témalima bé de bili-bili sukayan saén, békén been i gefee de, méraréy ké gérito itu-talun. Tidéw bénou, i itu-talune rambaé noy de bili-bili brab béragaré no bero. ¹³ I ni étew sukayan saén tagaké noy de bili-bili non békén kaan brab énda fo méimén bero. ¹⁴ Endob Begéney maake fiyo témalima bé de bili-bili. Gélolo guy de kuyug gu, brab i de kuyug gu gélolo ro Begén, ¹⁵ ségiléw bé kégélo lo guwe bé Abay guwe Tulus brab kégélo lo nuwe Begén. Atin i Begéne iray guy férénawa guwe inok méfukas i de kuyug gu dob de sala ro. ¹⁶ Wén i de ségiyo do bili-bili gu békén tidéw dob ni rugén. Fatut fanangguwité ku so bero brab fénggélingoé roy béréh guwe. Mélaw i de kéluhanay de étew gu, waléy sébaan i rugé ruwe brab ségétew i témalimae de.

¹⁷ “I funay Abay guwe méimu Begén, non énda gulaané kuy férénawa guwe. Endob amuk méléhu, méuyagu man. ¹⁸ Atin énda i géafas bé férénawa guwe tidéw dob Begéne, éndob kétaya ku fo iray gu. Wén i kuwagib gu de miray brab wén soy kuwagib gu de médot man ségule. Been i niy sénugu i Abay guwe Begén rigoné ku.”

¹⁹ Amun énggélingooy de Judio man i kékéréh Jesuse, énda man énggéséodor i de antaf fédew ro. ²⁰ Médooy de étew, ménbéréh ro maro, “Bunég i ni étew brab rénahuko saitan. Kagom fégélingoén de.”

²¹ Endob i de dumo de ménbéréh ro maro, “Enda gébéréh loo bé nan i étewé rénahuko saitan. Atin énda gaganéy ségétéwe sénaitanan i émféadi-adiwe bé de motoy langaféne inok waléy gérito.”

²² Tidéw bénou, énggumah i gaiwe kandulioy de Judioy kékéfétédém ruwe bé kékélinise bé lawi i Tuluse. Bé bénou, gai mélégénéy. ²³ Atin i Jesuse diyo dob lawi i Tuluse séagéw-agéw dob agéwone wén i atéfén, féndawéti bé dawéti i méntélatae datu Solomon. ²⁴ Atin i de Judio ménslimud ro dob Jesuse brab ménenginsa ro maro, “Taman kédiron nay kékéongot-ongot me begey? Amuk Beemey Kristowe, san i fénemili i Tuluse méguléw, bérhéhém begey i méméntaye.”

²⁵ Séménumbul i Jesuse mano, “Bénréh gun begom éndob énda munur gom de. I de mémégaif galbék fénrigoy Abay guwe Tulus Begén, been i da nan i émfégtigane begom fantag bé Begéne. ²⁶ Endob énda munur gom de non békén gom do bili-bili gu. ²⁷ I kagéne do bili-bili fénggélingoé roy kékéréh guwe brab gélolo gu bero, atin furay ro Begén. ²⁸ Iraya ku bero umul magufusa, brab énda méléhu ro. Atin énda i géafas bero tidéw dob Begéne. ²⁹ I Abay guwe Tulus toow na fo gérotor bé kéluhanane. Been i méniraye bero dob

Begéne. Atin énda i géafas bé de bili-bili gu tidéw dob Tuluse. ³⁰ I Begéne brab Abay guwe Tulus, sébaan gey saén."

³¹ Tidéw béno, i de Judio ménurut ro batéw man inok ibéro ro batéw i Jesuse féléhué ro damén. ³² Endob ménbérél i Jesuse mano, "Médoonén i fiyowe galbék fénrigoy Abay guwe Tulus Begén dob téngaanga kome. Ati isuwe bé de ni funa kom Begén méméléhu?"

³³ Séménumbul i de Judio maro, "Békén bé de fiyo galbék i funa keye Beem méméléhu, éndob sabaf mékémurka dob Tulusoy nan béréhé mo. I Beeme ségétew go saén kéilawan, sedek béréhé mo Tulus go?"

³⁴ Tidéw béno, séménumbul i Jesuse mano, "Endob wén i Ménsulate Kébérél i Tuluse dob Kitab gome mano, 'Do tulus gom.' " ³⁵ Féntaus Jesusey kékérél ne mano, "Enggétiga tom, i Ménsulate Kébérél i Tuluse toow fo toow taman sa taman. Mélaw ténavag i Tuluse do tulus i dé katufua tom niraya no bé kékérél ne. ³⁶ Atin Begéney fénemili i Abaye brab sénuguén mangéy dini dob duniyae. Mélaw sedek béréhé kom mékémurka i bénréh guwe bé Begéney Nga i Tuluse. ³⁷ Amuk énda rigoné kuy fégalbék i Abay guwe Begén, kagom munur Begén. ³⁸ Endob amuk rigoné ku, fatut unur gom bé de génalbék gu, fiyon fo ké énda munur gom bé kékérél guwe, inok gétiga kom brab gésobuto kom i Abaye dini dob Begéne, atin i Begéne diyou dob Abaye."

³⁹ Amun énggelingoo roy ni kékérél Jesuse, ténulama ro man i kéméfoe de, éndob énggésélyah brab ménsut.

⁴⁰ Atin ménfule i Jesuse mi-far dob wayége Jordan dob gono Juane mautis bé gétahe de. Atin diyo ménbat. ⁴¹ Atin médooy étewe ménangéy dob Beene. Atin ménbérél-bérél ro maro, "Fiyon fo ké i Juane énda i do rénigo no mékégaif, éndob toow i kéluhanay bénréh ne fantag bé Jesuse ni." ⁴² Atin diyo médooy ménunure bé Jesuse.

11

Ténébule Jesusey Lasarowe

¹ Wén i ségétewé lagéy démeruun, i dawét ne Lasaro, diyo bati dob Bettania. I Mariahe brab Martahe do tuwaréyén libun bati ro so dob no ingéd. ² Been i niy Mariahe léménuka bé fégéféamute dob de sekéy i Kadnanne Jesus brab kénayasén bé buk ne. Atin i Lasarowe lagéyén démeruun. ³ Mélaw i de libuno ménfieuwit ro kékérél mangéy dob Jesuse maro, "Kadnan, i toowe fo kégédawa mo dumo mo séloyuk, démeruun."

⁴ Amun énggelingoo Jesusey ni, ménbérél mano, "Enda méléhu i Lasarowe bé nan déruun. Ménrigoy ni inok médayéw i Tuluse, atin tidéw so dob ni médayéw soy Begéne sani Nga i Tuluse."

⁵ Toow fo méimu i Jesuse bé de ni sétuwaréy ro Martah, Maria, brab Lasaro. ⁶ Endob fiyon fo ké énggelingoo Jesuse démeruun i Lasarowe, énda na ménagéwén tidéw dob gono nuwe bati taman énda féntibusén nay ruwowe gétérésangan. ⁷ Tidéw béno, ménbérél dob de kuyugén mano, "Séfule tom mangéy Judea."

⁸ Endob bang i de kuyugén, "Maistéro, békén ba énda séna ménrugay i kétulamay de Judio diyo Beem méméléhu? Mélaw énda fatutén séfule gon man mangéy diyo."

⁹ Séménumbul i Jesuse mano, "Aw békén ba folo bra ruwo géuras i ségéfuwehe? Atin énda gébangkud i étewe magéw ké fuweh non gito noy géfekayaé dob duniyae. ¹⁰ Endob i étewe magéw ké kélungonon gébangkud non délémon." ¹¹ Nuret Jesusey binuwayae ni inok fégétiga no bé de kuyugén bé énda gésug-sugén diyo dob Judea non énda séna fénggilidén i galbék ne. Amun énggildid Jesuse bénréh i ni, rénéfaa no mano, "I Lasarowe dumo tom séloyuk, fidong. Mangéy diyo inok ulégé ku."

¹² Atin i de kuyugén ménbérél ro maro, "Amuk fidong, waléy adi-adi."

¹³ Endob i atag i bénréh Jesuse, ménléhu i Lasarowe, éndob énda énggésobutoy de kuyugén de. Marok tintu fidong. ¹⁴ Mélaw bénréh Jesuse fénkéntayén dob berowe mano, "Ménléhuén i Lasarowe. ¹⁵ Endob sabaf bé begome, mororu non énda diyou. Non wén i rigoné kuwe funa kom munur Begén. Enggomén, magéw tomén."

¹⁶ Atin ménbéréh i Tomase (féndawét so "Séfing") dob de dumo no kuyugén mano, "Modor tom de inok méléhu tom so séréngan bé Jesuse."

¹⁷ Amun énggégumah ro diyo, énggelingoo Jesuse bé ménfotén gétérésangan i kélébeng ruwe bé Lasarowe. ¹⁸ I ingéde Betania, gédét saén dob Jerusalem, télén gékilomitroy kéravy ne. ¹⁹ Atin médooy de Judio ménangéy diyo inok féfioné roy de fédew ro Martah brab Maria bé kéléhu i lagéy ruwe.

²⁰ Amun énggelingoo Martahe gédét gumah i Jesuse, ménagéw bénalakén, éndob i Mariahe ménféled dob lawie.

²¹ Atin ménbéréh i Martahe dob Jesuse mano, "Kadnan, amuk dini go, énda damén ménléhu i lagéy guwe. ²² Endob gétiga ku fiyon fo ké béleewe ni, iray i Tuluse Beem i ati ongoté muwe de."

²³ Atin ménbéréh i Jesuse mano, "Tébule i lagéy me."

²⁴ Atin bang Martahe, "Gétiga ku tébule moso beroy kéluhanay de étew dob tamfaday de gai."

²⁵ Séménumbul i Jesuse mano, "Begéney témbulee brab miraye umul. I étewe munur Begén, fiyon fo ké méléhu, méuyag so. ²⁶ Atin i méuyage étew munur Begén, éndaén méléhuén. Munur go bé ni?"

²⁷ Atin séménumbul i Martahe mano, "Hoo Kadnan, munuru Beemey Kristowe, sani nongot-nongot geye Nga i Tuluse ménangéy dob duniyae ni."

²⁸ Amun énggilid Martahe bénréh i ni, ménsefule mangéy dob Mariahe dumo no brab ménseguraw mano, "Enggumah i Maistérowe

brab féntawagén beem." ²⁹ Amun énggelingoo Mariahey ni, ménagayas témindég brab ménagéw bénalakén i Jesuse. ³⁰ (I Jesuse énda séna énggumahén dob ingéde, diyo séna dob gonoy bénalaka Martahe de.) ³¹ Atin i de Judio diyo ro dob lawie émféfiyo bé fédew Mariahe, amun énggito roy Mariahe ménagayas témindég brab ménagéw, ménfuray ro de. Marok mangéy kémérew dob lébéngé.

³² Amun énggumah i Mariahe dob gono Jesuse, ménléléngkéb dob adafa nuwe brab ménbéréh mano, "Kadnan, amuk dini go, énda damén ménléhu i lagéy guwe."

³³ Amun énggito Jesusey Mariahe kémérew brab de Judio ménodor de kémérew ro so, ménuray i na Jesuse brab toow fo méntete i fédew ne. ³⁴ Atin ménenginsa i Jesuse mano, "Hon i gonoy lénébéngó kome de?"

Séménumbul ro maro, "Kadnan, mangéy tom diyo."

³⁵ Tidéw béno, kéménrew i Jesuse.

³⁶ Mélaw ménsebéréh-béréh i de étew maro, "Téngténg gom, toow fo mégédaw i Jesuse bé Lasarowe."

³⁷ Endob bang i de dumo de, "Enggféadi-adino noy de motoy langaféne. Sedek énda énggféadi-adino noy Lasarowe inok énda damén ménléhuén?"

³⁸ Atin amun énggégumah i Jesuse dob lébéngé, toow fo méntete i fédew ne. I ni lébeng takub, atin ténléb roy bengawa nuwe bé dakéle batéw.

³⁹ Tidéw béno, ménbéréh i Jesuse mano, "Kéda kom i batéwa nan."

Endob i Martahe, libuy ni ménléhu ménbéréh mano, "Endob mahuén i bangkay ne béleewe ni, non ménfotén gétérésangan i kélébénge de."

⁴⁰ Atin ménbéréh man i Jesuse mano, "Bénréh gun dob beeme, amuk munur go, gito moy barakat i Tuluse." ⁴¹ Mélaw kénda roy batéwe dob bengaway lébéngé. Atin i Jesuse léménengag brab ménbéréh mano,

"Abay, toow fo fésalamatu dob Beeme non fénggélingoém Begén. ⁴² Atin gétiga ku fégélingoé mo Begén sénga

tékélid. Endob dasala kuy ni béleewe non bé de étew géiwéti Begén inok munur ro Beem i séménugue Begén.”

⁴³ Amun énggilid bénréhén i ni, ménbérh toow fo métanug mano, “Lasaro, sut go!” ⁴⁴ Tidew bénou, méntébule i Lasarowe brab ménusut. Atin méntabéd i de kémérén brab de sékéyén bé de safut féngébaus bé lowoh ne, brab méntéléb i rangih ne bé munsalawe. Atin ménbérh i Jesuse mano, “Kéda kom i de féngébaus de nan inok éndaén méfukétén.”

⁴⁵ Médooy de Judio ménangéy témukaw bé ro Mariahe, amun énggito roy rénigo Jesuse, ménunur ro dob Beene. ⁴⁶ Endob i de dumou bero, ménangéy ro dob de Fariseo brab nuret roy rénigo Jesuse. ⁴⁷ Mélaw i de odoroy de fadi brab de Fariseo, ménslimud ro beroy de kéfédéway de Judio. Atin ménbérh ro maro, “Ati rigoné tome? Non i Jesuse ni rémigo médooy do mékégaif. ⁴⁸ Amuk fidayaé tom i ni rigoné no, kéluhanay étewe munur dob Beene. Tidew bénou, waléy datu i de Judio atin mékérít i datu tome tidew Roma. Tidew bénou, mangéy diniy de sundaloy de Romano inok binasané roy lawi i Tuluse gono tom méngadaf, loo soy ingéd tome.”

⁴⁹ Endob ménbérh i Kayafase, sani gérotore fadi bé no bélintuwa mano, “Enda i lanték gom. ⁵⁰ Aw énda ba gétila kom de, labi na fiyo ké ségétew saén i méléhue gémantinon bé kéluhanay Judiowe, inok énda mébinasay ingéd tome?” ⁵¹ Bénréhén i ni békén tidew dob kaane saén kfégitung. Non beeney towe gérotor fadi bé no bélintuwa, mélaw sénarigoy Tuluse émbérh bé i Jesuse méléhu inok méuyag i de étew Judio. ⁵² Atin békén say de Judio, non i funa Jesuse méléhu inok i kéluhanay de nga i Tuluse, sani de munur dob Beene, fiyon atiy gonone tidewo ro, waléy ro sébaan.

⁵³ Mélaw tidew bé no gai, i de odoroy de Judio kfégitungé roy ati kfélhéruwe bé Jesuse. ⁵⁴ Mélaw éndaén

féira-iray Jesuse dob Judea ké magéw. Yamula ménangéy Efraim gédét dob gonone énda i étew de bat. Atin diyo ménbati beroy de kuyugén.

⁵⁵ Amun gédétén i kékanduli i de Judio féndawét “Témara”, médooy de étew tidew dob de ségiyo-giyo gonon ménangéy Jerusalem. Diyo ro rénigoy adate féndawét “Félinis” inok géamung ro bé kandulie ni. ⁵⁶ Atin sélédé roy Jesuse non énda énggito ro de diyo. Atin ménfénfingisa ro dob lawi i Tuluse maro, “Ati karang gome de, mangéy keey diniy Jesuse bé ni kékanduli, loo ké énda?” ⁵⁷ Non i de odoroy de fadi brab de Fariseo, bénréh ro dob de étew buluk wén i ségétew gégitoy bé gono Jesuse, béréhé no dob berowe inok gékéfoo ro.

12

¹ Ném séden kélungonon taman bé gaiy kékanduli ruwe féndawét “Témara”, i Jesuse ménangéy Betaenia, sani ingéd Lasarowe, i lagéye ténebuleén. ² Diyo ténafoy roy kan-dulie fégébasáa bé Jesuse. Bé no témégén, i lala Martahe démuwot, ménstar i ro Jesuse bero Lasaro. ³ Atin i Mariahe éndotén i dakéle katiya ménfénfingisa ro dob de sékéy Jesus. Tidew bénou, kénayasén bé buk ney de sékéy Jesus. Atin ménlégbé i duwaléy lawie bé térehung i ni fégéfamut. ⁴ Endob i ségétewé bé de kuyugén féndawét Judas Iskariot, sani ménfénfingisa ro dob de sékéy Jesus. Tidew bénou, kénayasén bé buk ney de sékéy Jesus. Atin ménlégbé i duwaléy lawie bé térehung i ni fégéfamut. ⁵ Endob i ségétewé bé de kuyugén féndawét Judas Iskariot, sani ménfénfingisa ro dob de sékéy Jesus. Tidew bénou, kénayasén bé buk ney de sékéy Jesus. Atin ménlégbé i duwaléy lawie bé térehung i ni fégéfamut. ⁶ Endob békén toow i kéruray i na nuwe bé de méskinan. Enggébérého noy no non i beeney ségétew ménakaw. Beeney téminue bé kurta ruwe, brab sénga tékélid médot de.

⁷ Endob séménumbul i Jesuse mano, “Kago élénén i Mariahe. Atin fatut itongé noy sama ne inok wén i fégéfamut bé gaiwe kélébeng bé

bangkay guwe. ⁸ I de méskinan bati dob begome sénga tékélid. Endob i Begéne, éndaén mérugayu bati dini dob begome.”

⁹ Médooy de étew énggelingoo ro diyo i Jesuse dob Betania. Mélaw ménangéy ro diyo. Békén say Jesusey funa ruwe mangéy diyo, non ménangéy ro diyo inok gito ro soy Lasarowe, sani lagéye ténébuleén. ¹⁰ Mélaw i de odoroy de fadi bénantak fédew roy féléhué ro soy Lasarowe. ¹¹ Non Lasarowey funay médoowe Judio téménré modor bé kétoro i de odoro ro atin méngganay ro munur bé Jesuse.

¹² Bé gétunduge de fuweh, médooy de étew do ménangéy dob Jerusalem inok mamung bé ni kanduli féndawé Témara, énggelingoo roy Jesuse mangéy Jerusalem. ¹³ Mélaw méndot ro do dau bongo brab ménusut ro dob ingéde inok balaké roy Jesuse. Ménbéréh ro métanug maro, “Dayéwé tom i Tuluse! Féfionéy Tuluse damén i ni géumah tidew dob Kadnane! Beeney datu tome do Judio!”

¹⁴ Atin éndot Jesusey natiy kudae brab kénudaa no. Mélaw méntuman i Ménslate Kébéréh i Tuluse mano, ¹⁵ “I begome do étew dob Jerusalem, kagom mégilak. Non géumah i datu gome kémuda dob natiwe.” ¹⁶ Enda fo énggésobutoy de kuyug Jesus i de ni bé no gai. Endob amun déméniat i Jesuse, énggétédémo ro brab énggésobuto roy Ménslate Kébéréh i Tuluse, brab been i niy rénigo ruwe dob Jesuse funan méntuman i Ménslate Kébéréh i Tuluse.

¹⁷ Bé béni, i de médooy do étew énggégito bé kétawag ne brab kétébule ne bé Lasarowe, nuret ro dob de dumoy fantage bé rénigo Jesuse.

¹⁸ Been i niy funay médoowe étew ménalak bé Jesuse dob de agéwon non énggelingoo roy rénigo nuwe ni mékégaif. ¹⁹ Mélaw ménbéréh-béréh i de Fariseo maro, “Endaén i fiyo

rigoné tom, énténg gom kéluhanay étewe modor ro de.”

²⁰ Atin diyo soy do étew tidew dob ingéde Gris. Ménangéy ro so Jerusalem inok géfengadafa ro bé no kékanduli. ²¹ Ménangéy ro dob Filipihe (sani tidéwe Betsaida, sébaan ingéd dob sakuf i Galileawe), brab ménbéréh ro maro, “Maistéro, méuyot gey géségitó bé Jesuse.”

²² Tidew béno, bénréh Filipihe bé Andree, brab ruwo ro ménangéy dob Jesuse brab bénréh ro dob Beeney kéuyotoy de étew. ²³ Atin ménbéréh i Jesuse mano, “Enggumahén i gaiwe toow fo médayew i Nga i Kéilawane, sani Begéne. ²⁴ Bérhéku begom i toowe, amuk i bénee énda mélébénge dob fantade, énda mégonokén. Endob amuk ménlébénge, mégonok médooy. Ségiléw bé Begéne, non amuk méléhuu, médooy gégedote bé mantuwe umul. ²⁵ I aruméne étew sani toowe fo gémulaan bé férénawa nuwe, méléhu. Endob i étewe énda gulaané noy férénawa nuwe dob ni duniya, gédoté noy mantuwe umul magufusa. ²⁶ Atiy méuyote gémalbékón Begén fatut modor Begén, inok fiyon fo ké ati ayo kuwe, diyo soy sugu-sugué kuwe. Atin fébantug i Abay guwey étewe gémalbékón Begén.

²⁷ “Toow fo tete i fédew guwe béléewe ni. Ati fatute bérhéku? Enda mon gébérého ku de ké maku, ‘Abay, kago fédayaén mérigo séko dob Begéne.’ Non been i niy funa kuwe ménangéy dini inok géagéwo kuy ni kérasay.” ²⁸ Tidew béno, déménasal i Jesuse mano, “Abay, fégito moy barakat me.”

Tidew béno, wén i émbéréhe tidew dob lawayo mano, “Fénggito gun i barakat guwe atin fégito gu man ségule.”

²⁹ Atin amun énggelingoooy de ménslimud do étew diyo i ni, i de dumoy de marok léte, atin i de dumoy de marok télikay no ménbéréh bé Jesuse.

³⁰ Endob bénréh Jesuse mano, “I funay Tuluse ménbéréh békén inok

gélingoo ku, yamula inok gélingoo kom so. ³¹ Béleewey gaiwe féganayéy Tulusey kékukum ne bé de tete étew. Atin fétékédanén i datu i ni duniya, sani Satanase. ³² Atin i Begéne, amuk métunggulu, fáfégédété kuy kéluhanay étewe dob Begéne.” ³³ (Bénréh Jesusey ni inok fégétiga no beroy fégéléhu ne, tunggulén dob kruse.)

³⁴ Atin ménbéréh i de étew ménlimud maro, “Ménbéréh dob Ménsulate Kébéréh i Tuluse i Kristowe kun méuyag taman sa taman. Mélaw sedek bénréhém i Nga i Kéilawane fatut tunggulén? Ati ni Nga Kéilawan?”

³⁵ Mélaw bénréh Jesuse bero mano, “I Begéne maak solo. Atin éndaén mérugay i kékati guwe dob begome. Fétuntay gom béléewe non diniwu séna inok gétiga kom i fiyowe agéwon. Endob amuk délémonén, éndaén gito gom i agéwone. ³⁶ Mélaw amun diniwu séna, unur gom Begén inok waléy gom so do solo miring Begén.”

Amun énggilid i Jesuse ménbéréh, méntrékan brab éndaén méntréfítido no bé de étew. ³⁷ Fiyon fo ké énggitio roy de médoor rénigo Jesuse do mékégaif, énda so munur ro de.

³⁸ Dob ni méntruman i Ménsulate Kébéréh i Tuluse, sénulat Isaiase sani méntrélatee sénarigoy Tuluse muret mano, “Kadnan, énda i munur bé uret geye, atin énda i énggétigan bé fénggitono muwe bé barakat me.”

³⁹⁻⁴⁰ Atin sénulat Isaiase so mano, “I Tuluse, fénwaléyén bero langafén brab fentegasén i de fédew ro, inok énda gégito ro brab inok énda gésobut ro brab énda gésenule ro brab munur dob Tuluse inok tabanga no bero.” Atin been i funa ruwe énda géunur ro.

⁴¹ Bénréh Isaiasey ni non bé gétahé de énggitio noy kékarakata Jesuse brab bénréhén i fantage bé Beene.

⁴² Fiyon fo ké loo bé ni, médooy de odoroy de Judio ménunur bé Jesuse. Endob énda fénayag ro de non mégilak ro bé de Fariseo fétékédané ro dob lawie féngadafan inok éndaén géfengadaf ro diyo. ⁴³ Enda fénayag roy kénur ruwe bé Jesuse non toow na

fo méuyot ro bé kédawéy i kékawane bé kédawéy i Tuluse.

⁴⁴ Tidéw béo, méntranug i kékéréh Jesuse mano, “I étewe munur dob Begéne, énda saén munurén dob Begéne, éndob munur so bé Tuluse séménugu Begén. ⁴⁵ Atin i étewe énggégito Begén, énggitio no soy séménugue Begén. ⁴⁶ Begéney maake solo. Ménangéyu dini dob duniyae inok rémendawu dob de étew. Mélaw i de munur dob Begéne, éndaén bati ro dob délémon. ⁴⁷ Atin i étewe énggégélingo bé kétoro guwe éndob énda munurén de, békén Begén i kémukume de, non énda ménangéyu dini inok kukumé kuy de kékawane, yamula fukasé ku bero dob de sala ro. ⁴⁸ I étewe mika Begén brab énda munurén bé kagéne kétoro, mélukum dob tamfaday de gai. Atin i kémukume de, been i kétoro guwe. ⁴⁹ Non i kagéne kétoro békén tidéw dob Begéne, éndob tidéw dob Abay guwe Tulus séménugu Begén. Been i ménférhéhe Begén. ⁵⁰ Atin gétiga ku, i sugu ne miray bé umule magufusa. Mélaw bérhéhe ku begom i sénugu i Abay guwe.”

13

Nurah Jesusey de sékéy i de kuyugén

¹ Bé béo, ségékélungonon séden atin kékanduli i de Judio fénawé “Témara”. Atin énggétiga Jesuse, gédétén i gaiwe tagaké noy duniyae ni atin séfule mangéy dob Abay ne. Toow fo ménimu bé de kuyugén dob duniyae ni, atin fenténgténgén i kékakél i kékédaw ne bero.

² Ménama i Jesuse beroy de kuyugén. Atin i Satanase, bér gétahé de fénémanduo noy Judas Iskariote sani nga Simon Iskariote inok fékéfoén i Jesuse. ³ Atin i Jesuse énggétiga noy Abay ne sénarigén dob Beeney kéluhanane. Atin énggétiga noy Beeney tidéw dob Tuluse atin séfule mangéy dob Tuluse. ⁴ Mélaw amun ménasar ro séna dob sékuloy ahayane, téménindég i Jesuse brab kénda noy kégal ne brab

nikétén i tuwaliyawé dob owok ne.
⁵ Tidéw béno, rénigono no wayég i félangganahé atin nurahén i de sékéy i de kuyugén, brab ténafo no bé tuwaliyawé nikétén dob owok ne.
⁶ Amun fégédét i Jesuse dob Simon Pedrowe, ménbéréh i Pedrowe mano, “Kadnan, aw Beem i murahe bé de sékéy gu?”

⁷ Séménumbul i Jesuse mano, “Enda gésobuto kom i atag i ni rigoné ku béléewe ni, éndob gésobuto kom so moso.”

⁸ “Kago”, bang Pedro. “Enda fo méuyotu de ké Beem i murahe bé de sékéy gu.”

Endob séménumbul i Jesuse mano, “Amuk énda géuraha ku begom, békén gom do toow kuyug gu.”

⁹ Mélaw bang Pedrowe, “Kadnan, békén say de sékéy gu, éndob urahém soy de kémér gu brab uléw guwe de so.”

¹⁰ Endob ménbéréh i Jesuse mano, “I étewe énggilidén méndiyoh, kailangan urahé no say de sékéyén, non limfiyonén i lowoh ne. Atin limfiyo gomén saliyu bé ségétéwe énda limfiyo no.” ¹¹ Bénréh Jesusey ni non gétiga no wén i ségétéwe bero émfékéfo de. Been i niy funa nuwe ménbéréh mano, “Enda kéluhana kom limfiyo.”

¹² Atin amun énggilidén nurah Jesusey de sékéy i de kuyugén, kéménégal brab ménasar man dob amaane. Tidéw béno, ménénginsa mano, “Aw énggésobuto kom i rénigo guwe dob begome? ¹³ Fédawété kom Begén ‘Maistéro’ brab ‘Kadnan’, atin toow fo fatut i nan non Begéney Kadnane. ¹⁴ Mélaw i Begéne, sani Kadna kome brab Maistéro gom, amun nurah guy de sékéy gom, fatut gom so séurah sékéy. ¹⁵ Ténoro gu begom i fatute adat. Rénigo guy ni inok iringé kom so. ¹⁶ Bérhéku begom i toowe, énda nay rifén ké toow na fo gérotor bé gefee de, brab énda nay sugu-suguén ké toow na fo gérotor bé amu ne. ¹⁷ Amuk

énggésobuto kom i de ni, toow gom na fo moror ké rigoné kom.

¹⁸ “Enda bérhéku yuy ni dob begome kéluhanan, non gétiga yuy de fédéw gom do fénemili gu. Mélaw gétiga ku wén i ségétéw begom émfékéfo Begén. Mérigoy ni inok métuman i Ménsulate Kébéréh i Tuluse mano, ‘I étewe dumo gu mama waléy sébanil Begén.’” ¹⁹ Féntaus Jesusey kékébéréh ne mano, “Bérhéku begom béléewe ni, bé énda séna ménrigo no inok amuk gégumah i gaiwe métuman i ni, géunur gom Begéney Kristowe tidéw dob Tuluse. ²⁰ Bérhéku begom i toowe, i étewe témayakuf bé sugué kuwe, témayakuf so Begén. Atin i témayakufe Begén, témayakufén soy Tuluse séménugu Begén.”

²¹ Amun énggilid Jesuse bénréh i ni, toow fo ménlidu i na nuwe atin ménbéréh man mano, “Bérhéku begom i toowe, wén sékoy ségétéwe begom émfékéfo Begén.”

²² Tidéw béno, i de kuyugén ménggésétengténg ro, non énda gétiga roy ati isuwe bé berowey bénréh Jesuse. ²³ Atin ménasar dob sékulo Jesusey kuyug ne toow fo kégédawa no. ²⁴ Atin kénébit Simon Pedrowey ni kuyug brab ménbéréh mano, “Fénginsaém ké ati isuwe de.”

²⁵ Mélaw ménfégédét i ni kuyug dob Jesuse brab ménénginsa mano, “Kadnan, ati isuwe begey i émfékéfoe Beem?”

²⁶ Séménumbul i Jesuse mano, “I étewe iraya ku bé fane nérém gu, been i nan.” Tidéw béno, amun énggérémo noy fane, nirayén dob Judase nga Simon Iskariote. ²⁷ Amun énggédot Judasey fane, ménahur i Satanase dob Beene. Atin ménbéréh i Jesuse mano, “Fagayas gon, rigo mo nén i rigoné muwe.” ²⁸ Endob énda i ségétéw bé de kuyugén ménasar dob amaane, énggésobut bé funa Jesuse ménbéréh bé nan. ²⁹ Non i Judase beeney témimue bé de kurta ro, brab marok sénugu Jesuse mangéy méléy bé de kailanga ro bé no kékanduli. Atin i de

dumo bero marok sénuguén mangéy miray kurta dob de méskinan.

³⁰ Amun énggédot Judasey fane ni, ménusut atin ménagéw. Bé béo, kélungonon.

I mantuwe sugu

³¹ Amun ménagéw i Judase, ménbéréh i Jesuse mano, “Béleewe gitonén i barakat guwe sani Nga i Kéilawane. Atin bé Begéne, giton soy barakat i Tuluse. ³² Brab amuk bé Begéne, énggitonén i barakat i Tuluse, tidéw béo fégitoi Tulusey barakat guwe. Atin rigoné noy ni magad. ³³ Do nga gu, éndaén mérugay i kébati guwe dob begome, brab sélédé kom séko Begén. Endob béréhé ku begom béléewe niy bénréh guwe dob de odoroy de Judio, ‘Enda géodor gom mangéy dob ayo kuwe.’ ³⁴ Atin ay niy mantuwe sugu iray gu begom: Ségédaw gom. Ségiléw bé kégédaw guwe begom, ségédaw gom. ³⁵ Amuk ségédaw gom, gétigay kéluhanay de étew mélaw begom i de kuyug gu.”

³⁶ Tidéw béo, ménénginsa i Simon Pedrowe mano, “Kadnan, ayo muwe de?”

Séménumbul i Jesuse mano, “Béleewe ni, énda géodor gom Begén mangéy dob ayo kuwe. Endob gétundug gom so moso may diyo.”

³⁷ Atin bang Pedrowe, “Kadnan, sedek énda géodoru Beem béléewe ni? Ulan den ké méléhuu sabaf bé Beeme.”

³⁸ Endob ménbéréh man i Jesuse mano, “Aw toow ulan den ké méléhu go sabaf bé Begéne? Béréhé ku beem i toowe, énda séna ukoro i férufete, dirungé mo Begén téléc gule bé énda gélolo mo Begén.”

14

Jesusey agéwone mangéy dob lawayo

¹ Bang Jesuse, “Kagom émbuku taloo no tete i de fédew gom. Unur gom bé Tuluse, brab unur gom so Begén.

² Wén i médoo do gonon dob lawi i Abay guwe. Atin magéwu angéyé

ku tafayén i de gono kom. Enda béréhé ku begom i ni amuk békén toow. ³ Tidéw béo, amuk énggilidén méntafay i de gono kom, séfuleu mangéy dini brab uwité ku begom mangéy dob batio kuwe inok sétifon tom. ⁴ Atin gétiga kom i agéwone mangéy dob ayo kuwe.”

⁵ Endob ménbéréh i Tomase mano, “Kadnan, énda gétiga key i ayo muwe de. Ati mélaw i kégétiga keye bé agéwone mangéy diyo?”

⁶ Séménumbul i Jesuse mano, “Begéney agéwone, Begéney toowe, brab Begéney umule. Enda i géangéy dob Abaye saliyu bé Begéne. ⁷ Amuk toow fo gétiga kom Begén, gétiga kom soy Abay guwe Tulus. Atin tidéw béléewe ni, énggétiga komén brab énggito gomén.”

⁸ Atin bang Filipihe. “Kadnan, fégito mo begey i Abaye Tulus. Been saén i nan i kailanga keye.”

⁹ Séménumbul i Jesuse mano, “Ménrugayén i kébati guwe dob begome. Endob taman so béléewe énda so wayo gélolo mo Begén Filipi? I énggégitowe Begén, énggito no soy Abaye. Sede mélaw ké émbéréh go, ‘Fégito mo begey i Abaye?’ ¹⁰ Aw énda fo munur go Begén diyou dob Abaye, atin i Abaye dini dob Begéne? I de béréhé ku begom békén tidéw dob Begéne. Tidéw dob Abaye dini dob Begéne gémalbék. ¹¹ Unur gom bé kéréhé guwe, i Begéne diyou dob Abaye, atin i Abaye dini dob Begéne. Taloo no unur gom sabaf bé de mérégaif énggito gom rénigo gu. ¹² Béréhé ku begom i toowe, i munure Begén gérigono noy de galbék rigoné ku. Atin gérigo na toow fo dakél mérégaif bé de kagén galbék, non mangéyu dob Abay guwe. ¹³ Atin rigoné kuy kéluhanay ongoté kome dob dawét guwe, inok fégito guy kériyoy Abay guwe Tulus. ¹⁴ Udenén éntingayén ongoté kom dob dawét guwe, rigoné ku.”

Fantag bé Rémogor i Tuluse

¹⁵ Féntaus Jesusey kékérén ne mano, “Amuk méimu gom Begén, odoro kom i de sugé ku. ¹⁶⁻¹⁷ Atin ongoté ku dob Abaye, brab sému ségiyo témabang sani Rémodor i Tuluse témo ro bé toowe. Atin bati dob begome taman sa taman. I de étew dob duniyae sébanil bé Tuluse énda tayakufé ro de non énda gito ro de brab énda gétiga ro de. Endob i begome, gétiga kom non bati dob begome brab énda tékéda no dob begome.

¹⁸ “Atin i Begéne, énda tagaké ku begom félébu, non séfuleo ku begom. ¹⁹ Endaén mérugayén, i de sébanil bé Tuluse éndaén gito ro Begén. Endob i begome, gito gom man Begén. Atin non méuyagu man taman sa taman, méuyag gom so taman sa taman. ²⁰ Amuk gégumah i nan gai tébuleu, gétiga kom i Begéne diyo dob Abay guwe, atin i begome dini dob Begéne, loo bé kediyo guwe dob begome.

²¹ “I témayakufe bé de sugu gu brab rigoné no, beeney méimue Begén. Atin i Abay guwe féimué noy étewé méimu Begén. Atin i Begéne féimué ku so brab fefégétiga ku dob beeney fantage bé Begéne.”

²² Tidewé bénou, ménbérén i Judase (békén Judas Iskariot) mano, “Kadan, sedek fefégétiga mo begey i fantage bé Beeme, endob énda fayagé mo de dob de étew sébanil bé Tuluse?”

²³ Séménubul i Jesuse mano, “I méimue Begén, odoro noy kétoro guwe. Atin i Abay guwe méimu de so brab i Abay guwe brab Begéne mangéy gey bati dob beene. ²⁴ I étewé énda méimuén Begén, énda so odoro noy kétoro guwe. I de ni kékérén gelingoo kom békén kagén, endob tidew dob Abaye séménugu Begén.

²⁵ “Bénréh gu dob begomey de ni lokut diniwu séna dob begome. ²⁶ I témabange sani Rémodor i Tuluse, féuwit i Abaye inok fétausé noy galbék guwe. Atin toroé no begom i kéluhanane brab fefégétédémén begom i kéluhanay bénréh guwe begom.

²⁷ “Féledé kuy kagéne kétanék dob begome, inok fiyoy de fédew gom. I kétanéke iray gu begom békén loo bé kétanéke dob duniyae ni. Mélaw kagom émbuku taloo no mégilak gom. ²⁸ Enggelingoo kom i bénréh guwe bé tagaké ku begom éndob séfuleo ku so begom. Amu damén ké toow gom méimu Begén, moror gom bé kénégy guwe dob Abaye non i Abaye toow na fo gérator Begén. ²⁹ Bénréh gu begom i ni lokut énda séna ménrigo no, inok amuk métuman, munur gom de. ³⁰ Enda férugayé kuy kékérén guwe dob begome non gégumah sékoy odoroy duniyae ni sani fénawéte Satanas. Endob énda i barakatén gélawan Begén. ³¹ Endob rigoné kuy kéluhanay sénugu i Abaye inok gétigay de étew i kímu guwe bé Abaye. Enggomén, magéw tomén tékédan tom dini.”

15

Ibinuwayaé fantag bé kayéwe

¹ Ménbérén man i Jesuse mano, “I Begéne maak sébaan idéng kayéw atin i Abay guwe Tulus Beeney gefee bé kayéwe. ² Amuk wén i do fongoy kayéwe énda mégonokén, kéléngé no. Atin limfiyoné noy de fongo mégonok inok méuman i kétégonok ruwe. ³ I begome maak do fongo gu brab ménlimfiyo gomén, non ménunur gomén bé de kétoro gu. ⁴ Kagom tékédan dob Begéne atin énda tékédanu dob begome. Enda i fongo gégégonok amuk énda ménsumfatén dob idéng i kayéwe. Ségiléw bé begome non amuk sésuway gom Begén, énda gérigo gom bé fiyowe.

⁵ “Non i Begéne maak idéng kayéw atin i begome maak do fongo. I étewé énda tékédan no dob Begéne, brab énda so tékédanu dob beene, gégégonok mèdoo do fiyo rigonén. Endob énda i fiyo gérigo kom ké tékédan gom dob Begéne. ⁶ Atin i endae ménsumfat dob Begéne ibérén loo bé fongowe. Tidewé bénou, waléy mégangu. Atin i kéluhanay de fongo do mégangu,

timuén inok ibérén dob aféye brab métuwég. ⁷ Endob i begome, amuk énda tékédan gom dob Begéne atin amuk modor gom bé kétoro guwe, udenén kétaya kom ongoté kom, atin gédoté kom. ⁸ Atin amuk énggégégonok gom médo do fiyo rigonén, dayewéy de étew i Abay guwe. Atin gétiga ro mélaw do kuyug gu begom. ⁹ Féimué ku begom ségiléw bé kéimu i Abay guwe Begén. Fétaus gom i kétayakuf gome bé gédaw guwe begom. ¹⁰ Amuk odoro kom i de sugu gu, gétaus gom bé kétayakuf gome bé gédaw guwe begom, ségiléw bé kéodoro ku bé de sugu i Abay guwe atin taus i kétayakuf guwe bé gédaw ne Begén.

¹¹ “Bénréh gu begom i ni inok méoror gom ségiléw bé Begéne inok toow tom fo séoror. ¹² Ay niy sugu guwe begom: ségédaw gom loo bé kégédaw guwe begom. ¹³ Amuk toow fo mégédaw i ségétewe étew bé dumo nuwe, irayén i férénawa nuwe inok tabanga no. Been i niy toowe fo dakél kégédaw. ¹⁴ Begom i do dumo gu, amuk rigoné kom i sugué kuwe begom. ¹⁵ Endaén fédawété ku begom do sugu-suguén, non i ségétewe sugu-suguén, énda gétiga noy rigonéy amu ne. Yamula fédawété ku begom do dumo gu, non bénréh gu begom i kéluhanay énggelingoo kuwe tidew dob Abay guwe Tulus. ¹⁶ Békén begom i ménémilie Begén, yamula fénémili gu begom. Ténabar gu begom inok géfégonok gom do fiyo galbék énda mékedano. Atin mélaw i Abaye Tulus, irayén begom i kéluhanay ongoté kome dob dawét guwe. ¹⁷ Ay ni mélaw i sugu guwe begom: ségédaw gom.

¹⁸ “I de étew sébanil bé Tuluse dob duniyae ni, amuk mérarék ro begom, fégétédém gom i ni, géétahu na kénraréko ro. ¹⁹ Amuk mamung gom sébanil bé Tuluse, méimu i de tete étew begom. Endob fénémili gu begom inok sésuway gom bé de tete étew dob duniyae ni. Mélaw mérarék ro begom. ²⁰ Fégétédém gom i bénréh guwe begom, ‘Enda i sugu-suguén

ké gérotor na bé amu ne.’ Mélaw amuk férasayé ro Begén, férasayé ro so begom. Endob amuk wén i do étew odoro roy kagéne kétoro, odoro ro soy kagome de. ²¹ Endob i funa ruwe begom émférasay non do kuyug gu begom. Non énda gétiga roy Tuluse, sani séménugue Begén. ²² Amuk énda ménangéyu dini mureton bero, énda i sala ro. Endob béleewe ni énda gésélyah ro non énggelingoo roy toowe, éndob mika ro de. ²³ Atin i de étew mérarék Begén, békén mérarék ro saén Begén non mérarék ro so bé Abay guwe. ²⁴ Enggito roy mékégaife galbék rénigo gu, énda gérigonoy ségiyowe de. Amuk énda énggito ro de, énda i sala ro. Endob énggito roy de ni, gido loo mérarék ro Begén brab Abay guwe Tulus. ²⁵ Endob fatut mérigoy ni inok métuman i Ménsulate Kébéréh i Tuluse mano, ‘Fiyon fo ké énda i funa ro, mérarék ro so Begén.’ ”

²⁶ Fétaus Jesusey kékéréh ne mano, “Gégumah sékoy témabange tidew dob Abaye Tulus. Sugué ku mangéy dob begome. I dawét ne Rémogor i Tuluse, atin toroé noy toowe. Amuk gumahén dini, fégétiga no bé de étew i fantage bé Begéne. ²⁷ Atin begome soy fatute muret fantag bé Begéne, non énggéséodor gom Begén tidew féganay bé kétoro guwe.”

16

¹ Fétaus Jesusey kékéréh ne mano, “Bénréh gu begom i kéluhanay de ni inok énda mékédan i késarig gome dob Begéne. ² Non éndaén moso tungkasé ro begom mahur dob de lawi féngadafan. Atin gégumah moso i gaiwe, i de étew méméléhu begom, marok rigoné roy kétayay Tuluse. ³ Rigoné roy de ni non énda séna gélolo ro Begén taloo no Abay guwe. ⁴ Endob bénréh gu begom i de ni, inok amuk gégumah moso i nan gai kékéréh begom, gétédémo kom i bénréh gun begom.

“Enda bénréh gu de begom bé de géyah, non diniwu séna séodor begom.

⁵ Endob béleewe ni, muleu mangéy

dob Tuluse séménugu Begén. Gido loo, énda i ségetéw begom ménginsa ké hon i ayo kuwe de. ⁶ Atin béléewe, toow fo tete i de fédew gom non bénréh guy de ni. ⁷ Gido loo, bérhéhe ku begom i toowe, toow na fo fiyo dob begome ké magéwu, non buluk énda magéwu énda mangéy i tétabange dob begome. Endob amuk magéwu, sugué ku mangéy dob begome. ⁸ Atin buluk gégumah, fefégétiga no bé de étew i de sala ro. Fefégétiga no soy fantage bé fiyowe brab fantag bé kékukum i Tuluse. ⁹ Fégétiga no bero ménsala ro sabaf énda méginugut ro Begén. ¹⁰ Fefégétiga no beroy fantage bé fiyowe non muleu mangéy dob Abaye Tulus, atin éndaén gito gom Begén. ¹¹ Atin fefégétiga no soy fantage bé kékukum i Tuluse, non i Satanase, sani odoroy kéluhanay teteetee dob duniyae ni, ménkukumén.

¹² “Médoo nay kéuyoto kuwe ureté ku begom, éndob énda séna gésobuto kom de béléewe ni, brab waléy gom émbuku ké bérhéhe ku. ¹³ Endob i Rémogor i Tuluse, sani témoree bé toowe, amuk gégumah, fefégétiga no begom i kéluhanay toowe. Enda bérhéhe noy de kaan saén kéfégitung, yamula toroé noy kéluhanay énggelingoo nuwe tidew dob Abaye, atin bérhéhe no begom i fantage bé kéluhanay mérigowe moso. ¹⁴ Dayewé no Begén, non fefégésobutén begom i kéluhanay de kagén kétoro brab de rénigo gu. ¹⁵ I kéluhanay kay Abaye, kagén so. Been i niy funa kuwe ménbérhéh bé i Rémogor i Tuluse, fefégésobutén begom i kéluhanay kétoro guwe.

¹⁶ “Endaén mérugayén tidew béléewe ni, éndaén gito gom Begén. Enda man mérugayén tidew bénó, gito gom man Begén.”

¹⁷ Atin i de dumo bé de kuyugén ménisébérhéh-bérhéh ro maro, “Ati atag i bénréh ne mano, ‘Endaén mérugayén tidew béléewe, éndaén gito gom Begén, brab énda man mérugayén tidew bénó, gito gom man Begén?’ Brab bénréhén

so mano, ‘Non muleun mangéy dob Abaye.’ ¹⁸ Atin ati keey i atag i ni, ‘Endaén mérugayén?’ Enda gésobuto tom i no bénréhén.”

¹⁹ Atin énggétiga Jesuse méuyot ro ménginsa, mélaw bénréhén bero mano, “Aw séfenginsa gom bé ati atag i bénréh guwe begom maku, ‘Endaén mérugayén éndaén gito gom Begén, brab énda man mérugayén tidew bénó gito gom man Begén?’ ²⁰ Bérhéhe ku begom i toowe, i de tete étew dob duniyae ni, toow ro fo moror bé mérigowe dob Begéne, éndob i begome, kémérew gom non toow fo tete i de fédew gom. Endob énda man mérugayén waléy gom toow na fo moror. ²¹ Ufama, i libune kéararan, démawét non énggumahén i gaiy kékérasaya nuwe. Endob buluk ménkéumahanén, ménlifotén bé kékédawéta nuwe, sabaf bé kéoror ne bé ngae ménunah dob duniyae ni. ²² Ségiléw bé nan soy begome. Béléewe ni, tete i de fédew gom. Endob amuk gégumahén sékoy gaiwe géségito tom man, waléy gom toow fo moror. Atin énda i gékédan bé kéoror gome.

²³ “Amuk gégumahén sékoy nan gai, éndaén ongote kom Begén. Bérhéhe ku begom i toowe, i Abaye Tulus, irayén begom i kéluhanay ongoté kome dob dawét guwe. ²⁴ Taman so béní, énda séna ménongot gom dob dawét guwe. Ongot gom atin gédoté kom, inok toow gom fo moror.

²⁵ “Bénréh gu begom i de ni fénagéw dob binuwaae. Endob gégumah sékoy gaiwe éndaén binuwaae ku begom, yamula fékéntayé kuy kéuret guwe fantag bé Abaye. ²⁶ Buluk gégumah i nan gai, begom i de mongot dob dawét guwe dob Beene inok iraya no begom. Békén Begén i mongote. ²⁷ Non i Abaye toow fo mégédaw begom. Féimué no begom non ménimú gom Begén brab ménunur gom Begén tidewu dob Beene. ²⁸ Tidewu dob Abaye Tulus, brab ménangéyu dob duniyae. Brab béléewe tékédanu dob duniyae ni, atin muleu mangéy dob Abaye.”

29 Tidéw béno, ménbéréh i de kuyugén maro, “Béleewe mékéntay i kékéréh me, éndaén émbéréh go binuwaya. **30** Béleewe ni gétiga key gétiga moy kéluhanane, non fiyon fo ké énda séna ménginsa gey, gétiga mon i de fénginsaé key. Mélaw munur gey Beem, tidéw go dob Tuluse.”

31 Atin bang Jesuse, “Aw méginugut gomén Begén? **32** Endob gégumah i gaiwe brab énggumahén, ké émbéragar gom, mule gom mangéy dob de lawi gom. Atin tagaké kom Begén ségétew gu saén. Endob fiyon fo ké loo bé nan, wén i dumo gu, non i Abay guwe Tulus i dumo guwe. **33** Bérhéh kuy de ni begom, inok fiyoy de fédew gom sabaf bé késarig gome dob Begéne. Férégénoy de tete étew begom, éndob fébaraw gom non ténanbananén Begén i Satanase, sani odoroy duniyae ni.”

17

1 Amun énggilid Jesuse bénréh i de ni, léménéngag saréw dob lawayo brab ménbéréh mano, “Abay, énggumahén i gaiwe. Fégito moy kéfiyo guwe funa ku fatut médayéw inok fégito gu soy kéfiyo muwe funa mo fatut médayéw. **2** Non sénarigém Begén i kuwagibé méguléw bé kéluhanay de kékilawan, inok iray guy umule magufusa dob kéluhanay de étew nirayém Begén. **3** Atin ay niy kégédote bé umule magufusa: kailangan gétiga roy Beeme brab Begéne, non Beem saén i tintuwe Tulus brab Begén i sénugu me Jesu Kristo. **4** Fénggito guy kéfiyo muwe dob duniyae, funa mo fatut médayéw atin énggilid gun i galbéke sénuguém Begén rigoné ku. **5** Abay, béleewe ni ay niwu dob adafa muwe, féséfuleém dob Begéney bantuge loo bé bantug tuwe tidéw féganay bé énda séna ménlimbag i duniyae de.

6 “Féfégétiga kuy fantage bé Beeme dob de étew dob ni duniya nirayém Begén. Beem i gefee bero, atin nirayém bero dob Begéne, atin ménunur ro bé kékéréh me. **7** Béleewe énggétiga ro tidéw dob Beemey

kéluhanane bérhéh ku brab rigoné ku. **8** Non fénfamfay gu dob berowey de kékéréhém nirayém Begén, atin méngginugut ro de. Enggétiga ro toowu tidéw dob Beeme, brab ménunur ro sénuguém Begén.

9 “Dasala ku bero dob Beeme. Enda dasala kuy de tete étew dob duniyae ni, éndob ongoté ku dob Beeme féfiyoné moy de étew nirayém Begén non kaam so do étew. **10** I kéluhanay kagéne kaam so, brab i kéluhanay kaame kagén so. Atin dob berowe énggiton i kéfiyo guwe funa ku fatut médayéw. **11** Atin muleu séko mangéy dob Beeme, brab éndaén batiu dob duniyae ni. Endob taus i karowe kékati dob duniyae ni. Fiyo Abay, diyaga mo bero bé barakat i dawét me, sani dawét me nirayém Begén, inok waléy ro sébaan, ségiléw bé betowe sébaan. **12** Amun diniwu dob berowe, déniyaga gu bero bé barakat i dawét me nirayém Begén. Déniyaga gu bero inok énda i ségétew métadin bero saliyu bé ségétew kailangan mékukum inok métuman i Ménsulate Kékéréhém. **13** Atin béleewe séfuleu mangéy dob Beeme. Bérhéh kuy de ni lokut diniwu séna inok i de gégélingo de toow ro fo moror séréngan bé Begéne. **14** Fénfamfay gu dob berowey de kaam kétoro. Atin i de tete étew dob duniyae, mérarék ro bero non éndaén mamung ro dob de tete étew ségiléw bé Begéne énda mamungu de. **15** Enda ongoté ku de dob Beeme ké kédané mo bero dob duniyae, éndob ongoté ku dob Beeme diyagané mo bero tidéw dob Satanase. **16** Enda mamung ro sébanil Beem ségiléw bé Begéne énda mamungu de. **17** I de ni kato étew, usarém i toowe féwaléyém bero do malinis dob adafa muwe. Atin i kaame kékéréh, been i toowe. **18** Sénugu gu bero muret dob de étew ségiléw bé késugu me Begén mangéy dob duniyae. **19** Atin sabaf bé berowe, iray gu Beem i fédew guwe, inok i berowe so iray roy de fédew ro dob Beeme.

20 “Békén saén i berowey dasala kuwe dob Beeme, éndob dasala ku soy

de étew munur ro dob Begéne non bé kúret i de ni kuyug gu. ²¹ Démasalu dob Beeme Abay inok waléy ro sébaan ségiléw bé Betowe. Atin ségiléw bé kédini muwe dob Begéne brab kédiyo guwe dob Beeme, dini ro so damén dob Betowe. Waléy ro damén sébaan inok i de étew dob duniyae munur ro bé sénuguém Begén. ²² Niray gu beroy barakate nirayém Begén inok i de fédew ro waléy sébaan loo bé Betowe. ²³ Non i Begéne diyou dob berowe, atin i Beeme dini go dob Begéne. Mélaw waléy ro damén tintu sébaan inok i de étew dob duniyae gétiga ro Beem i séménugu Begén brab féimuém bero loo bé kékému me Begén.

²⁴ “Abay, i de étew nirayém Begén, méuyotu de ké i ayo kuwe begey so inok gito roy bantug guwe, sani bantuge nirayém Begén non fénimuém Begén fiyon fo ké énda séna ménlimbag i duniyae de. ²⁵ Métintu Abay gu, i de étew sébanil Beem, énda gétiga ro Beem. Endob i Begéne énggétiga ku Beem. Atin i de ni kuyug, gétiga ro sénuguém Begén. ²⁶ Fénggétiga ku beroy fantage bé Beeme, brab fétausé ku so inok i kégédaw me bero waléy ségiléw bé kégédaw me Begén, atin gédiyou dob berowe.” Been i niy dasal Jesuse.

18

Kénéfo i Jesuse

¹ Amun énggilid i Jesuse démasal, ménagéw beroy de kuyugén ménifar ro bé wayége féndawét Kidron. Wén i do nohok kayéw diyo atin diyo ro téménrén. ² Atin i Judase sani émfékéfoe de énggétiga noy ni gonon non diyo démoyun sélimud i Jesuse bé de kuyugén. ³ Mélaw i Judase ménangéy diyo, fénanangguwitén i médoowe sundalo brab de mantay bé lawi i Tuluse sénugu i de odoroy de fadi brab do Fariseo. Ménuit ro do solo brab do téla-ta brab do kulangén. ⁴ I Jesuse énggétiga non i kéluhanane mérigo séko dob Beene. Mélaw

fénggédéto no bero brab ménbéréh mano, “Ati séléde kome?”

⁵ Séménumbul ro maro, “Séléde key i Jesuse tidew Nasaret.”

Atin bang Jesuse, “Begén i no.”

Diyo soy Judase brab been i émfékéfoe bé Jesuse. ⁶ Amun bénréh Jesuse Been i no séléde ro, énggétésunud i de sundalo brab kéluhana ro méntuwar. ⁷ Tidew béo, ménenginsa man i Jesuse mano, “Ati séléde kome?”

Atin séménumbul ro maro, “Jesus tidew Nasaret.”

⁸ Atin bang Jesuse, “Bénréh gun begom, Begén i Jesuse. Mélaw amuk Begén i séléde kome féagéw gom i de dumo gu ni.” ⁹ Bénréhén i ni inok métuman i kékému ne mano, “Abay, énda i énggétadino ku fiyon ségétew bé de étew nirayém Begén.”

¹⁰ Tidew béo, i Simon Pedrowe rénau noy sundange tidew dob ruma ne. Atin téni bohén i ségétew rifén kay gérotore fadi brab sénilafén i kelingo ne fingé kuwonon. I dawét i ni rifén Malkus. ¹¹ Tidew béo, bénréh Jesuse dob Pedrowe mano, “Rumaém i sundang ma nan. Non i kékérasaya kuwe niray i Tuluse Begén, békén ba kailangan téférasyun mon?”

Ménukum i Jesuse

¹² Tidew béo, i de sundalo beroy odoro ruwe, brab de mantay bé lawi i Tuluse, kénéfo roy Jesuse brab nikét ro. ¹³ Atin nuwit ro sungu dob Anase, térimay gérotore fadi bé no bélintuwa féndawét Kayafas. ¹⁴ Atin i Kayafase féngginau noy de odoroy de Judio bé gétahe de mano, “Toow na fo fiyo ké ségétew saén i méléhue inok énda méléhu i kéluhanay de Judio.”

¹⁵ Atin i Pedrowe brab ségétewé dumo no kuyug ménfuray ro bé Jesuse. I ni ségétew kuyug, énggéloloy gérotore fadi, mélaw énggéodor so bé Jesuse mahur mangéy dob fésaway lawi i gérotore fadi.

¹⁶ Endob i Pedrowe ménféled dob liuy bengaway fésawayane. Tidew béo, i dumo nuwe kuyug sani énggéloloy gérotore fadi ménut brab

ménsébéréh bé kénogone mantay dob bengawane, brab fénahurén i Pedrowe dob fésayawane. ¹⁷ I kénogone ni ménénginsa dob Pedrowe mano, "Aw békén ba beem i ségétewe bé de kuyug i lagéye kénéfo?"

Séménumbul i Pedrowe mano, "Békén begén."

¹⁸ Mélégénéy fo bé béno gai. Mélaw i de sugu-suguén brab de guwardiya ménuyag ro aféy atin téménindég diyo méntélagang ro. Atin diyo soy Pedrowe téménindég télagang.

¹⁹ Atin i gérotore fadi fénénginsaa noy Jesuse fantag bé de kuyugén brab bé de kétoroén. ²⁰ Séménumbul i Jesuse mano, "Enda ménbunéy i de kétoro gu. Yamula toroé kuy kéluhanay de étew non démoyunu témoro dob de lawi féngadafan brab dob lawi i Tulluse dob téngaangay de étew, non diyo ménlimud i de Judio. Enda foy bénréh gu ké sénkém saén. ²¹ Mélaw sedek fénginsaa mo Begén? Fénginsaa moy de étew énggégélingo Begén non gétiga roy de kétoro gu."

²² Amun bénréh Jesusey ni, i ségétewe bé de guwardiya ténamfilingén i Jesuse brab ménbéréh mano, "Aw been i nan i késumbulo muwe bé gérotore fadi?"

²³ Séménumbul i Jesuse mano, "Amuk tete i bénréh guwe, bérhéh ati tetee de. Endob amuk toow i bénréh guwe, sedek tamfilingé mo Begén?"

²⁴ Tidéw béno, i Jesuse tafay so nikét fenuwit Anase mangéy dob toowe gérotor fadi féndawét Kayafas.

²⁵ Amun i Pedrowe diyo séna dob aféye télagang, fénénginsaay de étew diyo maro, "Aw békén ba beem soy ségétewe bé de kuyugén?"

Endob dénirung Pedrowe mano, "Békén begén."

²⁶ Diyo i ségétewe rifén kay toowe gérotor fadi sani samung i étewe sénilaf Pedrowey kelingo ne. Ménénginsa mano, "Aw békén ba beem i énggito guwe dumo no bé kékéfo ruwe de dob safade?"

²⁷ Atin dénirung Pedrowe man mano, "Békén begén." Sonom so béno, ménukoro i férufete.

²⁸ Tidéw béno, nuwit roy Jesuse tidéw dob lawi Kayafase mangéy dob lawi i méguléwe bero tidéw Roma. Toow fo géfuwén bé no uras. Atin i de odoroy de Judio énda ménahur ro dob lawi i méguléwe inok odoro roy adat ruwe fantag bé kékanduli ruwe. Non amuk mahur ro dob lawi i de étew békén Judio, énda géamung ro bé kandulie féndawét ro "Témara" non marok mémérésik dob adafay Tullusey de lawi i de étew békén Judio. ²⁹ Mélaw i méguléwe féndawét Pilato ménut tidéw dob lawi ne mangéy dob berowe brab ménénginsa mano, "Ati funa kome témébo bé ni étew?"

³⁰ Séménumbul ro maro, "Amuk énda i rénigo no tete, énda uwité key de mangéy dob beeme."

³¹ Atin bang Pilatowe, "Uwit gom mangéy dob kagome kukuman, brab begom i kémukum de ké ati ménbéréhe dob kitab gome."

Endob séménumbul i de Judio maro, "Endob dob kitab gome do Romano, énda i kuwagib gey kémukum méléhu bé ségétewe étew." ³² Ménrigoy ni inok métuman i kékéréh Jesuse fantag bé kaane fégéléhu, sani dob kruse. Non i adat i de Romano, féléhué roy de étew dob de krus.

³³ Atin i Pilatowe ménahur dob lawi ne brab ténawagén i Jesuse, atin ménénginsa mano, "Aw Beem i datu i de Judio?"

³⁴ Séménumbul i Jesuse mano, "Aw kaam sa kéfegitung i nan loo ké énggelingoo mo tidéw dob de ségiyo bénréh roy nan fantag bé Begéne?"

³⁵ Atin bang Pilatowe, "Békén ségétew Judio! Endob do falan do dumo mo Judio brab de odoroy de fadi gom i ménuwite Beem dini. Ati tetee rénigo mo?"

³⁶ Séménumbul i Jesuse mano, "I sakuf i féguléwo kuwe békén dob duniyaé ni. Amuk duniyaé niy sakuf i féguléwo kuwe, i de kuyug gu métah ro sétiboh inok énda gékéfooy de Judio

Begén. I sakuf i kagéne féguléwon békén dini.”

³⁷ Mélaw i Pilatowe ménénginsa mano, “Amuk loo bé nan, aw ségétew go datu?”

Séménumbul i Jesuse mano, “Toow i kóbérén me, Begén i datue. Atin i funa kuwe ménumah brab ménangéy dob duniyae ni inok feféngésobut guy toowe. Atin i de étew modor bé toowe, fégélingoé ro Begén.”

³⁸ Atin bang Pilatowe, “Ati keeyén i toowe?”

Amun énggóbérénho Pilatowey ni, ménusut man ménangéy dob de Judio brab bénréhén mano, “Enda i gétiga ku sala i ni étew. ³⁹ Endob i adat gome, sénga kanduli gom féndawé ‘Témara,’ témangéy ségétew férius, sani ati fémilié kome. Aw méuyot gom de ké tangéyé kuy ni étew datu gom do Judio?”

⁴⁰ Séménumbul ro ménakaw, “Békén Been i tangéyéne. Méuyot gey de ké tangéyé moy Barabase saén.” (I Barabase ni, beeney ségétewe ménakaw.)

19

¹ Tidéw béno, i Pilatowe fénbadasén i Jesuse. ² Atin i de sundalo ménidot ro do suwaran kélég brab lénuku ro, atin fénsayaf ro bé Jesuse. Tidéw béno, fénkégal roy Jesuse furo kégal toow fo métah, maak datu. ³ Atin déniyangka ro maro, “Méraru damén i datu i de Judio.” Atin ténamfiling ro médoo gule.

⁴ Tidéw béno, ménangéy man i Pilatowe dob de étew ménribuk brab bénréhén mano, “Uwité ku mangéy dob téngaanga kome inok fégétiga ku begom énda i salaén.” ⁵ Atin ménusut i Jesuse séménayaf do lénuku suwar brab kéménagal furo. Tidéw béno, ménbérén i Pilatowe mano, “Téngténg gom, ay niy étewe.”

⁶ Amun énggitoy de odoroy de fadi brab de guardiya, ménkes ro maro, “Féléhuén, kélabonén dob kruse!”

Tidéw béno, ménbérén i Pilatowe mano, “Uwit gom brab begom i kémelabo de. Endob i begéne, karangé ku énda i salaén.”

⁷ Atin bang i de ménlimud, “Dob kitab geye fatut féléhuén non béréhé no Beene kun i Nga i Tuluse.”

⁸ Amun énggéléingoo Pilatowey de ni, ménuman i kégilak ne. ⁹ Mélaw ménsefule man mahur dob lawie brab fénénginsaa noy Jesuse mano, “Hon i tidéwo muwe de?” Endob énda séménumbul i Jesuse. ¹⁰ Mélaw bang Pilatowe, “Sedek énda sémumbul go? Aw énda gétiga mo de ké wén i kuwagib gu témangéy Beem, loo so méméléhu Beem dob kruse?”

¹¹ Atin séménumbul i Jesuse mano, “Gagané mo rigonén i nan dob Begéne sabaf saén nirayay Tuluse beem kuwagib. Been i funa nuwe i étewe ménuwit Begén dini toow na fo dakél i sala ne.”

¹² Amun énggéléingoo Pilatowey ni, ménuyot damén témangéy bé Jesuse. Endob ménékes i de Judio maro, “Amuk fétangéyém i nan étew, sébanil go wayo bé gérotore datu Sesar dob Roma. Non i ségétewe étew émbérén been kun i datue, beeney sébanile bé Sesare.”

¹³ Amun énggéléingoo Pilatowey kóbérén ruwe, fénsutén man i Jesuse. Tidéw béno, ménstar dob saray de kémukum dob gonone féndawé Gabata dob késbérénhe Hebreo (i atag ne i suduve batéw.) ¹⁴ Gédétén géutuh bé no térsang atin i gétunduge fuweh, kémanduli i de Judio féndawé ‘Témara’. Tidéw béno, ménbérén i Pilatowe dob de Judio mano, “Ay ni datu gome.”

¹⁵ Atin ménékes man i de étew maro, “Féléhuén, kélabonén dob kruse!”

Atin ménénginsa i Pilatowe mano, “Aw méuyot gom de ké kélaboné kuy datu gome dob kruse?”

Tidéw béno, séménumbul i de odoroy de fadi maro, “Enda i ségiyo datu gey saliyu bé Sesare dob Roma.”

¹⁶ Tidéw béno, naté Pilatowe dob berowey Jesuse inok kélaboné ro dob kruse. Atin nangéy roy Jesuse.

Kénlaboy Jesuse dob kruse

¹⁷ Mélaw nuwit roy Jesuse mésut dob no ingéd brab ménangéy ro dob

gonone féndawét Golgota dob gonone féndawét Golgota dob késébérén i Hebreowe (i atag ne “gonoy klobong uléwe”). Atin bé kéagéw ruwe fénduwal ro bé Jesusey krus ne. ¹⁸ Amun énggégumah ron diyo, i de sundalo, kénlabo roy Jesuse dob kruse. Atin kénlabo ro soy de ruwo gétew lagéy dob de krus. I ségétewé de fingé dob kuwono Jesuse, brab i ségétewé de fingé dob biwong Jesuse. Atin diyo i Jesuse ténunggul dob kérara ruwe. ¹⁹ Atin wén i sénulat Pilatowe, féndiyo ro dob krus Jesuse mano, “I Jesuse tidéw Nasaret, datu i de Judio.” ²⁰ Médooy de Judio énggébasa bé no non i ni gonon kénlaboy Jesuse dob kruse énda mérayuén dob Jerusalem. Atin sénulatén dob télewé timan késébérén, Hebreo, Latin, brab Griego. ²¹ Endob i de odoroy de fadi i de Judio ménbérén ro dob Pilatowe maro, “Kago sultén de ‘Datu i de Judio’. Yamula sultém loo bé ni, ‘I ni étew ménbérén mano, Begén i datu i de Judio.’”

²² Endob séménumbul i Pilatowe mano, “I sénulat guwe, énda fakayén fegalinén.”

²³ I de sundalo, amun énggilid ron kénlaboy Jesuse dob kruse, éndot roy de kégalén, sénbaad ro fot gétew. Atin éndot ro soy lambung ne. Atin non nawél énda i kumbanga no, ²⁴ i de sundalo ménbérén ro maro, “Katom riyasén de. Yamula sékung-kungo tom, atin i tétabane gékaan.” Ménrigoy ni inok métuman i Ménsluate Kébérén i Tuluse mano, “Sénbaad roy de kégal gu brab sénkung-kungo roy lambung guwe.” Atin been i nan i rénigoy de sundalo.

²⁵ Gédét dob krus Jesuse, diyo téménindég i idéng ne, brab tuwaréy idéng ne libun, brab bawag Kleopase féndawét Maria, brab ségétewé so Maria tidéw Magdala. ²⁶ Amun énggito Jesusey idéng ne brab ségétewé na kuyugén toow fo kégédawa no, ménbérén dob idéng ne mano, “Iday, béleewe ni beeney nga me.”

²⁷ Atin ménbérén so dob kuyug ne mano, “Béleewe ni beeney idéng me.” Mélaw méntidéw bé no, i kuyug Jesuse ni nuvitén i idéng Jesuse mule brab fénbatién dob lawi ne.

Ménléhu i Jesuse

²⁸ Tidéw béno, amun énggétiga Jesuse ménggilidén i kéluhanane, ménbérén mano, “Téruménu,” inok métuman i Ménsluate Kébérén i Tuluse fantag bé Jesuse.

²⁹ Wén i katiyae diyo ménfeno bé mélémuwe arak. Mélaw nérém roy maake gafas atin ténunggul ro dob métaahé kayéw brab féndiyo ro dob ba Jesuse. ³⁰ Atin amun énggéséfo no, ménbérén mano, “Enggilidén.” Tidéw béno, méntédungul atin ménléhuén.

³¹ Tidéw béno, i de odoroy de Judio nongot ro dob Pilatowe ké fétéfoén i sékéy i de étew dob de krus inok magad méléhu. Non i de Judio méuyot ro ké mékédan i lowoh i de étew dob de krus bé no so gai, non bé gétunduge de térsang Sabado sani gaiwe témérén ro. Brab been i térsange bé kékanduli ruwe. Mélaw toow fo mékétefu. ³² Mélaw i de sundalo ténéfo roy sékéy i de ruwo gétew lagéy dumo Jesuse énggéséréngan kénlabo dob de krus. ³³ Endob amun ménfégédét ro dob Jesuse, énggito ro ménléhuén. Mélaw éndaén ténéfo roy de sékéyén. ³⁴ Endob i ségétewé bé de sundalo dénilékén i tébing Jesuse atin réménanas i darae brab wayég. ³⁵ Begéney étewé énggégito bé ni ménrigo. Gétiga ku toow, brab ureté ku toow fo toow inok munur gom de. ³⁶ Ménrigoy de ni inok métuman i Ménsluate Kébérén i Tuluse mano, “Fiyon sébaan bé de bukalén, énda i météfo de.” ³⁷ Brab wén soy Ménsluate Kébérén i Tuluse mano, “Téngténgéy de étew i dénilék ruwe.”

I kélébénge bé Jesuse

³⁸ Tidéw béno, wén i ségétewé lagéy féndawét Jose tidéw Arimatea, ménangéy dob Pilatowe brab non-gotén i bangkay Jesuse. I Josehe ni ségétew so kuyug Jesuse éndob énda

ménfayagén non mágilak bé de odoroy de Judio. Tidéw béno, ténungkas Pilatowey bangkay Jesuse, mélaw nangéy Josehe.³⁹ Atin i Nikodemowe sani lagéye témenukaw bé Jesuse bé kélungonone, ménodor bé Josehe brab ménouwit fot folo gékilo fégféamut. (I ni fégféamut mira ménsélawék bé aloewe.)⁴⁰ Atin i de ni lagéy bénauis roy bangkay Jesuse bé futee safut atin sénlawék roy fégféamute ni. Non been i niy adat i de Judio ké lémbéng ro.

⁴¹ Gédét dob gono Jesuse ménléhu, wén i do nohok kayéw diyo. Atin dob ni gonon wén i mantuwe rénigo lébéng takub énda séna ménlébéng no.⁴² Non bé gétunduge de téresang Sabado sani gaiwe témerén ro, fénagayas ro lénébéng i Jesuse dob lébéng ni, non gédét.

20

Méntébule i Jesuse

¹ Amun toow fo géfuwén bé Duminggue de, kémélungon séna, ménagéw i libune féndawét Maria Magdalena mangéy dob lébéng. Atin énggito no ménkédan i batéwe dob bengaway lébéng. ² Mélaw léménantu mangéy dob Pedrowe brab ségétéwe ni bé de kuyug Jesus toow fo kégédawa no. Brab bénréhén mano, “Kénda roy bangkay i Kadnane dob lébéng brab énda gétiga key i fénggono ruwe de.”

³ Tidéw béno, i Pedrowe beroy ségétéwe ni kuyug Jesuse, ménagéw ro mangéy dob lébéng. ⁴ Léménantu ro atin énggétah énggumah dob lébéngey dumo Pedrowe kuyugén non toow na fo méraan. ⁵ Atin ménkudung-kudung sémarir, éndob énda ménahurén. Enggito no saén i de safut. ⁶ Tidéw béno, énggumah i Pedrowe, atin ménahur i beene dob lébéng brab énggito noy de safut ménumbuk. ⁷ Enggito no soy safute fénggébaus bé uléw Jesus. Enda ménlawékén dob de dumo safut, éndob méndilin dob ségiyowegonon. ⁸ Tidéw béno, ménahur soy ségétéwe ni kuyug dumo Pedrowe,

sani énggétahé énggumah dob lébéng. Atin amun énggito no, ménunur.⁹ Bé ni gai énda séna gésobuto roy Ménsulate Kébéréh i Tuluse fantag bé Jesuse tébule. ¹⁰ Tidéw béno, ménule i de ruwo ni gétew kuyug.

¹¹ Endob i Mariahe kémérew dob liuyu lébéng. Bé lala ne kémérew, ménkudung-kudung sémarir dob bukag i lébéng. ¹² Atin énggito noy ruwowe gétew téaki kéménégal fute, ménar ro dob féniroone bé bangkay Jesuse. I ségétéwe de ménar fingé dob uléw ne atin i ségétéwe de fingé dob sékéy ne.¹³ Atin ménbéréh ro maro, “Di, ati funa muwe kémérew?”

Atin séménubul mano, “Nuwit roy Kadna kuwe atin énda gétiga kuy fénggono ruwe de.”

¹⁴ Tidéw béno, séménling brab énggito noy Jesuse témenindégi diyo, éndob énda énggélolo no de ké Beeney Jesuse. ¹⁵ Atin bang Jesuse, “Di, ati funa muwe kémérew? Ati séléde muwe?”

Dob fédew Mariahe manok beeney magifate bé de nohok diyo. Mélaw ménbéréh mano, “Amuk Beemey ménuwite bé bangkay i Kadna kuwe, bérhéhém begén i fénggono muwe de inok angéyéku.”

¹⁶ Tidéw béno, bang Jesuse, “Maria.”

Atin méntébule ténéngténgén i Jesuse brab ménbéréh dob késébéréh i de Judio mano, “Raboni!” (I atag ne Maistéro.)

¹⁷ Amun énggélolo Mariahe Beeney Jesuse, ménbéréh i Jesuse mano, “Kago gamakén Begén, non énda séna énggéuleu mangéy dob Abay guwe Tulus. Endob ay go dob de tuwaréy gu brab bérhéhém bero, mangéy dob Abay guwe sani Tulus guwe. Been soy Abay gome brab Tulus gom.”

¹⁸ Mélaw ménagéw i Maria Magdalenahe nangéyén bénréh dob de kuyug bé énggito noy Kadnane brab ati de bénréhén de.

¹⁹ Amun kélungononén bé no Duminggu, i de kuyug Jesus ménslimud ro dob lawie atin kénandado roy de

fintu non mégilak ro bé odoroy de Judio. Atin tékow énggito roy Jesuse téménindég dob kérara ruwe. Atin ménbéréh mano, "Fiyoy de fédew gom damén." ²⁰ Tidéw béno, fénténgtengén beroy de fali dob de kémérén brab tébing ne. Atin i de kuyugén toow ro fo ménoror non énggito ro. ²¹ Tidéw béno, ménbéréh man i Jesuse mano, "Fiyoy de fédew gom damén. Sugué ku begom loo bé késugu i Abay guwe Begén." ²² Tidéw béno, niyufén bero brab ménbéréh mano, "Tanggaf gom i Rémogor i Tuluse. ²³ Amuk fésagada kom i ségetéwe bé de salaén, émfésagadan. Buluk énda fésagada kom de, énda émfésagadan no."

Engito Tomase

²⁴ I ségetéwe bé de folo bra ruwo kuyug Jesuse féndawét Tomas (féndawét so "Séfing") énda diyoén bé no gai méntefégitoy Jesuse. ²⁵ Mélaw i de dumo no kuyug nuret ro dob beene maro, "Engito gey i Kadnane".

Endob ménbéréh i Tomase mano, "Enda fo munuru de taman énda gito guy fali i de kélébo dob de kémérén brab taman énda géahuro kuy de dau kémér gu dob de fali dob de kémérén brab dob tébing ne."

²⁶ Ménifus i ségefadiyane tidéw béno, ménslimud man i de kuyug Jesus brab diyo soy Tomase. Fyon fo ké i de fintu ménkandado, tékow méntefégitoy Jesuse téménindég dob kérara ruwe. Atin i Jesuse ménbéréh mano, "Fiyoy de fédew gom damén." ²⁷ Tidéw béno, ménbéréh i Jesuse dob Tomase mano, "Téngtengém i de ni. Fédiyoém i de dau kémérém dob de kémér gu, brab féahurém i kémér me dob tébing guwe ni. Kagonén magalang-galang. Unur go Begén."

²⁸ Tidéw béno, ménbéréh i Tomase mano, "Beemey Kadna kuwe brab Tulus gu."

²⁹ Atin bang Jesuse, "Aw munur go Begén non énggito mo Begén? Toow fo méroror i de munur Begén fyon fo ké énda séna énggito ro Begén."

³⁰ Médoo na do mémégaif rénigo Jesuse énggitoy de kuyugén éndob énda ménslatén dob ni libro. ³¹ Ménslat i de ni inok munur gom bé Jesusey Kristowe, sani Nga i Tuluse. Atin sabaf bé kéunur gome bé Jesuse gédoté kom i umule magufusa.

21

¹ Tidéw béno, méntefégitoy man i Jesuse dob de kuyugén dob dogote féndawét Tiberias. Loo bé niy énggéagéwo nuwe. ² Diyo i Simon Pedrowe bero ro Tomas (féndawét so Séfing) brab Natanael tidéw Kana dob sakuf i Galileawe, brab ruwowe gétew nga Sebedeo féndawét Juan brab Santiago, brab ruwowe gétew kuyug Jesuse dumo ro. ³ Atin i Pedrowe ménbéréh dob berowe mano, "Mangéyu tugés."

Atin séménumbul ro maro, "Modor gey beem." Mélaw ménagéw ro ménangéy ro méda dob awange. Endob énda i sébaan énggédot ro sédo bé no ménsegékélungonon. ⁴ Amun sémbang i térsange, diyo i Jesuse téménindég dob dénsaane. Endob i de kuyugén énda gétiga ro de ké Beeney Jesuse. ⁵ Tidéw béno, ménbéréh i Jesuse mano, "Do adih, wén i énggédot gom sédo loo ké énda?"

Séménumbul ro maro, "Enda."

⁶ Atin ménbéréh man i Jesuse mano, "Lawu gom i fukét gome fingé dob kuwonoy awange atin gégedot gom de sédo." Mélaw lénawu roy fukét ruwe loo bé kékérén Jesuse de. Tidéw béno, énggédot ro toow fo médo sédo. Atin énda génaga roy mégénge bé fukéte dob awange non toow fo émbégat i de médo sédo.

⁷ Atin i ségetéwe ni bé de kuyug toow fo méngédaw i Jesuse de, ménbéréh dob Pedrowe mano, "Beeney Kadnane!" Amun énggelingoo Pedrowe, "Beeney Kadnane", kéménagal (non kénda noy kégal ne) brab ménagayas ménantéfor dob wayége atin léménangoy mangéy dob dénsaane. ⁸ I de dumo do kuyugén ménfuray ro dob dénsaane

ménda awang, génuyud roy fukéte ménféno sédo. Enda mérayuén tidéw dob dénsaane, wén keey i siyow folo gémitroy kéravy ne. ⁹ Amun déménunggu ron, énggito roy mégébarawe aféy wén i féntanang de sédo. Wén soy fan de. ¹⁰ Atin bang Jesuse, “Uwit gom diniy dumoy de sédo énggédot gom.”

¹¹ Mélaw i Pedrowe ménénik dob awange inok gédoté noy fukéte. Tidéw béno, génuyudén mangéy dob dénsaaney fukéte ménféno do dakél sédo. Fiyon fo ké ménféno bé dakéle sédo, mératuh bra limo folo bra téléw, énda ménkusi i fukét ruwe. ¹² Atin bang Jesuse bero, “Enggomén, mama tom.” Enda i ségétew bé de kuyugén émbaraw ménénenginsa ké ati Beene ni, non énggétiga ron Beeney Jesuse Kadnan. ¹³ Mélaw i Jesuse ménfégédét dob fane brab méndot de brab bénAADÉN dob berowe, loo soy de sédo.

¹⁴ Been i niy gétéléwe gule méntéfíttoy Jesuse dob de kuyugén tidéw bé kétébule ne.

I Jesuse brab Pedrowe

¹⁵ Amun énggilid ron mama, ménénenginsa i Jesuse dob Simon Pedrowe mano, “Simon, nga Jonas, aw toow na fo méimu go Begén bé kéimu i kéluhanay de ni Begén?”

Séménumbul i Pedrowe mano, “Hoo Kadnan, gétila moy kéimu guwe Beem.”

Atin bang Jesuse, “Fagifatém i de bili-bili gu.” ¹⁶ Tidéw béno, ménénenginsa man i Jesuse mano, “Simon, nga Jonas, aw toow fo méimu go Begén?”

Séménumbul man i Pedrowe mano, “Hoo Kadnan, gétila moy kéimu guwe Beem.”

Atin bang Jesuse, “Fagifatém i de bili-bili gu.” ¹⁷ Atin ménénenginsa i Jesuse bé gétéléw ne gule mano, “Simon, nga Jonas, aw méimu go Begén?” Mémentete i fédéw Pedrowe non fénénenginsaa Jesuse gétéléw gule mano, “Aw méimu go Begén?”

Mélaw séménumbul i Pedrowe mano, “Kadnan, gétila moy kéluhanane, gétila moy kéimu guwe Beem.”

Atin bang Jesuse, “Fagifatém i de bili-bili gu.” ¹⁸ Béréhé ku beem i toowe, amun ménenguwéd go séna, géikéto moy sintoro muwe, atin mangéy go dob kétaya muwe ayo mo. Endob buluk lukés gon, ségerun go kémawa, atin ségiyoy marake beem atin uwité no beem mangéy dob kéika muwe ayo mo.” ¹⁹ (Bénréh Jesusey ni dob Pedrowe nureténi atiy fégéléhu ne funay Tuluse émbantug.) Tidéw béno, bang Jesuse bé Pedrowe, “Furay go Begén.”

²⁰ Atin séménling i Pedrowe, atin énggito noy toowe ni fo kégédawa Jesuse kuyugén, sani kuyuge ménfégédét dob Jesuse bé kéama ruwe dob kékandulie brab ménénenginsa mano, “Kadnan, ati émfékéfoe Beem?” ²¹ I Pedrowe, amun énggito noy ni ségétew kuyug, ménénenginsa dob Jesuse mano, “Ati mosoy géagéwoy ni étew?”

²² Séménumbul i Jesuse mano, “Amuk méuyotu de ké méuyag taman bé késéfule guwe dob duniyae ni, ati mélaw i kaame de? Furay go Begén.”

²³ Sabaf mélaw bé ni, ménlegéb dob de kuyug Jesuse i urete bé i ni kuyug énda kun méléhuén. Endob békén bénréh Jesuse ké énda méléhuén. I bénréh Jesuse saén mano, “Amuk méuyotu de ké méuyag taman bé késéfule guwe, ati mélaw i kaame de?”

²⁴ Begénye nan kuyug Jesuse bénrého no! Enggito guy kéluhanay de ni ménrigo brab sénulat gu dob ni. Atin gétila key i kéluhanay de ni ménulat toow fo toow.

²⁵ Médoo nay de étingayén rénigo Jesuse tidéw bé de ni. Endob amuk sulatén kéluhanan, kloh sa keeyén i duniyae fégonon bé kéluhanay librowe ménulat.

I de Rénigoy de Apostol

Inisulat, been i niy fétalousoy Fiyowe Uret sénulat Lukase. I Lukase, been i ségétéwe doktor. Atin sénulatén i ni dob ségétéwe gérotor étew féndawéti Teofilo.

Been i niy sulate fantag bé de rénigoy de kuyug Jesus amun déméniatén i Jesuse. Féndawéti Jesuse bero “do apostol” non sénuguén bero inok muret ro. (I atag i “apostole” sénugu.) Sénulat Lukasey fantage bé de rénigoy de apostol brab de kékérén ro. I galbék i de apostol, been i kéurete bé Fiyowe Uret fantag bé Jesuse inok géunur i de étew dob Beene.

I RémoGOR i Tuluse, Been i téménabangane bé de apostol inok gérigono roy de mékégaif brab inok émbaraw ro muret fantag bé Jesuse.

¹ Teofilo,

Dob sunguwe libro gu, sénulat gu dob beemey fantage bé kéluhanay de rénigo Jesus brab de téneroén tidew dob gaiwe féngganayén i kégalbék ne, ² taman dob gaiwe féndiyat i Tulusey Jesuse mangéy dob lawayo. Amun énda séna déméniatén de, fénemanduo no bé barakat i RémoGOR i Tulusey de fénémilién do kuyugén féndawéti do Apostol (i atag i ni do sénugu).

³ Méntefégitoy Jesuse dob berowe médoogule tidew bé kéléhu ne taman fot folo gétérésangan inok toow fo gétiga ro méntébule. Dob de ni do gai méntefégi do berowe, téneroén i fantage bé kéguléw i Tuluse. ⁴ Atin amun ménsélimud i Jesuse beroy de kuyugén bénréhén bero mano, “Kagom séna tékédan dob Jerusalem. Endob ongot-ongot gom i fénasad i Abay guwe begom, sani bénréh guwe nén begom. ⁵ I Juane ménautis bé wayége éndob éndaén mérugayén bautison gom bé RémoGOR i Tuluse.”

⁶ Wén i no ségiyo gai ménsélimud i Jesuse beroy de apostol. Atin fénénginsaa ro maro, “Kadnan, aw béléewe ni bay gaiwe féséfuleé moy

kuwagibe émfétindég bé ingéd tome Israel?”

⁷ Séménumbul i Jesuse mano, “Békénén fatut gétiga kom i de gai non i Abay guwe saén i wéne aturano bé de gai. ⁸ Endob amuk gégumah i RémoGOR i Tuluse dob begome, waléy gom barakatan. Atin mélaw begomey murete fantag bé Begéne dob de étew dob Jerusalem, brab dob kéluhanay de ingéd dob Judea brab Samaria, brab dob kéluhanay de ingéd dob duniyae ni.”

Ikédiyat Jesuse

⁹ Amun énggilid Jesuse bénréh i ni, féndiyat i Tulusey Jesuse mangéy dob lawayo atin téngténg ro taman méntéléb bé de rawén. ¹⁰ Amun déméniatén i Jesuse, i lala ruwe séna léméngag dob lawayo, tékow méntefégitoy ruwowe gétew lagéy kéménégal ro fute téménindég diyo dob sékulo ruwe. ¹¹ Brab ménbérén ro maro, “Do étew tidew Galilea, sedek léméngag gom saréw dob lawayo? I Tuluse féndiyatén i Jesuse mangéy dob lawayo, atin séfule so moso loo bé kégito gome de déméniat.”

¹² Tidew bénro, i de apostol ménséfule ro mangéy Jerusalem tidew dob tuduke féndawéti Olibo, ségékilometroy kérayu ne. ¹³ Amun énggégumah ron dob ayo ruwe ni ingéd, méntaus ro dob sibéye dob rotor i lawie gono ro bati. I de ni ro Pedro, Juan, Santiago, Andres, Filipi, Tomas, Bartolome, Mateo, Santiago nga Alfeo, Simon sani ségétéwe toow fo gulaané noy ingéd ne, brab Judas nga Santiago. ¹⁴ Sénga tékélid sélimud ro inok démasal ro beroy de libun brab Mariahe idéng Jesuse, loo soy de tuwaréy Jesus do lagéy.

¹⁵ Amun ménifus i firoye gétérésangan, ménsélimud i de munur bé Jesuse, wén i mératuh bra ruwo folo gétew. Atin téménindég dob téngaanga ruwey Pedrowe brab ménbérén mano, ¹⁶ “Do dumo gu, énda fakayén ké énda métuman i Ménsulate Kékérén i Tuluse, fénbérén i RémoGOR i Tuluse bé Datu

Dabidey fantage bé Judase, sani ménuwite bé de kéménéfo bé Jesuse.
17 I Judase, ségettew betom, brab fénemili ménamung bé galbék tome.”
 Been i bénréh Pedrowe.

18 Atin i kurtae énggédotén bé ni tete rénigo no bé Jesuse fénggébéléyén fantad, atin diyo ménlawu brab ménléhu non ménbétus i sur ne atin ménandég i de téneekén. **19** Atin énggelingooy kéluhanay de étew dob Jerusalem i ni ménrigo, mélaw féndawét roy ni fantad “Akeldama”, dob karowe késébéréh. (I atag ne “Démara fantad”.)

20 Féntaus Pedrowey kékéréh ne mano, “Sénulat dob de Kanta tidéw dob Ménulate Kékéréh i Tuluse mano, ‘I lawi ne taus i kétagake de damén atin énda i bati diyo fiyon ségettew.’ Brab ménusat so mano, ‘Wén damén i émfétaus bé galbék ne.’

21-22 “Mélaw,” bang Pedrowe, “fatut mémili tom ségettew mantu dumot tom muret fantag bé kétébule Jesuse. Fatut beeney étewe dumot tom ménśodor-odor bé kédiniy Kadna tome séna, tidéw bé kéuret Juane bé kékautis ne taman bé kédiyat Jesuse mangéy dob lawayo.”

23 Mélaw ménemili ro ruwo gétew lagéy, ro Matias bero Jose Barsabas (féndawét so Justo). **24** Tidéw bénó déménasal ro maro, “Kadnan, gétiga moy fédew i kéluhanay étewe. Mélaw fefégétiga mo begey ké ati isuwe fénemiliém bé de ruwo ni gétew, **25** inok waléy apostol brab mamung émfétaus bé galbéké téragak Judase amun ménuleén mangéy dob gonone fatut ayono.” **26** Tidéw bénó, sénbunuto ro atin ménfemili i Matiase. Mélaw i Matiase ménwaléy apostol beroy de folo bra sébaan, brab ménamung bero.

2

I kégumah i Rémogor i Tuluse

1 Amun énggumahén i gaiy kékanduli ruwe féndawét Pentekostes, i kéluhanay de méginugut bé Jesuse, ménślimud ro dob sébaane gonon.

2 Atin tékow wén i énggelingoo ro tidéw dob lawayo toow fo métanug

maak émbagér réfuruh. Atin ménlegéb dob lawie gono ro ménstar. **3** Tidéw bénó, énggito roy de maak dila rino aféy ménlegéb brab ménégatag dob bumbunay séngae ségettew bero. **4** Atin fénemanduoy Rémogor i Tuluse bero. Atin ménšbéréh-béréh ro do séségiyo-giyo do késébéréh non fénbéréh i Rémogor i Tuluse bero.

5 Dob Jerusalem, wén i do Ju-dio do ménintulus ménbati diyo. Tidéw ro dob de séségiyo-giyo ingéd dob duniyae. **6** Amun énggelingoo roy ni démugués, médooy de étew ménangéy diyo brab ménślimud ro. Brab ménkéségiyonan ro non amun ménšbéréh i de étew méginugut bé Jesuse, i séngae étew énggelingoo noy kaane késébéréh. **7** Non toow fo ménkéségiyonan ro, ménſfénginsa ro maro, “Aw ati ni? Aw békén ba kéluhanay de ni do étew tidéw ro Galilea? **8** Sedek gélingoo tom bero sébéréh bénó kéluhanay de késébéréh dob de ingéd ténidéwo tom? **9** Tidéw tom dob Partia, dob Media, dob Elam, dob Mesopotamia, dob Judea, dob Kapadosia, dob Ponto, dob Asia. **10** Dob Frigia, dob Pamfilia, dob Egipto, dob de ingéd sakuf i ingéde Libia gédét dob Siren, brab dob Roma, **11** do Judio brab do békén do Judio éndob ménwaléy do munur bé kétoro i de Judio. Tidéw tom dob Kreta, brab dob Arabia. Atin i séngae ségettew betom énggelingoo no bero sébéréh-béréh dob kaane késébéréh fantag bé toowe fo mékégaif rénigoy Tuluse.” **12** Atin toow fo ménngaij ro brab énda énggésobuto roy ni ménrigo. Mélaw ménſfénginsa ro maro, “Ati atag i ni ménrigo?”

13 Endob i de dumot do étew déniyangka roy de kuyug Jesus brab ménbéréh ro maro, “Molon i de ni do étew.”

I kékuret Pedrowe

14 Tidéw bénó, téménindég i Pedrowe beroy de folo bra sébaan do dumot no apostol brab ménbéréh métanug dob de ménślimud étew mano, “Do dumot gu do Judio brab

kéluhanay de étew bati dob Jerusalem, toow gom fégélingo i béréhé kuwe ni inok gésobuto kom. ¹⁵ I de ni do étew énda molon ro loo bé kéfégitung gome de, non géraraan lémowot sénay térésange ni. ¹⁶ Endob méntuman béléewe niy bénréh i méntelatae sénarigoy Tuluse muret bé kékéréd ne féndawét Joel mano, ¹⁷ ‘Ay niy rigoné kuwe dob de tamfaday de gai, bang i Tuluse. Iray gu témantuy Rémogor guwe dob kéluhanay étewe. Brab i de nga gom do lagéy brab libun, béréhé roy de kékéréd gu. Atin i de kénogo lagéy gom gito roy toowe tidew dob Tuluse, brab i de lukés gom so gito roy toowe tidew dob Tuluse amuk téméginéf ro. ¹⁸ Atin fiyon foy de sugu-sugué ku, do lagéy brab do libun, ureté roy kékéréd guwe non tantuno ku bero irayan bé Rémogor guwe. ¹⁹ Atin rémigowu do mékégaif dob lawayo brab dob fantade. Giton i darae, aféye, brab mégéfole bél. ²⁰ Atin i térésange waléy délémon, brab i térsang kélungonone waléy furo maak dara. Been i niy mérigowe ké énda séna gérumah i émbantuge gaiy Kadnane kémukum. ²¹ Atin i kéluhanay mongote tabang dob Kadnane, méfukas ro dob de sala ro.’”

²² Atin féntaus Pedrowey kékéréd ne mano, “Do dumo gu do Judio, fégélingo gom i ni! I Jesuse tidew Nasaret, Beeney fénuit i Tuluse. Atin i de mékégaif do galbék fénrigoy Tuluse de, been i fégétuwana kome bé i Jesuse, Beeney tidéwe dob Tuluse. Atin énggétuwa komén i ni non i kéluhanay de ni, ménrigo dob kérara gome. ²³ Enggétigay Tulusey ati mérigowe non bénantak i Tuluse fékéfoén i Jesuse brab nirayén begom atin fénléhu gom fénkélabo bé de tete étew dob kruse. ²⁴ Endob i Tuluse ténebuleén i Jesuse brab ténungkasén tidew dob kédawét i kéléhue non énda fo fakayén gétaus méléhu i Jesuse.

²⁵ “Loo bé bénréh Dabide bé do géyah fantag bé Jesuse mano, ‘Démoyun gito guy Kadnane dob

sékuo kuwe, Beeney dumo guwe dob kuwono kuwe, mélaw énda mélilaku. ²⁶ Sabaf bé ni, toow fo fiyoy fédew guwe brab béréhé kuy kéoror guwe. Enda émbukuu bé lowoh guwe non wén i inam gu. ²⁷ Non énda tagaké mo Begén dob gonoy de ménléhu. Brab énda fédayaé moy lowoh i fiyowe sugu-sugué mo ké mérénah. ²⁸ Ténoroém begén i agéwone dob kéuyage. Atin sabaf bé Beem i dumo guwe, féororénu.’”

²⁹ Féntaus Pedrowey kékéréd ne mano, “Do dumo gu, toow fo béréhé ku begom i fantage bé katufua tome Dabid. I beene ménléhu brab lénébeng, atin taman béléewe ni ay ni soy lébeng ne. ³⁰ Beeney ségétewe sénarigoy Tuluse muret bé kékéréd ne. Atin énggétiga noy fénasad i Tuluse dob beene bé i ségétewe bé de séfuen waléy datu loo bé beene. ³¹ Enggétiga Dabide ké ati rigonéy Tuluse, komon énggérédho noy fantage bé kétébule Kristowe mano, ‘Enda méntagakén dob gonoy de ménléhu brab énda mérénah i lowoh ne.’ ³² I Jesuse ni féntebule i Tuluse, brab kéluhana key énggégito bé ni. ³³ Atin i Abay ne Tulus, féndiyatén i Jesuse mangéy dob kuwono nuwe, sani toowe fo basanan gonon. Atin i Jesuse, éndotén dob Beeney Rémogor i Tuluse loo bé fénasad ne. Mélaw i gito gome brab gélingoo kome bé béniy barakat i Rémogor i Tuluse nirayén begey. ³⁴ I bénréh Dabide, békén fantag bé lowoh ne non énda déméniat i Dabide mangéy dob lawayo, éndob been i ménbéréd mano, ‘Bénréh i Kadnane dob Kadna kuwe mano, sar go fingé dob kuwono kuwe, ³⁵ taman tabana kuy de sébanil Beem.’ ³⁶ Mélaw, i de kéluhana tom do Judio, fatut gétuwa tom i Jesuse ni, sani kénlabo gome dob kruse, féndawét i Tulusey Kristowe Kadnan.’ Been i niy bénréh Pedrowe.

³⁷ I de étew, amun énggelingoo roy ni, ménbuku i de fédew ro. Atin ménenginsa ro dob Pedrowe brab dob de dumo no apostol maro, “Do dumogey, ati fatute rigoné key?”

38 Atin séménumbul i Pedrowe mano, "I séngae ségétew begom fatut gésénule bé de salaén brab fébautis inok fégito noy kéunur ne bé Jesu Kristowe, inok i de salaén émfésagadan. Tidew béno, i Tuluse irayén i Rémogor ne dob begome. **39** Non i ni fasad i Tuluse, katom brab kay de nga tom, brab kay kéluhanay de étew dob de méravy, non kay kéluhanay fénemili i Kadna tome Tulus munur dob Beene."

40 Atin médo nay bénréh Pedrowe bero fantag bé toowe brab fénfagayu no bero mano, "Sésuway gom bé de tete étew inok énda mékukum gom so." **41** Atin médooy étewe ménunur bé kékéréh Pedrowe brab ménfóbautis ro, brab labi ro télew ngibu ménuman dob de kuyug Jesus bé béno. **42** Atin sénga tékélid fégélingoé roy kétoro i de apostol, atin ménseodor-odor ro maak do sétuwaréy ro. Brab séréngan ro mama brab démasal.

43 Atin i de apostol, fénrigoy Tuluse bero do médo mémégaif galbék, mélaw toow fo ménggaif i kéluhanay de étew. **44** Atin i kéluhanay de munur bé Jesuse, démoyun ro sélimud atin i kéluhanay de languntama ro séntukid-tukid ro. **45** Atin fénbéléy roy de fantad ro brab de tamuk ro inok sétukid-tukidé ro loo bé atiy de kailanga ro. **46** Sénga fuweh sélimud ro dob lawi i Tuluse, brab séréngan ro mama dob de lawi ro. Brab lala ruwe mama, toow ro fo moror brab térifantad. **47** Sénga tékélid dayewé roy Tuluse brab mégédaw i de étew bero. Atin sénga fuweh umanay Kadnane bero bé de mantu ménfukas étew.

3

I kéuwae béfikate

1 Wén i no sébaan fuweh, géraraan lémudug i térsange de, sani uras i kédasal i de Judio, i ro Pedrowe brab Juane ménangéy ro dob lawi i Tuluse. **2** Dob bénaway lawi i Tuluse fénadowé "Fiyó Fintu", wén i ségétewé lagéy fikat tidew fanay kéumahén. Sénga fuweh uwitéy de dumo no

mangéy dob ni bénawan inok mongot limus dob de étew mahur diyo. **3** Amun énggito noy ro Pedrowe brab Juane mahur, ménongot limus dob berowe. **4** Tidew béno, téneigténg ro Pedrowe brab Juaney ni lagéy fikat brab ménbéréh i Pedrowe mano, "Enténgén gey." **5** Mélaw téneigténgé bero, manok iraya ro kurta. **6** Endob i Pedrowe ni ménbéréh mano, "Enda i kurta gu taloo no bélowan, éndob iray gu beem i wéne dob begéne. Sabaf bé barakat i dawét Jesu Kristowe tidew Nasaret, béréhé ku beem, agéw go!" **7** Atin génamak Pedrowey kuwonone kémérén brab féntindégén. Sonom béno, tékow ménbagér i de sékéyén. **8** Atin méntésongkow témindég brab ménggéagéw. Atin ménahur dob lawi i Tuluse bero ro Pedrowe brab Juane, magéw brab sayaw-sayaw brab dayewé noy Tuluse. **9** Atin énggitoy kéluhanay de étew i ni lagéy magéw brab dayewé noy Tuluse. **10** Atin amun énggélolo ron beeney fikate démoyun mésar mongot limus dob "Fiyowe Fintu", toow ro fo ménggaif bé ni ménrigo dob beene.

11 Atin i lala ne génamak dob ro Pedrowe brab dob Juane dob kuridore fénadowé "Kuridor Solomone" ménfégédét léméntu mangéy dob berowey kéluhanay de étew non ménggaif ro bé ni ménrigo. **12** Amun énggito Pedrowey de étew ni, ménbéréh dob berowe mano, "Do dumo gu do Judio, sedek ménggaif gom bé ni? Sedek téngténgé kom begey loo bé nan? Aw makom ké ménggéagéw i ni lagéy sabaf bé barakat geye taloo no sabaf bé fiyowe kénéngintulus gey?" **13** Endob Been i Tuluse fénadafé Abrahame, Isak, brab Jakob, brab de katufua tom, i ménirayane toow fo gérator barakat dob Jesuse, sénuguén. Endob niray gom dob de génamak kukuman, brab ménika gom de dob adafa Pilatowe inok kukumé no, fiyon fo ké ménuyot de témancé. **14** I Jesuse ni métintu brab énda i salaén, éndob ménika gom

de brab énda féntangéy gom de. Yamula féntangéy gom uman i ségétéwe étew ménméléhu. ¹⁵ Atin fénléhu gom i Jesuse sani miraye bé umule magufusa. Endob ténebule i Tuluse brab énggito gey i ni. ¹⁶ Barakat i dawét Jesusey énggféadi-adiwe bé ni lagéy fikat gélolo gom. Ménrigoy ni sabaf bé kékunur geye bé Jesuse. Been i funa nuwe énggagéw dob téngaanga kome.

¹⁷ “Atin béleewe do dumo gu, gétiga ku énda énggétiga kom i rénigo gome brab de odoro tom bé kékéléhu gome bé Jesuse. ¹⁸ Endob bé ni rénigo gom, ténumay Tulusey bénréh i de sénarigo no muret bé kékéréd ne bé gétaho, bé i Kristowe fatut ferasayén. ¹⁹ Mélaw tagak gom i de tete adat gom brab unur gom bé Tuluse inok fésagada no begom bé de sala gom. ²⁰ Atin mélaw wén i do gai féfiyonéy Tulusey de fédéw gom. Atin féuwitén i Jesuse mangéy dob begome. Been i Kris-towe, sani fénemili ne méguléw begom. ²¹ Atin béleewe, i Jesuse batí séna dob lawayo taman bé kégumah i gaiwe féantunéy Tulusey kéluhanane. Been i niy bénréh i de sénarigo Tuluse muret bé kékéréd ne bé gétaho. ²² Non i Moisese ménbéréd bé gétaho dob de Judio mano, ‘I Tuluse sémugu moso ségétew sarigo no loo bé begéne. Been i ségétewé bé de séfu tom. Unuro kom i kéluhanay bérédé nuwe begom. ²³ Atin i kéluhanay étewe énda munur ro de, fégananéy Tuluse bero tidéw dob de étewén, brab binasané no bero.’ Been i niy kékéréd Moisese. ²⁴ Bénréh i de dumo so sénarigo Tulusey fantage bé de mérigo bé de ni do gai, tidéw dob Samuele brab dob kéluhanay de énggétundug dob beene. ²⁵ Atin i de fasad i Tuluse bénréh i de sénarigo no bé do gétah, kagom so. Atin kagom soy fasad i Tuluse dob de katufua kom. Non bénréhén dob Abraham mano, ‘Féfiyoné kuy kéluhanay étewe dob duniyae fénagéw dob de séfuém.’ ²⁶ Komon amun fén-uwit i Tulusey Kristowe, sénuguén sungu mangéy dob betome do Judio

inok féfiyoné no betom bé kékésénule ne betom bé de tete rigoné tom.” Been i niy kékéréd Pedrowe.

4

I Pedrowe brab Juane dob adafay de kékédewan

¹ Amun émbéréd sénay ro Pedrowe brab Juane dob de étew, énggégumah i de fadi, brab kafitay de mantay bé lawi i Tuluse, brab de Saduseo sani de étew énda munur ro bé kétébulee. ² Atin ménkéréd ro non téménoro i ro Pedrowe brab Juane dob de étew bé i Jesuse méntébule. Mélaw fénggito ro wén i kétébule. ³ Mélaw kénéfo ro bero, atin non sémingkufén bé berno, fénrisu ro bero taman bé démoe de. ⁴ Endob médooy ménunure bé de étew énggégélingo bé kékéréd Pedrowe, atin i de munur énggégumah limo ngibuy kédooy de lagéy de saliyu na bé de libun de.

⁵ Amun bé démoe de, ménslimud dob Jerusalem i de odoroy de Judio brab de lukés bero brab de témoro kukuman. ⁶ Bero soy gérötore fadi fénawet Anas, brab Kaifas, brab Juan, brab Alejandro brab kéluhanay samung i ni gérötore fadi. ⁷ Atin féntindég roy de ruwo ni gétew apostol dob adafa ruwe brab fénenginsaa ro bero maro, “Ati gefee bé barakate brab ati gefee bé dawéte féngérigo gom bé ni?”

⁸ Tidéw berno, fénemanduoy Rémogor i Tulusey Pedrowe atin mélaw séménumbul mano, “Do odoro key brab do lukés gey. ⁹ Amuk fénginsaa kom begey fantag bé fiyowe rénigo gey dob ni lagéy fikat brab ati kékéadi-adi geye de, ¹⁰ fégétiga ku dob kéluhana kome brab dob kéluhanay de Judio. I funay ni lagéy téménindég dob adafa kome ménadi-adi, non bé barakat i dawét Jesu Kristowe tidéw Nasaret. Been i fénléhu gome dob kruse éndob ténebule i Tuluse. ¹¹ Wén i ménslate fantag bé Jesuse dob Ménslate Kékéréd i Tuluse mano, ‘I batéwe nikaa kom do rémigo lawi, been i ménwaléye toow fo mélaga batéw.’ I Jesuse, Been i nan batéw

nikaa kom. ¹² Been saén i Mémukase,” bang Pedrowe, “non énda i ségiyo dob duniyae ni géfukas bé étewe.”

¹³ Toow fo ménggaif i de odoroy de Judio bé kébaraw ro Pedrowe brab Juane muret. Ménlabi na foy kégaif ruwe non énggétuwa roy énda i féngganad ro Pedrowe brab Juane. Atin mélaw énggélolo ro soy beroy de dumo Jesus. ¹⁴ Endob énda i góbérého ro, non énggito roy lagéye ni fikat ménadi-adi téménindég dob sékulo Pedrowe brab Juane. ¹⁵ Mélaw fénsut ro bero tidew dob sénlimudo ruwe sibéy. Tidew béno ménsebéréh-béréh ro maro, ¹⁶ “Ati kérigo tome bé de ni étew? Non kéluhanay de étew ni dob Jerusaleme ni, énggétiga roy mékégaife ni rénigo ro. Mélaw énda gédirungo tom de. ¹⁷ Endob géléé tom saén bero bé éndaén béréhé roy fantage bé Jesuse inok énda métarakén.”

¹⁸ Mélaw ténawag ro man bero mahur brab bénrého ro bero bé békénén béréhé roy fantage bé Jesuse taloo no témodo ro labité roy dawéte. ¹⁹ Endob i Pedrowe brab Juane séménumbul ro maro, “Fégitung gom ké ati isuwe métintu dob adafay Tuluse, odoro key i kagome sugu loo ké odoro key i sugu i Tuluse. ²⁰ Non énda fakayén témérén gey muret fantag bé énggito geye brab bé énggelingoo keye.” ²¹ Endob i de odoron toow na fo féningkél roy kégélé ruwe bero bé békénén ureté roy fantage bé Jesuse. Tidew béno, ténangéy ro bero. Enda gédusana ro bero non bé kédooy de étew démayéw bé Tuluse sabaf bé mékégaife rénigo ro. ²² Non i lagéye ni fén-adi-adi ro fotén folo góbélantuwa i idad ne, brab fikatén tidew fanay kéumahén.

²³ Amun méntangéyén i ro Pedrowe brab Juane, ménule ro mangéy dob de dumo ro munur bé Jesu Kristowe. Atin nuret roy kébéréh i odoroy de fadi brab de odoroy de Judio. ²⁴ Amun énggelingoo roy ni, ménseréngan ro démasal dob Tuluso

maro, “Kadnan, Beemey léménimbage bé lawaye brab fantade brab do-gote brab kéluhanay éntingayéne.

²⁵ Fénbéréh i Rémogor me bé katufua keye Dabid sugu-sugué mo mano, ‘Sedek ménkérít i de étew békén Judio? Brab sedek bantakéy de étew i éndae gérigono ro dob Tuluse?’ ²⁶ I de datu téménafay ro brab de méguléw dob duniyae ni ménselimud ro inok sébanil ro bé Kadnane brab Kristowe fénuwitén.’ Been i niy sénulat Dabide.”

²⁷ Atin fénauts roy kédasal ruwe maro, “Méntuman i Ménsluate Kébéréhém non ménselimud i ro Herode brab Ponsio Pilatowe dob ni ingéd beroy de étew békén Judio brab de dumo gey Judio. Ménselimud ro sébanil bé Jesuse sani fiyowe sugu-sugué mo fénemiliém méguléw. ²⁸ Ménselimud ro rémigo bé kéluhanay éntingayéne fatut mérigo dob kaame kétayan brab dob barakat me mérigo. ²⁹ Atin bé béri Kadnan, fégitungém i de tete kébérého ro begey brab tabanga mo begey do sugu-sugué mo inok émbaraw gey muret bé kébéréh me. ³⁰ Brab féuwitém i barakat me émféadi-adi brab émférigo begey bé de mékégaif dob dawéti fiyowe sugu-sugué mo Jesus.”

³¹ Amun énggilid ron démasal, ménkuyung i lawie sénlimudo ro brab fénemanduoy Rémogor i Tuluse bero. Tidew béno, ménbaraw ron muret bé kébéréh i Tuluse.

Séntukid-tukid roy de languntama ro

³² Atin i kéluhanay de munur bé Kristowe, ségiléw i de fédew ro brab itunga ro. Atin énda i isu bero gefe bé de languntama ro, éndob falan karo kéluhanan non séntukid-tukid ro. ³³ Atin wén i barakat i de apostol fénauts roy kéuret ruwe fantag bé kétébule i Kadnane Jesus. Brab i Tuluse toow fo mégédaw bero. ³⁴ Atin énda i ségetéw bero wén i kulang bé kífaguyag ne non fébéléy roy de fantad ro taloo no do lawi ro atin i kurtae gédoté ro, ³⁵ iray ro dob de apostol. Atin saaré roy kurtae dob katabuwane kailangay kéluhanane.

36 Atin wén i ségétéwe bero féndawét Jose. Beeney ségétéwe tidéw Siprus brab séfu i Lebitawe. Féndawét i de apostol so “Bernabe”. (I atag i ni “Ségétew émféfiyo fédew”.) **37** Fénbélényen i fantad ne atin nirayén dob de apostol i kurtae de.

5

Ananias brab Safira

1 Wén i ségétéwe lagéy féndawét Ananias, beroy bawag ne féndawét Safira, fénbélény roy dumoy fantad ruwe. **2** Endob nitongén i dumoy kurtae brab ménagayun soy bawag ne de. Atin nirayén i sama i kurtae dob de apostol. Endob bénréhén bé nirayén i kéluhanane. **3** Mélaw bénréh Pedrowe dob beene mano, “Ananias, sedek féndayaém i Satanase mémanduon beem? Non téménugi go dob Rémogor i Tuluse, non nitongém i dumoy kurtae énggédotém bé fénbélény me fantad. **4** Amun énda séna fénbélényém i fantad me, beem i gefee de. Atin amun fénbélény mon, kaam soy kurtae de. Endob sedek bénantakém rénigoy ni? Békén téménugi go dob étewe, yamula dob Tuluse téménugi go!” **5** Amun énggelingoo Ananiasey ni, méntuwar brab ménléhu. Atin i kéluhanay de énggégélingo fantag bé ni, toow ro fo ménggilak. **6** Atin ménahur i de kénogo lagéy brab éndot roy bangkay ne brab bénaus ro atin nangéy ro lénébeng.

7 Amun ménifus i télewe géuras, énggumah i bawag ne, éndob énda séna énggétiga noy ati ménrigowe. **8** Tidéw bénó, fénénginsaa Pedrowe mano, “Bérhéhém begén, aw been say niy kurtae énggédot i fantad gome?”

Atin séménumbul mano, “Hoo, been say nan.”

9 Mélaw bénréh Pedrowe de mano, “Sedek ténéngkad gom i Rémogor i Tuluse? I bawag me mantu séna ménléhu atin i de ménangéy de lémbéng, ay nan ron dob liyuwan, brab i beeme témundug so.” **10** Sonom bénó, méntuwar so brab ménléhu dob adafa Pedrowe. Amun ménahur i de

kénogo lagéy, énggito ro ménléhuén. Mélaw nangéy ro so lénébeng dob doror i bawag ne. **11** Atin toow fo ménkégilakan i kéluhanay de munur bé Kristowe, loo soy de kéluhanay de ségiyo étew énggégélingo bé ni.

Médooy de mékégaif

12 Atin i de apostol, médooy de mékégaif rénigo ro énggitoy de étew. Brab i kéluhanay de munur bé Kristowe ménslimud ro diyo dob “Kuridor Solomone” dob lawi i Tuluse. **13** Enda i ségétew ménamung bé de énda munur bé Kristowe, fiyon fo ké fiyoy kékérén i de étew fantag bé de munur. **14** Endob minut médooy de étew do lagéy brab do libun munur bé Kadnane. **15** Atin ménbantug i de mékégaif rénigoy de apostol. Mélaw nuwit i de étew dob de aguwon i de démeruun. Féniro ro bero dob de katri brab dob de bénékah ikam inok buluk témara i Pedrowe, gébela i anlung ne dob berowe. **16** Atin énggumah soy médooye étew tidéw dob de kloh ingéd géliwét dob Jerusalem. Brab nuwit roy de démeruun bero brab de étew rénahukoy de saitan. Atin kéluhana ro ménadi-adi.

I kérasay i de apostol

17 Tidéw bénó, i gérotore fadi brab de dumo no sani de Saduseo, ménaléw ro bé de apostol. Mélaw ménfagayun ro bé rigoné ruwe. **18** Atin kénéfo roy de apostol brab fénrisu ro bero. **19** Endob bé bénó kélungonon, nungka i télikiy Kadnaney de bengaway féri sunone. Tidéw bénó nuwitén bero mésut brab bénréhén mano, **20** “Taus gom dob lawi i Tuluse brab uret gom dob de étew i fantage bé ni mantu umul.” **21** Tidéw bénó, nodoroy de apostol i bénréh i télikiy ni. Mélaw amun géfuwénén, ménahur ro dob lawi i Tuluse brab téménoro ro.

Atin i gérotore fadi brab de dumo no, ténavag roy de odoroy de Judio inok sélimud i de kékédéway de Judio. Tidéw bénó, séménugu ro mangéy dob féri sunone inok uwité roy de apostol mangéy dob adafa ruwe. **22** Endob

amun énggumah i de sénugu dob férисуноне, énda énggito roy de apostol. Mélaw ménséfule ro mangéy dob de kéfédewan do ménlimud brab nuret ro maro,²³ “Amun énggégumah gey dob férисуноне, énggito gey i de béngawan do ménkandado brab diyo soy de guwardiya mantay dob liyuwe. Endob amun nungka gey, énda i énggito gey étew dob rahure.”²⁴ Mélaw i de odoroy de fadi brab kafitane odoroy de guwardiya bé lawi i Tuluse, amun énggelingoo roy ni, toow ro fo ménggaif. Atin fégitungé roy ati énggérigonoy de apostol.²⁵ Tidéw bén, wén i énggégumahe ménlolok dob berowe mano, “I de lagéy do fénrisu gom, diyo ro témo ro bé de étew dob lawi i Tuluse.”²⁶ Mélaw ménangéy i kafitane dob lawi i Tuluse beroy de guwardiya no. Atin kénéfo roy de apostol brab nuwit ro séfule. Endob énda féndawéto ro bero non mágilak ro bé de étew diyo ké ibéro ro bero batéw inok féléhué ro bero.

²⁷ Nuwit roy de apostol mangéy dob adafay de ménlimud do odoron. Atin i gérotore fadi ménbéréh dob bero mano,²⁸ “Génlé geyén begom bé kagomén témo fantag bé Jesuse, éndob énda nodoro kom de. Téngténg gom, ménlégébén dob Jerusaleme niy kétoro gome, atin bénréh gom, begey i ménméléhue bé Jesuse.”

²⁹ Endob séménumbul i Pedrowe brab de dumo no do apostol maro, “Fatut odoro key i Tuluse, békén étew.³⁰ Amun énggilid gomén fénléhu i Jesuse bé kékélabo gome de dob kruse, i Tulus i de katufua tom i ménfétébulee de.³¹ Atin féndiyat i Tuluse mangéy dob kuwono nuwe inok Been i Méguléwe brab Mémukase. Mélaw Been i émfésagade bé de sala tom do Judio amuk gésénule tom.³² Géureto key i de ni non énggito gey, loo soy Rémogor i Tuluse muret, sani Rémogore iray i Tuluse dob de étew munur dob Beene.”

³³ Atin i de odoron ni ménlimud, amun énggelingoo roy ni, toow ro fo ménkérít brab ménuyot ro ké

féléhuén i de apostol ni.³⁴ Endob i ségétewe bé de Fariseo féndawé Gamaliel téménindég dob kérara ruwe ménlimud. Beeney témoroe bé kitabe brab toow fo fégadatay de étew. Atin fénfésutén i de apostol.³⁵ Tidéw bén ménbéréh mano, “Do dumo gu do Judio, ingata kom ké ati kérigo gome bé de ni do étew.”³⁶ Bé do gétah wén i ségétewe étew féndawé Teudas, ménbéréh been kun i toowe ménbantug gérotor étew. Atin fot ratuh gétew i ménwaléye kuyugén. Endob wén i ménméléhu de atin i de kuyugén ménbéragar ro brab énda i énggérigono ro.³⁷ Tidéw bén, dob de gaiy késinsuse bé émfélistay kéluhanay de étew, énggumah man i ségétewe étew féndawé Judas tidéw Galilea. Atin médo soy ménwaléye kuyugén. Endob amun fénléhu soy Judase, ménbéragar soy de kuyugén.³⁸ Ségiléw so keeyén bé kéléhu Jesuse. Mélaw bérhé ku begom, katom kémukum brab fédayaé tomén i de ni do étew. Non amuk aturay kélawane saén, énda soy gérigono ro brab énda i rugaya ro.³⁹ Endob amuk aturay Tuluse, énda gégléo tom bero, non waléy tom saén sébanil bé Tuluse.”

Atin i de ménlimud do kéfédewan, ménagayun ro bé bénréh Gamaliele ni.⁴⁰ Tidéw bén, fénahur ron man i de apostol brab féntafés ro bero. Atin génlé ron man bero bé békénén muret ro fantag bé Jesuse. Tidéw bén, téngéy ro bero.⁴¹ I de apostol amun ménuts ron tidéw dob de ménlimud do odoron, toow ro fo ménoror non kénarang i Tuluse médait ro kéfasangan brab kémalanen sabaf bé kéunur ruwe bé Jesu Kristowe.⁴² Atin sénga fuweh ménangéy ro dob lawi i Tuluse brab dob de lawi i de étew. Atin diyo ro témo ro bé Fiyowe Uret fantag bé Jesu Kristowe.

6

I de fitéw gétew do témbang

¹ Bé do no do gai, amun minutén médooy de munur bé Kristowe, wén i de tete kégébaa no bé de munur

do Judio do sébéréh Griego dob de munur do Judio do sébéréh Hebreo. Ménbéréh i de Judio do sébéréh Griego bé émfédaya kun i de baléw bero, énda méirayan ro bé de kailanga ro sénga fuweh. ² Mélaw i de folo bra ruwo gétew do apostol ténimu roy kéluhanay de munur bé Kristowe brab bénréh ro dob berowe maro, "Enda fiyo no ké begey i sémaare bé de kailanga kom sénga fuweh, non fatut gey démoyun muret bé kékéréh i Tuluse, brab énda fatut diguré key i galbék geye. ³ Mélaw do dumo gey, fémili gom fitéw gétew lagéy, do métillédtéd brab fémanduoy Rémogor i Tuluse. Atin iray gey beroy aturane bé de ni, ⁴ inok i begeye do apostol fakay gey démasal brab muret fantag bé Tuluse sénga téklid."

⁵ Atin ménagayun i kéluhana ruwe bé bénréh i de apostol ni. Mélaw fénémili roy Estebane, ségétew méégét i kéunur ne brab fémanduoy Rémogor i Tuluse. Fénémili ro soy ro Filipihe, Prokoro, Nikanor, Timon, Parmenas, brab Nikolas tidéw Antiokia ségétew békén Judio, éndob ménrugayén i kéunur ne bé kukumay de Judio. ⁶ Atin nuwit ro bero mangéy dob de apostol. Tidéw béno, ténégéy de apostol i de bumbuna ro bé kédasala ruwe bero inok tabangay Tuluse bero bé mantuwe ni aturan.

⁷ Atin mélaw ménlégébén i urete fantag bé Tuluse. Atin minut médooy munure bé Kristowe dob Jerusalem. Atin médoonén i de fadi méganay so munur.

I kékéfie bé Estebane

⁸ Atin i Estebane toow fo fénfiyoy Tuluse inok wén i barakatén rémigo do mémégaif dob téngaangay de étew. ⁹ Endob wén i de étew ménisébanil bé Estebane. Beroy de étew dob simbaane féndawét "Méntangéy étew". I de dumo bero do Judio tidéw Siren, brab tidéw Alejandria, I de ni do étew beroy de dumoy de Judio tidéw. Silika brab Asia, ménghanay ro séédél bé Estebane. ¹⁰ Endob toow fo fénggétigay Rémogor i Tulusey Estebane émbéréh. Mélaw énda i ségétew gésumbul bero.

¹¹ Mélaw niraya ro kurta i de étew inok bérhéroy éndae toow fantag bé Estebane maro, "Enggelingoo key i ni étew ménbéréh tete fantag bé Moisese brab Tuluse." ¹² Mélaw fénkérít roy de étew brab de odoroy de Judio brab de témore kitab. Atin kénéfo roy Estebane brab nuwit ro dob adafay de ménlimud do kékédewan. ¹³ Tidéw béno, nuwit roy de étew émbéréh bé éndae toow fantag bé Estebane maro, "I Estebane ni démoyun émbéréh tete fantag bé mémétefuwe lawi i Tuluse brab de kukuman sénulat Moisese. ¹⁴ Enggelingoo key bénréhén bé i Jésus tidéw Nasaret, gébaé no kun i lawi i Tuluse brab fégaliné noy adate énggégéfaganada tom tidéw dob Moisese." ¹⁵ Tidéw béno, ténéngténg i kéluhanay de odoron i Estebane. Atin énggito roy rangih ne maak falas téaki.

7

I kékéfie bé Estebane

¹ Mélaw i gérotore fadi fénénginsaa noy Estebane mano, "Aw toow i de ni?"

² Atin séménumbul i Estebane mano, "Do dumo gu brab do lukés gu, fégélingo gom i bérhékuwe ni. I toowe fo ménbantug barakatan Tulus méméfégito dob katufua tome Abraham amun bati de séna dob Mesopotamia, bé énda séna ménagéwén de mangéy Haran. ³ Atin bénréhén de mano, 'Tagakém i de samungém brab ingéd me atin agéw go mangéy dob gonone toroé ku beem.' ⁴ Mélaw ténagakén i ingéd ne Kaldeo brab ménagéw mangéy Haran, atin diyo ménbati. Atin amun ménléhu i boh Abrahame, fénagéw i Tuluse man mangéy dob ni ingéd gono kom bati béleewe ni. ⁵ Bé do no do gai, énda nirayay Tulusey Abrahame fantad fiyon kloh. Endob fénasad i Tuluse dob Abrahame bé irayen dey ni fantad brab dob de séfuén témundug de, fiyon fo ké énda sénay nga Abrahame de. ⁶ Ay niy bénréh i Tuluse bé Abrahame mano, 'I de séfuém bati ro dob ségiyowe

ingéd toow fo mérayu atin waléy ro do rifén diyo. Atin mérasay ro taman fot ratuh gébélintuwa. ⁷ Endob kukumé kuy de étew rémifén bero. Atin i de séfumé tekédan ro dob nan ingéd atin féngadafé ro Begén dob ni gonon.' Been i niy bénréh i Tuluse." ⁸ Atin fénautus Estebaney kébéréh ne mano, "Tidéw bénó, sénugu i Tuluse dob Abrahamey ni adat sani kétulie inok wén i tanda bénó ni fasad. Mélaw ténuli Abrahamey nga ne Isak amun ménwaléwén gétérésangan ménumlah. Atin i Isake ténulién soy nga ne Jakob. Atin i Jakobe ténulién soy de folo bra ruwo gétew ngaén. Atin beroy de katufua tom do Judio.

⁹ "Endob i de nga Jakob ménadaléw ro bénó tuwaréy ruwe fénawéti Jose. Mélaw fénbéléy ro atin ménwaléy rifén dob ingéde Egipto. Endob Tulus i dumo nuwe. ¹⁰ Atin ténabangay Tuluse inok énda i sug-sugén fiyon fo ké médooy kérégénone. Atin amun diyo i Josehe dob adafay datue dob Egipto, fénfiyoy Tuluse brab niraya no kégétuwane. Mélaw ménuyot i datue de. Tidéw bénó fénwaléy i datuey Josehe odoron dob no ingéd brab beene soy odorone dob lawi i datue ni. ¹¹ Tidéw bénó, énggumah i dakéle lénggob dob ingéde Egipto brab dob Kanaan. Atin toow ro fo ménrasay. Atin i de katufua tom énda i amaé ro. ¹² Mélaw amun énggelingoo Jakobe wén i faréy dob Egipto, sénuguén i de ngaén, sani de katufua tom mangéy diyo bénó gésungu nuwe. ¹³ Dob gérubo nuwe gule ménangéy ro diyo, ménféfégéloy Josehe dob de dumo no sétiman boh. Atin énggétuway datuey fantage bénó de samung Jose. ¹⁴ Mélaw fénksamfay Josehey kébéréh ne bénó féangéyén i boh ne Jakob brab kéluhanay de samungén. Atin fitéw ro folo bra limo kéluhanan. ¹⁵ Tidéw bénó, ménagéw i ro Jakobe mangéy Egipto. Atin diyo ménléhu loo soy de ségiyo katufua tom. ¹⁶ Atin nuwit i de bangkay ro mangéy Sekem, atin lénébénge ro dob lénébénge bénléy Abrahame dob de étew Hamor."

¹⁷ Atin fénautus Estebaney kébéréh ne mano, "Amun gédétén i gaiwe métuman i fasad i Tuluse dob Abrahame, toowén fo médooy de Judio dob Egipto. ¹⁸ Atin bénó, ségyionén i datue dob Egipto, atin énda énggétiga noy fantage bénó Josehe. ¹⁹ Enda fo fiyoy ni datue. Féngakara noy de katufua tom. Atin fénrasayén fo bero toow. Non fénégésén i de katufua tom bénó ibéré roy de nga ro inok méléhu. ²⁰ Atin bénó do gai, ménumlah i Moisese, toow fo fiyoy nga. Rénitoy idéng ne sungu dob lawi ruwe taman télaw gétérésang kélunganon. ²¹ Amun fénliyu roy ngae dob lawie, éndot i libune nga i datue dob Egipto. Atin fénagifatén maak kaan so nga. ²² Mélaw ménotoro i Moisese bénó kéluhanay kégétuwane dob Egipto. Atin ménwaléy énggétigan étew dob de kébéréhén brab dob de rigoné no.

²³ "Amun fotén folo gébélintuwa i Moisese, ménuyot témukaw bénó de dumo no do Judio. ²⁴ Atin amun énggumah dob de dumo no, énggito noy kédusay ségyetéwe tidéw Egipto bénó dumo nuwe Judio. Mélaw ténabangén i dumo nuwe ni Judio brab séménuli fénléhuén i étew tidéw Egipto. ²⁵ Brab mano bénó i de dumo no do Judio énggésobuto roy been i usaréy Tuluse témabang bero inok métangéy ro. Endob énda énggésobuto ro de. ²⁶ Bénó gétunduge de fuweh, énggito noy ruwowe gétew Judio sétiboh. Atin génléen bero mano, 'Kagom sétiboh! Ségiléw gom falan Judio.' ²⁷ Endob i ségyetéwe de ferasayé noy dumo nuwe ni, dénién i Moisese brab ménbéréh mano, 'Békén beem i odoro keye taloo no kékédéwa key. ²⁸ Aw ménuyot go méméléhu begén loo bénó kékéléhu me bénó ségyetéwe tidéw Egipto natémégéno?' ²⁹ Amun énggelingoo Moisesey ni, ménraréy tidéw Egipto brab ménangéy bati dob ingéde fénawéti Madian. Atin diyo énggébawag brab wén i ngaén ruwo gétew lagéy."

³⁰ Atin fénautus Estebaney kébéréh

ne mano, "Amun ménifus i fote folo gébélantuwa, méntéfégito dob Moisesey télakiwe dob mérinoe kayéw dob gonone énda i étew de bati, gédét dob tuduke féndawét Sinai. ³¹ Toow fo ménggaif i Moisese bé ni énggito no. Atin amun ménfégédét inok gito no fo toow, énggelingoo noy béréh i Kadnane mano, ³² 'Begéney Tuluse fénengadaf i de katufua kom, ro Abraham, Isak, brab Jakob.' Atin i Moisese léménukub bé kégilak ne brab éndaén gétengtégo no de. ³³ Atin ménbéréh man i Kadnane mano, 'Kéda moy sinilas me non i gono muwe témidég mékétéfu fantad. ³⁴ Enggito guy kéférasye bé de étew gu dob Egipto. Brab énggelingoo kuy de dogés ro. Mélaw ménlusu inok fétangéy gu bero. Atin béléewe, sugué ku beem magéw mangéy Egipto.' "

³⁵ Atin fentaus Estebaney kékéréh ne mano, "Nikaay de dumo no Judiyo Moisese bé kékéréh ruwe maro, 'Békén beem i odoro key taloo no kékédéwa key!' Endob beeney sénugu i Tuluse méguléw bero brab émfétangéye bero. Atin i télakiwe méntéfégito dob beene dob mérinoe kayéw i témenabangane de. ³⁶ Atin fénanangguvitén i de étew mésut tidéw Egipto. Rénigo noy de mékégaif dob Egipto brab dob dogote féndawét 'Furo Dogot' brab dob gonone énda i bati diyo amun ménagéw ro diyo bé fote folo gébélantuwa. ³⁷ Atin i Moisesey ménbéréh dob de Judiyo mano, 'Emféuwit i Tuluse mangéy dob begome ségétew sarigo no muret bé kékéréh ne ségiléw bé kékéuwit ne begén. Been soy ségétéwe bé de séfu Israele.' "

³⁸ Atin fentaus Estebaney kékéréh ne mano, "Moisesey dumoy de Judiyo ménslimud dob gonone énda i ségétew étew bati diyo, bero soy de katufua tom brab télakiwe ménsléréh de dob tuduke Sinai. Brab beeney énggégédote bé kékéréh i Tuluse inok irayén so dob betome. I kékéréh i Tuluse ni énda mékéda no taman sa taman.

³⁹ "Endob i de katufua tom énda ménodor ro bé de sugu Moises. Yamula ménika ro de brab ménuyot ro séfule mangéy Egipto. ⁴⁰ Mélaw bénréh ro dob Arone sani ofo Moisese maro, 'Rigo go do kéninontow inok wén i féngadafé key, brab inok wén i manangguwit betom. Non énda gétiga key ké ati énggérígono Moisese sani ménanangguwite betom tidéw Egipto.' "

⁴¹ Atin fentaus Estebaney kékéréh ne mano, "Bé no do gai réménigo ro kéninontow maak falas nati safi. Atin téménulak ro dob adafa nuwe brab kénandulio ro inok fégito roy kéoror ruwe bé ni rénigo ro. ⁴² Endob sabaf bé ni, tétagak i Tuluse bero brab féndayaén bero ménengadaf bé de gitoon dob lawayo loo bé sénulat i sénarigoy Tuluse féndawét Amos mano, 'Do étew Judiyo, békén Begén i téulaka kome dob gonone énda i ségétew de bati bé lala i kédio gome bé ménfote fole gébélantuwa. Yamula ségiyoy fénengadaf gome. ⁴³ Non nuwit gom i battoy sébaane tulus féndawét Molok brab sébaane kéninontow maak gitoon tulus féndawét Renfan. Do kéninontow i fénengadaf gome, mélaw féangeyé ku begom fingé na diyo bé ingéde Babilonia.' "

⁴⁴ Atin fentaus Estebaney kékéréh ne mano, "I de katufua tom wénén i ginise lawi sani tandaé énda tagakéy Tuluse bero. Nuwit ro amun ménagéw ro dob gonone énda i étew de bati. Rénigo roy ni loo bé bénréh i Tuluse bé Moisese, ségiléw bé fénggitoy Tuluse de. ⁴⁵ Amun ménifus i firoye gébélantuwa, i de katufua tom énggédot roy ni tidéw dob de lukés ro. Atin i de katufua tom nuwit ro dob de ingéd téhaba ro bé gaiy kédédél i Tuluse bé de étew mésut dob do no gonon inok wén i battoy de Judiyo. Atin i odoro ruwey lagéye féndawét Josue. Atin fénbati roy lawi i Tuluse diyo taman bé gai Datu Dabide. ⁴⁶ Toow fo ménswat i Tuluse bé Dabide. Atin nongotén dob Tuluse inok tungkasé no rémigo bé lawi i Tuluse, sani Tuluse fénengadaf

Jakobe. ⁴⁷ Endob i nga Datu Dabide féndawét Solomon i réménigowe bé nan lawi.

⁴⁸ “Endob bérhéku begom, i toowe fo gérотор Tulus énda batien dob de lawi rénigoy kéilawane. Non bénréh i ségétewe sénarigoy Tuluse féndawét Isias mano, ⁴⁹ ‘Bang i Tuluse, laway i sara kuwe, atin i duniyaey ténaa kuwe bé de sékéy gu. Enda i lawi gérígono kom inok batio ku taloo no téreño ku. ⁵⁰ Békén ba Begén i réménigowe bé kéluhanay étingayéne?’”

⁵¹ Atin féntaus Estebaney kébéréh ne mano, “Toow fo métégas i de uléw gom! Enda séna fo ménfégalin i de fédew gom loo bé kétayay Tuluse. Brab toow gom fo do énda mégélingo bé kébéréh i Tuluse. Ségiléw gom so bé de katufua kom non atuho kom i Rémogor i Tuluse sénga téklid.

⁵² I de katufua kom fénrasay roy kéluhanay de sénarigoy Tuluse muret bé kébéréh ne bé do gétah. Fénléhu roy de sénugu i Tuluse muret fantag bé Kristowe sani métintuwe fo Sugusuquéy Tuluse. Atin i begome, kénéfo gom brab fénléhu gom i Kristowe.

⁵³ Enggétanggafa kom i de kukuman féniray i Tuluse bé de télaki, éndob énda nodoro kom de.” Been i niy bénréh Estebane.

I kéféléhue bé Estebane

⁵⁴ Amun énggelingoo de odoron i kébéréh Estebane, toow ro fo ménkérít. Kémigét i de kifé ro bé kékérít ruwe. ⁵⁵ Endob i Estebane toow fo fénémanduoy Rémogor i Tuluse, brab léménéngag dob lawayo, atin énggito noy kéréndaw i Tuluse brab énggito noy Jesuse témindég dob kuwonoy Tuluse. ⁵⁶ Atin ménbéréh i Estebane mano, “Téngténg gom! Enggito guy lawayo ménungka, brab i Nga i Kéilawane témindég fingé dob kuwonoy Tuluse.”

⁵⁷ Toow fo ménkérít i de odoron ni, mélaw néféng roy de kélingo ro brab ménékes ro. Atin sénréngana roy magayase de gémaak. ⁵⁸ Atin sénguyud ro mésut dob ingéde ni brab

nibéro ro batéw. Atin i de témebo de, kénda roy de gérubo lafin bé de kégal ro, atin fénled ro dob kénogo lagéye féndawét Saulo. ⁵⁹ Atin i lala ruwe mibéron batéw bé Estebane, déménasal dob Kadnane mano, “O Kadnan Jesus, tangafém i rémogor guwe!” ⁶⁰ Atin ménlingkuwéd brab ménbéréh métanug mano, “Kadnan, fésagadém i ni sala ro.” Sonom béo, ménléhu.

8

I kérerasay i de munur

¹⁻² Atin i Saulowe ménagayun bé kéféléhue bé Estebane. Atin i Estebane, lénébéng i de étew munur bé Kristowe brab toow fo rénuung ro. Atin méntidewen bé no térsang i kékérerasay de munur bé Kristowe. Brab kéluhana ro, saliyu bé de apostol, ménbéragar ro tidew Jerusalem mangéy Judia brab Samaria.

³ Atin i Saulowe ténulama no binasanén i kéfengintulus i de munur bé Kristowe, ahuro noy séngae lawi brab kéfoé no séguyudén i de étew munur bé Kristowe. Brab uwité no bero dob fériunone, do lagéy brab do libun.

I kélégéb i Fiyowe Uret dob Samaria

⁴ Atin amun ménbéragar i de étew munur bé Kristowe dob de ségiyo ingéd, nuret roy fantage bé Jesuse.

⁵ Atin i Filipiwe ménangéy dob sébaane ingéd diyo dob Samaria, atin diyo nureténi Jesuse Been i Kristowe sani fénemili i Tuluse méguléw.

⁶ I de étew, amun énggelingoo roy kébéréh ne brab énggito roy kéluhanay de mékégaif rénigo no, toow fo fénggelingoo roy kébéréh Filipihe.

⁷ Fénféraréyén i de saitan réménahuk dob de médoó étew, atin ménékes ro bé lala ruwe tékedan. Brab fén-adi-adi noy médoowe do fikat brab do kimoyén. ⁸ Mélaw toow fo ménoror i de étew dob no ingéd.

⁹ Wén i ségétewe lagéy dob no ingéd féndawét Simon, ségétew béliyan. Bé de énggétah do gai, fénggaifén i médoowe do étew dob Samaria bé de tete káfagakarén. Ménfabantug-bantug

bé beene kun i gérotore étew. ¹⁰ Atin i kéluhanay de étew dob no ingéd do méskinan brab do kawasa, fénggélingo ro. Bénréh ro maro “I ni étew féndawét Ménbantug Barakatan, sani barakat i Tuluse.” ¹¹ Ménrugay i kéfegaif ne bero bé de tete kéfagakarén. Mélaw toow ro fo fénggélingo. ¹² Endob amun énggélingoooy de étew i Fiyowe Uret nuret Filipiwe fantag bé kéguléw i Tuluse brab Jesu Kristowe, ménunur ro brab ménfábautis ro, do lagéy brab do libun. ¹³ Atin fiyon i Simone ménunur so bé Kristowe. Brab amun ménbautisén, démoyun ménodor bé Filipiwe. Atin toow fo ménggaif i Simone bé de énggito no rénigo Filipiwe.

¹⁴ Amun énggélingoooy de apostol dob Jerusalem i kétayakuf i de étew dob Samaria bé kékéréh i Tuluse, fenuwit roy ro Pedrowe brab Juane mangéy diyo. ¹⁵ Amun énggégumah ro diyo, dénasala roy de étew munur bé Kristowe inok tayakufé roy Rémogor i Tuluse. ¹⁶ Non i Rémogor i Tuluse, énda séna énggumahén dob berowe fiyon ségétew. Ménbautison ro saén inok fégito roy kékunur ruwe bé Kadnane Jesus. ¹⁷ Tidéw bénréh, ténevé Pedrowe brab Juaney de bumbuna ro. Atin ténggaf roy Rémogor i Tuluse.

¹⁸ Atin énggitoy béliyane ni Simon i kétanggaf ruwe bé Rémogor i Tuluse bé kétégéy de apostol bero. Mélaw bénréhén dob Pedrowe brab Juane bé iraya no bero kurta. ¹⁹ Brab bénréhén mano, “Irayanu so bé ni barakat inok amuk wén i tégné ku, gétanggaf so bé Rémogor i Tuluse.”

²⁰ Endob séménumbul i Pedrowe mano, “Mékukum go damén begom i kurta me, non mamo ké gébéléyo mo bé kurtaey niray i Tuluse. ²¹ Enda fakay go mamung bé galbék geye non énda séna métintuy fédew me dob adafay Tuluse. ²² Fatut go gésénule bé ni tete kéfégitungém brab dasal go dob Kadnane inok fésagada no beem bé ni salaém. ²³ Non énggito guy toow

fo mésina go brab bénilanggu i salae beem.”

²⁴ Tidéw bénréh, séménumbul i Simone mano, “Dasala kom begén dob Kadnane inok énda i métuman damén bé de bénréh gom dob begéne.”

²⁵ Atin i ro Pedrowe brab Juane, amun énggilid ron muret bé gétiga ruwe fantag bé Kristowe, brab bénréh roy kékéréh i Kadnane, ménfáule ro mangéy Jerusalem. Bé késfule ruwe, ménawét ro dob médoowe do ingéd dob Samaria brab nuret roy Fiyowe Uret diyo.

I Filipihe brab odorone

²⁶ Atin i Filipihe, sénugu i télakiy Kadnane mano, “Tafay go brab angéy go déligdigan dob agéwone tidéw Jerusalem mangéy Gasa.” (I ni agéwon éndaén i étew de magéwon.)

²⁷ Mélaw ménangéy diyo i Filipihe. Tidéw bénréh, énggébalaka noy ségétew lagéy kafun sarigoy baiwe dob ingéde Etiopia. Beeney ségétew gérotor étew mitong bé kurtae dob no ingéd. I ni étew séfule bé bénréh bé kékéw ne ménangéy ménadaf dob Jerusalem.

²⁸ Diyo dob kalesah ne brab basané noy librowe sénulat i méntelatae sénarigoy Tuluse féndawét Isaias.

²⁹ Atin bénréh i Rémogor i Tuluse dob Filipihe mano, “Ay go fégédét diyo brab odor go bé nan kalesah.” ³⁰ Mélaw i Filipihe ménsegéta mangéy fégédét brab énggelingoo noy kékasa nuwe bé librowe sénulat Isaiase. Atin fénenginsaa Filipihe mano, “Aw gésobuto moy nan basané mo?”

³¹ Séménumbul i ni sarigon mano, “Ati kégésobut guwe de ké énda i témo de begén?” Tidéw bénréh, féndaén i Filipihe dob kalesah ne atin ménfingé ro ménas. ³² Ay niy ménulat dob libro Isaiase, bénasa no, “Beeney maake bili-bili fénléhu. Beeney maake nati bili-bili mantés ké kéléngén i buk ne, non énda fo ménbérhén fiyon sétaga.” ³³ Toow fo ménfémala brab énda méntintuy kékukume de. Atin énda i gébéréh

fantag bé de séfuén non ménléhuén brab éndaén dini ro dob duniyae ni.”

³⁴ Atin ménénginsa i ni sarigon dob Filipihe mano, “Ati ni étew ménsulat dob ni? Aw bénréh i sarigoy Tulusey fantage bé kaane lowoh taloo no ségiyo étew?” ³⁵ Tidéw bénó, fénggétiga Filipihe dob beeney atag ni bénasa no brab nureténi i Fiyowe Uret fantage bé Jesuse. ³⁶ Atin amun diyo ro séna lowoh aguwon, énggumah ro dob gonone wén i wayég de. Atin ménbéréh i ni odoron mano, “Ay wén i wayég dob ni. Aw fakayu mébautis?”

³⁷ Séménumbul i Filipihe mano, “Fakay bautisé ku beem amuk tintugon munur bé Kristowe dob fédew me.”

Atin séménumbul i ni sarigon mano, “Munuru bé Jesu Kristowe, bé Beeney Nga i Tuluse.”

³⁸ Atin i ni sarigon fentéré noy kalesah ne brab ménlus bero Filipihe ménangéy dob wayége atin bénautis Filipihe. ³⁹ Amun géménaun ron tidéw dob wayége ni, nuwit i Rémodor i Kadnaney Filipihe. Endaén énggitoy sarigone niy Filipihe, éndob ménauts magéw toow fo moror. ⁴⁰ Atin i Filipihe ménékow énggégumah dob sébaane ingéd féndawét Asdod. Atin tidéw diyo ménuret bé Fiyowe Uret fantage bé Jesuse dob kéluhanay de ingéd énggétaraa no bé kéagéw ne mangéy dob ingéde féndawét Sesaria.

9

I kénéwaléy Saulowe munur

¹ Atin i Saulowe bé do no do gai, fentausén soy kérigo nuwe bé de kuyug i Kadnane. Non ménbéréh féléhué no kun bero. Atin ménangéy dob gérotore fadi, ² brab ménongot sulat dob beene mangéy dob de odoroy de Judio dob de lawi féngadafa ro dob ingéde Damasko inok kéfoé noy kéluhanay étew gito no diyo do modor dob Agéwo Jesuse brab uwité no bero mangéy Jerusalem, do lagéy brab do libun.

³ Atin ménagéw i Saulowe mangéy Damasko. Amun gédétén dob no ingéd, ménékow wén i réndaw tidéw dob lawayo géliwéti de. ⁴ Atin ménngétéléngkéb i Saulowe dob fantade brab énggelingoo noy émbéréhé mano, “Saulo! Sedek ferasayé mo Begén?”

⁵ Ménénginsa i Saulowe mano, “Ati Beeme, Kadnan?”

Atin séménumbul mano, “Begéney Jesuse ferasayé mo. ⁶ Tindégo brab taus go mangéy Damasko, atin diyo wén i étewé béréhé no beem i fatute rigoné mo.”

⁷ Atin i de étew dumo Saulowe magéw, téménrén ro. Ménantés ro non énggelingoo roy émbéréhé ni éndob énda gito ro de. ⁸ Atin i Saulowe téménindégo brab bénékahén i de moto no, éndob énda gérito no. Mélaw narak i de dumo no taman Damasko. ⁹ Atin ménéléléw géterésangan énda gérito no, brab énda ménamaén taloo no méniném.

¹⁰ Atin diyo dob Damasko wén i ségétewe kuyug Jesuse féndawét Ananias. Atin wén i fénggitoy Tuluse dob beene non ténavag i Kadnane mano, “Ananias!”

Séménumbul mano, “Ay niwu so Kadnan.”

¹¹ Atin ménbéréh i Kadnane mano, “Angéy go dob agéwone féndawét ‘Mééntang’ brab taus go dob lawi Judase brab fénginsaém diyo i lagéye féndawét Saulo tidéw Tarsus. Démasal sénay ni étew béní. ¹² Brab wén i fénggitoy Kadnane, brab dob ni énggitoy noy ségétewe lagéy féndawét Ananias énggumah dob beene brab ténege no inok gérito man.”

¹³ Séménumbul i Ananiase mano, “Kadnan, énggelingoo kuy uret i médoowe étew fantage bé ni lagéy, brab kéluhanay tetee rénigo no dob de kuyugém dob Jerusalem. ¹⁴ Atin ménangéy dini dob Damaskowe ni non wén i kuwagibe tidéw dob de odoroy de fadi inok kéfoé noy kéluhanay munure Beem brab de lémabit bé dawét me ké démasal ro.”

15 Endob ménbérél i Kadnane mano, "Angéy go diyo non fénemili guy ni étew inok waléy sugu-sugué ku muret fantag bé Begéne dob de étew békén Judio brab dob de datu brab dob de Judio so. **16** Brab fégétiga ku dob beene bé waléy so toow fo mérasay sabaf bé kéunur ne Begén."

17 Mélaw ménagéw i Ananiase mangéy diyo. Amun énggégumah dob lawie ménahur so brab ténégé noy Saulowe ni. Atin bénréhén de mano, "Saulo, dumo gu, sénugu i Kadnane begén mangéy dob beeme. Beeney Jesuse sani mémentefégitowé dob beeme dob aguwone bé kéangéy me dini. Sénuguén begén inok waléy go man gérito brab fémanduoy Rémogor i Tuluse beem." **18** Sonom bénó, i de maak éner ménlawu tidéw dob de moto Saulo brab énggégito. Atin ménagayas témindég brab ménfóbautis. **19** Amun énggilid mama, ménsefule i kébagér ne. Atin ménbati i Saulowe dob de kuyug Jesus dob Damasko bé ménfiroye gétérésangan.

I kékuret Saulowe dob Damasko

20 Atin i Saulowe ménagayas ménahur dob de lawi féngadafay de Judio brab nureténi fantage bé Jesuse. Bénréhén mano, "I Jesuse ni, Beeney Nga i Tuluse."

21 Atin i kéluhanay de énggégélingo de toow ro fo ménngaif brab ménsefenginsa ro maro, "Aw békén ba beeney étewe tidéw Jerusalem méméléhu bé de munur bé Jesuse? Aw békén ba ménangéy dini inok kéfoé noy de kuyug Jesus, inok uwité no mangéy dob odoroy de fadi dob Jerusalem?"

22 Endob ménwaléy toow fo émbagér muret i Saulowe brab féngétiga no dob de Judio dob Damasko i Jesuse, Been i Kristowe, sani méguléwe tidéw dob Tuluse ongot-ongoté ro. Atin énda i énggésumbul bero.

23 Amun ménifus i firoye gétérésangan, i de Judio ménslimud ro atin ménsefagayun ro bé féléhué roy Saulowe. **24** Fuweh na kélunganon i

kébantaya ruwe de dob de bengaway ni ingéd inok féléhué ro. Endob wén i ménlolok dob Saulowe fantag bé ni rigoné ro. **25** Mélaw wén i no kélunganon, i de kuyugén nuwit roy Saulowe dob gératore diding fénggédiding bé ni ingéd. Atin nahur ro dob dakéle biton brab ténuntu ro mangéy fingé bala dob faliluwangay didinge ni.

26 Atin ménule i Saulowe mangéy Jerusalem brab téménlama magiyamongan bé de kuyug Jesus. Endob mégilak ro de brab énda munur ro de ké ménwaléyén kuyug Jesuse.

27 Tidéw bénó, i Bernabewe nuvitén i Saulowe mangéy dob de apostol. Atin i Bernabewe nureténi dob berowey kétéfégíttoy Kadnane brab késébérél ne dob Saulowe dob aguwone. Atin bénréh Bernabewe soy kébaraw Saulowe muret fantag bé Jesuse dob Damasko. **28** Mélaw i Saulowe ménbati dob berowé dob Jerusalem. Brab séménugud muret fantag bé Kadnane dob kéluhanay de gonon dob Jerusalem. **29** Atin ménsebérél brab ménseédél bé de Judio do sébérél Griego. Mélaw ténlama ro féléhuén i Saulowe. **30** Amun énggétigay de dumo no munur bé Jesuse, dénura ro mangéy Sesaria brab fénule ro mangéy Tarsus.

31 Atin bé do no gai, énda ménrasay i de munur bé Kristowe dob Judea brab dob Galilea brab dob Samaria. Ménwaléy ro do méégét munur brab méninut ro médoo non ténabangay Rémogor i Tuluse bero, non toow fo féngadafé roy Kadnane.

I rénigo Pedrowe

32 Atin i Pedrowe, démoyun ménagéw mangéy dob de médoo do ingéd. Amun nangeyén téukaw i de dumo no munur bé Kristowe dob Lida, **33** diyo énggébalaka noy ségétewe lagéy féndawét Eneas. I Enease ni kimoyén brab ménwaléwén gébélintuwa i éndae kégétekén. **34** Atin ménbérél i Pedrowe dob beene mano, "Eneas, uwaé Jesu Kristowe

beem. Tek go brab dili moy iroo muwa nan!” Sonom béno énggétek i Enease ni. ³⁵ Enggitoy kéluhanay de étew dob Lida brab dob Saron i ni lagéy ménadi-adi. Mélaw ménunur ro bé Kadnane.

³⁶ Atin diyo dob Jopa, wén i ségétewe libun munur so bé Kristowe féndawét Tabita. (Taloo no Dorkas dob késébéréhe Griego. Atin i atag ne “séladéng”.) Sénga tékélid rémigo fiyo dob de méskinan, brab tabanga no bero. ³⁷ Bé do no gai, ménwaléy déméruruun brab ménléhu. Mélaw i de dumo no, nurah roy bangkay ne brab féndiyo ro dob sibéye dob rotor i lawie. ³⁸ Enda mérayu i ingéde Jopa dob ingéde Lida. Mélaw i de kuyug Jesus dob Jopa, amun énggelingoo ro diyo i Pedrowe dob Lida, sémenugu ro ruwo gétew lagéy mangey diyo inok bérhéhé ro dob Pedrowe bé magayas mangéy dob berowe. ³⁹ Mélaw ménodor i Pedrowe bero. Amun énggumah ron, nuwit roy Pedrowe mangéy dob sibéye dob rotor i lawie. Atin i kéluhanay de libun do baléw ménfégédét ro dob Pedrowe, kémérew ro brab fénggito roy de kégal rénigo Dorkase bé kéuyag ne séna. ⁴⁰ Tidéw béno, fénsut Pedrowe bero dob sibéye atin ménlingkuwéd démasal. Tidéw béno, sénaréwén i bangkaye brab ménbéréh mano, “Tabita, tek go!” Tidéw béno, bénékahén i de moto no brab amun énggito noy Pedrowe, méntek. ⁴¹ Atin i Pedrowe, génamakén i de kémérén brab féntindégén. Tidéw béno, ténawagén i kéluhanay de munur bé Kristowe brab de libun do baléw, atin fénggito no beroy Dorkase ménuyag. ⁴² Atin i urete fantag bé ni ménlégéb dob ingéde Jopa. Mélaw ménwaléy médooy ménunure bé Kadnane. ⁴³ Atin ménrugay i Pedrowe dob Jopa. Ménbati dob lawi i ségétewe lagéy gémalbék léminis do kulit safi féndawét Simon.

10

I Pedrowe brab Korneliowe

¹ Dob Sesaria, wén i ségétewe lagéy féndawét Kornelio. Beeney kafitay de sundalo tidéw Roma sani de sundalo féndawét ro “Do tidéw Italiana”. ² I ni kafitan toow fo méngintulus, loo soy kéluhanay de dumo no dob kaane kurégon. Démoyun miray tabang dob de Judio do méskinan. Brab sénga tékélid démasal dob Tuluse. ³ Wén i no sébaan fuweh, géraraan lémudug i térsange de, wén i fénggito Tuluse dob beene. Tintu fo énggito noy télakiy Tuluse ménahur dob lawi ne. Atin ténawag i télakiwe ni mano, “Kornelio!”

⁴ Atin ténéngténgén i télakiwe ni brab toow fo ménggilak. Atin séménumbul mano, “Ati no?”

Atin ménbéréh i télakiwe ni mano, “Mésuwat i Tuluse bé kégédaw me bé de fiyo rénigo mo brab kédasal me. Atin énggétédémo no beem. ⁵ Béleewe ni, sugu go do étew mangéy Jopa inok angéyé roy ségétewe lagéy féndawét Simon Pedro. ⁶ Diyo bati dob lawi i lagéye gémalbék léminis do kulit safi féndawét so Simon. I ni lawi gédét dob dogote.” ⁷ Tidéw béno, ménékédan i télakiwe ni. Atin i Korneliowe ténawagén i ruwowe gétew bé de sugu-sugué no, brab ségétewe bé de sundalo no toow fo méngintulus. Beene soy ségétewe bé de sarigo no. ⁸ Atin bénréhén beroy ni ménrigo. Tidéw béno, sénuguén bero mangéy dob ingéde Jopa.

⁹ Dob gétunduge de fuweh, amun gédét ron dob Jopa, i Pedrowe ménénik dob datare atéf i lawie batio no brab déménasal. Géutuhén bé béno. ¹⁰ Atin toowén fo mélayah brab ménuyot fo mama. Endob i lala i de étew dob nan lawi témafay séna bé amaé ruwe, wén i fénggito Tuluse dob Pedrowe ni. ¹¹ Enggito noy lawaye ménungka brab wén i maake dakél safut térimféna mangéy fantad ténutun fot i sugud ne. ¹² Diyo ménfuyut i kéluhanay séségiyo-giyowe do binatang do magéw brab do rémagaf dob fantade brab do kloh manok. ¹³ Brab énggelingoo noy

émbéréhé mano, “Pedro, étek go! Sumbaliém brab amaém.”

¹⁴ Endob séménumbul i Pedrowe mano, “Aba, énda fo gérigono ku de, Kadnan. Non tidéw féganay, énda séna ménamau bé de amaén liyén dob adat geye do Judio.”

¹⁵ Atin énggelingoo no man i émbéréhé ni mano, “Kago béréhén liyén taloo no tete i bénréh i Tuluse fiyo.” ¹⁶ Téléw gule ménrigoy ni. Tidéw béno, i ni méntutun ménbatun séfule mangéy dob lawayo.

¹⁷ I lala Pedrowe mégitung bé atiy atag i ni énggito no, énggumah i de sénugu Kornelio. Non amun fénénginsa roy hon i lawie gono Pedrowe bati, ménangéy ro diyo. Brab diyo ro dob liyuy bengawane. ¹⁸ Atin téménawag ro brab fénénginsa ro ké diyo bati i lagéye féndawét Simon Pedro.

¹⁹ Atin i Pedrowe tafay so fégitungé noy atiy atag i ni énggito no. Tidéw béno, i Rémogor i Tuluse ménbéréh dob Pedrowe mano, “Pedro, wén i téléw gétew lagéy séméléd beem.

²⁰ Tek go brab lus go, brab kago magalang-galang modor bero non Begén i séménugu bero.” ²¹ Mélaw ménlus i Pedrowe brab bénréhén bero mano, “Begén i nan sélédé kom. Ati funa kome séméléd begén?”

²² Séménumbul ro maro, “Sénugu kafitan Korneliowe begey mangéy dini. I ni étew toow fo métintu brab méngrintulus, atin i kéluhanay de Judio fégadata ro. Ménbéréh i télikwe dob beene bé féangeyé no beem dob lawi ne inok fégélingoé noy ati béréhé muwe.” ²³ Atin i Pedrowe ténayakufén bero dob lawie ni batio no, brab ménbati ro diyo ségékélungonon.

Atin bé démoe de ménodor bero brab wén soy do dumo bé de munur bé Kristowe dob Jopa ménodor de.

²⁴ Dob gétunduge de fuweh, énggumah ro dob Sesaria. Diyo nongot-nongot Korneliowe bero. Atin ténawagén i kéluhanay de samungén brab do dumo no séloyuk. Mélaw diyo ro so. ²⁵ Amun énggumahén i

Pedrowe, bénalak Korneliowe brab ménlingkuwéd dob adafa Pedrowe inok fénadafé no. ²⁶ Endob fentindég Pedrowe brab ménbéréh mano, “Tindég go, non i begéne kélawanu so loo bé beema nan.” ²⁷ Atin fentaus Pedrowey késébéréh-béréh ruwe bé lala ruwe mahur dob lawie ni, atin énggito noy médoowe étew ménlimud. ²⁸ Tidéw béno ménbéréh i Pedrowe mano, “Gétiga komén i adat geye do Judio. Enda fakayén dob kitab geye ké sémugud gey mangéy dob de lawi gom do békén Judio taloo no sélawék gey begom. Endob fénngétigay Tuluse begén bé mantuwe ni séna, bé fiyon fo ké ati no étew, éndaén fégitungé ku de mékérésik. ²⁹ Mélaw amun fén-angéy gom begén dini, éndaén ménSEDÉLU de. Mélaw féningsaa ku begom, ati funa kome ménfétawag begén?”

³⁰ Séménumbul i Korneliowe mano, “Amun naméntéléwo, loo so bénigéraraan lémudug i térsange de, déménasalu dob lawi guwe ni. Méntékow méntéfégíttoy lagéye toow fo sémélinang i kégal ne téménindég dob téngaanga kuwe. ³¹ Atin ménbéréh mano, ‘Kornelio, énggelingoo Tulusey kédasal me brab énggétédémo noy kégédaw me brab de fiyo rénigo mo. ³² Mélaw sugu go étew mangéy Jopa témawag bé lagéye féndawét Simon Pedro. Diyo bati dob lawi i lagéye gémalbék léminis do kulit safi féndawét Simon gédét dob dogote.’ ³³ Mélaw ménagayasu séménugu mangéy témawag beem. Atin mégédaw go non ménangéy go dini. Atin ay ni gey ménlimud dob adafay Tuluse inok méngringo bé fébéréh i Kadnane beem.”

I kékéréh Pedrowe

³⁴ Atin ménbéréh i Pedrowe mano, “Béleewe ni énggétiga ku, i Tuluse énda i isu ramigo no bé de étew. ³⁵ Non tayakuféy Tulusey étewe mégadatan de brab rigoné noy fatute kétayay Tuluse, fiyon fo ké ati katufua nuwe taloo no ké ati tidéwo nuwe de. ³⁶ Gétiga kom i kériray i Tuluse bé kékéréh ne dob de Judio. Dob berowe

fénayagén i Fiyowe Uret fantag bé kénéfiyowe fédew sabaf bé Jesu Kristowe. Endob Beeney Kadnay kéléuhanane. ³⁷ Gétiga kom ké ati ménrigowé dob kéléuhanay de ingéd dob Israel, méngganay dob Galilea amun i Juane nureté i fantage bé kékautis ne. ³⁸ Brab énggétiga kom i fantage bé Jesuse tidéw Nasaret. I Tuluse nirayén témantu dob Beeney Rémogor ne brab barakat ne. Séménugud dob kéléuhanay de ingéd, rémigo bé fiyowe brab fén-adi-adi noy de étew fénrasay Satanase. Enggérigono noy de ni non dob Beeney Tuluse. ³⁹ Brab begey i énggétitowé bé de ni rénigo no dob de ingéd i de Judio brab dob Jerusalem. Endob i de étew fénléhu roy Jesuse dob kruse. ⁴⁰ Endob ténebule i Tuluse dob gétéléw ne gétérésang brab fénggito noy Jesuse ménuyag. ⁴¹ Enda méntefégitó no dob kéléuhanay étewé éndob dob begeye saén méntefégitó do fénémili i Tuluse. Ménséréngan begey mama brab miném amun méntébuleén. ⁴² Atin sénuguén begey mangéy muret bé Fiyowe Uret dob kéléuhanay étewé brab muret bé Beeney fénémili i Tuluse kémukum bé de méuyag brab bé de ménléhu. ⁴³ Atin i kéléuhanay de énggétah do sénarigoy Tuluse muret bé kékérél ne, nuret roy fantage bé Jesuse. Atin bénréh ro bé i kéléuhanay munure dob Beene, fésagaday Tulusey de sala ro sabaf bé barakat i dawét ne.” Been i niy bénréh Pedrowe.

I kégumah i Rémogor i Tuluse dob de békén Judio

⁴⁴ Amun émbéréh sénay Pedrowe, i Rémogor i Tuluse méntérimféná mangéy dob kéléuhanay de mégélingo bé uret ne. ⁴⁵ Atin i de kuyug Jesus do dumo Pedrowe ménodor de tidéw Jopa do Judio ro. Atin toow ro fo ménggaif bé kéray i Tuluse so témantu bé Rémogor ne dob de étew békén Judio. ⁴⁶ Enggétiga ro niray i Tulusey Rémogor ne dob de békén Judio non énggelingoo roy késébérél ruwe bé de ségiyo késébérél énda gétiga ro

de brab dénayéw roy Tuluse. Mélaw bénréh Pedrowe bero mano, ⁴⁷ “I de ni do étew ténggaf roy Rémogor i Tuluse, ségiléw so bé betome. Mélaw énda fakayén ké énda bautisén ro bé wayége.” ⁴⁸ Mélaw bénréh bero fatut fébautis ro inok féténgténg roy kéunur ruwe bé Jesu Kristowe. Tidéw bénó, fénbati ro nay Pedrowe dob berowé bé ménfiroye gétérésangan.

11

I Pedrowe dob Jerusalem

¹ Atin i de apostol brab de dumo ro munur bé Kristowe dob Judea, énggelingoo roy fantage bé de étew békén do Judio ménwaléy ro munur bé kékérél i Tuluse. ² Mélaw amun ménénagé i Pedrowe mangéy Jerusalem, i de munur bé Kristowe do Judio, dénowoy roy Pedrowe, ³ maro, “Séménugud go mangéy dob lawi i de békén Judio, sani de énda méntuli. Atin ménséréngan go na bero mama.” ⁴ Mélaw nuret Pedrowe beroy kéléuhanay ménrigowé tidéw féganay.

⁵ Ménbérél i Pedrowe mano, “Amun diyou dob Jopa, déménasalu atin wén i fénggitoy Tuluse begén. Énggito gu tidéw dob lawayoy maake dakél safut ténutun fot i sugud ne. Atin ménténa dob téngaanga kuwe. ⁶ Tidéw bénó, ténegténg gu fo toow atin énggito gu diyo ménfuyut i séségiyo-giyowe do ayam brab do mérayar binatang do magéw brab do rémagaf dob fantade, brab do kloh manok. ⁷ Tidéw bénó énggelingoo kuy émbéréhe mano, ‘Pedro, tindég go, sumbaliém brab amaém.’ ⁸ Endob séménumbulu maku, ‘Aba, énda fo gérigono ku de, Kadnan. Non énda séna énggéamaubé kéléuhanay amaéne ménbérél liyén dob adat geye do Judio.’ ⁹ Endob énggelingoo ku man ségule i ni émbéréh tidéw dob lawayo mano, ‘Kagonén bérélén liyén taloo no tête i bénréh i Tuluse fiyo.’ ¹⁰ Tidéw gule ménrigoy ni. Tidéw bénó, ménbatun séfule mangéy dob lawayoy ni maak safut ménfeno do

binatang. ¹¹ Bé béno so, énggumah dob lawie gono ku bati i télewé gétew lagéy sénugu tidéw dob ingéde Sesaria mangéy témawag begén. ¹² Atin i Rémogor i Tuluse bénréhén begén bé magéwu brab békénu magalang-galang modor bero. Tidéw béno, ménodor so begén i de ném ni gétew do munur do dumo gu tidéw Jopa mangéy Sesaria. Amun énggumah geyén dob lawi Korneliowe, ménahur gey. ¹³ Atin bénréhén begey i fantage bé télakiwe énggito no dob lawi ne. Atin bénréh i télakiwe de kun mano, ‘Sugu go étew mangéy témawag bé lagéye féndawét Simon Pedro dob Jopa. ¹⁴ Ureté no beem i funa muwe méfukas dob de salaém begom i de samungém.’ Been i niy bénréh i télakiwe de kun.’

¹⁵ Atin fentaus Pedrowey kóbérén ne mano, “Amun méngganayu séna émbérén dob de étew ni dob Jopa, i Rémogor i Tuluse ménlus mangéy dob berowe ségiléw bé kéangéy ne dob betome do Judio bé féganayo.

¹⁶ Tidéw béno énggétédémo kuy bénréh i Kadnane mano, ‘I Juane mautis bé wayége éndob bautison gom bé Rémogor i Tuluse.’”

¹⁷ Atin fentaus Pedrowey kóbérén ne mano, “Enggitonén i kíiray i Tuluse bé Rémogor ne dob de ni étew békén Judio ségiléw bé kíiray ne de dob betome amun ménunur tom bé Kadnane Jesu Kristo. Mélaw énda i kuwagib gu mélén bé Tuluse miray bé Rémogor ne dob berowe.”

¹⁸ Amun énggelingoo roy ni kóbérén Pedrowe, téménrén ron bé kédowoy ruwe de. Atin dénayéw roy Tuluse maro, “Mégédaw so wayoy Tuluse bé de étew békén Judio non amuk gésénule ro, gédoté ro soy umule magufusa.”

I de munur dob Antiokia

¹⁹ I de munur bé Kristowe ménbéragar ro non bé kíférasaye bero tidéwén bé kíféléhue bé Estebane. Mélaw énggumah ro dob de mérayu ingéd. I de dumo de dob Fenisia atin i de dumo de dob Sipri brab

dob Antiokia. Atin nuret roy Fiyowe Uret dob de Judio saén. ²⁰ Endob wén i de dumo de tidéw Sipri brab do tidéw Sirin, amun énggumah ro dob Antiokia nuret ro so dob de békén Judioy Fiyowe Uret fantag bé Kadnane Jesus. ²¹ Atin i barakat i Kadnane ténabangén bero funay médoowe do étew énggésénule brab ménunur bé Kadnane.

²² Atin i urete fantag bé de ni énggumah dob de munur bé Kris-towe dob Jerusalem. Mélaw fénuit roy Bernabewe mangéy Antiokia. ²³ Amun énggumah diyo, énggito noy kégédaw i Tuluse bero. Toow fo ménoror i Bernabewe brab bénréhén bero kéluhanan bé fidayday ro bé kúnur ruwe dob kéluhanay de fidéw ro brab modor ro bé de sugu i Kadnane. ²⁴ Toow fo fiyo étew i Bernabewe ni. Fénémanduoy Rémogor i Tuluse brab méégét i kúnur ne. Mélaw sabaf bé kétoro ne, médooy de énggésénule brab ménunur ro bé Kadnane.

²⁵ Tidéw béno, ménangéy Tarsus i Bernabewe inok sélédé noy Saulowe.

²⁶ Amun énggito no, nuvitén mangéy Antiokia. Atin ménsegébélantuwa diyo ro beroy de munur bé Kristowe brab téménoro ro dob de médo étew. Atin diyo dob Antiokia, ménfeganay i kétawage bé de munur bé Kristowe “Kristiyano”.

²⁷ Bé do no do gai, wén i de sénarigoy Tuluse muret bé kóbérén ne énggumah dob Antiokia tidéw Jerusalem. ²⁸ Téménindég i ségétéwe bero féndawét Agabo brab fénbérén i Rémogor i Tuluse bé wén moso i gégumah dakél lénggob dob kéluhanay de ingéd dob duniye ni. (Atin énggumah i ni bé gaiy kíféguléw Klaudiowe dob Roma.) ²⁹ Atin i de kuyug, ménsegagayun ro bé émféuwt ro tabang bé atiy tamay gagane ruwe mangéy dob de dumo ro do kuyug bati dob Judea. ³⁰ Atin been i niy rénigo ruwe, brab fénuit ro bé ro Saulowe brab Bernabewey karowe

tabang do kurta mangéy dob de odoroy de munur diyo dob Judea.

12

I kérasay i de munur

¹ Bé do no do gai, féngganay i datue féndawét Herod i kéférasay ne bé de dumo bé de munur bé Kristowe.

² I Santiagowe dumo Juane sétiman idéng, fénféléhu Herode bé sundange.

³ Atin amun énggito no toow fo ménsuwat i de Judio bé ni rénigo no, fénkéfoén i Pedrowe. (Ménrigoy ni bé gaiy kékanduli i de Judio féndawét “Témara”, sani kandulie mama ro fan énda i fégéférak de.) ⁴ Amun énggékéfoo roy Pedrowe, fénrisu ro brab fénbantaya ro bé fote lumfuk do sundalo. Wén i fot gétew dob séngae de sétumfuk. Atin bénantak Herode kukumén i Pedrowe dob téngaangay de étew amuk gilid i kékanduli ruwe.

⁵ Mélaw ménbati i Pedrowe dob férisunone. Atin i de dumo no munur bé Kristowe téménantu ro démasal dob Tuluse inok tabanga noy Pedrowe.

I kétangéy Pedrowe tidéw dob férisunone

⁶ Amun ségékélungonon séden i télaa Herode kémukum bé Pedrowe, bé no kélungonon ménfidong i Pedrowe dob kérara i ruwowe gétew sundalo mantayan de. Brab nikét roy Pedrowe bé ruwowe timan sangkali. Atin wén soy do sundalo mantay dob béngray férisunone ni.

⁷ Atin tékow méntréfíttoy télaki Kadnane brab ménggékaya i sibéy ne dob férisunone. Atin i télaikiwé ni kénuyungén i Pedrowe dob wara nuwe inok ulégé no brab ménbéréh mano, “Fagayas go tek!” Sonom béno ménukoh i de sangkali dob de kémérén. ⁸ “Sintoro go brab sinilas go”, bang i télaikiwé ni. Atin nodoro Pedrowey bénréh i télaikiwé ni. Ménbéréh man i télaikiwé ni mano, “Kégalém i géruwowe lafin kégalém brab odor go begén.” ⁹ Atin ménodor i Pedrowe bé télaikiwé ni brab ménusut. Endob énda gétiga no de ké toow i ni rénigoy télaikiwé ni, look fénggitoy

Tuluse de dob téginéfe saén. ¹⁰ Ténaraa roy sunguwe brab géruwowe gonoy de sundalo ni do mantay. Tidéw béno, énggumah ro dob béngray férisunone ni futow i fintu ne. Atin ménungka so fiyon fo ké énda i ménungka de. Atin amun énggésut ron, méntaus ro magéw brab amun énggéliyuno ron i sébaane aguwon, tékow ménalfa i télaikiwé ni.

¹¹ Tidéw béno énggétiga Pedrowe nén i ni ménrigo, mélaw énggéréh no mano, “Béleewe énggétiga kun toow wayoy ni ménrigo! Sénugu i Kadnaney télaiki nuwe témangéy begén inok énda gérigono Herode brab de Judioy kétaya ruwe rigoné ro dob begéne.”

¹² Amun énggétiga noy ni, méntaus mangéy dob lawi Mariahe idéng Juan Markose. Diyo ménlimud i médoowe étew démasal. ¹³ Amun énggumah i Pedrowe, témenuktuk dob liuyu fintue dob fésayawane. Atin ménfégédét i ségétéwe sugu-suguén kénogon féndawét Roda inok angéyé no susinén. ¹⁴ Amun énggélolo noy béréh Pedrowe, toow fo ménoror. Endob énda nungkaén i fintue. Yamula sabaf bé kéoror ne ménsgéta séfule mangéy dob de étew brab bénréh bero i Pedrowe diyo dob liyuwe.

¹⁵ Endob ménbéréh ro maro, “Bunég go!” Endob énda téméré no émbéréh bero i Pedrowe diyo dob liyuwe. Mélaw bénréh ro maro, “Télaki Pedro keey i no.”

¹⁶ Tafay so témuuktuk i Pedrowe ni. Tidéw béno nungka roy fintue ni brab amun énggito roy Pedrowe, toow ro fo ménggaif. ¹⁷ Endob séniniyasa Pedrowe bero bé féantés ro, brab nureté beroy kéfésut i Kadnane de tidéw dob férisunone. Atin ménbéréh mano, “Uret gom i ni dob Santiagowe brab dob de dumo tom munur bé Kristowe.” Tidéw béno, ménagéw i Pedrowe mangéy dob ségiyowe gonon.

¹⁸ Amun géfuwénén, i de sundalo mantayan bé Pedrowe, toow ro fo ménggaif brab ménngilak. Enda énggétiga ro de ké ati énggérigono

Pedrowe. ¹⁹ Atin fénséléd Herodey Pedrowe. Atin amun énda énggito ro de, fénénginsaa Herodey de mantay bé férisunone, atin fénféléhuén bero. Tidew béno, léménudug i Herode mangéy Sesaria tidew Judea brab diyo ménrugay bati.

I kéléhu Herode

²⁰ Bé béno gai, ménkérít i Herode bé de étew tidew Tiro brab de étew tidew Sidon. Mélaw ménsefagayun ro mangéy ro dob beene. Bé énda séna ménangéy ro dob Herode, ménsebéréh ro bé sarigo nuwe dob lawi ne féndawét Blasto bé odoro no bero mangéy dob Herode inok ongoté ro de ké kédané noy kékérít ne bero. Non énda i ségiyo édoto ro bé amaé ruwe ké békén dob ingéde sakuf Herode.

²¹ Amun énggumahén i télaa ruwe mangéy diyo, i Herode kéménégál kégal datu brab ménasar dob saray datue. Tidew béno nureto no bero. ²² Atin ménkes i de étew démayew bé Herod maro, "Tulus i ni émbéréh, békén kéilawan." ²³ Sonom béno, kénukum i télaik Kadnaney Herode non ténayakufén i kéféngadaf ruwe de, brab énda feféngadafé no bero bé Tuluse. Mélaw ménsofotén i lowoh ne atin ménléhu.

²⁴ Atin bé do no gai, i urete fantag bé Tuluse ménlégéb dob de ingéd atin minut so médooy munure bé Kris-towe.

²⁵ Atin i ro Bernabewe brab Saulowe amun énggilid ron i galbék ruwe, ménsefule ro tidew Jerusalem mangéy Antiokia, brab nuwit roy Juan Markose.

13

I késugue bé Saulowe brab Bernabewe

¹ Diyo dob Antiokia, wén i de sénarigoy Tuluse muret bé kékéréné brab do téromo. I de ni, ro Bernabe, Saulo, Simeon (féndawét so mitam lagéy), Lusio (tidew Sirin), brab Manaen (sani dumo Herode ménngéséeruk). ² Wén i no sébaan fuweh, amun ménengadaf ro dob Tuluse brab ménfuwasa ro, i Rémogor

i Tuluse ménbéréh mano, "Iray gom Begén i ro Bernabewe brab Saulowe inok rigoné roy galbéke fénémili gu iray gu bero." ³ Mélaw ménfuwasa ro brab déménasal ro brab ténégé roy ro Bernabewe brab Saulowe. Tidew béno sénugu ro bero.

Dob Siprus

⁴ Atin i Bernabewe brab Saulowe do sénugu i Rémogor i Tuluse, ménagéw ro mangéy Selusia, atin tidew Selusia ménda ro barko mangéy dob bungéde féndawét Siprus. Ménodor soy Juan Markose. ⁵ Amun téménéfad ro dob ingéde Salamis, nuret roy kékéréné i Tuluse dob de lawi féngadafay de Judio. Atin téménabang soy Juan Markose.

⁶ Atin amun énggiefara ronén i ni bungéd mangéy dob ingéde Pafos, diyo énggébalaka roy béliyané ségétew Judio féndawét Bar-Jesus. (I dawét ne Elimas dob késébéréhe Griego.) Bénréhén been kun i sénarigoy Tuluse muret bé kékéréné ne. ⁷ Brab i ni béliyan, been i dumoy ségétewé gobernador dob no bungéd féndawét Sergio Paulo, toow fo métiledtéd. Atin i ni gobernador fentawagén i ro Bernabewe brab Saulowe non méuyot mégélingo bé kékéréné i Tuluse. ⁸ Endob i béliyané ni Elimas, toow fo ménsebanil bero. Atin ténulama no balengén i fédew i ni gobernador inok énda munurén. ⁹ Tidew béno, i Saulowe (féndawét so Pablo) toow fo fénemanduoy Rémogor i Tuluse. Atin fénandangén fo toow i ni béliyan.

¹⁰ Brab ménbéréh i Pablwe mano, "I beema nan, nga Satanas go! Tintu sébanil go bé kéluhanay fiyowe. Ménfeno go bé tugie brab akar. Atin télamané mo féwaléyén tugi i toowe tidew dob Kadnane. ¹¹ Bé béní so, kükuméy Tuluse beem bé waléy go langafén brab mérugay énda gégo go."

Sonom béno, i Elimase ménlangafén brab séménléd étew marak de. ¹² Atin i gobernadore ni ménunur bé Kris-towe amun énggito noy ni ménrigo.

Toow fo ménggaif bé kétoroe fantag bé Kadnane.

Dob Antiokia sakuf i ingéde Pisidia

¹³ Atin i Pablowe brab de dumo no ménda ro man barko dob Pafos, brab énggégumah ro dob gonone féndawét Perga sakuf i ingéde féndawét Pamfilia. Endob i Juan Markose ménsésuway bero atin ménséfule mangéy Jerusalem. ¹⁴ Atin tidéw Perga, méntaus ro mangéy Antiokia sakuf i ingéde Pisidia. Atin bé gaiwe kétérén, ménahur ro dob lawie féngadafay de Judio brab ménsar ro. ¹⁵ Amun énggilid i kébasawe bé de kitab sénulat Moisese brab de sénulat i de sénarigoy Tuluse, i de odoron dob lawie féngadafan fénbéréh roy ro Pablowe brab Bernabewe maro, “Do dumo gey, amuk wén i kéuyoto kom béréhé kom dob de étew ni émféfiyo bé de fédew ro, kagom séko méangga, béréh gom so bero.”

¹⁶ Mélaw téménindég i Pablowe brab séniniyasa no bero bé de kémérén inok mantés ro. Tidéw béo, ménbéréh mano, “Do dumo gu do Judio, brab begome do étew békén Judio do méngintulus, toow gom fégélingo. ¹⁷ I Tuluse féngadafé tom do Judio, i ménémilie bé de katufua tom. Atin fénwaléyén bero médo amun ménbati ro dob mérayue ingéd Egipto. Endob fénésut i Tuluse so bero tidéw Egipto bé barakat ne. ¹⁸ Atin téningkéloy Tuluse bero bé ménfote folo gébélantuwa dob gonone énda i étew de bati. ¹⁹ Amun énggilid ténaba noy de fitew timan ingéd dob Kanaan, nirayén i fantade ni dob de Judio. ²⁰ I kérugay i kéluhanay de ni fot ratuh bra limo folo gébélantuwa.

“Atin amun énggilid i ni, nirayay Tuluse bero do kénéfédewan inok wén i méguléw bero taman dob gai Samuele, ségétew sénarigoy Tuluse muret bé kékéréh ne. ²¹ Tidéw béo, i de Judio ménongot ro dob Tuluse datu ro. Atin fénémili i Tulusey ségétew lagéy féndawét Saulo nga Kis tidéw dob katufua Benjamene. Atin ménwaléy datu roy Saulowe bé

ménfote folo gébélantuwa. ²² Amun kénday Tulusey Saulowe, Dabid i fénwaléy ne datu ro. Bénréh i Tuluse mano, ‘Enggito guy Dabide, nga Jessewe, kénswata ku. Rigoné noy kétaya kuwe.’”

²³ Atin féntaus Pablowej kékéréh ne mano, “Jesusey ségétewé bér de séfu Datu Dabid. Brab Beeney fénwaléy i Tuluse Mémukas bér de étew Judio loo bér fénasad ne. ²⁴ Amun énda séna féngganay Jesusey galbék ne, i Juan Bautistawe, nureté dob kéluhanay de étew do Judio bér fatut ro gésénule bér de sala ro brab fábautis ro. ²⁵ Atin amun gédétén gilid i galbék Juane, bénréhén dob de étew mano, ‘Békén katabawan i kékaran gome begén. Non békénu Kristo sani ongot-ongoté kome. Endob gégumah gétundug begén. Atin gérotor na begén brab fiyon foy ikét i safatos ne, énda médaitu de mukoh.’”

²⁶ Atin féntaus Pablowej kékéréh ne mano, “Do dumo gu do séfu Abraham, brab de begom do békén Judio do méngintulus so, betom i fénuwitoy Tuluse bér ni Fiyo Uret fantag bér Mémukase. ²⁷ I de étew dob Jerusalem brab de odoro ro énda énggétiga ro de ké Jesusey Mémukase. Brab énda énggésobuto roy ménsulate kékéréh i de sénarigoy Tuluse muret bér kékéréh ne fiyon fo ké bénasa ro sénga fadiyan bér de gai kétérén. Endob fiyon fo ké loo bér ni, ténuma ro soy ménsulate bér kékukum ro bér Jesuse. ²⁸ Atin fiyon fo ké énda i funa ro kékukum bér Jesuse, nongot ro so dob Pilatowe féléhuén i Jesuse. ²⁹ Amun énggétumana ron i kéluhanay Ménsulate Kékéréh i Tuluse fantag bér Jesuse, kénda roy bangkay ne dob kruse brab lénébéng ro dob takube. ³⁰ Endob ténebule i Tulusey Jesuse. ³¹ Atin dob ménfiroye gétérésangan, médo gule méntefégitoy Jesuse dob de étew ménodor de amun ménagéw mangéy Jerusalem tidéw Galilea bér gétahe. Atin béléewe ni, beroy ménurete dob de Judio. ³²⁻³³ Brab ay ni gey inok

ureté key dob begomey ni Fiyo Uret, sani Urete fantag bé fasad i Tuluse dob de katufua tom rigoné no. Atin i fasade ni, méntuman so dob betome do séfu ro non ténébuleén i Jésuse. Ay niy ménssulate dob géruwowe Kanta dob Ménsulate Kébérélh i Tuluse mano, ‘Beemey Nga guwe, béleewe ménwaléyu Bohém.’ ”

³⁴ Atin féntaus Pablowey kékérélh ne mano, “Ay niy bénréh i Tuluse fantag bé kétébule ne bé Jésuse inok énda mérénah i lowoh ne mano, ‘Tintu iray gu begom i kéluhanay kéfionone loo bé fénasad guwe dob Dabide.’ ³⁵ Atin bénréhén so dob Tuluse mano, ‘Enda fédayaé moy lowoh i fiyowe sugusugué mo mérénah.’ ”

³⁶ Atin féntaus Pablowe man i kékérélh ne mano, “I ni sulat békén fantag bé Dabide, non amun énggilid rénigo Dabidey kénswatay Tuluse, ménléhu brab lénébeng dob sékuloy de katufua no atin mérénah i lowoh ne.

³⁷ Endob ténébule i Tulusey Jésuse, énda mérénah i lowoh ne. ³⁸ Mélaw do dumogu, fatut gétiga kom i sabaf bé Jésuse saén i géureto keye begom, wén i kéfésagadén bé de sala gom.

³⁹ Atin i kéluhanay de méginugut dob Beene émfésagad i de sala ro. Enda émfésagad gom sabaf bé kékodoro kome bé de kitab sénulat Moisese. ⁴⁰ Mélaw, ingat gom inok énda mérigo dob begomey bénréh i de sénarigoy Tuluse maro, ⁴¹ ‘Téngténg gom, begom i de démiyangka bé Tuluse. Mégaif gom bé rigoné kuwe bé béní brab ménléhu gom non énda méngginugut gom de, fiyon fo ké wén i témenoro de begom.’ ” Been i niy bénréh Pablowe.

⁴² Tidew bénó, ménssutén i Pablowe brab Bernabewe tidew dob lawie ni fénadafan. Atin bé lala ruwe mésut, rénafit i de étew man bero séfule bé gétunduge gai kétéréni inok ureto ro man bero ségule fantag bé de ni. ⁴³ Amun ménssutén i kéluhanane, ménodoy de Judio brab do békén Judio do ménggéodor bé kékéngintulus i de Judio, ménodoy ro bé ro Pablowe brab Bernabewe. Atin i de ni apostol, nureto ro bero bé fétasé roy

kétayakuf ruwe bé kégédaw i Tuluse bero.

⁴⁴ Amun dob gétunduge man gai kétéréni, gédét kéluhanay de étew dob no ingéd ménangéy ro dob lawie fénadafan inok méléingo ro man bé kékérélh i Kadnane. ⁴⁵ Atin toow fo ménadaléw i de Judio amun énggitoy de médooy do étew. Mélaw ménbérélh ro sébanil bé de bérélh Pablo, brab fénéngiras ro. ⁴⁶ Endob toow na fo ménfébaraw émbérélh i ro Pablowe brab Bernabewe maro, “Fatut ureté key i kékérélh i Tuluse dob begome do Judio sungu. Endob amun ménika gom de, fénngito gom énda médait gom gégedot bé umule magufusa. Mélaw tagaké key begom brab mangéy gey muret dob de békén Judio. ⁴⁷ Non been i niy sugue niray i Kadnane begey mano, ‘Féuwit gu begom maak do solo dob de étew békén Judio, inok i kéluhanay étewé dob duniyae ni gélingoo roy kékret gome brab ménfukas ro.’ ”

⁴⁸ I de étew békén Judio, amun énggelingoo roy ni kékret Pablowe brab Bernabewe, toow ro fo ménoror brab dénatoyé roy kékérélh i Kadnane. Atin i de étew fénémili i Tuluse gégedot bé umule magufusa, ménunur ro bé Kristowe.

⁴⁹ Atin i kékérélh i Kadnane ménلالag dob kéluhanay de gonon dob no ingéd.

⁵⁰ Endob i de Judio rénimbur roy de odoron do lagéy dob no ingéd brab de gérotor libun do békén Judio do méngintulus. Atin fénnganaya roy kékérasay ruwe bé ro Pablowe brab Bernabewe brab fénéraréy ro bero dob no ingéd. ⁵¹ Mélaw i de apostol ni, téngtag roy de bubuk sébuwan dob de sékéy ro inok fénéngétinga ro bé de étew békén Tuluse bero. Atin ménntaus ro mangéy Ikonium. ⁵² Atin i de munur dob Antiochia dob sakuf i ingéde Pisidia, toow ro fo ménoror brab fénémanduoy Rémogor i Tuluse bero.

14

Dob Ikonium

¹ Atin loo so bé ménrigowe dob Antiochia, i ménrigowe dob Ikonium. I Pablowe bero Bernabewe ménahur ro so dob lawie féngadafay de Judio. Atin toow fo fiyoy kétoro ruwe, mélaw médooy de Judio brab do békén Judio ménunur bé Kristowe. ² Endob wén i de Judio do énda méginugut ro brab rénimbur roy de étew békén do Judio inok waléy ro mékérít bé de munur. ³ Endob i ro Pablowe brab Bernabewe, ménrugay ro na ménbati diyo. Brab ménfébaraw ro muret fantag bé Kadnane. Atin nirayay Kadnane bero barakat inok gérigo ro do mékégaif. Mélaw énggétigay de étew ni, toow i kéuret ruwe fantag bé kégédaw i Tuluse. ⁴ Endob énda géséfagayun i de étew dob no ingéd. I de dumo bé de étew ménagayun ro dob de Judio. Atin i de dumo bero ménagayun ro dob de apostol.

⁵ Tidew béno, i dumo bé de Judio brab de dumo bé de étew do békén Judio, beroy de odoro ro, bénantak ro bé dusané ro brab ibéro ro batéw i de apostol inok méléhu ro. ⁶ Endob amun énggélingooy de apostol i ni bantak ro, ménraréy ro mangéy Listra brab Derbe, brab dob de ségiyo gonon dob sakuf i ingéde Lisonia. ⁷ Atin diyo nuret roy Fiyowe Uret.

Dob Listra

⁸ Atin diyo dob Listra, wén i ségétewe lagéy fikat non ménasidil i de sékéyén brab énda géagéwén tidew fanay kéumahén. ⁹ Ménasar brab féngélingoén i kétoro Pablowe ni. Atin énggito Pablowej kéunur ne funa no fakay waléy adi-adi. Mélaw ténéngténg Pablowej fo toow. ¹⁰ Atin féntanugén i kékérén ne mano, “Fééntang go tindég.” Sonom béno, ménagayas tésongkow témidég i ni lagéy brab ménadi-adi, brab ménagéwagéw. ¹¹ Amun énggitoy de étew i rénigo Pablowej ni, ménkes ro dob karowe késékérén dob no ingéd Lisonia maro, “Ménlus i de tulus ménfuwaléy ro do kéilawan mangéy dob betome!” ¹² Mélaw féndawét ro Seus i Bernabewe brab féndawét

ro Hermes i Pablowej non beeney murete. Non Seus brab Hermes i ruwoe bé de tulus kun féngadaféy de étew ni. ¹³ Atin i lawie féngadafay ro bé tulus ruwe féndawét Seus, diyo dob liyuy bengaway ingéd ruwe. Atin amun énggélingooy béliya ruwey ni rénigo Pablowej brab Bernabewe, nuwito no do safi brab do flores inok témulak beroy de étew dob adafay de apostol.

¹⁴ Amun énggétiga ro Bernabewe brab Pablowej ni rénigo ro, sénkusi roy de kégal ro inok fégito roy kéika ruwe bé ni rigoné ro. Brab léménéntu ro mangéy dob kérara i de étew ni ménribuk brab ménkes ro maro, ¹⁵ “Kagom rigonén i nan! Do kéilawan gey so loo bé begoma nan. Ménangéy gey dini inok ureté key i Fiyowe Uret fantag bé Jesuse inok ikaa komén i de ni do adat énda i do lantékén. Méuyot gey de ké féngadafé kom i tintuwe Tulus sani réménigowe bé lawaye, fantad, dogot, brab kéluhanay éntingayéne. ¹⁶ Bé de énggétah do gai, féndaya i Tuluse rigonéy de étew i kéluhanay karowe kétayan. ¹⁷ Endob tidew féganay, sénga tékélid féngéttiga noy fantage bé Beene dob de kégédaw rénigo no. Iraya no begom rana tidew dob lawayo inok mérük i de nohok gom ké gai ro. Iraya no begom amaé kom atin féfiyoné noy de fédew gom.” ¹⁸ Endob fiyon fo ké loo bé nan i kékérén ne, ménkérégénan i Pablowej brab Bernabewe gémélé bero bé kétulaka ruwe bero.

¹⁹ Endob wén i do Judio énggégumah dob no ingéd do tidew Antiochia sakuf i ingéde Pisidia brab do tidew Ikonium. Atin bénaleng roy fédew i de étew ni inok sébanil ro bé Pablowej. Mélaw nibéro ro batéw i Pablowej ni inok méléhu ro damén. Tidew béno, génuyud ro mésut i Pablowej tidew dob ni ingéd, atin ténaak ro non marok ménléhuén. ²⁰ Endob amun énggégumah i de dumo no munur bé Kristowe atin sénliwéto ro, téminidég i Pablowej brab ménahur man dob no ingéd. Atin bé démoé de ménagéw i ro Pablowej brab

Bernabewe mangéy Derbe.

I késéfule ruwe mangéy Antiokia

²¹ Amun énggumah ro dob Derbe, nuret Pablowe brab Bernabewey Fiyowe Uret atin médooy ménunure bé Kristowe. Tidéw béno, ménséfule ro mangéy Listra brab Ikonium brab Antiokia dob sakuf i ingéde Pisidia.

²² Brab fénbagér roy fédéw i de munur diyo brab bénrého ro bero bé fétausé roy kéodor ruwe brab késarig ruwe bé Jesuse. Brab ménbérél ro maro, "Kamarasayan tom na médooy gule sungu atin géahur tom dob kéféguléw i Tuluse." ²³ Atin dob séngae do ménlimud do munur, i de apostol, ménémili ro do étew inok waléy ro odoroy de munur. Atin démasal ro brab fuwasa ro atin sarigé ro bero dob Kadnane, sani unuro ruwe.

²⁴ Atin ménagéw ro témara bé ingéde Pisidia atin énggumah ro dob Pamfilia.

²⁵ Nuret roy Fiyowe Uret dob ingéde Perga. Tidéw béno léménudug ro mangéy Atalia. ²⁶ Tidéw Atalia, ménnda ro barko séfule mangéy Antiokia, dob sakuf i ingéde Siria sani ingéde gonoy de dumo ro munur séménarig bero dob Tuluse inok tabanga no bero bé galbék ruwe mantu séna fénggilid ro.

²⁷ Amun énggumah ro dob Antiokia, lénimud roy de munur bé Kristowe atin nuret roy kéluhanay de rénígoy Tuluse bé kéagéw ruwe brab fantag bé kébéngaw i Tuluse bé agéwone inok i de étew békén do Judio géunur ro bé Kristowe. ²⁸ Atin ménrugay ro ménbati diyo beroy de dumo ro munur bé Kristowe.

15

I késélimude dob Jerusalem

¹ Bé béno, wén i de étew ménangéy Antiokia tidéw Judea brab ténero roy de munur bé Kristowe maro, "Taman énda fétuli gom loo bé ménbéréhe dob kitabe sénulat Moisese, énda méfukas gom dob de sala gom." ² Endob i Pablowe brab Bernabewe ménika ro bé kétoro ruwe ni brab toow ro fo ménkérit brab ménédél ro bé de ni do étew. Atin ménfagayun ro

kéluhanan bé i ro Pablowe brab Bernabewe brab de dumo do munur dob Antiokia, mangéy ro dob de apostol brab dob de odoroy de munur dob Jerusalem inok fénginsaé roy fantage bé ni.

³ Atin i de étew do munur dob Antiokia sénugu ro bero mangéy Jerusalem. Atin bé kéagéw ruwe, énggétara ro dob de ingéd féndawét Fenisia brab Samaria. Atin diyo nuret roy fantage bé de étew do békén Judio ménwaléy do munur. Mélaw i de munur dob do no ingéd toow ro fo ménoror amun énggelingoo roy de ni. ⁴ Amun énggégumah ro dob Jerusalem, i de munur brab de apostol brab do odoron, tényakuf ro bero. Atin i Pablowe brab Bernabewe nuret roy kéluhanay rénígoy Tuluse dob berowe. ⁵ Endob i de dumo bé de Fariseo do ménwaléy munur bé Kristowe, téménindég ro brab ménbérél ro maro, "Fatut tulien i de étew do békén Judio do ménwaléy munur bé Kristowe brab fatut suguéen ro bé odoro roy kéluhanay de kukuman sénulat Moisese."

⁶ Atin ménslimud i de apostol brab do odoron inok sétiawané roy fantage bé ni. ⁷ Amun ménrugay ron ménbérél-bérél, téménindég i Pedrowe brab ménbérél mano, "Do dumo gu, énggétiga kom i ni: Bé i kéluhana tome dini, fénémili i Tuluse begén bé do gétah inok ureté kuy Fiyowe Uret dob de békén Judio inok munur ro so. ⁸ I Tuluse gétiga noy fédéw i kéluhanay étewe. Atin fenténgtengén i kétayakuf ne bé de békén Judio bé kéray ne bé Rémogor ne dob berowe ségiléw so bé kéray ne de dob betome. ⁹ Enda fénsébida no betom bé berowe non léninisén soy de fédéw ro non ménunur ro bé Kristowe. ¹⁰ Aw méuyot gom rémigo bé kékiaay Tuluse funa no kémukum begom? Aw féodoro kom beroy de sugu tidéw dob kitab Moisese foyon foy de katufua tom brab betome énda énggéodoro tom de? ¹¹ Békén i nan! Munur tom bé méfukas tom sabaf bé kégédaw i Kadnane Jesus, betom

ségiléw so bé berowe.”

¹² Tidéw béno, ménantés ro kéluhanan amun énggelingoo roy bénréh ro Bernabewe brab Pablowe fantag bé de mékégaif fénrigoy Tuluse bero amun diyo ro dob de étew békén Judio. ¹³ Amun énggilib ron émbéréh, ménbéréh i Santiagowe mano, “Do dumō gu, fégelingo gom! ¹⁴ I Simon Pedrowe, mantu séna nureténi do betomey sunguwe kégédaw i Tuluse dob de békén Judio amun fénémilién i de dumō bero ménwaléy so do kaan étew munur bé Beene. ¹⁵ Ségiléw so bé niy bénréh i de méntelata do sénarigoy Tuluse muret bé kékéréh ne. Non sénulat ro mano, ¹⁶ ‘Ménbéréh i Kadnane mano, séfuleu moso dob de séfu Datu Dabid. Brab fétindégé ku man bero non ségiléw ro bér sébaane lawi ménrundas. ¹⁷ Rigoné kuy ni inok i kéluhanay de étew munur ro dob Begéne, loo soy de étew békén Judio do fénémili gu waléy kagén do étew. ¹⁸ Been i niy bénréh i Kadnane, sani ménfégétigane bér de ni tidéw féganay.’”

¹⁹ Atin fentaus Santiagowey kékéréh ne mano, “I kagéne de karang, énda damén férégéno tom i de étew békén Judio énggésénule ron brab munur ro bér Tuluse. ²⁰ Yamula, sulata tom bero, bér békén ro sa mama bér amaéne ménwaléyén mékérésik dob adafay Tuluse non ténlak dob de kéninontow, brab békén ro bigaén, brab békén amaé roy de binatang énda ménsumbalién, brab békén ro mama dara. ²¹ Fatut rigoné roy ni inok énda mékérít i de Judio non ménrugayén i de kitab sénulat Moisese, ménbasanén dob kéluhanay de lawi féngadafay de Judio sénga gai kétéren, atin ménureténi dob kéluhanay de ingéd.”

I sulate mangéy dob de munur do békén Judio

²² Tidéw béno, i de apostol brab de odoron brab kéluhanay de munur bér Kristowe, ménfagayun ro ménémili bér de dumō bero. Atin fénuit ro bero mangéy Antiokia ménodor ro

bér Pablowe brab Bernabewe. Brab fénemili roy Judase (féndawét so Barsabas) brab Silase sani de ruwo gétew toow fo basanay de munur.

²³ Atin fénuit ro beroy sulate ni émbéréh mano, “I de begey do apostol brab do odoron, sani de dumō gom munur bér Kristowe dob Jerusalem, ségifaé key begom do dumō gey munur bér Kristowe do békén Judio bati dob Antiokia, dob Siria, brab dob Silisia. ²⁴ Enggelingoo key wén i do dumō gey ménangéy dob begome brab fénbuku roy de fédew gom bér de kékéréh ro. Endob énda sénugu gey bero rémigo bér de ni. ²⁵ Mélaw ménfagayun gey ménémili do lagéy inok sugué key bero mangéy dob begome. Modor ro bér Pablowe brab Bernabewe sani de kégédawa key do dumō tom. ²⁶ Beroy de étew niray roy férénawa ruwe dob galbék i Kadna tome Jesu Kristo. ²⁷ Mélaw sugué key i ro Judase brab Silase inok ureté ro dob begomey ségiléwe bér ni sénulat gey. ²⁸ I Rémodor i Tuluse féngésobutén begey brab ménagayun gey bér éndaén férégénon gom saliyu bér de ni do sugu: ²⁹ Kagom mama bér étingayéne ténlak dob de kéninontow, brab kagom mama dara, brab kagom mama bér de binatang énda ménsumbalién, brab kagom bigaén. Fiyo kér odoro kom i de ni. Been say niy béréhé keye begom. Salamat.”

³⁰ Tidéw béno, ménagéw i de sénugu ro ni mangéy Antiokia. Amun énggégumah ro diyo, ténavag roy kéluhanay de munur bér Kristowe brab niray roy ni sulat. ³¹ I de étew diyo amun énggébasana roy ni sulat, toow ro fo ménoror bér de ni kékéréh funay de fédew ro ménfiyo. ³² Atin i ro Judase brab Silase (beroy de sénarigoy Tuluse muret bér kékéréh ne), ménrugay i kékéréto ruwe bér de étew inok waléy fiyoy de fédew ro brab inok waléy méégét i kékénéruwe bér Kristowe. ³³ Atin ménbati ro diyo bér ménfiroye géfadiyan. Tidéw béno, fénfule i de dumō ro munur

bero mangéy Jerusalem dob de étew séménugu bero. Atin ménbérén ro mano, "Fijo damén i kéagéw gome." ³⁴ Endob i Silase ménbati dob Antiokia.

³⁵ I Pablowe brab Bernabewe ménbati ro dob Antiokia bé ménfiroye gétérésang kélungonon. I berowe brab de médo do dumo ro munur bé Kristowe, nuret ro brab ténero roy kékérén i Kadnane dob de étew.

I késésuway Pablowe brab Bernabewe

³⁶ Enda ménrugayén tidéw béo, i Pablowe bénréhén dob Bernabewe mano, "Séfule to mangéy dob de ingéd nureto to bé kékérén i Kadnane inok angéyé to tukawén i de dumo tom munur bé Kristowe brab inok gétiga to ké ati falas ruwe diyo."

³⁷ Atin i Bernabewe méuyot de ké uwitén i Juane Markose. ³⁸ Endob i Pablowe ménika muwit bér Juan Markose non téngakén bero dob Pamfilia brab énda ménfédaydayén modor bero dob galbék i Tuluse. ³⁹ Mélaw i Pablowe brab Bernabewe toow ro fo énggésédél fantag bér Juan Markose. Tidéw béo ménésuway ro. Nuwit Bernabewey Juan Markose ménada bér barkowe mangéy Siprus.

⁴⁰ Atin i Pablowe fénémilién i Silase modor de. Atin i de dumo ro do munur déménasal ro dob Kadnane inok Been i manangguwit bero bér kéagéw ruwe brab mégédaw bero.

⁴¹ Atin ménagéw ro mangéy Siria brab Silisia, brab fénbagér roy kéunur i de dumo ro munur bér Kristowe dob de ni do ingéd.

16

Ménodor i Timoteowe

¹ Atin i Pablowe ménangéy dob de ingéd féndawét Derbe brab Listra. Diyo wén i ségétew lagéy munur bér Kristowe féndawét Timoteo. I idéng ne ségétew libun Judio, munur bér Kristowe. Endob i boh ne békén Judio, i beene ségétew lagéy Griego.

² Atin i kéluhanay de munur bér Kristowe dob Listra brab Ikonium bénréh roy fiyowe fantag bér Timoteowe.

³ Atin i Pablowe ni ménuyot muwit bér Timoteowe ni modor bero. Mélaw ténulién loo bér adat i de Judio. Rénigo noy ni inok énda siyawéy de Judio de, non i kéluhanay de Judio dob de ingéd ayo ro, gétiga roy békén Judioy boh ne. ⁴ Atin ménagéw ro man. Amun ménawét ro dob de ingéd, nuret ro dob de munur bér Kristowey de sugu sénfagayunoy de apostol brab do odoron bér késélimud ruwe dob Jerusalem. Atin bénréh ro bero bér odoro roy de ni do sugu. ⁵ Mélaw i de ménlimud do munur bér Kristowe ménwaléy émbagér i kékéginugut ruwe brab méninut ro médo sénga fuweh.

Dob Troas

⁶ Ménagéw ro témara bér de sakuf i de gonon féndawét Frigia brab Galasia, non i Rémogor i Tuluse énda ténungkasén bero muret dob Asia.

⁷ Amun énggumah ro dob gonone féndawét Misia, téménlama ro mangéy Bitinia. Endob i Rémogor Jesuse énda ténungkasén bero mangéy diyo.

⁸ Mélaw léménudug ro mangéy dob ingéde Troas dob féedoror i dogote, témara bér gonone Misia. ⁹ Amun bér kélunganone de wén i énggétéginéfo Pablowe, non wén i fénggitoy Tuluse de. Atin énggito noy ségétewé lagéy tidéw Masedonia téménindégi brab nongotén dob Pablowe mano, "Ay go dini dob Masedoniawe ni brab tabangén gey." ¹⁰ Amun énggilid i ni téginéf, ménagékés gey mangéy Masedonia, non gétiga key ténavag i Tuluse begey dob Masedonia inok toroé key diyo i Fiyowe Uret.

Dob Filipos

¹¹ Dob Troas, ménada gey barko fééntang mangéy dob bungéde Samotrasia. Atin bér gétunduge de fuweh, ménlaus gey mangéy Neapolis. ¹² Atin tidéw man Neapolis, ménagéw gey dob ingéde féndawét Filipos. Been i niy mélagae dakél ingéd dob sakuf i Masedoniawe. Brab médooy de étew tidéw Roma bati diyo. Atin ménbati gey diyo bér ménfiroye gétérésangan.

¹³ Bé gaiy kétéréne, ménsut gey tidéw

dob ingéde ni brab ménangéy gey dob fédoror i dakéle wayég, non makey ké diyo i gonoy de Judio démasal. Amun énggumah gey diyo, ménasar gey brab ménésbéréh-béréh gey i de libun ménlimud diyo. ¹⁴ I ségetéwe bé de ni do libun, i dawét ne Lidia, tidéw dob ingéde féndawét Tiatira. I galbék ne émfébéléléy bé de balilaga furo safut. Tintu fo méngintulus i ni libun. Atin fentayakuf i Kadnaney fédew ne atin ménunur bé de kétoro Pablo. ¹⁵ Mélaw ménfábautis i ni libun brab de dumo no sétifon. Tidéw bénor bénréhén begey mano, “Amuk gékaranga kom tintuwu fo munur bé Kadnane, ay gom dob lawi guwe atin diyo gom bat.” Mélaw fénodorén begey.

I Pablowe dob férisunone

¹⁶ Wén i no sébaan fuweh, bé lala geye magéw mangéy dob gonone démasal, wén i ségetéwe rifén kénogon énggabalaka no begey. Rénahukoy saitane, komon gébérého noy ati mérigowé moso dob de gégumah do gai. Atin dakél i gédotéy de gefe de kurta bé ni galbékén béréhé noy ati mérigowé moso dob de étew. ¹⁷ Atin ménfuray begey ro Pablowe brab ménkes mano, “I de ni do étew, beroy sugu-suguéy toowe fo gérotor Tulus. Ureté ro dob begomey atiyé gáfukase begom.” ¹⁸ Beeniy rénigo nuwe bé ménfiroye gétérésangan taman ménrarék i Pablowe. Mélaw sénaréwén ténéngténgén i ni kénogon brab ménbéréh dob saitane mano, “Dob barakat Jesu Kristowe, sugué ku beem tékédan dob ni kénogon!” Sonom bénor, ménékédan i saitane dob beene. ¹⁹ Endob i de gefe bé ni rifén, amun énggito ro éndaén gégédot ro de kurta, ménkérít ro fo toow. Atin kénéfo roy ro Pablowe brab Silase, atin génuyud ro bero mangéy dob de gémamak kukuman dob fadiyane. ²⁰ Atin nuwit ro bero mangéy dob adafay de odoron tidéw Roma, brab bénréh ro maro, “I de ni do étew, do Judio. Rimburé roy katome ni ingéd. ²¹ Toroé roy adate sébanil bé de kukuma tom. Do Romano tom,

brab énda fakayén odoro tom i nan adat toroé ro.” ²² Atin médooy de étew ménamung lémubag bé ro Pablowe brab Silase.

Atin i de odoron fénkéda roy de kégal ro Pablo brab Silas brab fénbadas ro bero. ²³ Amun énggilid ro bénadas fo toow i ro Pablowe brab Silase, fénrisu ro bero, atin bénréh ro dob mantaye bé férisunone bé toow fo bantaya no bero. ²⁴ Mélaw fénahurén bero dob sibéye dob kérara i férisunone brab fénatungén i de sékéy ro dob toowe fo émbéyat do dakél kayéw inok énda géagéw ro.

²⁵ Amun kérara kélungononén, i ro Pablowe brab Silase déménasal ro brab kéménanta ro dob Tuluse. Atin fénggelingo i de dumo ro férisu. ²⁶ Atin ménékow léménuba toow fo émbagér, atin i férisunone ni ménkuyung fo toow. Brab sonom so bénor, ménungka i kéluhanay de fintu. Atin ménukoh i de sangkali fénggékét bé de sékéy i de férisu. ²⁷ Atin ménulég i mantaye bé de férisu. Amun énggito no ménungka i kéluhanay de fintu, manok énggésut i kéluhanay de férisu. Mélaw nawitén i sundang ne dob rumáne brab fétoyoén damén, non gétiga no féléhuéy de odoron amuk énggésut i de férisu. ²⁸ Amun gédétén damén fétoyo, ténavag Pablowe mékes mano, “Kago fétoyo, ay ni gey so kéluhanan!”

²⁹ Atin i mantaye ni bé de férisu, téménawag ménongot solo brab ménsgéta mahur dob férisunone ni. Toow fo léménukub bé kégilak ne, brab ménléngkéb dob adafay de sékéy ro Pablo brab Silas. ³⁰ Tidéw bénor, nuvitén bero mésut brab fénénginsaa no bero mano, “Ati fatute rigoné ku inok méfukasu dob de sala gu?”

³¹ Atin séménumbul ro maro, “Unur go bé Kadnane Jesus atin méfukas go. Beeme brab de samungém so.”

³² Atin nuret roy kékéréh i Kadnane dob beene brab dob kéluhanay de dumo no sétifon. ³³ Atin bénor so kélungonon, i mantaye ni nurahén i de fali ro. Atin tidéw bénor, ménagayas ménfábautis beroy de samungén.

³⁴ Atin fénlowotén i ro Pablowe brab Silase dob lawi ne brab fénamaén bero. Atin i ni ségékuréng toow fo ménoror non ménunur ron bé Tuluse.

³⁵ Atin bé géfuwéne de, i de odoron bé no ingéd, sénugu roy de sarigon mangéy dob férisunone inok tangéyé ro bero. ³⁶ Mélaw i mantaye bé férisunone bénréhén dob Pablowe mano, "I de méguléw séménugu ro bé féésutén go brab Silase. Mélaw ésut gomén brab kagomén émbuku."

³⁷ Endob ménbéréh i Pablowe dob de sarigon mano, "Enda i funa ro begey kémukum. Gido loo bénadas ro begey dob téngaangay médoowe étew, brab fénrisu ro begey fiyon fo ké énda méntiyawan gey. Brab i begeye do Romano so! Atin béleewe bunéyé ro saén i kéféesut ruwe begey! Enda fakayén! Béréh gom dob de méguléw tidéw Roma, beroy mangéye dini émféesut begey."

³⁸ Atin i de sarigon ménséfule ro dob de méguléw tidéw Roma brab nuret roy kékéréh Pablowe. Atin amun énggelingoo ro Romano so wayoy ro Pablowe brab Silase, toow ro fo ménggilak. ³⁹ Mélaw ménagéw ro mangéy dob férisunone brab nongot ro dob Pablowe brab Silase bé fésagadé ro bero. Tidéw bénou, nuwit ro bero mésut tidéw dob férisunone brab nongot ro dob berowe bé tékédan ronén dob ni ingéd. ⁴⁰ Atin i ro Pablowe brab Silase, amun ménusut ronén dob férisunone, méntaus ro mangéy dob lawi Lidiahe. Atin diyo énggito roy de dumo ro munur bé Kristowe. Brab bénréh ro beroy fiyowe inok fiyoy de fédéw ro. Tidéw bénou méntékédan ro.

17

Dob Tesalonika

¹ Atin amun méntaus magéw i ro Pablowe brab Silase, énggétara ro dob de ingéd féndawét Amfipolis brab Apolonia, atin énggégumah ro dob ingéde féndawét Tesalonika. Atin diyo wén i lawie féngadafan kay de Judio. ² Atin i Pablowe loo bé adat ne ménahur dob lawie ni féngadafan.

Méntéléw gé-Sabadoy no, sani gaiy kétéré ruwe, i Pablowe ménsebéréh-béréh bé de étew atin i kékéréh ne tidéw dob Ménsulate Kékéréh i Tuluse. ³ Fénggétiga no bero tidéw dob ni ménusat béréh mérasay i Kristowe brab tébule. Ménbéréh i Pablowe mano, "Béréhé ku begom i toowe fantag bé Jesuse. Beeney Kristowe, sani fénemili i Tuluse méguléw." ⁴ Atin wén i de ménunur bero brab nodoro roy ro Pablowe brab Silase. Loo soy médoowe do Griego méngintulus brab do gérotor do libun.

⁵ Endob i de Judio ménadaléw ro, mélaw lénimud roy de tete étew do énda i galbék ro tidéw dob de aguwon atin rénimbur roy ingéde ni. Atin dénunsuk roy lawi i ségétewe lagéy féndawét Jason inok sélédé roy ro Pablowe brab Silase, brab inok uwité ro bero dob adafay de médoow étew.

⁶ Endob amun énda énggito ro bero, nuwit roy Jasone brab de dumo no munur béréh Kristowe mangéy dob de méguléw béréh ni ingéd. Atin ménkes ro maro, "Wén i de étew réménimbur béréh kéluhanay de ingéd. Atin béleewe ni, ay ni ro énggégumah dob katome ni ingéd. ⁷ Atin i Jasone ni, fénbatién bero dob lawi ne. I kéluhana ruwe réménigo ro béréh békéne fatut dob kitabe tidéw dob Datu tome dob Roma. Non bénréh roy wén i ségiyo datu, sani féndawéte Jesus." ⁸ Amun énggelingoo roy ni kékéréh, ménrimbur i de médoow étew ménlimud brab de méguléw béréh ni ingéd. ⁹ Tidéw bénou, i de méguléw fénégés roy Jasone brab de dumo no mayad loo béréh adat ruwe inok métangéy ro. Tidéw bénou fénsut ro bero.

Dob Berea

¹⁰ Amun kélungononén, i de dumo ro munur béréh Kristowe, fénuwit roy Pablowe brab Silase mangéy dob ingéde féndawét Berea. Amun énggégumah ro diyo, ménangéy ro dob lawie féngadafay de Judio. ¹¹ Atin i de étew dob Berea, toow na fo fiyoy adat ruwe béréh de étew dob Tesalonika. Toow ro fo méuyot mégélingo béréh kétoro Pablowe. Atin

féganadé roy Ménsulate Kébérél i Tuluse sénga fuweh inok susiné ro ké toow i kétoro Pablowe. ¹² Atin médo ro ménwaléy munur bé Kristowe. Loo soy de Griego, do lagéy brab do libun do gérotor dob no ingéd. ¹³ Endob i de Judio dob Tesalonika, amun énggelingoo roy Pablowe muret bé kékérél i Tuluse dob Berea, ménangéy ro diyo brab rénimbur roy de médo étew diyo. ¹⁴ Mélaw i de munur bé Kristowe fénagayas ro fénuit i Pablowe mangéy dob féedoror i dogote, éndob ménbati i Silase brab Timoteowe dob Berea. ¹⁵ I de déménuran bé Pablowe ménodor ro de taman Atenas. Tidéw béno ménsefule ro mangéy Berea. Atin nuwit roy kékérél Pablowe dob ro Silase brab Timoteowe bé furay ro de magad.

Dob Atenas

¹⁶ I lala Pablowe ongot-ongot bero dob Atenas, toow fo ménbuku non médo foy de kéninontow dob no ingéd. ¹⁷ Mélaw i Pablowe ménsebérél bé de Judio brab de békén do Judio do méngintulus dob lawie féngadafan. Brab sénga fuweh ménsebérél-bérél so dob fadiyane bé de étew témara. ¹⁸ Ménsebérél soy Pablowe bé de maistéro témore bérél kégéitung i de Griego diyo féndawét Epikureo brab Estoiko. Atin ménbérél i de dumobero maro, “Ati bérél nan félangklangka étew énda i gétiga-tiga no?”

Atin bang i de dumobero maro, “Bérél no keeyén i de tulus dob de ségiyo ingéd.” Bénréh roy ni non nuret Pablowej fantage bé Jesuse brab kétébulee. ¹⁹ Mélaw nuwit roy Pablowe mangéy dob adafay de ménlimud do odoron, sani féndawét ruwe Areopayo brab ménbérél ro maro, “Méuyot gey gétigan fantag bé ni mantu kétoro bérél mo. ²⁰ Enda gésobuto key i de dumobero maro, “Ati bérél nan félangklangka étew énda i gétiga-tiga no?” ²¹ (Loo bé niy kékérél ruwe non i kéléhanay de étew dob Atenas brab de étew tidéw dob de ségiyo ingéd bati

diyo, méuyot ro mégélingo brab séuret-uret bé de mantu uret sénga tékélid.)

²² Mélaw téménindég i Pablowe dob téngaangay kéléhanay de odoron diyo ménlimud. Atin ménbérél mano, “Do étew dob Atenase ni, énggito gu toow gom fo mégéror méngadaf. ²³ Non amun ménugud-sugudu dob kagome ni ingéd brab téneigténg guy de gono kom méngadaf, énggito guy sébaane gono kom méngadaf témulak. Wén i sénulate de mano, ‘Dob ni, féngadafén i tuluse énda gélolono.’ I nan féngadafé kom fiyon fo ké énda gélolo gom de, Been i ni ureté ku begom. ²⁴ I Tuluse léménimbag bé duniyae ni brab kéléhanay éntingayéne. Been i Kadnay lawaye brab duniyae. Atin énda batién dob de lawi rénigoy kéilawane. ²⁵ Atin énda i éntingayén kailanga no géiray i étewe de tidéw dob de génalbéko no. Non Beeney méniraye bé kéuyage brab férénawawe dob kéléhanay de étew brab Been soy miraye bé kéléhanay éntingayéne kailanga tom. ²⁶ Tidéw dob ségétewe étew, rénigo noy kéléhanay de séségiyo-giyo do étew brab bénragarén betom dob duniyae ni. Atin Been i ménemilie bé de gai tom brab de gono tom bati. ²⁷ Réniyo noy ni inok i de étew sélédé roy Tuluse brab dob késéléd ruwe de, gito ro so keeyén. Endob i toowe, énda mérayu i Tuluse dob betome do étew. ²⁸ ‘Non tidéw dob Beeney kéuyag tome brab férénawa tome brab kégéagéw tome.’ Loo so bé niy bénréh i de dumobero maro, “Betome soy de ngaén.”

²⁹ Atin fentaus Pablowej kékérél ne mano, “Non betom i do nga i Tuluse, katom karangén de ké i falas i Tuluse loo bé falas i de kéninontow do bélowan taloo no do filak taloo no do batéw rénigoy kéilawane. ³⁰ Fendaya i Tulusey éndae kégéloy de étew de bé do gétah, brab énda kénukumén bero. Endob béléewe ni sénuguén i kéléhanay de étew dob kéléhanay de ingéd bé fatut ro gésénule bé de tete rigoné ro brab fatut tagaké ro. ³¹ Non fénemili i Tuluse nén i gaiwe ké

kukumé non i kéluhanay de étew dob duniyae ni bé toowe fo métintu. Atin i fékukumé nuwe Been i fénémili ne. Atin fénggélolo noy ni dob kéluhanay de étew bé kéfétébule ne de tidew bé kéléhu ne.”

³² I de dumō bé de étew diyo, amun énggelingoo roy kébérēh Pablōwe fantag bé kétēbulee, déniyangka roy Pablōwe. Endob i de dumō de ménbérēh ro maro, “Méuyot gey man mégélingo beem muret féruman fantag bé de ni.” ³³ Mélaw méntékédan i Pablōwe tidew dob de ménlimud ni do étew. ³⁴ Atin i de dumō bé de étew ni ménwaléy ro munur bé Jesuse brab nodoro roy Pablōwe. Ségétew beroy lagéye féndawét Dionisio, ségétew kéfédewan diyo. Brab ségétew so libun féndawét Damares brab wén soy do ségiyo do étew do ménunur.

18

Dob Korinto

¹ Amun énggilid i ni, méntékédan i Pablōwe dob Atenas brab ménangéy dob ingéde féndawét Korinto. ² Diyo énggabalaka noy ségétew Judio féndawét Akila tidew Ponto. Mantu séna énggumah tidew Italia beroy bawag ne féndawét Prisila, non i datue féndawét Klaudio, fentekéda noy kéluhanay de Judio diyo dob Roma. Atin nangéy Pablōwe bero lénangu. ³ Atin ménbati diyo non ségiléw i galbék ruwe Akilawé rémigo tulda. Brab ténabanga no bero gémalbék. ⁴ Sénga gai kétérén, ménangéy i Pablōwe dob lawie fengadafay de Judio, atin ménsebérēh bé de étew diyo inok i de Judio brab de békén Judio waléy ro géunur bé Kristowe.

⁵ Amun énggumah i ro Silase brab Timoteowe tidew Masedonia, éndaén gémalbék i Pablōwe saliyu bé kéuret ne fantag bé Jesuse. Nureténe dob de Judioy Jesusey Kristowe, sani fénémili i Tuluse méguléw. ⁶ Amun ménwaléy ro sébanil bé Pablōwe brab bénrého ro do tete, ténagtag Pablōwey de bubuk sébuwan dob kégal ne, brab ménbérēh mano, “Békénén

kagén aturan ké énda méfukas gom. Yamula do begom soy séndito kom de. Tidew béléewe ni mangéyun muret dob de békén Judio.” ⁷ Mélaw méntékédan diyo brab ménangéy batibati dob lawi i ségétew lagéy békén Judio méngintulus féndawét Titio Justo. Ménse doror i lawi ne dob lawie fengadafay de Judio. ⁸ Atin i lagéye féndawét Krispo, beeney méguléwe bé lawie fengadafan. I ni lagéy tintu fo ménunur bé Kadnane, loo soy kéluhanay de samungén. Atin wén i de médo do ségiyo étew dob Korinto énggelingoo roy Fiyowe Uret, brab ménunur ro brab ménfábautis ro.

⁹ Wén i no sébaan kélunganon, i Pablōwe wén i énggétéginefo no brab i Kadnane ménsebérēh de mano, “Kago mégilak! Fétausém i kéuret me. Fiyon fo ké ati mérigowe, kago térenon i galbék me. ¹⁰ Non démoyunu modor beem. Enda gésug-sug go non médooy de kagén étew dob ni ingéd.” ¹¹ Mélaw ménbati diyo bé rugay i ségébélintuwae bra nérmétérésang kélunganon téromo bé kékérēh i Tuluse.

¹² Amun ménwaléy gobernador i lagéye féndawét Galion dob Akaya, ménse limud i de Judio brab kénéfo roy Pablōwe brab nuwit ro dob adafay gobernadore ni inok kukumé no. ¹³ Atin bénréh ro maro, “I ni lagéy, feféngintulusé noy de étew bé békéne fatut dob kitab geye.”

¹⁴ Amun émbérérén damén i Pablōwe, ménbérēh i gobernador Galione dob de Judio mano, “Amuk tete i rénigo nuwe taloo no énda nodoro noy kukumay de Romano, fakay gétingkélo ku begom do Judio brab begén i kémukum de. ¹⁵ Endob i de ni funa kom de sébanil, been say fantage bé de dawét brab de kékérēh dob kagome kitab. Mélaw begom séden i kémukum de, non békén begén i kémukum de.” ¹⁶ Brab fentekéda no bero dob gonone ni kémukum. ¹⁷ Tidew bénó, kénéfo roy lagéye méguléw bé lawie fengadafay de Judio féndawét Sostenes brab lénubag ro dob téngaangay gonone kémukum.

Endob féndaya Galione saén, brab énda méntete i fédew ne de.

I késéfule ro Pablowe mangéy Antioquia

¹⁸ Amun ménggilid i ni, ménbati nay Pablowe dob Korinto bé ménfiroye gétérésangan. Tidéw béno, ménggétaw dob de dumo no munur bé Kristowe. Amun énggumah dob Senkrea, ménfétébungow non méntumanén i fasade rénigo no. Tidéw béno, ménda barko bero ro Prisila brab Akila mangéy Siria. ¹⁹ Amun énggumah ro dob Efeso, téngak Pablowe ro Akilawe brab Prisilawe atin ménangéy dob lawie féngadafay de Judio. Atin diyo ménsébéréh bé de Judio. ²⁰ Atin nongot ro dob beene ké férugay na bati dob berowe. Endob énda ménagayu no. ²¹ Yamula amun mégétawén, bénréhén bero mano, “Amuk kétayay Tuluse, séfuleu so mangéy dini.” Tidéw béno, ménda barko brab méntékédan dob Efeso.

²² Amun déménungu dob Sesaria ménangéy i Pablowe Jerusalem inok angéyé no ségifaén i de munur bé Kristowe diyo. Tidéw béno, méntaus mangéy Antiokia. ²³ Atin ménbati saén diyo bé ménfiroye géfadiyan. Tidéw béno ménagéwén man. Atin ménawét man dob de gonon dob sakuf i de ingéd féndawét Galasia brab Frigia brab fénégétén i kéunur i kéluhanay de kuyug Jesus diyo.

Fantag bé Apolose

²⁴ Atin wén i ségétéwe Judio féndawét Apolos tidéw Alejandria, énggumah dob Efeso. Toow fo fiyo muret brab tintu fo gétiga noy Mén sulfate Kébéréh i Tuluse.

²⁵ Méntoro fo bé fantage bé Agéwoy Kadnane. Atin toow fo émbagér i kéuret ne brab kétoro ne fantag bé Jesus. Katabuwan fo brab toow i kétoro ne, éndob i gétiga nuwe saén i kébautis Juane. ²⁶ Atin méngganay fébaraw émbéréh dob lawie féngadafay de Judio diyo, atin énggelingoo ro Akilawe brab Prisilawe. Mélaw nuwit ro mangéy dob lawi ruwe brab nuret ro dob beeney kéluhanay éndae séna

gétiga no fantag bé Agéwoy Tuluse.

²⁷ Tidéw béno, ménuyot i Apolose mangéy Akaya. Mélaw i de dumo no munur bé Kristowe dob Efeso, téngabanga ro atin séménulat ro dob de dumo ro munur bé Kristowe dob Akaya inok tayakufé ro ké gégumah diyo. Atin amun énggégumah i Apolose diyo, toow fo dakél i kétabang ne bé de étew do ménwaléy munur bé Kristowe sabaf bé kégédaw i Tuluse. ²⁸ Non tabanan i de Judio de ké séédél ro dob téngaangay de médoor étew. Non tidéw dob Mén sulfate Kébéréh i Tuluse fénggélolo noy Jesus, Beeney Kristowe.

19

I Pablowe dob Efeso

¹ Amun diyo i Apolose dob Korinto, i Pablowe ménawét dob de ingéd fingé dagé taman énggumah dob Efeso. Atin diyo énggito noy de dumoy de kuyug Jesus. ² Brab fénénginsaa no bero mano, “Amun munur gomén, aw énggumahén i Rémogor i Tuluse dob begome?”

Séménumbul ro maro, “Enda gétiga key de ké wén i Rémogor i Tuluse.”

³ Atin ménénginsa man i Pablowe mano, “Ati funa kome ménfábautis?”

Séménumbul ro maro, “Ménfábautis gey bé Juane inok fégito gey i kéunur geye bé kétoro ne.”

⁴ Atin ménbéréh man Pablowe mano, “I kébautis Juane, been i nan i fégéolonone bé kégésénule i de étew bé de sala ro. Atin bénréh Juane dob de Judio bé fatut ro munur bé étewé gégumah gétundug de, sani Jesus.”

⁵ Amun énggelingoo roy ni, ménfábautis ro inok fégito gey i kéunur ruwe bé Kadnane Jesus. ⁶ Atin téngé Pablowe bero atin énggumah i Rémogor i Tuluse dob berowe. Atin énggésébéréh ro bé de ségiyo késébéréh énda gétiga ro de brab nuret roy kébéréh i Tuluse. ⁷ Gédét ro folo bra ruwo gétew diyo.

⁸ Bé rugay i méntéléwe gétérésang kélunganon diyo, i Pablowe démoyunén mahur dob lawie féngadafay de Judio

brab ménsébérél bé de Judio diyo. Atin toow fo émbaraw muret émféunur bero bé kékéguléw i Tuluse. ⁹ Endob i de dumo bero toow fo métégas i de uléw ro, mélaw mika ro munur. Atin ménbérél ro na tete fantag bé Agéwoy Kadnane dob téngaangay kéluhanay de étew ménlimud. Mélaw méntrékédan i Pablwe diyo brab nuwitén i kéluhanay de kuyug Jesus. Atin fentausén i kétoro ne bero dob sékuwelahane ka Tiranowe sénga fuweh. ¹⁰ Atin téménoro diyo bé ménruwowe gébélintuwa. Mélaw i kéluhanay de étew bati dob Asia, do Judio brab do békén Judio, énggelingoo roy kékérél i Kadnane.

I de nga Eskeba

¹¹ Atin fénrigoy Tuluse do médo mékégaif i Pablwe. ¹² Fiyon i de munsala brab do tuwaliya nusar Pablwe, uwitén dob de démeriu atin waléy ro adi-adi brab i de saitan réménahuk dob de étew, ménraréy ro. ¹³ Atin wén i do Judio démoyun magéw brab do démedél saitan réménahuk dob de étew. Atin ténulama ro nusar i dawét i Kadnane Jesus fégédédél ro saitan. Ménbérél ro dob de saitan maro, "Dob dawét Jesuse sani ureté Pablwe, sugué key beem méraréy." ¹⁴ I de dumo bé de ni do lagéy réménigo bé de ni, been i de fitew gétew nga i ségétéwe gérotor fadi i de Judio féndawét Eskeba.

¹⁵ Endob dénawaay saitane bero mano, "Gélobo guy Jesuse brab Pablwe, éndob ati begoma nan?"

¹⁶ Tidéw bén, sénayaway lagéye bero rénahukoy saitane brab énda énggégaga ro bé ni lagéy. Atin lénubagén bero. Mélaw ménraréy ro tidéw dob lawi ne ménfali brab ménlékas ro. ¹⁷ Atin i kéluhanay de étew bati dob Efeso, do Judio brab do békén Judio énggelingoo roy fantag bé ni. Mélaw toow ro fo ménggilak. Atin ménumanan i kékantug i dawét i Kadnane Jesus. ¹⁸ Atin médo soy de munur bé Kristowe ménangéy dob téngaangay de étew atin ménemayag bé de tete rigoné ro. ¹⁹ Atin i de dumo

bero do béliyan nuwit roy de nusar ro do libro béliyan. Atin ténambak ro bero brab ténuwég ro dob téngaangay de étew. Atin bénilang ro ké firoy ilaga i de ni do libro, énggégumah limo folo ngibu dob karowe kurta. ²⁰ Atin loo bé niy kékélag i kékérél i Kadnane dob de étew diyo, brab minut médooy de étew munur de.

I kérimbure dob Efeso

²¹ Amun énggilid i de ni, ménuyot magéw i Pablwe mawét dob de gonon sakuf i de ingéd féndawét Masedonia brab Gresia mangéy Jerusalem. Brab ménbérél i Pablwe mano, "Amuk gégumahu dob Jerusalem, fatutu so mangéy Roma." ²² Endob fénétah Pablwey de ruwo gétew témabangan de ro Timoteo brab Erasto mangéy Masedonia. Atin i beene ménbati na dob Asia.

²³ Bé do no do gai, toow fo mégukét i de étew dob Efeso sabaf bé Agéwoy Kadnane. ²⁴ Diyo wén i ségétéwe lagéy fanday féndawét Demetrio, ménidot médo do étewen rémigo do kéninontow do filak. Atin i de ni kéninontow rénigo ro loo bé lawie féngadafan bé libune tulus ro féndawét Diana, atin féléléy ro brab gégédot ro de médo kurta. ²⁵ Tidéw bén, i ni fanday féndawét Demetrio ténawagén i kéluhanay de étewen rémigo do kéninontow beroy de dumo ro na géségléw galbék brab bénréhén dob berowe mano, "Gétiga kom i funa tome kawasa non bé ni galbék tom do rémigo kéninontow. ²⁶ Endob énggito gomén brab énggelingoo komén i rigoné Pablwe ni. Bénréhén dob de étew, i de tulus do rénigo tom békén kun tintu tulus. Atin médooy de étew énggégéunurén. Békén saén dob ingéd tome ni Efeso, éndob loo soy kéluhanay de ingéd dob Asia. ²⁷ Mélaw méninas keeyén i katome ni galbék sabaf bé nan kétoro, non émbérél tete i de étew fantag bé katome ni galbék. Brab saliyu na bé nan, tagakéy de étew moso i lawie féngadafa tom bé libune tulus Diana. Atin been i nan i funay

ménbantuge tulus Diana mékédan. Beeney féngadaféy kéluhanay de étew dob ingéde Asia brab dob duniyae ni, éndob éndaén mosoén fégadata ro de.”

²⁸ I de ménlimud do étew, amun énggelingoo roy ni, toow fo ménkérít ro brab ménkes ro maro, “Toow fo ménbantug i Dianahe sani tulus tome do tidew Efeso.” ²⁹ Tidew béo, rénimbur roy ingéde. Atin kenéfo roy ruwowe gétew lagéy tidew Masedonia ménodor bé Pablwe féndawéti Gayo brab Aristarko. Atin fénagayas ro nuwit mangéy dob dakéle lawi dob adafay de ménlimud do étew. ³⁰ Atin i Pablwe méuyot damén mangéy so dob adafay de ménlimud ni do étew. Endob i de dumo no munur énda fénagéw ro de. ³¹ Atin i de dumo bé de mékuléw dob Asia sani de dumo Pablo, ménféuwit ro kékéréd nongot ro so bé békén mangéy i Pablwe dob adafay de étew ni ménlimud. ³² Atin toow fo ménrimbur i kéluhanay de étew ni ménlimud atin kéluhana ro mékes séségiyo-giyoy béréréh ruwe, non i kédoono ruwe énda gétiga roy funa ruwe ménslimud. ³³ I de dumo bero marok Alejandrowey funa ruwe ménslimud non fentindég i de Judio dob adafay de étew. Atin i Alejandrowe séniniyasa noy de étew bé békén ro selekén inok émbéréd bé mamfil so dob berowe. ³⁴ Endob amun énggétiga ro Judio soy beene, ménkes ro séréngan bé ménruwowe géuras maro, “Toow fo ménbantug i Dianahe, sani tulus tome do tidew Efeso.”

³⁵ Tidew béo, i ségetéwe bé de mékuléw bé ni ingéd, fentanékén i de étew brab ménbéréd mano, “Do dumogu dob Efesowe ni, i kéluhanay de étew énggétiga ro dob Efesowe niy gonoy lawie féngadafan bé ménbantuge tulus Diana brab mékétéfuwe batéw ménlawu tidew dob lawayo. ³⁶ Enda i gédirung de. Mélaw kagomén mékérít taloo no rémigo gom tete bé éndae métayéw funa no. ³⁷ Nuwit gom diniy de étew ni fiyon fo ké énda mon ménénakaw ro dob de lawi féngadafan taloo no ménbéréd ro

tete fantag bé tulus tome Diana.

³⁸ Mélaw i Demetriowe beroy de dumo no fanday, amuk wén i téboé ro, fatut ro mangéy dob de kémukum bé fatute gai. Atin fakay témo ro diyo.

³⁹ Endob amuk wén nay ségiyo kétaya kom, fakay fétiyawa kom bé kéluhanay de étew sélimud begey do odoro kom.

⁴⁰ Non fakay betom i météboe bé ni késérimbur ménrigo béléewe ni. Brab énda gésélyah tom de non énda foy funa tom mérrimbur.” ⁴¹ Amun énggilid bénréhén i ni, fénuleén i kéluhanay de étew.

20

Dob Masedonia brab Akaya

¹ Amun éndaén sérimbur ro, fentawag Pablwey kéluhanay de munur bé Kristowe inok sélimud ro. Atin fénbagérén i de fédew ro bé kékéréd ne. Tidew béo, ménggétawén dob berowe brab ménagéw mangéy Masedonia.

² Nangeyén ténukaw i de ingéd diyo brab fénfiyo noy fédew i de munur bé de kétoroén. Atin ménlaus magéw taman énggumah dob Akaya.

³ Atin ménbati diyo télew gétérésang kélunganon. Amun magéwén damén mangéy Siria, énggelingoo noy bénantak i de Judio diyo féléhué ro. Mélaw ménsefule i Pablwe témará bé Masedoniawe.

⁴ Atin wén i de lagéy de ménodor ro Sopater nga Piro tidew Berea, ro Aristarko brab Segundo tidew Tesalonika, Gayo tidew Derbe, brab Timoteo, brab Tikiko brab Trofimo do tidew Asia.

⁵ I de ni do lagéy ménkah ro mangéy Troas atin nongot-nongot ro begey diyo.

⁶ Amun énggilid i kékandlione bé kékamae bé fane énda i fénggfééruk de, ménada gey barko tidew Filipos mangéy Troas.

Ménlimo gétérésangan tidew bé no, énggumah gey dob Troas atin diyo énggumaha key i de dumogu gey.

Atin ségefadiyan gey ménbati diyo.

Dob Troas

⁷ Bé sunguwe fuweh bé no fadiyan, ménslimud gey mama bé fane émfégétédem bé kéléhu Jesuse. Atin

i Pablowe ménuret toow fo mérugay énggumah kérara kélungonon, non magéw so bé démoe de. ⁸ Atin médooy de solo dob sibéye dob rotor i lawie gono key ménsélimud. ⁹ I nan sibéy, been i toowe fo gérotor dob lawie ni télew géandana i kégérotor ne. Wén i kénogo lagéy diyo féndawét Eutiko, ménasar dob faliluwangay gérotore ni sibéy. Endob énggéfidong i ni kénogo lagéy, non toow fo métah i uret Pablowe. Tidéw béno, ménlawu mangéy fantad tidéw dob gono nuwe ni ménasar brab ménléhu. Atin amun nangéy ro fénurut, énggito ro ménléhuén. ¹⁰ Endob ménlus soy Pablowe brab fénagayasén nangéy nékéf. Brab ménbéréh mano, "Kagom émbuku, méuyag so!" ¹¹ Tidéw béno, ménénik man i Pablowe brab sénkébeng-kébengén i fane atin ménama. Atin fénautasén i kékureto nuwe bero taman sémbangén i térsange. Tidéw béno, ménagéw i Pablowe. ¹² Atin nuwit i de étew mule i kénogo lagéye ni méuyag. Atin ménfiyoy de fédéw ro non ménuyag so.

Dob Mileto

¹³ Tidéw béno, ménésuway gey bé Pablowe dob Troas, atin ménanda gey barko mangéy Asos. Diyo nongot-nongot gey i Pablowe loo bé késugu ne begey, non ménuyot mémantad tidéw Troas mangéy Asos. ¹⁴ Amun énggéségitoy gey dob Asos, ménanda soy Pablowe dob barkowe, atin kéluhana key ménataus mangéy Mitilin. ¹⁵ Tidéw béno, ménangéy gey Kios bé démoe de. Atin bé gétunduge de fuweh énggumah gey dob Samos. Dob gétunduge de man fuweh énggumah gey dob Mileto. ¹⁶ Atin i Pablowe ménuyot de ké témara gey saén dob Efeso inok énda méanggaén dob Asia non toow fo magayas. Méuyot de ké gégumah dob Jerusalem bé gaiy Pentekostese, amuk fakay.

Ménggétaw i Pablowe

¹⁷ Mélaw tidéw Mileto, i Pablowe ménféuwit kékéréh mangéy Efeso

brab féntawagén i de odoroy de munur bé Kristowe diyo inok balaké ro. ¹⁸ Amun énggumah ronén, ménbéréh i Pablowe mano, "Enggétiga kom i kébati guwe dob begome tidéw fanay kégumah gu dob sakuf i ingéde Asia. ¹⁹ Atin gétiga kom rénigo guy galbék i Kadnane bé béno. Atin énda téfégérotoru, yamula kéménrewu sabaf bé kégédaw guwe begom. Atin téméningkélou bé kéluhanay de mérégén énggéagéwo ku bé de tete rénigoy de Judio dob begéne. ²⁰ Enda i sébaan dénígur gu bé funa kome fiyo dob de kétoro gu begom dob adafay médoowe étew taloo no dob de lawi gom. ²¹ Méégét i kékéréh guwe dob de Judio loo so dob de békén Judio bé fatut ro gésénule bé de sala ro atin munur ro bé Kadnane Jesus brab rigoné roy kétayay Tuluse. ²² Atin béleewe ni fénémanduooy Rémogor i Tuluse begén bé mangéyu Jerusalem. Atin énda gétuwa ku de ké ati mérigowe dob begéne diyo. ²³ Been say niy gétuwa kuwe, dob séngae ingéd nawéto ku, i Rémogor i Tuluse féningatén begén bé míférisuwu brab mérégén i géagéwo kuwe. ²⁴ Endob énda gulaané kuy umul guwe brab ulan den ké méléhuu, amuk géfégilid gu saén i galbéke niray i Kadnane Jesus begén, sani kékurete bé Fiyowe Uret fantag bé kégédaw i Tuluse.

²⁵ "Ménangeyu dob begome kéluhanan muret fantag bé kékéulgéw i Tuluse bé de étewén. Atin gétuwa ku béni, éndaén géségito tom man ségule.

²⁶ Mélaw bérhéku begom béleewe ni, amuk wén i ségetéw begom énda munurén bé Jesuse, békénén atura ku. ²⁷ Non nuret gun begom i kéluhanay kétayay Tuluse. ²⁸ Ingat gom brab diyaga gom i de lowoh gom loo soy de munur sénarig i Rémogor i Tuluse begom inok énda mékédan i de kékunur gom. Begom i maake témalima bé de bili-bili. Atin i de munur bé Jesuse beroy de maak do bili-bili. Atin i Tulusey gefee bé de

bili-bili sabaf bé kéléhu i Nga ne. ²⁹ Gétuwa ku, amuk tékédanun dini, wén i do gégumah do tugién témoro. Atin féteteé roy de fédew i de munur. ³⁰ Atin wén mosoy do étew tidew so dob begome ménlimud, émbéréh bé de tugi inok géuwito roy de munur dob békéne katabawan agéwon. ³¹ Mélaw ingat gom, brab kagom lifotén i de ténero gu begom kéluhanan, fuweh na kélungonon bé méntéléwe gébelintuwa. Atin toow fo kénrewo kuy kétoro guwe begom sabaf bé kégédaw guwe begom.

³² “Atin béleewe ni, sarigé ku begom dob Tuluse non tabanga no begom. Atin i kéuret guwe fantag bé kégédaw ne tabanga no so begom. Beeney émfébagére bé de kéunur gom, brab Been say miraye bé de kéfyonon loo bé rigoné nuwe dob kéluhanay de étewén. ³³ Enda méningaru bé éntingayéne kagom, fiyon filak, taloo no bélowan taloo no kégal. ³⁴ Gétiga kom i kégalbék guwe inok gédoté kuy kéluhanay kailanga keye begey i de dumo gu. ³⁵ Fénggito gu begom i kéluhanay de rénigo gu bé fatut mégéror tom inok gétabanga tom i de étew mérasay. Brab katom lifotén i kékéréh i Kadnane Jesus mano, ‘Toow na fo moror i étewe miray bé étewe médot.’”

³⁶ Amun énggilid i Pablowe émbéréh, ménlingkuwéd ro kéluhanan brab déménasal ro. ³⁷ Kéménrew ro kéluhanan brab nékéf roy Pablowe atin narék ro. Tidew bénou mènggétawén. ³⁸ Ménlabi foy kétete i fédew ruwe bé bénréh Pablowe bé éndaén kun gito ro de féruman. Tidew bénou, dénura ro mangéy dob barkowe édaa no.

21

I kégéw geye mangéy Jerusalem

¹ Amun énggégétaw geyén dob berowe, ménda gey brab méntaus gey mifar fééntang saréw dob bungéde Kos. Amun bé démoe de énggumah gey dob bungéde Rodas. Tidew bénou méntaus gey mangéy Patara. ² Diyo

énggito gey i sébaane barko mangéy Fenisia, mélaw ménda gey diyo. ³ Ménagéw gey taman énggékulaya key i bungéde Siprus, atin téménara gey saén mangéy de fingé déligdigan atin méntaus gey mangéy Siria. Atin déménunggu gey dob ingéde Tiro non fentefad roy de médo do uwit diyo. ⁴ Atin diyo énggito gey i de munur bé Kristowe, mélaw ménbati gey diyo ségefadiyan. Atin non fénémanduoy Rémogor i Tuluse bero, féngginau roy Pablowe bé békén taus mangéy Jerusalem. ⁵ Endob amun énggumahén i gaiwe magéw gey, méntékédan gey dob no inged. Atin i kéluhana ruwe dénura ro begey mangéy dob barkowe, bero soy de bawag ro brab de nga ro. Atin amun énggumah gey dob dénsaane, ménlingkuwéd gey kéluhanan brab déménasal gey. ⁶ Amun énggilid gey démasal, mènggétaw gey. Tidew bénou, ménda geyén man dob barkowe ni, atin ménule ro so kéluhanan.

⁷ Atin tidew Tiro méntaus gey magéw taman énggumah gey dob ingéde féndawét Tolemaida. Diyo énggito gey i de dumo gey munur bé Kristowe. Atin téménréen gey diyo ménsegétérésangan. ⁸ Dob gétunduge de fuweh, méntaus gey mangéy Sesaria. Amun énggumah gey diyo, ménbati gey dob lawi i ségétéwe lagéy muret bé Fiyowe Uret fantag bé Jésuse féndawét Filipi. Beeney ségétéwe bé de fitew gétew ménrugayén fénemili dob Jerusalem waléy tétabang. ⁹ Atin wén i do fot gétew do ngaén falan kénogon do muret so bé kékéréh i Tuluse. ¹⁰ Ménfiroy gétérésang tidew bé kégumah geye diyo, énggumah i ségétéwe lagéy tidew Judea féndawét Agabo. Beeney sénarigoy Tuluse muret bé kékéréh ne. ¹¹ Tidew bénou, ménfégédét dob begeye brab éndotén i sintoro Pablowe brab nikétén i de kaan sékéy brab de kémérén brab ménbéréh mano, “Ay niy bénréh i Rémogor i Tuluse mano, ‘I gefee bé ni sintoro ikétéy de Judio dob Jerusalem loo bé ni brab atéé ro dob de étew

békén Judio.' ”

¹² Amun énggélingoo key i ni, i beg-eye brab de dumo gey munur diyo ménfégédaw-gédaw gey bé Pablowe bé békén damén taus mangéy Jerusalem.

¹³ Endob i Pablowe séménumbul mano, “Sedek kémérew gom? Kagom fébukuén begén! Fakayun féikét dob Jerusalem brab fakayun méléhu sabaf bé Kadnane Jesus.”

¹⁴ Atin énda fo génaga gey i gémélée bé Pablowe. Mélaw téménréni gey gémélé de brab ménbérén gey makey, “Mérigo damén i kétayay Kadnane.”

¹⁵ Amun énggilid i firoye gétérésangan, téménifés gey atin méntaus gey mangéy Jerusalem. ¹⁶ Atin wén i do ménodor begey do munur bé Kristowe do tidéw Sesaria brab nuwit ro begey mangéy dob lawi i lagéye fébatio ro begey. Been i ségetéwe lagéy tidéw Siprus féndawét Mason. Beeney ségetéwe bé de toow fo énggétah do munur bé Kristowe.

Ténukaw Pablowy Santiagowe

¹⁷ Atin amun énggumah gey dob Jerusalem, i de dumo gey do munur bé Kristowe ménoror ro témayakuf begey. ¹⁸ Atin bé gétunduge de fuweh, i begeye Pablowe nangéy gey ténukaw i Santiagowe, sani odoroy de munur dob Jerusalem. Atin diyo soy kéluhanay de odoroy de munur bé Kristowe. ¹⁹ Amun gilid sénggifa Pablowe bero, nureténi i kéluhanay fénrigoy Tuluse de dob de békén Judio. ²⁰ Amun énggélingoo roy ni, dénayéw roy Tuluse. Atin bénréh ro dob Pablowe maro, “Gétiga mo adih, firoy ngibuy Judiowe ménunur bé Kristowe, atin toow fo nodoro roy de kukuman tidéw dob Moisese.

²¹ Enggélingoo roy fantage bé kétoro me kun dob kéluhanay de Judio bati dob de ségiyo ingéd beroy de békén Judio bé békén odoro roy de kukuma Moises. Brab bénréhém kun éndaén tulien i de nga ro taloo no odoron i adat i de Judio. ²² Ati mélaw i fatute rigoné tom? Non gélingoo ro sékoy fantage bé kégumah me dini. ²³ Mélaw

rido moy ni béréhé key beem. Wén i do fot gétew lagéy dini, réménigo ro fasad dob Tuluse loo bé adat tome do Judio. ²⁴ Mélaw odor go bero brab amung go bé adat i kéfelinise dob adafay Tuluse. Atin sukaya mo bero bé ni kéfelinis. Tidéw bénó, fétébungow ro loo bé adat tome do Judio. Mélaw fégito mo dob kéluhanay étewe bé odoro moy kukuma Moisese, inok gétiga ro kéluhanan bé békén toow i urete fantag bé beeme. ²⁵ Endob fantag man bé de étew do békén Judio do ménwaléy munur bé Kris-towe, sénulata key bero bé békén ro mama bé éntingayéne téulak dob de kéninontow, taloo no mama dara, taloo no mama bé éntingayéne énda ménsumbalién, taloo no ké bigaén ro.” Been i niy bénréh ro Santiagowe dob Pablowe.

²⁶ Mélaw dob gétunduge de fuweh, nuwit Pablowy de fot ni gétew do lagéy brab ménfelinis ro dob adafay Tuluse loo bé adat ruwe do Judio. Tidéw bénó ménahur dob lawi i Tuluse, atin fénngétiga no dob de fadi i gaiy kéfégilid i kéfelinise brab kéiray ruwe tulak bé de ni fot gétew lagéy.

I kékéfoé bé Pablowe

²⁷ Amun gédétén gilid i fitéwe gétérésangan, wén i de Judio tidéw Asia énggito roy Pablowe dob lawi i Tuluse. Atin rénimbur roy de étew ni ménlimud atin kénéfo roy Pablowe.

²⁸ Ménkes ro maro, “Do dumo gey do Judio, tabangan gey! Been i niy étewe démoyun magéw mangéy téromo dob kéluhanay de étew dob séngae ingéd bé békén odoro roy kukumane tidéw dob Moisese. Brab sébanil betom do Judio brab lawi i Tuluse. Atin saliyu na bé ni, ménuwit do békén Judio mahur dob lawi i Tuluse ni. Mélaw fénwaléyén mémérésik i méméfue ni gonon.” ²⁹ (Loo bé niy kébérén ruwe non énggito roy ségetéwe lagéy békén Judio féndawét Trofimo tidéw Efeso ménseodor bé Pablowe mangéy Jerusalem. Atin marok nuwit Pablowe mahur dob lawi i Tuluse ni.)

³⁰ Ménrimbur i de étew dob Jerusalem. Atin maak dunuk i étewe gégumah tidéw dob kéluhanay de gonon diyo. Kénéfo roy Pablowe brab génuyud ro mésut tidéw dob lawi i Tuluse. Tidéw béno, fénintu roy bengawane. ³¹ Amun télamané ro damén féléhuén, wén i ménangéye mélolok dob odoroy de sundalo tidéw Roma, bé mérimbur i kéluhanay étewe dob Jerusalem. ³² Sonom so béno, i odoroy de sundalo ni, nuvitén i de sundalo no ségéta mangéy dob gonoy de étew ni. Atin amun énggitoy de étew ni énggumah i de sundalo beroy odoro ruwe, ténréno roy kélubag ruwe bé Pablowe. ³³ Tidéw béno, i odoroy de sundalo ni, ménfégédét dob Pablowe brab kénéfoén. Atin fénikéténi bé de sundalo no bé ruwowe timan sangkali. Tidéw béno fénénginsaa no bero mano, “Ati ni étew? Ati rénigo nuwe?” ³⁴ Atin ménkes i de étew ni séségiyo-giyoy késumbul ruwe. Atin i odoroy de sundalo ni énda énggésobuto noy ni ménrigo non toow ro fo selekén. Mélaw fénuwitén i Pablowe bé de sundalo no mangéy dob kutae. ³⁵ Amun énggumah ron dob géday kutae, nénat i de sundaloy Pablowe non bé kékérit i de étew ni. ³⁶ Ménfuray i de étew ni mékes maro, “Féléhu gom!”

I kéuret Pablowe

³⁷ Amun gédét ron féahurén dob kuta i de sundalo ni, ménbéréh i Pablowe dob odoroy de sundalo ni mano, “Aw fakay gésébéréhu beem?”

Atin séménumbul i odoroy de sundalo ni mano, “Aw gétigan go wayo sébéréh Griego? ³⁸ Makuk beemey étewe tidéw Egipto méngganay bé késétibohe bé de gémamak kukuman. Atin ménanangguwit fot ngibu do méméléhu do étewén brab ménangéy ro batí dob gonone énda i do étew de batí.”

³⁹ Séménumbul i Pablowe mano, “I begéne, ségétewu Judio tidéw Tarsus dob Silisia, sani ménbantuge ingéd. Aw fakay so dob beeme ké góbéréhu dob de étew ni?”

⁴⁰ Atin ténungkas i odoroy de sundalo ni. Mélaw téménindég i Pablowe dob gédane brab séniniyasa noy de étew bé fétanék ro. Amun mémentanék ronén, ménbéréh i Pablowe dob Hébreewe, sani késébéréh i de Judio.

22

¹ Bang Pablowe, “Do dumo gu brab do lukés gu, fégélingo gom i bérhékuwe ni bé kéamfilo kuwe bé lowoh guwe.” ² Amun énggelingoo ro ménsebéréh dob karowe késébéréh, toow na fo ménantés ro. Atin fénautus Pablowej kóbéréh ne mano, ³ “I begéne, ségétewu Judio ménúmah dob Tarsus dob Silisia. Endob dob Jerusaleme ni ménruku. Atin ménngananadu dob toowe fo ménbantug témoreo féndawét Gamaliel. Atin toow fo ténoréen begén bé de adat tom do Judio loo bé kukumay de katufua tom. Atin toow fo ménuyotu modor bé kétayay Tuluse ségiléw so bé begome ni béléewe. ⁴ Fénrasay gu brab fénléhu guy de étew munur bé Jesuse. Atin kénéfo guy de lagéy brab do libun brab fénrisu gu bero. ⁵ I gérotore fadi brab kéluhanay de kékédéwan, góbéréh ro toow i ni bérhéku begom. Niraya ro begén sulat mangéy dob de dumotom Judio dob Damasko. Atin ménangéyu diyo inok kéroé kuy de munur bé Kristowe diyo, atin uwité ku damén dob Jerusaleme ni ikétén bé sangkalie inok kukumén ro.

⁶ “Endob amun géutuh téresang, diyou dob agéwone gédét dob Damasko. Atin mémentekow wén i réndaw tidéw dob lawayo mangéy dob begéne. ⁷ Sonom béno, ménngétéléngkébu dob fantade, atin énggelingoo kuy émbéréhe mano, ‘Saulo! Sedek ferasayé mo Begén?’ ⁸ Tidéw béno ménénginsau maku, ‘Ati beeme Kadnan?’ Atin séménumbul mano, ‘Bégéney Jesuse tidéw Nasaret, sani ferasayé muwe.’ ⁹ Atin i de dumogu ménodor begén, énggitoy ni réndaw éndob énda énggelingoo roy bérhéni ménsebéréh begén. ¹⁰ Atin fénénginsaa ku maku, ‘Kadnan, ati fatute rigoné ku?’ Atin séménumbul

i Kadnane mano, ‘Tindég go brab taus go mangéy Damasko. Atin diyo wén i étewé béréhé no dob beemey kéluhanay kétayay Tuluse rigoné mo.’ ¹¹ Bé béo so, ménwaléy langafén non bé réndawe ni énggito gu. Atin narak i de dumo gu begén taman énggumah gey dob Damasko.’

¹² Atin féntaus Pablowey kékéréh ne mano, “Atin diyo wén i ségétéwe lagéy féndawét Ananias. Toow fo méngrintulus brab toow fo nodoro noy de kitab tom. Atin tintu fo fénggadata noy kéluhanay de Judio bati diyo. ¹³ Atin ménangéy dob begéne brab ménbéréh mano, ‘Saulo, dumo gu, gérito gonén!’ Sonom béo, énggítowu man atin ténéngténg gu. ¹⁴ Atin ménbéréh man mano, ‘I Tuluse, fénéngadaf i de katufua tom, fénémilién beem inok gétigan i kétaya nuwe, brab inok giton i métintuwe sugu-sugué no féndawét Jesus, brab inok gélingoon i kékéréh ne. ¹⁵ Non waléy go muret dob kéluhanay de étew fantag bé Kristowe émbéréh bé énggito muwe brab énggelingoo muwe. ¹⁶ Atin béleewe, kagonén téangga-angga. Tindég go brab fébautis gon, brab dasal go dob Kadnane. Atin i de salaém mékédan.’”

¹⁷ Atin féntaus Pablowey kékéréh ne mano, “Tidew béo ménsefuleu mangéy Jerusalem. Atin amun déménasalu dob lawi i Tuluse, wén i fénggitoy Tuluse begén. ¹⁸ Enggito guy Kadnane brab ménbéréh dob begéne mano, ‘Fagayas go, tagakém i Jerusaleme ni, non i de étew dini énda tayakufé roy kéuret me fantag bé Begéne.’ ¹⁹ Atin séménumbulu maku, ‘Kadnan, gétiga roy démoyune kéagéw gu mangéy kémfo brab lémubag bé de munur Beem dob de lawi féngadafa ro. ²⁰ Atin amun féléhué roy Estebane sani ségétéwe muret fantag bé Beeme, diyou de so ménagayun de. Begén i ménantay bé de kégal i de ménméléhu de.’ ²¹ Endob ménbéréh i Kadnane dob begéne mano, ‘Agéw go. Sugué ku beem mangéy mérayu dob de békén Judio.’”

²² Atin amun bénréh Pablowey ni fantag bé de étew békén Judio, éndaén mégélingo i de étew de. Atin ménkes ro toow fo métanug maro, “Féléhu gom, énda médait méuyag i ni étew.” ²³ Atin ménkes ro, brab sénawér roy de bubuk sébuwan mangéy rotor bé kékérit ruwe brab kénda roy de dumo bé de kégal ro brab nafir ro dob rotor. ²⁴ Mélaw i odoroy de sundalo ni, fénuwitén i Pablowe mahur dob kutae ni, brab sénuguén i de sundalo no bé basadé ro inok gébérého noy ati rénigo nuwe, sani funay de Judio ni mékes brab mékérít. ²⁵ Endob amun nikét roy Pablowe inok basadé ron damén, ménbéréh i Pablowe dob ségétéwe kafitan mano, “Aw fakay basadén i ségétéwe Romano fiyon fo ké énda séna ménkukumén ménsala?”

²⁶ Atin amun énggelingoo kafitaney ni bénréh Pablowe, ménangéy dob odoroy de sundalo brab ménbéréh mano, “Ati rigoné muwe? I ni étew ségétew wayo Romano.”

²⁷ Mélaw i odoroy de sundalo ménangéy dob Pablowe brab ménénginsa mano, “Aw Romano go wayo?”

Séménumbul i Pablowe mano, “Hoo.”

²⁸ Atin ménbéréh i odoroy de sundalo ni mano, “I begéne, Romanowu so. Brab dakél i énggabayada kuwe inok waléy Romano.”

Atin ménbéréh man i Pablowe mano, “Endob i begéne, ménnumahu ségétew Romano.”

²⁹ Sonom béo, i de sundalo ni madasén damén bé Pablowe énggésunud ro. Atin i odoroy de sundalo ni toow fo ménggilak non fénikétén bé de sangkali i ségétéwe so Romano.

Dob adafay de kéfédéwan

³⁰ Atin i odoroy de sundalo ni ménuyot de ké gétiga noy funay de Judio ni témo béo Pablowe ni. Mélaw bé géttunduge de fuweh, fénkéda noy de sangkali fénggékét ro bé Pablowe. Atin sénuguén i de odoroy de fadi

brab kéluhanay de kéfédéway de Ju-dio sélimud. Tidéw béno, nuvitén i Pablowe brab féntindégén dob adafa ruwe ménlimud.

23

¹ Atin ténéngténg Pablowej de ménlimud ni brab ménbéréh mano, “Do dumō gu Judio, toow fo fiyoy fédéw guwe dob adafay Tuluse fantag bé de rénigo gu taman so béleewe ni.” ² Tidéw béno, i gérotore fadi féndawét Ananias, sénuguén i de étew téménindég gédét dob Pablowe bé tamfilingé roy ba ne. ³ Atin ménbéréh i Pablowe mano, “I beema nan ubo-ubo go méngintulus! Tamfilingéy Tuluse so moso beem. Kukumé mo begén dob kitabe éndob rénigo moy éndae fakay dob kitabe bé kéfétamfiling me begén.”

⁴ Tidéw béno, ménbéréh i de étew gédét dob Pablowe maro, “Sedek émbéréh go tete loo bé nan dob gérotore fadi i Tuluse?”

⁵ Séménumbul i Pablowe mano, “Do dumō gu, énda gétuwa ku de ké beeney gérotore fadi. Amuk énggétiga ku, énda damén fémalané ku de. Non bénréh i Ménstable Kébéréh i Tuluse mano, ‘Kago émbéréh tete fantag bé odoro kome.’”

⁶ Atin amun énggito Pablowej de dumō do lukés Saduseo brab de dumō do Fariseo, féntanugén ikébéréh ne dob de ménlimud do odoron mano, “Do dumō gu, i begéne, ségettewu Fariseo brab i de lukés gu do Fariseo so. Mékukumu béri sabaf bé kéunur guwe bé kétébule i de ménléhu.”

⁷ Amun énggilid bénréh Pablowej ni, méngganay so séédél i de Fariseo brab de Saduseo, atin ménsebaad ro.

⁸ (Non i de Saduseo énda munur ro bé kétébulee, taloo no munur ro bé wén i do téaki taloo no do rémogor. Endob i de Fariseo munur ro bé kéluhanay de ni.) ⁹ Atin minut métanug i kékékes ruwe. Atin i de dumō bé de téromo kitab do Fariseo, téménindég ro brab émbagér i kébéréh ruwe maro, “Enda i funa key kémukum bé ni lagéy. Wén keey i rémogor taloo no téaki tintu ménsebéréh de.”

¹⁰ Atin minut toow fo méduf i késéédél ruwe ni. Atin i odoroy de sundalo ni, mégilak de ké mébinasay Pablowe ni. Mélaw sénuguén i de sundalo no mangéy dob kérara i de ménlimud étew brab nuwit roy Pablowe séfule mangéy dob kutae.

¹¹ Dob gétunduge de kélungonon, téménindég i Kadnane dob séku-lo Pablowe brab ménbéréh mano, “Fébaraw go. Nuretém i fantage bé Begéne dob Jerusaleme ni. Atin fatut mangéy go so muret dob Roma.”

I bantak i de Judio

¹² Atin bé géfuwéne de, wén i de dumō Judio ménslimud ro inok géséfagayun ro bé ati rigoné ruwe. Atin ménsefasad ro bé énda mama ro taloo no miném taman énda géféléhuo roy Pablowe ni. ¹³ Labi fot folo gétew i réménigowe bé ni. ¹⁴ Tidéw béno, ménangéy ro dob de odoroy de fadi brab dob de odoroy de Judio brab ménbéréh ro maro, “Séménafa gey bé énda mama gey taman énda géféléhuo key i Pablowe. ¹⁵ Mélaw ay niy rigoné tome. I begome brab de kéfédewan, féuwt gom kékéréh mongot dob odoroy de sundalo tidéw Roma bé uwité noy Pablowe mangéy dob begome. Atin ubo-ubo toow fo méuyot gom ménginsaan bé Pablowe. Endob i begeye bonoé key dob de agéwon.”

¹⁶ Endob i lagéye nga i libu Pablowe énggelingoo noy ni bantak ro. Mélaw ménangéy dob kutae brab fénlolokén i ni dob Pablowe. ¹⁷ Tidéw béno i Pablowe, ténawagén i ségettewu bé de sundalo brab ménbéréh mano, “Uwitém i ni kénogo lagéy mangey dob odoro kome. Non wén i bérhé no de.” ¹⁸ Atin nuwit i sundalowey ni kénogo lagéy mangey dob odoro nuwe brab ménbéréh dob odoro nuwe mano, “Féntawag i férisuwe Pablo begén brab féndura no begén i ni kénogo lagéy non wén kun i bérhé no beem.”

¹⁹ Tidéw béno, narak i odoroy de sundaloy ni kénogo lagéy brab ménférayu ro inok ruwo ro saén.

Tidéw béno, fénénginsaa no mano, “Ati no béréhé mo begén?”

²⁰ Atin séménumbul mano, “I de odoroy de Judio ménséfagayun ro bé ongoté ro dob beemey féuwitém démo i Pablowe mangéy dob de ménlimud do kékédewan. Ubo-ubo saén fénginsaa roy Pablowe inok méuman i gétiga ruwe fantag bé beene. ²¹ Endob kago magayun bé nan. Non wén i labi fot folo gétew do lagéy rékunéy dob de agéwon inok bonoé ro. Séménafa ro bé énda kun mama ro taloo no miném ro taman énda géféléhuo roy Pablowe ni. Ténafaya ron béleewe ni brab ongoté ro séden i kaame kékagayun.”

²² Atin séménumbul i odoroy de sundalo ni mano, “Kago uretén i ni bénréhém begén dob de ségiyo.” Tidéw béno, fénuleén i ni kénogo lagéy.

Sénugu i Pablowe mangéy dob Felikse

²³ Tidéw béno, i odoroy de sundalo ni, téménawag ruwo gétew kafitan brab bénréhén bero mano, “Tafay gom ruwo ratuh sundalo, brab fitew folo do kuda brab do sundalo kémudaan bero, brab ruwo ratuh do sundalo muwit dilék inok magéw ro mangéy Sesaria alas siyow séko bé ni kékungonon. ²⁴ Atin tafay gom soy kudae kudaa Pablowe brab uwit gom mangéy dob Gobernadore Feliks. Ingata kom fo toow inok énda gésug-sugén.” ²⁵ Tidéw béno, séménulat i odoroy de sundalo ni mano, ²⁶ “Ay niy sulate tidéw dob Klaudio Lisiase mangéy dob Gobernador Felikse. Fiyo térésang. ²⁷ I ni lagéy kénéfo i de Judio brab féléhué ron damén. Endob amun énggétiga ku ségetéw so Romano, fénanangguwit guy de sundalo gu brab nangéy gey ténabang. ²⁸ Atin tidéw béno, ménuyotu de ké gétiga kuy funa ruwe de témbo. Mélaw nuwit gu mangéy dob de ménslimud do témiawan. ²⁹ Atin bé béno, énggétiga ku énda i tete rénigo no, funa ro de méméléhu taloo no férisunén. Fantag saén bé de kitab roy funa ruwe de témbo. ³⁰ Amun énggétiga kuy bénantak i de Judio bé féléhué

ro, fénagayas gu fénuit mangéy dob beeme. Atin bénréh gu dob de témbo de bé mangéy dob beeme mélolok bé kéluhanay funa ruwe de témbo.”

³¹ Amun fénggilid i odoroy de sundaloy sulat ne, nodoroy de sundaloy sugu ne. Mélaw nuwit roy Pablowe mangéy Antipatris bé no kékungonon. ³² Bé gétunduge de fuweh ménsefule i de ménagéw saén do sundalo mangéy Jerusalem. Endob i de sundalo do kémuda, beroy déménurane bé Pablowe taus mangéy Sesaria. ³³ Amun énggumah ro dob Sesaria, fénira-ira roy Pablowe dob gobernadore brab niray ro soy sulate. ³⁴ Atin bénasay gobernadorey sulate ni. Tidéw béno, fénénginsaa noy Pablowe ké ati ingéde tidéwo no. Atin séménumbul i Pablowe mano, “Tidéwu Silisia.”

³⁵ Atin ménbérh i gobernadore mano, “Fégélingoé ku beem dob gaiwe gégumah i de témbo beem.” Tidéw béno, fénbantaya noy Pablowe dob lawie fénrigo télate Datu Herode.

24

I kétébo i de Judio bé Pablowe

¹ Ménlimo gétérésangan tidéw béno, i gérotore fadi fénawet Ananias ménangéy Sesaria beroy de dumo no odoroy de Judio brab ségetéwe gétigan bé kitab i de Romano fénawet Tertulo. Ménangéy ro dob adafa Felikse, sani gobernadore, inok téboé roy Pablowe. ² Atin i Felikse, amun fentawagén i Pablowe, fénbérhén i Tertulowe. Mélaw féngganaya noy témboe bé Pablowe mano, “Gobernador Feliks, toow fo fégadate key beem. Atin fiyoy kékéguléw me non i gaiy kaame kékéguléw énda sénay ménstiboh de. Atin médooy de rénigo mo fiyo inok minut waléy fiyoy ingéd tome ni. ³ Atin sabaf bé ni, toow fo moror gey de brab fésalamat gey kéluhanan dob beeme sénga tékélid. ⁴ Endob inok énda kékébuwan go méangga, éndaén férugayé kuy kékérh guwe. Mélaw fégédawan gey brab fégélingoén gey fiyon magad

saén. ⁵ Enggétiga key i Pablwe ni toow fo samuk non rénimburén i de Judio dob kéluhanay de ingéd dob duniyae ni. Atin beeney odorone bé ségékla wi kefengintulus fédawéti Nasareno. ⁶ Atin ténlama no fénwaléy mékérésik i mékétéfuwe lawi i Tuluse, bé rénigo nuwe liyén. Mélaw kénéfó gey brab kukumé key damén dob kageye kitab. ⁷ Endob i odoroy de sundalo fédawéti Lisiás nangeyén nafas dob begeye bé lala geye de ménfélubag. ⁸ Tidéw béno, bénréhén begey bé angéyé key kun téboén i ni étew dob beeme. Atin amuk fénginsaa moy ni lagéy, gétiga moy kéluhanay funa keye de témbo.” ⁹ Tidéw béno, i de Judio ménamung ro so témbo brab bénréh roy toow i de bénréh Tertulo ni.

I kéamfilo Pablwe bé lowoh ne

¹⁰ Tidéw béno, i gobernadore fénbéréhén i Pablwe. Atin ménbéréh i Pablwe mano, “Gétiga ku toow gon fo ménrugay kémukum dob ni ingéd brab gétigan go odoro key do Judio. Mélaw toowu fo moror émbéréh bé kéamfilo kuwe bé kagéne lowoh dob adafa muwe. ¹¹ Ménfolo bra ruwo gétérésang saén i kégumah guwe dob Jerusaleme ni inok ménfélubag. Fakay go méngrinsa dob de ségiyo étew inok toow fo gétiga moy ni. ¹² Atin i de Judio, énda énggitro begén méniséédél bé de étew dob lawi i Tuluse taloo no rénimbur guy de étew dob de lawi féngadafan taloo no dob ségiyowe ingéd dob Jerusaleme. ¹³ Atin énda i fefégitro émféféngintoow bé kétébo ruwe begén. ¹⁴ Endob fayagé ku beem i kífengadaf guwe bé Tuluse fénengadaf i de katufua key bé kéodor guwe dob Agéwo Kristowe. Been i niy bénréh i de étew ni békén toow kífengintulus. Endob munuru so bé kéluhanay de kitab sénulat Moisese brab kéluhanay sénulat i de méntelata do sénarigoy Tuluse muret bé kóbéréh ne. ¹⁵ Ségiléw so bé de ni étew témbo begén, munuru so bé kétébule i Tuluse bé de ménléhu, do fiyo étew loo soy de tete étew. ¹⁶ Atin mélaw

démoyunu toow fo témélama rémigo fiyo dob adafay Tuluse brab dob adafay de étew inok énda i sala gu.

¹⁷ “Amun dob ménfiroye gébélintuwa énda ménbatiu dob Jerusalem, ménféluleu mangéy diyo inok uwité kuy kurta i de dumo gu Judio brab inok témulaku. ¹⁸ Atin been i niy rénigo guwe bé kégito ruwe begén dob lawi i Tuluse, amun gilidu ménfélins dob adafay Tuluse loo bé adat geye. Enda toow médooy étew dumo gu diyo brab énda i rénimbur gu diyo. ¹⁹ Endob wén i de Judio énggumah diyo do tidéw Asia. Bero damén i mangéy dob beeme témbo begén amuk wén i funa ro begén témbo. ²⁰ Taloo no fénbéréhén i de étew ni ménangéy dini ké ati salae énggitro dob begéné bé kédini guwe dob adafay de ménlimud do Judio do sétiawan, ²¹ saliyu bé sébaane bénréh gu métanug amun diyou dob adafay ruwe maku, ‘Kukumé kom begén non munuru bé kétébule i de ménléhu.’ ”

²² Atin i Gobernador Felikse, toow fo gétiga noy fantage bé Agéwo Jesuse, mélaw téménréni kémukum. Atin ménbéréh mano, “Fégilidé kuy kékukum guwe amuk gégumah i Lisiase sani odoroy de sundalo tidéw Jerusalem.” ²³ Atin sénuguén i kafitane bé bantaya noy Pablwe, éndob niraya no so kuwagib i Pablwe rémigo bé kétaya nuwe. Brab ténungkasén soy de dumo Pablo magifat de.

²⁴ Amun énggilid i firoye gétérésangan, ménféluleu mangéy diyo i Felikse brab bawag ne Drusila ségétew libun Judio. Atin fentawag roy Pablwe brab fénggelingo roy kúret ne fantag bé kénur ne bé Jesu Kristowe. ²⁵ Endob amun fentaus Pablwey kúret ne fantag bé ménféluleu kífaguyag brab kédigire bé de tete kétayan brab gaiwe gégumah i kékukum i Tuluse, ménwaléy méngrinsa i Felikse. Mélaw ménbéréh mano, “Fakay gon séfule brab fétawagu man beem kí wén i gai gu.” ²⁶ Atin i dob fédew Felikse ni, mano kí iraya Pablwe kurta. Mélaw

féntawagén médoor gule inok séuret-uret de.

²⁷ Amun énggilid i ruwowe gébelintuwa, békénén Feliks i gobernadore. Endob i Felikse ménuyot de ké mésuwat i de Judio de, mélaw féndayaén i Pablwe dob férisonone. Atin i ménwaléye gobernador i lagéye féndawét Porsio Festo.

25

I Pablwe brab Festowe

¹ Amun énggilid i téliséwe gétérésangan tidew bé kégumah Festowe dob sakuf i Judea, ménagéw tidew Sesaria atin ménangéy Jerusalem. ² Atin i de odoroy de fadi brab de odoroy de Judio ménangéy ro dob beene brab nuret ro diyo i funa ruwe téménébo bé Pablwe. ³ Atin ménfégédaw-gédaw ro dob Festowe ni bé féuwitén i Pablwe mangéy Jerusalem, non bénantak ro féléhuén dob de agéwon. ⁴ Séménumbul i Festowe mano, "I Pablwe ménférisu dob Sesaria, atin séfuleu so magad mangéy diyo. ⁵ Mélaw i de odoro kom fatut ro modor begéen mangéy Sesaria brab tébo gom i nan étew ké wén i tete rénigo no."

⁶ Atin i Festowe ménbaati na dob berowe bé ménlabiwe ségefadiyan. Tidew béno ménsefule mangéy Sesaria. Atin bé gétunduge de fuweh, ménangéy mésar dob gono nuwe kémukum brab séménugu bé uwitén i Pablwe mangéy dob adafa nuwe.

⁷ Amun énggégumah i Pablwe, i de Judio tidew Jerusalem téménindég ro géliwét de, brab bénréh roy kéluhanay gétimale fo kétébo ro de. Endob énda i toow géfégito ro bé kétébo ruwe de. ⁸ Endob i Pablwe bénréhén i kéamfilo nuwe bé lowoh ne mano, "Enda i rénigo gu tete dob kitab geye do Judio, taloo no réménigou tete sébanil bé lawi i Tuluse, taloo no dob toowe fo gérotor datu dob Roma."

⁹ Endob i Festowe méuyot de ké mésuwat i de Judio de, mélaw fénénginsaa noy Pablwe mano, "Aw méuyot go mangéy Jerusalem inok

diyo kukumé ku beem ké toow i de kétébo ro beem?"

¹⁰ Séménumbul i Pablwe mano, "Ay niy gono muwe kémukum, non wén i kuwagibém tidew dob toowe fo gérotor datu dob Roma. Atin ay niwu dob adafa muwe brab beem i fatute kémukum begén. Enda i rénigo gu tete dob de Judio brab fiyon i beeme gétiga moy ni. ¹¹ Amuk wén i rénigo gu tete dob kitabe atin fatutu féléhuén, énda méuyotu méraréy. Endob amuk énda toow i kéluhanay kétébo i de Judio begén, éndaén fatutu iray dob berowe. Ongoté ku dob beeme bé mangéy dob adafay toowe fo gérotor datu dob Roma inok been i kémukume begén. Non ségetéwu so Romano, brab wén i kuwagib gu mélukum dob adafay datue dob Roma."

¹² Tidew béno, ménsebéréh i Festowe dob de dumo no témabang. Amun énggilid, ménbéréh dob Pablwe mano, "Amun nongotém i mangéye dob adafay datue dob Roma, mélaw uwitén go mangéy diyo."

I Pablwe brab Agripawe

¹³ Amun ménngélfas i firoye gétérésang, énggumah i datue féndawét Agripa brab bawag ne féndawét Bérénis dob Sesaria. Nangéy ro ténukaw i Festowe diyo. ¹⁴ Amun ménfiroy ron gétérésang énggumah diyo, nuret Festowe dob Agripahey fantage bé Pablwe mano, "Wén i ménférisuwe lagéy dini bé Feliks sénay mélukum de. ¹⁵ Amun ménangéy Jerusalem, i de odoroy de fadi brab de odoroy de Judio, ténébo ro dob begéne atin nongot roy féléhuén. ¹⁶ Endob bénréh gu dob berowe bé békén adat tom Romanoy matée bé ségetéwe étew ménébo ké énda séna énggésétengaang roy de témbo de taloo no énda séna méniraya no gai mamfilon bé kaane lowoh. ¹⁷ Atin amun ménangéy ro dini, fénagayas gu so bé démoe de féntawag dob gono kuwe kémukum i ni lagéy. ¹⁸ Amun énggésétengaang ron, téménindég i de téménébo de brab ménbéréh ro. Endob énda wayoy tete

rénigo no funa ro de téombo. ¹⁹ Endob i funa ruwe saén séédél i fantage bé kékéngintulus ruwe brab fantag bé ségétewe lagéy féndawét Jesus. Ménléhuén i ni étew éndob i Pablowe bénréhén méuyag kun. ²⁰ Bé bénou, énda gétiga kuy fiyowe kétiyawa ku bé ni, mélaw fénénginsaa kuy Pablowe ké méuyot mangéy Jerusalem atin diyo kukumén. ²¹ Endob i Pablowe nongotén bé bantayan brab mangéy dob adafay datu tome dob Roma inok been i témiyawane de. Mélaw fénséfule gu man dob férisonne taman énda séna géfieuwito ku de mangéy dob datue dob Roma.”

²² Atin ménbérén i Agripahe dob Festowe mano, “I begéne so, Méuyotu ké gélingoo kuy nan lagéy.”

Atin séménumbul i Festowe mano, “Fégingoém fo démo.”

²³ Amun bé démoe de, éngumah i ro Agripahe brab Berenise, beroy de odoroy de sundalo brab do gérotor étew dob no ingéd. Atin toow fo fégadatan ro ménahur dob gonone kékum. Atin i Festowe séménugu bé uwitén i Pablowe mangéy dob dakélé ni sibéy. ²⁴ Brab ménbérén i Festowe mano, “Datu Agripa brab do kéluhanan kom dini, ay niy lagéye ténebo i kéluhanay de Judio dob begéne, dini brab dob Jerusalem. Brab mékes ro énda kun médaitén méuyag. ²⁵ Endob énda mon i énggito gu de funan de méméléhu. Atin amun nongotén i mangéye dob toowe fo gérotor datu tom dob Roma, ménuyotu de ké féuwit mangéy diyo. ²⁶ Endob énda i gétiga ku sulaté ku mangéy dob datu tome fantag bé ni étew. Mélaw Datu Agripa, fén-angéy gu dob adafa muwe beroy kéluhanay ni étew inok amuk gilid énggésusino komén, wén i gésulata ku mangéy dob datue dob Roma. ²⁷ Non gétiga ku bé békén fatut féuwit i ségétewe férisu mangéy dob datue dob Roma ké énda i féodorén de kétébo de.”

26

¹ Atin ménbérén i Agripahe dob Pablowe mano, “Tungkasé ku beem

émbéréh bé kéamfilo muwe bé lowoh me.”

Atin bémenter Pablowej de kémérén bé kékérbéréh ne mano, ² “Datu Agripa, toowu fo moror béléewe non gébérého ku beem i kéamfilo kuwe bé lowoh guwe fantag bé kéluhanay de kétébo i de Judio begén. ³ Non toow fo gétiga moy kéluhanay de adat tom do Judio brab de funa tom séédél. Mélaw ongoté ku dob beeme, kago mératér mégélingo begén.

⁴ “Gétigay kéluhanay de Judioy kagéne adat tidew fanay kékloh gu dob kagéne ingéd loo so dob Jerusalem.

⁵ Ménrugayén énggétiga ro begén, brab géfayaga ro toow i ni ké kétaya ro, ségétewu toow fo méngintulus mamung dob de Fariseo modor fo toow bé de kitab tom. ⁶ Atin béléewe ni kukuménu non bé inam guwe, sani késarig guwe bé fénasad i Tuluse bé de katufua key. ⁷ Been soy ni fasade ongot-ongotéy kéluhanana tome do Judio, do sénaar dob foloe bra ruwo gétribo, non wén soy inam ro de. Mélaw méngintulus ro fuweh na kélunganon. Atin sabaf bé ni inam gu o Datu, ténebo i de Judio begén. ⁸ Endob sedek toow fo mérégén i kéunur gome bé kékérbéléule i Tuluse bé de ménléhu?”

⁹ Atin féntaus Pablowej kékérbéréh ne mano, “Atin fiyon i begéne, bé gétahé makuk fatut rigoné kuy kéluhanay sébanile bé de étew munur bé Jesuse tidew Nasaret. ¹⁰ Atin bé gétaho, been i niy rénigo guwe dob Jerusalem. Atin ménodotu kuwagib tidew dob odoroy de fadi atin médooy fénrisu guwe bé de munur bé Tuluse. Brab amun kukumén ronén bé féléhuén ro, ménagayunu de so. ¹¹ Atin médooy gule ménangéyu dob de lawi féngadafan inok férasayé ku bero. Atin ténulama gu bero fénégés démirung bé kéunur ruwe bé Jesuse. Atin bé kékérit guwe bero ménangéyu dob de ségiyo ingéd inok férasayé ku bero diyo.

¹² “Been i nan i funa kuwe ménangéy Damasko, non tidew dob de odoroy de fadi, wén i kuwagib

gu kémfo bé de munur bé Jesuse diyo. ¹³ Atin, Datu, amun diyou dob de agéwon mangéy Damasko bé géutuhe térésang, énggito guy réndawe toow na fo géfékaya tidéw bé térésange, tidéw dob lawayo mangéy dob begéne brab dob de dumo gu. ¹⁴ Atin kéluhana key énggétéléngkéb dob fantade. Atin énggelingoo kuy émbéréhé ménsebéréh begén dob késébéréh tome Judio mano, ‘Saulo! Sedek férasayé mo Begén? Beem soy kérégénane bé nan rigoné mo non maak ayam go séménifa sabaf bé kédédél i gefee beem.’ ¹⁵ Tidéw béno ménenginsau maku, ‘Ati Beeme, Kadnan?’ Atin séménumbul mano, ‘Begéney Jesuse sani férasayé muwe. ¹⁶ Tindég go! Mémentefégitowu dob beeme inok beemey fémilié kuwe waléy sugu-sugué ku. Uretém dob de étew i kégito muwe Begén béléewe ni brab de féténgténg gu beem moso. ¹⁷ Tabanga ku beem inok énda gébinasanay de Judio brab de békén Judio beem. Atin sugué ku beem mangéy muret dob de étew do békén Judio. ¹⁸ Fefégesobutém beroy fantage bé Begéne inok gésénule ro tidéw dob délémone agéwon brab gito roy géfékayae tidéw dob Tuluse. Atin inok éndaén munur ro dob barakat Satanase, yamula munur ro bé barakat i Tuluse. Atin inok sabaf bé kéunur ruwe Begén i de sala ro émfasagadan, atin waléy ro so do étew i Tuluse sabaf bé kéunur ruwe dob Beene.’”

¹⁹ Atin féntaus Pablowey kékéréh ne mano, “Mélaw Datu Agripa, nodoro kuy no énggito gu tidéw dob lawayo. ²⁰ Mélaw ménuretu sungu dob Damasko, tidéw béno dob Jerusalem. Tidéw béno dob kéluhanay de ingéd i de Judio, tidéw béno dob ingéd i de békén Judio. Nureto ku bero bé fatut ro gésénule bé de sala ro brab munur ro bé Tuluse. Atin fefégitoy kégésénule ruwe bé de fiyo rigoné ro. ²¹ Been i niy funay de Judio kéménéfo begén dob lawi i Tuluse brab féléhué ron damén

begén. ²² Endob taman so béléewe ni, ténabangay Tuluse so begén. Mélaw béléewe ni téménindégu dini muret dob kéluhanay de étew do gérotor brab do gérifantad. Atin i kéuret guwe ségiléw bé kékéréh Moisese brab de étew sénarigoy Tuluse muret bé kékéréh ne mérigo. ²³ Bénréh roy fantage bé Kristowe, bé fatut kun ferasayén brab féléhuén. Atin Beeney sunguwe tébule inok fukasé noy de Judio brab de békén Judio.”

²⁴ Amun émbéréhé sénay Pablowe bé kéamfilo nuwe bé lowoh ne, ménkes i Festowe mano, “Pablo, bunég go! I dakéle kégétiga moy funa muwanan ménwaléy bunég.”

²⁵ Endob séménumbul i Pablowe mano, “Gobernador Festo, békénun bunég. I ni kékéréh gu métintu brab toow. ²⁶ Datu Agripa, gétiga moy kéluhanay de ni. Mélaw énda mégilaku de émbéréhé dob beeme. Non gétiga ku, énda méndirungén dob beeme non ménrigoy de ni dob gonone gétigay kéluhanay de étew. Ménlagal mélaw i kéurete de. ²⁷ Datu Agripa, aw munur go bé kékéréh i de étew sénarigoy Tuluse muret bé kékéréh ne? Gétiga ku munur go de.”

²⁸ Tidéw béno ménbéréh i Agripahe dob Pablowe mano, “Dob ni foko kéureté, aw gékaranga mo géfuwaléyo mo begén munur bé Kristowe?”

²⁹ Séménumbul i Pablowe mano, “Fiyon fo ké foko taloo no métaah, dasalé ku dob Tuluso bé i beeme brab kéluhanay de étew ni mégélingo begén, waléy gom munur bé Kristowe ségiléw bé begéne éndob békén méféri su loo bé begéne.”

³⁰ Tidéw béno téménindég i datue, brab gobernadore brab libune fénadawé Berenis brab kéluhanay de étew diyo atin ménagéw ro. ³¹ Amun ménagéw ron, ménsebéréh-béréh ro maro, “I ni étew, énda i tête rénigo no funan de méméléhu taloo no férisuén.”

³² Atin ménbéréh i Agripahe dob Festowe mano, “Amuk énda saén non-

gotén i mangéye dob datue dob Roma, fakayén damén tangeyén.”

27

I kéagéw Pablowe mangéy Roma

¹ Amun sénfagayuno ron i émféuwite begey dob barkowe mangéy Roma dob sakuf i dakéle ingéd Italiya, naté roy ro Pablowe beroy de ségiyo do férisu dob odoroy de sundalo tidéw Roma féndawét Julio. I de ni do sundalo, féndawét ro “Do sundaloy Datue”. ² Ménda gey dob barkowe tidéw Adramitio, non tafayén mangéy dob de ingéd dob sakuf i Asiawe. Ménodor begey i Aristarkowe ségétew Masedonian tidéw Tesalonika. ³ Amun bé démoe de déménungu gey dob Sidon. Atin i Juliowe, sani odoroy de sundalo, toow fo mégédaw bé Pablowe brab ténungkasén mangéy lémangu bé de dumo no inok fagifaté ro. ⁴ Atin méntaus gey magéw tidéw diyo. Atin rénumfak i réfuruhey barko geye, mélaw ménéngindoror gey bé bungéde féndawét Siprus fingé tégenon inok mékélung gey bé réfuruhe. ⁵ Tidéw béno, nifar gey i dogote mangéy bé doror i de ingéd féndawét Silisia brab Pamfilia taman énggégumah gey dob Mira, sébaan ingéd dob sakuf i Lisiawe. ⁶ Atin diyo énggitoy kafitaney sébaane barko tidéw Alejandria mangéy Italia, mélaw féndaén begey dob ni barko.

⁷ Atin méntana i kéagéw geye bé ménfiroye gétérésangan brab ménrégén i kéagéw geye taman téménara gey dob ingéde féndawét Kinido. Atin éndaén méntaus gey mangéy fingé diyo non rumfakéy réfuruhey barko geye. Mélaw ménifar gey mangéy fingé bé déligdigay bungéde Kreta inok mékélung gey bé réfuruhe. Atin téménara gey ménéngindoror bé gonone Salmon. ⁸ Atin ménéngindoror gey brab ménrégén foy kégumah geye dob ingéde féndawét “Fiyó Dungguon” gédét dob ingéde Lisia.

⁹ Atin ménrugay gey na diyo bat tamán éndaén mékégilak i magéwe dob dogote bé do no do gai non gai mélégénéy. Mélaw féngginau Pablowe bero mano, ¹⁰ “Enggito gu toow fo mékégilak i kéagéwe tidéw dini. Médooy de mébinasa bé de uwit dob barkowe brab barkowe so. Brab wén soy do dumo betom méléhu.” ¹¹ Endob i odoroy de sundalo énda ménagayu no bé bénréh Pablowe, yamula nodoro noy kékéréh i kafitane bé barkowe brab gefee de. ¹² Atin énda kun fiyo térenon i dungguone ni ké gai mélégénéy. Mélaw ménuyot i kédoono ruwe ké magéw ro inok gégumah ro dob Fenisia dob bungéde Kreta. Been i niy dungguone fingé dob élédoj déligdigane brab élédoj tégenone. Mélaw fiyoy téméréne diyo tamán gilid i gaiwe mélégénéy.

I défuke

¹³ Atin bé béno so, méniyufi réfuruhe énda émbagérén tidéw déligdigan. Mélaw i de étew dob barkowe maro ké fakayén i tause magéw mangéy Fenisia, loo bé bénantak ruwe. Brab bénatu ron i fériwatune atin ménagéw ro ménéngindoror bé dénsaane dob Kreta. ¹⁴ Endob énda ménrugayén tidéw béno, i toowe fo émbagér réfuruuh féndawét “Tégenoy Sébangane” énggumah tidéw fantad. ¹⁵ Atin énggóbela i ni réfuruuh dob barko geye. Atin énda fakay gey gétaus magéw rénumfak bé réfuruhe ni. Mélaw féndaya gey séden i kieuwit i réfuruhe begey. ¹⁶ Atin amun énggétara gey dob sébaane kloh bungéd féndawét Kauda fingé sébangane, ménalang i réfuruhe diyo. Atin i klohe awang bénégéng i barkowe, éndot ro tidéw dob dogote éndob toow fo mérégén. ¹⁷ Atin amun ténaléy ron i awange ni, nikét roy géliwéte bé barkowe ni bé de dakél taléy inok énda mérundasén. Mégilak ro ké mélébeng i barkowe dob fantad i dogote non éndaén ménalémén gédét dob Libia. Mélaw kénda roy layage brab ménéanur séden i barkowe modor bé kéfanir i

réfuruhe de. ¹⁸ Atin énda so téménréni émbagére ni défuk. Mélaw dob gétunduge de fuweh féngganaya roy lémauwé bé de uwit dob barkowe ni. ¹⁹ Atin bé gétunduge de man fuweh nibér roy de dumoy de usarén dob barkowe. ²⁰ Ménfiroy gétérésangan, i éndae kégito gey bé térésange taloo no do gitoon atin démayday soy défuke ni. Tidéw béno, éndaén foy inam gey ké méuyag gey na.

²¹ Amun ménrugayén i éndae kégéama i de étew ni, téménindég i Pablowe dob téngaanga ruwe brab ménbéréh mano, "Do dumo gu, amuk fénggelingo gom saén begén, énda damén méntékédan tom dob Kreta, brab énda damén i do ménsinggula brab do ménbinasa. ²² Endob héleewe ni ay niy bérhéhé kuwe begom, kagom mégilak non énda i ségétew méléhu betom. Endob i barkowe ni ménbinasa. ²³ Non bé nakélungonono méntefégito dob begéney télakiy Tuluse, sani Tuluse féngadafé ku brab gefee bé lowoh guwe. ²⁴ Ménbéréh i télakiwe ni dob begéne mano, 'Kago mégilak Pablo! Non fatut go témindég dob adafay datue dob Roma. Atin sabaf bé kégédaw i Tuluse beem, tabangé no soy kéluhanay de dumo mo ni dob kéagéw gome inok énda méléhu ro.' ²⁵ Mélaw," bang Pablowe, "kagom mégilak non sémarigu dob Tuluse bé métuman i kéluhanay de bénréhén begén. ²⁶ Endob méfanir tom mangéy dob sébaane bungéd."

²⁷ Ménfoloén bra fot gékélungonon i kéfanir i réfuruhe bé barko geye dob dogote Medeteranean. Tidéw béno amun kérara kélungononén, i de étew gémalbék dob barkowe marok gédét geyén dob fantade. ²⁸ Mélaw lénawu roy taléye wén i fériwatun de, inok témbuné roy kénélam ne. Atin énggétiga ro fot folo gémitroy kénélam ne. Atin énda ménrugayén tidéw béno, lénawu ron man i taléye ni atin télaw folo gémitro séden i kénélam ne. ²⁹ Atin non bé kégilak ruwe kénélanggat i barkowe dob de dakél batéw, mélaw lénawu roy foto

fériwatun tidéw dob igor i barkowe brab déménasal ro inok fuwehén damén. ³⁰ Atin i de étew gémalbék dob barkowe ni sénfagayuno roy méraréyé damén. Mélaw ténuntu roy klohe awang dob dogote. Ubo-ubo lawué roy de fériwatun dob uléw i barkowe ni. ³¹ Endob ménbéréh i Pablowe dob odoroy de sundalo brab dob de sundalo no mano, "Amuk tékédan i de étew ni gémalbék dob barkowe ni, énda méuyag gom." ³² Mélaw kénléng i de sundaloy de taléy fénggékét bé awange ni brab féndaya ro mélawu inok méanur sésuway bé barkowe.

³³ Amun mangéyén fuweh, nongot Pablowej mama ro kéluhanan brab ménbéréh mano, "Ménfoloén bra fot gétérésangan i kéongot-ongot gome atin énda i nama gom. ³⁴ Mélaw ama gom! Toow fo kailanga kom i mamae inok méuyag gom. Bérhéhé ku begom i ni, énda i sébaan betom wén i sug-sugén." ³⁵ Amun énggilid bénréhén i ni, ménidot i Pablowe bé fane brab ménfésalamat dob Tuluse dob téngaanga ruwe. Tidéw béno bénadén brab ménama ro. ³⁶ Atin éndaén ménbuku ro atin ménama ro kéluhanan. ³⁷ Ruwo gey ratuh bra fitew folo bra ném kéluhanan. ³⁸ Amun ménbésor ronén, nibér roy de faréy dob dogote inok waléy féngkag i barkowe.

Ménbinasay barkowe

³⁹ Amun géfuwénén, wén i énggito geye fantad éndob i de étew gémalbék dob barkowe, énda gélolo ro de kénélam ne. Endob énggito roy linéke brab dob dénsaane de wén i do médoo de farék. Atin ménfagayun ro amuk fakay diyo ro démunggu. ⁴⁰ Mélaw kénléng roy de fériwatun brab féndaya ro ménlawu dob ménaléme de. Atin nukoh ro soy ikét i de suwil. Tidéw béno, ténunggul roy layage inok faniréy réfuruhe mangéy dob dénsaane. Mélaw ménagéw gey. ⁴¹ Endob i barkowe ni ménanggat dob fanser i dogote brab téménréni diyo. Ménlébéng i lulung i barkowe ni atin

ménrundas i ulina nuwe non énggébélá diyo i émbagére do bagél.

⁴² Sénfagayunoy de sundaloy méméléhue bé de férisu inok énda i gélonguy brab géféraréy bero.

⁴³ Endob i odoroy de sundalo mika de ké féléhuén i Pablowe. Mélaw génléén i de sundalo no bé éndaén féléhuén i de férisu. Atin sénuguén i de gétigan lémonguy bé téfélaway ron dob dogote sungu brab lémonguy mangéy dob dénsaane. ⁴⁴ Atin i de dumo bero énda gétigan ro lémonguy, sénuguén bero médot bé de fafan brab do réfa i barkowe inok rémantaw ro. Atin i kéluhanaya keye énggégumah dob dénsaane, énda i énggésug-sug begey.

28

Dob Malta

¹ Amun énggégumah geyén dob dénsaane énda ménkaid gey, wén i ménbéréhe dob begeye bé Malta wayoy dawét i no bungéd. ² Toow fo mégédaw i de étew dob no ingéd begey. Non amun réménana brab toow fo mélégénéy, ménuyag ro aféy brab ténuganul ro begey. ³ Atin i Pablowe ménurut do kayéw fégésénuk. Atin amun féndiyoén i de kayéw dob aféye, ménuts i ulée tidéw dob de kayéw ni non kéédufan bé aféye brab kénékeén i kémér Pablowe brab ménbiti-bitin diyo. ⁴ I de étew bati dob no ingéd amun énggitoy ulée ni ménbiti-bitin dob kémér Pablowe, ménésbéréh-béréh ro maro, "Ménméléhu étew keeyén i ni lagéy, non fiyon fo ké énda ménléhuén dob dogote, bagié soy méléhue." ⁵ Endob kénuyung Pablowej kémér ne atin ménlawu i ulée ni dob aféye brab énda i kaidén. ⁶ Nongot-nongot i de étew ké lémbag i kémér Pablowe loo ké tékow métuwär brab méléhu. Endob amun ménrugayén i kéongot-ongot ruwe de atin énda i énggérígono no de, ménfégalin i de itunga ro brab ménbéréh ro maro, "Ségétew tulus i nan."

⁷ Enda mérayuén tidéw diyo i fantade kay lagéye féndawét Publio.

Beeney méguléwe bé no bungéd. Atin ténayakufén begey dob lawi ne bé méntéléwe gétérésangan brab toow fo méngédaw begey. ⁸ Atin i boh Publiowe déméruruun méniro dob kamawe non toow fo démfug brab mégudu. Atin i Pablowe ménahur dob sibéy ne. Tidéw béo, ténégé no brab déménasal atin modor so béo, ménadi-adi so. ⁹ Sabaf bé ni ménrigo, i kéluhanay de déméruruun do étew dob no ingéd ménangéy ro dob Pablowe. Atin kéluhanaya ro ménadi-adi. ¹⁰ Atin niraya ro begey médo do éntingayén. Brab amun ménanda geyén dob barkowe, niraya ro begey bé kéluhanay éntingayéne kailanga key bé kéagéw geye.

¹¹ Diyo wén i sébaane barko tidéw Alejandria féndawét "Do Séfing Tullus", non téménréni diyo bé gaiwe mélégénéy. Mélaw amun énggéléfas i téléwe gétérésang kélungonon, ménanda gey. ¹² Atin déménunggu gey dob ingéde féndawét Sirakusa brab téménréni gey diyo téléw gétérésangan. ¹³ Atin tidéw diyo, ménautas gey mangéy Regio. Atin bé démoe de déménumpar i réfuruhe tidéw déligdigan brab énggumah gey dob Peteoli bé ménruwowe gétérésangan. ¹⁴ Atin diyo énggitoy i de dumo gey munur bé Kristowe brab fénbati ro begey diyo ségéfadiyan. Tidéw béo, ménautas gey magéw mangéy Roma. ¹⁵ I de dumo gey munur bé Kristowe bati dob Roma, énggelingoo roy lalag i kégumah geye. Mélaw ménagéw i de dumo bero mangéy dob ingéde féndawét "Foro de Apio" brab de dumo de ménangéy "Tres Tabernas" inok balaké ro begey. Amun énggitoy Pablowe bero, ménfésalamat dob Tulusu brab ménbagér i fédéw ne.

Dob Roma

¹⁶ Amun énggégumah gey dob Roma, ténungkas roy Pablowe bati dob sébaane lawi beroy ségétewé sundalo mantayan de.

¹⁷ Amun énggéléfas i téléwe gétérésangan, féntawag Pablowej odoroy de Judío inok sélimud ro.

Amun ménsélimud ron, bénréh Pablowe bero mano, “Do dumo gu, fiyon fo ké énda i rénigo gu sébanil bé de dumo tom do Judio taloo no bé adate tidew dob de katufua tom, fénrisu ro begén dob Jerusalem atin naté ro begén dob de Romano. ¹⁸ Atin i de méguléw tidew Roma fénénginsaa ro begén brab tangéyé ron damén begén non gétiga ro énda i rénigo gu tete funa ku méléhu. ¹⁹ Amun énda ménagayun i de Judio de, nongot guy mangéye dob datue dob Roma, fiyon fo ké énda i fégétébo gu bé de dumo gu Judio. ²⁰ Been i niy funa kuwe ménongot géségito begom brab sébéréh begom. I funa kuwe ménikét bé de sangkali ni non bé kéunur guwe bé Kristowe, sani inam i kéluhanay de Judio.”

²¹ Atin séménumbul ro maro, “Enda sénay énggédot gey sulat tidew Judea fantag bé beeme. Atin i de dumo tom do Judio ménangéy dini tidew diyo énda mon i nuret ro tete fantag bé beeme. ²² Endob méuyot gey mégélingo ké ati kaame de kéfégitung non gétiga key dob kéluhanay de gonon, wén i do étew émbéréh ro tete fantag bé kaame kéféngintulus.”

²³ Mélaw ménséfagayun ro mémili térsang sélimud bé Pablowe. Atin toow fo médooy ménangéye dob lawie gono Pablowe bati bé no térsang. Atin tidew fanay géfuwén énggumah kélunganon i kétoro Pablowe bero fantag bé kéféguléw i Tuluse bé de étewén. Atin ténułama no bero fénunur bé Jesuse bé kélabit ne bero bé de sénulat Moises brab de étew sénarigoy Tuluse muret bé kébéréh ne. ²⁴ Atin i de dumo bero énggéunur bé kébéréh ne, éndob i de dumo bero énda fo munur ro de. ²⁵ Mélaw amun méntékédan ro, ménsébaad ro bé kébéréh Pablowe mano, “Toow i fénbéréh i Rémodor i Tuluse bé Isaiase ségétew sénarigoy Tuluse muret bé kébéréh ne dob de katufua kom, ²⁶ mano, ‘Agéw go mangéy dob de ni do étew brab bérém bero, Mégélingo gom éndob énda gésobuto kom de, brab

téméngténg gom éndob énda gito gom de. ²⁷ Non métégas i de uléw i de étew. Ménéfeng i de kelingo ro, brab méntéléfédéng i de moto ro. Amuk énda loo no bé nan, gégitoy de moto ro, brab gégléingo i de kelingo ro, brab gésobut i de itunga ro, brab balengé roy de fédew ro mangéy dob Begéne inok féadi-adiné ku bero.’ ”

²⁸ Féntaus Pablowey kébéréh ne mano, “Mélaw fatut gétiga kom i uret i Tuluse fantag bé kéfukas ne ménuretén dob de békén Judio. Atin i berowe fégélingoé ro fo toow.” ²⁹ Amun énggilid bénréh Pablowey ni, ménule i de Judio séédél ro fo toow.

³⁰ Atin bé rugay i ménruwowe gébélantuwa, ménbati i Pablowe dob lawie gono no mafin. Atin tényakufén i kéluhanay de étew mangéy de témukaw. ³¹ Atin nuretén i kéféguléw i Tuluse, atin ménbaraw ténoréen i fantage bé Kadnane Jesu Kristo brab énda i géménlé de.

I Sulat Pablowe dob de Munur bé Kristowe dob Roma

Been i niy sébaane bé de sénulat Pablo fégétoro bé de munur bé Jesu Kristowe. Bé gétahe, toow fo mérarék i Pablowe bé de munur bé Jesuse, atin ménuyot méméléhu bero. Endob tidew béno, méntefégitoy Jesuse dob Pablowe tidew dob lawayo. Tidew béno, bénalengén i fédew Pablowe brab ménwaleý munur bé Jesuse. Tidew man béno, ménwaleý i Pablowe bantugan muret fantag bé Jesuse. Séménugud mangéy dob de médo do ingéd inok féunuré noy de étew dob Jesu Kristowe. Atin médooy de ménunur sabaf bé kéuret Pablowe ni.

Amun sénulat Pablowej ni sulat dob de munur do bati dob Roma, énda séna énggéangéyén de diyo. Endob ménuyot foy Pablowe mangéy diyo. Mélaw sénulatén i ni fégéségifaén bero. Sénulatén soy ni inok toroé no bero fantag bé Jesu Kristowe. Ténoro Pablowe so bé i kéluhanay de étew, wén i do sala ro. Atin i bayad i salae, been i kéléhue. Endob i Tuluse, sénuguén i Nga ne Jesu Kristo dob duniyae ni inok féléhuén. Ménléhu i Jesuse génantino noy de kéilawan. Mélaw fésagadéy Tulusey de sala i de étew amuk munur ro bé Jesuse. Atin i de munur bé Jesuse, féwaléyéy Tuluse bero métintu dob adafa nuwe. Been i niy kétoroe dob ni sulat Pablowe ni.

¹ Begéney Pablowe sulata ku begom do munur bé Jesuse dob ingéde Roma. Begéney ségétewe sugu-sugué Jesu Kristowe. Fénemili i Tuluse begén waléy apostol inok ureté kuy Fiyowe Uret fantag bé Jesuse.

² I ni Fiyo Uret, fénasad i Tuluse bé do gétah bé kéfésulat ne bé de sénarigo no muret bé kékérén ne dob Mékétéfuwe Libro. ³ Atin i ni uret, been i niy fantage bé Nga i Tuluse, sani Kadna tome Jesu Kristo. Ségétew so kéilawan non ménúmah tidew dob

katufua nuwe Datu Dabide. ⁴ Atin i Jesuse ni, Mékétéfu so Tulus non fénngito noy Been i Nga i Tuluse bé kétébule ne bé barakat ne. ⁵ Atin sabaf bé sénugu Kristowe begén, ni-ray i Tuluse begén i fiyowe galbék gu non fénwaléy i Tuluse begén ségétew apostol inok émbantug i Kristowe. Atin mélaw démoyunu magéw muret témo do de étew dob kéluhanay de ingéd inok munur ro so bé Jesuse. ⁶ Atin fiyon i begome do munur bé Kristowe dob Roma, fénemili i Tuluse so begom waléy do kuyug Jesuse.

⁷ Mélaw sulata kuy kéluhanana kome dob Roma do kénimuoy Tuluse brab fénemilién waléy kuyugén.

I Abay tome Tulus brab Kadnane Jesu Kristo mégédaw ro damén begom brab iray ro damén begom i métanéke fédew.

Fésalamat i Pablowe bé Tuluse

⁸ Ay niy sunguwe béréhé ku begom: Fésalamatu bé Tuluse dob Jesu Kristowe sabaf bé begome. Non énggelingoo y kéluhanay étéwey fantage bé kénéur gome. ⁹ Sabaf bé Tuluse, mégéroru gémalbék muret bé Fiyowe Uret fantag bé Nga ne Jesu Kristo. Atin énggétigay Tulusey kédasala kuwe begom sénga téklid. ¹⁰ Atin démoyunu mongot bé kédasala kuwe bé fefakayéy Tulusey kéagéw guwe mangéy témukaw begom amuk kétaya no, non ménrugayén i kétaya kuwe témukaw begom. ¹¹ Non toow fo ménuyotu géségito begom inok gétoroo ku begom i ténero i Rémogor i Tuluse begén funa kom waléy ménégét i kénéur gome. ¹² Mélaw séféfiyo tom fédew bé kénéur tome bé Kristowe.

¹³ Do dumo gu, ménuyotu ké gétiga kom i ni, ménoodonén gule bénantak guy mangéye témukaw begom éndob wén foy manggae begén. Ménuyotu damén mangéy diyaan inok géfénuro kuy de étew békén Judio dob begome dob Roma bé Jesuse, loo bé rénigo guwe dob de békén Judio dob de ségiyo ingéd. ¹⁴ Non maak wén i dakél utong gu dob kéluhanay de étew. Atin i bayad guwe de, been i kénéur guwe

fantag bé Jesuse. Fatut ureté ku dob de métillédtéd brab dob de léngléngén, dob de énggégéganad brab dob de énda énggégéganad. ¹⁵ Mélaw toowu fo méuyot muret bé Fiyowe Uret dob begome so do bati dob Roma.

I Fiyowe Uret

¹⁶ Enda fo mémalawu muret bé ni Fiyo Uret non fyon fo ké ati munure de, i sunguwe do Judio brab tidéw béno do békén Judio, been so fukaséy Tuluse inok énda mékukumén. ¹⁷ Non ménfayag dob Fiyowe ni Uret bé féwaléyéy Tuluse métintuy de étew munur bé Kristowe sabaf saén bé kéunur ruwe. Non wén i Ménsulate Kébéréh i Tuluse mano, “I étewe ménwaléy métintu sabaf bé kéunur ne bé Tuluse, méuyag taman sa taman.”

Ménsala i Kéilawane

¹⁸ Atin i Tuluse dob lawayo, fénggitoy noy kékérit ne bé de tete adat i de étew brab de sala ro. Non sabaf bé de tete rigoné ro, alangé roy toowe kétoro. ¹⁹ Kukuméy Tuluse bero non magad damén gésobuto roy fantage bé Tuluse. Non fénkéntayéy Tuluse néni kékérit ne bé de tete adat i de étew brab de sala ro. Non sabaf bé de tete rigoné ro, alangé roy toowe kétoro. ²⁰ Mélaw énda i funay ségétewe étew gébéréh mano, “Enda gétiga ku de ké wén i Tulus.” Non tidéw bé kélémbag i Tuluse bér duniiae ni, énggétuwanén i magufusae barakat i Tuluse bér ati lénimbag ne fyon fo ké énda giton i Tuluse. Atin sabaf so bé atiy lénimbag ne, fatut gétigay kéluhanay étewe bé tintu Tulus i Tuluse. ²¹ I de ni do étew énda munur ro bé Tuluse, gétiga roy fantage bé Tuluse éndob énda fégadata ro de loo damén bé fatute. Enda so fésalamata ro de. Yamula i kékéritung ruwe ménwaléy énda i lantéken brab maak délémon. Non éndaén gésobuto roy toowe tidéw dob Tuluse. ²² Atin fyon fo ké béréhé ro do métillédtéd ro, éndob ménwaléy ro do dufang. ²³ Non énda féngadafé roy barakatane Tulus magufusa, yamula féngadafé roy de kéninontow rénigo ro loo bé falas i kéilawane énda magufusaén, brab do kloh manok, brab do binatang, brab do ulé.

²⁴ Atin non toow fo dufang i de ni do étew, téngak i Tuluse bero brab féndayaén bero rémigo do tete kétaya ro. Atin mélaw toow fo tete brab mékémalay de kérigo ro bé de lowoh ro. ²⁵ Atin énda munur ro bé toowe fantag bé Tuluse. Yamula munur ro bé de tugi. Féngadafé roy de lénimbag i Tuluse, énda féngadafé roy Beene léminbag bé de ni. Médayéw damén i Tuluse taman sa taman. Amen.

²⁶ Atin sabaf bé kétakak ruwe bé Tuluse, téngak i Tuluse bero brab féndayaén bero rémigo bé de tete do mékémala kétaya ro. Fyon i de libun bero, ménwaléy ro maak lagéy. Mika ro sétyan bé de lagéy loo damén bé fatute. Yamula sétyan ro falan bero do libun. ²⁷ Atin i de lagéy rigoné roy tete loo so bé ni. Ménwaléy ro maak libun. Mika ro sétyan bé de libun loo damén bé fatute. Yamula sétyan ro falan bero do lagéy. Rigoné roy toowe fo tete funa ro fatut mémala. Atin mékukum ro loo bé fatute sabaf bé de tete rigoné ro bé de lowoh ro.

²⁸ Sabaf bé kékia ruwe munur bé Tuluse, téngak i Tuluse bero brab féndayaén bero bér de tete kékéritung ro. Mélaw rigoné roy de tintu fo tete énda damén fatutén rigonén. ²⁹ Atin falan tete i démoyune féngitung ro. Ménwaléy ro do tete étew, do arumén, do rémigo tete, do toow fo médaléw, do méméléhu, do méuyot sétiboh, do tugién, do dusa, brab do géméno.

³⁰ Atin démoyun émbéréh ro tete fantag bé de dumo ro brab mérarék ro bé Tuluse. Enda fégadata roy dumo ruwe brab toow ro fo félangka-langka. Toow ro fo furung mégitung bé de tete rigonén. Atin énda odoro roy sugu i de lukés ro. ³¹ Atin furah ro brab énda tumané roy de fasad ro. Atin énda mégédaw ro taloo no méuray i na ruwe bér dumo ruwe. ³² Enggétiga roy kékéritung i Tuluse bér fatut méléhu i étewe rémigo bér de ni do késalaan. Endob fyon fo ké loo bér ni, fétausé ro soy de tete rigoné ro, atin méuyot ro de uman ké mamung soy de dumo étew bér de ni do rigoné ro.

2

I kékukum i Tuluse

¹ Mélaw gétiga tom fatut kukumén i de tete étew. Endob énda i ségétew begom gékukum bé de ni do étew non fatut gom so mékukum. Non rémigo gom so tete ségiléw bé berowe. Mélaw amuk dowoyé kom bero, dénowoy gom soy de lowoh gom. ² Atin gétiga tom mééntang i kékukum i Tuluse bé de étew rémigo tete loo bé de ni. ³ Fyon fo ké dowoyé kom i de ni do tete étew, éndob fyon i begome rémigo gom so tete ségiléw bé berowe. Mélaw kagom fégitungén de ké gésélyah gom bé kékukum i Tuluse. ⁴ Makom keeyén ké éndaén kailanga kom odoron i kétayay Tuluse non toow fo mégédaw i Tuluse brab tingkélé noy kékérítne. Endob gétiga kom damén i funay Tuluse mégédaw brab témingkél inok gésénule gom bé de sala gom. ⁵ Endob toow fo métégas i de atura kom funa kom mika gésénule. Mélaw méumanan i kékéríttoy Tuluse begom. Atin toow na fo gétimal i kékukum i Tuluse begom bé gaiwe fégito noy méntange kékukumén. ⁶ Non iray i Tulusey fatute irayén dob séngae étew sabaf bé de rénigo no. ⁷ Wén i do étew rigoné roy fiyowe sénga téklid non méuyot ro de ké dayewéy Tuluse bero brab fégadata no bero brab iraya no bero bé umule magufusa. Mélaw tintu fo iray i Tuluse beroy umule magufusa. ⁸ Endob wén soy do étew toow fo do méitung. Mika ro rémigo fiyo, yamula rémigo ro tete. Mélaw toow fo émbégat i kékukum i Tuluse bero, non tintu fo mékérít bé de rigoné ro. ⁹ Toow fo kérasayan brab kérégénan i kéluhanay de étew rémigo tete, dob de Judio sungu, tidew béo dob de étew békén Judio. ¹⁰ Endob i de étew rémigo bé fiyowe, dayewéy Tuluse bero brab iraya no bero bantugan brab kédané noy kékuku ruwe. Sungu-sungu dob de Judio, tidew béo dob de étew békén do Judio. ¹¹ Non i kékukum i Tuluse toow fo mééntang, atin énda i ramigo no.

¹² I de étew békén do Judio, énda gétiga roy de sugu i kitabe tidew dob Moisese. Mélaw amuk gésala ro, kukuméy Tuluse bero, éndob énda usaré noy kitabe fégékukumén bero. Endob i de Judio, gétiga roy de sugu i kitabe tidew dob Moisese. Mélaw amuk gésala ro, kukuméy Tuluse bero bé kitabe. Atin i bayad i sala i de étew kéléhu. ¹³ Non i Tuluse énda féwaléyé no métintuy étewe mégélingo saén bé kitabe. Yamula béréhéy Tuluse métintuy de étew modor bé kitabe. ¹⁴ I de étew békén do Judio, énda gétiga roy kitabe tidew dob Moisese. Endob fyon fo ké énda gétiga roy kitabe, wén i no géodoro ro soy atiy ménsgue dob kitabe. Non gétiga ro dob de fédew roy atiy fatute rigonén. Mélaw maak wén soy kitab dob de fédew ro. ¹⁵ Bé de fiyo rigoné ro, fégito ro gétiga ro dob de fédew roy fatute dob kitabe. Atin gétiga ro so dob de itunga roy fatute brab tete. Non amuk rigoné roy fiyowe, moror ro. Endob amuk rigoné roy tete, tete soy fédew ruwe de. ¹⁶ Mélaw loo bé niy kékukum Jesu Kristowe bé de ménbunéy do kégitung i de kéilawan bé gaiwe fékukuméy Tuluse loo bé ménbéréhe dob Fiyowe Uret ureté ku.

Fantag bé de Judio

¹⁷ Atin fantag bé begome do Judio. Méuyot gom de fo ké fédawéy gom i de lowoh gom do "Judio". Atin sémarig gom bé kéodoro kome bé kitabe brab félangka-langka gom non begom i fénemili i Tuluse. ¹⁸ Gétiga kom i kétayay Tuluse rigoné kom atin gétiga kom i fatute non ténero i kitabe begom. ¹⁹ Makom ké begom i manangguwite bé de étew maak langafén non énda gétiga roy fantage bé Tuluse. Brab makom ké begom i do maak solo émfégito bero bé agéwone mangéy dob Tuluse. ²⁰ Atin makom ké begom i do ténero bé de dufang, brab do maistéro dob de étew mantu séna méngganad fantag bé Tuluse. Loo bé niy kégitung gome non niray i Tuluse begom i kitabe, atin

diyo giton i tintuwe kégétigan brab toowe. ²¹ Démoyun gom témo do de ségiyo, éndob fatut toroé kom i kagome lowoh. Témo gom makom, "Kagom ménakaw", éndob ménakaw gom so. ²² Béréhé kom makom, "Kagom lémamfa". Endob lémamfa gom so. Brab bénréh gom mika gom bé de kéninontow, éndob mahur gom dob de lawi fengadafan inok ménakaw do kéninontow. ²³ Félangka-langka gom non niray i Tulusey kitabe dob begome. Endob fémalané kom i Tuluse bé éndae kéodoro kom bé kitabe. ²⁴ Wén i Ménsulate Kébérén i Tuluse mano, "Ménbérén i de békén Judio tete fantag bé Tuluse non bé de tete rénigo gom do Judio."

²⁵ Atin i begome do Judio, makom ké toow fo mélaga i kétulie begom. Atin toow, wén i lagaén amuk odoro kom i kitabe. Endob amuk énda odoro kom i kitabe, énda i laga i kétulie begom. ²⁶ Ufama, i étewé békén Judio, fiyon fo ké énda méntulién, amuk odoro noy kitabe, maak méntuli so dob adafay Tuluse. ²⁷ Mélaw i de étew békén Judio do énda méntulién, amuk modor ro bé kitabe, fégito ro bé fatut mékukum gom. Non énda odoro kom i kitabe fiyon fo ké dob begome sénulat i kitabe ni, brab do méntuli gom. ²⁸ Non i étewé métandaan saén i lowoh ne bé kétulie de éndob énda séna méntintuy fédew ne, békén tintu Judio. Non i funane fétuli békén saén dob lowohe. ²⁹ Yamula i tintuwe Judio, been i étewé métintuy fédew ne. Non maak méntuli i fédew ne non fénwaléy i Rémogor i Tuluse métintuy fédew ne. Békén i kitabey ménfewaléye de méntintu. Atin i étewé ménwaléy méntintu non bé galbék i Rémogor i Tuluse, médayéw i Tuluse de, fiyon fo ké énda médayéw i de étew de.

3

¹ Amuk toow i ni, aw wén i laga i étewé ké Judio loo ké énda? Aw wén i laga i kétulie loo ké énda?
² Toow fo dakél i laga ne. Non

wén i do dakél kéfiyonon niray i Tuluse dob betome do Judio. I sunguwe de, sénarig i Tuluse dob betomey Ménsulate Kébérén. ³ Fiyon fo ké i de dumo tom do Judio énda munur ro bé Kébérén i Tuluse, been so tumanéy Tulusey fasad ne. ⁴ Non fiyon fo ké i kéluhanay de kéilawan do tugién, énda tugién i Tuluse. Non wén i ménsulate kékérén Dabide fantag bé Tuluse mano, "Falang fo toow brab métintuy kékérén me. Atin amuk wén i témbo Beem, Been so témaban i Tuluse."

⁵ Endob amuk wén i dufang émbérén mano, "Amuk rémigo tom tete, fiyo so, non gétigay de étew i kéfiyoy Tuluse amuk gito roy kétete tome. Non mas gésobuto roy fiyowe rigonéy Tuluse bé de rigoné tom. Mélaw énda fatutén kukuméy Tuluse betom." Endob toow fo dufang i étewé gébérén loo bé ni. ⁶ Békén toow i nan dufang kékérén, non amuk énda métintuy Tuluse, énda gékukumo noy kéilawane.

⁷ Atin amuk wén soy dufang étewé émbérén mano, "Fiyo so ké tugién tom inok giton i éndae kétugiéy Tuluse. Mélaw gédayéwoy de étew i Tuluse non toow na fo fiyoy Tuluse bé betome. Mélaw énda fatut tom mékukum bé de sala tom." Endob toow fo dufang i ni kékérén. ⁸ Non ségiléw bé niy dufange kékérén mano, "Rémigo tom tete inok méumanan i fiyowe." Toow fo dufang i nan kétugitung. Endob wén i do étew téménifu begén bé bénréh gu kun i nan kédufangan. Endob énda i énggabérén ku loo bé nan. Fatut mékukum i de étew ménbérén tugién fantag bé begéne loo bé nan. Atin mékukum ro mon.

Enda i métintu étew

⁹ I betome do Judio, katom fégitungén de ké toow na fo fiyoy katome gohon bé de étew békén do Judio. Non fénggito gun begom i funa tome ségiléw. Enda i sébidana tom do Judio brab de békén Judio non kéluhana tom énggésala. ¹⁰ Non wén i Ménsulate Kébérén i Tuluse

mano, "Enda i métintu dob adafay Tuluse, fiyon ségétew. ¹¹ Enda i gésobut bé Tuluse, brab énda i séméléd bé agéwone mangéy dob Tuluse. ¹² Non i kéluhanay étewe téngak roy Tuluse. I kéluhanane réménigo tete. Enda i réménigo fiyo, fiyon ségétew. ¹³ I de ba ro maak do lébeng énda méntamfurén. Non toow fo tete i de kégébaa ro. Atin toow ro fo émbagér témugi. I de kékéréd ro maak bisa ulé. ¹⁴ Démoyun ron mémula brab mékétete fédew i de kékéréd ro. ¹⁵ Toow ro fo magad méméléhu. ¹⁶ Atin i kéluhanay géayo ruwe mébinasa brab kéfasangan. ¹⁷ Sétiboh saén i gétiga ruwe. ¹⁸ Atin énda fo fégadata roy Tuluse." Been i niy Ménsulate Kékéréd i Tuluse.

¹⁹ Atin énggétiga tom i ni: I kitabe tidew dob Moisese kay de Judio, sani de téménlama modor bé ni kitab. Sénulatén inok énda i funay étewe gébéréd bé énda i salaén. Atin mélaw i kéluhanay kéilawane fakay kukuméy Tuluse. ²⁰ Non i kéilawane réménigo bé éndae fakay dob kitabe. Mélaw énda i étew ménwaléy métintu dob adafay Tuluse sabaf bé kéodoro nuwe bé kitabe. I funane wén i kitab inok fégito noy sala i étewe.

I kékétintuy Tuluse

²¹ Endob béeleewe ni, fénggitoy Tulusey kékétintu nuwe bé étewe. Békén sabaf bé kéodoro étewe bé kitabe. Nuret i Ménsulate Kékéréd i Tulusey fantage bé de ni. ²² I Tuluse, féwaléyé no métintuy étewe sabaf bé kénur ne bé Jesu Kristowe. Rigoné noy ni dob kéluhanay de munur bé Kristowe non énda i ramigoy Tuluse. ²³ I kéluhanay étewe énggésala brab toow fo kulang i kéluhanane dob fatute kétayay Tuluse. ²⁴ Gido loo, sabaf bé kégédaw i Tuluse saén, féwaléyé betom métintu non bé kénur tome bé Jesu Kristowe sani kémédane bé de sala tom. ²⁵ Sabaf bé de sala tom, kukuméy Tuluse damén betom bé kéléhue. Endob i Tuluse fénféléhuén i Jesu Kristowe inok gantino no betom bé de sala tom, brab inok mékédan i kékukum i

Tuluse betom. Mélaw fésagadéy Tuluse betom bé de sala tom sabaf bé kénur tome bé Jesuse, sani tulake niray i Tuluse. Réningoy Tulusey ni inok fégito noy kékétang i kékukum ne. Bé do gétah, énda kénukumén i de étew ménsala non toow fo témingkél i Tuluse. ²⁶ Gido loo, fatut kukuméy Tulusey de sala. Been i niy funa nuwe kénukumén i Jesuse. Réningoy noy ni inok fégito noy kékétang i kékukum ne. Atin mélaw béeleewe ni, féwaléyé métintuy de étew munur bé Jesuse.

²⁷ Mélaw énda i funa tom félangka-langka. Non énda ménwaléy tom métintu sabaf bé kéodoro tome bé kitabe. Yamula ménwaléy tom métintu sabaf bé kénur tome bé Jesu Kristowe. ²⁸ Been i niy funa kuwe ménbéréd bé funay étewe waléy métintu, békén sabaf bé kéodoro né kitabe, yamula sabaf saén bé kénur ne bé Jesuse. ²⁹ Non i Tuluse békén saén i de Judio gégéngadafé de, éndob fiyon foy de békén Judio gégéngadafé ro soy Tuluse. ³⁰ Non sébaan saén i Tuluse. Atin ségiléw i kékétintu nuwe bé de Judio brab de békén Judio, sabaf saén bé kénur ruwe bé Jesuse. ³¹ Endob kagom fégitungén de kékétintu nuwe bé kitabe. Békén! Non amuk munur tom bé Jesuse, géodoro tom mélaw i kitabe.

4

Fantag bé Abrahame

¹ Ufama, i Abrahame, sani katufua keye do Judio. ² Amuk ménwaléy métintu non bé kéodoro nuwe bé de sugu i Tuluse, wén i funa no félangka-langka. Endob gétiga tom ménsala soy Abrahame, atin mélaw énda i funa no félangka-langka. ³ Non wén i Ménsulate Kékéréd i Tuluse mano, "Ménunur i Abrahame bé Tuluse. Atin mélaw kénarang i Tuluse métintu sabaf bé kénur ne." ⁴ Ufama, amuk wén i ségétew étew géménalbék, gédoté noy sahud ne. Atin médait sémahud. Békén saén niray de non sahudén bé géménalbék nuwe. ⁵ Endob békén loo bé nan i kékétintuy Tuluse betom do munur dob Beene. Non féwaléyé no betom métintu sabaf saén bé kégédaw

ne. Enda médait tom médot bé ni non énda génalbéko tom de. Ménalsa tom, gido loo kénarang i Tuluse betom métintu non bé kéunur tome bé Jesuse.

⁶ Been i niy atag i kékéréh Dabide bé méoror kun i étewe ménwaléyén métintu dob adafay Tuluse békén sabaf bé galbék ne. ⁷ Bénréh Dabide mano, “Méoror i de étew fén sagaday Tulusey de sala ro brab ménkédan i de tete rénigo ro. ⁸ Toow fo méoror i étewe lénifot i Kadnaney de salaén.”

⁹ Atin i ni kéfiyonon, békén saén niray dob de Judio, sani de mémentuli. Yamula niray so dob de békén Judio, sani de énda mémentuli. Non wén i ni Ménslat Kékéréh i Tuluse lénabit gu bé gétahe mano, “Ménunur i Abrahame bé Tuluse, atin mélaw kénarang i Tuluse métintu sabaf bé kéunur ne.” ¹⁰ Ati gaiwe de fén waléy i Tuluse métintuy Abrahame? Féntintuy Tulusey Abrahame bé énda séna mémentulién de.

¹¹ Tidéw béno, ménfétuli i Abrahame. Atin i funa nuwe ménfétuli inok wén i tanda fégito no bé kéfétintuy Tuluse de sabaf bé kéunur ne fiyon fo bé énda séna mémentulién de. Mélaw i Abrahame ménwaléy maak katufuay de munur bé Tuluse, sani de ménwaléy métintu dob adafa nuwe, fiyon fo ké énda séna mémentuli ro. ¹² Beene soy katufuay de Judio do munur, éndob békén saén sabaf bé kéfétuli ruwe. Yamula sabaf so bé ségiléw i kéunur ruwe bé Abrahame fiyon fo ké énda séna mémentulién de.

I Kéunure

¹³ I Tuluse fénasada noy Abrahame brab de séfuén bé irayén i duniyae dob berowe. Endob i funay Tuluse réménigo bé ni fasad békén sabaf bé kéodoro Abrahame bé kitabe. Yamula non ménunur bé Tuluse funa no so ménwaléy métintu. ¹⁴ Non amuk i fénasad i Tuluse irayén dob de étew modor bé kitabe, énda i atag i kéunur i étewe brab énda i laga i fasad i Tuluse.

¹⁵ Endob énda waléy tom métintu bé kéodor tome bé kitabe, non been i kitabey funay Tuluse mékérít betom. Non énda géodoro tom de. Endob

amuk énda i kitab, énda géféliso tom de.

¹⁶ Rénigoy Tulusey fasad ne sabaf bé kéunur Abrahame de, inok giton i fasad i Tuluse sabaf saén bé kégédaw ne, békén sabaf bé galbék i étewe. Atin i fasade ni kay kéluhanay de séfu Abraham. Non kay de Judio modor bé kitabe brab kay de étew so békén Judio munur loo bé Abrahame. Non i Abrahame, beeney maake katufuay kéluhanay de munur, do Judio brab de békén Judio. ¹⁷ Non wén i Ménslate Kékéréh i Tuluse dob Abrahame mano, “Féwaléyé ku beem katufuay de étew dob de médoingéd.” Mélaw dob adafay Tuluse, i Abrahame ménwaléy katufuay de munur bé Tuluse non ségiléw i kéunur ruwe bé beene. I Tuluse unuro tom, toow fo barakatan brab fakay tébuleé noy de ménléhu brab gélimbaga noy de éntingayén énda séna ménlimbagén.

¹⁸ I Abrahame ménunur bé Tuluse fiyon fo ké éndaén i inamén géfégéngá. Mélaw ménwaléy katufuay de étew dob de médoingéd. Non wén i Ménslate Kékéréh i Tuluse mano, “I de séfuém waléy ro médooy loo bé kédooy de gitoon dob lawayo.” ¹⁹ Bé béno gai toowén fo lukés i Abrahame, gédét mératuh gébélantuwa i idad ne, brab gétiqá no éndaén fakayén géfégéngá. Atin gétiqá no soy bawag ne Sarah éndaén fakayén géfégéngá non toowén fo lukés so. Endob fiyon fo ké loo bé niy kélubay i lowoh ne, émbagér i kéunur Abrahame bé Tuluse. ²⁰ Brab énda ruwo-ruwoy fédéw ne fantag bé fasad i Tuluse de, yamula fénégétén i kéunur ne brab dénayéwén i Tuluse. ²¹ Non tintu fo séménarig dob Tuluse bé rigoné noy atiy fénasad ne dob beene. ²² Atin mélaw kénarang i Tuluse métintu sabaf bé kéunur ne. ²³ Atin bang i ni Ménslat Kékéréh i Tuluse mano, “Kénarang i Tuluse métintu” békén saén fantag bé Abrahame. ²⁴ Yamula sénulatén so dob betome do munur bé Tuluse, sani téménébulee bé Jesuse Kadna tom, inok karangéy Tuluse so

betom métintu sabaf bé kéunur tome.
²⁵ Non i Jesuse sénugu i Tuluse inok féléhuén gémantinon betom sabaf bé de sala tom. Tidéw béno, méntébule, inok waléy tom métintu dob adafay Tuluse.

5

I kénéfintuy Tuluse

¹ Mélaw i Tuluse fénwaléyén betom métintu dob adafa nuwe sabaf bé kéunur tome bé Kadna tome Jesu Kristo. Atin sabaf bé ni rénigo Jesuse, éndaén mékerit i Tuluse betom.
² Atin non bé kéunur tome bé Jesuse, fénfakayén i kégédote bé kégédaw i Tuluse béléewe. Mélaw toow tom fo moror non gétiga tom rémendaw tom moso loo bé Tuluse. ³ Atin békén saén i niy funa tome moror. Moror tom so bé de mérégén géagéwo tom non sabaf bé de kérégénon, waléy tom géfedayday munur. ⁴ Atin amuk géfedayday tom munur, mésuwat i Tuluse betom. Atin amuk mésuwat i Tuluse betom, waléy émbagér i inam tome. ⁵ Atin i inam tome métuman, non fénggitoy Tulusey kégédaw ne betom bé kéiray ne bé Rémogor ne mangéy dob de fédew tom.

⁶ Amun maak do férisu tom séna bé de sala tom brab énda gétabanga tom i lowoh tome, i Tuluse ténabangén betom dob fénemili ne gai. Non ménléhuén i Nga ne Jesus inok fukasé no betom do tete étew. ⁷ Toow fo mérégén i ségétéwe étew méléhu inok tabangé noy métintuwe étew. Gido loo, wén so keey i ségétéwe étew méléhu inok tabangé noy métintuwe étew. ⁸ Endob i Tuluse, fénggitoy noy kégédaw ne betom, non fiyon fo ké ménalsa tom de séna, ménléhu i Kristowe génantino no betom. ⁹ Atin béléewe ni, ménwaléy tom métintu dob adafay Tuluse sabaf bé kéléhu Kristowe. Mélaw toow na fo gétiga tom bé mífukas tom tidéw dob kékukum i Tuluse sabaf bé Kristowe. ¹⁰ Bé gétahe de, sébanil i Tuluse betom, éndob sabaf bé kéléhu i Nga ne, tényakufén man betom. Mélaw non béléewe ni do dumoy Tuluse nén betom, tintu gétiga

tom mífukas tom sabaf bé kétébule i Nga ne. ¹¹ Atin békén saén bé ni! Méoror tom fo toow non bé kégédaw i Tuluse fénggitoy no fénagéw dob Kadna tome Jesu Kristo. Been i niy funay Tuluse ménkédan i kérít ne betom brab tényakufén betom.

I Adame brab Kristowe

¹² I funa nuwe wén i do tete dob duniyae ni, non ménalsa i sunguwe étew féndawét Adam. Atin kéléhu i bayad i salae. Tidéw béno, léménégéb i tete mangéy dob kéluhanay étewe. Mélaw i kéluhanay kélawane méléhu non i kéluhanane ménalsa. ¹³ Fiyon fo ké énda séna niray Moisesey kitabe de, wénén i do sala dob duniyae ni. Endob amun énda sénay kitab de, énda so ménbilang i de sala de. ¹⁴ Gido loo, ménléhu i kéluhanay étewe tidéw dob Adame taman dob Moisese, fiyon foy de étew énda ménalsa ro loo bé kékéfis Adame bé sugu i Tuluse.

I Adame maak anlung Kristowe non wén i gédotéy kélawane tidéw dob berowe. ¹⁵ Endob békén ro ségiléw non i iray i Tuluse békén ségiléw bé sala Adame. Médooy étewe ménléhu sabaf bé sala Adame. Endob toow na fo dakél i kégédaw i Tuluse irayén bé kékésagad ne bé médoowe étew sabaf bé kégédaw Jesu Kristowe. ¹⁶ Atin loo so bé ni, békén ségiléw i kégédaw i Tuluse bé sala Adame. Non mémukum i kélawane sabaf bé sébaane saén sala Adame. Endob amun médooy de étew réménigo médooy do sala, ménwaléy métintuy kélawane dob adafay Tuluse sabaf saén bé kégédaw ne. ¹⁷ Sabaf bé sala Adame, méléhu i kéluhanay kélawane. Endob toow na fo mémégaif i rénigo Jesuse non sabaf bé kégédaw Jesu Kristowe, gédotén i kékésagad i Tuluse brab kénéfintu nuwe. Atin i de étew do waléy métintu sabaf bé kégédaw i Tuluse, beroy Tuluse máguléw.

¹⁸ Mélaw amuk sabaf bé sébaane sala Adame, mémukum i kéluhanane de, ségiléw so bé sébaane fiyo rénigo Jesu Kristowe. Non sabaf bé rénigo Jesuse, mífukas i kéluhanane inok énda mémukum ro brab gédoté roy

umule magufusa. ¹⁹ Non i médoowe ménwaléy ménsala sabaf bé Adame énda modorén bé sugu i Tuluse, éndob médooy ménwaléye métintu dob adafay Tuluse sabaf bé kéodor Jesuse bé sugu i Tuluse.

²⁰ I funay Tuluse nirayén i kitabe inok méuman i kégitone bé salae. Endob amun minut médooy kégitone bé salae, toow na fo méuman i kégédaw i Tuluse bé kéilawane. ²¹ Mélaw fiyon fo ké dakél i bagér i salae non ménléhu i de étew, toow na fo barakatan i kégédaw i Tuluse non féwaléyé no betom métintu. Mélaw méuyag tom taman sa taman sabaf bé Kadna tome Jesu Kristo.

6

Maak ménléhu i tafaye adat

¹ Ati mélaw i fégitungé tome? Wén keey i dufang góbéréh bé fatut fétausé tom kun i késala tome inok méuman i kífésagad i Tuluse brab kégédaw ne betom. Endob békén fo katabawan i nan. ² Enda fakayén ké taus tom mésala non i sunguwe adat tom maak ménléhuén brab ménwaléy tomén métintu. ³ Aw énda gétiga kom de kéluhanan bé amun bénautis tom, fénggito tom ménwaléy tom do dumo Jesu Kristowe, maak ménamung tom so bé kéléhu ne? Non Been i géménantinon betom. ⁴ Mélaw amun bénautis tom maak ménamung tom so bé kéléhu ne brab kélébénge de. Atin sabaf bé barakat i Tuluse, métébule i Kristowe. Ménrigoy ni inok wén soy katom bé mantuwe umul brab adat.

⁵ Non amuk ménamung tom bé kéléhu Kristowe, tintu fo géamung tom so bé kétébule ne. ⁶ Atin gétuwa tom i ni, i tafaye umul tom brab adat tome maak ménléhuén énggéodor bé Kristowe dob kruse, inok i tafaye adat ménsala mékédanén. Mélaw békénén riféy salae betom, non éndaén géfégéso no betom rémigo tete. ⁷ Non i étewe ménléhuén, éndaén gésalaén. ⁸ Atin non maak ménléhu tomén séréngan bé Kristowe, munur

tom bé méuyag tom so betom ro Kris-towe. ⁹ Non gétiga tom éndaén méléhu ségule i Kristowe non métébuleén. Mélaw éndaén gétabanay léhuone de. ¹⁰ Ménléhu saén ségule inok gantino noy kéléhu i kéilawane non bé de sala tom. Atin métébule, brab i umul ney funay Tuluse mésuwat. ¹¹ Mélaw loo so bé ni, fatut tédemé kom bé éndaén kailanga kom i rémigowe sala, non maak ménléhu gom séréngan bé Jesuse. Atin tédem gom i mantuwe umul gom brab adat gome sabaf bé kewaléy gome do dumo Jesu Kristowe brab i umul gomey funay Tuluse mésuwat.

¹² Mélaw, do dumo gu, kagom fédayaén i de tete kétaya kom émfésala bé de lowoh gom dob duniyae ni. Kagom magayun bé de tete. ¹³ Atin kagom fédayaén i réfa i de lowoh gom mésala usaré kom fégérigo gom tete. Yamula iray gom i lowoh gome dob Tuluse inok usaré no bé fiyowe rigonén. Non been i fatute rigoné kom do ménfukasén tidéw dob kéléhue brab wénén i mantu umul gom brab adat. ¹⁴ Mélaw kagomén fédayaén i salae máguléwon begom, non éndaén sémarig gom bé kéodoro kome bé kitabe. Yamula sémarig gom bé kégédaw i Tuluse.

Ikérigowe béfiyowe

¹⁵ Wén keey i dufang góbéréh bé fatut fétausé tom kun soy késala tome non éndaén sémarig tom bé kéodor tome bé kitabe, atin sémarig tom saén bé kégédaw i Tuluse. Endob békén i nan. ¹⁶ Gétiga kom, amuk mamfun gom, waléy gom do rifén. Mélaw amuk modor gom bé amu gome sala, ménléhu gom. Endob amuk modor gom bé amu gome Tulus, waléy gom métintu. ¹⁷ Fésalamatu bé Tuluse non fiyon fo ké riféy salae begom bé do gétah, ménwaléy gom so méégét munur bé toowe kétoro fantag bé Jesuse énggelingoo kom. ¹⁸ Atin amun métangéy gomén tidéw dob salae, ménwaléy gom do métintu sugu-suguéy Tuluse. ¹⁹ I funa kuwe

ménbéréh bé ni ufama fantag bé riféne brab amue, inok magad i kégésobut gome bé kétoro guwe. Bé do gétah, maak do rifén gom bé de tete kétaya kom. Mélaw namfuno kom i de tete do mékérésik rígoné kom brab ménumanan i de sala gom. Endob béléewe ni téfewaléy gom rifén dob métintuwe inok gérigono kom i fiyowe kétayay Tuluse.

²⁰ Bé do gétah, amun riféy salae séna begom, énda gétiga kom i fantage bé fiyowe brab métintuwe. ²¹ Bé do no gai, énda gédoté kom i barase sabaf bé de tete rénigo gom. Kéléhu saén i gédoté kome de sabaf bé de ni sala. Atin béléewe ni mémala gom fantag bé de rénigo gom bé do gétah. ²² Endob béléewe ni mémangéy gomén dob salae brab ménwaléy gom do sugu-suguéy Tuluse. Atin i gédoté kome baras i fiyowe umul taman sa taman brab fiyowe adat funa kom gérigo bé kétayay Tuluse. ²³ Non i étewe mésala, gédote noy bayad i salae, sani kéléhue. Endob i étewe munur bé Kadna tome Jesu Kristo, iray i Tuluse umule magufusa dob beene.

7

Fantag bé kitabe

¹ Do dumogu, gésobuto kom damén i ni non énggétiga kom i fantage bé kitabe. I kitabe wén i atura no bé étewe taman méuyag séna. ² Ufama, i libune wén i bawagén. Ménbéréh dob kitabe bé énda fakayén sétayan bé ségiyowe saliyu bé bawag ne taman méuyag ro séna. Endob amuk ménléhuén i bawag ne, fakayén mawag ségiyo. ³ Mélaw amuk sétayan bé ségiyowe lagéy ké méuyag sénay bawag ne, énggélamfa brab énda nodoro noy kitabe. Endob amuk ménléhuén i bawag ne, fakayén mawag ségiyo brab énda ménusaléen.

⁴ Mélaw do dumogu, ségiléw so bé betome, non amun ménléhuén i Kristowe génantino no betom, maak ménléhu tom so. Mélaw éndaén kailanga no odoro tom i kitabe niray Moisese. Atin béléewe méuyag tom

man séréngan bé Jesuse sabaf bé kétébule ne. Non i betome maak lowoh Kristowe brab Been i uléw tome. Mélaw gérigono tom i atiy kétayay Tuluse. ⁵ Bé do gétah, ménodor tom séna bé de tete kétaya tom. Atin non wén i de médo do énda fakayén dob kitabe, toow fo ménuyot tom de rémigo. Atin non rénigo tom, ménkukum tom bé bayad i salae, sani kéléhue. ⁶ Endob béléewe, munur tomén bé Jesuse, mélaw fénukasén betom dob kitabe. Atin mélaw éndaén kailanga tom i modore bé kitabe inok waléy tom métintu, non amun ménléhu i Jesuse, maak ménléhu tom so funa tom ménfukas. Atin béléewe ni, wén i mantuwe agéwon fatut odoro tom. Been i Rémogor i Tuluse, sani témabangane betom. Mélaw éndaén kailanga tom i modore bé tafaye agéwon inok waléy tom métintu, sani kitabe tidéw dob Moisese.

⁷ Ati mélaw i gébérého tome fantag bé kitabe? Aw been i kitabey funa tome gésala? Békén! Yamula, i kitabe, fénggito no begén i de sala gu. Ufama, amuk énda énggétiga kuy kitabe mano, “Kago mingar,” énda gétiga kuy fantage bé kéingare.

⁸ Mélaw amun énggétiga ku tete i mingare, ménumanan i kéuyot guwe mingar sabaf bé kitabe. Non amuk énda i kitab, énda i bagér i salae. ⁹ Amun énda séna gétiga kuy fantage bé kitabe, énda méuyotu rémigo sala. Endob amun énggétiga kun i kitabe, toow fo ménuyotu rémigo sala, ¹⁰ atin ménwaléy módait ménléhu. I funay Tuluse méniray bé kitabe, inok i de munur de méuyag ro taman sa taman. Endob ménisébélouwe non been uman i funa kuwe ménkukum ménléhu non énda géodoro ku de. ¹¹ Fénggakaray salae begén bé kitabe, atin kénukum i salae begén ménléhu bé kitabe.

¹² Endob i kitabe, tidéw dob Tuluse, brab métintu brab fiyo brab mémétefu.

¹³ Wén keey i dufang gébéréh bé i fiyowe kitab i funa tome ménkukum ménléhu. Endob békén toow i ni. Yamula, de sala tom i funa tome ménkukum ménléhu non énda géodoro

tom i fiyowe kitab émfégito bé de sala. Mélaw sabaf bé kitabe, giton toow fo tete i de sala tom.

¹⁴ Gétiga tom fiyoy kitabe non tidew dob Rémogor i Tuluse. Endob riféy salae begén non kéilawanu saén. ¹⁵ Enda gésobuto kuy rigoné kuwe. Non i kétaya kuwe rigonén, énda gérigono ku de. Yamula gérigono ku uman i kéikaa kuwe rigoné ku. ¹⁶ Atin amuk rigoné kuy éndae fakay dob kitabe, fiyon fo ké mikau de rémigo, giton i kéfagayu kuwe bé métintuy kitabe. ¹⁷ Mélaw, békén begén i rémigowe bé de ni do sala. Yamula rigonéy tatee dob lowoh guwe. ¹⁸ Gétiga ku énda i fiyo dob tafaye adat gu. Non fiyon fo ké méuyotu fo rémigo bé fiyowe, éndob énda gérigono ku de. ¹⁹ Non énda gérigono kuy fiyowe kétaya ku rigoné ku. Yamula gérigono kuy tatee kéikaa ku. ²⁰ Atin amuk rigoné kuy békéné kétaya ku, békén begén i rémigowe de. Yamula rigonéy tatee dob lowoh guwe.

²¹ Ay niy mérigowe dob begéne. Amuk méuyotu rémigo fiyo, élénéy tatee dob lowoh guwe. ²² Endob i fiyowe dob fédew guwe toow fo méuyot modor bé kétayay Tuluse. ²³ Endob i tatee dob lowoh guwe sébanil bé fiyowe dob fédew guwe. Atin fégésé no begén rémigo bé békéné kétayay Tuluse. Mélaw maak ménférisuwu dob salae. ²⁴ Toowu fo mékégédaw-gédaw. Ati gétabange begén inok énda rifénu dob kagéne ni lowoh toow fo tete funa ku mélukum méléhu? ²⁵ I Tuluse, Been saén i gétabange begén. Mélaw toow fo fésalamata kuy Tuluse! Non ténangéyén begén sabaf bé rénigoy Kadna tome Jesu Kristo.

Mélaw i fédew guwe modor bé kétayay Tuluse, fiyon fo ké i lowoh guwe géodor bé tatee.

8

I mantuwe adat

¹ I betome do ménwaléy dumo Jesu Kristowe, énda kukuméy Tuluse

betom. ² Non sabaf bé kewaléy tome dumo Jesu Kristowe, i Rémogor i Tuluse fénukasén betom brab nirayén betom i umule magufusa. Atin mélaw éndaén i mémégés betom mésala funa tom méléhu. ³ I kitabe énda gétabanga no betom, non énda géodoro tom de. Endob i Tuluse, Been i témabangane betom. Sénuguén i Nga ne Jesus inok waléy kéilawan éndob énda i salaén. Tidew béno, ménléhu i Jesuse génantino no betom inok mékédan i de sala tom. Mélaw éndaén kailanga tom i modore bé de tete kétaya tom. ⁴ I funay Tuluse réménigo bé ni inok géodoro tom i fatute dob kitabe. Fakay i ni amuk fémanduoy Rémogor i Tuluse betom, brab éndaén fémanduoy tatee kétayay de lowoh tom betom. ⁵ Non i de étew fémanduoy tatee kétayay de lowoh ro, fégitungé ro saén i fantage bé tatee kétayay de lowoh ro. Endob i de étew fémanduoy Rémogor i Tuluse, fégitungé roy fiyowe loo bé kétayay Rémogor i Tuluse. ⁶ I étewe fémanduoy tatee kétayay lowoh ne, méléhu. Endob i étewe fémanduoy Rémogor i Tuluse, méuyag taman sa taman, atin éndaén mékérít i Tuluse de. ⁷ Non i de étew fémanduoy de tete kétayay de lowoh ro, sébanil bé Tuluse. Non énda modor ro bé kitab i Tuluse non énda gagané ro de. ⁸ I de étew fémanduoy tatee kétayay de lowoh ro, énda géfésuwata roy Tuluse.

⁹ Endob i begome, éndaén fémanduoy tatee kétayay de lowoh gom begom. Yamula fémanduoy Rémogor i Tuluse begom, amuk bat i Rémogor i Tuluse dob begome. Atin i éndae bat i Rémogor Kristowe, békén so kuyug Kristowe. ¹⁰ Endob amuk bat i Kristowe dob de fédew gom, fiyon fo ké méléhu i de lowoh gom sabaf bé de sala gom, méuyag gom taman sa taman non métintu gom dob adafay Tuluse. ¹¹ I Tuluse, Been i téménébulee bé Kristowe. Atin amuk bat i Rémogor i Tuluse dob de fédew gom, tébuleé no so begom bé Rémogor ne bat i dob begome.

¹² Mélaw do dumo gu, kailanga tom

i modore, éndob békén i tetee kétayay de lowoh tom i fatute odoro tom. ¹³ Non amuk odoro kom i fémandu i tetee kétayay de lowoh gom, méléhu gom. Endob amuk odoro kom i fémandu i Rémogor i Tuluse, tagaké kom i tetee tafay adat brab méuyag gom taman sa taman. ¹⁴ Non i de fémanduo Rémogor i Tuluse, beroy de nga i Tuluse. ¹⁵ Non i Rémogor i Tuluse nirayén dob betome, békén fénwaléyén betom do rifén mégilak bé Tuluse. Yamula fénwaléyén betom do nga i Tuluse. Atin sabaf bé Rémogor i Tuluse, gétawaga tom i Tuluse "Boh tom." ¹⁶ Atin i Rémogor i Tuluse, Been i émfégésobute betom bé do nga Tulus tom. ¹⁷ Atin amun do ngaén betom, gédoté tom moso i de kéfionon fénasadén betom. Atin gédoté tom soy de éntingayén gédoté Kristowe. Non amuk mérasy tom ségiléw bé kérasay Kristowe, gédoté tom i toowe fo fiyo séréngan bé Beene.

Igaiwe moso

¹⁸ Atin dob karang guwe de, ulanden bé de kérasay tom dob duniyae ni béléewe. Non toow na fo dakél i bantugane gédoté tom moso. ¹⁹ Non i kéluhanay de éntingayén lénimbag i Tuluse, toow fo ongot-ongoté roy gaiwe fégitoy Tulusey de ngaén. ²⁰ Non i de éntingayén lénimbagén, éndaén ménfiyo ro, békén dob karowe kétayan éndob dob kétayay Tuluse non Been i kéménukume de. Endob wén soy inam de, ²¹ non i kéluhanay lénimbag ne, fégaliné no so inok éndaén mérénah ro, brab éndaén riféy kéléhue bero, non féwaléyé Tuluse bero mantu loo bé kífewaléyé ne bé de ngaén mantu. ²² Non gétila tom taman béléewe ni, i kéluhanay de lénimbagén démorong ro loo bé kédorong i kéumahane libun. Non ongot-ongoté roy kífewaléye bero mantu. ²³ Atin békén saén i berowe. Non i betome, énggédot tomén i Rémogor i Tuluse, sani tandaé bé wén nay iray i Tuluse betom. Mélaw démorong tom so dob de fédew tom

bé kéongot-ongot tome bé kífewaléy i Tuluse betom do ngaén brab kífegali nuwe bé de lowoh tom. ²⁴ Ménfukas tom sabaf bé inam tome bé Tuluse émféantu betom inok méuyag tom taman sa taman. Endob amuk gito tomén, békén inam. Non wén i inam tom amuk énda séna gito tom i no ongot-ongoté tom. ²⁵ Endob amuk wén i inam tom atin énda séna gito tom i no inam tom, témingkél tom ongot-ongot.

²⁶ Loo so bé nan i kétabangay Rémogor i Tuluse betom amuk énda tintu méégét i kéunur tome. Non énda gétila tom i atiy fatute dasala tom. Endob fédasaléy Rémogor i Tuluse betom dob de fédew tom usaré noy de éntingayén énda góbérého tom de. ²⁷ Atin i Tuluse, sani gétila noy de fédew tom, gésobuto noy kédasal i Rémogor ne non démasal mongot témabang betom do munur loo bé kétayay Tuluse.

²⁸ Atin gétila tom i ni. I de betom fénimu i Tuluse, sani de étew fénémilién sabaf bé kétaya nuwe, fiyon atiy mérigowe dob betome, rigonéy Tulusey nan bé kéfiono tome. ²⁹ Non bé do gétilah, énggétigay Tuluse nén atiy isuwe do waléy ngaén. Atin fénémilién bero inok rénigo no bero waléy loo bé Nga ne Jesus, inok i Beene waléy ofo tom. ³⁰ Atin i de betom do fénémili, fénunurén betom, atin féntintu no betom, maak énda i sala tom. Atin féamungé no so betom bé kégérotor Kristowe.

I kégédaw i Tuluse

³¹ Amuk fégitungé tom i fantage bé ni, gétila tom i ni: I Tulusey dumo tome. Mélaw énda i gétaban betom. ³² I Tuluse énda ménikaén miray bé buntunge Ngaén Jesus. Yamula ténulakén fénggéganti no betom kéluhanan. Amuk loo bé nan i kégédaw ne, irayén so betom i kéluhanay kailanga tome. ³³ Enda i gétebo betom do fénémili i Tuluse. Non Tulusey ménféwaléye betom métintu dob adafa nuwe. ³⁴ Enda i

gékukum betom. Non i Jesu Kristowe, Been i ménléhu brab méntébule brab déméniyat mangéy dob kuwonoy Tuluse inok ongoté no fésagadan tom. ³⁵ Enda i gékédan bé kégédaw Kristowe betom. Fiyon fo ké kérégénan tom, taloo no wén i émférasay betom, taloo no mélawayaf tom, taloo no méskinan tom, taloo no kakaidan tom, taloo no méléléhu tom, énda gékédana roy kégédaw Kristowe betom. ³⁶ Non wén i Ménsulate Kébéréh i Tuluse mano, "Kakaidan tom féléhuén sénga tékélid sabaf betom i do kuyugén. Maak do bili-bili tom gédét do sumbalién." ³⁷ Mélaw fiyon fo ké kakaidan tom, témaban tom so sabaf bé Jesuse sani mégédawe betom. ³⁸ Non gétiga ku énda i gékédan bé kégédaw i Tuluse betom, fiyon fo ké méléléhu tom taloo no méuyag tom. Fiyon i de télaki taloo no do saitan, énda gékédana roy kégédaw Jesuse betom. Enda i éntingayén dob ni béléewe taloo no mangéy séna dini, gégaga de. I de barakat ro énda gégaga ro. ³⁹ Enda i éntingayén dob rotoro, taloo no dob ménaléme, gégaga de. Enda i sébaan lénimbag gékédan bé kégédaw i Tuluse betom fénagéwén dob Kadna tome Jesu Kristo.

9

Fantag bé de Judio

¹ Wén i bérhéhé ku begom. Atin i ni bérhéhé ku, toow fo toow. Munuru bé Kristowe, mélaw énda témugiu. I Rémogor i Tuluse bati dob fédew guwe brab mémantuon begén. Mélaw gétiga ku, toow i ni bérhéhé ku begom. ² Toow fo tete i fédew guwe béléewe ni brab démawét i fédew guwe non bé de étew gu, do dumo gu Judio, non énda munur ro bé Kristowe. ³ Amuk gagane ku saén, méuyotu damén mékukum gémantinon bero, brab waléyu sésuway bé Kristowe, inok i de dumo gu do Judio waléy ro munur bé Kristowe. ⁴ Beroy de tényakuf i Tuluse bé do gétah maak do ngaén. Fénggito no beroy barakat ne, brab fénasada no bero féfiyoné

no bero. Brab nirayén beroy kitabe, brab fatute adat bé kékengadafe, brab do fasad. ⁵ Fénemili i Tulusey de katufua ro. Brab i Kristowe, ségetéw bero amun ménwaléy kéilawan, non ménmah ségetéw Judio. Mélaw i Tuluse, sani méguléwe bé kéluhanane, médayéw dam taman sa taman! Amen!

⁶ Enda bénréh gu de ké énda tumanéy Tulusey fasad ne dob de Judio. Non békén kéluhanay de Judio do tintu méngintulus loo bé fatute damén.

⁷ Békén kéluhanay de Judio, sani de séfu Abraham, do tintu méngintulus. Non bénréh i Tuluse dob Abrahame bé do gétah mano, "Do séfu i nga me Isak saén i de tintu séfuém." ⁸ Ay niy atag i ni, békén kéluhanay de séfu Abraham do nga i Tuluse. Non i Isake ménmah sabaf bé kénéur Abraham bé fasad i Tuluse. Atin ségiléw so béléewe ni. Non i de étew do séfu Isake tidew dob fasad i Tuluse dob Abrahame, i ménwaléye do nga i Tuluse. ⁹ Non fénasad i Tuluse bé Abrahame mano, "Bé fatute gai, séfuleu. Atin bé bénno, géfégéngé i bawag me Sarah ségetéw nga lagéy."

¹⁰ Atin békén saén i ni. Non i nga ruwe féndawét Isak wén i ruwo gétew ngaén bé bawag ne Rebekah. Beroy de séfing féndawét Jakob brab Esaw.

¹¹⁻¹² Atin amun obor sénay Rebekahe de, bénréh i Tuluse de mano, "I ofoe de waléy sugu-suguéy tuwaréye de." Mélaw bénréh i Tulusey fantage bé ati mérigowe dob de ni do nga, fiyon fo ké énda séna ménmah ro, brab fiyon fo ké énda séna réménigo ro fiyo taloo no tete. Rénigoy Tulusey ni inok gétiga tom i kékemili i Tuluse bé békén sabaf bé fiyowe rigonéy de étew taloo no bé tete, yamula sabaf bé kétayay Tuluse saén. ¹³ Non wén i Ménsulate Kébéréh i Tuluse mano, "Toow na fo fénimu guy Jakobe bé Esawé."

¹⁴ Amuk loo bé ni, aw gébérého tom ba énda méméntang i rigonéy Tuluse? Békén! ¹⁵ Non ménbéréh i Tuluse dob Moisese bé do gétah mano, "I étewe kétaya ku kéurayay na guwe, méuray i na guwe de. Atin mégédawu

bé étewe kétaya ku kégédawa ku.” ¹⁶ Mélaw i funay Tuluse féfyoné noy étewe békén sabaf bé rénigoy étewe loo ké kétayay étewe. Yamula i funa nuwe saén émféfiyo bé étewe non bé kégédaw ne de. ¹⁷ Non wén i ni Ménusat Kébérélh i Tuluse dob datue dob Egipto mano, “I funa kuwe beem ménféwaléy datu inok fégito guy barakat guwe sébanil beem, atin émbantugu mélaw dob kéluhanay sugud i duniyae ni.” ¹⁸ Mélaw gétiga tom mégédaw i Tuluse bé de étew kétaya no kégédawa no. Brab fétégasé noy uléw i de étew kétaya no fétégasé no.

¹⁹ Atin amuk sumbulo kom begén bé bénréh guwe makom, “Sedek kukuméy Tulusey de étew ké énda munur ro sabaf bé kékétégas i Tuluse bé de uléw ro? Enda i géatuh bé Tuluse.” ²⁰ Endob énda i kuwagib gom sémumbul démowoy bé Tuluse loo bé nan. Ufama, i binanggæ énda gérikamo no dob réménigowe de mano, “Sedek rénigo mo begén loo bé ni?” Ségiléw so bé étewe, énda fatut riklamo no dob Tuluse. ²¹ Non i rémigowe bé ruwowe timan binangga, fiyon fo ké sébaan saén i fégérígowe de, sani métégase fantad, wén i kuwagibén rénigo bé sébaane de toow na fo fiyo brab balilaga.

²² Ségiléw so bé rénigoy Tuluse. Méuyot i Tuluse émfégito bé kékérit ne brab émfégétigan bé barakat ne. Atin toow fo téningkélén i kékérit ne bé de étew fatut mékukum. ²³ Atin méuyot so émfégito bé toowe kéfiyo no, énggiton dob dakéle kégédawén betom do ménafayén féwaléyé no fiyo loo bé Beene. ²⁴ Non betom i de fénemili i Tuluse, békén saén tidéw dob de Judio, yamula fiyon foy tidéwe dob de békén Judio so. ²⁵ Non wén i Kébérélh i Tuluse fénsulatén bé Hoseawe mano, “I de étew békén kagén, féwaléyé ku bero do kagén étew. Atin i de étew énda séna mégédawu bero, mégédawunén bero. ²⁶ Atin dob ingéde bénrého ku bé békén ro do kagén étew, diyo fédawétén ro do nga i méuyage Tulus.”

²⁷ Atin ménbérélh soy Isaiase bé do gétah fantag bé de Judio mano, “Fiyon fo ké médooy de Judio loo bé kedooy de farék dob de dénsaan énda kéluhana ro méfukas dob de sala ro, éndob kloh saén. ²⁸ Non i Kadnane fagayasé no kukumén i kéluhanay kéilawane.” ²⁹ Atin ménbérélh soy Isaiase bé do gétah mano, “I barakatane Kadnan Tulus, amuk énda méuray i na nuwe betom do Judio, météy tom mékukum kéluhanan loo bé kékukum ne bé de étew dob Sodom brab dob Gomora.”

³⁰ Ay niy atag i ni bénréh gu. I de békén Judio, fiyon fo ké énda téménlama ro waléy métintu, wén i do ménwaléy métintu bero dob adafay Tuluse sabaf bé kéunur ruwe. ³¹ Endob i de Judio, énda waléy ro métintu fiyon fo ké télamané roy waléye métintu bé kéodoro ruwe bé kitabe. ³² Sede? Non énda séménarig ro bé Jesu Kristowe. Yamula séménarig ro bé de rigoné ro. Mélaw maak énggébangkud ro dob dakéle batéw. ³³ Non wén i Ménusat Kébérélh i Tuluse mano, “Fédiyoé kuy batéwe dob Sion, sani ingéd i de Judio. Atin i de étew énda méninugut ro de, maak gébangkud ro brab mélawu ro. Endob i de étew munur ro de, féfyoné ku bero.”

10

¹ Do dumo gu, ay niy kétaya kuwe brab kédasal guwe dob Tuluse: Méuyotu de fo ké méfukas i de dumo gu Judio dob de sala ro. ² Gétiga kuy témantu ro ménintulus, éndob békén katabuwan i kékéngintulus ruwe non békén toow i kétoroe unuro ro. ³ Enda nodoro roy aguwone fantag bé kékétintuy Tuluse bé étewe. Yamula téménlama ro rémigo karo agéwon waléy métintu, sani kéodoro ruwe bé kitabe. Atin mélaw énda ménodor ro bé agéwoy Tuluse. ⁴ Wén i mantuwe agéwon mangéy dob Tuluse. Been i kéunure bé Jesu Kristowe. Mélaw i de munur bé Kristowe waléy ro métintu. Atin éndaén kailanga roy modore bé kitabe inok waléy ro métintu.

⁵ Sénulat Moisesey fantage bé kéwaléye métintu sabaf bé kéodorone bé kitabe mano, "Amuk wén i étew tintu fo modor bé kitabe énda félisé no de, gédoté noy umule magufusa." ⁶ Endob ay niy Ménsulate Kébérélh i Tuluse fantag bé kéwaléye métintu sabaf bé kéunure mano, "Kagom fégitungén de ké kailanga kom sélédén i Kristowe dob lawayo inok féangéyé kom fantad mangéy dob betome. ⁷ Atin kagom fégitungén de ké kailanga kom i mangéyé dob gonoy de ménléhu inok angéyé kom tébuleén i Kristowe." ⁸ Non ay niy Ménsulate Kébérélh i Tuluse mano, "Toow fo gédét i kékérélh i Tuluse dob begome. Diyo dob de ba gom brab dob de fédéw gom." Atin been i niy Fiyowe Uret fantag bé kéunure bé Kristowe ureté key. ⁹ Non amuk fayagé kom i Jesuse Kadnan bé de ba gom, brab amuk toow fo méginugut gom dob de fédéw gom bé ténebule i Tulusey Jesuse, méfukas gom dob de sala gom. ¹⁰ Non i kéunure dob de fédéw i funane waléy métintu dob adafay Tuluse. Brab bé kéfayage de bé baey funane méfukas dob de sala. ¹¹ Non wén i Ménsulate Kébérélh i Tuluse mano, "I kéluhanay munure de gédoté ro saén i fiyowe." ¹² Non dob adafay Tuluse énda i sébidanay de Judio brab de békén Judio. Enda i ramigoy Tuluse. Non i Kristowe, Been i Kadnay kéluhanay de munur dob Beene, brab tabangé noy kéluhanay de témwag mongot dob Beene. ¹³ Non wén i Ménsulate Kébérélh i Tuluse mano, "I kéluhanay de témwag bé Kadnane mongot tabang, méfukas ro."

¹⁴ Endob énda gétawagay de étew de amuk énda séna munur ro de. Atin énda géunur ro amuk énda séna énggelingoo roy fantage bé Jesuse. Atin énda gélingoo ro de amuk énda i muret fantag bé Jesuse dob berowe. ¹⁵ Atin énda i géuret de amuk énda i séménugu bé murete. Wén i Ménsulate Kébérélh i Tuluse fantag bé ni mano, "Toow fo fiyoy kégumah i de étew magéw mangéy muret bé Fiyowe

Uret." ¹⁶ Endob békén kéluhanay de mégélingo munur bé Fiyowe Uret. Non wén i sénulat Isaiase dob Ménsulate Kébérélh i Tuluse mano, "Kadnan, kloh i de munur bé uret geye." ¹⁷ Mélaw géunur i étewe amuk gélingoo noy toowe uret fantag bé Kristowe.

¹⁸ Wén keey i émbérélh mano, "I funay de étew énda munur non énda séna énggelingoo ro de." Endob békén toow i nan non i kéluhana ruwe énggégélingo ron. Non wén i Ménsulate Kébérélh i Tuluse mano, "I urete énggelingoon dob kéluhanay sugud i duniyae, atin i kékérélh ménlegéb dob kéluhanane." ¹⁹ Atin amuk wén i émbérélh mano, "Endob i de Judio énda énggésobuto ro de keey," énda toow i nan. Non sénulat Moisese dob Ménsulate Kébérélh i Tuluse mano, "Fédaléwé ku begom do Judio non fukasé kuy de békén Judio. Atin fékérélh ku begom non mégédawu bé de étew énda énggétiga ro Begén bé do gétah." ²⁰ Atin ménkéntay i késulat Isaiase de so mano, "I de étew énda sénléd ro Begén, énggétiga roy fantage bé Begéne non fénfégétiga ku bero." ²¹ Endob bénréhén i fantage bé de Judio mano, "Toow fo métégas i de uléw ro brab énda modor ro bé kétaya kuwe. Non fiyon fo ké démoyun tawagé ku bero, éndob mika ro mégélingo."

11

Fantag bé de Judio moso

¹ Gido loo, kagom fégitungén de ké téragak i Tuluse nén i de Judio. Fiyon i begéne, ségétewu so Judio tidéw dob katufua keye Abraham brab ségétewu so séfu Benjamen, ségétew so Judio. ² I Tuluse énda téragakén i de kaan do étew fénémilién bé do getah. Gétiga kom damén i sénulat Eliase fantag bé sala i de Judio. Déménasal i Eliase dob Tuluse mano, ³ "Kadnan, fénléhu i de Judioy de sénarigo mo muret bé kékérélh me. Atin généba roy de ahayan do tulakan gonoy de étew méngadaf Beem. Atin begén séden i ménsamae méngadaf

Beem, brab méuyot ro so méméléhu begén.” ⁴ Endob i Tuluse séménumbul mano, “Wén i fitew ngibu do dumomo do Judio fénliyu gu inok énda mamung ro méngadaf bé kéninontowe Baal.” ⁵ Ségiléw so bé béléewe ni, non wén soy kloh fénémili i Tuluse bé de Judio sabaf bé kégédaw ne bero. ⁶ Fémilié noy de étewén békén sabaf bé de rénigo ro, yamula sabaf saén bé kégédaw ne bero. Non amuk fémilié noy de étew sabaf bé galbék ruwe, békén sabaf saén bé kégédaw ne bero.

⁷ Amuk loo bé nan, i de Judio énda gito roy sélédé ruwe, sani kétintuwe. Non kloh saén bé de Judiyo ménwaléye de métintu, sani de fénémili i Tuluse. Atin i de dumoy de ménwaléy métégas i de uléw ro. ⁸ Non wén i Ménsumate Kébéréh i Tuluse mano, “I Tuluse fénwaléyén bero énda géfégitung brab énda gégito brab énda gégélingo inok énda gésobut ro taman béléewe ni.” ⁹ Atin bénréh Dabide so dob Ménsumate Kébéréh i Tuluse mano, “Géfégitung ro damén bé énda i sala ro non bé de médooy do kéfyonon niray i Tuluse bero. Mélaw mékukum ro damén. ¹⁰ Waléy ro damén do langafén, inok énda gégito ro. Brab waléy ro damén do sungkungan taman sa taman sabaf bé de émbégat kérégénon oboé ro.”

¹¹ Mélaw i de dumoy gu do Judio maak énggébangkud ro sabaf énda ménunur ro bé Kristowe. Endob kagom fégitungén de ké ménlawu ro brab énda gégétindégoy Tuluse bero. Non i kéika ruwe bé Kristowe, ménwaléy kéfyonoy de békén Judio. Non i urete fantag bé Kristowe ménlégbé dob de békén Judio funa ro ménfukas dob de sala ro. Ménrigoy ni inok i de Judio waléy ro médaléw. ¹² I kégésala i de Judiyo funay kéluhanay étewe fénfiyoy Tuluse. Non sabaf bé kéika i de Judio de, ménwaléy do munur i de békén Judio. Mélaw méumanan i kéfyonone iray i Tuluse bé gaiwe gésénule i de Judio brab munur ro bé Kristowe.

Ufama bé Kayéwe

¹³ Atin fantag man bé begome do békén Judio, wén i béréhé ku begom. I begéne ségétewu apostol sénugu mangéy dob begome do békén Judio. Atin i funa kuwe magayas gémalbék, ¹⁴ inok i de dumoy gu do Judio waléy ro damén médaléw bé kékukase begom funay de dumoy bero waléy so moso munur bé Kristowe inok méfukas ro so. ¹⁵ Non amun ménika i Tuluse bé de Judio, énggésénule i de békén Judio atin ménwaléy ro do dumoy Tuluse. Atin mélaw méumanan i kéfyonone iray i Tuluse amuk séfule i de Judio waléy dumoy Tuluse, non maak do ménléhu do méntébule.

¹⁶ Atin non i Abrahame munur bé Tuluse, wén so mosoy do séfuén waléy munur bé Tuluse. Non amuk fiyoy darir i kayéwe, fiyo soy de fongo no. ¹⁷ I de Judio ségiléw ro bé kayéwe mégonok. Atin Tulusey gefee de. Atin kénléngén i dumoy de fongo. Atin i begome, sénufat i Tuluse begom diyo atin fénwaléyén begom do mantu fongoy kayéw i Tuluse. Mélaw gégedot gom so do kéfyonon tidéw dob Tuluse ségiléw bé de Judio. ¹⁸ Endob kagom fégitungén de ké toow gom fo gérotor na bé de Judio. Non ségiléw gom so do falan fongo. Atin fatut gétiga kom i ni, i darire uyagé noy fongowe, békén i fongowey muyage bé darire.

¹⁹ Atin amuk émbéréh gom makom, “I Tuluse kénda noy de dumoy de Judio inok tanggafé no betom do békén Judio.” ²⁰ Toow i nan. Endob i funa ruwe ménkédan non énda munur ro. Atin i funa kome ménsumfat non munur gom. Mélaw ingat gom, brab kagom félangka-langka. ²¹ Non amuk kénléng i Tulusey de sungu do fongo sani de Judio, kéléngé no so begom do mantu fongo amuk témerén gom so munur. ²² Mélaw énggiton i kégédaw i Tuluse brab kékukum ne. Kukumé noy de étew énda munur ro. Endob toow fo mégedaw begom amuk fédayday gom témayakuf bé kégédaw ne. Endob amuk énda fédayday gom, kédané no begom loo bé de sungu do fongo. ²³ Atin i

de Judio, amuk éndaén fédayday ro mikä bé Tuluse brab amuk munur ro bé Jesuse, tayakuféy Tuluse man bero brab sumfaté no bero dob sunguwe gonon dob kayéw ne non fakay rigonéy Tulusey ni. ²⁴ Non amuk i de fongo tidéw dob ségiyowe kayéw, sani begome do békén Judio, fakay sumfaté no dob kayéw ne, toow na fo magad i késumfat ne ségule bé de fongo tidéw dob nan kayéw, sani de Judio.

I kégédaw i Tuluse

²⁵ Do dumo gu, méuyotu de fo ké gétiga kom i toowe tidéw dob Tuluse fiyon fo ké énda gésobutoy de étew de bé gétahe. I funa kuwe de émfégétigan begom inok énda fédayéw-dayéw gom non makom ké toow gom na fo gérotor bé de Judio. I kétegas i uléw i de Judio, énda démaydayén. Non wén so moso i gai gésénule ro. Been i gaiwe moso ké munur i kéluhanay de békén Judio fénémili i Tuluse. ²⁶ Tidéw béno, i kéluhanay de Judio mífukas ro so. Non wén i Ménsulate Kébérén i Tuluse mano, "Wén i mémukase gégumah tidéw dob de Judio inok féwaléyé no métintuy de Judio. ²⁷ Atin kédané kuy de sala ro loo bé fénasad guwe bero." ²⁸ I de dumo bé de Judio ménwaléy ro sébanil bé Tuluse non énda munur ro bé Fiyowe Uret. Ménrigoy ni inok mífukas gom do békén Judio. Gido loo, mégédaw i Tuluse bé de Judio non beroy de fénémilién, atin non bé fasad i Tuluse dob katufuay de Judio. ²⁹ Non i Tuluse énda mífegalín i kégítung ne bé atiy fémilié nuwe brab iraya nuwe kéfiyonon. ³⁰ Atin fantag man bé begome do békén Judio, bé do géyahé énda modor gom bé de sugu i Tuluse. Endob béléewe énggédot gom i kégédaw i Tuluse non fénlis i de Judio. ³¹ Atin loo soy berowe, non fiyon fo ké énda modor ro bé de sugu i Tuluse béléewe ni, fakay i Tuluse méuray i na nuwe bero brab fésagadé no bero moso loo bé rénigo nuwe dob begome sabaf bé kégédaw ne. ³² Non i Tuluse, maak

fénférisu noy kéluhanay de étew sabaf bé de sala ro brab fénggit no médait ro mékukum. I funa nuwe réménigo bé ni inok mégédaw bé kéluhanane bé kégésagad ne.

³³ Toow fo mégédaw i Tuluse! Toow fo gétigan i Tuluse brab métiledtéd! Enda i gésobut bé kégétiga nuwe taloo no rigoné nuwe. ³⁴ Non wén i Ménsulate Kébérén i Tuluse mano, "Enda i étew gésobut bé kégétigay Tuluse taloo no kégítung ne. Atin énda i géféginau bé Tuluse." ³⁵ Atin wén soy Ménsulate Kébérén i Tuluse mano, "Enda i géfélét dob Tuluse inok wén i utongén." ³⁶ Non i Tulusey léménimbage bé kéluhanay de éntingayén, brab Beeney muyage brab méguléwe bé kéluhanane. Atin i kéluhanay de éntingayén kaan inok médayéw. Médayéw damén i Tuluse taman sa taman. Amen.

12

I galbéké kay Tuluse

¹ Mélaw do dumo gu, sabaf bé dakéle gédaw i Tuluse betom, ongoté ku dob begome ké fédaya gom i Tuluse méguléwon begom. Been i maake tulak gom énda méléhuén. Fatut tintu fo fiyoy rigoné kome inok mésuwat i Tuluse de. Been i fatute kégéntulus gom. ² Atin kagom miring bé adat i de tete dob duniyae ni. Yamula fédaya gom i Tuluse fégaliné no begom bé kégéwaléy ne mantu bé de kégítung gom. Tidéw béno, gétya kom i kétayay Tuluse sani fiyowe brab métintuwe brab mékésuwate.

³ Atin non niray i Tuluse begén i aturane, bérhéku begom i ni: Kagom fégítungén de ké toow gom na fo gérotor bé de dumo gom. Yamula téritantad gom brab i séngae ségétew begom fatut kékémarang bé lowoh ne loo bé kékunure niray i Tuluse dob beene. ⁴ Ufama, fégítung gom i lowoh i étew. Wén i médo do réfaén. Atin i de réfa lowoh békén ségiléw i de rigoné ro. ⁵ Atin ségiléw so bé niy betome do munur bé Kristowe.

Non fiyon fo ké médo tom, ménwaléy tom maak do réfa i lowoh Kristowe. Atin maak sésumfat tom kéluhanan. ⁶ Toow fo mégédaw i Tuluse. Non tidéw dob Beene wén i do séségiyo-giyo kéfurungo tom. Mélaw fatut rigonéy séngae ségétew i kéfurungone niray i Tuluse de. Amuk i ségétéwe betom furung muret bé kékérél i Tuluse, fatut muret loo bé kéunure niray i Tuluse de. ⁷ Amuk furung go tétabang, tabang go. Amuk furung go témoro, toro go. ⁸ Amuk furung go émféfiyo fédew, rigo mo. Amuk furung go mi-ray, iray go témantu. Amuk furung go méguléw, fégéror go féguléw. Amuk furung go mégédaw, férorém i na muwe mégédaw.

⁹ Atin békén ubo-ubo saén i kégédaw gome bé de dumo gom. Atin fatut ikaa kom i tete. Atin lékafit gom dob fiyowe. ¹⁰ I betome, do sédumon tom sabaf bé Kristowe, mélaw fatut tom ségédaw. Atin fatut méraan i na tome séfégadat. ¹¹ Kagom faukén, yamula fatut fégéror gom rémigo bé kétayay Kadnane sabaf bé fiyowe fédew gom. ¹² Fatut moror tom non wén i inam tom dob Tuluse. Atin fatut témingkél tom bé de mérégén. Atin fatut démoyun tom démasal. ¹³ Atin fatut sétukidé tom i étingayéné katom dob de dumo tom munur bé Kristowe amuk méskinan ro. Brab fatut tayakufé tom i de étew dob de lawi tom fiyon fo ké énda gélolo tom de séna.

¹⁴ Kagom ongotén i kékukum i Tuluse bé de étew émférasay begom. Yamula fatut dasal gom dob Tuluse inok féfiyoné no bero. ¹⁵ Fatut mamung tom moror bé de étew moror brab mamung tom kémérew dob de étew kémérew. ¹⁶ Fatut waléy sébaan i fédew tome do munur bé Jesuse. Atin kagom félangka-langka, yamula fatut tom séloyuk bé de étew térfantad. Atin kagom fégitungén de ké do toow gom fo métillédtéd.

¹⁷ Amuk wén i réménigo tete dob begome, kagom sémuli. Yamula fatut rigo gom saén i fiyowe inok

énda i géadowy begom. ¹⁸ Rigo gom i fiyowe taman gagani kom inok énda i ségiyo étew mémérit begom. ¹⁹ Atin do dumo gu, fégétédém gom i ni, kagom sémuli bé tete. Yamula fédaya gom i Tuluse sémuli bé kérít ne. Non wén i Ménsulate Kébéréh i Tuluse mano, “Begén i sémuli. Begén i kémukum, bang i Kadnane.” ²⁰ Atin fatut odoro tom i ni Ménsulat Kébéréh i Tuluse mano, “Amuk mélawayaf i sébanile beem, féamaém. Atin amuk térumén, féinémém. Non amuk rigoné moy ni, waléy de mémala.” ²¹ Kagom fédayaén i tete sémugu begom rémigo tete. Yamula rigo gom fiyo inok tabanan i tete.

13

Fantag bé de gémamak kukuman

¹ Fatut i kéluhanay étewe modor bé sugu i de gémamak kukuman. Non i kéluhanay méguléwe, nirayay Tuluse bero aturan. Atin i ménfétindége bé gobernowe, Tulus. ² Mélaw i sébanile bé gobernowe, sébanil bé féntindég i Tuluse, atin mélaw mémukum i no étew. ³ Non i de rémigo fiyo énda kailanga ro mégilak bé de gémamak kukuman. Yamula i de rémigo tete kailanga ro mégilak ro bero. Amuk méuyot gom ké énda i funa kom mégilak bé de méguléw, rigo gom saén i fiyowe. Atin dayewé ro so begom. ⁴ Non i de méguléw, berowey sugu-suguéy Tuluse inok fiyoy goho kome. Endob amuk rémigo gom tete, fatut mégilak gom bero non wén i kuwagib ro kémukum. Berowey suguéy Tuluse kémukum bé de rémigo tete. ⁵ Mélaw fatut tom modor bé sugu i de gémamak kukuman. Békén saén sabaf bé kékukum ruwe éndob sabaf so bé gétiga tom i fatute.

⁶ Been i ni soy funa tome mayad buwis. Non i de méguléw, berowey de sugu suguéy Tuluse amuk rigoné roy fatute rigoné ro. ⁷ Mélaw fatut bayada tom bé katabuwaney kéluhanay buwis tome. Atin fatut fégadata tom i de gémamak kukuman.

⁸ Kagom mutong. I maake utong gom saén i kégédaw i dumo gome, atin bayada kom bé gédawe sénga tékélid. Non i tintuwe mégédaw bé dumo nuwe tumané noy kitabe. ⁹ Non wén i mén sulfate dob kitabe mano, "Kagom lémamfa. Kagom méméléhu. Kagom ménakaw. Kagom mingar." Atin i de ni sugu brab de dumo de, fakay odoro tom amuk modor tom bé ni sugu mano, "Fégédaw go bé dumo muwe, ségiléw bé kégédaw me bé kaame lowoh." ¹⁰ I étewe mégédaw bé dumo nuwe, énda rigoné noy tetee dob beene. Mélaw i kégédawe, been i niy kétumane bé kéluhanay de kitab.

¹¹ Atin fatut ségédaw tom non gétiga tom i ni gai. Endaén mérugayén tidéw béléewe, séfule i Kristowe. Béléewe toow na fo gédét i nan gai bé amun méngganay gomén munur bé Kristowe. Mélaw fatut mingat tom de brab kagom iringén i ségétewe fidong. ¹² Non béléewe ni maak kélungonon éndob gédétén fuweh, sani késéfule Kristowe. Mélaw fatut kédané tom i de tete adat tom tidéw dob délémone. Atin fatut tom rémigo fiyo non been i niy maake kulangé tom niray Kristowe betom do étew bati dob géfekaya. ¹³ Fatut rigoné tom i fiyowe loo bé fatute rigonén dob géfekaya. Mélaw kagom téolo-olon, taloo no mamung bé de tete karagiya, kagom sétayan bé ségiyowe saliyu bé bawag gome, kagom sékrit, brab kagom médaléw. ¹⁴ Yamula ongot gom dob Kadnane Jesu Kristo tabanga no begom rémigo bé fatute. Atin kagom odoron i de tete kétayay de lowoh gom loo bé tafaye adat gom.

14

Fantag bé amaéne

¹ Amuk wén i dumo gom munur bé Kristowe, éndob énda séna méégét i kéunur ne, tayakuf gom. Atin kagom séédél de ké ati kaane karang. ² I étewe méégét i kéunur ne, gékaranga noy fakay amaé noy kéluhanay de amaén. Endob i étewe énda séna méégét i kéunur ne, karangé noy

fénéngalaf saén i fakaye amaé no. ³ I étewe mama bé kéluhanay amaéne, békén fatut siyawé noy dumo nuwe ké mama saén fénéngalaf. Atin i étewe mama saén fénéngalaf, békén fatut dowoyé noy dumo nuwe ké mama bé kéluhanane. Non ségiléw ro ténayakuf i Tuluse bero. ⁴ Enda fatutén ké kukumé tom i dumo tome. Non ségiléw tom do sugu-suguéy Tuluse. Mélaw Tulus saén i fatute kémukum betom bé ati fiyowe brab tete. Atin i dumo gome munur bé Jesuse rigoné noy fiyowe non i Kadnane témabanga ne de.

⁵ Loo so bé de gai. Wén i do étew kémarrang bé wén kun i toow na fo mékétéfu gai. Endob wén soy do ségiyo étew kémarrang bé i kéluhanay de gai fantay-fantay ro dob adafay Tuluse. Fatut fégitungéy séngae ségétew i kétayay Tuluse. Tidéw béo fatut rigoné noy ati karangé nuwe kétayay Tuluse. ⁶ Amuk wén i étew karangé no wén i gai toow na fo mékétéfu, rigoné no inok basana noy Kadnane. Amuk wén i étew mama bé kéluhanay amaéne, rigoné no inok basana noy Kadnane. Gétiga tom i ni non fésalamata no dob Tuluse sabaf bé amaé no. Atin amuk wén i étew énda mamaén bé kéluhanay de amaén, rigoné no inok basana noy Kadnane brab fésalamata no so dob Tuluse. ⁷ Non i betome do munur bé Jesuse, i funa tome méuyag brab méléhu békén inok rigoné tom saén i kétaya tome. ⁸ Yamula amuk méuyag tom séna, rigoné tom i funay Kadnane médayéw. Brab amuk méléhu tom, méléhu tom inok médayéw i Kadnane de. Mélaw amuk méuyag tom taloo no méléhu tom, kay Kadnane betom. ⁹ I funa Kristowe féndayaén i kéféléhue de atin méntébule, inok Been i Kadnane féguléwo noy de méuyag brab de ménléhu. ¹⁰ Mélaw kagomén dowoyén i de dumo gom munur bé Jesuse. Brab kagomén siyawén i de dumo gom munur. Non kéluhana tom so moso témindég dob adafay Tuluse bé gaiy kékukum ne. Mélaw

Tulus saén i kémukume. ¹¹ Non wén i Ménsulate Kébéréh i Tuluse mano, “Loo bé kétoow i kéuyag guwe, i kétoow i kéluhanay étewe lémingkuwéd dob adafa kuwe. Atin i kéluhanay étewe fayagé ro Begén i Tuluse.” Been i bénréh i Kadnane. ¹² Mélaw fétindégéy Tulusey séngae étew dob adafa nuwe inok bérhéh roy kéluhanay de rénigo ro.

¹³ Mélaw kagomén kukumén i de dumo gom. Yamula fatut mingat tom inok i de dumo tom énda gésala ro sabaf bé de rénigo tom. ¹⁴ Sabaf sétiman i fédew guwe bé Kadnane Jesus, toow fo gétiga ku ténungkas i Tuluse betom mama bé kéluhanay amaéne. Endob amuk wén i étew karangé no liyén dob adafay Tulusey sébaane amaén, békén de fatut mama. ¹⁵ Endob amuk gito no begom mama, atin waléy tete i fédew ne de, énda mégédaw gom de. Mélaw kagom amaén i amaéne funay dumo gome gésala. Non i Jesuse ménléhu inok mékédan i de salaén. ¹⁶ Atin amuk wén i fiyo rénigo gom éndob kénarang i de étew sala, kagom rigonén de mon, inok énda gébéréh ro tete fantag bé be-gome. ¹⁷ Non dob kéféguléw i Tuluse bé de étewén, énda mélaga i de amaén taloo no do inémén. Endob i toowe fo mélaga i kétintuwe brab kéfiyoy fédewe, brab kéorore sabaf bé kéfemandu i Rémogor i Tuluse. ¹⁸ Amuk modor tom bé Kristowe loo bé ni, mésuwat i Tuluse betom. Atin mésuwat soy de ségiyo étew betom.

¹⁹ Mélaw fatut démoyun télamané tom rigonén i funa tome fiyoy de fédew tom brab funa tome waléy méégét i kéunur tome. ²⁰ Kagom binasanén i rigonéy Tuluse sabaf bé amaéne saén. Ténungkas i Tuluse betom mama bé kéluhanay amaéne. Endob kagom mama bé éntingayéne funay dumo gome gésala. ²¹ Ay niy fatute. Kagom mama karne, taloo no miném arak taloo no rémigo éntingayén funay dumo gome gésala. ²² Odoro kom i de kékarang gom fantag bé de amaén. Endob kagom séédél bé de dumo gom fantag bé de ni

non Tulus i méguléwe begom. Méoror i étewe fiyoy fédew ne non rigoné noy gékaranga nuwe fiyo. ²³ Endob i étewe amaé noy gékaranga nuwe tete, kukuméy Tuluse non gétiga no gésala ké rigoné no. Non amuk rigoné tom i gékaranga tome tete, gésala tom de.

15

¹ Atin i betome méégétén i kéunur tome, fatut tingkélo tom i de énda séna méégét munur, brab fatut tabanga tom bero. Enda fatut rigoné tom i de katom kétayan saén. ² Yamula fatut rigoné tom soy mélésuwate dob de dumo tom inok waléy méégét i kéunur ruwe. ³ Non fiyon i Jesu Kristowe énda rénigo noy kaane kétayan. Non wén i Ménsulate Kébéréh i Tuluse mano, “I de tete bénréh ro dob Tuluse, bénréh ro so dob Begéne.” Sénulatén i ni inok giton rénigo Jesusey kétayay Tuluse fiyon fo ké fénrasay ro. ⁴ Non i kéluhanay Ménsulate Kébéréh i Tuluse, ménusat inok métoro tom, brab inok wén i inam tom sabaf bé kéwaléy tome témingkél brab sabaf bé kéfiyoy de fédew tom ké masa tom bé Ménsulate ni Kébéréh i Tuluse. ⁵ I Tuluse fétinkélé no betom brab féfiyoné noy de fédew tom. Mélaw fésétimané no damén i de fédew tom miring bé Jesu Kristowe, ⁶ inok séréngan tom démayéw bé Tuluse Abay Kadna tom Jesu Kristo.

⁷ Mélaw sétayakuf gom maak do sétuwaréy ségiléw bé kétayakuf Kristowe betom, inok médayéw i Tuluse de. ⁸ Bérhéé ku begom, i Kristowe ménwaléy maak sugu-suguéy de Judio inok fégito no tintu fo tumanéy Tulusey fasad ne fénasadén dob katufuay de Judio bé do gétah. ⁹ Atin rénigo noy ni inok i de békén Judio dayéwé ro soy Tuluse sabaf bé kégédaw ne. Non wén i Ménsulate Kébéréh i Tuluse mano, “Toow fo dayéwé ku Beem Tulus, brab dayéwé de békén Judio so Beem. Dayéwé key Beem bé de kanta gey.” ¹⁰ Atin wén soy ni Ménsulat Kébéréh i Tuluse mano, “I de begom do békén Judio, oror gom séréngan bé

de Judio do fénémili étew.” ¹¹ Atin wén soy ni Ménsulat Kébérél i Tuluse mano, “I de begom do békén Judio, dayew gom i Kadnane. Atin i kéluhanay étewe fatut dayewé roy Tuluse.” ¹² Atin sénulat Isaiase soy ni mano, “Gégumah i ségtéwe étew séfu Jessehe. Atin Beeney waléye méguléw bé de békén Judio. Atin sémarig ro dob Beene.”

¹³ Atin i Tuluse, sani miraye kéfionon ongot-ongoté tom, féororé no damén begom, brab féfioné no damén i de fédew gom sabaf bé kéunur gome de, inok minut méégét i inam gome dob Tuluse sabaf bé barakat i Rémogor ne.

¹⁴ Atin fantag bé begome do dumogu, gétiga ku fiyoy de adat gom brab médooy de gétiga kom brab gétigan gom sétoro. ¹⁵ Gido loo, ménbarawu témooro begom dob ni sulat inok énda gélifoto kom de. Ménbarawu non niray i Tuluse begén i aturane, ¹⁶ inok muretu dob begome do békén Judio. Non sénugu Jesu Kristowe begén rémigo bé ni. Gémalbéku maak fadi non ureté kuy Fiyowe Uret i Tuluse inok i begome do békén Judio waléy gom maak ténulak dob Tuluse. Atin tayakuféy Tuluse begom non féntintuy Rémogor i Tuluse begom. ¹⁷ Atin non bé kétabang Jesu Kristowe begén, énda mémalawu émbérél fantag bé kéluhanay rigoné kuwe bé galbék i Tuluse. ¹⁸ Endob i gébérého kuwe saén i fantage bé fénrigo Kristowe begén bé kéusar ne begén. Non wén i de begom do békén Judio ménodor bé sugu i Tuluse sabaf bé kétoro guwe brab rénigo guwe. ¹⁹ Non i barakat i Rémogor i Tuluse fénrigo no begén i médoowe do mékégaif. Mélaw amun ménagéwu tidew dob ingéde Jerusalem taman dob ingéde Iliriko, tintu fo nuret guy Fiyowe Uret fantag bé Jesu Kristowe. ²⁰ Toow fo méuyotu muret bé Fiyowe Uret dob de ingéd énda séna énggégélingo i de étew fantag bé Kristowe. Non mikau muret saén dob de étew énggégélingo

ron fantag bé Jesuse tidew dob de ségiyo étew. ²¹ Non wén i Ménsulat Kébérél i Tuluse mano, “I de étew énda séna énggelingoo roy fantage bé Beene, gétiga ro moso. Atin i de étew énda séna ménureton ro, gésobuto ro moso.”

²² Been i niy funa kuwe médoonén gule ménangga mangéy dob begome. Non ménggeroru magéw mangéy dob de séségiyo-giyo ingéd. ²³ Endob béléewe ni, énggilidén i rigoné kuwe dob de ni gonon. Atin ménrugayén i kéuyot guwe mangéy dob begome. ²⁴ Mélaw méuyotu mangéy dob begome. Non magéwu mangéy Espaniya, atin fiyo ké mawétu dob begome singkow bé kéagéw guwe mangéy diyo. Atin amuk gilidén i fiyowe kétukaw gu begom, fiyo ké tabanga kom damén begén bé kéagéw guwe mangéy Espaniya. ²⁵ Endob béléewe ni mangéyu Jerusalem inok uwité kuy tabange kay de munur bé Jesuse batí diyo. ²⁶ Non wén i niray i de munur bé Kristowe dob Masedonia brab Akaya kay de méskinan do munur bé Kristowe diyo dob Jerusalem. Niray ro non been i kétaya ruwe. ²⁷ Toow ro fo moror tétabang non maak wén i utong ro bé de munur dob Jerusalem. Non i de Judio ténukidro bero bé kéunur ruwe bé kéangéy guwe dob de békén Judio. Mélaw i de békén Judio, fatut tétabang ro miray kurta dob de méskinan do Judio dob Jerusalem. ²⁸ Atin amuk fégilidé kuy ni galbék atin géiraya kun beroy kéluhanay ni kurta, tausu néni mangéy Espaniya brab mawétu dob begome. ²⁹ Atin gétiga ku amuk mangéyu dob begome, féfioné Kristowe betom sabaf bé kéagéw guwe.

³⁰ Atin do dumogu, non bé kéunur tome bé Kadna tome Jesu Kristo brab non bé késégédaw tome tidew dob Rémogor i Tuluse, ongoté ku begom dasal gom témantu inok tabangay Tuluse begén. Amuk rigoné kom i ni, géamung gom bé galbék guwe. ³¹ Dasala kom begén inok i de énda

munur dob Judea énda fésug-sugé ro begén. Brab dasal gom inok moror i de munur dob ingéde Jerusalem sabaf bé uwité kuwe bero. ³² Amuk mérigo ni brab amuk kétayay Tuluse, gétausu mangéy dob begome, brab toowu fo moror. Mélaw géséfifiyo tom do fédew bé kétukaw guwe begom. ³³ I Tuluse, sani funa tome fiyoy fédew tome, fémanduo no damén begom kéluhanan. Amen.

16

I késégifa Pablowe

¹ Wén i ségetéwe libun féndawét Febe mangéy dob begome. Beeney dumo tome so munur bé Jesuse brab fiyoy adat ne. Atin béleewe tétabang gémalbek dob de munur dob ingéde Senkrea. ² Tayakuf gom damén sabaf bé Kadnane loo bé fatute rigoné tom do munur bé Jesuse. Atin tabang gom bé atiy kailanga nuwe, non médooy tétabang ne, atin tétabangén so begén.

³ Atin fefégarém gom begén i Prisilahe brab Akilahe. Non beroy de dumo gu gémalbek bé galbék Jesu Kristowe. ⁴ Niray roy férénawa ruwe bé kétabanga ruwe begén, gédét ro féléhuén. Mélaw fésalamata ku bero loo soy de étew békén Judio do munur bé Kristowe. ⁵ Atin fefégarém gom so begén i de munur sélimud dob lawi ro Prisilahe brab Akilahe. Brab fefégarém gom so begén i Epenetowe, sani kégédawa kuwe dumo gu. Beeney sunguwe étew ménunur bé Kristowe dob Asia. ⁶ Atin fefégarém gom so begén i Mariahe, sani mégérore gémalbékon begom. ⁷ Atin fefégarém gom so begén i Andronikowe brab Juniase, sani de dumo gu Judio. Bé gétahe, beroy de dumo gu do férisu. I de apostol toow fo basana ro bero, brab ménunur ro bé Jesuse bé énda séna munuru de.

⁸ Atin fefégarém gom so begén i Ampliatowe, sani kégédawa kuwe dumo tom munur bé Kadnane.

⁹ Atin fefégarém gom so begén i Urbanowe, sani dumo tome gémalbek

bé galbék Jesu Kristowe. Brab fefégarém gom so begén i Estakiwe, sani kégédawa kuwe dumo gu. ¹⁰ Atin fefégarém gom so begén i Apolose, sani ménfítowe bé kéimu ne bé Kristowe. Atin fefégarém gom so begén i de étew dob kuréng Aristobuluse. ¹¹ Atin fefégarém gom so begén i Herodione, sani dumo guwe Judio. Atin fefégarém gom so begén i de étew dob kuréng Narsisuse munur bé Kadnane.

¹² Atin fefégarém gom so begén i Trifaenawe brab Trifosowe, sani de gémalbek bé galbék i Kadnane. Atin fefégarém gom so begén i Peruse, sani kégédawa kuwe dumo gu, sani mégérore gémalbek bé galbék i Kadnane. ¹³ Atin fefégarém gom so begén i Rufuse, sani ménbantuge gémalbek kay Kadnane. Atin fefégarém gom so begén i idéng ne, sani maake idéng gu so sabaf bé kégédaw ne begén. ¹⁴ Atin fefégarém gom so begén i Asinkrituse, Flegon, Hermes, Patrobas, Hermas, brab de dumo ro munur. ¹⁵ Atin fefégarém gom so begén i Filologuse, Julia, brab Nereuse, brab libu nuwe brab Olimpase brab kéluhanay de dumo ro munur.

¹⁶ Atin fégito gom i kégédaw gome amuk sémejifa gom. I kéluhanay de munur fésamfayé roy késégifa ruwe begom.

¹⁷ Atin do dumo gu, ongoté ku dob begome bé ingat gom bé de émféséedél brab témo ro bé ségiyowe kétoro bé fengganad gome. Férayu gom de inok énda kédané roy kéunur gome.

¹⁸ Non i de ni do étew, énda rigoné roy kétayay Kadnane Jesu Kristo. Yamula rigoné roy karowe kétayan. Atin tugio roy de énda séna fengganadéen bé de furung kékérén ureté ro. ¹⁹ I kéluhana keye, énggelingoo key i fantage bé kéodoro kome bé Fiyowe Uret funa ku moror. Méuyotu fo ké gétiga kom i kéluhanay fiyowe. Endob énda damén gétiga kom i tetee. ²⁰ Atin i Tuluse, sani émféfiyowe bé fédew tome,

tabanga no begom inok tabana kom sékoy Satanase.

Atin mégédaw fo damén i Kadnane Jesus begom.

²¹ I Timoteowe, sani dumo guwe gémalbék, ségifaé no begom. Atin i Luisiowe brab Jasone brab Sosipatare do dumo gu Judio, ségifaé ro so begom.

²² Atin i begéne, Tersio sani fénsulat Pablowe bé ni, ségifaé ku so begom sabaf bé Kadnane.

²³ Atin i Gayowe, sani gefee bé lawie batio key brab sélimudo keye do munur, ségifaé no so begom. Atin i Erastowe, sani mitonge bé kurtae dob ni ingéd, brab Kartuse dumotom, ségifaé ro so begom.

²⁴ Atin mégédaw fo damén i Kadna tome Jesu Kristo begom kéluhanan. Amen.

²⁵ Dayewé tom i Tuluse. Géféeégéto noy de kéunur tom bé Jesuse. Gérigono noy ni sabaf bé Fiyowe Uret fantag bé Jesu Kristowe ureté ku. Been i niy Fiyowe Uret énda gésobutoy de étew de non ménbunéy ménrugayén.

²⁶ Endob béleewe, i Fiyowe Uret fantag bé Jesuse giton dob de sénulat i de sénarigoy Tuluse muret bé kékérén ne. Atin non sénugu i magufusae Tulus, fégétiga key bé de étew dob kéluhanay de ingéd, inok i kéluhanay de étew damén méginugut ro de.

²⁷ Atin médayéw damén i sébaane Tulus. Enda i ségiyo saliyu bé Beene. Gétiga noy kéluhanane. Médayéw damén sabaf bé Jesu Kristowe taman sa taman. Amen.

Pablo

I Sunguwe Sulat Pablowe dob de Munur bé Kristowe dob Korinto

Been i niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Korinto. Atin i de dumo bé de étew diyo ménwaléy ro munur bé Jesu Kristowe sabaf bé kéuret Pablowe.

Endob amun méntékédan i Pablowe diyo, wén i de dumo bé de munur diyo rénigo roy tatee. Atin i de dumo de, wén i de ménenginsa fantag bé ati fatute rigoné ro sabaf bé kéunur ruwe. Médooy de fénginsaé ro non mantu ro séna munur bé Kristowe.

Mélaw séménulat i Pablowe inok sumbulo no bero bé de fénginsaé ro. Nugar Pablowe soy de dumo bero do ménnsala.

¹ Begéney Pablowe, fénémili i Tuluse ménwaléy apostol Jesu Kristowe sabaf bé kétayay Tuluse. I Sostenese dumo tom munur bé Jesuse brab begéne, sulata key begom ² do munur bé Tuluse bati dob Korinto. Fénémili i Tuluse begom inok waléy mélinis dob adafa nuwe sabaf bé Jesu Kristowe. Ménwaléy gom do étew i Tuluse beroy kéluhanay de étew dob kéluhanay de ingéd munur bé Jesu Kristowe, sani Kadna ruwe brab Kadna tome so.

³ I Abay tome Tuluse brab Kadna tome Jesu Kristo toow fo mégédaw damén begom brab iray ro damén i métanéke do fédew.

I kífyonone sabaf bé Kristowe

⁴ Toow fo démoyunu fésalamat bé Tuluse non bé kégédaw ne begom fénagéw dob Jesu Kristowe. ⁵ Non toow fo fénfiyoy Tuluse begom bé kewaléy gome do dumo Jesu Kristowe. Mélaw tintu fo énggésobuto kom i toowe kétoro brab gétigan gom so téromo de. ⁶ Ménwaléy toow fo méégét i kéunur gome bé ténero geye begom fantag bé Kristowe. ⁷ Mélaw i Tuluse

nirayén begom i kéluhanay kéfurunge kailanga kom tidéw dob Rémodor ne, bé lala gome ongot-ongot bé késéfule i Kadna tome Jesu Kristo. ⁸ Beeney émféégéte bé kéunur gome taman dob tamfaday duniyae, inok énda i sala gom dob gaiy késéfule ne. ⁹ Toow fo gésarig tom bé Tuluse, sani ménémilie betom inok waléy tom do dumoy Nga ne Jesu Kristo, sani Kadna tome.

Ménsébaad ro

¹⁰ Do dumo gu, sabaf bé kéguléw i Kadna tome Jesus betom ongoté ku begom kagom sébaad-baad. Yamula séfagayun gom inok waléy ségiléw i de fédew gom brab de kégéitung gom. ¹¹ Non do dumo gu, bénréh i de étew do dumo Kloewe démoyun gom kun séédél. ¹² Wén kun i do dumo begom émbéréh maro, "Kuyug Pablo gey i begeye." Atin i de dumo de kun émbéréh maro, "Kuyug Apolos gey i begeye." Brab i de dumo begom émbéréh ro maro, "Kuyug Pedro gey i begeye." Atin i de dumo do émbéréh maro, "Kuyug Kristo gey i begeye." ¹³ Toow fo tete i nan. Maak sénufak-ufak gom i Kristowe. Békén begén i ménléhue dob kruse inok méfukas gom bé de sala gom. Brab énda ménbautis gom inok waléy gom do kagén kuyug.

¹⁴ Fésalamatu dob Tuluse non békén begén i ménautise begom saliyu bé Krispowe brab Gayowe. ¹⁵ Mélaw énda i gébéréh de ké ménbautis gom dob dawét guwe. ¹⁶ (Bénautis guy Estabanase brab kéluhana ro ségalawi. Endob éndaén i ségiyo énggétédémo ku bénautis gu.) ¹⁷ I funa Kristowe begén séménugu békén ké mautisu. Yamula sénuguén begén muret bé Fiyowe Uret. Atin énda fénfurungén begén muret loo bé de étew dob duniyae ni, inok i de étew mégélingo, énda munur ro saén sabaf bé kéfurung guwe émbéréh. Yamula munur ro sabaf bé barakat i Tuluse. Mélaw énda émbunéy i barakat Kristowe mémukas bé de étew sabaf bé kéléhu ne dob kruse.

I kégétigay Tuluse

¹⁸ I de étew mékukum ro, marok énda i laga i kéurete fantag bé kéléhu Jesuse dob kruse. Endob i betome do ménfukasén dob de sala tom, gétiga tom toow i Fiyowe Uret brab fégito noy barakat i Tuluse. ¹⁹ Wén i Ménsulate Kébérél i Tuluse fantag bé ni mano, “Binasané kuy kégétigay de méngganad. Atin fégito gu énda i laga i kégétigung i de étew marok do métiledtéd ro.” ²⁰ Mélaw gétiga tom énda i laga i kégétigay de énggféganad taloo no de métiledtéd taloo no de furung émbérél dob ni duniya. Non fénggitoy Tuluse énda i lanték i kégétigay kéilawane.

²¹ Toow fo gétigan i Tuluse. Bénantakén bé énda gésobutoy de étew de sabaf bé de kégétiga ro saén. Yamula ménsuwat i Tuluse mémukas saén bé de étew munur bé Fiyowe Uret ureté key, fiyon fo ké bérél i de étew énda i laga i Fiyowe Uret. ²² I de Judio méuyot ro gégito do mékégaif inok géunur ro de. Atin i de étew tidew Akaya méuyot ro mégelingo bé de gétigan muret inok géunur ro de. ²³ Endob ureté tom i fantage bé Kristowe ménléhu dob kruse. Endob i de Judio mika ro de. Atin i de étew békén Judio fégitungé ro énda i lagaén. ²⁴ Endob i de étew do fénemili i Tuluse munur ro, do Judio brab do békén Judio, gétiga roy barakat i Tuluse brab kégétiga nuwe fénggitoy no dob kéléhu Jesu Kristowe. ²⁵ Non i kégétigay Tuluse toow na fo gérotor bé kégétigay de étew, fiyon fo ké fégitungé ro énda i lagaén. Atin i barakat i Tuluse toow na fo émbagér tidew bé kébagér i de étew, fiyon fo ké wén i do étew fégitungé ro énda i bagér i Tuluse.

²⁶ Do dumo gu, fégétédém gom i ni. Amun fénwaléy i Tuluse begom do munur, énda sénay médoob begom do gétigan, brab énda sénay médoob begom do odoron, taloo no do gérotor étew. ²⁷ Endob i Tuluse fénemilién i de étew léngléngén ro dob adafay kéilawane inok kémalanian i de étew marok toow ro fo gétigan. Atin fénemilién i de étew do gérifantad

dob adafay kéilawane inok kémalanian i de étew do téfégérotor. ²⁸ I Tuluse fénemilién i de étew diyangkaén brab ikaan brab énda i laga ro kun dob duniyae ni inok fégito no énda i laga i de éntingayén karangéy de étew toow fo mélaga. ²⁹ Mélaw énda i étew géfélangka-langka dob Tuluse. ³⁰ Gido loo, fénwaléyéy Tuluse betom dumo Jesuse. Atin i kéluhanay de kégétiga tom tidew dob Tuluse fénangéyén bé Kristowe. Atin sabaf so bé Kristowe, ménwaléy tom do métintu brab malinis dob adafay Tuluse brab méfukas tom bé de sala tom. ³¹ Mélaw toow i Ménsulate Kébérél i Tuluse mano, “Amuk wén i méuyot fébantug-bantug, fatut fébantug-bantug saén bé atiy rénigoy Kadnane.”

2

I Fiyowe Uret

¹ Atin do dumo gu, amun énggégumahu dob begome, nuret guy Fiyowe Uret i Tuluse. Endob énda ménfurungu émbérél taloo no muret loo bé ségétéwe wén i kégétiga no. ² Non ménuyotu saén muret dob begome fantag bé Jesu Kristowe brab fantag bé kéléhu ne dob kruse. ³ Mélaw amun énggumahu dob begome, toowu fo ménggilak brab léménukub, non gétiga ku énda furungu muret. ⁴ Atin amun nureto ku begom, énda ménusaru bé furunge kékérél taloo no kégétigan. Yamula i Rémogor i Tuluse diyo dob begéney ménfénure begom bé barakat ne, ⁵ inok i kéunur gome békén sabaf bé kégétigay étewe. Yamula munur gom saén sabaf bé barakat i Tuluse.

I kégétigay Tuluse

⁶ Endob i toowe, toroé kuy tin-tuwe ménalém kégétigan dob de étew méégt i kéunur ruwe. Endob i ni kégétigan békén tidew dob kéilawane taloo no tidew dob de méguléw dob duniyae bé ni do gai. Non mékédan i káféguléw ruwe. ⁷ Yamula toroé kuy ménaléme kégétigay Tuluse, sani ménbunéye non énda fénggitoy Tuluse

de bé do gétah. Non amun énda séna lénimbag i Tulusey duniyae ni, énggétiga non i atiy rigoné nuwe bé fukasé no betom inok méuyag tom taman sa taman dob lawayo. ⁸ Enda i ségétew méguléw dob duniyae ni énggésobuto noy ni ménalém kégétigan. Non amuk énggésobuto ro, énda damén fénléhu roy barakatane Kadnan dob kruse. ⁹ Non wén i Ménsulate Kébéréh i Tuluse mano, “Enda i ségétew énggégito taloo no énggégélingo taloo no énggégítung bé de fiyo do languntaman téafay i Tuluse kay de étew méimu de.” ¹⁰ Atin i de ménbunéy bé do gétah, fénggésobut i Rémogor i Tuluse dob betome. Non gétigay Rémogor i Tulusey kéluhanane, fiyon i de ménalém kékéfítung i Tuluse. ¹¹ Enda i gétigan bé atiy dob kékéfítung i ségétewe étew saliyu bé beene so. Ségiléw so bé Tuluse. I Rémogor i Tuluse saén i gétigane bé atiy dob kékéfítung i Tuluse. ¹² Atin énggédot tom i Rémogor i Tuluse bati dob de fédew tom. Békén rémogor tidéw dob duniyae ni, éndob Rémogor i Tuluse. Féngétiga no betom i kéluhanay niray i Tuluse betom.

¹³ Mélaw toroé tom i ténero i Rémogor i Tuluse betom, békén tidéw saén dob kégétigay étewe. Toroé tom i toowe tidéw dob Rémogor i Tuluse dob de étew bati i Rémogor i Tuluse diyo dob de fédew ro. ¹⁴ Endob i étewe énda diyo i Rémogor i Tuluse dob fédew ne, énda gétayakufo noy de éntingayén tidéw dob Rémogor i Tuluse non énda gésobuto no de. Atin karangé noy énda i lagaén non i Rémogor i Tuluse saén i émfégésobute de. ¹⁵ I étewe batoy Rémogor i Tulusey fédew ne, gésobuto noy kéluhanane. Endob i étewe énda diyo i Rémogor i Tuluse dob beene, énda gésobuto noy kékéfítung i de étew diyo i Rémogor i Tuluse dob berowe. ¹⁶ Non wén i Ménsulate Kébéréh i Tuluse mano, “Enda i gétigan bé atiy dob itungay Tuluse brab, énda i gétoro bé Tuluse.” Endob i betome do munur, fénggito Kristowe betom i kékéfítung ne.

3

Do sugu-suguéy Tuluse

¹ Do dumo gu, amun diyou séna dob begome, énda énggérého ku begom i ségiléwe bé kékébéréh guwe dob de étew fénémanduoy Rémogor i Tuluse. Non kailanga kuy émbéréhe dob begome maak do nga munur bé Kris-towe. Non odoro kom sénay de tete kétaya kom. ² Mélaw énda gétoroo ku begom bé de ménalém kégétigan, non ségiléw gom bé ngae énda géamaa noy métégase amaén, éndob ratah saén. Fiyon béléewe ni, énda gésobuto kom i ménaléme kétoro gu. ³ Non odoro kom sénay de tete kétaya kom. Wén sénay do médaléw brab do séédél begom. Mélaw giton dob begomey kékodoro kome bé de tete kétaya kom, ségiléw bé de énda munur bé Jesuse. ⁴ Non amuk wén i émbéréh begom maro, “Begey i kuyug Pablowe”, brab émbéréh i de ségiyo maro, “I begeye do kuyug Apolos gey”, fégito gom i késégiléw gome bé de énda séna munur.

⁵ Fégitung gom i fantage bé de ni. I begéne, sani Pablowe, ati begéne? Atin ati Apolose? Ségiléw gey falan do sugu-suguéy Kadnane saén. Fénuret i Tuluse begey inok munur gom. Rigoné key saén i galbéké sénugu i Tuluse sénga ségétew begey rigoné key. ⁶ Maak do gémalbék gey dob fantade. I begéne ségiléwu bé mohoke. Atin i Apolose ségiléw bé mitisone de wayég. Endob Tulusey émféruke bé de nohok. ⁷ Mélaw békén i mohoke taloo no mitisone de wayég i fatute de médayéw. Endob Tulus saén i fatute de médayéw non Been i émféruke de. ⁸ I mohoke brab mitisone de wayég, énda i isu bero toow na fo gérator. Atin irayay Tuluse bero baras loo bé kédakél i de galbék rénigo ro. ⁹ Non i begeye Apolosey de sugu-suguéy Tuluse brab sétabang gey gémalbék. Atin i begome maak do nohok i Tuluse.

Atin ségiléw gom bé sébaane lawi rénigoy Tuluse. ¹⁰ Atin i Tuluse fénwaléyén begén ségétew furung rémigo lawi. Mélaw begén

i ménfédiyoe bé batéwe gonoy de liléy ménbunsud. Atin ségiyo man i émfétause bé kérigowe bé ni lawi. I atag i ni, wén i ségiyo témodo begom béléewe ni. Atin i émfétause bé galbéke fatut ingata noy rigoné nuwe. ¹¹ Atin sébaan saén i batéw i lawi i Tuluse. Been i Jesu Kristowe fénwaléy i Tuluse maak batéw non Been saén i unuro tome. ¹² Atin i de rémigo bé lawi i Tuluse, médooy de fégérigo ro de. Atin i de séségiyo-giyo fégérigo bé lawie ségiléw bé de séségiyo-giyo kétoro. Amuk fiyoy kétoroe maak do bélowan brab do filak brab do balilaga do batéw. Enda métuwégi de ni do éntingayén. Endob amuk énda fiyoy kétoroe, ségiléw bé de kayéw brab do kéroon. I de ni do éntingayén magad do métuwégi. ¹³ Bé gaiwe moso séfule i Kadnane mangéy kémukum, giton i galbék i kéluhanay de étew. Atin téngkadé noy de galbék ro bé aféye. Amuk fiyo, énda métuwégi. Endob amuk tete, métuwégi. ¹⁴ Atin amuk énda métuwégi i galbék i ségétewe étew, gédoté noy baras ne tidew dob Tuluse. ¹⁵ Endob amuk météyi métuwégi i galbék i ségétewe étew, énda gédoté noy baras ne fiyon fo ké ménfukas inok énda mémukumén. Ségiléw bé étewe énggáféraréy tidew dob métuwégi lawi éndob énda i énggáuwito no.

¹⁶ Gétiga kom damén i begome maak lawi i Tuluse non diyo i Rémogor ne bati dob de fédew gom. ¹⁷ Atin amuk wén i minasa bé lawi i Tuluse, binasanéy Tuluse soy nan étew, non i lawi i Tuluse mémekétéfu. Atin begom i nan lawi.

¹⁸ Kagon tugion ilowoh gome. Non amuk wén i ségétew begom manok toow fo gétigan dob adafay de dumo no dob duniyae ni, fatut waléy énda i gétiga no dob adafay de étew, inok waléy toow fo gétigan dob adafay Tuluse. ¹⁹ Non i kégétigane dob duniyae ni énda i lagaén dob adafay Tuluse. Non wén i Ménsulate Kébéréh i Tuluse mano, "Usaréy Tulusey de akar i de énggétigan do étew fégélangkébén

bero." ²⁰ Atin wén i Ménsulate Kébéréh i Tuluse mano, "I Kadnane gétiga noy kégétigung i de gétigan do étew énda i lagaén." ²¹ Mélaw kagom fégélangka-langka i kéfuray gome bé de étew. Non i begeye do sugu-sugué kom, békén gey funa kom félangka-langka. ²² Atin i begéne brab Apolose brab Pedrowe, niray i Tuluse begey dob begome inok tabanga key begom. Fiyon i duniyae ni, brab de éntingayén gérumah moso, brab de éntingayén béléewe ni, brab fiyon i de umul brab kéléhu, niray i Tuluse inok féfiyoné no begom. ²³ Atin i begome ka Kristowe, brab i Kristowe kay Tuluse.

4

Do apostol

¹ Atin fantag bé begeye do témodo, fatut karangé kom begey do sugu-sugué Kristowe. Non sénarig i Tuluse dob begeyey de ménalém kékéréhén. ² Atin i sarigone fatut odoro noy de sugu i amu ne. ³ Endob énda émbukuu fantag bé ati kégétigung gome begén taloo no i kégétigung i de ségiyo étew begén. Fiyon i begéne, énda kukumé kuy kagéne lowoh. ⁴ Enda tete i fédew guwe fantag bé de rénigo gu. Gido loo, énda séna gito no ké fiyo taloo no ké tete i de rénigo gu, non Kadnaney kékumé begén. ⁵ Mélaw kagom sékukum béléewe ni. Yamula ongot-ongot gom i késéfule i Kadnane. Non fégito no bé bénou i kéluhanay rénígoy de étew do énda séna gito no béléewe ni. Atin fégito no soy ati dob fédew i kéluhanay étewe. Bé bénou gai, i Tuluse dayéwe noy séngae ségétew look énda, sabaf sa bé de rénigo ro.

⁶ Do dumo gu, énggélabito kuy dawét guwe brab Apolose. Endob i begeye do ufama saén inok gétiga kom bé fatut odoro kom saén i fénslat i Tuluse. Mélaw kagom karangén de ké toow na gérotor i ségétewe témodo bé dumo nuwe témodo. ⁷ Fégitungé kom keey do toow gom na fo gérotor bé de ségiyo. Endob dufang i nan kégétigung. Non

i kéluhanay de éntingayén do kagom, Tulus i méniraye de dob begome. Mélaw kagom félangka-langka, non énda foy éntingayén do kagom saliyu bé de gédoté kom tidew dob Tuluse.

⁸ Fégitungé kom keeyén bé éndaén kailanga kom i tabange tidew dob Tuluse. Fégitungé kom keeyén bé énggédot gom i kéluhanay de kéfyonon tidew dob Tuluse. Fégitungé kom keeyén bé béleewe ni méguléw gom séréngan bé Kristowe fiyon fo ké i begeye do apostol énda séna méguléw gey. Endob i toowe, énda séna méguléw gom. Endob méuyotu damén ké béleewe ni méguléw gom inok méguléw gey so béri séréngan begom. ⁹ Non dob karang guwe de, rénigoy Tuluse begey do apostol do toow fo gérifantad. Ségiléw gey bé de férisu gédétén féléhuén dob téngaangay kéluhanay de étew brab de télaki. ¹⁰ I kékarang i de ségiyo étew begey, do dufang non munur gey bé Kristowe. Endob i begome, makom ké do toow gomén gétigan sabaf bé Kristowe. Atin i begeye toow gey fo kun mélubay. Endob i begome, makom ké émbagér gomén. Atin énda fégadatay de étew begey fiyon fo ké fégadata ro begom. ¹¹ Atin taman so béleewe ni i begeye mélayah gey brab térumén gey, brab kulang i de kégal gey. Brab ferasayén gey lubagén brab énda i lawi gey. ¹² Mégéror gey gémalbék inok gédoté key i de kailanga key. Atin amuk ingonéy de étew begey, dasala key bero inok féfiyonéy Tuluse bero. Amuk ferasayén gey, fédayaé key saén. ¹³ Amuk wén i émbéréh tete fantag bé begeye, sumbulo key bé fiyowé kékéréh saén. Maak do ruhuk gey saén. Taman béleewe ni siyawéy de étew begey dob duniyae.

¹⁴ Do dumo gu, békén sénulat guy ni ké fémalané ku begom. Yamula inok toroé ku begom maak do gulaané ku nga gu. ¹⁵ Non fiyon fo ké médooy témoroe begom fantag bé Kristowe, ségétew saén i maake abay gom, sani begéne. Non ménwaléy gom munur

bé Kristowe amun nuret guy Fiyowe Uret dob begome. ¹⁶ Mélaw ongoté ku begom iring gom begén. ¹⁷ Been i funa kuwe sémugu bé Timoteowe mangéy dob begome. Been i toowe fo kégédawa ku maak nga gu sabaf bé Kadnane, brab modor bé de sugué ku de. Amuk gégumah dob begome, fefégétédémén begom i de kétoro gu fantag bé de adat tom sabaf bé Kristowe, ségiléw bé ténero guwe dob de munur dob kéluhanay de ingéd.

¹⁸ Wén i do dumo begom do ménwaléy félangka-langka non marok éndaén séfuleu mangéy diyaan. ¹⁹ Endob séfuleu so mangéy diyaan amuk kétayay Tuluse. Atin bé béo, susiné kuy kédooy énggérigonoy de félangka-langka, békén i de kékéréh ro saén. ²⁰ Non i kéféguléw i Tuluse betom békén dob kékéréhe saén, éndob dob barakat ne. ²¹ Ati isuwe kétaya kom? Amuk énda témérén gom bé de tete rigoné kom, séfuleu moso ferasayé ku begom. Endob amuk tagaké kom i de tete adat gom, séfuleu mégédaw begom.

5

Wén i ségétew bero ménala

¹ Wén i énggelingoo kuwe bé wén kun i ségétéwe begom réménigo toow fo tete. Lénamfaén kun i bawag i boh ne. Fiyon i de énda méngintulus, énda gérigono roy loowe bé ni. ² Gido loo, toow gom fo wayo félangka-langka. Endob fatut gom damén mémala brab émbuku. Atin fatut énda tungkasé kom méngintulus sélimud begom i ni étew réménigo bé ni. ³ I begéne, fiyon fo ké mérayuu dob begome maak diyoo so dob begome non doyuné ku so begom fégitungén. Atin sabaf bé atura kuwe, kénukum gun i ni étew ménala, loo bé rigoné kuwe damén ké diyoo dob begome. ⁴ Amuk sélimud gom, maak diyoo so non diyo soy fédew guwe. Mélaw dob atura kuwe tidew dob Kadnane Jesu Kristo, ⁵ sugué ku begom miray bé ni étew dob Satanase inok binasané noy lowoh ne. Tidew

béno, gésénule damén, atin mélaw énda mékukum i rémogor ne bé gaiy kékukum i Kadnane Jesus.

6 Kagom damén félangka-langka. Gétiga kom i kékéréhe mano, "Géférerukoy klohe saén fégfééruk i kéluhanay fane." **7** Atin i étew ni ménsala, ségiléw bé fégfééruke bé fane. Fatut kédané kom tidéw dob begome inok énda waléy gom tete kéluhanan. Yamula waléy gom damén tintu fiyo. Atin gétiga ku méntintu gomén béní sabaf bé kéunur gome bé Kristowe. Non i Kristowe ségiléw bé natiwe bili-bili fénléhu ténulak bé gaiy kandulie féndawét "Témara". Non fénléhuén i Jesuse ténulak gémantinon betom inok méfukas tom bé de sala tom. **8** Mélaw rígoné tom i mantuwe kanduli sani kéamae émfégétédém bé kétulake bé Jesuse. Atin fatut amaé tom saén i fane énda i féngfééruk de. I atag i ni, fatut kéra kom i de tafay tete adat gom atin fatut toow fo fiyoy de adat gom brab béréh gom saén i toowe.

9 Amun sénulata ku begom bé gétahe, bénréh gu begom bé kagomén séloyuk bé de étew mékérésik i de adat ro. **10** Endob i kékéréh guwe ni, fantag bé de békén munur bé Jesuse, sani de bigaén, de arumén, brab de lémiful, brab de méngadaf bé de kéninontow. Non amuk dini gom dob duniyae ni, kailanga kom séloyuk bero sénga tékélid. **11** Endob i bénréh guwe, been i fantage bé de étew émbéréh do munur bé Jesuse endob do toow fo bigaén, do arumén, look méngadaf ro do kéninontow, look émbéréh do tete tugi fantag bé de étew, do molon, do lémiful. Kagom séloyuk bé de ni do étew émbéréh do munur ro kun bé Jesuse endob taus ro mésala loo bé de ni. Fiyon mama, kagom séréngean bero.

12-13 I de étew énda munur ro bé Jesuse, énda i atura tom kémukum bero, non Tulus saén i kémukume bero. Endob i de dumo gom ménbéréh munur ro bé Jesuse, fatut kukum gom bero amuk ménsala ro loo bé ni. Non wén

i Ménsulate Kébéréh i Tuluse mano, "Kéra kom i tetee étew dob begome."

6

Fantag bé késébanil-banile

1 Amuk wén i méuyot témo be-gom bé dumo gome munur bé Jesuse, kagom téboén de dob adafay de gémamak kukuman do békén munur. Yamula, fatut téboé kom dob adafay de dumo gom munur. **2** Enda keey gétiga kom de, do betom munur i kémukume moso bé kéluhanay de étew dob duniyae ni. Atin amuk betom i kémukume bé duniyae ni, gékukumo tom i kéluhanay de kloh étingayén béleewe ni. **3** Enda keey gétiga kom de, betom i kémukume moso bé de télaki dob lawayo. Mélaw toow fo fakay tom sétiyawan béleewe ni dob fantade. **4** Mélaw amuk wén i témo begom bé dumo gome munur, énda fatutén téboén dob adafay de gémamak kukuman non énda munur ro bé Jesu Kristowe. **5** Fémala-mala gom! Aw énda foy ségétew gétigan begom témiyawan bé de ménsébanil dob begome munur bé Jesuse? **6** Endob réménigo gom wayo énda fiyo non sétebo gom dob adafay de étew gémamak kukuman, énda munur ro bé Jesuse.

7 Atin sabaf bé de késétébo gom, giton fo toow i kékulang i késarig gome bé Tuluse. Toow na fo fiyo ké fidaya gom ké wén i déménufang begom taloo no ké wén i léméniful begom. **8** Endob i toowe, begom i de ménsala brab do léméniful bé de dumo gom munur. **9** Gétiga kom damén i de étew énda métintu ro, énda féguléwoy Tuluse bero. Fétuntay gom. I de bigaén, brab de méngadaf bé de kéninontow, brab do lémamfa, brab do bakla, énda géahur ro dob kékéulgéw i Tuluse. **10** Atin loo soy de ménakaw, brab de arumén, brab do molon, brab do émbéréh do tete tugi fantag bé de étew, brab do lémiful, énda so géahur ro dob kékéulgéw i Tuluse. **11** Bé do gétahe, wén i do dumo begom loo bé nan. Endob béleewe ni ménlinis gomén tidéw dob de sala

gom, atin do ménwaléy gomén do étew i Tuluse. Fénwaléyén begom do métintu bé barakat i Kadnane Jesu Kristo brab Rémodor i Tuluse.

Ifiyowe adat

¹² I betome do munur, fakay gérigono tom i kéluhanay éntingayéne amuk énda teteén. Gido loo, békén kéluhanay éntingayéne fiyo. Fiyon fo ké fakay rigoné kuy kéluhanane, éndob békén fo fatut waléy maak riféy de rigoné ku. ¹³ Ufama, i sure, kay amaéne. Atin i amaéne kay sure. Toow i nan. Endob wén moso i gai kédanéy Tulusey sure brab amaéne.

Atin i lowohe békén fégésébiga. Yamula rénígoy Kadnaney lowoh i de étew inok rigoné roy galbék i Kadnane. Atin sabaf bé Kadnane, waléy mantuy de lowoh tom moso. ¹⁴ Non Tulusey ménfétébulee bé Kadnane Jesus, atin fétébuleé no so mélaw betom bé barakat ne.

¹⁵ I de begom do munur, gétiga kom damén i de lowoh gom maak réfa i lowoh Kristowe so. Mélaw énda fatutén sumfata tom bé sundale. Toow fo tete i ni. ¹⁶ Gétiga kom damén i ni. I étewe sumfaté noy lowoh ne dob sundale, waléy ro sétiman lowoh. Non wén i Ménçulate Kébéréh i Tuluse fantag bé sébawage mano, "I de ruwo gétew waléy ro sétiman lowoh." ¹⁷ Endob i étewe sumfaté noy fédew ne dob Kadnane waléy ro sétiman fédew.

¹⁸ Mélaw kagom témayan bé ségiyowe saliyu bé de bawag gom. I de dumo do sala énda sébanilén bé lowohe loo bé ni. Endob i étewe bigaén, ménçala sébanil bé lowoh ne. ¹⁹ Gétiga kom damén i lowoh gome maak lawi i Tuluse non i Rémodor i Tuluse ni-rayén begom, bati dob de fédew gom. Mélaw i lowoh gome békén kagom.

²⁰ Yamula Tulus i gefee bé de lowoh gom non bénléyén begom, atin i Nga ney fénggébayad ne de amun ménléhu dob kruse mémukas betom. Mélaw usar gom i de lowoh gom bé funay Tuluse médayéw.

7

Fantag bé késébawage

¹ Atin fantag man bé de fénénginsa gom begén dob de sulat gom, ay niy késumbulo kuwe de. Fiyo ké énda mawag i lagéye. ² Endob sabaf médooy de étew do bigaén, fiyo ké i séngae lagéy fatut mawag ségétew libun, brab i séngae libun fatut mawag ségétew lagéy. ³ Atin fantag man bé de sébawag, fatut ro séfidong. I lagéye énda fatutén émbéréh "Kago" dob bawag ne. Loo soy libune énda fatutén émbéréh "Kago" dob bawag ne. ⁴ Non i libune békén been i gefee bé lowoh ne, non kay bawag ne. Atin i lagéye békén so been i gefee bé lowoh ne, non kay bawag ne. ⁵ Mélaw kagom élénén i bawag gome ké rigoné noy kailanga nuwe. Endob amuk i de sébawag énda séfidong ro bé firoye kélungonon inok démasal ro, fakay. Endob amuk gilid i no, fatut fétausé roy késéfidong ruwe inok énda kudiyunéy Satanase bero sabaf bé kétayay lowoh ruwe.

⁶ Enda sugué ku begom bé de ni bénréh gu. Yamula féginau gu saén begom bé fiyo ké énda sébawag gom. ⁷ Non méuyotu de damén ké iringé kom begén énda i bawag gu. Endob énda ségiléw tom kéluhanan. Non irayay Tulusey séngae ségétew kaan kéfurungan loo bé étewe énda mawagén. Atin i de ségiyo étew, irayay Tuluse bero ségiyo kéfurungan.

⁸ Ay niy bérhékuwe dob de énda séna bawagén brab dob de baléw: Toow na fo fiyo ké énda mawag gom, ségiléw bé begéne. ⁹ Endob amuk énda gétingkélo kom i kétayay de lowoh gom, toow na fo fiyo ké mawag gom. Non toow na fo fiyoy mawage bé kérégénan gom sabaf bé kétayay lowohe.

¹⁰ Atin fantag man bé begome wénén i do bawag gom, ay niy bérhékuwe dob begome. Been i niy sugu i Kadnane, békén saén kagén. I libune békén fo fatut ké séglak bé bawag ne. ¹¹ Endob amuk wén i libun génlak i

bawag ne, énda fo fakayén ké mawag man ségiyo. Endob fakay séfule dob bawag ne. Atin i lagéye békén fo fatut ké gélaké noy bawag ne.

¹² Atin fantag man bé begome do sébawag, ay niy kagéne saén féginau dob begome. (Non énda sénugu i Kadnaney ni.) Amuk wén i lagéy dumo tom munur bé Jesuse éndob i bawag ne énda munurén, atin i bawag ne ni mika ségélak, énda fatutén ké gélaké no. ¹³ Atin amuk wén i libun dumo tom munur bé Jesuse, éndob i bawag ne énda munurén, atin i bawag ne mika ségélak, énda fatutén gélaké no. ¹⁴ Non i bawage énda séna munurén, waléy malinis dob adafay Tuluse sabaf bé bawag ne munur bé Jesuse. Amuk békén loo bé ni, i de nga ro énda malinis ro dob adafay Tuluse maak do nga i de békén méngrintulus. Endob i toowe fo, malinis ro dob adafay Tuluse. ¹⁵ Endob i bawage énda munurén, amuk gélaké noy bawag ne, fédaya gom gélaké no. Fakay i ni, non kétayay Tuluse ké métanék i kébati tome. ¹⁶ Fatut fédayaé no ké gélakéy bawag ne, non fiyon fo ké énda ségélakén, énda so gétiga no de ké sabaf bé beene waléy géunur i bawag ne loo ké énda.

¹⁷ Atin fiyon fo ké atiy gohoyséngae ségétew betom bé gaiwe fén-unur i Tuluse betom fatut fétausé tomén. Non niray i Kadnaney nan gohon. Been i sugué kuwe dob de munur dob kéluhanay de ingéd. ¹⁸ Amuk i ségétew begom méntrilién bé énda séna ménwaléyén de munur bé Jesuse, éndaén fatutén ké kédané noy kétuli ne béléewe. Atin amuk i ségétew begom énda séna méntrilién amun ménwaléyén munur, éndaén fatutén fétuli béléewe. ¹⁹ Non ulanden ké méntrili gom loo ké énda. I toowe fo mélaga i kéodoro kome bé de sugu i Tuluse. ²⁰ Mélaw fiyon fo ké atiy gohoyséngae ségétew betom bé gaiwe fén-unur i Tuluse betom, fatut fédayday tomén loo bé nan. ²¹ Amuk ségétew go rifén bé gaiwe ménwaléy gon munur,

kago émbuku de. Endob amuk fakay tangéyén go, rigo mo. ²² Non amuk ségétew go rifén bé gaiwe ménunur go, féwaléyé Kadnane beem békénén rifén dob adafa nuwe. Atin loo so bé ni, amuk békén go ségétew rifén bé gaiwe ménunur go, waléy go rifé Kristowe. ²³ I Tuluse bénléyén betom amun nirayén i buntunge Ngaén fénléhu géménantinon betom. Mélaw békén tom fatut waléy riféy kéilawane saén. Yamula riféy Tuluse betom. ²⁴ Do dumo gu, fiyon fo ké atiy goho tome bé gaiwe fén-unur i Tuluse betom, fatut fétausé tom, non Tulus i dumo tome.

²⁵ Atin fantag man bé de étew énda sénay bawag ro, énda i gébérého ku sugu tidew dob Kadnane. Endob ay niy karang guwe de, brab ségétewu gésarigo kom non bé kégédaw i Kadnane begén. ²⁶ I karang guwe de, fiyo ké énda mawag gom non mérégén i de gai béléewe ni. ²⁷ I étewé énda i bawagén, békén fatut sélédé no. Atin i étewé wén i bawagén, békén fatut gélaké no. ²⁸ Endob amuk wén i étew méuyot mawag, fakay. Békén sala i mawage. Endob géagéw gom mérégén. Been i niy funa kuwe énggabéréh bé kagom fatut mawag béléewe ni, non mikau de ké kérégénan gom loo bé de kékérégénay de sébawag.

²⁹ Non bérhéku begom do dumogu, éndaén mérugay i gai tome. Mélaw tidew béléewe ni, i étewé wén i bawagén, fatut mégéror rémigo bé galbék i Kadnane maak énda i bawagén. ³⁰ Ségiléw so bé de tete fédewén, brab de fiyo fédewén, brab de wén do languntama ro brab do énda i languntama ro. Ulanden non fatut ro mégéror rémigo bé galbék i Kadnane. ³¹ Atin amuk musar tom bé de éntingayén dob duniyae ni, békén fatut toowé tom gulaanén. Non éndaén mérugay i duniyae ni.

³² Méuyotu de fo ké énda émbuku gom. I lagéye énda i bawagén toow na fo mégéror rémigo bé galbék i Kadnane non énda i mangga de.

Mélaw i fégitungé nuwe saén i funay Kadnane mésuwat. ³³ Endob i lagéye bawagan, fégitungé noy de éntingayén dob duniyae ni inok fésuwaté noy bawag ne. ³⁴ Sabaf bé ni, mésébaad i kékégitung ne. Ségiléw so bé libune énda i bawagén, fégitungé no saén i fantage bé Kadnane inok toow fo mégéror rémigo bé galbék i Kadnane. Endob i libune wén i bawagén, fégitungé noy de éntingayén dob duniyae ni non méuyot de ké fésuwaté noy bawag ne.

³⁵ Békén bénréh guy ni ké énda fébawagé ku begom. Békén! Bénréh guy ni inok tabanga ku begom rémigo bé fatute brab inok mégéror gom rémigo bé galbék i Kadnane, atin énda i mangga begom bé ni.

³⁶ Fantag man bé de ménsefasad sébawag moso, amuk méuyot ro de ké éndaén fétausé roy késébawag ruwe inok énda i angga ro rémigo bé galbék i Tuluse, fiyo. Endob amuk méuyot ro fo séfidong, fatut ro sébawag loo bé kétaya ruwe. Enda mésala ro amuk sébawag ro. ³⁷ Endob i lagéye, amuk énda i mémégés de éndob toow fo kétaya no ké éndaén fétausé no bawagén i libune fénasada no bawagé no, fiyo so. ³⁸ Mélaw, fiyo ké bawagé noy kénogone fénasada no. Endob toow na fo fiyo ké énda bawagé no de.

³⁹ I libune wén i bawagén, énda fakayén ké mawag ségiyo taman méuyag sénay bawag ne. Endob amuk ménléhu i bawag ne, fakay man mawag bé kétaya nuwe, éndob fatut ségétew so munur bé Kadnane Jesus. ⁴⁰ Endob toow na fo méror rémigo bé éndaén mawagén ségule. Beeniy kékégitung guwe de. Atin gékaranga ku, fénggésobut i Rémogor i Tuluse begén ni.

8

Fantag bé amaéne

¹ Atin fantag man bé fénénginsa gome ké fakay tom mama bé amaéne ténulak dob adafay de kéninontow, ay niy késumbul guwe de. Gétiga

tom kéluhanan énda i barakat i de kéninontow. Gétiga tom énda i lanték ro. Endob i de étew marok do gétigan ro, waléy ro félangka-langka. Endob békén tom fatut félangka-langka, yamula fatut mégédaw tom inok féfiyoné tom i fédew i de dumo tom. ² I étewe manok toow fo gétigan, énda séna gétiga noy ati fatute gétiga no. ³ Endob i étewe toow fo féimué noy Tuluse, géloloy Tuluse non ménwaléy étew i Tuluse.

⁴ Na, fantag man bé amaéne ténulak dob adafay kéninontowe, gétiga kom i kéninontowe énda méuyagén taloo no Tulus. Non sébaan saén i Tuluse, atin éndaén i ségiyo de. ⁵ Bénréh i de dumo do étew wén kun i médoo do tulus brab kadnan dob lawayo brab dob fantade. Atin toow, wén i médoo féngadafé de étew. ⁶ Endob gétiga tom, sébaan saén i Tuluse, sani Abaye ménfélimbag bé kéluhanane. Been i odoro tome brab féngadafé tom sénga téklid. Atin sébaan saén i Kadnane sani Jesu Kristowe léménimbag bé kéluhanay éntingayéne brab Beeney funa tome méuyag.

⁷ Endob békén kéluhanay étewe gétiga roy ni. Wén i de dumo étew marok do tulus i de kéninontow non beeniy karowe kéunur bé do gétah bé énda séna ménunur ro de bé Jesuse. Mélaw amuk mama ro bé amaéne ténulak dob adafay kéninontowe, marok énggérigo ro bé salae funa ro tete fédew. ⁸ Endob gétiga tom, békén amaén i funay Tuluse betom mésuwat. Non amuk mama tom de, loo so ké énda mama tom de, ulanden dob Tuluse.

⁹ Gido loo, ingat gom inok i de rigoné kom, békén funay dumo gome énda séna méégét i kéunur ne, waléy gésala. ¹⁰ I begome wén i gétiga kom, amuk mama gom dob lawie féngadafan bé kéninontowe, atin amuk énggitoy ségétewé énda séna gétiga noy fantage bé de ni kétoro, waléy so méuyot de mama, fiyon fo ké dob fédew ne sala i mamae bé amaéne ténulak dob adafay kéninontowe. ¹¹ Mélaw i ni étew énda

séna méégét i kéunur ne, énggésug-sug, non rénigo noy gékaranga nuwe mésala de. Enda fiyoy nan, non beene soy funa Kristowe ménléhu inok mékédan i sala ne. Mélaw i kégétiga muwe wayoy funay dumo muwe waléy gésala. ¹² Mélaw amuk rigoné moy ni, beem i mésalae sébanil bé Kristowe non mésala go sébanil bé dumo muwe bé kéfésala me bé dumo muwe énda méégét i kéunur ne. ¹³ Mélaw amuk sabaf saén bé karnehey funay dumo muwe gésala, kagon mama de inok énda mésala i dumo muwe de.

9

Fantag bé sahud i de apostol

¹ Enda i ségiyo étew géatur begén non ségétewu apostol brab non méntefégitoy Kadna tome Jesus dob begéne. Atin i begome, ménunur gom bé Jesuse sabaf bé kétoro guwe begom. ² Mélaw fiyon fo ké i de ségiyo do étew énda fégéoloné ro begén ségétew apostol, fatut fégéoloné kom begén non i kéunur gomey fégéolonone bé i begéne ségétewu apostol. Non begén i murete fantag bé Kadnane dob begome do étew dob Korinto.

³ Atin amuk wén i démowoy begén, ay niy késumbulo kuwe de: ⁴ Aw békén ba fatutu irayan kéama gu bé kégalbék guwe téromo fantag bé Kristowe? ⁵ Aw énda bay kuwagib gu miring bé rénigoy de dumo gu do apostol brab de tuwaréy Jesus brab Pedrowe? Non kéluhanay ro wén i do bawag ro munur so bé Jesuse. Atin amuk magéw ro, uwité roy de bawag ro. Mélaw wén soy kuwagib gu rémigo damén bé nan. ⁶ I Bernabewe brab begéne, énda fatut gey gémalbék saliyu bé kétoro geye saén. Fatut irayan gey amaén bé kétoro geye saén. Sedek énda mérigoy ni loo bé mérigowe dob de ségiyo téromo? ⁷ Ufama, énda i ségétew sundalo been soy mayadan bé kaane lowoh bé kégalbék ne sémundalo. Ségiléw so bé mohoke, wén i kuwagibén mama bé de kéntewén. Loo soy témalimae bé

de bili-bili, fatut gédoté noy de dumo gatas i de bili-bili talimaé no.

⁸ I ni bénréh gu békén saén tidéw dob kéilawane, non been soy niy ménbéréhe dob kukumay Tuluse. ⁹ Ménbéréh dob kitabe sénulat Moisese mano, “I ayame sad-sadé noy faréye inok mérek, békén fatut ikétén i ba ne.” Atin i Tuluse békén saén bénréhén i ni fantag bé ayame. ¹⁰ Non bénréhén so fantag bé begeye do muret bé Fiyowe Uret. I démaduwe brab kémétéwe wén i inam ro gégedot bé kéntew ruwe. ¹¹ Atin ségiléw so bé begeye. Nohok gey i kékéréh i Tuluse dob begome inok méuyag gom taman sa taman. Mélaw fatut irayan gey amaé key inok méuyag gey dob duniyae ni. ¹² Non amuk i de ségiyo téromo begom wén i kuwagib ro médot tidéw dob begome, toow na fo dakél i kuwagib geye de.

Gido loo, énda séna ménongot gey tidéw dob begome. Yamula féndaya gey kéluhanay mérégéné inok énda saén méangga i kéuret geye bé Fiyowe Uret fantag bé Kristowe. ¹³ Gétiga kom damén i de étew gémalbék dob lawi i Tuluse, mama ro so diyo. Atin i de fadi témulak, mama ro so bé dumoy témulak ruwe. ¹⁴ Ségiléw soy ni bé begeye. Non sénugu i Kadnane bé fatut médot i de téromo bé kéfaguyag ruwe tidéw dob de ténero ro.

¹⁵ Endob fiyon fo ké wén i kuwagib gu médot bé kéfaguyag guwe tidéw dob de ténero gu, énda séna ménongotu dob berowe. Atin békén sémulatu béní inok mongotu dob begome. Mikau fo mongot dob begome. Toowu na fo méuyot ké méléhhu mélaway kisak mékédan i funa kuwe félangka-langka, sani kégalbék guwe fiyon fo ké énda médotu sahud. ¹⁶ Endob énda i kuwagib gu félangka-langka sabaf bé kéuret guwe bé Fiyowe Uret. Non sénugu i Kadnane begén muret fantag bé Kristowe. Atin mélaw amuk énda rigoné ku de, toowu fo mékégédaw-gédaw non mékukumu fo toow. ¹⁷ Amuk muretu sabaf bé kétaya kuwe saén, gédoté kuy sahud

guwe de. Endob sénugu i Tuluse bégén, mélaw fatut rigoné ku sabaf sénarigén i ni galbék dob begéne.¹⁸ Ati mélaw i sahud guwe de? Ay ni: Been i dakéle kéoror gu bé kéuret guwe bé Fiyowe Uret fiyon fo ké énda mongotu bé kéfaguyag guwe loo damén bé kuwagib guwe de.

¹⁹ Atin fiyon fo ké békénu ségétew rifén, waléyu maak riféy kéluhanay étewe inok tabangé ku bero waléy do munur bé Jesuse. ²⁰ Mélaw amuk diyou dob de Judio, iringé kuy adat i de Judio inok munur ro. Fiyon fo ké énda kailanga no modoru bé kitabe tidéw dob Moisese, modoru de amuk diyou dob de modoron de inok munur ro bé Jesuse. ²¹ Atin amuk diyou dob de békén Judio, iringé ku soy adat ruwe inok munur ro so bé Jesuse. Endob fiyon fo ké éndaén modoru bé kitab Moisese, modoru bé kitab Kristowe. ²² Atin amuk diyou dob de étew énda séna gétiga roy fatute amaé tom bé kéluhanay de amaén, énda amaé kuy amaéne karangé ro énda fiyo no. Rigoné kuy ni inok tabanga ku bero munur bé Jesuse. Mélaw rigoné kuy adat i de udenén étew dumo gu inok i de dumo bero waléy géunur bé Jesuse.

²³ Rigoné kuy kéluhanay de ni inok munur ro bé Fiyowe Uret fantag bé Jesuse, inok gédoté ku soy de kéfionon iray i Tuluse sabaf bé kélégeb i Fiyowe Uretén. ²⁴ Gétiga kom damén i ni. Amuk sékuya i de étew, kéluhana ro léméntu, éndob ségétew saén i témbane brab gégédote bé barase. Mélaw fégérör gom loo bé sékuyaé inok barasay Tuluse begom moso. ²⁵ I étewe sékuya toow fo fégérör bé rigoné nuwe inok waléy émbagér i lowoh ne. Rigoné noy ni inok téman, atin gédoté noy barase de énda fo métinkélén. Endob i betome mégérör gémalbék bé galbék i Kadnane, gédoté tom soy katome baras énda mébinasa no taman sa taman. ²⁶ Beeniy funa kuwe magayas féntang léméntu mangéy dob fégilidoy sékuyaane. Atin ségiléwu bé ségétewé

sémuntuk, toow fo tiliké no inok toow fo guraté no. ²⁷ Atin i lowoh guwe ni, amuk wén i tete kétaya no, dusané ku inok énda modoru bé nan tete kétaya ku. Rigoné kuy ni inok i begéne témenoro bé médoowe, énda waléy mékedan i kagéne baras.

10

¹ Do dumo gu, méuyotu de ké gétiga kom i énggagéwoy de katufua tom amun ménodor ro bé Moisese. Déniyagay Tuluse bero kéluhanan. Non ténléb i rawéne bero bé kéagéw ruwe brab énggéifara roy dogote féndawét Furo Dogot. ² Mélaw maak bénautison ro bé rawéne brab dogote inok waléy ro do kuyug Moises. ³ Atin ménama ro kéluhanan bé amaéne tidéw dob Tuluse. ⁴ Atin méniném ro kéluhanan bé wayége tidéw dob Tuluse, non féniném i Tuluse bero bé wayége tidéw dob sébaane batéw ménodor bero. I ni batéw been i Kristowe. ⁵ Gido loo, énda ménswat i Tuluse bé kédoono ruwe. Mélaw médooy ménléhue bero diyo dob gonone énda i étew de batí.

⁶ I funa nuwe ménrigoy de ni inok wén i do ufama témo betom, inok gétiga tom énda fatut féngonoyé tom i de tete éntingayén loo bé berowe.

⁷ Enda fatut tom méngadaf bé de kéninontow loo bé rénígoy de dumo bero. Non wén i Ménsulate Kébéréh i Tuluse mano, "Ménsar ro dob adafa nuwe mama brab miném. Tidéw béno, téménindég ro mésayaw dob adafa nuwe." ⁸ Atin énda fatut tom bigaén loo bé rénígoy de dumo bero, non kénukum i Tuluse bero bé kéléhu i ruwowe folo bra télew ngibu bé ségétérésangane. ⁹ Atin békén fatut tukawa tom i Kadnane bé de rigoné tom do tete loo bé rénígoy de dumo bero, funay de ulé kéméneke bero atin ménléhu ro. ¹⁰ Atin énda fatut tom riklamo loo bé rénígo ruwe funay Tuluse sénuguén i téakiwe méméléhu bero.

¹¹ I funay de ni do ménriko inok wén i do ufama témo brab émféingat bé kéluhanay étewe, non éndaén mérugay i tamfaday gaiwe tidéw béléewe ni.

¹² Mélaw, i étewe manok toow fo méégét i kéunur ne, fatut mingat inok énda mésalaén. ¹³ I de kétukawa no bé séngae ségétew étew békén saén ménantu, non i kéluhanay kéilawane métukawanén loo bé begome. Atin toow tom fo gésarig bé Tuluse non énda fédayaé no betom métukawan bé kétukawe gélamfas na betom. Non bé gaiwe métukawan tom, tintu fébagéré no betom inok wén i kétingkél tom, inok énda damén gérigo tom sala.

¹⁴ Mélaw do gulaané ku do dumogu, kagom méngadaf bé de kéninontow. ¹⁵ Gétiga kom i fatute, mélaw fégitung gom i de bénréh gu inok gétiga kom ké toow look énda. ¹⁶ Amuk mamung tom bé “komiyuniyune” fégétédémé tom i kéléhu Kristowe, mama tom fan brab miném tom arak fénsalamata key dob Tuluse. I inémé tome, been i dara Kristowe sétukidé tom. Atin i amaé tome, been i lowoh Kristowe sétukidé tom. ¹⁷ Sébaan i fane. Mélaw i kéluhana tome waléy sébaan so non mama tom bé sébaane fan.

¹⁸ Fégitung gom i fantage bé de étew Judio. I kéluhanay de mama bé ténulake, séréngan ro do méngadaf bé Tuluse. ¹⁹ Ay niy atag i ni kétoro gu begom. I kéninontowe, rénigoy étewe saén. Atin mélaw énda i atag i amaéne ténulak dob adafay de kéninontow. ²⁰ Gido loo, békén saén do kéninontow i de féngadafé ro, ké témulak ro do saitan so. Békén Tulus i féngadafé ruwe. Mélaw mikau de ké mamung gom bé kéféngadafe bé de saitan. ²¹ I betome do munur bé Kristowe, amuk mama tom bé komiyuniyone, fégétédémé tom i Kadnane Jesus brab Beeney féngadafé tome. Mélaw énda fakay tom mama so bé de amaén ténulak dob adafay de saitan non maak mamung tom méngadaf bé de saitan. ²² Békén fatut fédaléwé tom i Kadnane. Non toow fo barakatan brab gékukumo no betom, atin énda géséliyah tom de.

²³ Fiyon fo ké fakay rigoné tom i kéluhanane békén fiyoy kéluhanay de rigonén. Atin fiyon fo ké fakay rigoné tom i kéluhanane, békén fégétabang bé de dumogu tom i kéluhanay de rigonén.

²⁴ Békén fatut tabanga tom saén i de katom lowoh. Fatut tabanga tom soy de dumogu tom.

²⁵ Fakay amaé tom i de udenén karne fébéléy dob fadiyane, brab békén fatut fénginsaé tom ké ténulak dob adafay de kéninontow, inok énda waléy tete i de fédew tom amuk amaé tom. ²⁶ Non ténungkas i Tuluse betom mama bé kéluhanay amaéne dob Ménsulate Kébérén mano, “Tulusey gefee bé duniyae brab kéluhanay étingayéne.”

²⁷ Amuk wén i ségétew étew énda munurén bé Kristowe atin séngkaté no begom mama, brab amuk magéw gom mangéy diyo, fatut amaé kom i kéluhanay féama ne begom. Endob kagom fénginsaén de ké ténulak i amaéne ni dob kéninontowe, inok énda waléy tete i de fédew gom ké mama gom de. ²⁸⁻²⁹ Endob amuk wén i émbérén de begom mano, “I ni amaén ténulak dob adafay kéninontowe”, kagom amaén de, inok i ménbérénne dob begome énda waléy tete i fédew ne.

Endob amuk ménginsa gom makom, “Amuk fakay amaé kuy atiy kétaya kuwe, sedek énda géamaa ku de sabaf saén bé ségétewé étew énda gétiga no de ké ténungkas i Tuluse betom mama bé kéluhanane? ³⁰ Sedek wén i démowoy begén bé amaéne fénsalamata ku dob Tuluse?”

³¹ Ay ni késumbul guwe de: Amuk wén i rigoné kom look amaé kom look inémé kom, rigo gom i kéluhanane inok médayéw i Tuluse de. ³² Mélaw kagom rigonén i funay dumogome tete i fédew ne, fiyon Judio, taloo no békén Judio, loo soy de munur bé Kristowe. ³³ Iring gom i rigoné kuwe. Kétaya ku ké démoyun fésuwaté kuy kéluhanay étewe. Enda rigoné kuy kéfiyonoy kagéne saén lowoh, yamula rigoné ku soy funay kéluhanay de étew fiyo inok munur ro so bé Jesuse brab méfukas ro bé de sala ro.

11

¹ Mélaw iring gom begén loo bé kéiring guwe bé Kristowe.

Fantag bé de libun

² Do dumō gu, dayéwé ku begom, non démoyun fégétédémé kom begén brab odoro kom i de kétoro gu begom. ³ Atin méuyotu de ké gésobuto kom i ni. I lagéye uléw i bawag ne. Atin i Kristowey uléw i lagéye. Atin Tulus i uléw Kristowe. ⁴ Mélaw i lagéye amuk ureté noy kébéréh i Tuluse taloo no démasal, fatut énda météléb i uléw ne inok fégito noy Kristowe uléwén. ⁵ Endob i libune amuk ureté noy kébéréh i Tuluse taloo no démasal, fatut télélébé noy uléw ne inok énda émfémalay bawag ne. Non amuk énda, ségiléw bé libune ménérih i uléw ne. ⁶ Atin amuk énda télélébé noy uléw ne, fatut fékélengén i buk ne. Endob toow fo mékémala ké ménkéleng i buk i libune taloo no ménérih i uléw ne, mélaw fatut télélébé noy uléw ne. ⁷ Endob i lagéye énda fatut télélébé noy uléw ne ké démasal taloo no ké muret bé kébéréh i Tuluse. Non beeney maake anlung i Tuluse non niray i Tuluse dey aturay duniyae ni. Békén libuney funay bawag ne médayéw. ⁸ Non i sunguwe lagéy békén tidéw dob libune. Yamula libuney tidéwe dob lagéye. ⁹ Atin i lagéye békén lénimbag inok kay libune. Yamula lénimbag i libune inok kay lagéye. ¹⁰ Mélaw fatut télélébey libuney uléw ne inok fiyon i de télaki gétiga roy lagéy i uléw ne. ¹¹ I betome do munur bé Kadnane, i lagéye brab libune fatut sétabang. Non i libune kailanga noy kétabang i lagéye. Atin i lagéye kailanga noy kétabang i libune. ¹² Non loo bé gétaho, i sunguwe libun tidéw dob sunguwe lagéy, béeleewe i lagéye mumah tidéw dob libune. Atin i kéluhanane tidéw dob Tuluse, non Been i lémimbage bé kéluhanane.

¹³ Begom séden i mégitunge de. Aw fakay ba démasal i ségétéwe libun dob simbaane amuk énda télélébé noy uléw ne? Gétiga tom énda fakayén. ¹⁴ Atin gétiga tomén dob de fédew tom bé énda fo fiyo no ké métaah i buk i lagéye. Toow fo mékémala. ¹⁵ Endob toow fo fiyo ké métaah i buk i libune funa no médayéw. Non niray

dey buk ne inok météléb i uléw ne.

¹⁶ Amuk wén i mika bé ni kétoro, ay niy késumbul guwe de. Enda i ségiyo adat ténero gey saliyu bé ni bé kéfengadafe. Atin ménagayun soy kéluhanay de munur bé Tuluse dob kéluhanay de ingéd.

Ikéama i Kadnane

¹⁷ Ay niy ségiyowe na bérhéhé ku begom. Enda dayéwé ku begom sabaf bé késelimud gome méngadaf. Non énda fiyoy rigoné kome, rigoné kom i tete. ¹⁸ Non énggelingoo ku, buluk sélimud gom kun, ménsébaad-baad gom. Atin gétiga ku wén i kétoow i ni. ¹⁹ Gido loo, kailanga kom i mésébaade inok toow fo giton i isuwe tintu fo sémarig bé Tuluse. ²⁰ Amuk sélimud gom mama bé amaéy Kadnane sani komiyuniyune, énda fiyoy nan rigoné kom. Mélaw békén gom tintu mama bé amaéy Kadnane. ²¹ Non amuk mama gom, i de dumō begom toow fo arumén. Mélaw i de dumō de mule ro mélawayaf. Atin saliyu na bé nan, waléy i de dumō begom molon ké sélimud gom. ²² Sedek énda mama gom brab miném dob de kagom lawi? Non bé kéarumé kome, fémalané kom i de méskinan begom. Mélaw i de ségiyo étew émbéréh ro tete fantag bé begome do munur bé Jesuse. Ati mélaw i fiyowe bérhéhé ku? Enda fo dayéwé ku begom loo damén bé kétaya kome de. Yamula bérhéhé ku begom, toow fo tete i rigoné kome.

²³ Non i ténero guwe begom fantag bé komiyuniyune ségiléw so bé kétoro i Kadnane de begén. Bé kélunganone fénkéfo Judasey Kadnane Jesus, éndot Jesusey fane. ²⁴ Atin amun gilid ménfésalamat dob Tuluse, sénbaad-baadén. Atin ménbéréh mano, "Ay niy lowoh guwe, niray inok méfukas gom. Ama gom i ni fégétédémo kom Begén." ²⁵ Loo so bé no, amun énggilid ro mama fétémégén, éndotén i tabue. Brab ménbéréh mano, "I ni tabu, beeniy mantuwe fasad i Tuluse rénigo bé dara guwe. Amuk miném

gom de, rigo gom fégétédémo kom Begén."

²⁶ Non taman so bé késéfule i Kadnane, sénga mama gom bé fane ni brab miném dob tabue ni, fégito gom i késarig gome bé kéléhu ne fégéfukas begom. ²⁷ Mélaw amuk wén i étew mama bé éfay Kadnane brab miném dob tabu ne, éndob énda méégét i kékéfítung ne fantag bé atag i komuniyone ni, ménsala sébanil bé Kadnane. Non énda basana noy lowoh ne brab dara ne. ²⁸ Mélaw fatut susinéy séngae étew i kaane lowoh ké fiyo taloo no tete i kékéngadaf ne. Amuk gékaranga no fiyo, fakay mama bé fane brab miném dob tabu i Kadnane. ²⁹ Endob amuk wén i étew mama de brab miném de, atin énda rénigo no de inok fégétédémé noy kéléhu i Kadnane, kukuméy Tuluse de sabaf bé nan rénigo no. ³⁰ Beeniy funa kome médooy de mélubay begom brab do démeruun, atin wén soy do ménléhu begom. ³¹ Endob amuk susiné tom na sunguy de katom lowoh bé kékéngadaf tome bé Kadnane, énda kukuméy Tuluse betom. ³² Endob bé kékifit i Tuluse betom béleewe ni, toroé no betom inok énda kukumé no betom moso loo bé gétimale kékukumén bé de étew énda munur ro bé Jesuse.

³³ Mélaw do dumo gu, amuk sélimud gom mama bé komiyuniyone, kagom magayas. Yamula séongot-ongot gom. ³⁴ Atin amuk wén i mélaf, fatut mama na métah dob lawi ne. Atin tidew béno, mangéy sélimud. Mélaw énda kukuméy Tuluse begom ké sélimud gom. Atin fantag man bé de ségiyo kékéginan gu begom, bérhéhé ku fo ké séfuleu mangéy diyan.

12

Iray i Rémogor i Tuluse

¹ I kékuyoto kuwe bérhéhé ku begom i fantage bé de iray i Rémogor i Tuluse. Do dumo gu, méuyotu de fo ké gésobuto kom i de ni. ² Bé gétahe, amun énda séna munur gom bé Jesuse, wén i ménfífengadaf begom bé de kéninontow. Atin sabaf bé

ni, énggésala gom, fénéngadaf gom i de kéninontow, sani de énda méuyag.

³ Mélaw méuyotu de ké gétiga kom i ni. I étéwe fémanduooy Rémogor i Tuluse, énda géfémulaa noy Jesuse. Brab énda soy étew gébéréh mano, "Jesusey Kadna kuwe," saliyu bé fénémanduooy Rémogor i Tuluse.

⁴ Médoo gékélasiy de kéfurungan iray i Rémogor i Tuluse, éndob sébaan saén i tidéwo ruwe sani Rémogor i Tuluse.

⁵ Médoo gékélasiy kégalbéke, éndob sébaan saén i Kadnane galbékon.

⁶ Médoo gékélasiy de rigoné tom, éndob sébaan saén i Tuluse émférigo de dob betome kéluhanan. ⁷ I Rémogor i Tuluse niraya noy séngae ségétew betom bé sébaane kéfurungan inok fégétabang tom bé kéluhanay de dumo tom munur. ⁸ Non i Rémogor i Tuluse, irayén dob de dumo étew i kéfurunge émbéréh bé toowe kégétigan. Atin dob ségiyowé man étew, irayén i kéfurunge émfégésobut bé ménaléme kétoro.

⁹ Atin dob de ségiyo, irayén i émbagére kéunur. Atin dob de ségiyo, irayén i kégétigane muwa. Endob sébaan saén i Rémogor i Tuluse miray de.

¹⁰ Atin dob de ségiyo, irayén i barakate inok gérigo ro do mékégaif. Atin dob de ségiyo, irayén i kéfurunge muret bé kékéréh i Tuluse. Atin irayén dob de ségiyoy kéfurunge mégélolo bé barakate ké atiy tidéwo nuwe de, inok gétiga ro ké tidew dob Tuluse loo ké tidew dob Satanase. Atin irayén dob de ségiyoy kéfurunge sébéréh bé de séségiyo-giyo késébéréh énda séna gétiga ro de. Atin irayén dob de ségiyoy kéfurunge émfégésobut bé de ni do késébéréh. ¹¹ Atin fiyon fo ké médoo gékélasiy de kéfurungan irayén, sébaan saén i Rémogor i Tuluse miray de. Atin irayén saén dob séngae ségétew kétaya no iraya no de.

Maak lowoh

¹² I Kristowe ségiléw bé sébaane lowoh. Atin betomey maake réfa i lowoh Kristowe. Wén i do séségiyo-giyo kéfurungo tom ségiléw bé rigonéy de réfa i lowohe. Endob sébaan saén

i lowohe. ¹³ I begome kéluhanan, do Judio taloo no do békén Judio, do rifén taloo no do békén rifén, sébaan saén i Rémogor i Tuluse ménautison betom. Mélaw ménwaléy tom maak sébaan lowoh fémanduoy Rémogor i Tuluse.

¹⁴ Sébaan saén i lowoh i ségétewé étew éndob médooy de réfaén.

¹⁵ Ufama, amuk émbéréh i sékéye mano, "Békenu réfa i lowohe non békénu kémér," békén toow i nan. Non i sékéye, fiyon fo ké énda gégamakén loo bé kémére, réfa i lowohe soy beene. ¹⁶ Atin amuk émbéréh i kelingoe mano, "Békenu réfa i lowohe non békénu moto," békén toow i nan. Non i kelingoe, fiyon fo ké énda gégito no loo bé motowe, réfa i lowohe soy beene. ¹⁷ Ufama, amuk i sébaane lowoh falan saén moto, énda gégélingoén. Atin amuk falan saén kelingo, énda gétéréhungén. ¹⁸ Endob énda lénimbag i Tulusey étewe loo bé nan. Non rénigo noy de séségiyo-giyowé réfa i lowoh i étewe loo bé kétayay Tuluse de. ¹⁹ Mélaw amuk ségéréfa saén i lowohe, énda médawétén lowoh. ²⁰ Endob i toowe, médooy tom do réfa i lowoh Kristowe.

²¹ Mélaw i motowe énda gébéréhén dob kémére mano, "Enda kailanga ku beem." Atin i uléwe énda gébéréhén dob sékéye mano, "Enda kailanga ku beem."

²² I toowe, i de réfa i lowohe fégitungé tom do énda fo

toowén balilaga, beroy de toow fo do kailangan. ²³ Atin i de réfa i lowohe fégitungé tom do toow fo gérifantad, toowé tom fo talimaén. Atin i de dumoy réfaén énda toowén fiyo, toowé tom féfiyonén bé kégale.

²⁴ Enda kailanga no rigonén dob de dumoy réfa i lowohe do fiyo falas.

Non rénigoy Tulusey de lowoh tom inok talimaé tom i de réfaén karangé tom énda balilaga ro. ²⁵ Mélaw békén fatut sésinay de réfa i lowohe non rénigoy Tuluse bero inok sétabang ro.

²⁶ Atin amuk kédawétan i ségéréfae bé lowohe, kédawétan ro so kéluhanan. Atin amuk médayéw i ségéréfae de,

méoror ro kéluhanan.

²⁷ Mélaw betomey lowoh Kristowe, brab kéluhana tom do réfa i lowoh ne.

²⁸ I betome do munur maak sébaan saén i lowoh tome. Atin niray i Tuluse dob séngae ségétew betom i kaane galbék. Fénémili i Tulusey de étew gémalbék loo bé ni. I sunguwe de, rénigo noy dumoy de étew do apostol. I géruwowe de, rénigo noy de dumoy de muret bé kékéréh ne. I gétéléwe de, rénigo noy de dumoy de témore. I de dumoy de rénigo no bero gétigan rémigo bé de mékégaif. I de dumoy de rénigo no bero gétigan muwa bé de démeruun. I de dumoy de rénigo no bero tétabang bé de dumoy ro. I de dumoy de rénigo no bero do fiyo odoron. Atin rénigo noy de dumoy de furung sébéréh bé séségiyo-giyowé késébéréh énda gétiga ro de. ²⁹ Enda fakayén ké kéluhana tom do apostol, taloo no do muret bé kékéréh i Tuluse, taloo no do témore, taloo no do rémigo bé de mékégaif. ³⁰ Enda fakayén ké kéluhana tom muwa bé de démeruun, taloo no gésébéréh bé de séségiyo-giyowé késébéréh énda gétigano, taloo no émfégésobut bé de ni do késébéréh.

³¹ Mélaw fatut ongoté kom dob Tulusey de kékfurungan toow fo balilaga.

Endob wén na foy toow de balilaga sani kégédawe.

13

Ikégédawe

¹ Fiyon fo ké gésébéréhu bé de séségiyo-giyowé késébéréh i de étew brab de télaki, éndob amuk énda mégédawu, énda i laga i kékfurung guwe non ségiléwu saén bé selekéne agung taloo no loo bé selekéne banting.

² Atin fiyon fo ké furungu témore bé kékéréh i Tuluse, brab gésobuto kuy de ménalém kékéréh tidéw dob Tuluse, brab fiyon fo ké toowu fo gétigan, brab toow fo émbagér i kéunur guwe inok géféaguwo kuy de tuduk,

éndob amuk énda mégédawu, énda foy lanték gu. ³ Atin fiyon fo ké iray guy kéluhanay de languntama ku inok tabanga kuy de méskinan, brab iray

guy lowoh guwe fétuwégu bé de étew, éndob amuk énda mégédawu, énda i baras gédoté ku.

⁴ I étewe mégédaw toow fo tingkélo noy de dumo no. I étewe mégédaw rigoné noy fiyowe dob de dumo no. I étewe mégédaw énda médaléwén bé de dumo no. I étewe mégédaw énda félangka-langkaén taloo no fébantug-bantug. ⁵ I étewe mégédaw énda lémigis-ligisén. I étewe mégédaw énda arumé no. I étewe mégédaw énda magadén mékérít. I étewe mégédaw magad fésagada noy de dumo no. ⁶ I étewe mégédaw énda méororén bé tatee. Yamula méoror bé fiyowe brab métintuwe. ⁷ Atin i étewe mégédaw tingkélé noy kékérasya nuwe ké tete i de rigonéy de dumo no dob beene. Fédayaé no sa bero. I étewe mégédaw, énda mékédan i késarig ne taloo noy inam ne bé fiyoy de rigonéy de dumo no étew.

⁸ I de kéfurung émbéréh bé kékéréh i Tuluse, mékédan moso. I de kéfurung sébéréh bé de séségiyo-giyo késébéréh énda gétiga no, mékédan so moso. I kégétigane, mékédan so moso. Endob i kégédawe énda mékeda no. ⁹ Non kulang sénay kéfurung tome émbéréh bé kékéréh i Tuluse brab de kégétiga tom. ¹⁰ Endob amuk gumah i gaiwe iray i Tuluse betom i tintuwe fiyo, mékédan i de éntingayén do kulang.

¹¹ Bé kéénga guwe séna émbéréhu loo bé ngae, brab i kégétigung guwe, nga so. Endob amun ménwaléyun métuwa, ménkédanén i de adat gu loo bé ngae. ¹² Ségiléw so bé be-tome. Béleewe ni, i kégétiga tome brab kégésobut tome bé Tuluse, kloh saén. Ségiléw bé anlunge téngténgé tom dob rébure féngalungan. Endob amuk gégumah moso i gaiwe gito tomén foy Jesu Kristowe, gésobuto tomén i kéluhanane, ségiléw bé kégésobut i Tuluse de betom, békénén maak anlung.

¹³ Mélaw télaw i éntingayéne énda mékeda no: kéunur, inam, brab

kégédaw. Endob i toowe de fo imfortante, been i kégédawe.

14

Iiray i Rémogor i Tuluse

¹ Mélaw fatut tom toow fo méuyot bé kégédawe bé de dumo tom. Atin fatut so méuyot tom bé de dumo do kéfurungon tidew dob Tuluse. Labilabi na foy murete bé kékéréh i Tuluse. ² I étewe sébéréh bé késébéréhe énda gétiga no, dob Tuluse saén sébéréh, békén dob étewe. Non énda gésobuto ro de. Béréhé no saén i de ménbunéy non féréréh i Rémogor i Tuluse de. ³ Endob i étewe muret bé kékéréh i Tuluse, ureté no dob de étew inok tabanga no bero émféégté bá de kéunur ro brab féginauné no bero, brab émféfiyo bé de fédew ro. ⁴ I étewe sébéréh bé késébéréhe énda gétiga no, tabanga no saén i kaane lowoh. Endob i murete bé kékéréh i Tuluse, tabanga noy kéluhanay de munur mégélingo.

⁵ Méuyotu de damén ké gésébéréh gom kéluhanan bé de késébéréh énda gétiga kom de, éndob toowu de na fo méuyot ké ureté kom i kékéréh i Tuluse. Toow na fo gérotor i étewe ureté noy kékéréh i Tuluse bé étewe sébéréh bé késébéréhe énda gétiga no, saliyu ké béréhé noy atag i bénréh ne inok gégéfiyono noy fédew i de dumo no munur. ⁶ Mélaw do dumo gu, amuk gégumahu diyaan atin sébéréhu bé késébéréhe énda gétiga tom de, énda gétabanga ku begom. Toow na fiyo ké ureté ku begom i fénggitoy Tuluse begén, taloo no béréhé ku begom i de gétiga ku, taloo no ureté ku begom i kékéréh i Tuluse, taloo no toroé ku begom. Non amuk rigoné kuy de ni, tabanga ku begom.

⁷ Ufama, fégitung gom i de baat. I faléndage taloo no fégérung, amuk i ségetéwe étew énda gétiga noy kényuf ne bé faléndage taloo no énda gétiga noy kékébit ne bé fégérungs, ati fanufanuy kégétigay de mégélingo de ké atiy linggengé nuwe. ⁸ Atin amuk wén i sundalo iyufé noy témburiwe

inok mangéy sétiboh i de dumo no, éndob énda fékéntayé noy kéiyuf ne bé témburiwe, ati fanu-fanuy kégésobut ruwe de ké fatut ro magayas mangéy sétiboh. ⁹ Ségiléw so bé begome, amuk sébérélh gom bé késébérélh énda gétiga kom de, énda mon i gésobut de. Mélaw énda i atagén brab énda i lagaén. ¹⁰ Médooy de séségiyogiyo do késébérélh dob duniyae ni, éndob wén i atag i séngae késébérélh. ¹¹ Endob amuk énda gésobuto kuy késébérélh i dumo guwe séuret-uret, énda fo gésésobutan gey. ¹² Atin i begome, toow fo méuyot gom de ké gégédot gom bé de kékfurung tidéw dob Rémogor i Tuluse. Endob fatut télama gom usar i de kékfurung émfébagér bé kéunur i de dumo gom.

¹³ Mélaw i étewe furung sébérélh bé késébérélh énda gétiga no, fatut démasal dob Tuluse mongot kégétigan émfégésobut bé atag i késébérélh ne dob de dumo no. ¹⁴ Non amuk fédasaléy Rémogor i Tuluse begén dob késébérélh énda gétiga ku de, moror i rémogor guwe fiyon fo ké énda gésobutoy itunga kuwe de ké atiy atag ne. ¹⁵ Ati mélaw i fiyowe rigoné ku? Fatut fédayaé kuy Rémogor i Tuluse émfédasal begén dob rémogor guwe. Endob usaré ku soy itunga kuwe ké démasalu. Fatut fédayaé kuy Rémogor i Tuluse émfékanta begén dob rémogor guwe, éndob fatutu so kémanta dob itunga kuwe. ¹⁶ Amuk i ségétéwe étew dayewé noy Tuluse bé rémogor ne saén, i de étew énda gétiga roy fantage bé ni kékfurung, énda fo gésobuto ro de. Mélaw énda géséfagayun ro maro, “Amen” non énda gésobuto ro de. ¹⁷ Fiyon fo ké fiyoy kékfésalamat ne dob Tuluse, énda géfébagéro noy kéunur i de dumo no.

¹⁸ Fésalamatu dob Tuluse, non toow na fo gésébérélh bé késébérélh énda gésobuto ku de bé begome kéluhanan. ¹⁹ Endob amuk sélimudé de dumo gu munur bé Kris-towe inok méngintulus, toow na fo méuyotu sébérélh bé késébérélh gésobutoy kéluhanane fiyon sétaga saén

bé médoowe kékberélh énda gésobuto ro de. Mélaw gétoroo kuy de étew.

²⁰ Do dumo gu, kagom miring bé kékfégitung i de nga. Endob iring gom i kékfégitung i de nga fantag bé tetee non énda gétiga roy tetee. Saliyu na bé nan, iring gom i kékfégitung i étewe gétigan. ²¹ Wén i Ménsulate Kékberélh i Tuluse mano, “Sugué ku mangéy dob de Judioy de étew ségiyoy de késébérélh ro tidéw dob ségiyowe ingéd. Endob fiyon fo ké mérigoy ni, énda so fégélingoé ro Begén, bang i Kad-nane.” ²² Mélaw i kékfurunge sébérélh bé késébérélh énda gétiga no, niray i Tuluse inok i de énda munur gélolo ro tidéw dob Tuluse. Endob i kékfurunge muret bé kékberélh i Tuluse, niray i Tuluse inok émfébagér i kéunur i de munur.

²³ Mélaw amuk sélimud gom do munur, atin sébérélh gom bé késébérélh énda gétiga kom de, atin géumah i étewe énda munurén taloo no énda gétiga noy fantage bé ni kékfurung niray i Tuluse, manok bunég gom. ²⁴⁻²⁵ Endob amuk kéluhana kom muret bé kékberélh i Tuluse, atin i étewe énda séna munurén bé Jesuse ménangéy témuak begom, gésobuto noy késébérélh gome. Mélaw waléy gétiga noy de salaén, atin gésénule. Mélaw lémingkuwéd méngadaf bé Tuluse brab émbérélh mano, “Tulus i tintuwe mémanduon begom.”

²⁶ Mélaw do dumo gu, amuk sélimud gom méngadaf, fiyo ké wén i kémanta, brab wén soy téromo, brab wén soy muret bé atiy fénggitoy Tuluse de. Atin fatut wén soy émbérélh dob séségiyogiyo késébérélh énda gétiga no, brab fatut wén soy émfégésobut bé ni késébérélh. Rigo gom i kéluhanay de ni émfébagér bé kéunur i de dumo gom. ²⁷ Atin amuk wén i gétigan sébérélh bé késébérélh énda gétiga no, fatut ruwo loo ké télew saén i rémigowe de. Atin fatut sétélés-télés ro émbérélh. Atin fatut wén soy émfégésobut bé kékberélh ruwe. ²⁸ Endob amuk énda i émfégésobut de, fatut mantés ro kéluhanan atin

sébéréh ro séden bé Tuluse dob de fédew ro. ²⁹ Atin fakay émbéréh i ruwowe taloo no télaw gétew étew muret bé kékéréh i Tuluse. Brab i kéléhanay étew fatut fégélingoé ro fo toow inok gétiga ro ké katabuwan i kétoro ruwe taloo no békén. ³⁰ Atin amuk wén i ségétew bé de ménsar mégélingo, wén i fénggitoy Tuluse de, fatut témerén i émbéréh inok gébéréh i ni étew. ³¹ Fakay kéléhana kom muret bé kékéréh i Tuluse, éndob sétélés-télés gom muret, inok métoro brab émféfiyoy fédew i kéléhanane. ³² I kéléhanay de étew nirayay Tuluse kégétigan muret bé kékéréh ne, fatut séongot-ongot brab sétélés-télés ro muret. ³³ Non mikä i Tuluse ké megukét i késélimud gome, yamula méuyot bé mélosoe.

Atin wén soy ni sugu gu begom, sani ségiléwe bé rigonéy de munur dob kéléhanay de ingéd. ³⁴ I de libun fatut féantés ro ké gai sélimud ro méngadaf, non énda fatutén ké émbéréh ro. Non dob kitab i de Judio, i libune fatut saén mégélingo brab séodor-odor saén. Enda fakay ro mékuléw. ³⁵ Atin amuk méuyot ro méganad, fatut ménginsa ro dob de bawag ro dob de lawi ro, non mékémala ké émbéréh i de libun ké sélimud gom dob simbaane.

³⁶ Kagom fégitungén de ké tidéw saén dob begomey kékéréh i Tuluse, taloo no makom ké begom saén i nirayan de. Toow fo békén i nan. ³⁷ Amuk wén i ségétew begom manok niray i Tulusey kékéréh ne, look wén i kékfurunge tidéw dob Rémogor i Tuluse, fatut magayun bé do sugu i Tulusey de ni kétoro sulaté ku dob begome. ³⁸ Atin amuk wén i étew énda modorén bé ni sulat, kagom fégélingoén de.

³⁹ Mélaw do dumo gu, fatut méuyot gom muret bé kékéréh i Tuluse. Endob kagom fétérénén i étewé émbéréh dob késébéréh énda gésobuto no de. ⁴⁰ Endob fatut féfiyo gom i de adat gom brab fétanék gom ké sélimud gom méngintulus.

15

Fantag bé kétébule Kristowe

¹ Atin béleewe, do dumo gu, fefégétédém gu begom i Fiyowe Uret nuret gun begom bé do getah. Bé béo tintu ménunur gom bé ni Fiyo Uret fantag bé Jesu Kristowe taman so béleewe ni. ² Non i Fiyowe Uret nuret gu dob begome, been i mémukase begom tidéw dob de sala gom. Non énda kukuméy Tuluse begom amuk démayday gom munur. Non amuk énda fidayday gom, békén gom tintu munur.

³ Atin i Fiyowe ni Uret, ténero gu begom i ténoroe begén. Toow fo gérotor i ni kétoro. I Kristowe ménléhu génantino no betom inok énda mékukum tom sabaf bé de sala tom. Been soy kéuret i Ménsulate Kékéréh i Tuluse. ⁴ Atin lénébéng i Kristowe brab méntébule dob gétélén ne gétérésang loo bé kéuret i Ménsulate Kékéréh i Tuluse. ⁵ Tidéw béo, méntéfégito dob Pedrowe. Tidéw béo, méntéfégito dob kéléhanay de folo bra ruwo kuyugén. ⁶ Tidéw béo, méntéfégito dob labiwe limo ratuh do dumo tom munur amun ménlimud ro. I kédoono ruwe méuyag ro séna béléewe ni, éndob i de dumo bero ménléhu ron. ⁷ Tidéw béo, méntéfégito dob Santiagowe. Tidéw béo dob kéléhanay de apostol.

⁸ Atin amun gilid méntéfégito dob berowe, méntéfégito so dob begéne énggáfuray. Atin ménunuru maak ségétewu nga ménfégés i kékumah ne. Non fiyon fo ké mikau de munur, fénunur i Tuluse so begén. ⁹ Atin begéne foy toowe gérfantad bé kéléhanay de apostol, non amun énda séna munuru de, toow fo fénrasay guy kéléhanay de munur bé Jesuse. Mélaw énda médaitu fidawétén apostol. ¹⁰ Endob sabaf saén bé kékédaw i Tuluse, fénwaléyén begén apostol. Atin non bé kékédaw ne, wén i fiyowe ménrigo. Non toow na mégéror i kagéne galbék bé de dumo do apostol. Endob békén begén i gémalbéke. Yamula tabangay

Tuluse de begén. ¹¹ Atin ulanden ké énggelingoo kom i Fiyowe Uret tidéw dob begéne look tidéw dob de dumogu apostol. Non ségiléw i de kétoro gey. Atin been i nan i nunuro kome.

Fantag bé kétébule i de munur

¹² Atin ay niy ténero guwe begom: Méntébule i Jesu Kristowe. Mélaw sedek i de dumogu begom émbéréh bé énda kun fakayén tébule i de ménléhu moso? ¹³ Non amuk énda fakay tébule i de ménléhu, fiyon i Kristowe énda séna méntébuleén. ¹⁴ Atin amuk énda méntébule i Kristowe, énda foy lanték i kétoro geye brab énda i funa tom munur. ¹⁵ Atin békén saén i ni, non amuk loo bé nan i begeye, do tugién gey sébanil bé Tuluse. Non begey i ménbéréhe bé fentébule i Tulusey Kristowe. Mélaw tugién gey amuk énda tébule i de ménléhu, loo soy Kristowe. ¹⁶ Non amuk énda tébule i de ménléhu, énda so tébule i Kristowe. ¹⁷ Atin amuk énda méntébule i Kristowe, énda i lanték i kéunur gome. Mélaw énda séna mékédan i de sala gom brab mékukum gom. ¹⁸ Atin amuk énda i kétébule, i de ménléhu do munur bé Kristowe, énda man méuyag ro, yamula mékukum ro so. ¹⁹ Atin amuk i inam tome bé Kristowe taman saén dob kéléhu tome, toow tom fo mékégédaw-gédaw bé kéluhanay étewe.

²⁰ Endob i toowe, méntébule i Kristowe. Mélaw gétiga tom tébule soy kéluhanay de ménléhu. Non Beeney sunguwe saén méntébule. ²¹ I funay kéluhanay étewe méléhu non ménalsa i sunguwe étew, sani Adame. Atin i funay kéluhanay étewe tébule, non bé rénigoy ségétewe sani Jesuse.

²² I kéluhanay kéilawane méléhu non énggédot tom i kéléhue tidéw dob katufua tome Adam. Atin ségiléw so bé ni, i kéluhanay munure bé Kristowe tébule, non énggédot roy umule énda i tamana no tidéw dob Beene. ²³ I sunguwe méntébule inok méuyag taman sa taman, Been i Jesu Kristowe. Tidéw béno, do betom kuyugén i gétunduge tébule dob gaiwe séfule moso. ²⁴ Tidéw béno dob

tamfaday de gai, i Kristowe tabana noy kéluhanay de méguléw do sébanil dob Tuluse. Binasané noy atura ruwe brab barakat ruwe. Atin irayén i kéféguléwe dob Tuluse Abayén. ²⁵ Non i Kristowe kailanga noy méguléwe taman tabanay Tulusey kéluhanay de sébanil de. ²⁶ Atin i toowe fo géfuray tabana Jesuse sébanil dey kéléhue. ²⁷⁻²⁸ Non wén i Ménsulate Kébéréh i Tuluse mano, “I Tuluse rigoné noy Kristowe méguléw bé kéluhanane.” Mélaw féguléwo Kristowey kéluhanane saliyu saén bé Tuluse, non Been i ménféguléwe bé Kristowe. Atin amuk Kristoy méguléwe bé kéluhanane, tidéw béno feféguléwén bé Abay ne Tuluse i Beene. Mélaw Kristowey méguléwe bé kéluhanane, brab Tulusey méguléwe bé Kristowe brab kéluhanane so.

²⁹ Amuk énda i kétébule i de ménléhu, ati funay de étew fébautis gémanti bé de ménléhu? ³⁰ Atin amuk énda i kétébule, sedek fédidayday gey rémigo bé galbék i Tuluse béní ké kakaidan gey sénga tékélid? ³¹ Do dumogu, i de sébanil bé Tuluse, sénga fuweh i kéuyot ruwe méméléhu begén. Atin gétigay Tuluse toow i ni loo bé kétoow i kéoror guwe sabaf bé kéunur gome bé Kadna tome Jesu Kristo. ³² Toowu fo kérégénan dob ni ingéd, Efeso. Non i de sébanil begén maak do mérayar binatang méuyot ro begén méméléhu. Mélaw amuk énda i kétébule, énda i funa ku gémalbék. Amuk énda i kétébule, modoru bé kébéréhe mano, “Mama tom, brab miném tom brab méguyaya tom béleewe ni, non démo méléhu tom.”

³³ Ingat gom inok énda munur gom bé éndae toow. Non amuk séloyuk gom bé de étew do tete i de adat ro, waléy gom de géiring. ³⁴ Féfiyo gom i de adat gom, brab tagak gom i de tete rigoné kom. Fatut mémala gom non wén i do dumogom énda gétiga roy toowe kétoro fantag bé Tuluse.

³⁵ Endob amuk wén i ménginsa mano, “Ati kéfingé-fingé i kéfétébule i Tuluse bé de ménléhu? Brab ati falas

i lowoh ruwe?" ³⁶ Ay niy késumbul guwe de. Toow fo dufang i da nan kéfenginsa. Non i bénee lénibéngén dob fantade ké ohokén. Tidéw bénou, méuyag. ³⁷ Amuk mohok gom, énda ohoké kom i dakéle idéng kayéw, yamula ohoké kom i bénee saén. ³⁸ Tulusey méniraye bé lowoh i bénee loo bé kétaya nuwe de. Atin i séngae klase béne wén i kaan mantu lowoh ké mérükén.

³⁹ I kéluhanay de lénibag do mérénawa, séségiyo-giyoy de lowoh ro. I kélawané ségiyo lowoh ne. I de binatang ségiyo soy de karo lowoh. I de kloh manok brab do sédo ségiyo soy de lowoh ro.

⁴⁰ Wén i do séségiyo-giyo do lowoh dob lawayo brab dob fantade. Atin i kéluhanay de lénibag i Tuluse, falan fiyoy de falas ro. Endob énda ségiléw i kéfiyoy de lowoh dob lawayo brab de lowoh dob fantade. ⁴¹ Ufama, fiyoy falas i de solo dob lawayo éndob békén ségiléw. I térsange ségiyoy falas ne, i térsang kélungonone ségiyo soy kaane falas, i de gitoon ségiyo so. Fiyon i de gitoon énda kéluhanay ro ségiléw i de falas ro.

⁴² Ségiléw so bé niy kétébule i de ménléhu. Non amuk ménlébéngén i ménléhue, mébinasay lowoh ne. Endob amuk méntébuleén, éndaén mébinasay lowoh ne non mantu néen brab méuyag taman sa taman. ⁴³ Amuk ménlébéngén i bangkaye, teteén i falas ne brab éndaén i bagérén. Endob amuk méntébuleén, toowén fo fiyoy falas ne brab émbagérén. ⁴⁴ I bangkaye lénébéng, tidéw dob fantade ni. Endob féwaléyéy Tuluse mantuy lowoh ne inok médait ro méuyag beroy Tuluse taman sa taman. Mélaw amuk wén i lowoh médait dob duniyae ni, wén soy lowoh médait dob lawayo. ⁴⁵ Non wén i Ménsulate Kébéréh i Tuluse mano, "I sunguwe étew, sani Adame, nirayay Tuluse férénawa inok méuyag dob duniyae ni." Endob i Kristowe, sani féndawéte "Géruwowe Adam", Been i miraye bé umule magufusa

inok méuyag tom taman sa taman dob lawayo. ⁴⁶ Békén i umule dob lawayoy énggéétahe, non énggéétah i umule dob duniyae ni. ⁴⁷ I Adame, sani sunguwe étew, ménlimbag bé fantad i duniyae ni. Endob i Kristowe, sani maake géruwo Adam, tidéw dob lawayo. ⁴⁸ I kéluhanay kéilawane, ségiléw i lowoh ruwe bé Adame tidéw dob fantade. Endob i kéluhanay waléye kuyug Kristowe, ségiléw moso i lowoh ruwe bé Kristowe dob lawayo. ⁴⁹ Amuk kéluhana tom ségiléw bé Adame tidéw dob duniyae, gégumah so moso i gaiwe waléy tom so ségiléw falas bé Kristowe tidéw dob lawayo.

⁵⁰ Do dumo gu, ay niy atag i bérélé kuwe begom. I de lowoh tom ni méléhu non énda géahurén dob lawayo. I loowe bé ni lowoh, énda gédoté noy umule magufusa.

⁵¹ Fégélingo gom i ni ménbunéy fénggétigay Tuluse begén. Enda kéluhana tom méléhu, éndob méfégalin i de lowoh tom bé de mantu lowoh. ⁵² Toow fo magad i kéfégali nuwe, loo bé ségulee kémérék-mérék i motowe, ké émbéréh i toowe géfuray témburi. Atin modor so ké fébéréh i Tulusey ni témburi, i kéluhanay de ménléhu tébule ro. Atin i de lowoh ro émfégalin inok éndaén méléhu ro, non mélucas tom kéluhanan. ⁵³ Non i tafaye lowoh fatut mélucas inok éndaén méléhuén. Fatut émfégalin i mébinasawe lowoh inok éndaén mébinasa no. ⁵⁴ Atin amuk ménfégalinonén i tafaye lowoh bé mantuwe lowoh éndaén méléhuén, bé bénou métumanén i Ménsulate Kébéréh i Tuluse mano, "Endaén i méléhu non kénday Tuluse néen non téna ba nonén." ⁵⁵ Mélaw éndaén mégilak tom méléhu non éndaén i kéléhu. Atin éndaén i funan émbuku bé kéléhue non ménatabananén. ⁵⁶ I funa nuwe wén i kéléhu non ménasala tom. Atin i funa nuwe ménasala tom non énggáféliso tom i kukumay Tuluse. ⁵⁷ Endob fésalamat tom bé Tuluse non bé rénigo nuwe. Non éndaén mégilak tom bé kéléhue non fénukasén betom sabaf bé rénigoy Kadna tome Jesu Kristo.

⁵⁸ Mélaw, do dumo gu do kégédawa ku, fébagér gom i késarig gome bé Kadnane inok énda mékedano. Fégéror gom dob galbék i Kadnane. Non gétiga tom énda mésinggula i galbék tome, amuk rigoné tom kay Kadnane.

16

I tabange kay de munur dob Jerusalem

¹ Atin wén i ségiyowe sugu gu begom. Fatut timu gom kurta fégétabang gom bé de dumo gom munur bé Jesuse dob Judea. Sénugu gu soy ni dob de munur dob ingéde Galasia. ² Sénga Duminggu, fatut témafay i séngae ségétew begom bé atiy iray ne dob Tuluse. Fatut iray gom dob Tulusey baade gédoté kom. Itong gom inok amuk gérumahu diyaan, éndaén kailanga kom i témidue. ³ Atin amuk gérumahu diyaan, sugué kuy de étew fénemili gom mangéy dob Jerusalem inok uwité roy de iray gom. Atin émféuwitu so do sulat émfégétigan bé de étew dob Jerusalem fantag bé kétabang gome. ⁴ Atin amuk kailanga ku soy magéwe mangéy dob Jerusalem, féodoré ku bero.

I bantak Pablowe

⁵ Mangéyu diyaan ké gilidu néen téménara dob ingéde Masedonia. Non métahu mangéy diyo. ⁶ Atin amuk gumahu dob begome, batiu na keey diyaan firoy gétérésang kélungonon look taman gilid i basa barate. Atin amuk tausu magéw, fiyo ké tabanga kom begén bé kéagéw guwe dob atiy ayo kuwe. ⁷ Non énda méuyotu mawéti diyaan ké magadu de saén. Yamula méuyotu de damén ké batiu na diyaan bé firoye gétérésang kélungonon, amuk fakay dob Kadnane.

⁸ Endob batiu na dob Efesowe ni taman gilid i kandulie féndawé Pentekostes. ⁹ Non dini médooy de méuyot mágélingo bé Fiyowe Uret toroé ku. Endob médooy soy sébanile de begén.

¹⁰ Atin i Timoteowe, amuk gérumah diyaan, fégédaw gom de brab tayakuf gom. Non gémalbék so kay Kadnane,

ségiléw bé begéne. ¹¹ Atin énda fatutén ké siyawé kom. Yamula fégadata kom atin amuk taus i kéagéw ne séfule mangéy dob begéne, fatut tabanga kom. Non ongot-ongoté ku beroy de dumo no munur.

¹² Atin fantag man bé dumo tome Apolos, féngginau gu fo bé angéyé no begom tukawén diyaan beroy de dumo no munur. Endob mika séna mangéy diyaan béleewe. Yamula mangéy fo kun diyaan ségiyo gai.

¹³ Fatut mingat gom, brab fidayday gom i kéunur gome bé Jesuse. Kagom mémala fantag bé kéunur gome. Yamula fébaraw gom brab fébagér gom. ¹⁴ Atin fiyon atiy rigoné kome, fégédaw gom.

¹⁵ Gétiga kom i fantage bé Stefanase brab de dumo no séglawi. Beroy de sungu ménunur bé Kristowe dob Akaya. Toow ro fo mégéror tétabang bé de dumo ro munur. ¹⁶ Mélaw, méuyotu ké fidaya gom i kéféguléw i de étew loo bé beene brab kéluhanay étewe mamung bé karowe galbék.

¹⁷ Toow fo mororu bé kégumah ro Stefanase, brab Fortunatowe brab Akaikowe dini. Non tétabang ro begén bé kégundoy guwe begom.

¹⁸ Fénfiyo roy fidéw guwe loo bé kékéfiyo ruwe bé de kagom so fidéw. Mélaw fatut fégadata kom i de étew loo bé nan.

¹⁹ I de munur dob kéluhanay de ingéd dob Asia ségifaé ro begom kéluhanan. I ro Akilawé brab Prislawé, toow ro fo ségifaén so begom sabaf bé Kadnane. Loo soy de munur sélimud dob lawi ruwe, ségifaé ro so begom. ²⁰ Atin i kéluhanay de dumo tom munur dini, ségifaé ro so begom.

Fatut fégito gom i kégédaw gome amuk ségifaén gom.

²¹ Taman saén dob niy béréhé kuwe begom. I begéne, Pablo, sulaté kuy ni géfuray kékéhé bé kagéne kémér. Ségifaé ku so begom.

²² Amuk wén i do énda émféimu bé Kadnane, kukuméy Tuluse damén bero. Séfuleén damén i Kadnane. (Maranata.)

²³ Atin fétauséy Kadnane Jesus
damén i kégédaw ne begom.

²⁴ Toowu fo méimu begom sabaf bé
kéunur tome bé Jesu Kristowe.

Pablo

I Géruwowe Sulat Pablowe dob de Munur bé Kristowe dob Korinto

Ay niy sébaane bé de sénulat Pablo, sani ménbantuge muret fantag bé Jesu Kristowe. I ni sulat, been i niy géruwowe sulat sénulat Pablowe dob de munur do bati dob ingéde Korinto. Dob sunguwe sulat Pablowe, téneroén i de étew bé ati fatute rigoné ro. Atin dob ni géruwo sulatén, bénréh Pablowejé kéoror ne sabaf bé kéodor ruwe bé ni kétoro.

Diyo dob Korinto, wén i do étew ménbéréh bé békén kun tintu apostol i Pablowe. Mélaw dob ni so sulat, bénréh Pablowejé funa nuwe toow fo tintu apostol, non toow fo mégoror lémégéb bé Fiyowe Uret fantag bé Jesu Kristowe. Mégoror gémalbék, fiyon fo ké toow fo mérásay sabaf bé kéuret ne ni.

¹ Begéney Pablowe, ségétew apostol sénugu Jesu Kristowe non been i galbéke kétayay Tuluse rigoné ku. I begeye Timoteowe, ségétew so dumogu munur bé Jesuse, sulata key begom do munur dob ingéde Korinto brab dob kéluhanay de ingéd dob Akaya.

² I Tuluse Abay tom brab Kadnane Jesu Kristo mégédaw damén begom brab iray ro damén begom i métanéke fédew.

Fésalamat dob Tuluse

³ Fatut tom fésalamat bé Tuluse sani Abay i Kadna tome Jesu Kristo. Toow fo mégédaw i Abaye Tulus, atin Been i tidéwoy kéluhanay tabange. ⁴ Tabanga no betom dob kéluhanay de kérégéno tom inok gétabanga tom soy de dumot tom amuk kérégénan ro fiyon ati klasi nuwe. Iraya tom so bero tabang loo bé tabange niray i Tuluse betom.

⁵ Non amuk toow fo mérásay tom loo bé Kristowe sabaf bé kéunur tome de, gédoté tom soy tintuwe kétabang tidéw dob beene. ⁶ I funa keye téférasay

inok gédoté kom i tabange brab inok méfukas gom bé de sala gom. Atin amuk métabangan gey, métabangan gom so brab gédoté kom i bagére inok géfedayday gom témingkél bé de kérégénon ségiléw bé begeye. ⁷ Atin i késarig geye begom, méégét non gétiga key amuk mérásay gom ségiléw bé begeye sabaf bé kéunur gome bé Kristowe, tabangay Tuluse so begom ségiléw bé kétabang ne begeye.

⁸ Do dumogey, méuyot gey de ké gétiga kom i fantage bé kérasay geye dob ingéde Asia. I de étew diyo, toow fo fénrasay ro begey, atin mélaw makey ké éndaén méuyag gey. ⁹ Makey ké méléhu geyén bé beno. Endob ménrigoy ni inok énda sémarig gey bé kageye lowoh, yamula fatut sarigo key saén i Tuluse sani témébulee bé de ménléhu. ¹⁰ Ténabangén begey dob de makakaid inok énda méléhu gey sabaf bé de makakaid. Atin gétiga key tabangé no begey sénga tékélid. Sémarig gey bé énda téréno noy kétabang ne begey. ¹¹ Atin fatut tabanga kom begey bé de kédasal gom, inok médooy étewe fésalamat dob Tuluse non bé tabange nirayén begey sabaf bé kédasal i de médooy étew.

¹² Do dumogey, wén i funa key fidayéw-dayéw, brab gétiga key toow fo toow i ni. Fiyoy de rénigo gey dob begome brab dob kéluhanay de étew, non modor gey bé kétayay Tuluse. Atin tabangay Tuluse begey inok béréhé key i fiyowe brab toowe, békén dob kageye kégétigan éndob sabaf saén bé kégédaw i Tuluse.

¹³⁻¹⁴ Sulata key begom bé gébasana kome brab gésobuto kom. Méuyotu de damén ké gésobuto komén fo toow i de énda séna énggésobuto kom toow béléewe ni inok bé gaiwe séfule i Kadnane Jesus, moror gom sabaf bé begeye atin i begeye moror gey so sabaf bé begome.

¹⁵⁻¹⁶ Atin non gétiga ku fo toow gésobuto kom i ni, bénantak guy mangéye sémugud dob begome sungu bé do géyahé bé kéangéy guwe dob ingéde Masedonia. Atin bénantak

gu soy mawéte man ké séfuleu inok gétabanga ku begom ruwo gule, brab gétabanga kom so begén bé kéagéw guwe mangéy Judea. ¹⁷ Endob énda énggérigono kuy ni. Mélaw makom keeyén ké méfégalin i itunga kuwe sénga tékélid. Brab makom keeyén ké ségiléw i kéfégítung guwe bé de étew dob duniyae ni énda sarigon ro non magad fo fégaliné roy de itunga ro. Békén loo bé nan. ¹⁸ Béréhé ku begom i toowe, ségiléw bé kétoow i Tuluse, tintu fo bénantak guy rigoné kuy fénasad guwe begom. ¹⁹ Non témélamawu miring bé Jesu Kristowe Nga i Tuluse, sani ureté keye begom ro Silase brab Timoteowe. Non i Jesuse énda magad fégaliné noy itunga nuwe. Yamula tumané noy kéluhanay de béréhé no. ²⁰ Non i Jesusey téménumane bé kéluhanay fénasad i Tuluse. Been i niy funa tome émbéréh “Amen” (i atag ne “toow”) fantag bé kékéréd i Tuluse inok médayéw i Tuluse. ²¹ I Tuluse, Beeney émféégeté bé kéunur tome bé Kristowe inok tintu tom do dumo no. Atin Tulus soy ménémilie betom. ²² Brab ténandaa no begey inok gélolon Beeney gefee begey. Atin nirayén betom i Rémogor ne batí dob de fédéw tom inok fégétiga no betom i irayén i kéluhanay fénasad ne.

²³ Amuk énda toow i béréhé kuwe begom, kukuméy Tuluse damén begén. Gétiga roy funa kuwe énda ménangéy diyaan dob Korinto inok énda géadowyo ku begom. ²⁴ Enda méuyot gey sémugu begom ké ati fatute unuro kom. Non gétiga key méégétén i kéunur gome bé Kristowe. Yamula sétabang tom gémalbék inok toow gom na fo moror.

2

¹ Atin do dumo gu, toow fo fénggitung gu bé énda mangéy diyaan amuk féteteé ku saén i de fédéw gom ségiléw bé gétaho. ² Non amuk féteteé kuy de fédéw gom, ati émféfiyowe bé kagéne fédéw? Enda, non énda géfífiono kom i fédéw guwe amuk féteteé guy de fédéw gom. ³ Beeniy

funa kuwe séménulat dob begome bé do gétah. Ménikau mangéy dob begome, non i begome fatut damén féororé kom begén. Endob amuk ménangéy diyaan bé béno, féteteé gom saén i fédéw guwe. Gétiga ku fo toow, amuk mororu, moror gom so. ⁴ Amun sénulata ku begom, toow fo tete i fédéw guwe brab émbukuu brab énggékérewu. I funa kuwe sémulat békén ké féteteé kuy de fédéw gom. Yamula inok fégétiga ku begom i toowe kéimu gu begom kéluhanan.

Kéfésagad bé ségétéwe ménsala

⁵ I étewa nan ménsala diyaan, énda féteteén i fédéw guwe, yamula féteteén i de fédéw gom, taloo no de fédéw i de dumo saén begom. Non énda méuyotu de ké fékélébuwanén i kédusawe de bé ni kékéréd gu. ⁶ Katabuwanén i kékukum i kédoono kome de. ⁷ Atin béléewe ni, fatut fésagad gomén brab féfiyo gom i fédéw ne, non amuk énda, mékedan keeyén i késarig ne bé Tuluse sabaf bé kélébuwan i kétete i fédéw ne. ⁸ Mélaw, ongoté ku begom bé fégétiga kom dey toow i kéimu gome de. ⁹ I funa kuwe séménulat dob begome bé gétaho inok téngkadé ku begom brab inok gétiga ku ké modor gom bé kéluhanay de sugué ku begom. ¹⁰ Atin amuk fésagadé kom i ségétéwe étew, fésagadé ku so. Atin amuk wén i ménsala, fésagada ku inok moror gom. Gétiga Kristowe tintu fo fésagadé ku. ¹¹ Atin i funa kuwe rémigo bé ni, inok énda lifulé Satanase betom. Non gétiga tomén i tetee bantakén.

¹² Amun énggumahu dob ingéde Troas inok muretu bé Fiyowe Uret fantag bé Kristowe, énggito gu ténafoy i Kadnaney agéwo kuwe bé galbék guwe diyo. ¹³ Gido loo, toow fo ménbukuu non énda énggito gu diyo i dumo tome munur Tito. Mélaw ménngétawu dob de étew diyo, atin méntausu magéw mangéy dob ingéde Masedonia.

¹⁴ Endob toowu fo fésalamat bé Tuluse. Non sabaf bé kéunur tome

bé Kristowe, féténgténégén betom dob kéluhanay de étew inok fégétiga noy barakat ne. Mélaw sabaf bé be tome, wén i de étew dob kéluhanay de gonon gétiga roy fantage bé Kristowe. ¹⁵ Maak do dukah tom ténuwég Kristowe brab ténulakén dob adafay Tuluse. Atin i amut ne mélégéb dob de étew do ménfukas brab dob de étew so énda méfukas ro. ¹⁶ Dob de étew énda munur bé Kristowe, maak ahu ménléhu i kétoro tome fantag bé Fiyowe Uret, non mékukum ro sabaf bé nan kétoro. Endob dob de étew munur dob Kristowe, maak mamut i kétoro tome non fégétiga no bero bé iray i Tuluse beroy umule magufusa. Toow fo Fiyoy Urete ni. Mélaw énda i étew tintu médait lémégéb de. ¹⁷ Endob i begeye, énda ségiléw gey bé de ségiyo do téromo. Non i berowe, ureté roy kékérédaw i Tuluse inok gédoté roy kurtae. Endob sabaf Tulus i séménugue begey, gétiga no ureté key i toowe, non begey i do sugu-sugué Kristowe.

3

I mantuwe aguwon

¹ Ati kékégitung gome de, aw félangka-langka geyén man fantag bé de ni? Enda. Enda ségiléw gey bé de ségiyo téromo kailanga ro nay sulate tidéw dob de ségiyo étew émfégito bé kuwagib ruwe téromo inok tayakufé kom bero. Atin kailanga ro soy sulate tidéw dob begome amuk mangéy ro téromo dob de ségiyo. ² Endob i begeye, énda kailanga key i de sulat loo bé nan. Non i kéunur gomey maake sulat ménusat dob de fédew gey inok gétigay kéluhanay de étew i fantage bé de kétoro gey. ³ Atin gétiga roy begom i de maak do sulat tidéw dob Kristowe, fénsamfayén dob begeye. Atin i fénggésulate de békén tinta, yamula Rémogor i méuyage Tulus i fénggésulate de. Atin i sulatane de békén do batéw loo bé kitabe niray Moisese, yamula i de fédew gey i sulatane de.

⁴ I funa keye gékérédaw loo bé ni non sémarig gey bé Tuluse, sabaf bé Kristowe. ⁵ Enda gékérédaw key de ké kagey kégétigan i funa keye gérigo bé ni galbék. Non Tuluse saén i funa keye de gérigo. ⁶ Tulus i ménirayane begey kégétigan inok gétoroo key i mantuwe agéwon. Atin i mantuwe ni agéwon, békén nirayén begey i kitabe, yamula nirayén begey i Rémogor i Tuluse. Non amuk sémarig tom bé kéodoro tome bé kitabe niray Moisese, ménléhu tom. Endob amuk sémarig tom bé Rémogor i Tuluse, irayén i mantuwe umul magufusa dob betome.

⁷ Bé do gétah, amun sénulat i Tulusey kitabe dob de batéw, fénggito noy barakat ne. Amun énggito Moisese kérédaw i Tuluse, réménéndaw soy kaane falas, funay de Judio énda géténgténégé de, fyon fo ké ménlumén i kérédaw ne. Mélaw amuk loo bé nan i barakat i kégumah i kitabe muwit kéléhu, ⁸ toow na fo fiyoy rigonéy Rémogor i Tuluse. ⁹ Amuk barakatan i galbéké kémukum bé de étew, labi na fo dakél i barakat i galbéké émfétintu bé de étew. ¹⁰ Mélaw i kitabe toow fo barakatan bé gétaho, éndob éndaén i barakatén béléewe ni. Non béléewe ni, wén na foy toow barakatan tidéw bé beene. ¹¹ Non amuk barakatan i kitabe wén i tamana no, labi na fo barakatan i mantuwe agéwon énda i tamana no.

¹² Atin sabaf bé ni késarig tom bé énda mékédan i ni, toow tom fo émbaraw muret. ¹³ Enda ségiléw tom bé Moisese ténlébén i falas ne inok énda gitoy de Judio kékélum i kérédaw ne taman mékédan. ¹⁴ Endob toow fo métégas i de uléw i de Judio. Mélaw taman so béléewe ni méntéléb so tafay i de kégésobut ro. Météléb i de kégésobut ro amuk gébasana roy kitabe sani tafaye agéwon. Endob amuk wén i ségétew bero waléy dumo Kristowe sabaf bé kéunur ne de, mékédanén i kétéléb i itunga nuwe brab toow fo gésobuto no. ¹⁵ Taman so béléewe ni amuk basané roy kitabe tidéw dob Moisese, météléb i de

itunga ro. ¹⁶ Endob amuk munur ro bé Kadnane, mékédan i kétéléb i de itunga ro. ¹⁷ I Kadnane ni ménabit, Been i Rémogor i Tuluse. Atin i étéwe bati i Rémogor i Tuluse dob beene, ménfukas dob kitabe, non éndaén kailanga no modor de inok méfukas bé de salaén. ¹⁸ Mélaw i kéluhana tome do munur bé Kristowe, giton i anlung i kéréndaw i Kadnane dob falas tome, non énda météléb i de kéfégitung tom. Non giton i mantuwe adat tom miring bé Kristowe. Non i Rémogor i Tulusey mégaline betom loo bé kéfiyoy Kadnane. Mélaw minut fiyo miring bé Kadna tome Jesu Kristo.

4

¹ I Tuluse mégédaw begey, atin mélaw fénémilién begey inok rigoné tom i ni galbék. Mélaw énda mékédan i kéror geye bé galbék geye. ² Dénigur gey i de tete brab de ménbunéy do rigonén toow fo do mémala. Enda témugi gey brab énda fégaliné key i kékéréh i Tuluse. Yamula béréhé key i tintuwe fo toow inok i kéluhanay étéwe gétiga ro do métintu gey, brab inok gétigay Tuluse so. ³ Non amuk ménbunéy i Fiyowe Uret ureté key, ménbunéy saén dob de étew énda méfukas ro dob de sala ro. ⁴ Enda munur ro non ténléb Satanasey kéfégitung ruwe. Been i féngadaféy de étew dob duniyae ni. Télébé noy de kéfégitung ro inok énda gito roy kégékaya i Fiyowe Uret fantag bé kégérotor Kristowe, sani tintuwe anlung i Tuluse. ⁵ Non énda muret gey inok waléy gey émbantug. Yamula ureté key i Jesu Kristowe, Been i Kadnane, inok Been i waléye émbantug. Atin ureté key bé begeyey témabangane begom inok médayéw i Jesuse. ⁶ Amun lénimbag i Tulusey kéluhanay éntingayéne, ménbéréh mano, "Mékédan damén i délémone brab waléy wén damén i géfékaya." Been soy émfégékayaé bé de itunga tom inok gésobuto tom i kéfiyoy Tuluse fenténgén dob Jesu Kristowe.

⁷ Endob i de betom, maak do binangga tom saén nahuron drantung inok giton i barakate dob de lowoh tom békén katom, yamula kay Tuluse. ⁸ Démoyun gey mérasyay éndob énda méntabanan gey. Wén i do no, énda gésobuto key de, éndob énda mékédan i kéunur geye de. ⁹ Médooy de sébanil begey, éndob énda tagakéy Tuluse begey. Wén i no fédawéto ro begey, éndob énda tagakéy Tuluse begey. Wén i no fédawéto ro begey, éndob énda mébinasa gey. ¹⁰ Ségiléw gey bé Jesuse non sénga tékélid médooy de mérarék begey, brab méuyot ro méméléhu begey. Mélaw giton i kéuyag Jesuse béléewe ni non Been i témabangane begey. ¹¹ Amuk méuyag gey séna, démoyun gey gédét damén méléhu sabaf bé kéuret geye fantag bé Jesuse. Mérigoi ni inok giton i Jesuse méuyag non tabanga no begey démoyun. ¹² I funa keye démoyun kakaidan non bé kéuret geye fantag bé Jesuse. Endob ulandenén, non been i niy funa kome gégédot bé umule magufusa.

¹³ Wén i Ménuslate Kékéréh i Tuluse mano, "Ménunuru de, mélaw béréhé ku." Ségiléw so bé begeye, non munur gey de, mélaw béréhé key. ¹⁴ Non gétiga key i Tuluse sani téménébulee bé Kadnane Jesus, tébuleé no so begey brab begome brab féangéyé no betom dob adafa nuwe dob lawayo. ¹⁵ Atin i funa keye téférasy inok gédoté kom i de kéfiyonon. Atin bé lala ne minut médooy gégédoté bé kégédaw i Tuluse, waléy so médooy de fésalamat dob Tuluse inok toow fo médayéw.

¹⁶ Been i niy funa keye énda mékédan i kéror geye gémalbék. Non fiyon fo ké démoyun gey waléy lukés brab minut mélubay i lowoh geye, fébagéréy Tulusey kéunur geye sénga fuweh. ¹⁷ Atin i de kérasyay gey béléewe do kloh saén brab mékédan so moso. Atin sabaf bé de kéfedayday gey bé de ni kérégénon, toow na fo médayéw gey dob lawayo diyo moso, brab énda téméréno Mélaw toow na fo dakél i ni moso bé de kérégénon béléewe. ¹⁸ Non

i de gulaané key békén i de éntingayén giton dob duniyae ni. Yamula toow gey fo méuyot bé de éntingayén do énda gito no. Non i de éntingayén giton dob duniyae ni, do méalfa ro moso. Endob i de énda séna giton, sani de éntingayén iray i Tuluse, énda mékedan ro.

5

¹ Non gétiga key i ni. I de lowoh tom dob duniyae ni maak do lawi saén bation bé firoye gébélantuwa taman mékedanén, san ké méléhu tomén. Endob i Tuluse rénigo no soy de lawi tom dob lawayo. Been i de mantu do lowoh tom méuyag taman sa taman. ² Atin non bé de kérégénon béléewe, toow fo méuyot tom de ké gédoté tomén magayas i de mantu lowoh tom dob lawayo. ³ Amuk gédoté tomén i mantuwe lowoh tom, éndaén mékedano. ⁴ Endob amuk bati tom séna dob de lowoh tom dob duniyae ni, gédogés tom bé de kérégénon. Gido loo, énda fo méuyot tom témagak bé tafaye lowoh tom. Yamula méuyot tom saén kémégal bé mantuwe lowoh inok i tafaye lowoh méumbayan bé mantuwe de éndaén méléhuén. ⁵ Tulus i téménafaye bé de ni inok mérigo dob betome moso. Brab nirayén betom i Rémogor ne maak tising tandaén bé kétuma nuwe bé kéluhanay de ni moso.

⁶ Mélaw toow fo méégét i kéunur tome sénga tékélid. Gétiga tom amuk bati tom séna dob de tafay lowoh tom dob duniyae ni, énda gébati tom sétifon bé Kadnane diyo dob lawayo.

⁷ Non dob de rigoné tom béléewe ni, énda furay tom bé atiy gito tome, yamula furay tom bé atiy unuro tome.

⁸ Tintu fo émbagér i kéunur tome brab méuyot tom témagak bé de tafay lowoh tom inok mule tom bati sétifon bé Kadnane. ⁹ Gido loo, i toowe fo kétaya tom rigoné tom i késuwata nuwe fyon udenén gono tom, dini taloo no diyo dob lawayo. ¹⁰ Non i kéluhana tome kailangan fo méukum dob adafa Kristowe. Atin i séngae ségétew étew gédoté noy ati fatute

barasén look kékukume de sabaf bé de rénigo no, fiyo loo soy tetee dob duniyae ni.

Do dumoy Tuluse

¹¹ Atin non gétiga key i kégilake bé kékukum i Kadnane, télamané key féunurén i de étew. Gétigay Tulusey de fédew gey brab méuyot gey de so ké gétiga kom soy de fédew gey. ¹² I funa kuwe sémulat bé de ni kékéréh gu, békén inok dayewé kom begey. Yamula inok gétiga kom i fiyowe rigoné key brab inok gétiga kom i sémumbulone bé de étew dayewé ro saén i falas i étewé, békén i adat ne. ¹³ Wén keey i do étew mégitung marok do bunég gey. Endob i funa ruwe marok bunég gey non toow fo rigoné key témantuy kétayay Tuluse. Endob gétiga kom énda bunég gey, non gétiga kom gémalbék gey inok tabanga key begom. ¹⁴ Toow fo mégédaw i Kristowe begey funa key mégéror gémalbék. Gétiga key ménléhu i ni ségétew étew inok méuyag i kéluhanay de étew. Mélaw maak ménléhu i kéluhanane sabaf bé kégantino Kristowe bero. ¹⁵ Ménléhu gémaninon bé kéluhanay étew inok i de méuyag, éndaén rigoné roy kétaya ruwe. Yamula rigoné roy kétaya Kristowe, sani ménléhue brab méntébulee inok éndaén méukum ro.

¹⁶ Mélaw i kékégitung geye békén loo bé kékégitung i de étew énda munur ro bé Kristowe. Endob bé do gétah, i kékégitung geye loo saén bé kéilawane, funa key makey ké kéilawan saén i Kristowe. ¹⁷ I étewé waléy dumoy Kristowe sabaf bé kéunur ne de, ménwaléy mantu étew. I tafaye adatén méntagakén atin ménwaléyén mantuy adat ne. ¹⁸ Tulus i réménigowe bé de ni, non sabaf bé Kristowe, fénwaléyén betom éndaén sébanil dob Beene. Non séloyukén begey. Atin fégalbéké no begey inok féunuré key i de étew inok waléy so séloyuk i Tuluse bero.

¹⁹ Mélaw ay niy kéuret geye: I Tuluse nusarén i Kristowe mémukas bé de kéilawan inok waléy tom séloyuk bé Tuluse atin fénsgadén i de sala tom.

Atin sénarigo no begey muret fantag bé kénéwaléy ne betom séloyuk dob Beene.

²⁰ Mélaw begey i de sarigo Kristo muret bé kéongot i Tuluse. Féongoté no begey bé fagayun gomén bé kétaya nuwe. Non kétayay Tuluse féwaléyé no begom do dumo no séloyuk. ²¹ Enda i sala Kristowe. Endob sabaf bé kéluhanay de sala tom, kénukum i Tulusey Kristowe, inok waléy tom métintu loo bé Tuluse non bé kénéwaléyé tome do dumo Kristowe sabaf bé kénur tome de.

6

¹ Non begey i do témabang bé galbék i Tuluse, ongoté key begom do téménanggaf bé kégédaw i Tuluse, usar gom i kégédaw ne fégérigo bé fiyowe. Kagom mika de. ² Non wén i Ménsulate Kébéréh i Tuluse mano, “Dob fatute gai, féngélingo guy de kédasalém, atin ténabang gu beem dob fatute gaiy kífukas guwe bé kéilawane.” Fégélingo gom: Béleewe niy gaiwe fatut tayakufé kom i kégédaw i Tuluse. Béleewe niy gaiwe fatut fédaya gom i Tuluse mémukas begom bé de sala gom.

³ Toow fo ingata key i de rigoné key inok énda i géférika gey munur brab inok énda i géadowy bé galbék geye lémégéb bé Fiyowe Uret. ⁴ Yamula, dob kéluhanay de rigoné key, fégito gey begey i de sugu-suguéy Tuluse. Non fiyon fo ké kérégénan gey brab kérasayan gey, témingkél gey.

⁵ Atin ménlubag gey, ménfériku gey, méngsug-sug gey bé de mérimbur étew. Atin wén i no talawan geyén gémalbék, atin mélaw énda géama gey, brab énda géfidong gey. ⁶ Atin énda i rénigo gey mékérésik adat, brab gésobuto key i kébéréh i Tuluse, brab téméninkél gey, brab ténabanga key i de étew. Atin Rémogor i Tulusey mémantuone begey brab toow gey fo méngédaw. ⁷ Atin nuret gey i toowe kétoro, brab i barakatane Tulus tabanga no begey. Mélaw bé kéluhanay de ni féngito gey, begey i de

sugu-suguéy Tuluse. Atin i métintuwe brab fiyowey maake kélung gey brab dilék gey. ⁸ Wén i do masanan begey, éndob wén soy do émfémala begey. Wén i do démayéw begey, éndob wén soy do méngiras begey. Wén i do ménbéréh do tugién gey kun, éndob toow i de béréhé key. ⁹ Wén i de étew émbéréh énda kun gélolo ro begey, éndob toow fo gélolon gey. Gédét geyén méléhu sénga tékélid, éndob méuyag gey so. Ménkukum gey éndob énda méléhu gey. ¹⁰ Fiyon fok wén i do émfétete bé de fédew gey, éndob démoyun moror gey. Maak toow geyén fo méskinan, éndob sabaf bé begeye, médooy de étew ménwaléy ro maak kawasa taman sa taman. Maak énda i do kagey bé de éntingayén, éndob wén i kagey bé de kéluhanay de iray i Tuluse.

¹¹ Do dumo gey dob Korinto, bénréh geyén begom i kéluhanay dob de fédew gey, brab énda i ménbunéy de. ¹² Enda kulang i kímu geye begom, éndob ku-lang i kagome kímu begey. ¹³ Béréhé ku begom do maak nga gu, féimuén gey loo bé kímu geye begom.

Kagom mawag bé de énda munur

¹⁴ Kagom sébawag bé de étew énda munur ro bé Kristowe. Non énda ségiléw i fiyowe brab tetee, mélaw énda fakay ro waléy sébaan. Enda fakay sétifon i géfekaya brab délémons. ¹⁵ I Kristowe brab Satanase énda géséfagayun ro. Atin énda waléy sétiman fédew i étewe munur bé Kristowe bé étewe énda munurén bé Kristowe. ¹⁶ I lawi i Tuluse, sani gonone méngadaf, énda fakayén ké diyo so féngadafén i de kéninontow. Atin i betome maak lawi batoy méuyage Tulus. Non bénréh i Tuluse mano, “Batiu dob de kagén étew brab modoru bero. Atin begén i féngadafé ruwe, brab beroy de étew gu.” ¹⁷ Atin bénréh i Kadnane so mano, “Tagak gom i de étew féngadafé roy de kéninontow brab sésuway gom bero. Férayu gom dob de mékérésik adat ro, atin tanggafé ku begom. ¹⁸ Waléy Boh gom, atin waléy gom do

nга gu do lagéy brab do libun. Been i niy bénréh i toowe fo barakatan Kadnan."

7

¹ Do dumō gu, been i niy de fénasad i Tuluse betom rigoné no. Mélaw tagaké tom i kéluhanay de tete, dob lowoh tome taloo no dob fédew tome. Atin linisé tom i de lowoh tom brab télamané tom rigonén i de malinis dob adafay Tuluse inok toow fo métintu tom. Rigoné tom i ni non fégadata tom i Tuluse.

I kéoror Pablwe

² Fatut toow gom féimu begey. Enda i rénigo gey tete dob ségétewe étew, taloo no fénala gey, loo ké lénafis gey. ³ Enda bérhé kuy de ni ké dowoyé ku begom. Non loo bé bénréh guwe bé do gétah, toow fo gulaané ku begom. Amuk méuyag gey look méléhu gey, mégédaw gey so begom. ⁴ Toow fo sémarig gey begom brab géfélangklangka gey sabaf bé begome. Mélaw fiyon fo ké kérasayan gey, fiyoy de fédew gey, brab toow gey fo moror sabaf bé begome.

⁵ Atin amun énggumah gey dini dob Masedonia, énda fo énggétérén gey. Non toow fo ménkérégénan gey. Ménseédél begey i de sébanil begey. Atin ménbuku gey fantag bé de mantu munur bé Kristowe. ⁶ Endob i Tuluse toow fo gétiga noy émféfiyowé bé de fédew i de étew tete i de fédew ro. Mélaw fénororén i de fédew gey bé kégumah Titoe. ⁷ Atin békén saén i kégumah ney funa keye ménoror, non loo soy bénréh ne fantag bé kékéfiyo gome bé fédew ne. Atin nureténe begey i kéuyot gome géségitoy begén. Brab toow gom fo kun énggésénule atin fénagayas gom bénréh dob de étew témo begén i kéamfilo kome begén. Mélaw toowu na fo moror.

⁸ Non fiyon fo ké ménchte i de fédew gom bé sulat guwe, énda énggésénuleu de ménféuwit dob begome. Endob bé do gétah, énggésénuleu de brab ménuyotu de damén ké éndaén fénouwit gu de dob begome amun énggétiga

ku ménwaléy tete i de fédew gom. ⁹ Endob béléewe ni toow fo mororu, éndob békén sabaf bé kétete i de fédew gom. Yamula mororu béléewe ni non énggésénule gom. Non tétagak gom i de tete rigoné kom sabaf bé kétete i de fédew gom. Fénésénule i Tuluse begom brab nusarén i kétete i de fédew gom. Mélaw fiyoy rénigo geye dob begome bé nan sulat. ¹⁰ Non amuk féteteéy Tulusey fédéwe, muwit kégésénule brab kédigur bé de sala. Brab beeniy muwite bé kékukase bé kékukume. Mélaw toow fo fiyoy nan kétete fédew. Endob i kétete i fédew i de étew énda munur bé Kristowe, muwit kéléhu. ¹¹ Endob i begome, fégitung gom i fiyowe rénigoy Tuluse dob begome sabaf bé kétete i de fédew gom. Non sabaf bé kétete i de fédew gom, tintu méuyot gom rémigo bé fiyowe, brab toow fo méuyot gom émfégitoy bé éndaén i sala gom béléewe ni. Atin ménkérít gom brab ménbuku gom bé salae rénigoy ségétewe begom. Atin méuyot gom émfésuwat begén. Mélaw, sabaf bé kétete i de fédew gom, kénukum gom i ni sala, atin fenténgteng gom bé békén kagom sala i ni. ¹² Mélaw i funa kuwe séménulat dob begome bé gétahé békén saén sabaf bé nan étew ménala, taloo noy étewe énggésalaa no. Yamula gétigay Tuluse séménulatu inok fégétiga ku dob begomey kédakél i kégédaw gome begey. ¹³ Been i niy funay de fédew gey ménfiyo. Atin ménumanan foy kékéfiyo de fédew gey. Non i Titoé fénororén begey bé kékuret ne fantag bé kékéoror gome de. ¹⁴ Ménfélangklangkau fo muret dob Titoe fantag bé begome, atin fénggito gom foy kétow i kékuret guwe. Démoyun gey émbérhéh bé toowe dob begome. Atin ségiléw so énggito Titoey kétow i funa keye félangka-langka fantag bé begome. ¹⁵ Mélaw minut dakél i kékumu ne begom, bé lala ne gétédém bé kékuyot gome modor bé de sugu gu, brab kébasana kome de. ¹⁶ Toowu fo méror non gésarigo ku fo begom toow.

8

I kériraye dob Tuluse

¹ Atin do dumō gey, méuyot gey de fo ké gétiga kom i ménrigowé dob de munur bé Kristowe dini dob Masedoniawé ni bé kégédaw i Tuluse.

² Fiyon fo ké toow ro fo kérasayan brab kérégénan, toow ro fo moror. Mélaw fiyon fo ké toow fo méskinan ro, toow ro fo ménggédaw méniray kurta fégétabang bé de dumō ro munur.

³ Atin béréhé ku begom i toowe, niray roy gagané ruwe. Tidéw bénō, ménuman ron man miray non been i niy kétaya ruwe rigoné ro. ⁴ Komon nongot ro fo dob begeye ké tungkasé key bero mamung témabang bé de dumō tom munur bé Kristowe dob ingéde Judea. ⁵ Toow gey fo ménggaif non rénigo roy békéne fo bantak fédew gey gérigono ro. I sunguwe de niray roy de lowoh ro brab de fédew ro dob Kadnane. Tidéw bénō, non rénigo roy kétayay Tuluse, nodoro roy de sugu gey. ⁶ Atin non Titoey méngganaye bé ni rigonén, féngginau gey bé fétausé noy kétimu ne kurta fégétabang bé de munur dob Judea inok géfégilido kom i galbéke ni rénigo gom bé kégédaw gome. ⁷ Gétiga ku énda kulang gom bé de kéunur gom, taloo no de kéuret gom, loo soy de kégétiga kom, loo soy kétaya kome témabang, loo soy kégédaw gome begey. Mélaw méuyot gey de ké fégito gom soy énda i kulang bé kégédaw gome bé kériraye.

⁸ Enda sugué ku de begom, éndob méuyotu de ké gétiga kom i fantage bé de dumō gom munur dob de ségiyo gonon. Témantu ro fo témabang. Beeniy funa kuwe émbéréh de dob begome béléewe, inok iringé kom bero. Mélaw gétiga ku ké toow gom fo mégédaw. ⁹ Gétiga tom i kégédaw i Kadna tome Jesu Kristo. Non fiyon fo ké toow fo kawasa dob lawayo, ménwaléy méskinan dob duniyae ni bé kéwaléy ne kéilawan inok waléy gom kawasa dob lawayo sabaf bé kétérifantad ne.

¹⁰ Atin féginauné ku begom bénō, fiyo ké fégilidé kom i féngganaya kome galbék bé no énggéétah bélintuwa. Begom i de sungu téménimu do kurta fégétabang, atin begom soy de sungu méuyot témabang. ¹¹ Mélaw fatut fétausé kom taman géfégilido kom. Fatut méuyot gom magayas mágilid de ségiléw bé kífagayas gome bé kébantak gome de. Atin iray gom i atiy wéne begom. ¹² Amuk méuyot gom miray bé atiy wéne begom, mésuwat i Tuluse témayakuf bé nan. Endob i Tuluse énda méuyotén ké iray gom i éndae gagané kom.

¹³ Enda méuyot gey de ké kérégénan gom sabaf bé de kétabang gom miray dob de ségiyo inok éndaén kérégénan ro. Endob kétaya key ké ségiléw-giléw i kéluhanane. ¹⁴ Béleewe ni gétabang gom bé de ségiyo non gaba-gabay kagome kífaguyag. Endob kulang foy karowe de. Atin dob gaiwe kulang gom brab gaba-gaba roy berowe, tabangé ro so begom. Mélaw ségiléw-giléw i késétabang gome. ¹⁵ Non wén i Ménslate Kébéréh i Tuluse mano, “I étewe énggétimu médoo, énda gaba-gaba no. Atin i étewe énggétimu kloh saén, énda so kulangén.”

¹⁶ Toow fo ménfésalamat gey dob Tuluse non bé kéuyot Titoé mégédaw begom loo bé kégédaw geye begom.

¹⁷ Amun nongot gey dob beene ké tabanga no begom, toow fo ménuyot de rémigo. Atin non toow fo ménuyot témabang begom, mélaw méuyot mangéy diyaan.

¹⁸ Féodoré key bé Titoey ségétewe dumō tom munur, mégéror fo muret bé Fiyowe Uret, funa no toow fo fégadatay de munur dob de ségiyo ingéd. ¹⁹ Atin saliyu na bé nan, beeney fénémili i de munur dob de séségiyo-giyo ingéd inok modor begey bé kéagéw geye mangéy muwit bé kurtae fégétabang bé de méskinan munur bé Kristowe. Rigoné key i ni galbék inok médayéw i Kadnane de brab fégito gey i kéuyot geye témabang.

²⁰ Méuyot gey ké modor i de ni étew non toow gey fo mingat bé kéuwit

geye bé ni dakél iray inok énda i témo begey. ²¹ I kétaya keye rigoné key i fatute dob adafay Tuluse loo so dob adafay étewe.

²² Atin saliyu na bé ni, sugué key soy ségétéwe dumo tom munur. Médoonén fo gule ténéngkad gey atin mélaw gétiga key méuyot fo tétabang. Atin béléewe ni toow na fo méuyot tétabang begom non dakél foy késarig ne dob begome.

²³ Atin i Titoe, beeney dumo guwe gémalbék tétabang begom. Atin i de étew modor bé Titoe, beroy de sénarigoy de munur dob de séségiogyo ingéd mangéy tétabang begom inok médayew i Kristowe. ²⁴ Fégito gom i kégédaw gome bero inok i de munur dob de ségiyo ingéd gétiga ro kégédaw gome brab gétiga ro so toowi funa keye géfélangka-langka fantag bé begome.

9

¹ Endaén kailanga kuy sémulate dob begome fantag bé kétabang gome bé de dumo tom munur do méskinan dob Judea. ² Non gétiga ku toow gom fo méuyot tétabang. Brab dénayew gu begom dob de munur dini dob Masedoniawe ni. Bénréh gu bero maku, "I de dumo tom munur dob ingéde Akaya, tafay ron tétabang tidéw bé no énggéétah bélintuwa." Amun énggelingoo roy ni, i kédoono ruwe ménwaléy méuyot tétabang. ³ Mélaw béléewe ni, sugué ku mangéy dob begomey de ni do dumo tom munur inok tabanga ro begom métuman i ni brab gétafaya komén i tabang gome loo bé bénréh geye. Giton mélaw toow i kédayew geye begom. ⁴ Non amuk i de étew tidéw Masedonia modor ro begén mangéy diyaan, atin amuk énda i ténafeay gom kurta, toow fo mémala gey de, brab kémalanen gom de so. Non makey ké wén i ténafeay gom kurta. ⁵ Mélaw, makuk fiyo ké sugué ku métah mangéy diyaan i de ni do dumo tom munur inok gétafaya kom i iray gome, sani fénasad gome. Mélaw

amuk gégumahu diyaan, méntafayén i de iray gom. Mélaw giton i kéuyot gome miray énda ménfégés gom de.

⁶ Fégétédém gom i ni, i étewe mohok kloh, kémétew so kloh. Atin i étewe mohok médo, kémétew so médo.

⁷ Mélaw, sénga ségétéw étew fatut irayén i bénantak ne irayén. Atin békén fatut miray ké tete i fédew ne de taloo no ké manok ménfégés de saén. Non toow fo mégédaw i Tuluse bé étewe toow fo moror ké miray. ⁸ Atin i Tuluse géirayén begom i mas na médo bé de kailanga kom inok démoyun gaba-gabay kéfaguyag gome atin géiray gom so tabang dob de ségiyo. ⁹ Non wén i Ménsulate Kébéréh i Tuluse mano, "Iraya no témantuy de méskinan, brab i kégédaw ne énda i tamana no." ¹⁰ Atin i Tuluse irayén i de béné dob de mohok, inok mama i de étew. Mélaw iraya no so begom do béné, sani de kétabang gom dob de ségiyo, inok dakél i gékétewo kome, sani de médo do fiyo rénigo gom sabaf bé dakéle kégédaw gom.

¹¹ Démoyn iray i Tuluse begom i katabuwane inok gétantu gom miray tabang sénga tékélid, inok médooy fésalamate bé Tuluse sabaf bé tabange tidéw dob begome uwité key. ¹² Non i ni galbék rigoné kom, békén saén i kétabange bé de munur, éndob been soy funay de médo étew fésalamat dob Tuluse. ¹³ Atin amuk gito roy dakéle kégédaw gom loo bé ni, médooy démayewe bé Tuluse sabaf bé kéodor gome bé sugu Kristowe, brab sabaf bé kéégét i kéunur gome bé Fiyowe Uret fantag bé Kristowe, non mégédaw gom miray dob berowe brab dob kéluhanay de ségiyo. ¹⁴ Atin mélaw dasala ro begom dob Tuluse atin toow fo gulaané ro begom. Atin i funa ruwe gémulaan begom non bé dakéle kégédaw gom bero tidéw dob Tuluse. ¹⁵ Mélaw fésalamat tom dob Tuluse non bé Nga ne Jesu Kristo toow fo mélaga nirayén betom.

10

Fantag bé Pablowe

¹ Atin i begéne, sani Pablowe, wén i ongoté kuwe dob begome. Wén i de ménbéréh térifantadu kun ké diyou dob begome. Endob amuk énda kun diyou dob begome, toowu fo émbaraw sémulat dob begome. Endob ongoté ku dob begome bé toowe mélanat kékéréh loo bé kégédaw Kristowe. ² Ongoté ku dob begome, féfiyo gom i de rigoné kom inok énda kailanga kuy fébarawe ké gégumahu dob begome, loo bé rigoné kuwe dob de étew émbéréh bé i begeye kun ségiléw gey i de étew énda munur ro bé Kristowe. Non rigoné key kun i de tete kétaya key. ³ Toow kéilawan gey saén, éndob énda sarigo key i kékagér i kékilawane fégésétiboh sébanil bé Satanase. ⁴ Non i kéuret geye énda ségiléwén bé kéuret i de tete étew dob duniyae ni. Yamula i kéuret geye tidéw dob Tuluse brab wén i barakatén inok témaban gey bé de kétoro énda toowén. ⁵ Fégitó gey énda toow i kéluhanay uret i de étew sébanil bé Tuluse brab kékéréh i de étew félangka-langka malang bé toowe kétoro fantag bé Tuluse. Atin fiyon i de kékéfítung ro énda toowén, fégaliné key inok modor so bé de sugu Kristo. ⁶ Atin amuk fégito gom tintu odoro kom i de sugu Kristo, tidéw béno kukumé key i de ségiyo munur amuk énda modor ro bé de suguén.

⁷ Kagom téngténgén saén i falas i étewe, yamula fatut fégítung gom soy fantage bé fédéw ne. Amuk wén i étew gékaranga no been i sugu-sugué Kristowe, fatut karangé no so begey, do sugu-sugué Kristowe so. ⁸ Non énda mémalawu félangka-langka bé aturane niray i Kadnane begey. Non nirayén dob begeye inok féégété key i kéunur gome, énda mébinasa gom de. ⁹ Mikau ké fégítungé kom fégilaké ku saén begom dob de sulat gu. ¹⁰ Endob wén keeyén i étew émbéréh mano, “Dob de sulat Pablo, toow fo émbaraw brab émbagér. Endob amuk dini dob betome, toow fo mélanat i de kékéréhén brab énda furungén muret.” ¹¹ Endob i étewe mégitung loo bé nan, fatut gétila noy ni. I de sénulat gey béléewe

ni, fiyon fo ké sérayu tom, been soy nan i de rigoné key ké gésétengaang tomén.

¹² Endob énda féségléwé key i begeye bé de étew do félangka-langka. Toow ro fo dufang, non marok bero saén i do gérotor, brab dayéwé ro soy de karo lowoh brab de étew miring bé adat ruwe. ¹³ Endob i begeye, énda taluwan gey démayéw bé de lowoh gey, non béréhé key saén i de rénigo gey dob galbéké niray i Tuluse begey, loo bé de rigoné key dob begome. ¹⁴ Atin énda taluwan gey démayéw bé de lowoh gey, non begey i de sungu ménangéy diyaan muret dob begome bé Fiyowe Uret fantag bé Kristowe. ¹⁵ Enda félangka-langka gey fantag bé galbék i de ségiyo dob de ségiyo gonon énda sénugu i Tuluse begey. Endob méuyot gey de ké amuk minut émbagér i kéunur gome, gétabanga kom begey émféunur bé de dumo gom dob kagome ingéd. ¹⁶ Tidéw béno, géureto key i Fiyowe Uret dob de ingéd géliyu begom. Mélaw énda fégéfélangka-langka gey i galbék i ségiyowe étew.

¹⁷ Non wén i Ménsulate Kékéréh i Tuluse mano, “Fiyon atiy méuyote félangka-langka, fatut félangka-langka sabaf saén bé rénigoy Kadnane.” ¹⁸ Non i étewe dayéwé noy kaane lowoh, énda i lanték i kédayéw ne. Endob amuk Tulus i démayéwe bé ségétewe, giton médait médayéw.

11

Do ubo-ubo apostol

¹ Méuyotu de damén ké tingkélo kom na begén kloh bé kéuret guwe ni fiyon fo ké maak dufangu. ² Toowu fo médaléw fantag bé begome loo bé kédaléw i Tuluse. Non i begome ségiléw gom bé ségétewe kénogon fentisingonén. Atin i Kristowe maak beeney lagéye ménfétisingon bé ni kénogon. Atin begéney maake ménfétisingon de brab toow fo méuyotu de ké gésébawag ro. ³ Mégilaku de ké tagaké kom i Kristowe loo ké éndaén modor gom bé

de suguén taloo no ké éndaén gulaané kom de. Embukuu ké fésélawéké kom i toowe fantag bé Kristowe bé tugi i de ségiyo kéfengadaf. Amuk rigoné kom i nan, géiringo kom moso i sala i sunguwe libun féndawét Eba, non méndurat bé kétugiéy ulée, sani Satanase. ⁴ Non amuk wén i ségétew étew gégumah dob begome, brab muret ségiyo kétoro fantag bé Jesuse bé kétoro geye, munur gom de wayo. Taloo no fiyon fo ké ureté roy ségiyowe rémogor brab ségiyowe kéfengintulus, munur gom de so wayo, fiyon fo ké énda ségiléwén bé kageye kétoro.

⁵ Atin i do no étew diyaan do ubo-ubo do gérotor do apostol ro, gétiga ku énda i ségétew bero toow na fo gérotor begén. ⁶ Fiyon fo ké énda furungu muret, énda kulang i kégétiga kuwe. Fénggito gey begom médoonén gule i kéluhanay de rénigo gey.

⁷ Nuret gu dob begomey Fiyowe Uret i Tuluse, éndob énda fénbayada ku de begom, fiyon kloh. Atin ménterifantadu inok waléy gom gérotor. Aw békén ba fiyoy nan rénigo gu? ⁸ Amun diyou dob begome gémalbék, i de munur bé Kristowe dob ségiyowe gonon i ménayadane begén. Mélaw énggéédotu dob berowe inok gétabanga ku begom. ⁹ Atin amun diyou dob begome, énda ménongotu kurta tidéw dob begome fiyon fo ké wén i kailanga ku. Yamula i de dumotom munur dob Masedonia, nuwitoro begén bé kéluhanay de kailanga ku. Atin loo so bé do gétah, énda fo dotéku mosoy tabange tidéw dob begome. ¹⁰ Atin been i niy funa kuwe félangka-langka. Non énda méndotu kurta tidéw dob begome loo so dob de udenén ingéd dob Akaya. Atin énda so médotu moso tidéw dob begome. Been i fasad guwe brab gétiga ku fo toow loo bé kétoow i kétoro Kristowe. ¹¹ Fégitungé kom keey énda méimuu begom non bé de ni kékéréh gu. Endob gétigay Tuluse, toow fo féimué ku begom.

¹² Fétausé ku rigonén i de rigoné ku béleewe ni, mélaw énda mongotu

tabang tidéw dob begome, inok i de téfégérator do ubo-ubo saén do apostol, énda i funa ro félangka-langka brab inok énda gembéréh ro ségiléw i karowe rigonén bé kageye de. ¹³ I berowe, békén tintu ro apostol Kristowe. Yamula do ubo-ubo ro saén, brab do témuji ro. Magakar ro saén inok makom ké do tintu ro do apostol Kristowe. ¹⁴ Endob énda mégaifu de, non gétiga ku fiyon i Satanase géfarino noy falas ne loo bé falas i télakiy Tuluse. ¹⁵ Mélaw énda mérégéno ké ubo-ubo i de sugu-sugué Satanas inok maak do tintu sugu-suguéy métintuwe Tulus. Endob mékukum ro moso loo bé fatute sabaf bé de ni do tete rigoné ro.

I kérasay Pablowe

¹⁶ Séguleé ku man bérhéhén, kagom fégitungén de ké dufangu. Endob amuk karangé kom begén dufang, tingkélonu inok wén i funa ku géfélangka-langka loo bé ségétewe dufang. ¹⁷ I ni bérhéhén ku begom béleewe ni, békén tidéw dob Kadnane, non fébantug-bantugu saén loo bé ségétewe dufang. ¹⁸ Endob non médooy de émbéréh félangka-langka sabaf saén bé de éntingayén dob ni duniya, fakay so félangka-langkau. ¹⁹ Atin non makom keey ké toow gom fo do métileédé, fatut moror gom témingkélon bé de dufang. ²⁰ Non amuk wén i téfégérator étew sugué no begom, taloo no afasé noy de languntama kom, taloo no lifulé no begom, taloo no félangka-langka dob téngaanga kome, taloo no tamfilingé no begom, tingkélo kom brab fédayaé kom saén. ²¹ Toow fo émbaraw ro, éndob i begeye énda émbaraw gey loo bé nan. Makom keeyén ké talaw gey non énda i rénigo gey tete loo bé nan dob begome.

Atin amuk félangka-langka ro, géfélangka-langkau so, fiyon fo ké dufang i ni kékéréh fégéfélangka-langka. ²² Félangka-langka ro non do Judio ro. Endob ségétewu so Judio. Atin bérhéh ro do étew Israel ro, éndob loo soy begéne. Atin bérhéh ro do séfu Abraham ro, éndob ségétewu so

séfu Abraham. ²³ Gétiga ku émbéréhu béní maak ségétew bunég, éndob énda gétérénu. Aw bénréh ro beroy de sugu-sugué Kristo? Endob i begéne ségétew so sugu-sugué Kristowe, atin toowu na fo mégéror gémalbék bé berowe. Mas médoonén gule ménférisuwu sabaf bé kéuret guwe bé Kristowe. Mas médoonén so gule ténafésu, brab mas médoonén gule gédétun méléhu. ²⁴ Limo gule bénadas i de Judio begén bé télewe folo bra siyow gule badas. ²⁵ Télew gule bénadas i de Romano begén. Atin wén i no gai, i de étew nibéro ro begén batéw taman marok méléhuu néen. Télew gule méndau barko falan ménrundas dob dogote, brab wén i no gai ségétérésangan brab ségékélungonon i kérantaw-rantaw guwe dob dogote. ²⁶ Dob démoyune kéagéw gu, médooy de makakaid do énggéagéwo ku: do makakaid dob de wayég dunuk, do makakaid dob do tulisan, do makakaid sabaf bé de dumo gu Judio brab do békén Judio so, de makakaid dob de ingéd brab dob de gonon énda i do étew de bati, brab do makakaid dob dogote. Atin wén soy do makakaid tidéw dob de ubo-ubo saén do dumo gu munur, éndob i toowe, sébanil ro begén. ²⁷ Toowu fo géménalbék, brab wén i no énda géfidongu. Atin wén i no mélayahu brab téruménu, atin kulang i amaé kuwe brab kégal guwe, brab énda i batio ku. ²⁸ Atin békén saén i nan, non démoyunu émbuku fantag bé kéluhanay de sélimud do munur bé Kristowe. ²⁹ Non amuk wén i kérasayan sabaf mélubay i kéunur ne, mérasayu so bé kékuku guwe. Taloo no amuk wén i ségétew munur gésala sabaf wén i ménfésala de, tete i fédew guwe de brab mékéritu bé ménfésala de.

³⁰ Enda méuyotu félangka-langka, éndob amuk félangka-langkau, bérhéhé ku saén i de fantag bé de kérégéno ku inok giton énda fo furungu. ³¹ ITuluse sani Abay i Kadnane Jesus, médayéw damén i dawét ne taman sa taman.

Gétiga no toow i kékéréh guwe. ³² Bé do gétah amun diyou de séna dob ingéde Damasko, wén i ségétewé méguléw diyo fénemili Datu Aretase. Atin sénuguén i de sundalo no mantay dob bengaway no ingéd inok kéfoé ro begén. ³³ Endob wén do téménabang begén, nahur ro begén dob dakéle biton. Atin ténuntu ro begén dob faliliuwangay didinge fénggélangkat bé no ingéd. Mélaw énggékéraréyu.

12

¹ Kailanga kuy fébantug-bantuge fiyon fo ké énda i lanték gu. Bérhéhé ku béléewe niy fantage bé de fénggitoy Kadnane begén loo soy de fénayagén dob begéne. ² Wén i gélolo guwe lagéy munur bé Kristowe, atin ménfoloén bra fot gébélintuwa i kékéwit i Tuluse de mangéy dob toowe fo gérotor laway. Endob énda saén gétiga ku de ké toow énggéangéy diyo taloo no fénggitoy Tuluse de saén. Tulus saén i gétigane de. ³ Mélaw énda gétiga ku de ké ménangéy i lowoh ne dob bélówone fantad loo ké rémogor ne saén. Tulus saén i gétigane de. ⁴ Enggélingooy ni étew diyo i de éntingayén énda gébéréhoy de kélawan de, brab énda fo fakayén bérhéhé étewe. ⁵ Mélaw fébantug-bantugu sabaf bé ni étew, éndob énda fébantug-bantugu fantag bé kagéne lowoh saliyu saén bé de éntingayén férito no énda fo furungu de. ⁶ Amuk fébantug-bantugu, énda rigoné ku de loo bé ségétewé dufang non bérhéhé kuy toowe. Endob énda fébantug-bantugu non mikau de ké karangéy de étew begén toowu na fo gérotor bé fatute. Non fatut karangé ro begén sabaf saén bé de gito ro rigoné ku brab de gélingoo ro bérhéhé ku.

⁷ Atin inok énda géfélangka-langkau sabaf bé de fiyo énggito gu, nirayén begén i déruune toow fo démawét. Atin i Satanase nusarén fégéférasayén begén inok énda géfélangka-langkau. ⁸ Télew gule déménasalu dob Kadnane fantag bé ni ongoté ku ké kédané noy ni déruun. ⁹ Endob séménumbul i

Kadnane mano, "Kégédaw guwe saén i kailanga muwe. Non toow fo minut dakél i barakat guwe témabang ké toow fo minut go mélubay." Mélaw mororu félangka-langka sabaf bé de kélubay gu inok fébagéré Kristowe begén bé barakat ne. ¹⁰ Atin mélaw toow fo mororu sabaf bé de kélubay gu, brab kéingone begén, brab kédusawe begén, brab kéférasaye begén, brab de mérégén géagéwo ku sabaf bé kéunur guwe bé Kristowe. Non gétiga ku amuk mélubayu, wén soy gai fébagéré Kristowe begén.

¹¹ Béleewe ni rigoné kuy rigoné ségétéwe dufang non fébantug-bantugu. Endob fénégés gom de begén rémigo non fatut damén begom i mamfilone begén. Non fiyon fo ké gérifantadu, toowu na fo gérotor bé da nan do ubo-ubo saén do apostol diyo dob begoma nan. ¹² Atin amun diyou dob begome, fénggito gu dob begomey ségétéwu fo tintu apostol. Non rénigo guy de mékégaif fiyon fo ké énggédaydaya kuy de mérégén. ¹³ I rénigo guwe dob begome ségiléw so bé rénigo guwe dob de munur dob de ségiyo ingéd saliyu saén bé ni. Enda méndotu kurta dob begome fégétabang gom begén loo bé kéédot guwe dob de ségiyo. Amuk karangé kom énggésalau sabaf bé ni, fésagadanu!

¹⁴ Beeniy gétéléwoy kétafay guwe mangéy témukaw begom, éndob énda mongotu kurta fégéfaguyag gu tidéw dob begome. Non begomey gulaané kuwe, békén i kurta gome. Ufama, i de nga békén fatut miray kéfaguyag dob de lukés ro, yamula i de lukés roy fatute miray kéfaguyag dob de nga ro. Atin begomey maake do nga gu non ménunur gom sabaf bé kéuret guwe. ¹⁵ Atin toowu de fo moror ké géétéyo ku miray i kéluhanay languntama kuwe brab férénawa guwe fégétabang begom. Endob maak minut kloh i kéimu gome begén bé lala guwe minut dakél i kéimu guwe begom.

¹⁶ Gétiga kom bé énda fénrégéno ku

begom non énda i nongot gu kurta dob begome. Endob wén keeyén i émbéréhe begom mano, "I Pablowe toow fo tugién, fénagakara no betom, brab lénifulén betom." ¹⁷ Endob ati étewe fénagakara ku, taloo no ténuvio ku, taloo no léniful gu? Enda! Aw wén i éndot gu tidéw dob begome bé késugu guwe bé de sarigo ku mangéy dob begome? Enda! ¹⁸ Nongot guy Titoe magéw mangéy diyaan brab sénugu gu modor soy ségétéwe dumo tom munur. Aw wén i éndot Titoe tidéw dob begome, taloo no lénafisén begom? Enda! Aw békén ba ségiléw i rénigo geye non sébaan saén i kétaya keye rigonén, sani témabange begom?

¹⁹ Makom keey ké bérhéhe key i de ni inok féténgténg gey begom énda i sala gey. Békén i nan. Non gétigay Tulusey, bérhéhe key saén i fébéréh Kristowe begey. Do dumogu, i kéluhanay de rigoné key, rigoné key inok émbagér i kéunur gome. ²⁰ Toow fo émbukuu ké gégumahu dob begome, gito gu begom rémigo bé békéne kétaya ku. Atin gito gom mélaw begén rémigo bé békéne kétaya kom. Been ké gumaha ku begom, séédél, mésérédaléw, sékérít, séitung, séingon, ségéno, séfélangka-langka, brab sérimbur. ²¹ Atin ménbukuu amuk gégumahu diyaan, fémalanéy Tuluse begén dob téngaanga kome, non gékérewu sabaf bé de médoobegom do ménsala bé do gétah, éndob énda séna énggésénule ro témagak bé de tete rigoné ro loo bé de kébigé ro brab de tete kétaya ro.

13

¹⁻² Beeniy gétéléwe gule kétukaw gu begom. Atin wén i Ménsulate Kébéréh i Tuluse mano, "Amuk wén i ségétew étew ténebo ménsala, kailangan wén i ruwo gétew taloo no télén gétew énggégito de atin fayagé roy ati énggito ruwe fantag bé ni kétébo." Mélaw amuk gégumahu diyaan, fégélingoé kuy de kétébo gom brab kukumé kuy de étew ménsala. Bénréh gun i ni dob begome bé do gétah amun

nangéy gu begom ténuakaw bé géruwo nuwe gule. Atin béréhé ku man ségule dob ni sulat. ³ Bé béno gai, amuk gérumahu diyaan, fégito gu begom i kéluhanay émféngintoowe bé de kékéréh gu, toow fo tidéw dob Kristowe. Amuk wén i rigoné no dob begome, énda mélubayén, yamula fégito noy barakat ne dob begome. ⁴ Non fiyon fo ké maak énda i barakat Kristowe bé kéléhu ne dob kruse, méuyag béléewe ni sabaf bé barakat i Tuluse. Atin ségiléw bé begeye, maak énda i barakat gey non kérégénan gey sabaf bé kéunur geye bé Kristowe. Endob sabaf so bé kéunur geye bé Kristowe, i barakat i Tulusey muyage begey inok taus i kétabanga keye begom.

⁵ Sétengkad gom inok gétiga kom ké tintuy kéunur gome bé Kristowe loo ké énda. Atin gétiga kom damén ké bati i Kristowe dob de fédéw gom. Amuk énda bati i Kristowe dob begome, énda séna tintuy kéunur gome de. ⁶ Atin gétiga kom damén begey i de tintu apostol Jesu Kristowe. ⁷ Atin démasal gey dob Tuluse énda damén rigoné kom i tete. I funa keye démasal loo bé ni békén ké fégito gey toow fo mégulit i kageye galbék ménfénur begom. Yamula démasal gey loo bé ni inok rigoné kom i fatute fiyon fo ké maak énda mégulit i de rénigo gey. ⁸ Non amuk modor gom bé toowe kétoro, énda fégito gey begom i atura keye. Non énda usaré key i atura keye rémigo sébanil bé toowe, yamula usaré key i atura keye témabang bé de étew inok modor ro bé toowe kétoro. ⁹ Atin toow fo mororu amuk gito gu begom émbagér i kéunur gome atin mélaw énda fégito gey i atura keye. Mélaw démasal gey inok minut émbagér i kéunur gome. ¹⁰ Been i niy funa kuwe sémulat bé de ni amuk énda diyou dob begome. Mélaw amuk gérumahu diyaan énda damén kailanga kuy démusawe kémukum begom. Non niray i Kadnane begén i aturay ségétéwe apostol inok fébagéré kuy kéunur gome, békén kukumé ku begom.

¹¹ Taman saén dob niy sulaté kuwe begom. Féfiyo gom fo toow i de rigoné kom, odoro kom i de kéféginau gu begom. Séfagayun gom brab fétanék gom i fédéw gome. Mélaw i Tuluse, sani toowe fo mégédaw begom brab mi-rayan begom bé métanéke, démoyun diyo dob begome.

¹² Atin amuk séségifa gom fatut fégito gom i késégédaw gome.

I kéluhanay de munur bé Kristowe bati dob de ségiyo ingéd ségifaé ro begom.

¹³ Atin mégédaw damén i Kadnane Jesu Kristo begom, brab mégédaw damén i Tuluse begom, loo soy Rémogor i Tuluse démoyun damén bati dob kéluhanay de fédéw gom.

Pablo

I Sulat Pablowe dob de Munur bé Kristowe dob Galasia

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Galasia, atin médooy de étew ménwaléy munur bé Jesuse sabaf bé kéuret ne. Séménulat i Pablowe dob berowe.

I kédoonoy de étew do bati dob Galasia, békén Judio. Mélaw énda ménodor ro bé kitabe taloo no adat i de Judio. Endob dénowoy i de Judioy de munur bé Jesuse brab ténero ro bé kailanga ro soy modore bé kitab i de Judio.

Endob i Pablowe, énggétiga no énda kailangay de étew i modore bé kitab i de Judio inok méfukas ro dob de sala ro. Yamula kailanga ro saén i munure bé Jesu Kristowe. Mélaw séménulat i Pablowe dob de munur do bati dob Galasia inok toroé no bero bé énda kailanga roy modore bé kitab i de Judio.

1-2 Begéney Pablowe, sulata ku begom do munur bé Jesu Kristowe dob de ingéd sakuf i Galasiawe. I begéne brab kéluhanay de dumo gu munur dini, ségifaé key begom. I begéne ségétéwu apostol békén sénugu i kéilawane, taloo no kéilawan saén i méniraye aturan dob begéne. Yamula i Jesu Kristowe brab Abay tome Tulus sani téménébulee bé Jesusey ménémilie begén, brab de ménféwaléy begén apostol brab de séménugu begén.

3 I Abay tome Tulus brab Kadnane Jesu Kristo, mégédaw ro damén begom brab fétanéké ro damén i de fédew gom.

4 I Kristowe, nirayén i umul ne bé kéléhu ne dob kruse inok i de sala tom émfésagad, brab inok énda mékukum tom loo bé de étew rémigo tete béléewe ni. I funa Kristowe nirayén i umul ne, non nodoro noy kétayay Abay tome

Tulus. **5** Médayéw i Tuluse damén taman sa taman! Amen.

Sébaan saén i Fiyowe Uret

6 Toow fo ménggaifu bé rénigo gome. Sedek toow fo magad i kétagak gome bé Tuluse sani ménféunure begom sabaf bé kégédaw Kristowe. Non balengé kom i de fédew gom brab munur gom bé ségiyowe "Fiyo Uret". **7** Endob i toowe, énda i ségiyo Fiyo Uret non sébaan saén i toowe kétoro. Endob wén i do étew diyaan fénbuku ro begom bé de tugién kétoro ro non méuyot ro mélalin bé toowe Fiyo Uret fantag bé Jesu Kristowe. **8** Endob amuk wén i muret atin i kéuret ne énda ségiléwén bé kageye kéuret fantag bé Jesuse dob begome, mékukum damén mangéy dob emfernowo. Fiyon fo ké do télaki taloo no begey, amuk fégaliné key i toowe kétoro, mékukum gey so damén! **9** Bénréh geyén begom atin bérhéhe ku man ségule béléewe ni. Amuk wén i téromo fantag bé Jesuse atin énda ségiléwén bé kétoroe nunuro komén bé do gétah, mékukum damén mangéy dob emfernowo!

10 Enggito gomén dob ni sulat énda sélédé kuy kédayéw i étewe. Non méuyotu saén ké Tulus i démayéwe begén. Amuk méuyotu de saén ké mésuwat i de étew begén, éndaén damén tausu waléy sugu-sugué Kristowe.

11 Do dumo gu, méuyotu de ké gétiga kom i ni, i Fiyowe Uret ténero gu begom békén tidew dob kéilawane. **12** Non énda énggédot gu de tidew dob étewe, brab énda i ségiyo de témenoro begén. Yamula fénggétiga Jesu Kristowe begén.

13 Enggélingoo kom i fantage bé tafaye adat gu. Toowu fo ménodor bé kétoro i de dumo gu Judio. Atin i de munur bé Kristowe, fénrasay gu fo bero toow brab ténlama gu béninasay kénéfingintulus ruwe inok éndaén i étew munur bé Jesuse. **14** I kédooy de dumo gu do Judio ségiléw gey idad, énda gérédégo ro begén bé kéodoro kuwe

bé kétoro i de Judio. Brab toow na fo nodoro kuy adat i de katufua key.

¹⁵ Endob fiyon fo ké loo bé nan, i Tuluse toow fo mégédaw begén. Non bé énda séna ménumahu de, fénémili non begén inok waléyu sugu-sugué no. ¹⁶ Atin sabaf bé kétaya nuwe, fénggitó no begén i Nga ne Jesus inok ureté kuy fantage bé Beene dob de békén Judio. Endob énda i féntoroo ku fantag bé Kristowe. ¹⁷ Atin énda ménangéyu dob ingéde Jerusalem inok ménginsau dob de sungu do apostol. Yamula ménagayasu mangéy dob ingéde féndawét Arabia. Tidéw béno, ménséfuleu mangéy dob ingéde Damasko. ¹⁸ Atin télew gébélantuwa tidéw béno, ménangéyu Jerusalem inok tukawé kuy Pedrowe. Brab ménbatiu dob beene ruwo gáfadiyan. ¹⁹ Atin bé béno, énda i ségétew énggitó gu bé de dumo do apostol saliyu saén bé Santiagowe sani tuwaréy i Kadnane Jesus.

²⁰ Béréhé ku begom bé toow i ni sulaté ku begom, békén tugi. Gétigay Tuluse so toow i ni.

²¹ Tidéw béno, ménangéyu dob de ingéd dob Siria brab dob Silisia. ²² Bé do no do gai, i de munur bé Kristowe dob Judea, énda séna énggébalaka ro begén taloo no gélolo ro begén. ²³ Enggelingoo ro saén i bénréh i de étew fantag bé begéne maro, "I étewe toow fo fénrasayén betom bé do gétah brab ténlama no kédanén i kéunure bé Kristowe, béléewe ni ménbalengén i fédew ne brab ménwaléyén wayo muret fantag bé Kristowe." ²⁴ Mélaw dénayéw roy Tuluse sabaf bé begéne ménwaléy munur bé Kristowe.

2

¹ Folo bra fot gébélantuwa tidéw béno, ménséfuleu man mangéy Jerusalem begey Bernabewe. Brab nuwit gu soy Titoe. ² Ménséfuleu non fénggétigay Tuluse begén bé fatutu mangéy diyo. Atin ménsélimud gey i de odoroy de munur, éndob énda i ségiyo étew diyo. Atin nuret gu dob berowey Fiyowe Uret ténero gu dob

de békén Judio. Rénigo guy ni inok énda mékédan i kéluhanay galbék guwe sani kéfénur guwe bé de békén Judio.

³ Endob ménsuwat ro bé galbék guwe. Mélaw i dumo guwe Tito, fiyon fo ké ségétew békén Judio, énda fénégés ro de fétuli. ⁴ Endob bé béno, wén i de étew do ubo-ubo saén munur bé Kristowe brab ménamung ro dob begeye, méuyot ro de fo ké tulien. I de ni do étew, i funa ruwe ménamung dob begeye, inok susiné ro saén ké modor gey bé kitabe niray Moisese loo ké énda. Brab méuyot ro de ké féwaléyé ro begey riféy kitabe, fiyon fo ké ménfukas geyén bé kéodorone bé kitabe tidéw dob Moisese sabaf bé kéunur geye bé Jesu Kristowe.

⁵ Endob énda fo ménagayun gey de, inok énda mésélawék i ségiyowé kétoro bé Fiyowe Uret ténero gey begom.

⁶ Atin i de odoron diyo, énda numana roy de kagén kétoro non katabuwanén. (Féndawét gu bero do odoron non bero kun i odoroy de munur bé Kristowe. Endob ulanden dob begéne non gétiga ku énda i isu ramigoy Tuluse.) ⁷ Atin i de ni do odoron gétiga ro fénémili i Tuluse begén inok muret bé Fiyowe Uret dob de békén Judio loo bé kéfémili i Tuluse bé Pedrowe inok muret dob de Judio. ⁸ Non i Tuluse fénwaléyén begén apostol dob de békén Judio ségiléw bé kéféwaléy ne bé Pedrowe apostol dob de Judio. ⁹ Atin i de odoron diyo ro Santiago, Pedro, brab Juan, énggésobuto ro niray i Tuluse begén i ni galbék. Mélaw ménséalamano ro begey Bernabewe fégétanda bé kégéséfagayu keye. Ménséfagayun gey bé i Bernabewe brab begéne magéw gey mangéy muret dob de békén Judio atin i berowe mangéy ro muret dob de Judio. ¹⁰ Wén i sébaane saén nongot ro, sani kétabange bé de méskinan do munur bé Kristowe bati dob Jerusalem. Endob toow fo ménuyotu nén tétabang bero, bé énda séna ménongot ro.

¹¹ Endob amun ménangéy i

Pedrowe dob Antiokia, bénréh gu dob beene dob adafay de munur bé békén fo fatut i rénigo nuwe.¹² Ay niy rénigo nuwe. Amun énda séna énggumah i de Judio sénugu Santiagowe, i Pedrowe séréngan mama bé de békén Judio. Endob amun énggumah ron, éndaén ménserénga no mama bé de békén Judio. Non mégilak bé de Judio do témozo bé kailangan métuli i de békén Judio.¹³ Tidew béo, i kéluhanay de Judio do munur diyo, ménggilak ro so loo bé kégilak Pedrowe. Mélaw éndaén séréngan ro mama bé de békén Judio do munur so. Atin fiyon i Bernabewe ménamung so. Enda fiyoy rénigo ruwe fiyon fo ké gétiga roy fatute.¹⁴ Amun énggito guy rénigo ruwe ménsebanil bé Fiyowe Uret, bénrého kuy Pedrowe dob téngaangay kéluhana ruwe maku, "Pedro, fiyon fo ké i beeme ségétew go Judio, éndob ténagak mon i adat i de Judio. Sede mélaw ké fégésé moy de békén Judio modor bé adat i de Judio?" Beeniy kégélé guwe bé Pedrowe.

I Kéunure

¹⁵ I begeye, ménmah gey do Judio, békén gey do étew békén Judio do ménalsa.¹⁶ Gido loo, gétiga tom i funay étewe waléy métintu dob adafay Tuluse. Békén sabaf bé kéodor ne bé kitabe tidew dob Moisese. Yamula sabaf saén bé kéunur ne bé Jesu Kristowe. Atin i begeye do Judio, ménunur gey so bé Jesu Kristowe inok waléy gey métintu sabaf bé kéunur geye dob Beene. Békén sabaf bé kéodor geye bé kitabe tidew dob Moisese. Non énda i ségétew waléy métintu sabaf bé kéodor ne bé kitabe.¹⁷ I de begey do Judio, amuk ménwaléy gey métintu sabaf bé Kristowe, giton ménalsa gey so ségiléw bé de békén Judio. Endob kagom fégitungén de ké Kristowey muwite bé salae. Békén i nan!¹⁸ Endob amuk séfuleu modor bé kitabe tidew dob Moisese fiyon fo ké ténagak gun, fégito guy begéne ségétewu toow fo ménalsa, non énda ménodoru bé kitabe.¹⁹ Maak ménléhuun, atin

mélaw éndaén kailanga no modoru bé kitabe tidew dob Moisese. Endob méuyagu non énggédot guy mantuwe umul tidew dob Tuluse. Atin sabaf bé kéunur guwe bé Kristowe, maak ménserénganu de méléhu dob kruse, non been i géménantinon begén.²⁰ Mélaw békénén begén i méuyage, yamula méuyag i Kristowe dob begéne. Atin i kéuyag guwe béléewe ni, méuyagu non bé kéunur guwe bé Jesuse Nga i Tuluse. Toow fo mégédaw begén. Ménléhu inok méuyagu.²¹ Enda mikau bé kégédaw i Tuluse. Endob amuk waléy métintuy kélawane sabaf bé kéodor ne bé kitabe, énda i atag i kéléhu Kristowe.

3

Fantag bé kitabe

¹ Do étew dob Galasia, toow gom fo dufang! Sedek féngélingo gom i de étew manangguwit begom témagak bé Fiyowe Uret? Toow fo ménkéntay i kétoro guwe begom fantag bé rénigo Jesu Kristowe amun ménléhu dob kruse.² Wén i fénginsaé kuwe begom, ati kégédot gome bé Rémogor i Tuluse? Aw sabaf bé kéodor gome bé kitabe tidew dob Moisese? Békén! Non gédoté kom i Rémogor i Tuluse sabaf saén bé kégélingo gome brab kéunur gome bé Fiyowe Uret fantag bé Jesuse.³ Aw toow gom fo dufang? Ménwaléy gom métintu sabaf bé késarig gome bé Rémogor i Tuluse. Aw makom ké géumana kom i kétintu gome sabaf bé késarig gome bé de lowoh gom? Enda fakayén!⁴ Aw mén singgula i de kéfiyonon énggédot gom sabaf bé kéunur gome bé Jesuse? Enda fo damén mésinggulaén.⁵ Aw niray i Tulusey Rémogor ne dob begome brab rénigo noy de mékégaif galbék dob téngaanga kome non nodoro kom i kitabe tidew dob Moisese? Enda! Yamula sabaf bé kégélingo gome brab kéunur gome bé Fiyowe Uret fantag bé Jesuse.

⁶ Ségiléw so bé ménrigowe dob katufua keye Abraham. Non wén i Ménslate Kébéréh i Tuluse mano, "I

Abrahame, ménunur bé Tuluse. Atin sabaf bé kéunur ne, kénarang i Tuluse métintu.” ⁷ Mélaw fatut gésobuto kom i ni: I de étew munur bé Tuluse ségiléw bé kéunur Abrahame, beroy de ménwaléy do tintu séfu Abrahame, sani de tintu Judio. ⁸ Wén i Ménsulate Kébéréh i Tuluse bé fétintunéy Tuluse soy de békén Judio sabaf bé késarig ruwe. Mélaw nuret i Tuluse dob Abrahamey Fiyowe Uret bé do gétah, mano, “Fénagéw dob beeme, féfiyoné kuy kéluhanay de étew dob duniyae.” ⁹ I Abrahame ménunur bé Tuluse, mélaw i beene fénfiyoy Tuluse. Atin ségiléw so bé ni, i kéluhanay de étew munur, féfiyonéy Tuluse so bero.

¹⁰ Endob i de étew sémarig bé kéodoro ruwe bé kitabe tidéw dob Moisese, mékukum ro. Non bang i Ménsulate Kébéréh i Tuluse, “I étewe énda démoyuno modor bé kéluhanay de sugu dob kitabe, kukuméy Tuluse.”

¹¹ Mélaw gésobuto tom bé énda i ségétew ménwaléy métintu dob adafay Tuluse sabaf bé kéodor ne bé kitabe tidéw dob Moisese. Non wén soy Ménsulate Kébéréh i Tuluse mano, “I étewe ménwaléy métintu sabaf bé kéunur ne bé Tuluse, méuyag taman sa taman.” ¹² Endob i étewe sémarig bé kéodoro nuwe bé kitabe, békén ségétew sémarig bé Tuluse. Non wén i Ménsulate Kébéréh i Tuluse mano, “I étewe modor sénga tékélid bé kéluhanay de sugu i kitabe tidéw dob Moisese, méuyag taman sa taman.”

¹³ Endob gétiga tom bé énda i ségétew gérigo bé nan. Gido loo, i Kristowe fénukasén betom inok énda mékukum tom bé kitabe. Non i Kristowe ménukumén génantino no betom. Non wén i Ménsulate Kébéréh i Tuluse mano, “I étewe ménléhu bénitin dob kayéwe, ménrigo non kénukum i Tuluse.” ¹⁴ Atin i funa Jesuse féndayaén i kéféléhue de loo bé nan, inok i kéfiyonone fénasad i Tuluse nirayén dob Abrahame, irayén so dob de békén Judio sabaf bé Jesu Kristowe. Mélaw gédoté tom i Rémogor i Tuluse fénasadén sabaf bé kéunur tome bé Jesu Kristowe.

¹⁵ Do dumo gu, ay niy ufamawe. Amuk wén i ruwo gétew ménséfagayun brab rénigo roy fasade bé késulat ruwe bé de dawét ro, énda i gékedan de taloo no géuman de. ¹⁶ Atin loo so bé niy, rénigoy Tuluse fasad dob Abrahame brab dob séfu ne. I Ménsulate Kébéréh i Tuluse énda ménbéréhén mano, “de séfuém” non énda médo no. Ménbéréh saén mano, “séfuém”, atin i atag i ni ségétew saén, sani Kristowe. ¹⁷ Atin ay niy atag i bénréh guwe ni. I Tuluse rénigo noy fasade dob Abrahame. Atin fot ratuh bra téléc folo gébélintuwa tidéw bénou, énggumah i kitabe tidéw dob Moisese. Endob i kitabe énda gékedana noy fasade non toow fo tumanéy Tulusey fasad ne. ¹⁸ Non amuk iray i Tulusey de kéfiyonon sabaf bé kitabe, békénén sabaf bé fasade. Endob i toowe, niray i Tulusey de kéfiyonon dob Abrahame sabaf saén bé fasad ne.

¹⁹ Atin amuk loo bé nan, ati ulane bé kitabe? Niray i kitabe inok giton i sala i étewe taman gégumah i séfu Abrahame, sani fénasad i Tuluse. I ni kitab i Tuluse, fénuitén bé de télaki mangéy dob ségétewé kénédéwan sani Moisese. ²⁰ Endob amun niray i Tulusey fasad ne dob Abrahame énda kailanga noy kénédéwane non ségétew saén i réménigowe bé fasade, sani Tuluse.

²¹ Aw makom ké énda géséfagayun i kitabe brab fasad i Tuluse? Kagom fégitungén de loo bé nan. Non amuk i kitabe muwit umul magufusa dob betome, fakay tom waléy métintu sabaf bé kitabe. ²² Endob wén i Ménsulate Kébéréh i Tuluse bé i kéluhana tome do kélawan dob duniyae ni mékukum tom sabaf bé de tete rigoné tom. Mélaw i Tuluse ténuma noy fasad ne dob betome sabaf saén bé kéunur tome bé Jesu Kristowe. Atin féfiyoné no betom sabaf saén bé kéunur tome.

²³ Amun énda séna féngétiga no betom i mantuwe aguwon mangéy dob lawayo, sani kéunure bé Jesuse, maak ménféri su tom dob kitabe. Atin énda

gésut tom taman énda fénggito no betom i mantuwe aguwon. ²⁴ Mélaw kitab i méguléw betom taman dob kégumah Kristowe inok waléy tom métintu sabaf bé kéunur tome de. ²⁵ Atin béléewe ni ménwaléy tomén munur bé Kristowe, mélaw i kitabe éndaén féguléwo no betom.

²⁶ Atin ménwaléy gom do nga i Tuluse sabaf bé kéunur gome bé Jesu Kristowe. ²⁷ Atin ménfélautis gom inok fétengténg gom i kéunur gome bé Kristowe. Mélaw ménwaléy gom loo bé Kristowe non ménwaléy gom do dumo no. ²⁸ Mélaw i de Judio brab de békén Judio, ségiléw ro. Fiyon i de rifén brab de békén rifén, do lagéy brab do libun, falan ro ségiléw. I kéluhana tome do munur bé Kristowe ségiléw-giléw tom dob adafay Tuluse. ²⁹ Amuk do kuyug Kristo gom, ménwaléy gom so do maak séfu Abrahame brab gédoté kom i kéluhanay fénasad i Tuluse.

4

¹ Ufama, amuk wén i kawasa étew brab ménléhu atin wén i ségétew ngaén fénledén. I nan nga, amuk ménguwéd séna, maak sugu-suguén saén, fiyon fo ké been i gefee bé kéluhanane. ² Brab wén i do sénarigoy ménlatae bohén témalima de brab mégatur de. Endob amuk dakélén i ni nga brab gégumahén dob idade bénréh i boh ne, gédoté non i kéluhanane. ³ Ségiléw so bé betome, amun énda séna munur tom bé Kristowe, maak do rifén tom, non bé do gétah nodoro tom i de rémogor do uléw dob duniyae ni. ⁴ Endob amun énggumahén i fatute gai, i Tuluse sénuguén i Nga ne dob duniyae ni. Atin ménwaléy kéilawan bé kéumah ne dob ségétew libun. Tidéw béno, nodoro noy kitabe tidéw dob Moisese. ⁵ Rénigo noy ni inok fukasé no betom do étew maak do ménférisu dob kitabe inok waléy tom do nga i Tuluse.

⁶ Atin i Tuluse sénuguén i Rémogor i Nga ne mangéy batí dob de fédéw

tom. Been i émbéréhe dob de fédéw tom mano, "Abay gu Tulus". Réningoy Tulusey ni inok gétiga tom do ngaén so betom. ⁷ Mélaw békén tomén do rifén, yamula ménwaléy tom do nga i Tuluse. Mélaw gédoté tom i kéluhanay étingayéne kay de ngaén.

⁸ Bé do gétah, énda séna gélolo gom i Tuluse. Mélaw bé do no gai, rifén gom dob kéluhanay de tabaré kom do tulus, éndob békén tintu Tulus. ⁹ Endob béléewe ni, gélolo gomén i Tuluse non fénémilién begom. Mélaw sedek méuyot gom séfule dob de tafay kékéngintulus gom, énda i lantékén? Aw méuyot gomén man waléy rifén ségule dob de ni? ¹⁰ Sedek fégadata kom i de gai, do bélintuwa brab do térsang kélungonon brab do térsang sabaf bé kitabe? ¹¹ Ménbukuu fantag bé begome non maak ménsinggula i kéluhanay de ténero gu begom.

¹² Ongoté ku begom do dumogu, iring gom begén, loo bé kéiring guwe begom bé kétaké guwe bé kitabe tidéw dob Moisese. Atin énda séniyaw gom begén, ¹³ fiyon fo ké énggétiga kom i kédéruu kuwe bé do no do gai. Endob been i niy funa kuwe énggéuret bé Fiyowe Uret dob begome bé gésunguwe. ¹⁴ Endob énda séniyaw gom begén taloo no ménika gom begén, fiyon fo ké ménkérégénan gom fo toow sabaf bé kédéruu kuwe. Yamula tényakuf gom begén maak ségétew télakiy Tuluse look maak begéney Jesu Kristowe. ¹⁵ Brab toow gom fo ménoror bé béno. Tintu gétiga ku ké amuk fakay sa damén, fiyon i de moto gom iray gom fégétabang begén. Endob sedek ménbaleng i de fédéw gom? ¹⁶ Aw ménsébanil gom begén sabaf bé kéuret guwe bé toowe?

¹⁷ I de ségiyo étew témore begom bé de énda toow, fiyoy de rigoné ro dob begome, éndob énda fo fiyoy funa ruwe rémigo bé de ni. Méuyot ro de ké tagaké kom begén inok bero saén i de dumogom séloyuk. ¹⁸ Enda tete i késédumone amuk fiyoy funane de. Méuyotu de ké séloyuk gom bé

kéluhanay étewe, békén ké begén saén. Brab amuk énda diyou dob begome, fatut wén i do ségiyo do dumo gom séloyuk. ¹⁹ Maak do gulaané ku do nga gu begom. Ségiléw bé libune kéararan ongot-ongoté noy kéumah i nga ne, démawét i fédew guwe sabaf bé begome taman ségiléw i adat gome bé Kristowe. ²⁰ Toowu fo méuyot damén ké diyou dob begome béleewe ni, inok séuret-ureté tom i fiyowe. Non émbukuu fo toow béni. Atin beeniy funa kuwe sémulat loo bé ni.

²¹ I begome do méuyot modor bé kitabe, fétuntay gom i atag i kitabe. ²² Non ménbéréh i kitabe bé i Abrahame wén i ruwo gétew ngaén lagéy. I ségétéwe de ngaén bé bawag ne rifén féndawét Agar, atin i ségétéwe de ngaén bé bawag ne békén rifén féndawét Sarah. ²³ I kéumah i nga ne bé libune rifén ségiléw bé kéumah i kéluhanay de nga. Endob i kéumah i nga ne bé libune békén rifén, ménrigo non fénasad i Tuluse bé Abrahame fiyon fo ké toow fo lukésén i Abrahame brab bawag ne Sarah brab énda i nga ro. ²⁴ I de ni do ruwo gétew libun maak binuwaya. Ay niy atag ne. Wén i ruwo gékelasi do étew, do étew riféy kitabe brab de étew békén riféy kitabe. I libune féndawét Agar, ségiléw bé tafaye aguwon, sani kéodore bé kitabe énggédot Moisese dob tuduke Sinai. Brab i kéluhanay de ngaén, do rifén non i Agare rifén. ²⁵ I riféne ni libun Agar anlung i tuduke Sinai dob Arabia, ségiléw bé de Judio dob Jerusalem non beroy de riféy kitabe tidew dob tuduke Sinai. ²⁶ Endob i bawag Abrahame féndawét Sarah békén rifén. Maak do ngaén betom non békén riféy kitabe betom. ²⁷ Non bang i Ménsulate Kébéréh i Tuluse, “I beeme libun énda énggégéngéga go, oror go! Fiyon fo ké énda ménkédawétan go bé kékéumaha muwe, fatut mékes go bé kéoror me! Non fiyon fo ké téngak i bawag me beem, toow na fo médooy kaame do nga bé libune wén i bawagén.”

²⁸ Mélaw do dumo gu, i begome do nga i Tuluse so sabaf bé fasad ne, ségiléw bé Isake ménmah dob Sarahé non fénasad i Tuluse bé Abrahame, fiyon fo ké lukés ron. ²⁹ Atin bé béno, i nga Abrahame ménmah loo bé kéumah i de nga dob duniiae ni, fénrasayén i tuwaréy ne ménmah sabaf bé tabang i Rémogor i Tuluse. Ségiléw so bé de mérigo dob betome béleewe ni non i de riféy kitabe férasayé ro betom. ³⁰ Ay niy Ménsulate Kébéréh i Tuluse mano, “Féféraléyém i libune rifén brab nga ne, non i nga i riféne énda fakayén gégédot bé de languntaman iray dob nga i békéne rifén. Non i kéluhanane kay nga i békéne rifén.” ³¹ Mélaw, do dumo gu, békén tom maak do nga rifén. Yamula i betome maak do nga i békéne rifén.

5

¹ I Kristowe téngéyén betom. Békénén do riféy kitabe betom. Non éndaén kailanga tom i modore bé kitabe. Mélaw kagom man waléy riféy kitabe ságule.

² Begéney Pablwe, mélaw fégélingo gom i béréhé kuwe ni begom. Amuk sarigo kom i kétulie begom inok méfukas gom bé de sala gom, énda fukasé Kristowe begom. ³ Atin géléé ku man begom ságule. I étewe fétuli inok méfukas bé de salaén, kailanga no soy modore bé kéluhanay kitabe. ⁴ I begome do sémarig bé kéodoro kome bé kitabe inok waléy gom métintu, énggésésway gom bé Kristowe, brab énda tayakufé kom i kégédaw i Tuluse. ⁵ Endob i begeye, munur gey bé Kristowe. Mélaw sémarig gey bé Rémogor i Tuluse féwaléyé no begey do métintu sabaf bé kénur geye. ⁶ Non amuk munur tom bé Jesu Kristowe, ulanden ké métuli tom look énda. I toowe saén mélaga i kénur tome bé Jesuse. Atin giton i kénur tome bé de kégédaw tom.

⁷ Bé do gétah, tintu fo munur gom bé toowe kétoro. Ati ménanangguwite begom sésuway bé toowe kétoro? ⁸ I kékfanangguwite begom sésuway

bé toowe, békén galbék i Tuluse. Non Been i témenawage begom inok munur gom de.⁹ I tugie kétoro begom ségiléw bé fégfééruke bé fane. Non fiyon fo ké kloh saén i fégfééruke de, mélégéb dob kéléhanay fane.¹⁰ Endob fiyon fo ké loo bé nan, sémarigu bé Kadnane tabanga no begom inok énda munur gom bé de ségiyo kétoro saliyu bé kagéne kétoro. Atin fantag man bé nan étew fénbukuén begom bé de tugi kétoro, gétiga ku kukuméy Tulusey nan étew.

¹¹ Do dumō gu, wén keeyén i embéréh begom bé toroé ku soy fatut gom fétuli. Endob amuk toow i nan, sedek taman so béléewe niy kéférasay i de Judio begén? Non taman so béléewe ni, mékérít ro begén bé kétoro guwe fantag bé kéléhu Kristowe dob kruse, sani funa tome saén méfukas bé de sala tom.¹² I da nan do étew ménfébuku begom bé de tugi kétoro ro bé fatut gom fétuli, méuyotu de damén ké fékafun ron fo!

¹³ Do dumō gu, fénémili i Tuluse betom inok méfukas tom dob kitabe. Endob fiyon fo ké loo bé nan, énda fatut odoro tom i de tete kétayay de lowoh tom. Yamula fatut ségédaw tom inok démoyun tabanga tom i de dumō tom munur bé Jesuse.¹⁴ Non i kéléhanay de sugu dob kitabe tidéw dob Moisese géodoron so amuk rigoné i ni sébaan sugu, “Fégédaw go bé dumō muwe, loo bé kégédaw me bé kaame lowoh.”

¹⁵ Endob amuk démoyun gom séédél brab séfétete fédéw, binasané kom i kéfengintulus gome.

¹⁶ Mélaw ay niy béréhé kuwe begom: odoro kom i fémandu i Rémogor i Tuluse, atin mélaw énda odoro kom i de tete kétayay de lowoh gom.¹⁷ Non i de tete kétayay de lowoh tom toow fo sébanil bé kétayay Rémogor i Tuluse. Enda fo séfagayun ro. Mélaw wén i no, énda gérigono tom i fiyowe kétaya tom rigoné.¹⁸ Endob amuk odoro kom i fémandu i Rémogor i Tuluse, énda kailanga kom i modore bé kitabe tidéw dob Moisese.

¹⁹ Gélolo tom i de tete kétayay de lowoh tom, sani do kébigaén, brab do toow fo tete do rigoné,²⁰ brab kéfengadaf bé de kéninontow, brab do kénélyan brab do rémamut, brab do étew démoyun mérarék brab sétiboh, do médaléw, do sékérít, brab do arumén, brab do sébaad-baad atin do sébanil ro,²¹ brab do mingar, brab do molon, brab do sérimbur, brab do ségiyo na tete do rigoné. Béréhé ku man begom ségule, i de ni do étew énda géahur ro dob kéféguléw i Tuluse.

²² Endob gélolo tom soy de étew modor bé fémandu i Rémogor i Tuluse. Beroy de étew gulaané roy de dumō ro, brab moror ro, brab fiyoy de fédéw ro, brab témingkél ro ongot-ongot, brab mégédaw ro, brab rigoné roy fiyowe, brab gésarigon ro,²³ brab téritantad ro, brab énda modor ro bé de tete kétayay de lowoh ro. Amuk rigoné tom i de ni, énda félisé tom i de sugu tidéw bé do gétah.²⁴ Atin i kéléhana tome do étew ka Jesu Kristowe, maak fénléhu tomén i de tete adat tom dob krus Jesuse. Mélaw tétagak tom i tafaye adat tom brab de tete kétaya tom.²⁵ I Rémogor i Tulusey mirayane betom bé mantuwe umul, mélaw fatut odoro tom i fémandu ne.²⁶ Katom félangka-langka, taloo no séfekérít taloo no séingar.

6

¹ Do dumō gu, amuk énggétéksa kom ménsla i dumō gome munur, fatut i de begom fémanduoy Rémogor i Tuluse gélé gom inok énda tausén mésala. Endob fatut mélémak saén i kébéréh gome de. Brab ingat gom so inok énda so gésala gom.² Atin fatut sétabang gom sénga tékélid, non amuk rigoné kom i ni, modor gom bé sugu Kristowe.³ Atin amuk wén i étew manok tintunén fo fiyoy adat ne éndob énda fo toowén, tugio noy kaane lowoh.⁴ I kéléhana kome fatut susi gom i de lowoh gom. Amuk fiyoy de rigoné kom, fatut moror gom de. Endob kagom usarén i adat i dumō gome fégétémbu gom bé kagome adat.

5 Non i séngae ségétew étew mékukum dob adafay Tuluse sabaf bé de rénigo no. Mélaw kagom sékukum.

6 I de étew ténero fantag bé Jesuse, fatut tukidé roy kéfiyono ruwe dob témoree de.

7 Kagom munur bé éndae toow. Enda i ségétew géfagakara noy Tuluse. Gétiga noy kéluhanane. Mélaw buluk atiy ohokéy ségétéwe, been soy nan i kétéwé nuwe. Atin loo so bé ni, i Tuluse irayén i fatute dob séngae ségétew étew sabaf bé rénigo nuwe.

8 I étewe rémigo bé tetee non odoro noy tetee kétayay lowoh ne, gédoté noy kéléhue énda i tamana no. Endob i étewe rémigo bé kétayay Ré mogor i Tuluse, gédoté noy umule magufusa tidew dob Ré mogor i Tuluse. **9** Mélaw katom lugotén rémigo bé fiyowe. Non amuk fédiday tom bé fiyowe rigoné tom, gédoté tom moso i fiyowe baras tom tidew dob Tuluse. **10** Mélaw fatut démoyun tom rémigo bé fiyowe dob kéluhanay étewe, brab labi na fo dob de dumo tom munur bé Jesuse.

11 Téngténg gom i kédakél i de késulat gu, non begén i sémulat bé de ni géfuray kékérél bé de kagén kémér.

12 I de étew fégésé ro begom fétuli, félangka-langka ro brab méuyot ro saén ké dayéwéy de dumo ro bero kékilawan.

Méuyot ro fétuli begom non mégilak ro ké ferasay i de dumo ro bero Ju dio sabaf bé késarig ruwe bé kéléhu Kristowe. **13** I de étew témo ro fatut gom fétuli inok modor gom bé kitabe, i berowe énda so mon modor ro démoyun bé kitabe. Méuyot ro de ké fétuli gom inok dayéwéy de dumo ro bero Judio sabaf bé kékétuli gome. **14** Endob i begéne, i kagéne saén funan fédayéw-dayéw i Kadna tome Jesu Kristo sabaf bé kéléhu ne dob kruse. Non éndaén rifénu dob de tete kétayan dob duniyae ni brab éndaén géfégésoy de tete kétayan begén rémigo sala, sabaf bé kéléhu Jesuse dob kruse. **15** Ulanden ké métuli i ségétéwe étew, look énda. I toowe saén mélaga i kewaléy i adate mantu sabaf bé Kristowe. **16** Atin i de étew modor

bé ni ténero gu, mégédaw damén i Tuluse bero brab iraya no damén bero bé métanéke fédew, loo so dob kéluhanay étew i Tuluse.

17 Atin ay niy tamfaday béréhé kuwe begom dob ni sulat. Tidew béléewe ni, fiyo damén ké éndaén i ségétew émférégénon begén. Non i de laas gu dob lowoh guwe ni, beeniy émfégítowe bé begéney tintuwe sugusugué Jesuse. Non i de étew sébanil bé Jesuse bénadas ro begén médo gule.

18 Do dumo gu, mégédaw fo damén i Kadna tome Jesu Kristo begom kéluhanan. Amen.

Pablo

I Sulat Pablowe dob de Munur bé Kristowe dob Efeso

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Efeso, atin wén i do étew diyo ménwaléy ro do munur bé Jesu Kristowe sabaf bé kéuret ne. Séménulat i Pablowe dob berowe.

Amun sénulat Pablowey ni, ménférisu de nén sabaf bé kéuret ne fantag bé Kristowe. I funa Pablowe séménulat bé ni, non énggelingoo noy éndaén séodor-odor i de fédéw i de munur diyo. Endob mika i Pablowe de ké énda sétiman i fédéw i de kéluhanay de munur, fiyon fo ké do Judio ro look do békén Judio ro. Mélaw sénulatén i ni dob de békén Judio do munur bé Kristowe. Ténoroén bero bé fatut sétiman fédéw i kéluhanay de munur bé Jesu Kristowe, non maak sébaan saén i lowoh ruwe, atin i Jesuse, Been i uléw ruwe.

¹ Begéney Pablowe, sani apostole sénugu Jesu Kristowe non beeniy kétayay Tuluse. Sulata ku begom do dumogu munur bé Jesu Kristowe do bati dob Efeso, sani de énda témérén modor bé kétaya nuwe.

² I Abay tome Tulus brab Kadnane Jesu Kristo, mégédaw ro damén begom brab iray ro damén begom i métanéke fédéw.

³ Toow fo fésalamat tom bé Tuluse sani Abay i Kadna tome Jesu Kristo. Non nirayén betom i kéluhanay kéfiyonone dob lawayo sabaf bé kéunur tome bé Kristowe. I de ni kéfiyonon kay de rémogor tom, békén kay de lowoh tom. ⁴ Bé do gétah, amun énda séna ménlimbag i duniyae de, fénemili i Tuluse nén betom sabaf bé Kristowe inok waléy tom do métintu étew dob adafa nuwe énda i do sala tom.

⁵ Atin non toow fo mégédaw betom, bénantakén i émféwaléye betom

do ngaén sabaf bé rénigo Jesu Kristowe. Rénigo noy ni non been i niy kétaya nuwe. ⁶ Dayéwé tom i Tuluse non bé fiyowe kégédawén betom bé kéiray ne bé toowe fo gulaané no Ngaén, Jesu Kristo. ⁷ Non sabaf bé kéléhu Kristowe, fénukasén betom dob de sala tom, non fén sagad non i de sala tom. Toow fo mégédaw i Tuluse! ⁸ Enda gétémbunon i kégédaw i Tuluse betom! Atin fénggétiga no brab fénggésobutén betom i fantage bé Beene. ⁹ Atin fénggétiga no betom i ménbunéye bantakén bé sunguwe fantag bé kérigo nuwe betom bé Kristowe. Fénggétiga no betom non been i niy kétaya nuwe rigoné no. ¹⁰ Atin ay niy bénantak ne rigoné no. Amuk gé gumahén i fatute gai, féwaléyé noy kéluhanane dob lawayo brab dob duniyae ni sétiman uléw, atin Kristowey uléw ruwe.

¹¹ I kéluhanay de rénigoy Tuluse, rénigo no non kétaya no brab bénantakén rigoné no. Atin been soy funa nuwe fénemilién betom bé énda séna ménlimbag i duniyae de inok waléy tom do étewen sabaf bé kéunur tome bé Kristowe. ¹² Mélaw i begeye do Judio do sungu munur bé Kristowe, toow fo dayéwé key i barakatane Tulus.

¹³ Ségiléw so dob begome. Non amun énggelingoo kom i toowe kétoro sani Fiyowe Uret fantag bé kékufase dob de sala, ménunur gom so bé Kristowe. Mélaw i Tuluse nirayén begom i Ré mogor ne inok bati dob de fédéw gom loo bé fénasad ne. Rénigo noy ni inok wén i tanda bé kékufas gome. ¹⁴ Atin i Ré mogor i Tuluse ni, Been soy maake tising inok tintu gétiga tom tu manéy Tulusey kéluhanay fénasad ne irayén betom brab fégilidé noy kékufas ne betom dob de sala tom. Toow fo dayéwé tom i barakatane Tulus!

¹⁵ Mélaw amun énggelingoo kuy fantage bé kéunur gome bé Kadnane Jesus brab kégédaw gome bé kéluhanay de dumogu munur, ¹⁶ énda fo témérénu fésalamat dob Tuluse sabaf

bé begome. Atin dasala ku begom dob Tuluso. ¹⁷ Atin ongoté ku dob Tulus i Kadna tome Jesu Kristo sani barakatane Abay tom, bé irayén begom i Rémogor ne. Atin i Rémogor i Tuluse ni féwaléyé no begom métileédté brab féfégétiga no begom i Tuluse inok toow fo waléy gétiga kom i Tuluse. ¹⁸ Ongoté ku so dob Tuluso, féfégésobuté no begom inok gétiga kom i de médo do kéfiyonon gédoté tom. Been i inam tome sabaf bé kékemili ne betom inok munur tom bé Kristowe. ¹⁹ Atin démasalu so inok waléy gétiga kom i kédakél i barakat i Tuluse témabang betom do munur. Atin i ni barakat i Tuluse, ²⁰ funa no énggáfétibule bé Kristowe brab énggafédiyat de mangéy mésar dob kuwono nuwe. ²¹ I Kristowe, Beene foy toowe gérotor méguléw. Toow na fo gérotor bé kéluhanay de datu, do odoron, do amu, brab do barakatan étew. Atin i dawét ne toow na fo gérotor bé kéluhanay de dawét dob de ni do gai brab dob de gai gégumah moso. ²² Atin i Tuluse, fénwaléyén i Kristowe méguléw bé kéluhanane inok tabangé no betom do munur de. ²³ Atin i kéluhana tome do munur, maak betom i lowoh Kristowe brab Beene i uléw tome. Enda i kulang dob Beene brab énda i kulang dob lawayo taloo no dob fantade sabaf bé Beene.

2

¹ Bé do gétah, maak do ménléhu gomén sabaf bé de sala gom. ² Bé bénou, ménodor gom bé de tete adat i do étew sébanil bé Tuluse. Brab ménodor gom bé Satanase sani datu i de barakatan saitan dob lawayo brab méguléw bé de étew énda modor ro bé Tuluse. ³ I toowe, bé gétahé, kéluhana tom ménamung bero modor bé de tete kétayay de lowoh tom brab de tete itunga tom. Atin bé bénou, ségiléw tom so bé kéluhanay kéilawane, non mékérít i Tuluse betom, brab fatut mékukum tom.

⁴ Endob i Tuluse toow fo ménuray i na nuwe betom brab toow fo mégédaw betom. ⁵ Mélaw fiyon fo

ké maak ménléhu tom sabaf bé de sala tom, nirayén so betom i mantuwe umul séréngan bé kékétibule ne bé Kristowe. Mélaw i funa tome saén ménfukas dob de sala tom non bé kégédaw i Tuluse. ⁶ Sabaf ménwaléy tom do dumo Kristowe, maak ménibule tom séréngan de inok mamung tom so dob Beene méguléw dob lawayo. ⁷ I funa nuwe réménigo bé ni, inok féténgtengén taman sa taman i dakéle kégédawén betom bé Jesu Kristowe. ⁸ Non ménfukas tom dob de sala tom sabaf bé kégédaw i Tuluse amun ménunur tom. Ménkédan i kékukum ne betom békén sabaf bé galbék tome, yamula nirayén betom i umule magufusa sabaf saén bé kégédaw ne. ⁹ Mélaw énda géfélangka-langka tom sabaf bé kékufukas tome, non énda ménfukas tom dob de sala tom sabaf bé fiyowe galbék tom. Yamula sabaf saén bé gédaw i Tuluse. ¹⁰ Sabaf bé kékunur tome bé Jesu Kristowe, lénimbag i Tuluse betom inok wén i mantu umul tom brab mantu adat tom. Fénwaléyén betom mantu inok rigoné tom i fiyowe galbék térafayén rigoné tom.

¹¹ I de begom do békén Judio, fégétédém gom i sunguwe goho kom. I de Judio, rigoné roy adat ruwe fétuli (sani tanda i lowoh ruwe), atin fédawét ro begom do “Békén tuli”.

¹² Bé bénou, bé énda séna munur gom, ménésuway gom bé Jesu Kristowe, brab énda mén-amung gom dob de étew fénemili i Tuluse. Brab békén kagom i fasad i Tuluse bé de étewén. Bé bénou, fiyon fo ké méuyag gom dob duniya ni, énda i inam gom brab énda gélolo gom i tintuwe Tulus.

¹³ Endob béléewe ni, munur gomén bé Jesu Kristowe funa kom ménwaléy do dumo no. Mélaw éndaén mérayu gom dob Tuluse non fénfégédét i Tuluse nén begom sabaf bé kéléhu Kristowe génantino no begom.

¹⁴ Sabaf bé Kristowe, i begeye do Judio brab de begom do békén Judio, ménwaléyén sébaan i uléw

tome. Mélaw éndaén sébanil tom brab ménwaléy tomén sédumon sabaf bé kéléhu Jesu Kristowe dob kruse.

¹⁵ Atin amun ménléhuén, fénukasén betom inok éndaén kailanga tom i modore bé de sugu i kitab i de Judio. Atin i betome do ruwo gékélasi do étew, fénwaléyén betom sébaan mantu gékélasi do étew ménodor dob Beene. Mélaw ménkedanén i késébanil tome. ¹⁶ Atin kénda noy késékérít tome do Judio brab do békén Judio sabaf bé kéléhu ne dob kruse. Atin fénwaléyén betom ségékélasi do étew inok séfule tom méngadaf bé tintuwe Tulus. ¹⁷ I Kristowe ménangéy dob duniyae ni brab nureténi Fiyowe Uret fantag bé kékéday kékérít i Tuluse. Nureténi i ni dob begeye do Judio do gédét dob Tuluse loo so dob begome do békén Judio do mérayu dob Tuluse. ¹⁸ Atin sabaf bé kéunur tome bé Kristowe, i betome, do Judio brab do békén Judio, fakay tom géfégédét dob Abaye Tulus sabaf bé tabang i Rémogor ne.

¹⁹ Mélaw i begome do békén Judio, éndaén sésuway gom bé de étew i Tuluse. Yamula ménwaléy tom sédumon sétiman Abay sani Tuluse, sabaf bé kéunur tome bé Kristowe. ²⁰ Atin i betome do munur bé Kristowe, ségiléw tom bé sébaane lawi féntindég i Tuluse dob sébaane dakél batéw. I Kristowe, Been i nan i maake batéw. Atin i de apostol brab de sénarigoy Tuluse muret bé kékérh ne, beroy de maak do liléy i nan lawi. ²¹ Mélaw émbagér i ni lawi sabaf bé Jesu Kristowe, brab Beeney funa tome ménwaléy lawi i Tuluse féngadafan de. ²² Atin i begome do békén Judio brab de kéluhanan tom munur, féwaléyéy Tuluse betom sébaan lawi fébatio no bé Rémogor ne.

3

¹ Atin sabaf bé kéluhanay de ni, dasala ku begom dob Tuluse. Atin i begéne Pablo ségétew munur bé Jesu Kristowe, ménférisuwu non fénférisu ro begén amun nuret gu begom do békén Judio fantage bé Jesuse.

² Gétiga ku éngélingoo kom i kégédaw

i Tuluse begén bé sénarigén dob begéney ni galbék muret dob begome fantag bé Kristowe inok méfukas gom so. ³ Bé do gétah, ménbunéy i bantak i Tuluse. Endob fénggétiga no begén. Sénulat gun begom i klohe fantag bé de ni. ⁴ Atin amuk gébasana kom i sulat guwe ni, gétiga kom i kégésobut guwe bé ni ménbunéy kétoro fantag bé Kristowe. ⁵ Bé do gétah, i Tuluse énda fénggétiga no dob de étew i fantage bé ni ménbunéy. Endob béleewe ni, dob kétabang i Rémogor ne, fénggétiga noy ni dob begeye do apostol brab dob de sénarigo no muret bé kékérh ne. ⁶ Atin ay niy ni ménbunéy. I begome do békén Judio, féfiyonéy Tuluse so begom loo so bé de Judio, sabaf bé kéunur gome bé Fiyowe Uret. Atin mélaw ménwaléy tom maak sétiman lowoh brab Kristowey uléwe. Mélaw waléy so kagom i de fasad iray i Tuluse bé de munur bé Jesu Kristowe.

⁷ Atin i begéne, fénémili i Tuluse begén inok waléyu sugu-sugué no magéw mangéy muret bé Fiyowe Uret. Atin i Tuluse férigo no begén i ni galbék sabaf bé kégédaw ne begén brab sabaf bé barakat ne ménggéféwaléy begén sugu-sugué no. ⁸ Begéney toowe fo gérifantad bé kéluhanay de munur bé Kristowe. Gido loo, fénfiyoy Tuluse begén bé késugu ne begén mangéy dob de békén Judio muret bé Fiyowe Uret fantag bé de toow fo fiyo do kéfiyonon gédotén sabaf bé kéunure bé Kristowe. ⁹ Brab sénuguén begén inok fefégésobut gu dob kéluhanay de étew i fantage bé kétumay Tuluse bé de bantakén. I Tuluse, sani léménimbage bé kéluhanané, bénunéyén i bantak ne bé do getah. ¹⁰ I funa nuwe bénunéyén i bantak ne, inok bé béleewe ni usare no betom do munur bé Kristowe fefégétiga no dob de barakatan do odoron do méguléw dob lawayoy fantage bé de médo do kégétigay Tuluse. ¹¹ I funa nuwe réménigo bé ni, non tumané noy bénantak ne bé do gétah bé énda séna ménlimbag i

de éntingayén de. Atin ténuma non béléewe ni nusarén i Kadna tome Jesu Kristo. ¹² Atin ménwaléy tom do dumo Kristowe sabaf bé kéunur tome de. Mélaw éndaén mémala tom fégédét dob Tuluse. ¹³ Mélaw, do dumo gu, ongoté ku dob begome, bé kagom tete i de fédew gom bé kérasay guwe ni bé kétabanga kuwe begom. Yamula fatut moror gom de non kéfiyono kom i funa kuwe mérasay inok féfiyonéy Tuluse begom.

¹⁴ Amuk fégitungé kuy kéluhanay de rénigoy Abaye Tulus dob betome, lémingkuwédu brab démasalu dob Beene. ¹⁵ I kéluhanay de munur dob duniyae ni taloo no dob lawayo, ténavagén betom do étewén. ¹⁶ Atin ongoté ku dob Tuluse bé usaré noy dakéle barakatén fégéfubagér bé de fédew gom bé barakat i Rémogor ne. ¹⁷ Brab ongoté ku so bé fébatié noy Kristowe dob de fédew gom sabaf bé kéunur gome. Atin ongoté ku so bé fébagéré noy de kégédaw gom, ¹⁸ inok i begome brab kéluhanay de dumo tom munur bé Kristowe gédoté tom i kégétigane inok gésobuto tom i kédaké i kégédaw Kristowe betom. ¹⁹ Hoo, méuyotu de ké gétiga kom i kégédaw ne, fiyon fo ké énda i ségétew étew tintu gésobut de fo, inok énda témérén bati i Tuluse dob de fédew gom brab énda so témérén i Tuluse mémantuon begom inok maak ménfeno gom bé tintuwe Tulus.

²⁰ Dayewé tom i Tuluse, sani témabangane betom bé barakat ne, brab toow na fo médooy gérigono nuwe bé de ongoté tom brab de fégitungé tom. ²¹ I kéluhana tome do munur brab i Jesu Kristowe, dayewé tom damén i Tuluse taman sa taman. Amen.

4

¹ Mélaw i begéne, sani ménfériusue sabaf bé rénigo guy galbék i Kadnane, ongoté ku dob begome bé rigo gom i fiyowe loo bé adate kétayay Tuluse, non begom i de étew fénémili

i Tuluse inok munur de. ² Fatut démoyun gom térifantad brab métanék i adat gome brab tingkél gom. Atin fatut fégito gom i kégédaw gome bé de késétingkél gom. ³ Atin tintu fo ingat gom inok énda fésésuwayén i de fédew gom taloo no sébanil gom, non i Rémogor i Tuluse fénwaléyén betom sédumon brab ségiléw i de fédew tom inok énda séédél tom. ⁴ Non sébaan saén i lowohe, sani de betom do munur bé Kristowe, atin Been i uléwe. Atin sébaan saén i Rémogore mémantuon betom kéluhanan. Atin sébaan saén i inam tome sani umule magufusa sabaf bé kékemili i Tuluse betom. ⁵ Atin sébaan saén i Kadnane sani Kristowe, brab sébaan saén i unuro tome sani Kristowe, brab Been saén i funa tome ménbautis. ⁶ Sébaan saén i Tuluse, sani Abay i kéluhanay de étew, sani Kadnay kéluhanane. Been i batie dob kéluhana tome do munur brab férigo no betom kéluhanan i kaane galbék.

⁷ I séngae ségétew betom munur de, iraya no kékfurung loo bé kétaya Kristowe iraya no de. ⁸ Non wén i Ménuslate Kébéréh i Tuluse mano, “Amun déméniate mangéy dob lawayo, nuwitén i médoowe do férisu. Atin wén i de nirayén bé de étewén.” ⁹ Ati atag i “déméniate mangéy dob lawayo?” Ay niy atag ne: bé sunguwe ménlus mangéy dob duniyae. ¹⁰ Mélaw i Beene ménlus, sani Kristowe, Beene soy déméniate. Atin ménangéy dob toowe fo gérotor laway inok diyo dob kéluhanay de gonon. ¹¹ Atin Beeney méniraye bé de kékfurungoy de étew. I de dumo betom, fénémilién waléy apostol. Atin i de dumo de sénarigén dob berowey murete bé kékéréh ne. I de dumo de muret bé Fiyowe Uret. Atin i de dumo de, fénwaléyén do pastor. Brab i de dumo de, fénwaléyén do témore. ¹² Rénigo noy ni inok tafayé no betom kéluhanan dob galbék i Tuluse, inok waléy émbagér i lowoh Kristowe, sani de betom do munur de. ¹³ Mélaw waléy ségiléw i de fédew tom bé kéunur tome brab kégétiga

tome bé Jesu Kristowe Nga i Tuluse. Atin waléy méégét i kéunur tome de brab waléy géiringo tom i tintuwe fiyo adat Kristowe. ¹⁴ Atin amuk mérigoi ni, békén tomén maak do nga, magad munur bé de séségiyo-giyo do tugi kétoro i de étew do magakar. ¹⁵ Yamula, i betome fatut démoyun ureté tom i toowe bé lala tome mégédaw bé de dumo tom. Atin fatut maak méruk tom inok énda i kulang dob kéunur tome brab minut tom loo bé Kristowe sani uléw tome. ¹⁶ Non i betome do munur bé Kristowe, maak betom i sébaane lowoh, brab Beeney uléwe. Atin i kéluhanay de réfa i lowohe toow fo fiyoy késufat ruwe sabaf bé Kristowe. Mélaw amuk sétabang i de réfaén, fiyo brab méruk i lowohe. I atag i ni, amuk rigoné tom i de séségiyo-giyo galbék niray i Kadnane, waléy tom minut ségiléw bé Kristowe sabaf bé késégédaw tome.

¹⁷ Amun begéney sénarigoy Kadnane muret, ay niy béréhé kuwe begom: Kagomén rigonén i ségiléwe bé adat i de békén méngintulus, non énda i lanték i de itunga ro. ¹⁸ Brab délémon i de kéfégitung ro. Enda i karo bé mantuwe umul tidéw dob Tuluse non énda i gétiga-tiga ro sabaf bé kétegas i de uléw ro. ¹⁹ Enda mémala ro fantag bé de tete adat ro. Atin odoro ro saén i de tete kétayay de lowoh ro, brab témantu ro fo rémigo bé kéluhanay de udenén klasi do tete.

²⁰ Endob i begome, amun ménunur gomén bé Kristowe, békén i nan i ténoroe begom. ²¹ Non toow fo énggelingoo kom i fantage bé Jésus. Brab amun ménwaléy gom do kuyugén, téneroén begom i toowe tidéw dob Beene. ²² Mélaw tagak gom i tafaye itunga kom brab de tete adat gom brab de kétaya kom bé do gétah, non toow fo tete i de kétayay de lowoh gom témugion begom funa kom waléy mébinasa. ²³ I de fédew gom brab de itunga kom fatut fo waléy mantu. ²⁴ Fatut féwaléy gom mantuy de adat gom lénimbag i Tuluse ségiléw bé Beene. Tidéw béno, giton métintu

gom brab fiyo gom.

²⁵ Mélaw kagomén témugi! Fatut kéluhana kom béréhé kom i toowe dob de dumo gom. Non i begome do munur ségiléw tom do réfa i lowoh Kristowe atin Been i uléwe. ²⁶ Atin amuk mérkit gom, kagom fédayaén de gésala gom bé kékérít gome. Atin kagom férugayén de ké mérkit gom, kagom fégumahén de témégén. ²⁷ Inok énda fakayén fanangguvité Satanase begom. ²⁸ I ménakawé fatut témérén ménakaw. Atin fatut gémalbék inok gédoté noy méntintuwe kégaguyag atin inok gétabanga noy de méskinan. ²⁹ Kagom émbéréh tete. Yamula béréh gom i fiyowe dob de dumo gom sani kékéréhe gétabang bero brab géféeégét bé kéunur ruwe. Témabang gom mélaw bé de mágélingo begom bé ati kailangay de fédew ro. ³⁰ Atin kagom rigonén i kéikaay Rémogor i Tuluse, sani funa nuwe tete i fédew ne. Non i Rémogor i Tuluse, Been i tanda i Tuluse émfégito bé do étew i Tuluse betom. Brab Been i maake tising émfégito bé fégilidéy Tuluse moso i kékufas ne betom dob de sala tom. ³¹ Fatut kéra komén kéluhanan i kékérít gome brab kétete i de fédew gom bé de dumo gom. Kagom fémalanén i de dumo gom taloo no bérého kom bero tete. Brab kagomén sémiyaw. ³² Yamula fatut gom ségédaw brab séfésagad gom, loo bé kékésagad i Tuluse begom sabaf bé Kristowe.

5

¹ Atin non ménwaléy gomén do nga i Tuluse toow fo gulaané no, fatut iring gom de. ² Fatut démoyun gom ségédaw loo bé kégédaw Kristowe betom funa no nirayén i férénawa nuwe fénggufas betom. Ménwaléy maak dukah ténuak toow fo mamut, sani funay Tuluse ménswat.

³ Atin non do étew i Tuluse begom, kagom arumén, taloo no bigaén gom, taloo no rémigo gom bé tete. Atin kagom séuret-uret fantag bé de ni. ⁴ Atin kagom so labitén i de tete do mérkésik brab do dufang do késébéréh. Yamula fatut usaré kom i

de ba gom fésalamat dob Tuluse. ⁵ Non béréhé ku begom i toowe, i de étew do bigaén taloo no do rémigo tete, énda géahur ro dob kéféguléw Kris-towe brab Tuluse. Atin énda so géahur i de étew do arumén non i kéaruméne ségiléw bé kéfengadafe kéninontow.

⁶ Kagom munur bé de tugién uret énda i lantékén. Non wén i de étew témořo bé ulanden ké tete i de rigonén. Endob been i de niy funay Tuluse mékérít brab kukumé noy de étew énda modor ro bé de suguén.

⁷ Mélaw kagom séloyuk bé de ni do tete étew. ⁸ Bé do gétah, rénigo gom i de tete brab maak ménagéw gom dob délémone. Endob amun ménwaléy gomén munur bé Kadnane, magéw gom dob géfekayae. Mélaw rigo gom i fiyowe loo bé fatute rigonéy de étew i Kadnane. ⁹ Non amuk magéw gom dob géfekayae, gérigono kom i fatute brab métintuwe brab toowe. ¹⁰ Féganad gom i adate émfésuwat bé Kadnane. ¹¹ I de étew bati séna dob délémone, sani de énda séna gétiga roy Kadnane, kagom mamung bé de tete rigoné ro énda i lantékén. Yamula fégito gom i fiyowe adat inok témérén ro damén bé de tete rigoné ro. ¹² I de ménbunéy do tete fo rigoné ro, toow fo mékémala fiyon fo ké labitén saén.

¹³ Endob amuk rémendaw i Soloe, giton tete foy de ni do ménbunéy.

¹⁴ Atin mélaw waléy ro bati dob géfekayae. Non wén i binuwayae fantag bé de tete étew mano, "I beeme fidong, tékénal go, brab tébule go! Atin i Kristowe rémendaw dob beeme."

¹⁵ Mélaw fétuntay gom i de adat gom. Kagom iringén i rigonéy de étew énda gétiga roy fatute. Yamula iring gom i rigonéy de étew toow fo gétigan. ¹⁶ Toow fo tete i de rigonén dob de ni do gai. Mélaw amuk wén i fiyo gérigono kom, fagayas gom rigo.

¹⁷ Mélaw kagom rémigo kédufangan. Yamula fétuntay gom i kétayay Tuluse, inok gétiga kom.

¹⁸ Atin kagom molon bé arake funa kom mébinasa. Yamula fatut maak méféno gom bé Rémogor i Tuluse.

¹⁹ Atin amuk séuret-uret gom, sébéréh gom bé de kanta tidéw dob Ménsulate Kébéréh i Tuluse. Brab kanta gom i de kanta démayéw bé Kadnane loo bé kéfemandu i Rémogor i Tuluse. Atin fatut kémanta gom dob Tuluse bé de fédew gom. ²⁰ Fatut fésalamat gom bé Abaye Tulus sénga tékélid sabaf bé kéluhanay de kéfiyonon nirayén dob begome. Atin labit gom i dawét i Kadna tome Jesu Kristo ké fésalamat gom.

Fantag bé de sébawag

²¹ Fatut térifantad gom brab sébasa gom inok giton i kébasana kome bé Kristowe.

²² I begome do libun bawagan, fatut odoro kom i sugu i bawag gome, ségiléw bé kéodoro kome bé de sugu i Kadnane. ²³ Non i lagéye, beeney uléw i bawag ne ségiléw bé Kristowey uléw i de munur. Non betom i maake lowohén brab Been i uléwe sabaf bé kéfukas ne betom. ²⁴ Mélaw i de libun do bawagan, fatut odoro roy de sugu i de bawag ro loo bé kéodoro tome do munur bé de sugu Kristo.

²⁵ Atin i begome do lagéy bawagan, fatut mégédaw gom bé de bawag gom loo bé kégédaw Kristowe betom do munur de. Gétiga tom i kégédaw ne betom non nirayén i férénawa nuwe bé kéfukas ne betom. ²⁶ Rénigo noy ni inok waléy tom malinis dob adafay Tuluse, sabaf bé kéfembautis tome dob wayége brab kéodoro tome bé kébéréh ne. ²⁷ Rénigo noy ni inok i kéluhanay de munur maak bawag Kristowe, uwitén dob adafa nuwe toow fo malinis, brab métintu énda i salaén. Féwaléyé no betom fiyo inok gétanggafa no betom. ²⁸ Fatut i de lagéy mégédaw ro bé de bawag ro loo bé kégédaw ruwe bé karowe lowoh. I lagéye mégédaw bé bawag ne mégédaw so bé lowoh ne, non ménwaléy ro maak sétiman lowoh.

²⁹ Non énda i étew ikaa noy kaane lowoh. Yamula féamaé no brab talimaé no, ségiléw bé kétalima Kris-towe betom do munur de. ³⁰ Non betom i de réfa i lowoh ne. Brab

Beeney uléwe.³¹ Non wén i Ménsulate Kébéréh i Tuluse mano, “Been i niy funay lagéye témagak bé boh ne brab idéng ne inok mawag. Atin i ni ruwo gétew étew waléy sébaan i lowoh ruwe.”³² Been i niy sébaane fo dakél toow fénggétigay Tuluse betom dob Ménsulate Kébéréhén. Atin gésobuto kuy atag i ni fantag bé Kristowe brab de betom do munur de.³³ Gido loo, i atag ne fantag so bé késébawage. Non i séngae lagéy fatut mégédaw bé bawag ne. Brab i séngae libun fatut basana noy bawag ne.

6

Fantag bé de nga brab de lukés ro

¹ Atin i begome do nga, fatut odoro kom i sugu i de lukés gom, non been i nan i fatute rigonéy de munur bé Kadnane. ² Wén i sugue dob kitabe mano, “Basana moy boh me brab idéng me.” Been i niy sunguwe sugu wén i fasade,³ mano, “Amuk basana moy de lukésém, féfiyoné ku beem brab méraru go dob duniyae ni.”

⁴ Atin i begome do boh brab do idéng, amuk sugué kom i de nga gom, kagom fékérítén bero. Yamula fifit gom bero brab féginau gom bero dob kétoro i Kadnane.

⁵ Atin i begome do rifén, fatut odoro kom i sugu i de amu gom, brab fatut basana kom bero brab mégilak gom bero. Rigo gom i ni tidéw dob fiyowe fédéw gom maak odoro kom i de sugu Kristo. ⁶ Fatut rigo gom i fiyowe sénga tékélid, békén saén dob gaiwe téngténgéy amu gome begom inok mésuwat begom. Yamula tidéw dob fiyowe fédéw gom, rigo gom i kétayay Tuluse maak begom i de rifé Kristo. ⁷ Atin fatut moror gom ké gémalbék gom, maak Kadnan i galbéko kome, békén saén kéilawan. ⁸ Atin fégétédém gom i ni, i Kadnane barasa noy séngae ségétew étew, fiyon fo ké rifén taloo no békén, sabaf bé fiyowe rénigo no.

⁹ Atin i begome do amu, fatut féfiyo gom i kérigo gome bé de rifé

kom. Kagom fégilakén bero bé de tete kébéréh gom. Fégétédém gom i ni, i begome brab de rifé kom ségiléw gom so falan riféy Tuluse dob lawayo, brab énda i isu ramigo no.

I de kulangén iray i Tuluse

¹⁰ Do dumō gu, ay niy tamfaday bérhéé kuwe begom dob ni sulat. Fébagér gom dob barakat i Kadnane inok émbagér i kéunur gome. ¹¹ Usar gom i kéluhanay de kulangén niray i Tuluse begom inok géatuh gom bé Satanase brab de tete akarén. ¹² Non békén do kéilawan i dumō tome sétiboh. Yamula sétiboh tom bé de satan brab do tete odoron dob délémone ni duniya brab dob lawayo. ¹³ Mélaw béléewe ni gamak gom i de kulangén tidéw dob Tuluse inok amuk gégumah i teteet gai dunsukoy Satanase begom, géatuh gom de. Tidéw bénō, amuk gilid i késétibohe, témanban gom.

¹⁴ Mélaw ingat gom. Bérhéé gom i toowe. Been i niy maake légét gom kay sundalowe. Atin rigo gom i métintuwe. Been i niy maake futow fégékélung gom bé de kuméng gom. ¹⁵ Atin uret gom démoyun i Fiyowe Uret fantag bé kétanéke tidéw dob Kristowe. Been i niy maake safatos gom kay sundalowe. ¹⁶ Atin féginugut gom bé Kadnane sénga tékélid. Been i nan i maake kélung gom. Mélaw énda guratén gom bé de mérino séléb fégéfana Satanase begom. ¹⁷ Tayakuf gom i kéfukas i Tuluse begom dob de sala gom. Non been i niy maake futow sayaf fégétéléb bé de uléw gom. Atin usar gom i kébéréh i Tuluse, non been i niy maake sundang gom tidéw dob Rémogor i Tuluse. ¹⁸ Dasal gom sénga tékélid ongot gom tabang dob Tuluse. Atin fédaya gom fédasaléy Rémogor i Tuluse begom. Fatut mingat gom sénga tékélid brab dasala kom soy de dumō gom munur inok tabangay Tuluse so bero. ¹⁹ Atin dasala kom so begén inok fémanduo Tuluse begén muret bé kébéréh ne, brab inok énda mégilaku émfégétigan bé de Fiyo Uret ménbunéy bé do gétah.

20 Atin sabaf bé Fiyowe ni Uret, begén i ségétéwe sénarigon magéw mangéy muret. Gido loo, béleewe ni ay niwu dob férisonone sabaf bé kéuret guwe. Mélaw dasalanu inok émbarawu muret bé Fiyowe Uret loo bé fatute.

21 I Tikikowe, sani kégédawa tome dumo tom munur brab gésarigone sugu-suguéy Kadnane rémigo bé galbék ne, beeney murete begom bé goho kuwe ni dini inok gétiga kom i ati rigoné kuwe. **22** Been i niy funa kuwe de sémugé mangéy dob begome inok ureté noy fantage bé de goho key dini brab inok féfiyoné noy de fédéw gom.

23 I Abaye Tulus brab Kadnane Jesu Kristo, mégédaw ro damén bé kéluhana kome do munur brab iray ro damén begom i métanéke fédéw brab émféégét bé de kéunur gom. **24** Atin mégédaw damén i Tuluse bé kéluhanay de énda témérén féimu bé Kadna tome Jesu Kristo taman sa taman.

Pablo

I Sulat Pablowe dob de Munur bé Kristowe dob Filipos

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Filipos atin wén i de étew diyo ménwaléy ro do munur bé Jesuse sabaf bé kéuret ne. Séménulat i Pablowe dob berowe.

Amun sénulat Pablowej ni, ménférисunén sabaf bé kéuret ne fantag bé Kristowe. I de munur diyo bati dob Filipos, amun énggelingoo ro ménférису Pablowe, sénugu roy ségétewe bero mangéy bati sétifon bé Pablowe dob férисunone inok tabanga no brab fagifaté no. Ménféuwit ro so kurta fégébayad bé fégéfaguyag Pablowe amun ménférisu. Mélaw sénulat Pablowej ni sulat émfésalamat dob berowe sabaf bé tabang ruwe de.

Fiyon fo ké ménférису Pablowe, toow fo méoror sabaf bé kéunur ne bé Jesu Kristowe. Séménulat soy Pablowe dob de munur do bati dob Filipos inok énda témérén ro munur, fiyon fo ké ati kérasaye gégumah dob berowe. Ténoro Pablowe bero bé fatut ro méoror sabaf bé Kristowe.

¹ I begeye Pablo brab Timoteo do sugu-sugué Jesu Kristowe. Sulata key begom do munur bé Jesu Kristowe dob Filipos brab dob de odoro kom do munur brab do témabang.

² I Abay tome Tulus brab Kadnane Jesu Kristo mégédaw ro damén begom brab iray ro damén begom i métanéke fédéw.

³ Fésalamatu dob Tulus tome sénga gétédémo ku begom. ⁴ Atin sénga dasala ku begom kéluhanan, toowu de fo moror, ⁵ non bé kétabanga kome begén bé galbék guwe muret bé Fiyowe Uret tidéw fanay kéunur gom taman so béleewe ni. ⁶ Mélaw gétiga kuy ni: I fiyowe rigonén féngganay i Tuluse dob begome, fétausé no taman dob gaiwe séfule i Jesu Kristowe moso. ⁷ Toow fo gulaané ku begom

kéluhanan. Fatut gulaané ku begom non té nabanga kom begén bé galbék guwe. Fiyon fo ké béleewe ni diniwu dob férисunone ni loo so bé do gétah bé kéto ro guwe brab késumbul guwe fantag bé Fiyowe Uret, té nabanga kom so begén bé ni galbék niray i Tuluse non mégédaw betom. ⁸ I Tuluse gétiga no toow foy ni béréhé ku begom. Toowu fo mégundoy begom brab féimué ku fo begom loo bé kéimu Jesu Kristowe betom.

⁹ Atin démasalu dob Tuluse bé minut dakél i késégédaw gome brab minut so dakél i kégétiga kome bé toowe brab fatute, ¹⁰ inok gégéfilio kom i tintuwe fiyo. Mélaw énda i sala gom fégétebo begom dob gaiwe séfule i Kristowe moso. ¹¹ Atin gérigo gom bé médoowe fiyo sabaf bé kékéwaléy Kristowe begom métintu, inok médayéw brab basanay Tuluse.

¹² Do dumo gu, méuyotu de ké gétiga kom i ni: I kéluhanay de ménrigo dob begéne, been i da nan i téménabange bé kélégéb i Fiyowe Uret. ¹³ Non i kéluhanay de sundalo mantay dob lawi i datue ni brab kéluhanay de étew so dini, gétiga roy funa kuwe ménférisu dini non begén i sugusu-gué Kristowe. ¹⁴ Atin sabaf so bé kékérisu guwe, i kédoonoy de dumo gu munur ménwaléy émbagér i késarig ruwe bé Kadnane. Mélaw méninut ro émbaraw brab éndaén mégilak ro muret bé kékéréh i Tuluse.

¹⁵ I de dumo de ureté roy fantage bé Kristowe non médaléw ro begén brab méuyot ro de ké gélawana roy de rénigo gu. Endob i de dumo de, fiyoy funa ruwe muret fantag bé Kristowe. ¹⁶ Ureté roy fantage bé Kristowe sabaf bé kégédaw ruwe non gétiga ro fénemili i Tuluse begén muret brab sémumbulon bé de étew sébanil bé Fiyowe Uret. ¹⁷ Endob i de dumo de, énda fo fiyoy funa ruwe muret bé Fiyowe Uret. Non muret ro sabaf saén bé kéuyot ruwe waléy émbantug. Atin marok géumana roy kékérégéna kuwe dob férисunone ni.

¹⁸ Endob ulanden! Mororu sabaf bé kéuret ruwe fantag bé Kristowe. Fiyon fo ké tete i funa ruwe muret bé Fiyowe Uret loo ké fiyo, i toowe fo mélaga ké ureténi i Kristowe. ¹⁹ Atin énda témerénu moror, non gétiga ku gégumah soy gaiwe métangéyu dob férisonne ni, sabaf bé de kédasal gom brab dob tabang i Rémogor Jesu Kristowe. ²⁰ Atin i toowe fo kétaya ku brab wén i inam gu bé gétausu rémigo bé kétaya nuwe inok énda i funa ku mémala. Atin démoyun damén émbarawu fo toow inok i kéluhanay de rigoné ku, been i de niy funa Kristowe médayéw. Mélaw fiyon fo ké méuyagu taloo no méléhhuu, médayéw i Kristowe sabaf bé kéluhanay de rigoné ku. ²¹ I karang guwe de, i funa kuwe méuyag inok médayéw i Kristowe. Endob amuk méléhhuu, toow na fo fiyo, non diyou dob lawayo. ²² Mélaw énda gétiga kuy isuwe fémié ku. Non amuk méuyagu, gétausu rémigo bé fiyowe galbékén. ²³ Endob méuyotu méléhu inok gétékédanun dob duniiae ni brab inok géséloyukun bé Kristowe dob lawayo, inok toow na fo fiyoy kébati guwe. ²⁴ Endob toow na fo fiyo ké méuyagu dini inok gétaus i kétabanga kuwe begom. ²⁵ Atin sabaf bé ni, gétiga ku tausu séna méuyag. Atin batiu dob begome kéluhanan inok gétabanga ku begom émféégét bé kéunur gome bé Kadnane brab émfétaus bé kéoror gome sabaf bé kéunur gome, ²⁶ inok amuk géséfuleu mangéy dob begome, méumanan i funa kome démayéw bé Jesu Kristowe sabaf bé begéne.

²⁷ Endob fiyon fo ké ati mérigowe dob begéne, fatut féfiyo gom i de adat gom loo bé kétoro i Fiyowe Uret fantag bé Kristowe, inok fiyon fo ké énda géangéyu diyaan, gétiga ku énda émbaleng i de fédew gom. Yamula gélingoo ku bé sébaan i de fédew gom brab méuyot gom gémalbék bé galbék i Tuluse inok waléy médooy étewe munur bé Fiyowe Uret fantag bé Jesu

Kristowe. ²⁸ Atin kagom mégilak bé de sébanil begom. Non amuk énda mégilak gom bero, gétiga ro niray i Tuluse begom i umule magufusa, atin gétiga ro so kukuméy Tuluse bero. ²⁹ Non mégédaw i Tuluse begom, nirayén begom i kuwagibe munur bé Kristowe loo soy kérasaye sabaf bé Kristowe. ³⁰ Non béleewe ni kéluhana tomén mérasay. Enggit gomén i kérasay guwe sabaf bé ni galbék bé do gétah, brab énggelingoo komén i fantage bé kérasay guwe béleewe ni. Atin béleewe ni, mérasay gom so loo bé ni.

2

Fantag bé Kristowe

¹ Do dumō gu, ménwaléy émbagér i de fédew gom sabaf bé kéunur gome bé Kristowe. Atin ménwaléy fiyoy de fédew gom sabaf bé kégédaw Kristowe. Atin ménwaléy gom sédumon sabaf bé Rémogor i Tuluse. Atin ménwaléy gom ségédaw brab méséuray na. ² Mélaw, sabaf bé de ni, ongoté ku dob begome, fésébaa kom saén i de fédew gom brab de itunga kom, brab fésébaa kom saén i de kétaya kom, brab fébagér gom i késégédaw gome. Toowu fo moror begom amuk rigoné kom i de ni. ³ Atin kagom rémigo bé de éntingayén non bé kéuyot gome saén émbantug look inok waléy gom gérotor. Yamula térfantad gom brab kagom fégitungén de ké toow gom na fo gérotor bé de dumō gom.

⁴ Atin kagom saén fégitungén i fantage bé de kagom do kailangan. Yamula fégitung gom soy ati kétabanga kome bé de dumō gom. ⁵ Fatut iring gom i adat Jesu Kristowe brab itunga nuwe. ⁶ Non fiyon fo ké ségiléw bé Tulusey Kristowe, énda fégitungé no fatut témulama rémeféng bé Tuluse.

⁷ Yamula téragakén i kégérotor ne brab ménteféwaléy ségétew sugu-suguén bé kéumah ne dob kéilawane. ⁸ Atin amun ménwaléyén ségétew kéilawan, toow fo ménterifantad bé kéodoro nuwe bé de sugu i Abay ne Tulus taman so bé kéfélhue de dob kruso. ⁹ Atin

sabaf bé ni, toow fo fénwaléy i Tuluse gérotor brab nirayén dey dawéte toow na fo gérotor bé kéluhanay de ségiyo dawét, ¹⁰ inok amuk labitén i dawét Jesuse, i kéluhanay de étew dob lawayo, brab dob duniyae ni, loo soy dob fantad i duniyae, lémingkuwéd ro. ¹¹ Atin kéluhana ro fayagé roy Jesu Kristowe, Been i Kadnane, inok médayéw i Abaye Tulus.

¹² Mélaw do dumō gu, odor gom bé de sugu gu. Amun diyou séna dob begome, toow fo nodoro kom i de sugu gu. Atin béléewe amun éndaén diyou dob begome, fatut na fo odoro kom i kéluhanay de sugu gu. Mélaw fédayday gom i kégalbék gome dob kéodoro kome bé Tuluse brab dob kéfégadata kome de inok méfukas gom dob kékukume énda i tamana no. ¹³ Non démoyun i Tuluse diyo dob begome brab tabanga no begom inok kétaya kom brab gérigono kom i késuwata nuwe.

¹⁴ Rigo gom i kéluhanay kétaya nuwe, kagom riklamo de taloo no séédél gom de, ¹⁵ inok waléy gom do métintu étew nga i Tuluse brab énda i do sala gom fégétébo i de étew begom fiyon fo ké sélawék gom bé de tete étew bati dob délémone ni duniya. Ségiléw gom bé de giton dob lawayo, ¹⁶ non ureté kom dob berowey fantage bé mantuwe umul. Atin amuk rigoné kom i ni, toowu fo moror sabaf bé begome dob gaiwe moso séfule i Kristowe. Non giton énda ménsinggula i kéluhanay rénigo guwe bé kétabang guwe begom inok munur gom.

¹⁷ Iray guy kéuyag guwe keeyén maak tulak dob Tuluse. Amuk lee, méororu séréngean begom, atin maak umanén dob kagome tulak iray gom dob Tuluse sénga fuweh bé kéunur gome de. ¹⁸ Atin loo soy begome, fatut so moror gom séréngean begén amuk mérigo ni.

¹⁹ Sémarigu bé Kadnane Jesus bé fakay séko sugué kuy Timoteowe mangéy dob begome. Atin amuk

séfule mélaw mangéy dini, góbérého no begén i fantage bé begome funay fédew guwe waléy fiyo. ²⁰ Been saén i dumō guwe dini gulaané no so begom. ²¹ I de ségiyo étew, fégitungé ro saén i fantage bé de karo kífyonon. Enda fégitungé roy fantage bé galbék Jesu Kristowe. ²² Endob i Timoteowe, gétiga kom toow fo fiyoy adat ne. Ténabangén begén lémégéb bé Fiyowe Uret loo bé kétabang i ségetéwe nga bé abay ne gémalbék. ²³ Mélaw, méuyotu de sému gom mangéy diyaan amuk toowén fo gétiga kuy mérigowé dob begéne. ²⁴ Atin sémarigu so dob Kadnane bé énda mérugayén tidéw béri, i begéne so géangéyu so dob begome.

²⁵ Atin gékaranga ku kailangan fo sugué ku séfule mangéy dob begomey dumō tome Epafrodit. Beeney dumō guwe géménalbék muret bé Fiyowe Uret fiyon fo ké wén i do sébanil begey. Beeney sénugu gome mangéy dob begéne inok tabanga no begén, atin béléewe ni féséfuleé kun mangéy dob begome. ²⁶ Toowén fo mégundoy begom kéluhanan brab mélidu i na nuwe non énggelingoo kom i kédéruu nuwe. ²⁷ Toow fo ménfasang démeruun, gédétén fo méléhu. Endob toow fo ménuray i nay Tuluse de loo soy begéne. Non amuk ménléhu de, méuman i kétete i fédew guwe de. ²⁸ Mélaw toow fo méuyotu de ké géuleén mangéy diyaan non gétiga ku toow gom de fo moror ké géségitó gom, brab éndaén mélaw i funa ku émbuku. ²⁹ Mélaw fatut toow gom de fo moror témayakuf non beeney dumō tome munur bé Kadnane. Atin fatut basana kom loo soy de étew loo bé beene ni. ³⁰ Non géfédew fo méléhu bé kégalbék nuwe bé Kristowe. Nirayén i férénawa nuwe bé kétabanga nuwe begén bé galbék guwe énda gétabang gom de.

3

¹ Mélaw, do dumō gu, ay niy de tamfaday de béréhé ku begom dob

sulat guwe ni. Oror gom sabaf bé Kadnane! Atin ulanden ké séguleé ku man sulateén i fantage bé de sénulat gun begom bé do gétah. Non amuk séguleé ku man béréhén i de ni, mas kloh i kaid gome. ² Ingata kom i de étew tete i de rigoné ro. Fégésé ro begom mémali bé de lowoh gom non sénugu i Tuluse kun. ³ Endob i toowe, betomey de tintu étew i Tuluse, békén i berowe. Non maak ténu i Tuluse betom sabaf bé késarig tome bé Jesuse. Non féngadafé tom i Tuluse dob Rémogor ne brab moror tom sabaf bé kéunur tome bé Jesu Kristowe. Enda sémarig tom bé de adat loo bé kétulie loo bé de rigoné ro. ⁴ Endob amuk fatut i késarige bé de adat loo bé nan, fakayu de so gésarig. Atin amuk wén i étew gékaranga no toow fo nodoro noy adat i de kéilawan brab gésarig de, labi na foy begéne. ⁵ Non amun ménségfadiyan sénay kéumah guwe de, méntuliun. Begén i ségétéwe séfu Benjamene, séfu i katufua keye Israel. Tintuwu fo Judio. Atin fantag man bé kitab i de Judio, toow fo nodoro ku non ségétéwu Fariseo. ⁶ Atin non toow fo odoro kuy de adat i de Judio, fénrasay gu foy de munur bé Jesuse. Atin fantag so bé kéodore bé kitabe inok i étewe waléy méntintu, énda fo énggafélico ku de. ⁷ Bé do gétah, makuk i kéluhanay de ni méumanan i kétintu guwe de. Endob béléewe ni gétiga ku fo énda i do lantékén. Atin téragak guy de ni atin gésarigu bé Kristowe. ⁸ Atin békén saén i de niy de téragak gu, non téragak guy kéluhanane inok gédoté kuy toowe na fo fiyo, sani kégétiga kuwe bé Kadna kuwe Jesu Kristo. Sabaf bé Kristowe téragak guy kéluhanay de éntingayén. I kégétung guwe de, maak do réhuk saén do nibér gu inok gédoté kuy Kristowe, ⁹ brab waléyu dumo no. Brab inok waléyu métintu dob adafay Tuluse sabaf bé kéunur guwe bé Kristowe. Enda waléyu métintu sabaf bé kéodore kuwe bé kitabe. Mélaw i funa kuwe waléy métintu békén tidéw dob lowoh guwe, yamula tidéw dob Tu-

luse sabaf bé kéunur guwe bé Kristowe. ¹⁰ I toowe fo kéuyoto ku béléewe ni ké gétiga ku fo toow i Kristowe brab barakat ne sani Kaane barakat sabaf bé kétébule ne. Atin méuyoto de so ké géamungu bé de kérasayén loo bé kéiray ne bé férénawa nuwe dob kruse, ¹¹ inok i begéne so gétébule so moso.

¹² Enda béréhé kuy de ni ké ménwaléyun fo métintu loo bé ni taloo no éndaén foy sala gu. Békén! Endob fédaydayu brab télamané ku inok mérigo moso i kéluhanay de ni, non been i niy funa Kristowe fénwaléyén begén kaan. ¹³ Do dumo gu, gétiga ku fo toow, énda séna méntuman i de ni dob begéne. Endob i sébaane télamané ku rigonén, sani lémifote bé de rénigo gu bé do gétah inok géfégítungo kuy de gérigono ku moso. ¹⁴ I begéne ségiléwu bé ségétéwe sékuya. Fééntangu léméntu taman dob tamfaday sékuyaane inok témanbanu brab gédoté kuy baras guwe, sani kébati guwe dob lawayo sabaf bé kétawag i Tuluse begén sabaf bé Jesu Kristowe.

¹⁵ Loo bé nan i fatute fégítungéy kéluhanay de méégét munur. Endob amuk wén i dumo begom énda magayun no bé begéne, i Tuluse fefégétiga no begom i katabuwane. ¹⁶ Endob fatut odoro tom i kétoroe nodoro tomén taman so béléewe ni.

¹⁷ Atin do dumo gu, fédayday gom iring begén, brab iring gom i de étew ségiléw i adat ruwe bé begeye.

¹⁸ Médoonén gule bénréh guy ni bé do gétah. Atin béléewe ni kéréwo kuy kékéréh guwe de man ségule dob begome. Médooy de étew toow fo tete i de adat ro. Brab sabaf bé de ni tete rigoné ro, giton dob niy sébanil ro bé kékérete fantag bé kéléhu Kristowe dob kruse. ¹⁹ Atin géangéy ro moso dob emfernowo, non i maake tulus ro sani de tete kétayay de lowoh ro. Atin félangka-langka ro bé de tete rigoné ro funa ro damén fatut mémala. Atin fégítungé ro saén i fantage bé de éntingayén dob duniyae ni. ²⁰ Endob i betome, dob lawayo diyo i tin-

tuwe ingéd tom. Atin ongot-ongoté tom i mémukase betom ké séfuleén mangéy dini tidéw dob lawayo, sani Kadna tome Jesu Kristo. ²¹ Amuk gégumahén i nan gai, fégaliné noy de ni gérifantad lowoh tom brab rigoné no loo bé kaane barakatan lowoh. Atin rigoné noy ni dob barakat ne sani barakat ne fégéféguléwén bé kéluhanay éntingayéne.

4

¹ Mélaw do dumo gu, fédayday gom i késarig gome bé Kadnane brab odor gom bé de suguén. Toow fo gu-laané ku begom brab mégundoyu fo begom. Mororu fo sabaf bé begome, brab géfédayéw-dayéwu fo sabaf bé begome.

² Atin i begome Eudia brab Sintiki, ongoté ku dob begome, séfagayun gomén non i begome sédumon sabaf bé Kadnane. ³ Atin i beeme so, sani tintuwe dumo gu gémalbék, ongoté ku dob beeme tabanga moy de ni libun inok géséfagayun ro. Non mégéror ro téménabangan begén bé galbéke lémégéb bé Fiyowe Uret, bero ro Klemente brab de ségiyo dumo gu gémalbék. I kéluhanay de dawét ro ménusulatén dob libroy Tuluse sani lis-tanane bé de dawét i de étew gégédot bé umule magufusa.

⁴ Oror gom sénga tékélid sabaf bé Kadnane. Séguleé ku man béréhén: Oror gom!

⁵ Atin fatut ségédaw gom non gédétén i késéfule i Kadnane. ⁶ Atin kagom émbuku. Yamula dasal gom dob Tuluse brab ongot gom i de kailanga kom brab fatut so fésalamat gom dob Beene ké mongot gom. ⁷ Atin i kétanéke tidéw dob Tuluse, diyagané noy de fédéw gom sabaf bé kéwaléy gome do dumo Jesu Kristowe inok énda émbuku gom. Toow fo fiyoy kétanéke tidéw dob Tuluse, mélaw énda gésobutoy de étew de.

⁸ Atin do dumo gu, umana kuy de ni sulaté ku bé ni sa: Fégitung gom i de éntingayén do fiyo, brab toow, brab métintu, brab malinis. I de ni

éntingayén funay de étew médayéw brab mébasanan amuk rigoné ro. ⁹ Atin rigo gom i de ténero gu begom brab de énggito gom rénigo gu. Atin mélaw diyo dob begomey Tuluse, sani miraye bé kétanéke dob betome.

¹⁰ Toow fo dakél i kéoror guwe brab kédayéw guwe bé Kadnane non fénggito gom man i kégédaw gome begén. Ménrugayén énda fénggito gom de fiyon fo ké méuyot gom de émfégit, énda fakayén. ¹¹ Békén béréhé kuy ni sabaf bé wén i kulang bé de kailanga ku. Non téneroén begén i ni, bé fiyon fo ké atiy goho kuwe, fatut fo kasukudanu. ¹² Enggéagéwo kuy mérasaye kéfaguyag loo soy gababawe kéfaguyag. Atin téneroén begén bé fatutu kasukudan sénga tékélid dob séngae gonon, fiyon fo ké mélawayu taloo no bésoru, fiyon fo ké mérasay i kéfaguyag guwe taloo no gaba-gaba. ¹³ Gérigono kuy kéluhanane sabaf bé tabang Kristowe émfébagér begén.

¹⁴ Endob toow fo fiyoy rénigo gome dob begéne, non ténabanga kom begén dob gaiwe ménkérégénanu. ¹⁵ I begome batí dob Filipos, gétiga kom fo toow bé begom saén i de munur téménabangan begén amun téragak guy gono kome dob Masedonia dob gaiwe mantu séna nuret guy Fiyowe Uret. Enda i ségiyo do munur ménamung begom mirayan begén kurta. ¹⁶ Atin amun diyou séna dob Tesalonika, médo gule fén-uwito kom begén tabang. ¹⁷ Enda béréhé kuy ni ké iraya kom man begén. Yamula kétaya ku fo ké dakél i barase gédoté kom sabaf bé gédaw gome. ¹⁸ Enggédot gun i tabange fénuit gom begén bé Epafrditowe. Atin toow fo gaba-gabay fénuit gome begén. Mélaw ménwénén i kéluhanay kailanga kuwe béléewe ni. I nan do niray gom maak toow fo mamut tulak émfésuwat bé Tuluse brab gétanggafa no. ¹⁹ Atin i Tulus guwe, iraya no begom bé kéluhanay kailanga kome tidéw dob

toowe fo kékawasa no sabaf bé Jesu Kristowe. ²⁰ Médayéw damén i Abay tome Tulus taman sa taman. Amen.

²¹ Ségifaé kuy kéluhana kome do munur bé Jesu Kristowe diyaan. Atin i de dumo gu dini ségifaé ro so begom.

²² Atin i kéluhanay de munur dob ni gonon ségifaé ro so begom, labi na foy de munur bati dob lawi i datue ségifaé ro so begom. ²³ Mégédaw damén begom kéluhanan i Kadnane Jesu Kristo.

Pablo

I Sulat Pablowe dob de Munur bé Kristowe dob Kolosas

Ay niy sébaane bé de sénulat Pablo, sani ménbantuge muret fantag bé Jesu Kristowe. I Pablowe ni, énda séménugudén mangéy dob ingéde Kolosas, éndob énggélolo noy odoroy de munur diyo féndawét Epafras. I Epafrase ni, ménwaléy munur non énggélungoo noy kéuret Pablowe dob ingéde Efeso.

Amun sénulat Pablowey ni, ménférisu de néni sabaf bé kéuret ne fantag bé Kristowe. Ménangéy i Epafrase dob Pablowe brab bénréhén dob beene bé wén i do tugién téromo énggumah dob de munur do bati dob ingéde Kolosas. Bénréh i de ni tugién téromo bé wén kun i de télaki do mas na gérotor bé Jesu Kristowe atin wén so kun i do étew fatut féngadaféy de étew. Atin i de ni tugién téromo, bénréh ro so bé de munur bé Kristowe, fatut ro kun modor bé kitab i de Judio.

Mélaw séménulat i Pablowe dob de munur do bati dob Kolosas inok toroé no bero bé i Jesuse, Been i tintuwe Nga i Tuluse, atin mélaw énda i mas na gérotor bé Beene. Ténoroén i Kristowe Beene saén i fatute féngadaféy de étew, békén do télaki taloo no do ségiyo. Atin ténoroén bé i funay de étew méfukas ro bé de sala ro, non bé kéunur ruwe saén bé Jesu Kristowe. Mélaw énda kailanga roy modore bé kitab i de Ju-dio. Sénulat Pablowey ni dob berowe inok gétiga roy towe fantag bé Kristowe atin inok énda munur ro bé de kétoro i de tugién téromo énggumah dob berowe.

¹ I ni sulat tidew dob begéne, sani Pablowe ségétew apostol sénugu Jesu Kristowe non been i niy kétayay Tuluse. I begéne brab dumo tome munur Timoteo sémulat gey mangéy dob begome ² do munur bé Kristowe dob Kolosas, sani de dumo gey démayday fo modor bé Kristowe.

I Abay tome Tulus mégédaw damén begom brab irayén damén begom i métanéke fédéw.

³ Sénga dasala key begom dob Tuluse, sani Abay i Kadna tome Jesu Kristo, démoyun gey fo fésalamat dob Beene sabaf bé begome. ⁴ Non énggélungoo key i fantage bé méégéte kéunur gom bé Jésu Kristowe brab kégédaw gome bé kéluhanay de dumo tom munur. ⁵ Atin i funa kome munur brab mégédaw, non bé inam gome bé de baras gom gédoté kom moso dob lawayo. Atin énda mécédan i de ni baras gom. Enggétiga kom i fantage bé ni amun mén-uret dob begomey toowe, sani Fiyowe Uret fantag bé Jesuse. ⁶ Atin i ni Fiyo Uret énggélungoo kom, been soy niy lémégebe dob médoowe do étew dob duniyae ni. Atin sabaf bé kéunur ruwe de, waléy fiyoy adat ruwe loo bé begome tidew dob sanguwe gai énggélungoo kom i kégédaw i Tuluse brab tintu gésobuto kom i ni kégédaw i Tuluse. ⁷ Enggélungoo kom i fantage bé ni kégédaw i Tuluse tidew dob Epafrase, sani gulaané tome dumo tom sugu-sugué Kristowe. Beeney mésarigone gémalbék tétabangan begey muret fantag bé Kristowe. ⁸ Bénréhén begey i fantage bé kégédaw gome sabaf bé kéfemanduoy Rémogor i Tuluse begom.

⁹ Mélaw tidew fanay kégélingo gey bé de ni, démoyun dasala key begom. Ongoté key dob Tuluse, fefégtiga no begom i kétaya nuwe rigoné kom, brab fefégsobuté no begom brab fefégtiga no begom i fatute dob kéfemandu i Rémogor ne. ¹⁰ Atin mélaw, gérigono kom i kétayay Kadnane inok mésuwat bé de adat gom. Gérigono kom i de kéluhanay de fiyo brab waléy gétiga kom i fantage bé Tuluse. ¹¹ Atin démasalu bé fébagéré no begom bé barakat ne inok fédayday gom témingkél brab moror gom fiyon fo ké mérégén i de gétamana kom. ¹² Atin géfésalamat gom dob Abaye Tulus non féndaitén so begom

inok gégédot gom bé de irayén dob de étewén, sani de étew dob gégékayaé munur bé Kristowe. ¹³ Non i Abaye Tulus, fénukasén betom tidew dob délémons, sani kéguléw Satanase brab fénbatién betom dob gégékayaé, sani kéguléw i gulaané nuwe Ngaén Jesus. ¹⁴ Atin sabaf bé kéléhu i Nga ne, ménfukas tom tidew dob Satanase brab ménfésagad i de sala tom.

Fantag bé Kristowe

¹⁵ Enda giton i Tuluse, éndob i Kristowe, been i ménfégítowe bé atiy Tuluse non giton i Kristowe. Atin Beeney sunguwe Ngaén non ménwénén bé énda séna lénimbag i Tulusey de udenén étingayén. Atin Been i toowe na fo gérator bé kéluhanay de lénimbag i Tuluse. ¹⁶ Non fénlimbag i Tuluse bé Kristowey kéluhanay étingayéne, dob lawayo brab dob fantade, do giton brab de énda do giton, fiyon i de rémogor do énda gitono brab de odoro ro loo soy de méguléw bero, falan Kristoy léménimbage bé kéluhanay de étingayén inok usaré noy kéluhanane. ¹⁷ Wénén i Kristowe bé énda séna ménlibag i de udenén étingayén. Atin i kéluhanay de étingayén diyo dob karowe gonon non Kristowey méguléwe bero. ¹⁸ I kéluhana tome do munur, betom i maake lowoh Kristowe atin Beeney uléwe. Atin Been i miraye umul dob betome do munur de. Beeney sunguwe Nga i Tuluse, atin Beeney toowe na fo gérator bé kéluhanay de tébule. Mélaw Beeney toowe fo gérator, gérator na bé kéluhanane. ¹⁹ Non sabaf fo dob kétayay Tuluse, tintu fo ségiléw soy Kristowe bé Beene. ²⁰ Atin méuyot de so ké i kéluhanay étingayéne dob duniyae ni brab dob lawayo géséfagayun de non bé Nga ne. Atin bé kéléhu i Nga ne dob kruse, énggféwaléyoy Tulusey kéluhanane dumo no.

²¹ Bé do gétah, méravy gom dob Tuluse brab sébanil gom bé Tuluse non bé de tete rénigo gom brab de

tete kégégitung gom. ²² Endob béleewe ni non bé kéléhu Kristowe, fénwaléy i Tuluse begom do dumo no, inok waléy gom métintu dob adafa nuwe énda i sala gom brab énda i gétébo begom. ²³ Endob kailanga kom i émfédaydaye bé késarig gome bé toowe kétoro. Atin féégét gom i kéunur gome. Brab kagom térenon i kégéinam gome bé de kéfiyonon fénasad i Tuluse begom amun énggelingoo kom i Fiyowe Uret. Been i niy toowe fo Fiyo Uret énggumah dob begome atin béleewe ni lémégéb mangéy dob kéluhanay ingéde dob duniyae ni. Atin i begéne, sani Pablwe, been i galbék guwe non sénugu Kristowe begén mangéy muret bé ni Fiyo Uret.

²⁴ Atin béleewe ni, mororu sabaf bé kérasy guwe tétabangan begom. Mororu non sabaf bé de kérasy gu, gétabangu émféglid bé kérasy Kristowe inok waléy fiyoy lowoh ne, sani de munur de. ²⁵ I Tuluse fénwaléyén begén sugu-suguéy de munur inok gétabanga ku begom bé kéuret guwe bé kéluhanay de kékérén. ²⁶ Been i niy kékérén i Tuluse ménbunéy dob kéluhanay de étew bé do gétah. Endob béleewe ni féngétiga noy de étewén. ²⁷ Béleewe ni méuyot i Tuluse de ké fégétiga no dob kéluhanay de étewén i ni toow fo fiyo kétoro ménbunéy bé do gétah. Atin ay niy nan kétoro: Bati i Kristowe dob de fédew gom, atin sabaf bé ni waléy gom toow fo fiyo dob lawayo loo bé kéfiyoy Tuluse. I ni kétoro kay kéluhanay de étew. ²⁸ Mélaw ureté key i fantage bé Kristowe dob kéluhanay de étew. Brab féingaté key i kéluhanane brab toroé key beroy kéluhanay gétiga keye inok kéluhana ro munur bé Kristowe inok waléy ro énda i kulang dob kéunur ruwe. ²⁹ Atin i begéne fégéroru gémalbék inok mérigo damén i de ni. Atin fébagéréy barakat Kristowe begén inok gérigono kuy de ni.

2

¹ Méuyotu de ké gétiga kom i kégéror

guwe gémalbék témabangan begom brab de munur diyo dob Laodisea, loo soy kéluhanay de étew énda séna gélolo ro begén. ² Fégéroru gémalbék inok émbagér i de fédéw gom brab inok waléy gom maak sédumon sabaf bé dakéle késégédaw gom, brab inok tintu munur gom bé toowe sabaf bé kégésobut gome bé toowe kétoro fénggétigay Tuluse begom, sani fantage bé Kristowe. ³ Non Kristo saén i miraye bé tintuwe kégétigan brab tintuwe kégésobut.

⁴ Bérhéé ku begom i ni inok énda géunur gom bé de tugi do akar i de étew fiyon fo ké maak toow i de kéuret ro. ⁵ Non fiyon fo ké énda diyou dob begome, démoyun so fégítungé ku begom. Atin mororu fo non gétiga ku émbagér i kéunur gome bé Kristowe, brab énda téréno kom de.

⁶ Atin non ténayakuf gom i Kristowe Kadna kom, fatut rigo gom i tintuwe miring bé Beene non begom i de dumono. ⁷ Ufama, i kayéwe déménarir dob fantade. Atin i begome, maak déménarir gom dob Kristowe. Mélaw kagom sésuway bé Beene. Rigo gom i kétaya nuwe brab fébagér gom i kéunur gome loo bé ténoroe néen begom. Atin fatut démoyun gom fésalamat dob Tuluse sabaf bé Kristowe. ⁸ Atin ingat gom inok énda i magakaran begom émféunur bé de tugi do kétoro énda i lantékén, fiyon fo ké maak toow i de ni. Non tidéw saén dob kéilawane, brab tidéw dob de saitan. Békén toow i nan kétoro non békén tidéw dob Kristowe. ⁹ I funa kuwe muret bé ni dob begome, inok gétiga kom i toowe fantag bé Kristowe. I Kristowe ménwaléy kéilawan. Gido loo, i Kristowe, tintu ségiléw bé Tuluse. ¹⁰ Atin i Tuluse niraya no begom bé tintuwe umul sabaf bé begom i de dumo Kristo. Beeney toowe méguléw, gérotor na bé kéluhanay barakatane méguléw brab do odoron. ¹¹ Atin sabaf bé begom i de dumo Kristo maak do méntuli gomén. I kétuli gome, békén

i kétulie rigonéy de étew loo bé adat i de Judio. Yamula Kristoy maake téménuli begom bé kékéda nuwe bé de tafayén tete do adat gom tidéw dob begome inok éndaén kailanga kom i rémigowe tete. ¹² Brab amun ménbautis gomén maak ménlébéng gomén brab maak méntébule gom ménggéodor bé Kristowe, sabaf bé kéunur gome bé barakat i Tuluse ménfétébule de. ¹³ Bé do gétah énda i umul gom magufusa, non médooy de sala gom brab non énda modor gom bé kitabe niray Moisese, loo bé kéodoroy de Judio de. Endob béleewe ni niray i Tulusey umule magufusa dob begome loo bé ménfétébulee bé Kristowe. Atin tintu fo fénsgadén i kéluhanay de sala tom. ¹⁴ Maak kénayasén i kéluhanay ménssulate do sala tom brab kitabe atin maak kénlabo no dob kruso séréngan bé Jesuse inok amun ménléhu i Kristowe ménkédan i nan sulat fantag bé de sala tom brab kitabe so. ¹⁵ Bé béo amun ménléhu i Kristowe, i Tuluse kénda noy kuwagib i de saitan méguléw brab de tete méguléw. Atin fénémala no bero dob téngaangay kéluhanay de étew bé kétabana nuwe bero bé kéléhu Kristowe dob kruse.

¹⁶ Mélaw kagom fédayaén i de étew sémugu begom bé atiy fatute amaé kom brab inémé kom, taloo no sugué ro begom bé fatut kun fégadata kom i de mékétéfu do gai, brab do mantu térsang kélunganon, brab do gai kétérén. ¹⁷ Non i kéluhanay de ni maak do anlung i kéluhanay de éntingayén saén do gérumah mosoén, atin i tintuwe, been i Kristowe. ¹⁸ Kagom fédayaén i de étew do félangka-langka kukumé ro begom sabaf bé de énggitro ro kun tidéw dob Tuluse. Télamané ro begom félengadafén bé de télaki. Endob kagom fédayaén de. I de ni do étew do ubo-ubo saén do térfantad ro, éndob i toowe, do félangka-langka ro. Atin marok do gérotor ro sabaf bé de fiyo kégétiga ro kun, éndob i toowe, énda i funa ro félangka-langka. ¹⁹ I de ni do étew éndaén ménsumfat ro

dob lowohe, sani Kristowe. Endob i betome maak lowoh Kristo, atin Been i uléwe. Ménsumfat tom kéluhanan loo bé de réfa i lowohe, atin féerukéy Tuluse betom non ménsumfat tom kéluhanan dob Kristowe.

²⁰ Maak ménléhu gom énggéodor bé Kristowe. Mélaw méntangéy gomén tidéw dob de saitan brab éndaén géféguléwo ro begom. Mélaw kagomén modor bero. ²¹ Atin kagom odor-odor ké sugué ro begom maro, "Kagom kuwahén i ni", taloo no, "Kagom amaén i nan". ²² Non i amaéne waléy mékédan ké namaén. Mélaw kagom odoron i da nan do sugu non tidéw saén dob kélawane. ²³ I de ni étew maak fiyoy de sugu ro, non fégésé roy de étew méngadaf bé de télaki, brab ubo-ubo ro térfantad, brab do lubagé roy de lowoh ro. Endob i de ni do sugu énda fo fiyo no brab énda fo toowén. Non énda gétabanga ro betom mika bé de tete kétayay lowoh tome.

3

¹ Maak méntébule gomén ménggéodor bé Kristowe, non wén i umul gom magufusa sabaf bé Beene. Mélaw fatut fégitung gom i fantage bé de éntingayén dob lawayo diyo. Non diyo i Kristowe méguléw mésar dob kuwonoy Tuluse. ² Fégitung gom i de éntingayén dob lawayo diyo, békén i de éntingayén dob fantade ni. ³ Non maak ménléhu gomén non éndaén modor gom bé de tete adat. Atin wén i tintuwe umul gom sétifon bé Kristowe dob lawayo. Atin énda mékédan i ni umul non sédumon i Kristowe bé Tuluse. ⁴ I tintuwe umul gom diyo dob Kristowe. Atin amuk séfule giton i kéfiyo nuwe, brab giton soy kéfiyoy mantuwe umul gom non géodor gom bé Kristowe.

⁵ Mélaw fatut tagak gom i de tete kétayay de lowoh gom, loo bé de kékigaén, brab mékérésike rigonén brab do kéarumén. Non i kéaruméne ségiléw bé kéfengadafe bé kéninontowe. ⁶ I de étew rémigo bé de ni, kukuméy Tuluse bero non énda modor ro bé de

suguén. ⁷ Atin fiyon i begome, rénigo gom i da nan bé do gétah, non tete sénay de adat gom bé béno.

⁸ Endob béleewe ni, fatut tagak gom i kéluhanay de ni, loo bé kékérite, brab kéraréke, brab de ségiyo na do tete kékéréh. ⁹ Kagom tugion i de dumogom, non tétagak gomén i de tafay do tete adat gom. ¹⁰ Brab ménfukas gomén bé kégédot gome bé mantuwe brab fiyowe adat. I ni mantu adat tidéw dob Tuluse. I Tuluse démoyun féwaléyé no begom mantu brab fiyo loo bé Beene inok toow fo gétiga kom i fantage bé Beene. ¹¹ Mélaw ségiléwgiléw i de mantu étewén, fiyon fo ké do Judio taloo no do békén Judio, fiyon fo ké do méntuli taloo no énda, fiyon fo ké do énggégéganad taloo no énda, fiyon fo ké do rifén taloo no békén. Enda i ségiyo gérotor saliyu bé Kristowe, brab Been i batie dob kéluhana tome do munur de.

¹² Betomey de étew fénémili i Tuluse waléy do étewén sabaf bé kégédaw ne betom. Mélaw fatut mégédaw gom brab méuray i na gome, brab térfantad gom, brab métanék i de adat gom brab témingkél gom. ¹³ Atin fatut sétabang gom, brab séfésagad gom amuk wén i réménigo tete dob begome. Fatut fésagad gom i de dumogom loo bé kéfésagad i Kadnane begom. ¹⁴ Atin saliyu na bé de ni, fatut ségédaw gom, non been i niy funa kome waléy sétiman i de fédéw gom loo bé fatute. ¹⁵ Atin fédaya gom i Kristowe fétanéké noy de fédéw gom, inok énda sékérít gom non been i niy funay Tuluse fénwaléyén begom sébaan lowoh. Atin fatut démoyun gom fésalamat. ¹⁶ Atin i kéluhanay de fiyo kétoro Kristowe fatut démoyun bati dob de fédéw gom. Atin fatut sétoro gom brab séféginau gom loo bé kékéfétigay Tuluse de begom. Atin kanta gom i de kanta démayéw bé Tuluse brab de kanta émfésalamat dob Tuluse. ¹⁷ Mélaw i rigoné kome, fiyon fo ké dob de kékéréh taloo no dob de rigonén, fatut rigo gom sabaf begom i de kuyug i Kadnane Jesus. Atin sabaf

bé kéunur gome bé Kristowe, fatut démoyun gom fésalamat dob Abaye Tulus.

¹⁸ I de begom do bawagan libun, odoro kom i de sugu i de bawag gom, non been i niy fatute rigonéy de munur bé Kristowe. ¹⁹ Atin i de begom do lagéy, fatut fégédaw gom bé de bawag gom brab kagom dusanén bero.

²⁰ I de begom do nga, odoro kom i kéluhanay sugu i de lukés gom, non been i niy késuwatay Tuluse.

²¹ Atin i de begom do boh brab do idéng, kagom fékélébuwanén i kéadowoy gome bé de nga gom taman waléy ro mékérít brab éndaén méuyot ro rémigo fiyo.

²² I de begom do rifén, odoro kom i kéluhanay sugu i de amu gom. Fatut rigo gom i fiyowe sénga tékélid, békén saén dob gaiwe téngténgéy amu gome begom inok mésuwat begom. Yamula tidéw dob fiyowe fédéw gom odoro kom i de sugu ro sabaf bé dakéle kébasana kom bé Kadnane. ²³ Brab fiyon fo ké ati rigoné kome, fatut toow gom fo fégérör, maak békén saén kéilawan i galbéko kome éndob maak Kadnan i galbéko kome. ²⁴ Fégétédém gom i ni, i Kadnane barasa no begom. Non i Kadnane barasa no begom bé de kéfiyonon irayén dob de étewén. Non Kristowey tintuwe amu gom.

²⁵ Atin i de étew rémigo tete, kukuméy Tuluse bero loo bé kégétimal i de sala ro. Non i Tuluse, énda i isu ramigo no.

4

¹ Atin i de begom do amu, fatut rigo gom i métintuwe brab fiyowe dob de rifé kom. Fégétédém gom i ni, fiyon i begome, wén soy Amu gom dob lawayo.

² I kéluhana kome do munur, fatut fédayday gom i kédasal gome dob Tuluse. Brab kagom manat ké démasal gom. Atin fatut fésalamat gom dob Tuluse ké démasal gom. ³ Atin dasal gom so mongot dob Tuluse tabanga no begey inok wén i do

gai géureto key i kébéréh ne brab gégétiga key i Kristowe dob de étew. Been i niy kétoroe ménbunéy bé gétahe. Atin ménférisuwu béleewe ni sabaf bé kéuret guwe bé ni Fiyo Uret. ⁴ Mélaw dasal gom inok fékéntayéy Tulusey kéuret guwe loo bé fatute rigoné ku.

⁵ Atin fatut fétuntay gom i de rigoné kom dob de étew do énda séna munur bé Kristowe, atin tulama gom uret i Kristowe sénga gai fakay ureté kom.

⁶ Atin féfiyo gom démoyun i késéuret-uret gome bero brab i késéuret-uret gome fatut wén i lagaén. Brab fatut gétiga kom i fatute késumbul gom dob kéluhanay de étew.

⁷ I gulaané tome dumo tom Tikiko, sani mésarigone gémalbék brab dumo gu so ségiléw sugu-suguéy Kadnane, been i émfégétigane begom fantag bé begéne brab goho kuwe ni dini.

⁸ Been i niy funa kuwe de sému mangéy dob begome, inok féororé no begom bé kéuret ne begom fantag bé de goho key dini. ⁹ Atin wén soy ségétéwe lagéy dumo gom sébaan gonon fénawéti Onésimo modor de. Beeney gulaané tome dumo tom munur bé Jesuse. Toow fo mésarigon i ni étew. I berowe, ureté ro dob begomey kéluhanay de ménrigo dini.

¹⁰ I Aristarkowe, ségifaé no begom. Been i dumo guwe ménférisu dini. Ségifaé Markose so begom, sani dumo Bernabewe sétiman bebe. Fén-uwito kun begom kébéréh fantag bé Markose, bé fatut tayakufé kom amuk gégumah dob begome. ¹¹ Atin i Jesuse (fénawéti so Justo) ségifaé no so begom. Enda i ségiyo do Judio mamungon begén muret fantag bé kégéuléw i Tuluse, saliyu bé de ni do télew gétew. Toow fo télabanga ro begén.

¹² Atin i Epafrase, ségifaé no so begom, sani dumo gome sébaan gonon brab ségétéw so sugu-sugué Jesu Kristowe. Sénga tékélid démasal fo dob Tuluso inok mégét i kéunur gome brab énda téméréno, brab inok rigoné kom fo toow i kétayay Tuluse. ¹³ Enggitó

gu foy kégéror ne gémalbék, mélaw géureto ku dob begomey fantage bé kégéror ne témabangan begom brab de étew dob Laodisea loo soy de étew dob Hierapolis. ¹⁴ Atin i Lukase, sani gulaané tome muwa brab Demase so, ségifa ro begom.

¹⁵ Atin fésamfay gom so dob de munur dob Laodiseay késégifa geye bero brab dob libune féndawét Nimfas brab dob de munur sélimud méngadaf dob lawi ne. ¹⁶ Amuk gilid basané kom i sulat guwe ni, fatut fébasa gom so dob de munur bati dob Laodisea. Brab wén soy sulat guwe mangéy dob de munur dob Laodisea, fatut basa gom so. ¹⁷ Atin béréh gom dob Arkipowe bé fatut fétausé noy galbéke niray i Kadnane de.

¹⁸ I begéné Pablo, sulaté kuy ni géfuray késégifa bé de kagén kémér. Kagom lifotén begén nikét bé sangkalie dob férisunone ni.

Mégédaw damén i Tuluse begom.
Pablo

I Sunguwe Sulat Pablowe dob de Munur bé Kristowe dob Tesalonika

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Tesalonika, atin médoobé de étew i ménwaléye do munur bé Jesuse sabaf bé kéuret ne. Endob i de Judio do bati diyo dénédél roy Pablowe mésut tidew dob ni ingéd, non ménika ro bé kétoro ne fantag bé Kristowe.

Amun tékédan i Pablowe tidew dob ingéde ni Tesalonika, ménbuku fantag bé de mantu do munur bati diyo. Ménbuku ké témérén ro munur bé Kristowe sabaf bé kéférasay i de Ju-dio bero. Mélaw sénugu Pablowej ségétéwe dumo no gémalbék fénadawé Timoteo inok susiné no ké ati gohoy de munur. Amun ménsefule i Timotewe mangéy dob Pablowe, nureténi fantage bé de munur dob Tesalonika bé fétausé roy kéunur ruwe bé Kadnane Jesu Kristo, fiyon fo ké mérasyar. Mélaw sénulat Pablowej ni inok ureté no dob berowey kéoror ne brab inok féfiyo noy fédew ruwe. Dob ni sulat, ténero Pablowe soy fantage bé késéfule Kristowe brab kétibile i Tuluse bé de munur moso.

¹ I begeye Pablo, Silas brab Timoteo, sémulat gey mangéy dob begome do munur bé Kristowe dob ingéde Tesalonika, do étew i Abaye Tulus brab Kadnane Jesu Kristo.

Mégédaw damén i Tuluse begom brab irayén damén i métanéke fédew.

² Démoyun gey fésalamat dob Tuluse sabaf bé begome kéluhanan, atin sénga tékélid dasala key so begom dob Tulus. ³ Non buluk démasal gey dob Abaye Tome Tulus, gétédémo key i de fiyo rigoné kom sabaf bé kéunur gome bé Kristowe. Brab gétédémo key i kégéror gome gémalbék sabaf bé kéimu gome bé Kristowe. Brab

gétédémo key i kéégét i inam gome bé késéfule i Kadna tome Jesu Kristo.

⁴ Do dumo gey, gétiga key méimu i Tuluse begom brab fénémilién begom waléy do étewén. ⁵ Non amun nuret gey dob begomey Fiyowe Uret, énda nureto key saén begom, yamula fénggit gey so begom i de mékégaif rénigo gey dob barakat i Rémogor i Tuluse. Atin tintu énggétiga key toow fo fiyoy toowe dob Fiyowe Uret. Atin énggito gom i fiyowe adat gey amun diyo gey dob begome atin rénigo gey i kéluhanay de ni inok tabangé key begom. ⁶ Atin i begome, niring gom i adat geye brab adat i Kadnane. Fiyon fo ké ménngéagéw gom médoob kérasay, tényakuf gom i Fiyowe Uret. Atin toow fo ménoror gom, non fénoror i Rémogor i Tuluse so begom. ⁷ Mélaw, ménwaléy gom do étew fatut iringéy de munur dob Masedonia brab Akaya. ⁸ Non i kékéréh i Kadnane nuret gom békén saén ménlégéb dob Masedonia brab Akaya. Yamula i kékurete fantag bé kéunur gome bé Tuluse ménlégéb mangéy dob kéluhanay de ingéd. Mélaw éndaén kailanga key i murete fantag bé kéunur gome. ⁹ Non kéluhanay de étew muret fantag bé kékayakuf gome begey bé kéangéy geye témukaw begom. Atin ureté ro soy kétakag gome bé kéfengadaf gome bé de kéninontow amun ménunur gomén bé tintuwe brab méuyage Tulus inok fénadafé kom brab rigoné kom i kétaya nuwe. ¹⁰ Atin ureté roy fantage bé kékongot-ongot gome bé késéfule i Nga ne Jesus tidew dob lawayo. Beeney ténebule i Tuluse. Atin Beeney mémukase betom inok énda kukumé no moso i de kéilawan.

2

¹ Do dumo gey, begom soy énggétigane de bé wén i fiyo rénigoy kétukaw geye begom. ² Gétiga kom i kéférasaye begey brab kéfengirase begey dob ingéde Filipos. Ménrigoy ni bé énda séna ménagéw gey de mangéy dob begome. Endob fénbaraw i Tuluse

begey inok géureto key begom i Fiyowe Uret tidéw dob Beene, fiyon fo ké médooy sébanile begey. ³ Atin i kéuret geye dob begome békén tidéw dob tugie kétoro, taloo no tete i funa keye témo, taloo no fagakara key begom.

⁴ Yamula, doyuné key bérhéhén i kétayay Tuluse, non gékarangay Tuluse médait gey muret bé Fiyowe Uret funa no sénarigén dob begeye. Atin énda télamané key fésuwatén i de étew, yamula méuyot gey émfésuwat bé Tuluse sani gétigane bé de fédew tom.

⁵ Gétiga kom i kageye kébéréh. I kageye kébéréh békén saén kékuwéy taloo no fégékurta gey. Gétigay Tuluse so toow i ni. ⁶ Atin énda séménléd gey bé de kédayéw gom begey taloo no kédayéw i de ségiyo. ⁷ Wén i atura key sému gey begom tétabang begey non do apostol Kristo gey, éndob énda rénigo gey de. Yamula amun diyo gey dob begome, mélémak i kérigo geye begom ségiléw bé ségétewe idéng toow fo mélémak i kérigo nuwe bé de ngaén.

⁸ Atin sabaf bé kéféimu geye begom, nuret gey dob begomey Fiyowe Uret tidéw dob Tuluse. Atin békén saén i ni, yamula ménuyot gey so séloyuk begom bé kéluhanay de rigoné kom, non toow fo gulaané key begom. ⁹ Do dumogey, gétiga key gétédémo kom soy kégéror geye gémalbék. Amun nuret gey dob begomey Fiyowe Uret tidéw dob Tuluse, fuweh na kélungonon i kégalbék geye inok gédoté key i kégaguyag geye. Mélaw énda ménkérégénan gom begey.

¹⁰ Gétiga kom brab gétigay Tuluse so bé fiyo brab métintuy de rénigo gey dob begome do munur. Enda i rénigo gey funay ségétewe gétébo begey. ¹¹ Gétiga kom i de rénigo gey dob séngae ségétew begom, ségiléw bé kérigo ségétewe boh bé de ngaén.

¹² Non fénbagér gey brab fénfiyo gey i de fédew gom. Atin nongot gey dob begome bé rigoné kom i fiyowe sénga tékélid loo bé fatute rigonéy de étew i Tuluse. Been i ménmilie begom inok féguléwo no begom brab inok gétiga kom i kégifiyo nuwe.

¹³ Atin ay ni soy funa keye démoyun fésalamat dob Tuluse. Amun nuret gey dob begomey kébéréh i Tuluse, féngélingo gom brab tényakuf gom. Ménunur gom de bé békén saén kébéréh i kélawane, yamula kébéréh i Tuluse. Atin tintu fo tidéw dob Tulusey kébéréh geye, non usaréy Tulusey kébéréh ne émfébagér bé kéunur i betome do munur bé Jesuse.

¹⁴ Atin do dumogu, i ménrigowé dob begome ségiléw bé ménrigowé dob de étew i Tuluse do munur bé Jesu Kristowe batí dob Judea. Férasay i de dumoro bero do Judio. Atin ségiléw so bé begome, i de dumogom batí dob kagome ingéd ferasayé ro so begom sabaf bé kéunur gome bé Jesuse. ¹⁵ I de Judio dob Judea fénléhu roy Kadnane Jesus brab de sénarigoy Tuluse muret bé kébéréh ne. Atin fénrasay ro so begey. Toow fo énda mésuwat i Tuluse bero. Atin sébanil ro so bé kéluhanay étewe. ¹⁶ Non ténlama roy gémélée begey muret bé Fiyowe Uret dob de békén Judio, funa ro méfukas dob de sala ro. Mélaw ségiléw bé gétahe, toow fo ménfénoréon bé salae. Mélaw béléewe ni, toow fo mémérit i Tuluse bero.

¹⁷ Atin do dumogey, amun énggéséfeka tom bé magade saén énda gélifoto key begom. Yamula toow fo mégundoy gey begom atin toow fo témenlama gey man mangéy diyaan inok géségito tom. ¹⁸ Méuyot gey séfule mangéy dob begome. Brab i begéne, Pablo, médoonén gule témenlamawu mangéy diyaan. Endob alangé Satanase fo begey. ¹⁹ I funa keye damén méuyot séfule mangéy sugud-sugud diyaan, non toow fo gulaané key begom. Atin gulaané key begom non sabaf bé begome, ménwaléy méégét i kóngot-ongot geye bé késéfule Jesu Kristowe. Atin sabaf bé begome, toow gey fo moror. Atin amuk diyo gey moso dob adafay Kadnane Jesus Kristo ké séfule, géureto key i fiyowe fantag bé de rénigo gey sabaf bé kéunur gome. ²⁰ Toow, begom i funa keye moror brab gégélangka-langka.

3

¹ Amun éndaén foy fégifusa key bé kégundoy geye begom, ménséfagayun gey télén gétew bé i begeye ruwo gétew bati gey dob Atenas, ² brab ségetew saén i mangéye diyaan. Mélaw sénugu gey i Timoteowe, sani dumo tome munur brab dumo gey gémalbék dob Tuluse muret bé Fiyowe Uret fantag bé Jesu Kristowe. Sénugu gey i Timoteowe inok fébagéré noy kéunur gome brab féfioné noy de fédew gom, ³ inok énda i ségetew begom mébaleng i kéunur ne sabaf bé de kéferasay begom. Gétiga kom soy de ni do kérasay mérigo dob betome non beeniy bantak i Tuluse. ⁴ Non amun diyo gey séna dob begome, bénréh geyén dob begome bé ferasayén tom moso. Atin tintu gétiga kom so bé toow fo ménrigo. ⁵ Been i niy funa kuwe séménugu bé Timoteowe mangéy dob begome. Endob téningkél guy kébuku guwe fantag bé begome. Mélaw sénugu guy Timoteowe inok susiné noy fantage bé kéunur gome. Ménbukuu ké téneungkad Satanase begom brab bénalengén i kéunur gome atin mésinggula mélaw i kéluhanay galbék geye.

⁶ Atin mantu séna énggumah i Timoteowe tidew dob begome. Atin nuvitén i fiyowe uret fantag bé kéunur gome brab kégédaw gome. Atin bénréhén begey i doyuné kom kun fégitungén i fiyowe fantag bé begeye. Brab bénréhén soy kéuyot gome géségito begey loo bé kéuyot geye géségito begom. ⁷ Mélaw do dumo gey, fiyon fo ké béleewe ni médooy de mérégén géagéwo key brab kérasayan gey, ménfiyoy de fédew gey sabaf bé begome. I kéunur gomey funay de fédew gey ménfiyo. ⁸ Non bé do gétah, toow fo ménbuku gey fantag bé begome. Endob béleewe ni, moror gey non gétiga key méégét i kéunur gome bé Kadnane brab éndaén fo émbaleng i de fédew gom. ⁹ Béleewe ni, géfésalamat gey dob Tuluso fantag bé begome. Fésalamat

gey sabaf bé kéoror geye démasal dob Tuluso fantag bé begome. ¹⁰ Fuweh na kélunganon, démasal gey fo toow dob Tuluse ongoté key dob Beene tungkasé no betom géségito man ségule inok géféeégéto key i kéunur gome amuk wén i kulang de.

¹¹ I Abay tome Tulus brab Kadna tome Jesus, tafayé ro damén i agéwone inok géagéw gey mangéy dob begome. ¹² Atin féinutéy Kadnane fédakélé damén i késégédaw gome brab kégédaw gome bé kéluhanay de étew, inok waléy ségiléw bé kédakél i kégédaw geye begom. ¹³ Mélaw fébagéré noy de fédew gom, brab féwaléyé no begom toow fo fiyo brab do métintu inok énda métébo gom amuk diyo gomén dob adafay Abay tome Tulus bé gaiwe séfule i Kadnane Jesus beroy kéluhanay de étewén.

4

¹ Atin do dumo gey, wén soy béréhé keye begom. Ténoro gey begom i fatute adat rigoné kom inok mésuwat i Tuluse de. Atin been i niy rénigo gome. Atin béleewe ni sabaf bé atura keye tidew dob Kadnane Jesus, ongoté key dob begome bé umana kom i da nan fiyo rigoné kom. ² Gétiga kom i kétoro geye begom sabaf bé atura keye tidew dob Kadnane Jesus. ³ Kétayay Tuluse ké métintu gom brab kagom bigaén. ⁴ I kéluhana kome fatut féfiyo gom i kébawag gome. Rigo gom i fatute loo bé kétayay Tuluse. ⁵ Mélaw féfiyo gom i kébawag gome loo bé fatute. Kagom iringén i de énda méngintulus, modor ro saén bé de tete kétayay de lowoh ro. ⁶ Mélaw fatut énda i ségetew begom rémigo késalaan loo bé ni dob dumo gome munur bé Kristowe taloo no lafisé kom. Non i Kadnane kukumé noy de étew rémigo tete loo bé ni. Bénréh geyén i ni dob begome bé do gétah brab sulaté ku man béleewe ni. ⁷ Non i Tuluse fénémilién betom inok waléy tom do métintu étew. Enda fénémilién betom inok sétayan tom bé békéne do bawag tom. ⁸ Mélaw amuk wén i étew

mika bé ni kétoro, békén étew i kéikaa nuwe, yamula Tulus, sani miraye bé Rémogor ne dob betome.

⁹ Enda kailanga kuy sémulatane begom fantag bé kégédaw gome bé de dumō gom munur. Non Tulus i téménoroe begom bé fatut ségédaw gom. ¹⁰ Atin gétiga key mégédaw gom bé kéluhanay de dumō gom munur bati dob Masedonia. Gido loo do dumō gey, ongoté key dob begome bé umana kom i kégédaw gome. ¹¹ Fatut fétanék gom i kébati gome, brab kagom furaya fédew i de dumō gom. Brab fatut fégérōr gom gémalbék inok gédoté kom i kéfaguyag gome, loo bé bénréh geye begom bé do gétah. ¹² Amuk rigoné kom i ni, fiyon i de énda munur fégadata ro begom, brab énda kailanga kom i mongote dob de ségiyo inok gédoté kom i kéfaguyag gome.

I késéfule Jesuse

¹³ Atin do dumō gey, méuyot gey de ké gétiga kom i fantage bé de ménléhuén kuyug Kristowe. Non amuk gétiga kom i toowe fantag bé ni, énda tete i de fédew gom loo bé de étew énda i inam ro. ¹⁴ Non munur tom bé i Jesuse, ménléhu, tidew béno méntébule, atin séfule moso. Mélaw munur tom bé i de ménléhu munur bé Jesuse, tébule ro brab féséfuleéy Tuluse moso bero modor bé Jesuse.

¹⁵ Ay ni sulaté key i kétoro i Kadnane: I de betom do méuyag séna dob gaiwe séfule i Kadnane, énda géétah tom bé de ménléhu do kuyug Jesuse.

¹⁶ Non bé gaiwe séfule i Kadnane mélus tidew dob lawayo, wén i mékes toow fo métanug, brab émbéréh i gérotore téakiy Tuluse, brab émbéréh i témburiy Tuluse. Tidew béno, i de étew munur bé Kristowe do ménléhuén, beroy de sungu tébule. ¹⁷ Tidew béno, i de betom do kuyug Jesuse do méuyag séna bé béno gai, sétimu tom betom i de mantu méntébule dob rawéno diyo. Atin sébalak tom bé Kadnane dob rotoro diyo. Tidew béno, diyo tom dob Kadnane taman sa taman. ¹⁸ Mélaw

séféfiyo gom fédew bé de ni do kékéréh gu.

5

¹ Do dumō gey, énda kailanga key i sémulatane begom fantag bé gaiwe mérigoy de ni. ² Non gétiga kom i fantage bé késéfule i Kadnane moso. Kétékowan moso i de étew de loo bé kékétékoway ségétewe étew ké géumah i ségétewe ménakaw ké kélungonon. ³ Bé lala i de étew émbéréh maro, “Métanék i ni gai brab énda i makakaid bé ni kébati,” sonom béno tékow géumah i gaiwe mébinasa ro. Atin énda géséliyaha ro de. Atin métékow i géumah i nan gai loo bé géumah i gaiwe kéararan i ségétewe libun obor. ⁴ Endob do dumō gu, énda bati gom dob délémone loo bé de étew énda gétiga roy fatute. Mélaw énda fatut gom kétékowan bé géumah i gaiwe séfule i Kadnane loo bé ségétewe kétékowan ké géumah i ségétewe ménakaw. ⁵ I kéluhana kome bati gom dob géfékayae sani dob fangangaturay Tuluse. Enda bati tom dob délémone, sani dob fangangatura Satanase. ⁶ Mélaw katom démoyun féfidongén i de itunga tom loo bé de étew énda ongot-ongoté roy géumah i Kadnane. Fatut démoyun tom mingat brab féfiyoné tom i adat tome brab énda odoro tom i de tete kétayay de lowoh tom. ⁷ Kélungonon i kéfidong i de étew brab kélungonon soy kéolo ruwe. ⁸ Endob i betome do bati dob géfékayae énda fatut odoro tom i de tete kétayay de lowoh tom. I betome do munur, fatut iringé tom i sundalowe, non fatut kégalé tom i kénur tome bé Tuluse brab kégédaw tome bé de dumō tom non been i niy maake futow kémélung bé de kuméng tom. Brab fatut féégété tom i inam tome bé kékufas tome dob de sala tom non been i niy maake futow sayaf téméléb bé de uléw tom. ⁹ Non fénemili i Tuluse betom békén inok kukumé no betom. Yamula fénemilién betom inok fukasé no betom sabaf bé Kadnane Jesu Kristo. ¹⁰ Non i Jesuse gánantino no betom

méléhu inok méuyag tom bati dob beene taman sa taman fiyon fo ké ménléhu tomén taloo no méuyag tom séna dob gaiwe séfule mangéy dini.
11 Mélaw fatut fétaus gom i késéféfiyo gome fédéw brab késétabang gome loo bé rigoné kome béleewe ni.

12 Atin do dumō gey, ongoté key dob begome bé fégadata kom i de gémalbék dob begome, sani de odoro kom fénémili i Kadnane témořo begom. **13** Basana kom bero brab féimu gom bero sabaf bé galbék ruwe dob begome. Atin kagom sétiboh bé de dumō gom munur.

14 Atin do dumō gey, ongoté key dob begome bé béréh gom dob de faukén bé fatut ro gémalbék. Atin fatut fébagér gom i fédéw i de mégilak. Atin fatut tabanga kom i de étew kailanga roy tabange. Atin fatut tingkélo kom i kéluhanay de étew.
15 Féginau gom i de étew bé békén ro sémuli ké wén i réménigo tete dob berowe. Yamula fatut rigo gom fiyo dob de dumō gom munur brab dob kéluhanay de étew sénga tékélid.

16 Atin fatut moror gom sénga tékélid. **17** Brab fatut dasal gom démoyun. **18** Atin fiyon fo ké ati goho kome, fatut fésalamat gom dob Tuluse. Non been i niy kétayay Tuluse rigoné kom sabaf bé kéwaléy gome do dumō Jesu Kristowe.

19 Atin kagom alangén i Rémogor i Tuluse. **20** Atin kagom mika bé urete tidéw dob Tuluse. **21** Téngkad gom i kéluhanane brab tayakuf gom i fiyowe. **22** Atin féravy gom dob kéluhanay teteet.

23 I Tuluse, sani émfétanéke bé de fédéw gom, féwaléyé no damén begom métintu. Atin diyagané no damén i de lowoh gom brab de rémogor gom brab de fédéw gom inok énda i rigoné kom fatut sénditon gom de taman dob gaiwe séfule i Kadna tome Jesu Kristo.
24 I Tuluse, sani ménféwaléye begom do munur, rigoné noy ni non toow fo gésarigon.

25 Do dumō gey, dasala kom so begey.

26 Fatut ségifa gom i kéluhanay de dumō tom munur, brab fégito gom i kégédaw gome bero ké séségifa gom.

27 Atin sabaf bé atura kuwe tidéw dob Kadnane, ongoté ku dob begome bé basa gom i ni sulat dob kéluhanay de dumō tom munur diyaan.

28 Mégédaw damén begom i Kadna tome Jesu Kristo.

Pablo

I Géruwowe Sulat Pablowe dob de Munur bé Kristowe dob Tesalonika

Ay niy sébaane bé de sénulat Pablo, sani ménbantuge muret fantag bé Jesu Kristowe. Been i niy géruwowe sulatén dob de munur do bati dob ingéde Tesalonika. Dob sunguwe sulat Pablowe, téneroén i fantage bé késéfule Jesuse. Endob i de dumo bé de étew diyo, énda gésobuto ro de. Mélaw sénulat Pablowe man i ni sulat inok fégétiga no beroy fantage bé késéfule Jesuse, non bé sungu-sunguwe, gégumah i Ségetéwe Sébanil bé Kristowe. I ni étew, médooy férigo nuwe tete bé de étew énda munur ro bé Kristowe.

Dob ni sulat, fénfiyo Pablowey fédew i de étew do munur diyo inok fédayday ro munur fiyon fo ké mérasay ro sabaf bé kéunur ruwe.

¹ I begeye, Pablo, Silas brab Timoteo, sémulat gey mangéy dob begome do munur bé Kristowe dob ingéde Tesalonika, sani de étew i Abay tome Tulus brab Kadnane Jesu Kristo.

² I Abaye Tulus brab Kadnane Jesu Kristo, mégédaw ro damén begom brab iray ro damén begom i métanéke fédew.

³ Do dumo gey, fatut gey démoyun fésalamat dob Tuluse sabaf bé begome. Non toow fo minut méégét i kéunur gome brab minut fo dakél i késégédaw gome. ⁴ Been i niy funa keye émbéréh bé fiyowe fantag bé begome dob de munur bé Kristowe dob de simbaay Tuluse dob de ségiyo ingéd. Ureté key i fantage bé kéunur gome brab kétingkél gome bé de kékérasay begom brab de mérégén géagéwo kom. ⁵ Dob kéluhanay de ni, giton métintuy kékukum i Tuluse, atin waléy gom toow fo médait féguléwo no. Atin i funa kome mérasay, sabaf bé kékérguléwoy Tuluse begom.

⁶ Endob métintuy Tuluse atin mélaw

férasayé no moso i de étew émférasay begom béléewe ni. ⁷⁻⁸ Atin kédané noy kérasay gome brab de kagey so kérasay. Rigoné noy ni dob gaiwe téfégito moso i Kadnane Jesus ké séfule tidew dob lawayo kémégal mérino aféy, beroy de barakatan do télaki no. Atin bé béno kukumé noy de étew mika ro bé Tuluse brab de énda munur bé Fiyowe Üret fantag bé Kadna tome Jesus. ⁹ Mékukum ro mébinasa taman sa taman. Sésuway ro bé Kadnane brab dob barakat ne réméndaw. ¹⁰ Mérigoy ni dob gaiy késéfule ne inok dayéwéy kéluhanay étew ne brab fégadatay kéluhanay de munur de. Atin géamung gom so dob berowe non ménunur gom bé kéureto keye begom.

¹¹ Been i niy funa keye démoyun démasal mongot dob Tuluse bé féwaléyé no fiyoy de adat gom loo bé fatute rigonéy de étew fénemili i Tuluse. Ongoté key so dob Beene bé tabanga no begom bé barakat ne inok gérígono kom i fiyowe kétaya kom rigonén sabaf bé kéunur gome de. ¹² Mélaw dayéwé kom i Kadna tome Jesus, brab i Beene dayéwé no so begom. Mérigoy ni sabaf bé kégédaw i Tulus tome brab Kadnane Jesu Kristo.

2

I késéfule Jesuse

¹ Do dumo gey, fégétiga key begom i fantage bé késéfule i Kadna tome Jesu Kristo brab kétimu ne betom inok diyo tom dob Beene. Ongoté key dob begome, ² bé kagom magad mégilak taloo no émbuku i de fédew gom amuk wén i gélingoo kom uret bé énggumahén kun i gaiy késéfule i Kadnane. Kagom munur de fiyon fo ké ségetéw kun sénarigoy Tulusey ménbéréhe de taloo no bénréh i ségetéwe kun muret taloo no wén kun i sulat tidew dob begeye fantag bé ni. ³ Mélaw kagom fo fédayaén i de étew fagakara ro begom. Non i gaiwe séfule i Kadnane, énda gégumahén

taman énda médooy de waléy sébanil bé Tuluse brab téfégítøy Tetee Etéw sani tintuwe fo sébanil bé Tuluse, sani mangéye dob emfernowo moso.

⁴ Atin ay niy rigonéy nan étew: Sébanil bé kéluhanay fénagadaféy de étew brab kéluhanay de mékétéfu kun. Atin toow fo téfégérotor dob kéluhanay de ni. Atin mahur so dob lawi i Tuluse brab mésar diyo atin bérhé no been kun i Tuluse.

⁵ Aw énda gétédémo kom i de ni? Bénréh gun i ni dob begome bé do gétah bé kédiyo guwe séna dob begome. ⁶ Endob béleewe ni wén i malang bé ni Tete Etéw, atin gétiga kom i malange de. Endob téfégítøy ni Tete Etéw dob fatute gai. ⁷ Béleewe ni, gémalbékén i barakat i ni Tete Etéw, éndob mébunéy i de rigoné no. Endob i malange de, taus i kéalang ne de taman mékédan. ⁸ Tidéw bénou, i Tetee Etéw téfégito. Endob amuk gégumah i Kadnane Jesus, féléhué noy ni Tete Etéw bé kéiyuf ne de brab binasané no dob barakat i kéréndaw ne. ⁹ Endob amuk gégumah i ni Tete Etéw, wén i barakatén tidéw dob Satanase. Brab gérigono noy kéluhanay de séségiyo-giyo do mékégaif do galbék do énda toowén non békén tidéw dob Tuluse. ¹⁰ Brab rémigo do médooy do gékelasi do tete inok fagakara noy de étew do méléhu. Méléhu ro non énda tényakuf roy toowe kétoro inok méfukas ro dob de sala ro. Yamula ménika ro de. ¹¹ Been i niy funay Tuluse fénfégitungén bero bé békéne katabuwan inok munur ro bé de tugi. ¹² Mélaw i kéluhanay de étew énda munur ro bé toowe kétoro éndob méuyot ro rémigo tete, kukuméy Tuluse bero.

¹³ Do dumoy gey, toow fo mégédaw i Kadnane begom. Fatut démoyun gey fésalamat dob Tuluse sabaf bé begom. Non fénemili i Tuluse begom fukasé no bé sunguwe. Hoo, fénwaléyén begom do métintu do étewén bé barakat i Rémogor ne brab dob kéunur gome bé toowe kétoro. ¹⁴ Atin sénéngkat i Tuluse begom munur dob Beene bé Fiyowe Uret nuret gey begom, inok

kagom soy kéfiyoy Kadna tome Jesu Kristo. ¹⁵ Mélaw do dumoy gey, féégét gom i kéunur gome brab lékafit gom dob de toow ténero gey begom dob de kúret gey brab dob sulat geye.

¹⁶⁻¹⁷ I Kadna tome Jesu Kristo brab Abay tome Tulus fébagéré ro damén begom brab féfiyoné ro damén begom inok démoyun gom gérigo brab gébéréh bé fiyowe. Toow fo mégédaw i Tuluse betom, sani émfébagére bé de fédew gom brab émféégéte bé kégéinam tome bé de kéfiyonon irayén.

3

¹ Atin do dumoy gey, ay niy tam-faday bérhé keye begom. Dasala kom begey inok magad mélégéb i kékéréh i Kadnane brab médooy de étew munur dob Beene brab fégadata ro so ségiléw bé de rénigo gom. ² Dasal gom so dob Tuluse inok énda fédayaé noy de tete étew ferasayé ro begey. Non médooy de étew énda munur ro bé Fiyowe Uret.

³ Endob toow fo gésarig tom bé Kadnane. Fébagéré noy de fédew gom brab diyagané no begom tidéw dob Satanase. ⁴ Atin sabaf bé kéunur geye bé Kadnane, gésarigo key begom. Gétiga key rigoné kom béleewe niy de sénugu gey begom brab taus gom so dob de gétundug do gai moso.

⁵ I Kadnane fanangguité no damén begom inok minut mééégét i kékéimu gome bé Tuluse brab inok fédayaé gom fo toow sabaf bé kétabang Kristowe.

Fatut gémalbék

⁶ Do dumoy gey, sabaf bé atura keye tidéw dob Kadnane Jesu Kristo, sugué key begom féravy dob de faukén do munur, sani de énda modor bé de ténero gey bero. ⁷ Gétiga kom fatut rigo gom i ségiléwe bé rénigo geye. Enda ménfaukén gey amun diyo gey dob begome. ⁸ Atin énda nongot gey saén i kéfaguyag geye. Yamula bénléy gey i de amaé key. Atin ménfégéror gey gémalbék fuweh na kélungonon inok énda kérégénan gom sabaf bé

begeye. ⁹ Rénigo gey i de ni fiyon fo ké wén i kuwagib gey médot bé kékaguyag geye tidéw dob begome. Endob i funa keye énda médot bé kékaguyag geye tidéw dob begome inok iringé kom i fiyowe adat fénggito gey begom.

¹⁰ Atin amun diyo gey séna dob begome, ténero gey begom i ni: "I étewe mika gémalbék énda fatutén féamaén."

¹¹ I funa keye sémulat bé ni non énggelingoo key wén i do faukén begom énda gémalbék ro. Enda kun i saliyu rigoné ro ké békén furaya fédéw roy rigonéy de dumo ro.

¹² Mélaw sabaf bé atura keye tidéw dob Kadnane Jesu Kristo, sugué key dob de faukén étew bé rigoné roy fatute. Fatut gémalbék ro inok gédoté roy kékaguyag ruwe.

¹³ Endob i begome, do dumo gey, kagom lugotén rémigo bé fiyowe.

¹⁴ Amuk wén i dumo gom énda modorén bé kétoro geye dob ni sulat, fégilolo gom. Tidéw béo, kagom séloyuk de inok waléy mémala.

¹⁵ Endob kagom sébanil de, yamula féginau gom loo bé fatute rigoné kom dob de dumo gom munur bé Jesuse.

¹⁶ I Kadnane, sani émfétanéke bé de fédéw tom, toow fo damén fétanéché noy de fédéw gom sénga tékélid fiyon fo ké ati goho kome. Atin diyo damén i Kadnane dob begome kékuanan.

¹⁷⁻¹⁸ Sulaté kuy ni bé kagéne kémér. Ségifaé ku begom. Loo bé niy kékifirmana kuwe bé kéléuhanay de sulat gu. Loo bé niy késulat guwe.

Mégédaw damén begom kéléuhanan i Kadna tome Jesu Kristo.

Pablo

I Sunguwe sulat Pablowe dob Timoteowe

Ay niy sébaane bé de sénulat Pablowe, sani ménbantuge muret fantag bé Jesu Kristowe. Sénulatén dob ségétewe lagéy féndawét Timoteo. I Timoteowe ni, been i dumo Pablowe amun ménagéw mangéy muret fantag bé Kristowe. Ténabanga Timoteowey Pablowe atin beeney maake nga Pablowe.

Sénulat Pablowe ni inok féingaté noy Timoteowe fantag bé de tugién do émbéréh énda kun fakay i mamae bé de dumo amaén. Wén soy de ségiyo tugién kétoro ro.

Dob ni sulat, ténero Pablowe fantage bé fiyowe kékéngintulus, atin téneroén soy fantage bé ati klasiy étewe fatut waléy odoroy de munur.

¹⁻² Timoteo,

Sulata ku beem, sani maake nga gu sabaf bé kéunur me bé Kristowe. I begéne Pablo, sani ségétewe apostol Jesu Kristowe non i Tuluse brab Jesu Kristowe sénugu ro begén muret fantag bé Kristowe, sani mémukase betom dob de sala tom. Atin i Jesuse, Beeney sarigo tome.

I Abaye Tulus brab Kadna tome Jesu Kristo mégédaw ro damén beem, brab méuray damén i na ruwe beem, atin iray ro damén beem i métanéke fédew.

Fantag bé tugiéne kétoro

³ Féginauné ku beem loo bé rénigo guwe bé do gétah amun téngak gu beem bé kéagéw guwe mangéy Masedonia. Kago tékédan dob Efeso, non wén i de étew téromo diyo bé éndae toow. Mélaw méuyotu de ké géléé mo bero. ⁴ Béréhém bero bé békénén féganadé roy de kétutul brab de kélabit bé de médoo do katufuan funa ro démoyun séédél. I de ni do éntingayén énda fégésobuté ro betom i bantak i Tuluse non i tintuwe aguwon, been i kéunure bé Kristowe. ⁵ I funa kuwe

sémugu bé ni inok ségédaw ro sabaf bé kétakak ruwe bé de sala ro brab sabaf bé fiyoy fédew ruwe brab sabaf bé tintuwe fo kéunur ro. ⁶ Endob wén i de étew diyo bénaleng roy de ni inok témantu ro séédél bé éndae lantékén. ⁷ Méuyot ro téromo bé kitabe tidew dob Moisese. Endob fiyon i karowe kékéréh, énda gésobuto ro de taloo no de kétoro ro do fégésé ro dob de ségiyo étew.

⁸ Endob i betowe, gétiga to fiyoy kitabe tidew dob Moisese amuk fiyoy késare de. ⁹ Gétiga to, i kitabe békén rénigo inok kay de fiyo do étew. Yamula rénigoy kitabe inok wén i gémélé bé de tete étew, brab i de étew do ménala, brab de énda méngintulus, brab de étew énda fégadata roy Tuluse, brab de méméléhu bé de lukés ro brab de méméléhu do étew, ¹⁰ brab de étew sétayan bé de békén do bawag ro, brab de bakla, brab de miyag, brab de témuji, brab de témo bé éndae toow, brab de étew félisé roy towe kétoro.

¹¹ Atin i ni toow kétoro, tidew dob Fiyowe Uret i ménbantuge barakatan Tulus, sani Fiyowe Uret sénarig dob begéne inok légébé ku.

¹² Fésalamatu fo dob Kadna tome Jesu Kristo, sani émfébagére begén inok gérigono kuy ni galbék. Fésalamatu dob Beene non kénarangén begén mésarigon funa no fénémilién begén inok waléyu sugu-sugué no.

¹³ Fénémilién begén fiyon fo ké bé do gétah ménbéréhu fo tete fantag bé Beene, brab fénrasay gu, brab fénéngiras gu. Endob i Tuluse toow fo ménuray i na nuwe begén non énda séna ménunuru, mélaw énda gétiga kuy fatute rigoné ku bé béo. ¹⁴ Atin i Kadna tome toow fo méngédaw begén brab fénunurén begén brab méngédaw begén non been i de niy rigoné nuwe dob de étew do dumo Jesu Kristowe.

¹⁵ Wén i toowe kékéréh, fatut tayakuf gom brab unuro kom mano, “I Jesu Kristowe ménangéy dob duniyae ni inok fukasé noy de ménala do étew inok énda mékukum ro.” Atin begéney toowe fo tete bero

kéluhanan. ¹⁶ Endob been i niy funay Tuluse ménuray i na nuwe begén, inok giton i kédakél i ketingkél Jesu Kristowe bé kégédaw ne begén sani toowe fo tete étew. Mélaw i kéléhanay de étew munur dob Beene moso, sani de gégédot bé umule magufusa, gétiga ro toow fo mégédaw i Kristowe. ¹⁷ I tintuwe Tulus, sani éndae giton, brab sani méguléwe bé kéléhanane, brab sani énda i féganayay kéuyag ne taloo no tamana no, médayéw damén brab basanan taman sa taman. Amen!

¹⁸ Timoteo, beemey maake nga gu, sugué ku beem béléewe, loo bé kékérhé bénréh i sénarigoy Tuluse fantag bé beeme bé do gétah.

Odor go bé de ni do kékérhé inok gétabana moy de békén toow kétoro loo bé ségétéwe sundalo tabana noy dumo nuwe sébanil. ¹⁹ Féégétém i kénur me brab odoro moy fatute. Non wén i do étew énda rigoné roy gétiga ruwe fatut, funay kénur ruwe mébinasa. ²⁰ I de dumo bero, been i ro Himeneowe brab Alejandrowe. Endob téngak gu bero brab kénukum gu bero bé kéray guwe bero dob Satanase inok gétiga ro énda fakay ro émbéréh tete fantag bé Tuluse.

2

¹ I toowe fo sungu ongoté ku dob beeme, fatut dasala kom i kéléhanay étew. Fégédaw-gédaw gom ongot dob Tuluse atin fésalamat gom dob Beene bé kéléhanay de rigoné no dob begome. ² Fatut dasala kom i de datu brab kéléhanay de méguléw inok métanék i kékati tome atin énda i sétiboh bé lala tome rémigo bé fiyowe loo bé kétayay Tuluse. ³ I funa kuwe mongot bé ni non fiyoy démasale. Been i niy funay Tuluse, sani mémukase betom, mésuwat. ⁴ I Tuluse méuyot de ké méfukas i kéléhanay de étew inok énda mékukum ro. Brab méuyot so ké gétiga roy toowe kétoro. ⁵ Non sébaan saén i Tuluse brab sébaan saén i kékédeway Tuluse brab kékawane, Been i étewé Jesu Kristo. ⁶ Non i Jesuse, nirayén

i férénawa nuwe inok mékédan i kékukume bé kéléhanay étew. Mélaw dob fatute gai, fénggito noy kéuyot i Tuluse mémukas bé kéléhanay étew inok énda mékukum ro. ⁷ Atin been i niy funa nuwe ménémili begén inok waléy apostol, atin sénuguén begén mangéy dob de békén Judio inok toroé ku bero inok munur ro bé toowe kétoro. Tintu fo bérhé kuy toowe, énda fo témugiu.

⁸ Dob séngae gonon, méuyotu ké démasal i de lagéy. I de lagéy démasal, fatut fiyoy de adat ro. I de kémér ro tungkulén bé lala ruwe démasal, békén fatut fégérigo sala. Atin i de ni lagéy, békén ro fatut mékérít bé de dumo ro taloo no séédél ro. ⁹ Atin méuyotu de so ké kémégal i de libun bé fatute kékégal. Enda fatut ro miring bé de libun énda mémala ro. Fatut ro météméd. Mélaw énda fatut fékélébuwané roy émféfiyowe bé de buk ro bé de séségiyo-giyo kékutus taloo no de kékégono bé de bélodon do ono look perlas, taloo no de kékégal bé de balilaga do kékégal. ¹⁰ Yamula i funa ruwe médayéw non fiyoy de rigoné ro loo bé fatute rigonéy libune méngintulus. ¹¹ Atin i de libun fatut mantés ro brab térfantad ro ké gai kékéganad. ¹² Enda tungkasé kuy de libun téromo taloo no sugué roy de lagéy. Fatut mégélingo ro saén. ¹³ Non Adam i lénimbage sungu, tidéw béo Eba. ¹⁴ Atin békén Adam i féngakara Satanase. Yamula, Eba i féngakara Satanase inok géféliso noy sugu i Tuluse. ¹⁵ Endob i de libun, tabangé no bero ké mégéngá ro, amuk fédiday ro munur, brab mégédaw ro, brab térfantad ro, brab rémigo ro fiyo.

3

Fantag bé de odoron

¹ Toow i ni kékérhé mano, “Amuk méuyot i ségétéwe waléy odoroy de munur, toow fo fiyo, non tintu fo fiyoy nan galbék kétaya no.” ² I ségétéwe odoroy de munur fatut ségétéw lagéy énda i salaén funan de témo. Atin fatut ségétéw saén

i bawag ne. Atin fatut mééntang i kékégitung ne. Atin fatut énda odoro noy de tete kétayay lowoh ne. Atin fatut fo métintu, brab tayakufé noy de étew dob lawi ne fiyon fo ké énda gélolo no bero. Atin fatut gétiga noy témoree. ³ I odoroy de munur énda fatutén molon bé arake taloo no méuyot sétiboh. Yamula fatut métanék i adat ne brab mika sétiboh. Atin énda fatutén ké toow fo méuyot bé kurtae. ⁴ I étewe odoroy de munur, fatut fiyoy kékéguléw ne bé bawag ne brab de ngaén. I de ngaén fatut odoro roy de suguéen brab fatut fégadatay ro démoyun. ⁵ Non amuk énda gétiga noy méguléwe bé kaane kuréngon, énda so gétiga noy méguléwe bé de munur bé Tuluse. ⁶ Atin i étewe mantu séna ménwaléy munur bé Kristowe, békén fatut waléy odoroy de munur. Non amuk mérigoi ni, waléy félangklangka atin mélaw mélukum ségiléw bé Satanase. ⁷ Atin i étewe waléy odoroy de munur, fatut ségétew fégadatay de békén munur inok énda génoé ro de. Mélaw énda gégégakara Satanase de funa no gésala.

⁸ Atin fantag man bé de témbang bé simbaane, sani de fédawétén do “dikon”, fatut so fiyoy de adat ro brab do métintu ro do étew. Enda fatut ro molon bé arake taloo no arumén ro. ⁹ Atin fatut méégét i kéunur ruwe bé toowe kétoro, brab énda fatut ruwo-ruwoy de fédew ro. ¹⁰ Amuk wén i ségétew méuyot waléy témbang dob simbaane, fatut téngkadén na métah. Brab amuk énda i funan de témbé, fakay waléy “dikon”. ¹¹ Atin i bawag i dikone, fatut fiyoy adat ne. Enda fatutén gémoéno bé étewe. Fatut mééntang i kékégitung ne. Atin fatut fo mésarigon. ¹² Atin i témbange, fatut ségétew saén i bawag ne. Atin fatut fiyoy kékéguléw ne bé bawag ne brab de ngaén. ¹³ Atin i de témbang do gémoénbék fiyo, fégadatay de munur bero. Atin géfébaraw ro muret fantag bé kéunur ruwe bé Jesu Kristowe.

¹⁴ Ilala guwe ni sémulat dob beeme,

wén i inam gu mangéy séko témukaw beem. ¹⁵ Endob amuk wén i malang begén, fégétigay ni sulat dob beemey fatute adat tom do étew i Tuluse. Betomey simbaay méuyage Tulus. Betomey maake do liléy brab sérinan, brab i toowe kétoro féndiyoén dob betome. ¹⁶ Tintu fo gétiga tom i ni: Toow fo fiyoy kétoro i katome kékéngintulus fénggitoy Tuluse betom. Non been i ni: I Kristowe ménwaléy kéilawan. Brab i Rémogor i Tuluse fénggitoy noy Kristowe métintu. Atin énggitoy de téaki. Atin wén i do ménuret fantag bé Kristowe dob de békén Judio. Atin médooy de étew dob duniyae ni ménunur de. Atin déméniyat mangéy dob lawayo.

4

Fantag bé Amaén

¹ Ménkéntay i kékéréh i Rémogor i Tuluse bé wén moso i do étew témérén munur bé toowe, brab waléy ro munur bé de tugién do rémogor brab de kétoro i de saitan. ² I de ni do kétoro tidew dob de témugi étew do ubo-ubo ro saén munur bé Kristowe. Enda tete i de fédew ro ké rémigo ro tete non éndaén gétiga roy fatute. ³ I de ni do étew toroé roy énda kun fakay i mawage brab énda kun fakay i mamae bé de dumo anaén. Endob sedek lénimbag i Tulusey de amaén? I funay Tuluse léménimbag bé de amaén inok i betom do gétigan brab munur bé toowe kétoro mama tom de. Mélaw fakay tom mama bé de ni amaén amuk gilid tom démasal fésalamat dob Tuluse. ⁴ Fiyoy kéluhanay de étingayén lénimbag i Tuluse. I kéluhanay de séségiyo-giyo do amaén fatut amaén tom amuk gilid tom démasal fésalamat dob Tuluse. Enda fatut ikaa tom i lénimbag i Tuluse. ⁵ Gétiga tom féfiyonéy Tulusey de amaé tom non bé kíféfalamat tome de, atin non been i niy kétoro i kékéréh i Tuluse de.

⁶ Toow go fiyo sugu-sugué Jesu Kristowe amuk toroé moy de ni dob de dumo mo munur bé Kristowe.

Atin taus go minut waléy fiyo suguén bé kéféganad me bé Fiyowe Uret brab toowe kétoro nunuro mo. ⁷ Endob kago fégélingoén i de tutul énda médaitén uretén. Mika i Tuluse bé de ni non békén toow. Yamula fébagérém i kéunur me bé toowe kétoro inok rigoné moy kétayay Tuluse. ⁸⁻⁹ Wén i toowe kékéréh, fatut unuroy de étew mano, "Fiyo ké fébagéré moy lowoh me. Endob toow na fiyo ké fébagéré moy kéunur me, non wén i lagaén dob de gai béléewe ni brab dob de gégumah do gai dob lawayo moso." ¹⁰ Been i niy funa tome mégéror gémalbék, non sémarig tom bé méuyage Tulus, sani mémukase bé kéluhanay de étew, brab tintuwe mémukas bé de étew munur dob Beene.

¹¹ Mélaw toroém i de ni brab suguém dob de étew. ¹² Atin kago fidayaén i de étew énda fégadata ro beem non ménguwéd go séna. Yamula féfiyo moy kékéréh me brab adat me brab kégédaw me brab kéunur me brab kérigo muwe bé lowoh me, inok i de munur bé Kristowe iringé ro beem. ¹³ Atin tantu go basa bé Ménsulate Kékéréh i Tuluse dob adafay de étew taman gégumahu diyaan. Atin toroém bero brab ureto mo bero. ¹⁴ Atin kago lifotén i kífurunge niray i Tuluse beem amun ménbéréh i de sénarigoy Tuluse muret atin ténegéy de odoroy de munur i bumbuna muwe. ¹⁵ Tantu mo rigoy de ni inok i kéluhanay de étew gito ro minut métintuy adat me rémigo bé kétayay Tuluse. ¹⁶ Ingata moy de rigoné mo brab de toroé mo. Non amuk taus go rémigo bé de ni, mémukas go bé de salaém brab mémukas soy de gégélingo beem.

5

¹ Kago ugarén i de lukésén lagéy. Yamula féginau mo bero maak do bohém. Atin féginau moy de kénogo lagéy maak do dumo mo sétiman idéng. ² Atin i de lukés do libun, féginau mo bero maak do idéngém. Atin dob de kénogon, féginau mo bero

maak do dumo mo sétiman, idéng, kago dufangén bero.

³ Atin i de baléw énda i samung ro magifat bero, fégadata mo bero brab tabanga mo bero. ⁴ Endob amuk wén i do nga i de baléw taloo no do bebe ro, fatut do nga ro brab do bebe roy magifate bero inok baliwana roy kégafat i de lukés ro bero brab de bebe ro. Non been i niy kétayay Tuluse rigoné ro, sani kégédawé bé de lukés, tidéw béo bé de ségiyo étew. ⁵ Endob amuk énda i samung i baléwe magifat de, sémarig dob Tuluse atin démasal fuweh na kélunganon mongot tabang dob Tuluse. ⁶ Endob i baléwe rigoné noy tetee kétaya no, maak ménléhuén fiyon fo ké méuyag séna. ⁷ Toroém beroy de ni bénréh gu inok énda i gétébo bero. ⁸ Endob amuk wén i ségétew munur atin énda fagifaté noy de samungén brab énda fo fétintuné noy kégafat ne bé de dumo no sétifon lawi, tétagakén i kéunur ne brab ménwaléy toow na fo tete bé ségétewé énda munur bé Kristowe.

⁹ Kago listanén i baléwe dob listanay de baléw fatut tabangan amuk énda séna labi no ném folo gébélantuwa. Atin békén saén i ni, fatut so éndaén mawagén man. ¹⁰ Brab fatut toow fo gétigay de étew fiyoy adat ne loo bé fiyowe kégafatén bé de ngaén, brab tanggafé noy de kana dob lawi ne, brab urahé noy sékéy i de dumo no munur, brab tabanga noy de étew kérasayan, brab rigoné noy fiyowe sénga tékélid.

¹¹ Endob kago listanén i de baléw do ménguwéd séna. Non amuk méuyot ro man mawag sabaf bé kétayay de lowoh ro, gétagaka roy galbék Kristowe. ¹² Atin amuk rigoné roy ni, énda gétumana roy sunguwe fasad ro bé Kristowe. ¹³ Atin saliyu na bé ni, waléy ro faukén brab démoyun ro saén sugud-sugud. Atin umana ro nay tetee bé kégéno ruwe bé de étew bé éndae fatut bérhé ro, brab furaya fédew ro. ¹⁴ Mélaw dob kagéne de kégéitung, fiyo ké mawag man ségule

i de ménguwéd do baléw brab mégénaga ro, brab fagifaté roy de dumō ro sétifon lawi inok i de étew sébanil betom énda i gébérého ro tete fantag bé betome. ¹⁵ Non i de dumō do baléw ménbaleng i de fédew ro atin béléewe ménwaléy ro do kuyug Satanas.

¹⁶ Amuk wén i libun munur bé Kristowe brab wén i do baléw do samungén, fatut fagifaté no. Fatut tabanga no bero inok énda kérégénan i de munur magifat bero. Mélaw i de munur gégafifata roy de baléw énda i do samung ro magifat bero.

¹⁷ I de odoroy de munur, amuk toow fo fiyoy galbék ruwe, médait ro sémahud ruwo takéf, labi na foy de mégéror muret brab témore béréh i Tuluse. ¹⁸ Non wén i Ménsulate Kébéréh i Tuluse mano, "Kago ikétén i ba i safie amuk sad-sadé noy faréye inok mérek." Non fatut mama i safie mérek béréh i Tuluse mano, "I gémalbéké, fatut gédoté noy sahud ne."

¹⁹ Atin kago fégélingoén i kétéboe béréh ségétéwe odoron taman énda i ruwo gétew taloo no télew gétew émféféngintoow de. ²⁰ Atin géléém dob adafay de munur i ségétéwe odoron énda témeréno rémigo tete inok mágilak i de dumō de.

²¹ I Tuluse brab Jesu Kristowe brab de télikiy Tuluse, fiyon fo ké énda gito tom bero béri, téngténgé ro betom béléewe ni. Mélaw sugué ku beem béréh odoro moy de ni ténorogu beem. Brab kago wén i isu ramigo mo béréh de étew. Yamula ségiléw-giléw i kérigo muwe béréh kéluhanay de étew. ²² Atin kago magad mémili do étew inok waléy ro odoroy de munur. Non amuk mésala ro, beem soy mésénditon de. Fatut énda i gétébo beem.

²³ Atin kago miném saén wayég. Fatut miném go so kloh arak fégéuwa béréh sur me, non démoyun go démérue.

²⁴ Wén i do étew magad fo giton i de sala ro, mélaw magad ro so mécukum. Endob wén soy do étew mécuney i de sala ro atin énda gito no taman wén i

sému de. ²⁵ Atin ségiléw so béréh, wén i do étew toow fo magad giton i de fiyo rigoné ro. Endob wén soy do étew énda fo magad giton i de fiyo rigoné ro, éndob giton so moso.

6

¹ I de munur do rifén, fatut toow fo fégadata roy de amu ro sénga tékélid, inok énda i gébéréh tete fantag béréh Tuluse taloo no fantag béréh kétoro tome. ² Atin i de munur do rifén, amuk munur soy de amu ro, énda fatut ro mérarék béréh de amu ro, non falan so bero do munur brab maak sétiman ro idéng. Yamula fatut umana roy kégéror ruwe gémalbék non i de tabangé ro, falan so bero do gulaané ro dumō ro munur.

Fatut toroém beroy de ni brab férido mo bero. ³ Amuk wén i étew témore béréh ségiyowe kétoro brab énda magayu no béréh toowe kéluhanay i Kadna tome Jesu Kristo brab mika béréh toowe kétoro fantag béréh kétayay Tuluse, ⁴ toow fo félangka-langka i nan étew brab énda i gétiga no. Wén i tete kétaya no séédél brab méngras, brab mantém fiyon fo ké énda i funa no, ⁵ brab méuyot fo séédél béréh de dumō étew tete i de kékéfítung ro brab de étew do éndaén munur ro béréh toowe kétoro. I de ni do étew marok waléy ro kawasa béréh kékéfítulus ruwe.

⁶ Endob i toowe, i de tintu do méngras maak do kawasa amuk fiyo ronén béréh kéluhanay éntingayéne karo, énda mingar ro béréh ségiyowe. ⁷ Non béréh kéluhanay témoine, énda i nuwit tom. Brab amuk méléhu tom, énda soy uwité tom. ⁸ Mélaw, amuk wén i amaé tom brab kégal tom, fatut fiyo tom den. ⁹ Endob i de étew toow fo méuyot waléy kawasa, magad ro fo métukawan mésala béréh de tete brab do dufang kétaya ro, funa ro mécuban brab méléhu. ¹⁰ Non i kétayane béréh kurtaey funay étewé rémigo béréh kéluhanay kélasiy tete. Wén i do étew toow fo méuyot ro béréh kurtaey, funa ro témeréne munur béréh Kristowe brab funa ro toow fo tete i de fédew ro.

¹¹ Endob i beeme, Timoteo, ségétéw go sugu-suguéy Tuluse. Mélaw férayu

go dob de ni do adat. Brab télama mo rigoy métintuwe brab kétayay Tuluse. Atin féégétém i kéunur me, brab fégédaw go bé de dumo mo, brab tingkél go, brab fétanékém i adat me. ¹² Atin fégéror go rigo bé fatute sabaf bé kéunur me, loo bé ségétéwe toow fo méraan léméntu sékuya. Atin dotém i umule magufusa. Non i funay Tuluse beem ménémili waléy munur inok gédoté moy umule magufusa. Atin énggédotém i umule magufusa non fénayagém i Kristowe dob adafay médoowe étew. ¹³ I Tuluse, sani muyage bé kéluhanay éntingayéne, brab Jesu Kristowe, sani ménbérhéhe bé toowe dob adafa Ponsio Pilatowe téngténgé ro betom béeleewe ni. Mélaw sugué ku beem bé ¹⁴ tintu mo fo odoron i de sénugu gu beem brab rigo mo inok énda i gétébo beem. Rigo moy ni taman dob késéfule i Kadna tome Jesu Kristo. ¹⁵ Féséfuleéy Tulusey Jesuse dob fatute gai. Atin i Tuluse, Beeney barakatane méguléw bé kéluhanane, brab Beeney odoroy de odoron brab Kadnay de datu. ¹⁶ Been say méuyage tidéw féganay brab méuyag so taman sa taman. Brab bati dob géfékayae énda i géfégédét de. Enda i ségétew énggégito de taloo no wén i gérito de. Médayéw damén i Tuluse brab méguléw damén taman sa taman. Amen.

¹⁷ Atin i de kawasa do munur, bérhéhém bero bé békén ro félangka-langka brab békén ro sémarig bé de kurta ro taloo no de éntingayén do karo, non magad so mécédan. Yamula fatut sémarig ro bé Tuluse, sani témantuwe mirayan betom bé kéluhanay éntingayéne inok fiyoy goho tome. ¹⁸ Toroém i de kawasa rémigo fiyo, inok maak kawasa ro bé fiyowe rigoné ro. Fatut ro mégédaw brab fatut miray ro tabang dob de ségiyo atin fatut tukidé roy de languntama ro. ¹⁹ Amuk rigoné roy ni, wén i gédoté ro tidéw dob Tuluse dob de gai géumah moso funa ro tintu kawasa, brab énda mécédan no taman sa taman. Atin gédoté roy tintuwe umul

magufusa.

²⁰ Timoteo, kago tagakén i toowe kétoro sénarig dob beeme. Kago fégélingoén i de késéuret-uret ikaay Tuluse. Atin féravy go dob de du-fang kégégitung i de étew fédawété ro “Kégétigan.” ²¹ Non wén i do étew émbéréh wén kun i kégétiga ro. Endob been i niy funa ruwe téménrén munur.

Mégédaw damén i Tuluse begom.

Pablo

I Géruwowe Sulat Pablowe dob Timoteowe

Ay niy sébaane bé de sénulat Pablo, sani ménbantuge muret fantag bé Jesu Kristowe. Been i niy géruwowe sulat Pablowe dob Timoteowe, sani téménabangane de lémégéb bé Fiyowe Uret. Amun sénulat Pablowej ni, ménférissunén sabaf bé kéuret ne fantag bé Kristowe. Gétiga no éndaén mérugayén taman féléhuénén. Mélaw sénulatén i ni sulat dob Timoteowe inok sarigé noy galbék ne dob beene, atin inok fébagéré noy fédew Timoteowe inok énda témérén no témodo bé toowe fantag bé Jesu Kristowe.

¹⁻² Timoteo,

Sulata ku beem maak ségétew nga gu gulaané ku. I begéne Pablo ségétew apostol Jesu Kristowe non been i niy kétayay Tuluse. Sénuguén begén inok ureté kuy fantage bé mantuwe umul fénasadén betom, sani umule magufusa énggédot tom sabaf bé kéunur tome bé Jesu Kristowe. I Abaye Tulus brab Kadna tome Jesu Kristo mégédaw ro damén beem brab méuray damén i na ruwe beem brab iray ro damén beem i métanéke fédew.

³ Begén i ségétewe sugu-suguéy Tuluse brab fiyyo fédew guwe bé kérigo guwe bé galbék i Tuluse loo bé rénigoy de katufua ku. Atin fuweh na kélungonon fésalamatu dob Tuluse démasal ongoté ku dob Beene bé tabanga no beem. ⁴ Toowu fo mégundoy beem. Atin gétédémo kuy kékérew me amun tétagak gu beem. Méuyotu géségit man beem inok mororu fo man. ⁵ Gétédémo kuy tintuwe kéunurém, ségiléw bé kéunur i bebe me Loida brab idéng me Eunis. Gétiga kuy méégét soy kaame kéunur. ⁶ Atin sabaf bé ni, fefégétédém gu beem bé fatut fébagéré i kéfurunge niray i Tuluse beem amun ténegé ku beem. ⁷ Non i Tuluse énda nirayén betom i Rémogor ne inok talaw tom.

Yamula nirayén betom i Rémogor ne inok émbaraw tom brab inok ségédaw tom brab inok gérigono tom i fatute.

⁸ Mélaw kago mémala muret fantag bé Kadna tome, brab kago mémala fantag bé begéne sani ménférissu sabaf bé kéunur guwe dob Beene. Yamula amung go bé kérasay guwe sabaf bé Fiyowe Uret. Gérigono moy ni non fébagéréy Tuluse beem. ⁹ I Tuluse fénukasén betom dob de sala tom, brab fénemilién betom waléy do étewén. Rénigo noy ni békén sabaf bé fiyowe rénigo tom. Yamula fénukasén betom sabaf bé kaane funan brab sabaf bé kégédaw ne betom bé énda séna ménlimbag i duniyae de. Atin i kégédaw ne betom fénagéwén dob Jesu Kristowe. ¹⁰ Atin béléewe ni fénggito noy kégédaw ne bé kégumah Jesu Kristowe sani mémukase betom dob de sala tom. Atin i Jesuse kenda noy barakat i kéléhue brab fénggétiga no betom i umule magufusa fénagéw dob Fiyowe Uret.

¹¹ Atin i Tuluse fénemilién begén waléy apostol inok ureté ku brab toroé kuy ni Fiyo Uret. ¹² Been i niy funa kuwe mérasay béléewe ni. Endob énda mékédan i késarig guwe, non toow fo gétiga kuy Tuluse unuro ku brab gétiga ku diyagané no begén taman gégumah i gaiwe séfule i Kadnane inok gérigono kuy galbéké sénarigén dob begéne. ¹³ Fédaydayém i kéodoro muwe bé de toow kékérén ténero gu beem. Atin fédayday go unur bé Tuluse brab fégédaw go bé de dumo mo. Gérigono moy ni non begom i de dumo Kristowe. ¹⁴ Bantaya moy toowe kétoro sénarig dob beeme. Gérigono moy ni sabaf bé barakat i Rémogor i Tuluse batí dob betome.

¹⁵ Gétiga moy kétak i kéluhanay de dumo gu munur begén dob Asia, fiyon i ro Figelowe brab Hermogenese. ¹⁶ Endob féfiyonéy Tuluse damén i Onesiforowe brab de samungén. Non médo fo gule fénoror ro begén. Enda mémala ro fantag begén ségétewu férissu. ¹⁷ Yamula, amun énggumah i Onesiforowe dob

Roma, fénagayasén begén sénlé dé taman énggito no begén. ¹⁸ Toow fo gétiga moy kétabanga nuwe begén dob ingéde Efeso. Mélaw mégédaw damén i Kadnane de dob késéfule ne moso mangéy kémukum.

2

¹ Atin i beeme Timoteo, maak ségettew go nga gu, fébagérém i kéunur me. Gérigono moy ni sabaf bé kégédaw i Tuluse betom do dumo Jesu Kristowe. ² Enggelingoo moy de kétoro gu nuret gu dob de médo do étew. Mélaw i beeme, fatut toroém soy de étew gésarigo mo inok géto ro so dob de ségiyo.

³ Fatut amung go bé kérasay guwe sabaf bé kéunur guwe, inok waléy go so sugu-sugué Jesu Kristowe mérasay ségiléw bé fiyowe sundalo. ⁴ I sundalowe énda furaya fédewén i de rigonén békén kay sundalowe. Yamula rigoné noy funay odoro nuwe mésuwat. ⁵ Atin i sugu-sugué Tuluse ségiléw bé ségettew sékuya léméntu. Enda gétaba no saliyu ké odoro noy de sugu bé késékuya. ⁶ Atin i sugu-sugué Tuluse ségiléw so bé ségettew mégéror gémalbék dob fantade. Fatut been i sunguwe gégedot bé kíntew ne. ⁷ Fétuntayém i de ni do sénulat gu, non i Kadnane fefégésobutén beem i kéluhanay de ni.

⁸ Fégettédémém i Jesu Kristowe, sani séfu Datu Dabide. Ménléhuén, éndob méntebule. Been i niy Fiyowe ni Uret toroé ku, ⁹ funa ku mérasay béléewe ni, nikétu bé sangkalie maak ségettew ménénakaw. Endob i kékéréh i Tuluse énda ménikétén! ¹⁰ Been i niy funa kuwe ni fédayday témingkél bé kéluhanay de kérasay, inok gétabanga kuy de étew fénémili i Tuluse, inok méfukas ro so bé de sala ro sabaf bé kéunur ruwe bé Jesu Kristowe brab inok toow fo fiyoy goho ruwe beroy Tuluse taman sa taman. ¹¹ Wén i toowe kékéréh mano, “Amuk séréngan tom de méléhu bé kégantino Jesuse betom, séréngan tom de so méuyag taman sa taman.

¹² Atin amuk témingkél tom bé de kékérasay betom, gégumah so moso i gaiwe méguléw tom séréngan bé Jesuse. Endob amuk dirungé tom i Jesuse bé békén tom do kuyugén, dirungé no so betom. ¹³ Atin fiyon fo ké énda géfédéday tom rémigo bé kétaya Jesuse, fidayday so fo rémigo bé ati bénréh ne rigoné no dob betome. Non énda fakayén ké énda tumané noy kékéréh ne.”

¹⁴ Fefégétédémém bé de munur diyaan i fantage bé de ni. Suguém bero dob adafay Tuluse bé békén ro séédél fantag bé atag i kékéréh saén. Non énda gédotén i kífyonone bé késéédéle loo bé ni, yamula mébinasa saén i kéunur i de mégélingo de. ¹⁵ Rigo moy kéluhanay gérigono muwe inok mésuwat i Tuluse bé galbék me. Mélaw énda i funa mo mémala brab katabuwan i kétoro me bé toow i kékéréh i Tuluse. ¹⁶ Férayu go dob de énda do lantékén késéuret-uret ikaay Tuluse, non i de étew rémigo bé ni minut ro mérayu dob Tuluse. ¹⁷ I kétoro i de énda méngintulus, ségiléw bé de toow fo mékébinasa kélain magad fo témunoh dob lowohe. Ro Himeneo brab Fileto i ruwowe gétew dumoy de ni téromo. ¹⁸ Ténagak roy toowe aguwon brab béninasa roy kéunur i de dumo bé de munur. Non bénréh roy énggilidén kun i kétébule tome. ¹⁹ Endob i toowe kétoro i Tuluse ségiléw bé toowe fo dakél batéw non énda émfaring. Non wén i Ménsulate Kékéréh i Tuluse mano, “I Kadnane, gétiga noy ati kaane do étew.” Brab wén soy ségiyowe Ménsulat Kékéréh i Tuluse mano, “I étewe émbéréh bé been i étew i Kadnane, fatut tagaké noy de tete rigoné no.”

²⁰ Dob dakéle lawi, wén i do séségiyo-ségiyo do biléw brab do limfung diyo. I de dumo de do bélowan brab do filak. Atin i de dumo de do kayéw rénigo do biléw brab i de dumo de métégas fantad rénigo do biléw. Mélaw i gefee de, usaré noy de balilaga de amuk wén i do gérotor kana no. Atin i de dumo de usaré ro

sénga fuweh. ²¹ Ségiléw soy de ni bé étewe. Amuk toow fo malinis i fédew i ségétéwe étew bé kétagak ne bé de tete adatén, maak do bélowan tamuk i Tuluse usaré no dob fiyowe galbék, non médait usaréy Tuluse dob fiyowe galbék. ²² Mélaw, férayu go dob de tete kétayay lowoh i ménguwéde étew. Atin télama mo rigoy métintuve, brab fébagérém i kéunur me, brab fégédaw go démoyun, brab fétanékém i de fédew i de dumo mo inok énda i sétiboh. Non been i niy adat i de fiyo étew démasal dob Kadnane mongot tabang. ²³ Atin férayu go dob de dufang késéedél énda i lantékén. Non been i niy funay de étew gésékérít. ²⁴ Enda fatut séédél i sugu-suguéy Kadnane. Yamula fatut mégédaw bé kéluhanane. Brab fatut fiyo brab témingkél bé kétoro ne. ²⁵ Enda fatutén mémérit, yamula fatut féfiyoné noy kétoro ne bé de sébanil de, inok fégalinéy Tuluse keeyén i de fédew ro atin gésobuto ro mélaw i toowe. ²⁶ Tidéw bénou, mééntang i de kégéitung ro brab géféraréy ro tidéw dob Satanase, sani kéménéfoe bero inok fégésé no bero modor bé kétaya nuwe.

3

¹ Fégétédémém i ni. Dob tamfaday de gai, toow fo moso mérégén. ² I de étew moso, do méitung brab arumén, brab do toow fo félangka-langka, brab do tete i de kégébaa ro, brab énda odoro roy de sugu i de lukés ro, brab do énda fésalamat ro, brab do mika ro modor bé de sugu i Tuluse. ³ Atin énda fo mégédaw ro, brab énda méuray i na ruwe bé dumo ruwe, brab do émbagér gémo fégébinasa ro bé dumo ruwe, brab do magad sétiboh brab mémérit, brab mika ro bé fiyowe. ⁴ Békén saén i de ni, do tugién ro fo, brab énda fégitungé roy de tete rigoné ro, brab do félangka-langka ro fo, brab énda méimu ro bé Tuluse éndob rigoné ro saén i de kétayay de karolowoh. ⁵ Atin ubo-ubo féngadafé roy Tuluse, éndob énda munur ro bé barakat ne. Férayu go dob de ni do étew. ⁶ I de dumo bero,

mahur ro dob de lawi inok toroé ro brab féguléwo roy de libun énda émbagér i de fédew ro brab mégilak ro sabaf bé de sala ro, atin médooy foy de tete kétaya ro. ⁷ Been i de niy de libun toow fo télamané ro féganadén i toowe éndob énda fo gésobuto ro de. ⁸ Ségiléw so bé késébanil ro Janese brab Jambrese bé Moisesey késébanil i de ni do lagéy bé toowe kétoro. Enda foy lanték i de kégéitung ro brab békén toow i kéunur ruwe. ⁹ Endob énda mégilit i de rigoné ro, non gitoy kéluhanay de étew i kédufang ruwe, ségiléw bé kégitoj de étew bé kédufang ro Janese bero Jambrese.

¹⁰ Endob i beeme Timoteo, gétiga moy kétoro guwe brab adat guwe brab funa kuwe gémalbék. Atin énggitoy moy kéunur guwe brab ketingkél guwe brab kégédaw guwe brab kégédayday guwe fiyon fo kégai mérégén. ¹¹ Atin énggitoy moy kégérasaye begén. Brab énggétiga moy ménrigowe dob begéne dob Antioquia, brab dob Ikonium, brab dob Listra. Toow fo gétimal i kégérasaye begén dob de ni do ingéd. Endob télabangay Tuluse begén dob kéluhanay de ni inok énda mébinasawu. ¹² Atin béréhé ku beem i toowe, i kéluhanay de étew méuyot modor bé kétayay Tuluse sabaf bé kéunur ruwe bé Jesu Kristowe, toow ro fo férerasayén kéluhanan. ¹³ Endob i de tete étew brab ubo-ubo saén i de kéunur ro, toow fo minut ro tete. Géfagakara roy de ségiyo étew bé de kétugié ro brab fagakara ro soy karowe lowoh. ¹⁴ Endob i beeme, fétausém i kéunur me bé toowe ténoréen beem brab nunuro mo. Non gétiga moy de ténoréen beem. ¹⁵ Brab gétédémo mo tidéw fanay kékéngéam, énggésobuto mon i Ménsulate Kébéréh i Tuluse. Atin been i niy ménfégétigane beem inok méfukas go dob de salaém sabaf bé kéunur me bé Jesu Kristowe. ¹⁶ Atin i kéluhanay de Ménsulat Kébéréh i Tuluse, sénulat i de étew non fénémanduoy Tuluse de bero. Atin i kéluhanay de ni do ménsulat fiyo

fégétoro bé toowe, brab fégéfééntang bé de tugi, brab fégégélé bé tetee, brab fégétoro bé métintuwe adat. ¹⁷ Mélaw dob kéféganade de, i étew i Tuluse waléy furung brab gérigo bé kéluhanay de séségiyo-giyo do fiyo galbék.

4

¹ Maak diyo to dob adafay Tuluse brab Jesu Kristowe, sani séfulee moso brab méguléw brab kémukum bé kéluhanay de étew, do méuyag loo soy do ménléhu. Mélaw sugué ku beem, ² bé uretém i kébéréh i Tuluse. Fatut tafayém démoyun inok fiyon fo ké ati gaiwe de, géuret go, fiyon fo ké mika mégélingo i de étew. Féégétém i kéfénur me bero. Géléém i de étew bé békén ro rémigo tete, brab féginau mo bero. Atin fatut tingkélo moy kétoro me bero. ³ Gégumah moso i gaiwe éndaén fégélingoéy de étew i toowe kétoro. Yamula odoro roy de tete kétaya ro. Atin séméléd ro bé de maistéro do téromo saén bé de karo do kétayan atin fétoro ro bero. ⁴ Atin éndaén fo fégélingoé roy toowe kétoro. Yamula fégélingoé ro saén i de békén do toow do tutul. ⁵ Endob i beeme, fégitung go fiyo inok gérigono moy métintuwe sénga tékélid, fiyon fo ké atiy gégumahe mérégén dob beeme. Atin fédayday go fiyon fo ké kérégénan go. Atin fétausém i galbék me muret bé Fiyowe Uret, brab rigo moy kéluhanay kétayay Tuluse rigoné mo non beem i sugu-sugué nuwe.

⁶ I begéne maak ségétewu tulak non énggumahén i gaiwe méléhuun.

⁷ Enggilid gun i kéluhanay fatute rigoné ku, ségiléw bé kéfélid i ségétéwe sékuya léméntu. Enggilid gun i galbéke niray i Tuluse begén. Atin énda ménkédan i kéunur guwe bé toowe kétoro. ⁸ Atin dob gaiwe kémukum moso i Kadnane, gédoté kuy barase kay de métintu do étew i Kadnane, sani métintuwe kémukum. Atin békén saén begén i gégédate bé ni baras, yamula irayén so dob kéluhanay de étew toow fo

méngundoy bé Kristowe brab ongot-ongoté roy késéfule ne.

⁹ Timoteo, toow fo télama moy magayase mangéy dini. ¹⁰ I Demasse, téragak non begén sabaf bé kégulaa nuwe bé de étingayén dob duniyae ni. Mélaw ménangéy dob ingéde Tésalonika. Atin i Kresentewe ménangéy Galasia, atin i Titoe ménangéy Dalmacia. ¹¹ Lukas saén i dumo guwe dini. Angéyém i Markose brab uwitém mangéy dini non gétabanga no begén bé de galbék gu dini. ¹² Sénugu guy Tikikowe mangéy dob ingéde Efeso. ¹³ Amuk mangéy go dini, uwitém i mégéfole kégal gu fénled gu dob lawi Karpowe dob Troas. Uwitém soy de libro gu, labi na foy de sulat gu.

¹⁴ I Alejandrowe, sani fandaye galang, toow fo tete i rénigo nuwe dob begéne. Endob Kadnan séden i kémukume de. ¹⁵ Atin ingata mo non toow fo émbagér i kéuret ne sébanil bé de kétoro tom.

¹⁶ Enda i dumo gu bé sunguwe kéamfilo ku bé lowoh guwe non téragak ro begén kéluhanan. Fésagadéy Tuluse damén bero. ¹⁷ Endob énda téragak i Kadnane begén. Been i dumo guwe brab fénbagérén begén, inok énggureto kuy kéluhanay Fiyowe Uret dob kéluhanay de békén Judio. Atin té nabanga no begén inok énda géféléhuoy de tete étew begén. ¹⁸ Atin gétiga ku, tabangay Kadnane begén inok énda gébinasana ro begén. Atin uwité no begén mangéy dob kéfélid ne dob lawayo énda i sug-sug gu. Médayéw damén i Kadnane taman sa taman. Amen!

¹⁹ Ségifaém begén i de sébawag ro Prisila brab Akila, brab kéluhanay de étew dob lawi Onesiforowe. ²⁰ I Erastowe ménbati dob ingéde Korinto, brab téragak guy Trofimowe dob Mileto non démeruun. ²¹ Télama mo foy mangéye dini lokut énda séna gumah i gaiy mélégnéye. I ro Ebullowe, Pudente, Lino, Klaudia, brab kéluhanay de dumo tom do munur ségifaé ro beem.

22 Diyo damén i Kadnane dob
beeme. Atin mégédaw damén i Tuluse
begom kéluhanan.

Pablo

I Sulat Pablowe dob Ségétewé Lagéy Féndawét Tito

Ay niy sébaane bé de sénulat Pablo, sani ménbantuge muret fantag bé Jesu Kristowe. Sénulatén i ni dob ségétewé lagéy féndawét Tito, sani témabangane de bé kélégéb ne bé Fiyowe Uret.

Dob ni sulat, ténero Pablowey ati klasiy étewe fakay waléy odoroy de munur. Ténoroén soy fantage bé fiyowe adat i de munur bé Jesu Kristowe.

¹ Tito,

I begéne, Pablo sani sugu-suguéy Tuluse brab ségétew apostol Jesu Kristowe. Begéney fénemili i Tuluse inok sugué no begén mangéy témabang émfébagér bé kéunur i de étew fénemili i Tuluse brab inok fefégesobut gu beroy toowe kétoro i katome kékéngintulus. ² I ségiyowe de funa ku sému, inok gésobuto ro gésarig ro bé méuyag ro taman sa taman. I Tuluse, been i niy fénasad ne dob betome tidéw féganay bé énda séna ménlimbag i duniyae de, bé irayén betom i umule magufusa. Atin gétiga tom énda fakayén ké énda tumanéy Tulusey fasad ne. ³ Atin béléewe niy gaiwe fégétiga noy kékéreh ne. Non sénarigén dob begéney kékéreh ne brab ureté ku non been i niy sénugu i Tulus tome mémukas.

⁴ Sémulatu mangéy dob beeme, sani ménwaléye maak tintu nga gu bé kéunur tuwe bé Jesuse. I Abaye Tulus brab Jesu Kristowe, sani mémukase betom dob de sala tom, mégédaw damén beem, brab iray ro damén beem i métanéke fédéw.

⁵ I funa kuwe téménagak beem diyoan dob bungéde Kreta, inok géfégilido moy galbék tome, brab inok géfémili go do étew waléy odoroy de munur dob séngae ingéd diyo. Fégétédémém i de kétoro gu fantag bé de ni. ⁶ I fémilié muwe odoron,

fatut ségétew lagéy énda météboén. Atin fatut ségétew saén i bawag ne. Atin i de ngaén, fatut do munur ro brab énda karangéy de étew bero do dufang taloo no mémelis bé de suguén. ⁷ I odorone, fatut ségétew énda météboén, non beeney sarigone bé galbék i Tuluse. Enda fatutén félangka-langka, taloo no magad mékérít, taloo no miném arak taman molon, taloo no méuyot sétiboh, taloo no arumén bé kurtae. ⁸ I odorone, fatut féfiyoné noy kéfagifat ne bé de kana no. Brab fatut méuyot rémigo fiyo. Fatut métintuy kérigo nuwe bé de dumo no atin rigoné noy kétayay Tuluse. Brab fatut énda odoro noy de tete kétayay lowoh ne. ⁹ Atin fatut toroé no saén i atiy modore bé toowe kétoro, sani mésarigone kétoro to. Amuk rigoné noy ni, waléy émbagér i kéunur i de étew bé toowe kétoro. Atin géfégito no énda katabawan i kékéreh i de étew sébanil bé toowe kétoro.

¹⁰ Non médooy de étew mika mégélingo bé toowe kétoro brab duraté ro soy de ségiyo étew bé de tugi kétoro ro énda i do lantékén, labi na foy kétoro i de munur do Judio. ¹¹ Fatut fo géléén ro inok éndaén témore ro. Non gukété roy de ségékuréng bé de kétoro ro énda fatutén toroén. I funa ruwe saén témore loo bé nan non méuyot ro saén kémurta. Fatut ro damén mémala. ¹² Bé gétahe wén i ségétewé béliyan tidéw so diyaan dob Kreta, ménbéréh mano, “I de étew dob Kreta do toow fo tete brab do tugién. Faukén ro so, éndob do arumén ro mama.” ¹³ Toow i nan bénréhén. Mélaw géléém fo bero toow inok waléy fiyoy kéunur ruwe. ¹⁴ Brab inok éndaén munur ro bé de békén toow do tutul i de Judio loo soy de sugu i de étew mika bé toowe kétoro. ¹⁵ I étewe malinis dob adafay Tuluse, karangé noy kéluhanay éntingayéne malinis. Endob énda i malinis dob de étew énda séna malinis i de fédéw ro brab énda séna munur ro bé Kristowe non énda séna mélinis i de itunga ro brab énda mémala ro bé de sala ro. ¹⁶ Bérhéh ro gétiga ro kun i

Tuluse, éndob giton dob de tete rigoné ro énda gétiga roy Tuluse. Toow fo tete i de adat ro brab énda modor ro bé fatute. Enda médait ro rémigo fiyo.

2

¹ Mélaw i beeme, fatut toroém saén i atiy modore bé toowe kétoro. ² Bérhéém dob de lukés lagéy bé fatut féfiyoné roy de rigoné ro brab fatut mégitung ro fiyo brab fatut énda odoro roy de tete kétayay de lowoh ro. Atin fatut féégété roy kéunur ruwe bé Kristowe, brab fatut mégédaw ro bé de dumo ro, brab fatut ro témingkél. ³ Atin loo so bé niy toroé muwe bé de lukés libun bé fatut ro rémigo fiyo loo bé kétayay Tuluse. Békén ro fatut géméno, taloo no démoyun ro miném arak. Atin fatut téromo ro fiyo, ⁴ inok métoro i de ménguwédo libun bé féimué roy de bawag ro brab de nga ro, ⁵ brab fatut énda odoro roy de tete kétaya ro taloo no de tete kétayay de lowoh ro. Brab fatut fégéror ro gémalbék dob de lawi ro, brab fatut odoro roy sugu i de bawag ro, inok énda i émbéréh tete fantag bé kékéréh i Tuluse unuro tom.

⁶ Atin loo so bé niy toroé muwe dob de ménguwédo lagéy bé fatut énda odoro roy de tete kétaya ro. ⁷ Atin i beeme, fatut féfiyo moy de rigoné mo, inok iringéy de dumo étew beem. Fatut toroé moy toowe, brab kago séfoyok bé lala me téromo. ⁸ Atin usarém i fiyowe kékéréh ké téromo go inok énda i géadowy bé de béréhé mo. Mélaw i de sébanil beto mémala ro non énda gétéboo ro beto.

⁹ Toroém dob de rifén bé fatut odoro roy sugu i de amu ro brab fatut rigoné roy mékésuwa saén. Békén ro fatut séédél bé de amu ro. ¹⁰ Békén ro ménakaw. Yamula, fatut féténgténg ro bé de amu ro bé démoyun ro rémigo fiyo brab mésarigon ro. I de munur do rifén, amuk rigoné roy ni, médayéw i kétoroe fantag bé Tulus tome mémukas betom dob de sala tom.

¹¹ I kégédaw i Tuluse, sani funay de étew méfukas, fénggito no dob kéluhanay de étew. ¹² Atin i ni kégédaw, fégétiga no betom bé fatut tagaké tom i de tete rigonén kéikaay Tuluse, brab téreño tom i kéodoro tome bé de tete kétayay de lowoh tom, inok métintu tom brab rémigo tom fiyo loo bé kétayay Tuluse amuk batitom séna dob duniyae ni, ¹³ bé lala i kéongotongot tome bé fiyowe fo gai séfule i toowe fo barakatan Tulus tom Jesu Kristo, sani mémukase betom. Bé bénou, giton i kéréndaw ne. I késéfule ne, been i niy inam tome. ¹⁴ Nirayén i férénawa nuwe génantino no betom inok fukasé no betom dob kéluhanay tetee. Atin inok féwaléyé no betom do malinis do étewén méuyot rémigo fiyo.

¹⁵ Toroém i de ni. Wén i atura mo méguléw bé de étew diyoan. Mélaw usarém i atur me máginau bero brab géléém bero ké rémigo ro tete. Atin kago fédayaén bero énda fégadata ro beem.

3

¹ Fefégétédémé béréhém bé de munur diyaan bé fatut odoro roy de sugu i de méguléw do gémaak kukuman. Fatut mamung ro bé de udenén bé de fiyo rigonéy de gémaak kukuman. ² Bérhéém bero bé békén ro fatut émbéréh tete fantag bé de étew taloo no sétiboh ro. Yamula fatut ro rémigo fiyo dob kéluhanay de étew, brab fatut ro émbéréh fiyo dob kéluhanay de étew. ³ Non i betome so do munur, bé do gétah, do dufang tom brab énda ménodor tom bé de sugu i Tuluse brab énda énggétiga tom i fatute. Brab ménodor tom fo toow bé kéluhanay de tete kétayay de lowoh tom. Démoyn rénigo tom i tetee, brab toow fo médaléw tom. I de dumo do étew mérarék ro betom brab mérarék tom so bero. ⁴ Endob fukaséy Tuluse betom, non amun fénggito noy kégédaw ne betom, ⁵ kenda noy de sala tom. Réningo noy ni békén sabaf bé fiyowe rénigo tom, yamula sabaf bé kékéréh i na nuwe betom. Fénukasén betom bé kelinis i Rémogor

i Tuluse betom, sani kéumah tome man ségule inok wén i mantu umul tom brab mantu adat tom taman sa taman.⁶ I Tuluse ténantuno no betom nirayan bé Rémozor ne fénagéwén dob Jesu Kristowe, sani mémukase betom.⁷ Rénigo noy ni inok waléy tom métintu dob adafay Tuluse sabaf bé kégédaw ne betom, brab inok gédoté tom i umule magufusa, sani ongot-ongoté tome.⁸ Toow i ni kétoro.

Méuyotu de ké toroé moy de ni dob de munur bé Tuluse diyaan inok waléy ro rémigo bé fiyowe galbék. Non amuk fiyoy galbék ruwe, been i noy fégétabange bé de ségiyo étew.⁹ Endob kago mamung bé de késéédél énda i lantékén. Brab kago fégélingoén i toowe fo métaah kélébit bé de katu-fuan brab de késékérit fantag bé kitabe. I kéluhanay de ni do énda i lantékén.¹⁰ Fatut géléém i étewe émfésébanil bé de munur. Atin amuk énda téméré no, géléém man ségule. Atin amuk énda fo téméré no, kago néen séloyuk de.¹¹ Non toow fo gétiga mo tete i étewe loo bé ni, atin giton ménsala non bé de tete rénigo no.

¹² Sugué ku mangéy diyaan i Artemase brab Tikikowe. Amuk géumah ro diyaan, toow fo télama moy mangéye dob begéne dob ingéde Nikapolis, non méuyotu bati diyo bé gaiwe mélégénéy.¹³ Toow fo télama mo tabangan i Apolose brab Senase sani gétigane bé kitabe inok magad i kégéagéw ruwe. Brab tabanga mo bero bé kéluhanay de kailanga ro.¹⁴ Toroém i de dumo to munur bé fatut ro fégéror rémigo fiyo inok gétabanga roy de étew do mérasay. Békén ro faukén.

¹⁵ Ségifaéy kéluhanay de dumo gu beem dini. Atin i de dumo gey munur do méimu begey, fésamfayém dob berowey késégifa geye bero. Mégédaw damén i Tuluse begom kéluhanan.

Pablo

I Sulat Pablowe dob Filemone

Ay niy sébaane bé de sénulat Pablo, sani ménbantuge muret fantag bé Jesu Kristowe. I Filemone ni, wén i rifé no féndawét Onesimo. Endob ténuis Onesimowey kurta Filemone, atin ménraréy. Amun énggumah i Onesimowe dob ingéde Roma, énggébalaka noy Pablowe. Atin nuret Pablowej fantage bé Jesu Kristowe dob beene. Tidéw bénou, énggésénule i Onesimowe bé de salaén atin ménwaléy munur bé Kristowe. Tidéw bénou, tétabangén i Pablowe brab fénagifatén non diyo i Pablowe dob férисуноне.

Dob kitab i de Romano, fatut féléhuén i Onesimowe non ségétew rifén ménraréy. Mélaw sénulat Pablowej ni sulat dob Filemone, sani gefee bé Onesimowe inok ongoté no dob beene bé fésagadé noy Onesimowe. Tidéw bénou, fénuwitén i ni sulat bé Onesimowe non séfule mangéy dob Filemon.

¹ Filemon,

Begéney dumou muwe Pablo. Ay niwu dob férисуноне sabaf bé kéunur guwe bé Jesu Kristowe. I begéne brab Timoteowe, sani dumou tome munur, sulata key beem. I beeme, gulaané key beem dumou gey gémalbék bé galbék i Tuluse. ² Atin sémulat gey so mangéy dob de munur sélimud ménadaf dob lawi me. Loo so dob Apiawe, sani maake libu key sabaf bé Kristowe, brab dob Arkipowe sani dumou geye maak sundalo gémalbék bé galbék i Tuluse.

³ I Abay tome Tulus brab Kadnane Jesu Kristo, mégédaw ro damén begom brab iray ro damén begom i métanéke fédew.

⁴ Sénga démasalu, démoyunu fo fésalamat dob Tuluse sabaf bé beeme, Filemon. ⁵ Non énggelingoo kuy fantage bé méngeté kéunurém bé Kadnane Jesus brab fantag bé kégédaw me bé kéluhanay de dumou mo munur.

⁶ Atin démasalu so dob Tulus bé waléy gétiga kom non bé késéduomo tome sabaf bé kéunur tome bé Jesusse. Mélaw gésobuto kom i de kéfiyonon gédoté tom sabaf bé kéunur tome bé Kristowe. ⁷ Atin i kégédaw me bé de dumou mo, been i niy funa kuwe toow fo moror brab fiyoy fédew guwe. Atin moror soy kéluhanay de munur bé Kristowe sabaf bé beeme.

⁸⁻⁹ Mélaw, wén i ongoté kuwe dob beeme. Fakay gésuguo ku beem rémigo bé fatute non bé atura kuwe tidéw dob Kristowe. Non begén i Pablowe, ségétew sarigo Jesu Kristowe, atin béleewe ni ménférisuwu sabaf bé Beene. Gido loo, ongoté ku saén dob beeme non toow fo gulaané ku beem. ¹⁰ Mélaw, ongoté ku dob beeme bé fésagadém i Onesimowe. Beeney maake nga gu sabaf bé kéunur ne bé Kristowe. Non amun diniwu dob férисуноне ni, fénunur gu. ¹¹ Bé do gétah, énda i tabang Onesimowe beem. Endob béleewe ni toow fo énggétabangén dob beeme, loo so dob begéne.

¹² Atin béleewe ni féséfuleé ku mangéy dob beemey ni toow fo gulaané ku étew. ¹³ Méuyotu de damén émfébati dob begéne bé lala guwe bati dob férисуноне ni sabaf bé kéfélégéb guwe bé Fiyowe Uret. Non amuk bati dini, gétabanga no begén loo bé beeme amuk dini go damén. ¹⁴ Endob énda rigoné kuy ni amuk énda tungkasé mo de begén. Non énda méuyotu mémégés beem. Yamula méuyotu de ké tidéw fo dob kaame kétayan i kétabanga muwe begén.

¹⁵ I funa nuwe keyén énggéséfekay Onesimowe beem bé magade saén, inok amuk séfule mangéy dob beeme, éndaén géséfeka gom tidéw béleewe ni. ¹⁶ Atin béleewe ni, i Onesimowe, békénén rifé mo saén. Yamula ménwaléyén maak dumou mo sétiman idéng sabaf bé kéunur ne bé Kristowe. Toow fo gulaané ku éndob toow na fo gulaané mo non békén saén rifé mo, yamula ménwaléyén maak dumou mo sétiman idéng sabaf bé Kadna tome.

¹⁷ Mélaw amuk fégitungé mo begén ségétew dumo mo, tayakufém loo bé kétayakuf me damén begén. ¹⁸ Atin amuk réménigo tete dob beeme taloo no wén i utongén beem, dob begéne séden étukém. ¹⁹ Sulaté kuy ni bé de kagén kémér: I begéne, Pablo, bayada ku beem. (Endob kago lifotén de wén i utongém begén, sani mantuwe umulém sabaf bé kéunur me bé Kristowe.) ²⁰ Mélaw adih, toow fo damén méuyotu de ké tabanga mo begén bé rigoné moy nan nongot gu. Féororénu non sédumon tom sabaf bé kéunur tome bé Kristowe.

²¹ Toow fo gétiga ku béleewe ni, rigoné moy kéluhanay ongoté kuwe beem dob sulat guwe ni, atin gétiga ku umana moy kérigo muwe bé éndae ongoté ku. ²² Atin wén nay ségiyo ongoté ku dob beeme. Tafayanu sibéy inok wén i batio ku ké mangéyu diyaan. Non wén i inam gu féséfuleéy Tuluse begén mangéy diyaan sabaf bé kédasala kome bé késéfule guwe mangéy diyoan.

²³ Atin i Epafrase dumo gu ménférisu sabaf so bé kéunur ne bé Jesu Kristowe, ségifaé no beem.

²⁴ Atin ségifaéy de dumo gu so gémalbék beem, ro Markos, Aristarko, Demas brab Lukas.

²⁵ Mégédaw damén begom kéluhanan i Kadnane Jesu Kristo.

Pablo

I Sulate dob de Judio do Munur bé Jesu Kristowe

Enda gétiga tom de ké ati séménulate bé ni sulat, non i séménulate de énda sénulatén i dawét ne. Endob gétiga tom sénulatén dob de Judio do munur bé Jesu Kristowe. Sénulatén i ni inok fébagéré noy de fédew ro, non i de dumo ro do Judio fénrasay ro bero sabaf bé kéunur ruwe bé Jesuse funa ro éndaén odoro roy kitab i de Judio.

Dob ni sulat, wén i kétoroe bé Jesuse, Been i Nga i Tuluse, atin mélaw toow na fo gérotor bé de télaki brab de sénarigoy Tuluse muret bé kékérén ne brab fiyon i Moisese. Wén soy kétoroe bé fénléhu i Jesuse fégétulak fégékédan bé de sala i de kéilawan. Mélaw éndaén kailangay de étew i témulake do ayam taloo no do ségiyo éntingayén. Wén soy kétoroe bé toow fo kailangay de étew i munure bé Jesuse non Been i kékédeway de étew mangéy dob Tuluse.

¹ Bé do gétah do gai, ménsébérén i Tuluse bé de katufua tom do Judio fénagéwén dob de étew do sénarigo no muret bé kékérén ne. Fénbérén hén bero médo gule brab dob séségiyoye aguwon. ² Endob béleewe ni, dob de ni gefuray do gai, ménsébérén dob betome fénagéwén dob tintuwe Ngaén. I Tuluse, fénlimbagén bé Nga ne niy kéluhanay éntingayéne, atin fénemili i Tulusey Beene waléy so gefe bé kéluhanane. ³ Atin i Nga i Tuluse ni, rémendaw bé barakat i Tuluse, non ségiléw so bé Tulusey ni Nga. Atin i Nga i Tuluse ni, Beeney émfétause bé kéluhanay éntingayéne inok énda méalfa ro. Rigoné noy ni dob barakatane kékérén. Atin amun énggilid kénda noy sala i de kéilawan, ménséfule mangéy dob lawayo inok mésar fingé dob kuwonoy Tuluse inok méguléw.

⁴ Mélaw i Nga i Tuluse, ménwaléy toow na fo gérotor bé de télaki. Loo so bé ni, bé kékédawét i Tuluse Jesusey Nga ne, giton toow na fo gérotor i Jesuse bé de télaki. ⁵ Non wén i Ménsulate Kékérén i Tuluse bénréhén dob Jesuse mano, “Beemey Nga guwe, béleewe ménwaléyu Bohém.” Bénréh i Tulusey ni dob Jesuse, éndob énda bénréhén de dob de télaki no. Atin wén soy Ménsulate Kékérén i Tuluse mano, “Begéney Boh ne, atin Beeney Nga guwe.” Bénréh i Tulusey fantage bé Jesuse, békén fantag bé de télaki. ⁶ Atin amun gédétén i gaiwe féuwit i Tulusey toowe fo gérotor Ngaén mangéy dob duniyae ni, ménbérén man mano, “I Beene, fatut féngadaféy kéluhanay de télaki gu.” ⁷ Endob ay niy kékérén i Tuluse fantag bé de télaki no mano, “I de télaki gu, sani de sugu-sugué ku, féwaléyé ku bero do réfuruh brab do aféy.” ⁸ Endob ay niy kékérén i Tuluse fantag bé Nga ne mano, “Beemey Tuluse brab méguléw taman sa taman. Métintu foy kékéguléw me. ⁹ Atin méimu go bé fiyowe, brab mérarék go bé tetee. Been i niy funa kuwe, sani Tulus me, ménemili Beem inok fégérotoré ku Beem bé de dumo mo. Atin fénoror gu so beem.” ¹⁰ Atin wén soy ségiyoye Ménsulat Kékérén i Tuluse dob Nga ne mano, “I Beeme, Kadnan, bé féganayo Beemey léménimbage bé duniyae. Atin rénigo moy lawaye bé de kémérém.” ¹¹ I duniyae brab lawaye, méalfa ro moso, éndob i Beeme, méuyag go taman sa taman. I de ni waléy ro tafay ségiléw bé kégale. ¹² Ségiléw bé kékédét me bé kégale inok baliwana mo bé mantuwe de. Endob i Beeme, énda méfégalin go, atin énda i tamanay kéuyag me.” ¹³ Atin ménbérén soy Tuluse dob Nga ne mano, “Sar go fingé dob kuwono kuwe ni taman fétabané ku Beem bé de sébanil Beem.” Endob énda bénréh i Tulusey ni dob de télaki no. ¹⁴ Mélaw, i de télaki, beroy do sugu-suguéy Tuluse saén. Enda gito gey bero, éndob suguéy Tuluse bero

témabang betom do étew gégédot bé umule magufusa tidéw dob Beene.

2

¹ Mélaw fatut fo fétuntayé tom i de toow kétoro énggelingoo tom, inok taus i kéunur tome de. ² Non toow i kitabe niray i Tuluse fénuvitén bé de télaki. Mélaw i kéluhanay de mémélis bé kitabe, ménkukum ro loo bé fatute. ³ Atin ségiléw so bé ni, tintu mékukum tom so amuk fédayaé tom brab énda odoro tom i kétoroe fantag bé fiyowe kéfukas i Tuluse betom bé de sala tom. I Kadna tome Jesus i sunguwe ménuret betom fantag bé ni kéfukas, sani amuk munur tom bé Jesuse, kédané noy de sala tom inok énda mékukum tom. Atin i de étew énggégélingo bé ni kéuret i Kadnane, bénréh roy toow fo toow i kéuret ne de. ⁴ Atin i Tuluse, fénggito no so toow i ni kéuret bé kéférigo nuwe bero do ségiyo-giyo do mékégaif bé barakat ne. Atin nirayén dob de ni muret i de kéfurungon sabaf bé kéfemanduoy Rémogor i Tuluse bero. Niray i Tuluse beroy loowe bé kétaya nuwe de irayén dob séngae ségtéw bero.

⁵ Atin bérhéhé ku begom i fantage bé mantuwe duniya gégumah moso. I Tuluse, énda fénémilién i de télaki méguléw bé ni mantu duniya.

⁶ Yamula fénémilién i de étew. Non wén i Ménsulate Kébérén i Tuluse mano, "Tulus, sedek énda lifoté moy de étew? Non kéilawan ro saén. Sede mélaw ké fagifaté mo bero?

⁷ Fénggérifantadém bero bé de télaki singkow saén. Endob niraya moy de kéilawan bantugan brab féngadaté mo bero. ⁸ Atin fénémiliém i de étew méguléw bé kéluhanay de éntingayén." Been i niy Ménsulate Kébérén i Tuluse.

Mélaw gétiga tom féguléwoy kéilawaney kéluhanay éntingayéne, atin énda i éntingayén énda féguléwo no de. Endob gétiga tom so, béléewe ni énda séna méguléw i kéilawane bé kéluhanay éntingayéne. ⁹ Endob gido loo, gétiga tom i Jesuse fénggérifantad i Tuluse bé de télaki bé singkowe saén inok méléhu gantino noy kéluhanay de

étew inok énda méléhu ro. Ménrigoy ni sabaf bé kégédaw i Tuluse. Atin béléewe, bantugén i Jesuse brab fégadatan fo toow sabaf bé kéfedaye ne bé kéfélhéue de. ¹⁰ I Tuluse, lénimbagén i kéluhanay éntingayéne brab Beeney émfétause bé kéluhanane. Atin fiyoy rénigo nuwe bé kéfedaye ne bé Jesuse. Mérasay, non sabaf bé kérasay ne, énda i kulang dob kéfukas ne betom. Rénigoy Tulusey ni inok féwaléyé no betom médo do ngaén inok médayéw tom séréngan bé Jesuse taman sa taman. Non i Jesuse, Beeney aguwoy de étew inok méfukas ro tidéw dob de sala ro.

¹¹ I Jesuse, linisé noy de étew dob de sala ro. Atin i betome do ménlinisén dob de sala tom, sétiman tomén Boh bé Jesuse, sani Tuluse. Been i niy funa Jesuse énda mémala no fédawété no betom do tuwaréyén. ¹² Non wén i Ménsulate Kébérén mano, "Tulus, bérhéhé kuy fantage bé Beeme dob de tuwaréy gu. Atin dayewé ku Beem dob kéluhanay de étew sélimud féngadafé ro Beem." ¹³ Atin bénréh Jesuse so mano, "Sémarigu dob Tuluse." Atin bénréhén so mano, "Ay niwu, begey i de nga i Tuluse nirayén dob Begéne."

¹⁴ Atin i de betom do nga i Tuluse, méléhu tom non kéilawan tom saén. Been i funa Jesuse ménwaléy so kéilawan loo bé betome. Rénigo noy ni inok méléhu, inok bé kéléhu ne, énggébinasana noy Satanase, sani tidéwoy kéléhue. ¹⁵ Atin rénigo noy ni inok géfukasa noy kéluhanay de étew bé ménrugayén i kégilak ruwe méléhu.

¹⁶ Atin békén do télaki tabanga nuwe. Yamula betom do séfu Abraham i tabanga nuwe. ¹⁷ Been i niy funa nuwe kailanga noy waléye ségiléw bé betome do tuwaréyén, inok Beeney waléye toow fo mégédaw brab tintu fo gésarigon gérotor fadi tom dob adafay Tuluse, inok gékédana noy de sala tom do kéilawan. ¹⁸ Atin mélaw, gétabana noy de étew téngkadé Satanase, non i Beene ténenkad Satanase so brab toow fo fénrasayén.

3

¹ Do dumō gu do munur bé Kristowe, sani de sénéngkat i Tuluse bati moso dob lawayo diyo, fégitung gom i fantage bé Jesuse. Been i no sénugu i Tuluse mangéy dob duniiae ni. Sénuguén inok waléy gérotor fadi bé kékéngintulus tome dob Beene. ² I Jesuse ni, toow fo nodoro noy kéluhanay de fénrigoy Tuluse de, ségiléw bé kékodoro Moisese bé kéluhanay de galbékén dob de étew i Tuluse. ³ I étewe rémigo lawi, mas na émbantug bé lawie. Ségiléw so bé Jesuse, mas na émbantug bé Moisese. ⁴ I kéluhanay de lawi, wén i do réménigo bero. Atin Tulus i réménigowe bé kéluhanay étingayéne. ⁵ I Moisese, fiyoy rénigo nuwe amun sugu-suguén dob de étew i Tuluse. Atin i rénigo nuwe ménwaléy maak anlung i rigonéy Tuluse moso. ⁶ Endob i Kristowe, Beeney Nga i Tuluse brab Been soy sarigone méguléw bé de étew i Tuluse. Atin i betome do munur de, betom i de étew i Tuluse, amuk méégét i kéunur tome de brab amuk énda mékédan i késarig tome de bé kéongot-ongot tome de.

⁷ Non wén i Ménssulate Kébérél i Rémogor i Tuluse mano, "Amuk gélingoo kom i kékérlé i Tuluse béléewe ni, ⁸ kagom fétegasén i de uléw gom loo bé kétégas i uléw i de katufua kom amun ménika ro bé kétayay Tuluse dob gonone énda i étew de bat. Non ténéngkad ro diyo i ketingkél i Tuluse. ⁹ Fiyon fo ké énggito roy de mékégaif do rénigo gu bé ménfote folo gébélantuwa," bang i Tuluse, "ténéngkad roy ketingkél guwe bé de tete adat ro. ¹⁰ Mélaw ménkérítu bero brab bénréh gu maku, 'Démoyun ro mika bé kétaya kuwe brab énda fo modor ro bé de sugu gu.' ¹¹ Mélaw ménkérítu bero, brab fénasada ku bero maku, 'Enda géahur ro dob gono kuwe inok gétérén ro moso séréngan Begén.' " Been i niy kékérlé i Tuluse.

¹² Mélaw, do dumō gu, ingat gom inok énda i ségétew begom waléy tete i itunga nuwe brab énda munurén bé

Tuluse. Non amuk loo bé ni, diguré noy méuyage Tulus. ¹³ Yamula, fatut séfériyo tom fédew sénga fuweh lokut wén sénay gai tom inok énda i ségétew betom énggégéfakaran rémigo sala funa no waléy métégas i uléw ne. ¹⁴ Non amuk féégété tom i késarig tome bé Kristowe taman sa taman loo bé gétaho, toow fo gétaus tom sédumon bé Kristowe.

¹⁵ Been i niy bénréh i Ménssulate Kébérél i Tuluse mano, "Amuk gélingoo kom i kékérlé i Tuluse béléewe ni, kagom fétegasén i de uléw gom loo bé kétégas i uléw i de katufua kom amun ménika ro bé kétayay Tuluse."

¹⁶ Ati de étew énggégélingo bé kékérlé i Tuluse, éndob natuho roy Tuluse? Beroy de étew do Judio do fénanangguwit Moisese tidew Egipto.

¹⁷ Ati de étew kénritoy Tuluse bé ménfote gébélantuwa? Bero soy de Judio do ménssala dob Tuluse funa ro ménléhu dob gonone énda i étew de bat. ¹⁸ Beroy de étew fénasaday Tuluse mano, "Enda fakayén ké mahur ro dob gono kuwe inok gétérén ro moso séréngan Begén." Non énda modor ro bé kékérlé i Tuluse. ¹⁹ Mélaw gétiga tom énda énggéahur ro non énda ménunur ro bé Tuluse.

4

¹ Fiyon fo ké énda géahur i de énggétah do étew, énda mékédan i fasad i Tuluse bé fakay géahur i de étew dob gonoy Tuluse témérén. Mélaw fatut mingat tom inok kéluhana tom géahur diyo. ² Non énggélingoo tom i Fiyowe Uret ségiléw bé kékérlé i de katufua tom de. Endob fiyon fo ké énggélingoo ro, énda énggédot roy fiyowe non énda ménunur ro de. ³ Endob i betome do munur de, géahur tom dob gonoy Tuluse inok gétérén tom. Endob i de étew do énda munur, énda fakayén mahur ro. Non wén i Ménssulate Kébérél i Tuluse mano, "Ménwaléyú mékérít, atin réménigowu fasad bé énda géahur ro dob gono kuwe témérén." Bénréh i Tulusey ni fiyon fo ké méntafayén

i gono nuwe, non ménggilidén i galbék ne tidéw bé kélimbag ne bé duniyae ni. ⁴ Non wén i Ménsulate Kébéréh i Tuluse fantag bé géfitéw ne gétérésangan mano, "Amun énggild i Tuluse bé galbék ne, téménrén dob géfitéw ne gétérésangan." ⁵ Atin wén man i Ménsulate Kébéréh i Tuluse mano, "Enda fakayén ké mahur ro dob gono kuwe témérén inok gétérén ro sérèngan Begén." ⁶ I de sungu étew énggégélingo bé Fiyowe Uret, énda énggéahur ro dob gonoy Tuluse, non énda ménahur ro. Mélaw wén i do ségiyo étew géahur dob gonoy Tuluse inok gétérén ro sérèngan de. ⁷ Gétiga tom i ni non réménigo man ségiyo gaiy Tuluse inok géahur i de étew dob gono nuwe témérén. Non amun ménifus i ménrugaye nén gai tidéw bé gaiwe énda ménunur i de sungu do étew, fénbéréh i Tulusey Datu Dabide mano, "Amuk gélingoo kom i kékéréh i Tuluse béleewe ni, kagom fétégasén i de uléw gom." ⁸ Atin fantag man bé de ni do sungu étew, amuk énggéfanangguwito Josuehe bero mangéy dob tintuwe gonoy Tuluse inok tintu gétérén ro, éndaén damén ménbéréh i Tuluse fantag bé ségiyowe gai géahur i de étew dob gonoy Tuluse inok gétérén ro. ⁹ Mélaw gétiga tom géahur soy de étew i Tuluse dob gonoy Tuluse inok gétérén ro ségiléw bé kétérény Tuluse dob géfitéw ne gétérésangan amun énggild léménimbag. ¹⁰ Non i kéluhanay de étew géahur dob gonoy Tuluse inok gétérén ro sérèngan de, gétérén ro so dob de galbék ro ségiléw bé kétérény Tuluse bé kélimbag ne. ¹¹ Mélaw toow tom fo télamánén i mahure inok gétérén tom sérèngan bé Tuluse. Katom félisén i kékéréh i Tuluse loo bé rénigoy de énggéétah do étew funa ro énda énggéahur.

¹² I kékéréh i Tuluse toow fo barakatan brab miray bé umule magufusa. Ségiléw bé sundange toow fo murém. Non i kékéréh i Tuluse maak diléké noy de itunga tom brab de fédew tom. I Nga i Tuluse

gétiga noy kéluhanane fantag bé betome. Gétiga noy itunga tome brab fédew tome. ¹³ I Tuluse gétiga noy kéluhanane, énda i éntingayén mébunéy dob Beeney. Gito noy kéluhanane, fiyon i de rigoné tom. Mélaw wén mosoy gai kailanga tom témindég dob adafa nuwe brab béréhén dob Beeney fantag bé kéluhanay de rénigo tom.

¹⁴ Mélaw fatut fo fétausé tom i kéégét i kéunur tome bé Jesu Kristowe loo bé fénayag tome. Non wén i toowe fo fiyo gérotor fadi tom, sani Jesuse Nga i Tuluse, déméniat mangéy dob Tuluse. ¹⁵ Atin i ni gérotor fadi, toow fo gésobuto noy kélubay tome non kéilawan tom saén. Non i Jesuse ménwaléy kéilawan brab ténukaw Satanase bé séngae gékelasi kétukawan de ségiléw bé betome, éndob énda fo énggésala i Jesuse. ¹⁶ Mélaw, katom mégilak fégédét dob mégédawe Tulus. Non méuray i na nuwe betom brab mégédaw betom, atin tabanga no betom dob de gai kérégénan tom.

5

¹ I kéluhanay de gérotor do fadi, fénemilién bero inok waléy ro do kénéfédaway de étew mangéy dob Tuluse. I galbéké sénarig dob berowe, témulak ro dob Tuluse inok mécédan i sala i de étew. ² I de gérotor do fadi, do kéilawan ro saén atin mélubay ro. Mélaw gétingkélo roy de étew ké gésala ro atin méuray i na ruwe bé de étew gésala non énda gésobuto roy fatute.

³ Atin i de gérotor fadi, kéilawan ro saén, mélaw énda démoyun ro gérito bératute. Mélaw kailanga roy témulake inok kédanéy Tulusey de karo sala ségiléw bé de sala i de ségiyo do étew.

⁴ Atin i galbék i gérotore fadi, toow fo fégadatay de étew. Atin énda i ségetéw étew géfémili bé kaane lowoh waléy gérotor fadi. Non Tulus saén i mémilié bérati isuwe waléy gérotor fadi loo bératé. ⁵ Atin ségiléw so bératé niy Kristowe, békén Been i ménemilié bératé lowoh ne inok waléy gérotor fadi. Yamula Tuluse i ménemilié de, sani ménbéréhe

dob Beene mano, "Beemey Nga guwe, béeewe ménwaléyu Bohém."

⁶ Atin wén soy ségiyowe kékérél i Tuluse mano, "Beemey ségétewé fadi taman sa taman, ségiléw bé Melkisedeke."

⁷ Amun ménbati sénay Jesuse dob duniyae ni, déménasal brab kéménrew ménfégédaw-gédaw dob Tuluse, sani géfukase de bé kéléhue. Atin fénggélingo i Tuluse non bénasana noy Tuluse brab nodoro noy kétayay Tuluse. ⁸ Fiyon fo ké Nga i Tulusey Jesuse, féngganadén i kéodore bé de sugu i Tuluse bé kérasaye énggéagéwo no. ⁹ Atin amun énggilid non i kéluhanay sénugu i Tuluse de, ménwaléy Been i mémukase bé kéluhanay de étew modor dob Beene inok gédoté roy umule magufusa. ¹⁰ Atin tidéw bénó, fénwaléy i Tulusey Jesuse gérotor fadi ségiléw bé fadie Melkisedek bé do gétah.

¹¹ Médooy gébérého keye fantag bé ni. Endob mérégén i kékégésobute de dob begome non métana gom gésobut. ¹² Ménrugay gomén ménunur bé Jesuse. Mélaw fatut gomén damén do téromo. Endob énda fakayén non taman so béeewe ni kailangan gom séna toroén inok gésobuto kom i de sungu kétoro fantag bé kékérél i Tuluse. Fatut damén mama gomén bé de métégas do amaén, sani ménaléme kétoro, éndob taman so béeewe ni maak témutu gom séna. ¹³ I de témutu séna, do nga ro séna. Enda gésobuto roy kétoroé fantag bé kétintuwe. ¹⁴ Endob i de lukés, mama ron bé métégase do amaén. Atin gélolo ronén i fiyowe brab tete sabaf bé kékéganad ruwe de.

6

¹ Mélaw katomén séduli-dulién i de sungu kétoro fantag bé Kristowe. Yamula féganadé tom i de ménalém de. Endaén kailanga tom démoyun féganadén i de kétoro, loo bé fatut tagakéy de étew i de rigonén énda géfukasa no bero, brab fatut munur ro bé Tuluse. ² Endaén kailanga

tom féganadén i kétoroé fantag bé kékautise, brab fantag bé kétégéné bé de bunbunan bé lala i kédasalane de, brab fantag bé kétébule i de étew, brab fantag bé kékukum i Tuluse taman sa taman. ³ Yamula féganadé tom soy de ménalém do kétoro, amuk tungkaséy Tuluse damén.

⁴ I de étew téménréni ro munur, éndaén gésénule ro man ségule. Bé do gétah, énggésobuto ronén i toowe kétoro fantag bé Jesuse. Brab énggédot ronén i niray i Tuluse fénagéw dob Kristowe brab énggédot ronén i Rémogor i Tuluse. ⁵ Bé do gétah, énggétiga ronén toow fo fiyoy kékérél i Tuluse. Brab énggétérédama ronén i barakat i Tuluse fégito no moso dob de mantu do gai. ⁶ Gido loo, tétagak roy de ni. Mélaw éndaén fakayén fégésénuleén ro man. Non maak séguleé ro man féléhuén i Nga i Tuluse. Mélaw fémalané roy Nga i Tuluse dob adafay de étew.

⁷ Ufama, i betome tidéw dob fantade ni do kéilawan ségiléw tom bé fantade démoyun méranaan. Amuk témunoh i de fiyo ohokén do amaén, féfiyonéy Tulusey no fantad. ⁸ Endob amuk féerukéy fantadey de suwar brab de kéroon, énda i do lagaén. Mélaw tuwégéy gefee de. Ségiléw so bé ni, i étewe miring bé fantade ni, kukuméy Tuluse.

⁹ Mélaw, do dumo gu, fiyon fo ké loo bé niy kékérél guwe dob begome, gétiga ku taus gom rémigo fiyo loo bé fatute rigonéy de étew ménfukas dob de sala ro. ¹⁰ Toow fo métintuy adat i Tuluse. Enda mélfotén bé de fiyo rénigo gom brab kékumu gome bé Tuluse fénggito gom bé kétabanga kome bé de dumo gom munur bé Kristowe. Atin taman so béeewe niy kétabanga kome bero. ¹¹ Toow fo méuyot gey de ké fétausé kom kéluhanan i kégérör gome taman bé késéfule Kristowe, inok gédoté kom i kéluhanay inamé kome. ¹² Mika gey de ké waléy gom faukén. Yamula fatut iring gom i de étew do munur brab do témingkél.

Beroy de étew gégédot bé fénasad i Tuluse.

¹³ Fégitung gom i katufua tome Abraham. Amun fénasaday Tulusey Abrahame, énda i ségiyo toow na fo gérotor bé Tuluse inok usaré noy dawét ne fégésafaén. Mélaw nusar i Tulusey kaane dawét fénggésafaén bé ni fasad. ¹⁴ Ménbéréh i Tuluse mano, "Fasada ku beem bé féfiyoné ku beem brab iraya ku beem médo do séfuém." ¹⁵ Atin téméningkél i Abrahame, mélaw énggédotén i fénasad i Tuluse de. ¹⁶ Amuk sémafa i étewe, usaré noy dawét i ségétéwe étew toow na fo gérotor bé beene. Atin géunur mélaw i de étew gégélingo de. ¹⁷ Ségiléw so bé ni, i Tuluse toow fo fénbagérén i fasad ne bé kérigo nuwe bé safane, inok i de étew fénasada no toow fo fégito no bero brab fégétiga no beroy énda émfégalin i fasad ne brab tintu fo tumané no. ¹⁸ Mélaw ruwo timan éntingayén i éndae fégaliné no. I sébaane de, been i fasad ne. Atin i géruwono nuwe, been i safane. Mélaw gétiga tom énda témugi i Tuluse. Mélaw i de betom do étew fédiyaga bé Tuluse, toow fo méégét i kéunur tome dob Beene loo soy inam tome bé gédoté tom i fénasad ne dob betome. ¹⁹⁻²⁰ Toow fo méégét i inam tome bé tumanéy Tulusey fasad ne betom. Non sénarig tom i nan dob Tuluse. Mélaw énda mékédan i kéunur tome de. Atin i funa nuwe énda mékédan i késarig tome de non wén i kéfédéwa tom dob sékuloy Tuluse, sani Jesu Kristowe. Maak ménahur dob sibéy i Tuluse mangéy fingé bala bé rindunge dob lawi i Tuluse. Atin diyo mélaw dob sékuloy Tuluse. Ménwaléy gérotor fadi tom taman sa taman loo bé fadie féndawét Melkisedek bé do gétah.

7

¹ I Melkisedeke ni, beeney datu i ingéde Salem bé do gétah. Atin been soy fadie ménagadaf bé toowe fo gérotor Tulus. Atin wén i no gai, ménstiboh i Abrahame bé de ségiyo datu, sani de kéménéfo bé

samsung ne, atin énggáféléhu no bero. Atin bé lala Abrahame mule, énggébalaka noy Melkisedeke. Atin nongot Melkisedeke dob Tuluse, bé féfiyoné noy Abrahame damén.

² Tidéw béo, niray Abrahame dey géfoloe bé téneba nuwe énggédotén dob de datu fénléhuén. I atag i dawéte Melkisedek, "Métintu Datu". Atin non datu i Melkisedeke dob Salem, i atag i dawét ne so, "Datu Kémédan bé Késétiboh". ³ Enda ménsulatén ké ati boh Melkisedeke taloo no ati idéng ne taloo no ati katufua nuwe. Atin énda so ménsulat i fantage bé kéumah ne taloo no fantag bé kéléhu ne. Mélaw maak Nga i Tuluse non énda gétigay de étew de ké ati tidéwo nuwe de taloo no ati ténamana nuwe de. Mélaw i Melkisedeke fadi taman sa taman.

⁴ Mélaw gétiga tom toow fo gérotor i Melkisedeke. Non fiyon i Abrahame sani katufua tome do Judio, nirayén i géfoloe bé téneba nuwe énggédotén bé késétiboh ne. ⁵ I de fadi i de Judio, sani de séfu Lébi, séfu ro soy Abrahame. Sénugu i kitabe bero médot bé géfoloe tidéw dob de Judio. Mélaw éndot ro tidéw dob de dumo ro do Judio, fiyon fo ké do séfu Abraham ro so kéluhanan. ⁶ Endob i Melkisedeke békén séfu Lebiwe. Gido loo, éndotén i géfoloe tidéw dob Abrahame, atin nongotén dob Tuluse bé féfiyoné noy Abrahame. Rénigo noy ni, fiyon fo ké Abraham i étewe fénasaday Tuluse. ⁷ Atin gétiga tom, i étewe ongoté no dob Tuluse bé féfiyoné noy ségétéwe étew, toow na fo gérotor i nan étew. ⁸ I de fadi i de Judio médot bé géfoloe tidéw dob de dumo ro Judio, méléhu ro. Endob i Melkisedeke, sani ménchte béréh géfoloe tidéw dob Abrahame, énda ménsulatén dob kékéralak ne béréh. ⁹⁻¹⁰ Atin amun niray Abrahamey géfoloe dob Melkisedeke, maak Lebi soy méniraye. Non fiyon fo ké énda séna ménimah i Lebiwe de, maak diyo séna dob lowoh i katufua nuwe Abrahame bé kégébalak ne béréh Melkisedeke. Atin Lebiy katufuay de fadi ménchte béréh géfoloe tidéw dob de

Judio. Mélaw giton bé ni, mas gérotor i kéfadi Melkisedeke bé kéfadi i de séfu Lebi.

¹¹ Amun niray i Tulusey kitabe dob de Judio, ménémili do fadi, sani de séfu Lebi, inok beroy de gémamak bé kitabe. Endob amuk fakay waléy métintuy kéilawane sabaf bé galbék i de fadi tidéw dob de séfu Lebi, éndaén damén kailangan i ségiyowe fadi loo bé Melkisedeke, békén loo bé kéfadi Aarone sani séfu Lebiwe. ¹² Atin amuk fégalinén i fadie, fatut so fégalinén i kitabe. ¹³⁻¹⁴ Atin i Kadna tome Jesu Kristo, sani mantuwe fadi bénréh gu, békén séfu Lebiwe. Yamula, Beeney séfu Judahe, atin énda i ségiyo bé de séfu Judah do ménwaléy fadi. Mélaw bé kéluhanay de séfu Judah, Jesuse saén i ménwaléye de fadi. Non énda bénréh Moisese de ké waléy do fadi i de séfu Judah.

¹⁵ Atin ménggiton fo toow bé amuk wén i mantu fadi loo bé Melkisedeke baliwana no bé de séfu Lebi, wén soy mébaliwanan bé kitabe niray Moisese.

¹⁶ Atin i Jesuse énda ménwaléyén fadi sabaf bé kitabe sénugu bé i de séfu Lebi saén i waléye do fadi. Yamula ménwaléy fadi sabaf bé kébarakatay umul ne énda méléhuén taman sa taman. ¹⁷ Non wén i Ménsulate Kébéréh i Tuluse mano, "Waléy go fadi taman sa taman, loo bé fadie Melkisedek." ¹⁸ Mélaw i de tafay sugu fantag bé de fadi ménkédanén non énda i laga ro brab énda gétabanga ro betom. ¹⁹ Non i kitabe niray Moisese, énda fakayén ké waléy tom métintu sabaf bé kéodor tome de. Mélaw niray i Tuluse betom i mantuwe aguwon toow na fo fiyo. Atin sabaf bé ni, gégédét tom dob Tuluse.

²⁰ Atin saliyu na bé ni, ay niy ségiyowe funan mas na fiyoy mantuwe ni agéwon. Amun rénigoy Tuluse fadi i Jesuse, réménigo so safra do Beene. Endob énda rénigo noy ni safra bé kérigo nuwe bé de séfu Lebi do fadi. ²¹ Endob i Jesuse, ménwaléy fadi bé safra i Tuluse mano, "I Begéné Kadnan, rigoné kuy fasade bé waléy

go fadi taman sa taman. Atin énda fégaliné kuy kétaya kuwe." ²² Mélaw sabaf bé ni safra i Tuluse gétiga tom toow na fo fiyoy mantuwe aguwon rénigoy Tuluse inok tanggafé noy de étew, sani kéunur tome bé Jesuse.

²³ Atin ay ni ségiyowe funan mas na fiyoy mantuwe agéwon. I de fadi do séfu Lebi, kailangan médoor ro non méléhu ro, atin amuk méléhu i ségétéwe de, kailangan wén i baliwa no. ²⁴ Endob i Jesuse, méuyag taman sa taman. Mélaw énda i baliwa no. ²⁵ Mélaw fakay géfukasa noy de étew tidéw dob de sala ro, sani de étew modor de mangéy dob Tuluse. Gérigono noy ni sénga tékélid taman sa taman. Non méuyag taman sa taman, atin mélaw wén i kéfédéwa tom mongot dob Tuluse.

²⁶ Mélaw Jesus i gérotore fadi kailanga tom. I Jesuse, mékétéfu brab énda i salaén. Enda ségiléwén betom do gésala. Atin amun déméniat i Jesuse, rénigoy Tuluse toow fo gérotor. ²⁷ Ségiyo foy Jesuse bé de ségiyo do fadi. Enda kailanga noy témulake dob Tuluse sénga fuweh inok mérédan i kaane sala, atin tidéw béno témulak man inok mérédan i de sala i de ségiyo étew. Non nirayén i sébaane tulakén, sani lowoh ne. Mélaw éndaén kailanga noy témulake. ²⁸ I kitabe niray Moisese, mémili do gésala étew inok waléy ro do gérotor fadi. Endob ménrugay tidéw béno, ménwaléy gérotor fadi i Nga i Tuluse non fénémili i Tuluse sabaf bé fasad ne bé safra ne. Atin i Jesuse ni, énda i salaén taloo no udenén kulang de. Atin ménwaléy gérotor fadi taman sa taman.

8

¹ Ay niy atag i kéluhanay de uret gey begom dob ni sulat. Wén i gérotor fadi tom loo bé nan nuret gu, Been i Jesu Kristowe. Diyo dob lawayo mésar fingé dob kuwonoy barakatane Tulus. ² Mélaw diyo i Jesuse rigoné noy galbék i fadie dob tintuwe lawi i Tuluse dob lawayo. Békén étew i

réménigowe bé ni lawi, yamula Kadnan i réménigowe de.

³ I kéluhanay de gérotor do fadi, fénwaléyén bero do fadi inok miray ro do ayam tulakén dob Tuluse. Mélaw ségiléw so bé ni, i katome gérotor fadi, fatut wén i tulakén irayén dob Tuluse. ⁴ Amuk diniy Jesuse dob fantade ni, énda fakayén waléy fadi. Non wénén i do fadi do miray tulak loo bé fatute dob kitabe niray Moisese. ⁵ Endob i toowe, i galbéke rigonéy de fadi dob fantade ni, maak anlung i toowe galbék rigoné Jesuse dob lawayo diyo. Ségiléw so bé rénigo Moisese. Non amun gédétén rigoné noy safute lawi i Tuluse, bénréh i Tuluse de mano, “Rigo mo loo bé falas i tintuwe simbaan dob lawayo fénggito gu beem dob tuduke.” ⁶ Atin i galbék Jesu Kristowe bé kéfadi ne toow na fo fiyo bé galbék i de fadi do séfu Lebiwe. Atin ségiléw so bé ni, i mantuwe aguwon rénigo Tuluse inok tanggafé noy de étew toow na fo fiyo dob tafaye aguwon. Non toow na fo fiyoy fasade fégérigo bé mantuwe aguwon.

⁷ Amuk énda i kulang bé sunguwe aguwon, éndaén kailangan i mantuwe de. ⁸ Endob i Tuluse énda ménsuatén bé de étew modor bé sunguwe aguwon. Non wén i Ménsulate Kébéréh i Tuluse mano, “Gégumah i gaiwe, bang i Kadnane, rigoné kuy mantuwe aguwon inok tayakufé kuy de étew do séfu Israel. ⁹ Békén loo bé sunguwe aguwon rénigo gu kay de katufua ro bé gaiwe fénanangguwit gu bero mésut tidéw Egípto. Non énda ménodor ro bé no aguwon rénigo gu bero. Atin féndaya gu mélaw bero, bang i Kadnane. ¹⁰ Ay niy mantuwe aguwon rigoné ku kay de séfu Israel dob de gai moso, bang i Kadnane: Sulaté kuy de kitab gu dob de itunga ro brab dob de fédéw ro. Atin Begéney Tulus ruwe, brab beroy de étew gu. ¹¹ Atin mélaw, éndaén kailanga no moso toroé ro dob de dumo roy fantage bé Begéne maro, ‘Fatut gétiga kom i Kadnane.’ Non i kéluhanay de étew, do gérotor brab do

gérifantad, gétiga ron Begén. ¹² Atin fésagadé kuy de sala ro, brab éndaén tédéché kuy de tete rénigo ro.” Been i niy kékéréh i Tuluse. ¹³ Atin mélaw gétiga tom i sunguwe aguwon tafayén brab éndaén i lagaén, non bénréh i Tuluse bé wén i mantu de. Mélaw gétiga tom éndaén méusar i tafaye de non ménkédanén.

9

¹ I sunguwe aguwon rénigo Tuluse inok tanggafé noy de étew, wén i do suguén fantag bé kéfengadafé brab fantag bé fatute lawi féngadafan rigoné de étew. ² Rénigo roy safute lawi féngadafan. Atin wén i ruwo timan sibéyén. I sunguwe de, féndawét “Mékétéfu gonon”, atin wén i solo de brab ahayan brab fan tulakén dob Tuluse féndiyo dob ahayane. ³ Dob béngaway ni lawi wén i rindunge de. Atin wén soy rindung fégétéléb bé béngaway gérwonoy sibéy ne. Atin i ni sibéy féndawét “Toow fo Mékétéfu Sibéy”. ⁴ Diyo wén i bélwone ahayan gonon témuwég bé dukahe. Diyo soy baule méntéléb bé bélwone. Atin i baule ni, been i niy tandaé bé fasad i Tuluse. Dob ni baul wén i bélwone binangga nahuron bé amaéne féndawét “mana”. Atin diyo so dob baule niy tugé Aarone démenaun. Atin diyo soy de lumfayfay do batéw sénulatay Tuluse bé kitab ne. ⁵ Dob rotor i baule ni, diyo féntindég i de kéninontow i de barakatan do télaki émfégétigan bé diyo i Tuluse. Atin ménbékah i defafak ro dob rotor i gonone firikon bé darae fégékédan bé de sala. Endob énda kailangan fégétiga key begom i kéluhanay de fantag bé ni gonon béleewe ni.

⁶ Atin amun ménlosoén i kéluhanane loo bé ni, mahur i de fadi dob sunguwe sibéy féndawét “Mékétéfu gonon” sénga fuweh inok rigoné roy galbék ruwe. ⁷ Endob gérotor fadi saén i géahure dob gérwonoy sibéy féndawét “Toow fo Mékétéfu Sibéy”. Atin ségule saén mahur sénga ségébélantuwa. Atin amuk mahur

diyo, muwit dara tulaké no dob Tuluse inok mékédan i de salaén rénigo no do énda énggétiga no de, brab de sala rénigoy de dumo no do Judio sani de sala énda énggétiga ro rénigo ro. ⁸ I kéluhanay rigonéy de fadi ni, ténero i Ré mogor i Tuluse de betom bé amuk wén sénay sungu sibéy, énda séna fakayén géahur i de étew dob géruwowe sibéy féndawé “Toow fo Mékétéfu Sibéy”. ⁹ I de ni maak do anlung i de gai saén béleewe ni. Fégétiga no betom bé i kéluhanay de iray dob Tuluse brab de ayam do tulakén, énda gékédana roy de sala.

¹⁰ Non i ni kéfengingtulus, fantag saén bé de sugu bé atiy géamaay de étew brab géinémo ruwe, brab fantag so bé de kéurah ro bé de lowoh ro. Endob i de ni do sugu kay de lowoh ro saén, énda gékédana noy de sala ro. Tafayén i de ni do sugu, mélaw usarén saén taman dob gaiwe fégalinéy Tulusey aguwone.

¹¹ Endob i Kristowe, énggumahén brab ménwaléyén gérotor fadi i man tuwe aguwon toow na fo fiyo bé tafaye de. Atin i lawie féngadafan galbéko no, toow na fo fiyo bé tafaye de. Békén rénigoy de étew brab énda dini no dob fantade ni. ¹² Atin ménahur i Kristowe dob Toowe fo Mékétéfu Sibéy ségule saén non éndaén kailanga noy mahure man. Atin békén do dara kambing taloo no do dara nati safi i uwité nuwe fégétulakén dob Tuluse. Yamula nuvitén i kaane dara fégétulakén dob Tuluse. Atin mélaw ménfukas tom tidéw dob de sala tom taman sa taman. ¹³ Bé do gétah, dara kambing brab dara safi brab awéw i natiwe safi i firikéne dob de étew do mékérésik dob kéfengintulus i de Judio. Atin tidéw béno, éndaén mékérésik ro. ¹⁴ Atin amuk waléy malinis i ségétewé étew bé dara i de ayam, toow na fo fiyoy gérigonoy dara Jesu Kristowe. Non sabaf bé kétabang i Ré mogor i Tuluse énda i tamana no, nirayén i lowoh ne fégétulak dob Tuluse. Non énda i tete dob Kristowe, fiyon kloh. Atin i dara ne, linisé noy de fédew

tom dob de sala tom atin kédané noy késarig tome bé adate énda i lagaén. Atin mélaw gérígono tom i galbék i méuyage Tuluse.

¹⁵ Atin been i niy funa Kristowe ménwaléy kéfédawa tom inok rigoné noy ni mantu agéwon inok tanggaféy Tulusey de étew. Mélaw i kéluhana tome do fénemili i Tuluse, gédoté tom i kéfiyonone taman sa taman loo bé fénasad i Tuluse. Fakay i ni mérigo non wén i kéléhu, sani kéléhu Jesu Kris towe, kémédan bé de sala tom rénigo tom bé lala tome séna ménodor bé tafaye agéwon.

¹⁶ Ufama, wén i ségétew étew rémigo sulat bé lala ne séna méuyag. Sénulatén ké ati gégédote bé de tamukén féledé no ké méléhu. Atin amuk ménléhuén i ni étew, kailangan wén foy émféféngintoow de ménléhuén. Tidéw béno, i étewe gégédot bé tamuk ne, gédoté no loo bé kébéréh i sulate. ¹⁷ Endob amuk méuyag sénay ni étew réménigo sulat, énda i laga i ni sulat. Non wén saén i atagén ké méléhuén. ¹⁸ Atin ségiléw so bé niy tafaye ni aguwon rénigoy Tuluse. Non kailangan wén i dara inok mékédan i de sala. ¹⁹ Dob sun guwe de, bénréh Moisese dob de étew i kéluhanay de sugu tidéw dob kitabe. Tidéw béno, éndotén i dara i de nati safi brab kambing atin sénlawékén bé wayége. Tidéw béno, fénreén i bubul i bili-biliwe fénfuro no, brab fénreén soy klohe fongoy kayéwe féndawé isob. Atin tidéw béno, fénrikén dob de étew brab fénrikén so dob librowe sénulatan bé kitabe. ²⁰ Atin bé lala Moisese mémirik, ménbéréh mano, “Ay niy darae tanda i aguwone rénigoy Tuluse inok tayakufé no betom. Atin fatut odoro tom i ni agéwon non sénugu i Tuluse.” ²¹ Atin fénrik Moisese soy darae dob safute lawi féngadafan, loo so dob kéluhanay de gamít usarén bé kéfengintuluse. ²² Géfédew kéluhanay éntingayéne ténero i kitabe fatut firikon bé dara i ténulake inok waléy ro malinis dob adafay Tuluse. Atin amuk énda i dara ténulak, énda méfésagad i de étew bé de

sala ro.

²³ I kéluhanay de éntingayén ni dob lawie féngadafan kailangan firikon bé darae. Endob i de ni maak do anlung i toowe gamit i féngadafane dob lawayo saén. Mélaw fatut toow na fo fiyoy tulakéne dob tintuwe gamit i féngadafane dob lawayo. ²⁴ Mélaw ténulak Kristowey kaane dara. Atin énda ménahurén dob mékétéfuwe sibéy dob fantade ni non maak anlung i tintuwe féngadafan dob lawayo saén. Atin diyo béniy Kristowe rigoné noy galbék i kéfédawa tome dob adafay Tuluse. ²⁵ I gérotore fadi i de Judio mahur dob Toowe Fo Mékétéfu Sibéy sénga bélintuwa, muwit bé dara i ayame fégétulakén. Endob i Kristowe, énda kailanga noy mahure médoor gule témulak bé lowoh ne. ²⁶ Non amuk kailangan rigoné noy ni sénga bélintuwa, kailangan so mérasay médoor gule tidéw bé gaiy kélimbage bé duniyae ni. Endob kailanga no saén i mahure ségule amun gédétén i tamfaday de gai. Atin méntéfégito inok kédané noy sala i de étew sabaf bé kétulak ne bé lowoh ne. ²⁷ I kéluhanay de étew kailanga roy méléhue, tidéw bénorukukuméy Tuluse bero. ²⁸ Atin loo so bé ni, téménulak i Kristowe ségule inok mékédan i sala i de medoo étew. Atin séfule mangéy dob duniyae ni. Endob énda séfuleén inok kédané noy sala i de étew. Yamula séfule mangéy dini inok fégilidé noy kéfukas ne bé de étew mongot-mongot bé késéfule ne.

10

¹ I kitabe niray Moisese, maak anlung i de tintu fo fiyo iray Kristowe saén moso. Mélaw kulang i kitabe sémugu bé fatut témulak i étewe sénga bélintuwa taman sa taman. Non i kitabe énda géféwaléyo no métintuy étewe fégédét dob Tuluse. ² Mélaw i de étew ménéngintulus loo bé sénugu i kitabe, amuk tintu ménwaléy ro damén malinis dob adafay Tuluse, éndaén tete i de fédew ro fantag bé de sala ro, atin éndaén kailanga roy

témulake man ségule. ³ Endob i toowe, gétédémo ro énda séna ménkédan i de sala ro, non kailanga roy témulake sénga bélintuwa. ⁴ Non i dara i de safi taloo no do kambing, énda fakayén kémédan bé de sala.

⁵ Mélaw amun gédétén gégumah i Kristowe dob duniyae ni, bénréhén dob Tuluse mano, “Enda méuyot go bé de ayam do tulakén dob Beeme. Yamula rénigo moy kagéne lowoh inok been i niy fatute tulakén dob Beeme. ⁶ Non énda mésuwat go bé de ayam tulakén do tuwégén dob ahayane féngadafan brab de tulak fégékédan bé sala i de étew. ⁷ Mélaw, bérhéku dob Beeme, Tulus, ay niwu inok rigoné kuy kétaya muwe loo bé ménuslate fantag bé begéne dob libro muwe.” ⁸ Ay niy sunguwe bénréh Jesuse, “Enda méuyot go taloo no mésuwat go bé de tulak taloo no do ayam tuwégén dob ahayane féngadafan taloo no do tulak fégékédan bé de sala.” Bénréhén i de ni fiyon fo ké been i de niy sénugu i kitabe. ⁹ Tidéw bénorukukuméy Tuluse bero, “Tulus, ay niwu inok rigoné kuy kétaya muwe.” Mélaw gétiga tom kénday Tulusey tafaye aguwon tulakay de étew. Atin bénaliwana no bé tulak Kristowe. ¹⁰ Rénigo Kristowey kétayay Tuluse rigoné no. Mélaw i kéluhana tome ménwaléy tom malinis dob adafay Tuluse non ménkédanén i de sala tom sabaf bé tulak Jesu Kristowe, sani kaane lowoh. Mélaw éndaén kailangan i ségiyowe tulak.

¹¹ Dob tafaye aguwon, i de Judio do fadi témindégo ro dob lawie féngadafan sénga fuweh inok rigoné roy galbék ruwe témulak médoor gule. Gido loo, i de fégétulak ro énda fakayén kémédan bé de sala ro. ¹² Endob i Kristowe, téménulak saén ségule inok mékédan i de sala. Atin éndaén kailangan i ségiyowe tulak taman sa taman. Tidéw bénorukukuméy Tuluse inok máguléw. ¹³ Diyo so bénorukukuméy Tuluse inok máguléw. ¹⁴ Mélaw sabaf bé sébaane

saén tulak, ménlinis tom tidéw dob de sala tom, atin ménwaléy tom métintu taman sa taman.

¹⁵ Atin wén soy kétoro i Rémogor i Tuluse fantag bé ni. Non bénréhén dob Ménsulate Kébéréh i Tuluse mano, ¹⁶ “Begéney Kadnane, atin ay niy mantuwe aguwon rigoné ku inok gétayakufo kuy de étew moso. Sulaté kuy de kitab gu dob de fédew ro brab dob de itunga ro.” ¹⁷ Atin bénréhén man mano, “Endaén fégétédémé kuy de sala ro taloo noy de tete rigoné ro.” ¹⁸ Mélaw amuk ménfésagadan i de ni, éndaén kailangan i ségiyowe tulak fégékédan bé de sala.

¹⁹ Mélaw, do dumo gu, sabaf bé kéléhu Jesu Kristowe, éndaén kailanga tom i mégilake ké mahur tom dob Toowe fo Mékétéfu Sibéy gonoy Tuluse. ²⁰ Rénigo noy mantuwe aguwon bé kétulak ne bé lowoh ne. Atin i de étew modor bé ni aguwon, méuyag ro taman sa taman. Amun ménbinasay lowoh ne maak rindung i béngaway Toowe fo Mékétéfu Sibéy ménkusi inok géahur i de étew. ²¹ Atin wén i toowe fo gérотор fadi tom, sani Jesu Kristowe. Beeney uléw tome do étew i Tuluse. ²² Mélaw fatut fégédét tom dob Tuluse énda ubo-ubo i kékengadaf tome de, brab énda ruwo-ruwoy de fédew tom bé kéunur tome de. Fakay i ni non maak ménfirikon tomén bé dara Kristowe fégékédan bé de sala tom inok éndaén fégitungé tom i de sala tom. Atin malinisén i de lowoh tom non bé kékautise betom. ²³ Enda ruwo-ruwoy fédew tome de. Yamula fatut féégété tom i késarig tome bé nan ongot-ongoté tom, sani fayagé tome dob de étew sani kétumay Tuluse bé fasad ne. Non gésarig tom bé tumané noy fasad ne. ²⁴ Atin fatut fétausé tom i késégédaw tome, brab késétabang tome, brab kérigo tome bé fiyowe. ²⁵ Atin katom térenon i késélimud tome méngintulus loo bé adat tome. Katom iringén i de étew témérén ron sélimud méngintulus. Yamula, fatut séfébagéré tom i de fédew tom. Fatut fo rigoné tom i ni

non éndaén mérugayén tidéw béeleewe niy késéfule i Kadnane.

²⁶ Endob amuk fétausé tom i kérigo tome sala fiyon fo ké gétiga tom i toowe kétoro, mén singgula i kétulak Kristowe atin énda i tulak fégékédan bé de sala tom. ²⁷ Amuk wén i ségétew réménigo bé ni, fatut mégilak bé kékukum i Tuluse. Non wén i gonone aféy fégébinasa bé de étew sébanil bé Tuluse. ²⁸ Bé gétahé, i étewé géfélis bé kitabe niray Moisese, énda méuray i nay de kémukum de amuk wén i ruwo taloo no télew gétew témbo de. Mélaw féléhuén i ni étew mén sala. ²⁹ Amuk loo bé ni, ati keey i mérigowé dob étewé mika bé Nga i Tuluse? Toow fo gétimal i kékukume de non fénggitó noy kékarak ne bé énda i laga i dara Kristowe kémédan bé de salaén, sani tandaé bé mantuwe aguwon kay de étew inok waléy ro malinis dob adafay Tuluse. I étewé mika bé Nga i Tuluse, maak fénéngirasén i Rémogor i Tuluse fiyon fo ké mén gédaw i Rémogor i Tuluse de. Mélaw i ni étew médait fo ké gétimal i kékukume de. ³⁰ Non gétiga tom ménbéréh i Tuluse mano, “Begéney sémulie, Begéney kémukume.” Atin wén soy ségiyowe Ménsulat Kébéréh i Tuluse mano, “Kukuméy Kadnaney de étewén.” ³¹ Toow fo mékaid ké kukuméy Tulusey ségétewé étew. ³² Fégétédém gom i de énggétah do gai, amun mantu séna énggésobuto kom i toowe kétoro fantag bé Tuluse. Fiyon fo ké ménrasay gom, énda téménrén gom munur. ³³ Wén i do no do gai, i de énda munur fénéngiras ro begom dob adafay médoowe do étew atin fénrasay ro begom. Atin wén i no gai fénrasay roy de dumo gom, brab ménamung gom bero non ménuray i na gome bero. ³⁴ Atin ménuray i na gome bé de étew do ménférisu sabaf bé kéunur ruwe. Atin amun éndot roy de tamuk gom, énda ménkérít gom de. Yamula moror gom non gétiga kom wén i toow na fo fiyo tamuk gom gédoté kom moso, atin énda ménkédano taman sa taman. ³⁵ Mélaw, kagom térenon

i késarig gome bé Kadnane. Yamula féégét gom i késarig gome de inok gédoté kom i dakéle baras. ³⁶ Atin fatut fetingkél gom inok gérigono kom i kétayay Tuluse brab inok gédoté kom i fénasad ne. ³⁷ Non wén i Ménsulate Kébéréh i Tuluse mano, "Endaén mérugayén, gégumahén i nan ongot-ongoté kom. Enda mélisén. ³⁸ Atin i de métintu do étew gu, gédoté roy umule magufusa non ménunur ro Begén. Endob amuk wén i ségétew bero ménbaleng i fédew ne sabaf mégilak atin éndaén munurén, énda mésuwatu de." ³⁹ Endob i de betom, do dumogu, békén betom i de ménbaleng do fédewén brab do téménréni do munur do mékukum ro mélaw. Békén loo bénan i de rigoné tom, non ménunur tom atin mélaw méfukas tom tidew dob de sala tom.

11

¹ Ati kéunure? Wén i kéunur tom amuk tintu gétiga tom gédoté tom i de ongot-ongoté tom, sani de éntingayén énda séna gito tom de. ² I de énggéétah do étew, fénswat roy Tuluse sabaf bé kéunur ruwe. ³ Sabaf bé kéunur tome bé Tuluse, énggésobuto tom i kélémbag ne bé duniyae ni dob kébéréh ne saén. Lénimbagén i kéluhanay de énggiton tidew dob de énda do giton.

⁴ I Abele bé do gétah, sabaf bé kéunur ne, nirayén i toowe na fo fiyo tulak dob Tuluse bé tulake niray i ofo ne Kain. Sabaf bé kéunur ne, kénarang i Tuluse métintu, non ténayakufén i tulak ne. Atin sabaf bé kéunur ne, wén soy kétoroén dob betome fiyon fo ké ménléhuén.

⁵ Atin i Enoke, sabaf bé kéunur ne, énda ménléhuén. Yamula féndiyat i Tuluse atin éndaén énggitoy de étew de non diyoén dob lawayo. Wén i Ménsulate Kébéréh i Tuluse fantag bé Enoke bé ménswat i Tuluse de bé énda séna déméniyatén de. ⁶ Atin amuk énda munur i ségétew étew bé Tuluse, énda géfésuwata noy Tuluse. Non i étewe fégédét dob Tuluse, kailangan munur bé wén i Tulus brab barasay Tulusey kéluhanay de séméléd de.

⁷ Atin i Noehe bé do gétah sabaf bé kéunur ne, réménigo barko. Non amun bénréh i Tuluse dob beene bé wén i gégumah dakél dunuk, ménunur de. Mélaw nodoro noy sugu i Tuluse rémigo barko. Atin énda mélaw ménléné i Noehe brab de samungén fiyon fo ké kénukum i Tulusey de ségiyo étew dob duniyae ni. Atin mélaw sabaf bé kéunur ne, fénggito Noehe bé tete i de kéilawan. Atin fénwaléy i Tuluse métintuy Noehe sabaf bé kéunur ne.

⁸ Atin i Abrahame so, sabaf bé kéunur ne, nodoro noy kébéréh i Tuluse bé kétawag i Tuluse de brab sénuguén mangéy dob ségiyowe ingéd inok gédoté noy fantade fénasad i Tuluse irayén de. Mélaw tétagakén i kaane ingéd sabaf bé kéunur ne, fiyon fo ké énda gétiga noy ayo nuwe de.

⁹ Atin sabaf bé kéunur ne, ménbati i Abrahame diyo dob fantado no, sani fénasad i Tuluse irayén de. Ménbati diyo maak ségétew miloh saén fiyon fo ké been i niy fantade fénasad i Tuluse irayén de. Ménbati dob sa-fute lawi rénigo no loo so bé nga ne Isak brab bebe né Jakob. Bero soy fénasaday Tuluse de irayén i fantade ni. ¹⁰ I Abrahame ni, nongot-nongotén i ingéde dob lawayo, sani ingéde bénantak i Tuluse brab rigoné no brab énda mékédano taman sa taman.

¹¹ Atin sabaf bé kéunur ne, i Abrahame ménwaléy boh, fiyon fo ké toowén fo lukés loo soy bawag ne Sarah. Endob fiyon fo ké lukés ron fo toow, séménarig ro dob Tuluse bé tumané noy fasad ne. ¹² Atin mélaw fiyon fo ké toow fo lukésen i Abrahame ni brab éndaén géféoboro noy bawag ne, ménwaléy so katufuay médoowe étew. Ségiléw ro bé kédooy de gitoon dob lawayo brab de farék dob dénsaane.

¹³ I de ni do étew ménunur bé Tuluse, ménléhu ro bé gaiwe énda séna énggédot roy fantade fénasad i Tuluse irayén bero. Gido loo, énda téménréni ro ménunur, non gétiga roy wén i gaiwe moso gédoté roy nan

ongot-ongoté ro, sani fénasad i Tuluse bero. Atin fénggito ro bé békén tintu ingéd roy duniyae ni, yamula i tintuwe ingéd ro dob lawayo diyo.

¹⁴ Atin i de étew béleewe ni loo bé niy kébéréh ruwe, fégito ro békén dob fantade niy tintuwe ingéd ro, yamula dob lawayo diyo. ¹⁵ Non i ro Abrahame, énda ménggundoy ro bé ingéde fénled ro. Amuk ménggundoy ro de, wén soy gai géséfule ro mangéy diyo.

¹⁶ Yamula, ménuyot ro fo mangéy batí dob ségiyowe ingéd, sani toowe na fo fiyo ingéd dob lawayo diyo. Atin i Tuluse énda mélaw mémala no ké fédawétén Tulus ro. Non ténafayén i ingéde batioy de ni étew.

¹⁷⁻¹⁸ Atin sabaf bé kéunur Abrahame bé Tuluse, irayén damén i nga ne Isak fégétulakén dob Tuluse. Toow fo fédewén miray bé buntunge ngaén fégétulakén fiyon fo ké wén i fasad i Tuluse de mano, “Bé nga me Isak, waléy go katu fuay médoowe étew.” Atin fiyon fo ké fénasaday Tulusey Abrahame loo bé ni, ténéngkadén soy Abrahame féléhué noy nga ne. Atin ménodor i Abrahame bé sugu i Tuluse.

¹⁹ Non gétiga Abrahame gétébuleoy Tuluse soy Isake. Atin maak ténébule i Tuluse so non amuk énda génlé i Tulusey Abrahame, féléhué noy nga ne Isak.

²⁰ Atin i Isake amun lukésén, sabaf bé kéunur ne bé Tuluse, nongotén dob Tuluse bé féfiyoné no mosoy de ngaén, ro Jakob brab Isaw.

²¹ Atin i Jakobe, sabaf bé kéunur ne bé Tuluse, amun gédétén méléhu, nongotén dob Tuluse bé féfiyoné noy séngae bebeén, sani de nga i nga ne Jose. Rénigo noy ni bé lala ne séménanday dob tugé ne fénéngadafén i Tuluse.

²² Atin i Josehe so, sabaf bé kéunur ne bé Tuluse, amun gédétén méléhu, bénréhén i fantage bé kéésut i de séfuén, sani de Judio, tidéw Egipto. Atin bénréhén so bé fatut uwité roy bangkay ne ké mésut ro.

²³ Atin i de lukés Moises, sabaf bé kéunur ruwe, bénunéy roy nga

ruwe Moises taman télén gétérésang kélunganon i idad ne. Non i datue dob Egipto, sénuguén bé féléhué i kéluhanay de nga lagéy i de Judio. Endob i de lukés Moisese énda ménggilak ro mémélis bé ni sugu, non ménunur ro bé Tuluse. Atin énggito ro toow fo fiyoy nga ruwe.

²⁴ Atin i Moisese ni so, sabaf bé kéunur ne bé Tuluse, amun métawanén étew, ménika de ké fédawétén nga i libune nga i Datue dob Egipto. Rénigo noy ni fiyon fo ké toow fo fiyoy goho nuwe dob lawi i datue gono no ménruk.

²⁵ Endob sabaf bé kéunur ne, mas ménuyot mérásay séréngan bé de dumo no do étew i Tuluse bé singkowe saén kéféguyaya muwit sala.

²⁶ Fénggitungén, mas fiyo ké mérarék i de étew de sabaf bé kéunur ne bé Kristowe géumah moso bé kéluhanay de ungangén dob Egipto gédoté no. Non gétiga no toow na fo fiyoy baras ne gédoté no tidéw dob Tuluse moso.

²⁷ Atin sabaf bé kéunur ne, ménékédan i Moisese dob Egipto fiyon fo ké mérarék i Datue de, non énda mágilakén. Atin ménfedayday dob de gai do mérégén non maak gito noy éndae giton Tulus manangguwit de.

²⁸ Atin sabaf bé kéunur ne, rénigo noy kandulie féndawét “Témara”. Mélaw sénuguén i de Judio mémirik bé dara i bili-biliwe dob de fintu i de lawi ro inok i télakiwe méméléhu taraa no saén i lawi i de Judio atin énda féléhué noy de ofo nga dob séngae lawi loo bé rénigo nuwe dob de étew dob Egipto.

²⁹ Atin sabaf bé kéunur ruwe bé Tuluse, amun ménuts i de Judio tidéw Egipto énggifar ro dob do-gote féndawét “Furo Dogot” maak ménagéw ro dob tikare fantad. Endob amun ténundug i de sundalo tidéw Egipto bero atin téménlama ro mifar, ménléne ro kéluhanan non ménsefule i wayége.

³⁰ Atin sabaf bé kéunur i de Judio, ménrundas i émbagére diding géliwéti bé ingéd i de sébanil bero féndawét Jeriko. Non ménodor ro bé sugu i Tuluse bé agéwé ro liwétén sénga fuweh

taman fitéw gétérésangan. Tidéw béno, rénundas i Tuluse. ³¹ Endob bati diyo so dob Jerikoy sundale libun féndawéti Rahab. Atin sabaf so bé kéunur ne, énda ménléhuén sérénagan bé de étew dob ingéd ne do mémélis bé de sugu i Tuluse. Non tényakufén i de sénarigoy odoroy de Judio, sani de sénugu ro témulik bé kébagér i no ingéd. Endob sénékém ro saén i kétulik ruwe de.

³² Témérénun muret fantag bé de énggéétah do étew ménunur bé Tuluse, loo bé ro Gideone, ro Barak, Samson, Jeffe, Dabid, Samuel brab sénarigoy Tuluse muret bé kébéréh ne. Non kulang i gai guwe muret fantag bé kéluhana ruwe. ³³ I de dumo bero, sabaf bé kéunur ruwe, ménstiboh ro bé de ségiyo do dakél ingéd atin téménaban ro. Méngguléw ro métintu, atin énggédot roy fénasad i Tuluse. Atin i de dumo bero énggétigémo roy ba i de mérayar brab do émbaraw dakél binatang féndawét leon inok énda gékekeo ro bero. ³⁴ Atin i de dumo bero sabaf bé kéunur ruwe, énda méntuwégi ro dob de toow fo dakél do aféy. Atin i de dumo bero énda ménléhu ro bé de sundang i de sébanil bero. Fiyon fo ké mélubay ro, ménwaléy ro émbagér sabaf bé kéunur ruwe inok gétabana roy de sundalo sébanil bero tidéw dob de ségiyo ingéd. ³⁵ Atin wén soy de libun bero mémentebule i de nga ro sabaf bé kéunur ruwe.

Atin i de dumo bero, ménléhu ro bé kéférasaye bero, non ménika ro tangéyén. Mas ménuyot ro mérasyay brab méléhu inok tébule ro brab gédoté roy toowe na fo fiyo kéfaguyag. Rénigo roy ni sabaf bé kéunur ruwe bé Tuluse. ³⁶ I de dumo bero de munur, déniyangka ro bero brab bénadas ro bero. Atin i de dumo bero, nikét ro brab fénrisu ro bero. ³⁷ I de dumo bero, ménléhu ro bé kéibérone bero batéw. Atin i de dumo bero, sénufak ro bero bé ragarie. Atin i de dumo bero, téníboh ro bero bé sundange atin ménléhu ro. Atin i de dumo bero, énda i do kégal ro saliyu bé kulit i de bili-bili brab do kulit kambing.

Toow ro fo méskinan brab toow ro fo ménrasay. ³⁸ Atin i de dumo bero de munur ni, énggétagaka roy de lawi ro brab ménangéy ro bati dob de gonon énda i do étew de bati brab dob de tuduk, brab dob de takub brab dob de tosong fantad non ferasayén ro. Enggiton énda fo médait i de tete étew sétifon dob duniyae ni bé de ni do fiyo étew munur bé Tuluse.

³⁹ Toow fo ménswat i Tuluse bero de ni do étew sabaf bé kéunur ruwe. Gido loo, énda séna énggédot roy fénasad i Tuluse irayén bero. ⁴⁰ Non bénantak i Tuluse betom i toowe na fo fiyo aguwon. Mélaw kailanga ro ongot-ongot betom do étew béléewe, inok tumané noy fasad ne bero sérénagan betom.

12

¹ Mélaw gétédémo tom i de médo do énggéétah étew do méégét ro munur bé Tuluse. Atin maak téngténgé ro betom béléewe ni. Atin i betome, maak sékuya tom bé lala ruwe téméngténg. Mélaw fatut tagaké tom i de éntingayén funa tom métana léméntu. I atag i ni kébéréh gu, fatut tagaké tom i de sala funa tom énda gérigo bé kétayay Tuluse. Atin fatut mégéror tom rémigo bé galbék i Tuluse. ² Atin fatut féégété tom i kégéitung tome fantag bé Jesuse, sani émféunure betom brab émféégéte bé kéunur tome. I Jesuse, féndayaén i de étew kémélabo de dob kruse. Atin fiyon fo ké mémémalay kéléhu ne dob kruse, énda fégitungé no de. Yamula fénggitungén i kéror ne ké gilid i kérasay ne. Atin béléewe ni diyo ménasar fingé dob kuwonoy Tuluse méguléw.

³ Fétuntay gom i ménrigowe dob Beene. Féndayaén i de tete étew émférasay de. Mélaw i begome, fatut fébagér gom i de fédew gom brab kagom témérén munur, fiyon fo ké wén i émférasay begom. ⁴ Non fiyon fo ké atuho kom i salae, énda séna féléhuén gom sabaf bé kéunur gome. ⁵ Aw énggélifoto komén i kébéréh i Tuluse dob begome do ngaén, sani kébéréhe émféfiyo bé de fédew gom? Bang i Tuluse, “Nga gu, fétuntay go

ké fifité ku beem sabaf bé de salaém. Atin kago tete i fédew me de ké fifité ku beem.⁶ Non i de étew fifité ku ké mésala ro, beroy de étew kégédawa ku. Atin i de étew fifité ku ké rémigo ro tete, beroy de étew tényakuf gu maak do nga gu.”⁷ Mélaw amuk mérasay tom, tingkél gom atin fégitung gom maak fifitéy boh gome begom sabaf bé de sala gom. Non amuk kérasayan gom, gétiga kom i Tuluse tényakufén begom maak do ngaén. Non i kéluhanay de boh, fifité roy de nga ro amuk rigoné roy tete. ⁸ Atin amuk énda fifitéy Tuluse begom ké mésala gom, békén gom do tintu ngaén, éndob do ngaén saén dob liyuwe. ⁹ I de katom boh dob fantade ni, fifité ro betom ké rémigo tom tete. Atin mélaw basana tom bero. Mélaw, toow fo fatut ké fédayaé tom i Tuluse méguléw betom. Non Beeney Abay tome dob lawayo atin irayén betom i umule magufusa ké rigoné tom i ni. ¹⁰ I de katom do boh dob fantade ni, fifité ro betom ké nga tom séna, loo bé gékaranga ruwe fiyo. Endob i Tuluse fifité no betom inok tabanga no betom minut métintu loo bé kétintu nuwe. ¹¹ Amuk fifitéy Tuluse betom, mika tom de bé no gai brab tete i de fédew tom de. Endob sabaf bé ni moror tom de moso ké gégumah i gaiwe waléy tom métintu brab métanék i de fédew tom.

¹² Mélaw, do dumo gu, amuk maak lugotén gom rémigo bé kétayay Tuluse féégét gom i kénur gome. ¹³ Taus gom agéw dob métintuwe aguwon inok i de étew énda séna méégét i kénur ruwe, amuk gito ro begom énda minut ro mélubay, yamula minut méégét i kénur ruwe.

¹⁴ Rigo gom i kéluhanay de gérigono kom dob kéluhanay de étew inok énda gésékérit gom. Atin fétintu gom sénga tékélid, non amuk énda métintu gom, énda gito gom i Kadnane moso. ¹⁵ Atin ingat gom inok énda i ségétew begom témérén témayakuf bé kégédaw i Tuluse. Non i étewe loo bé ni ségiléw bé

nohoke féla brab bisay onok ne, non mégukét i de munur. Atin been i niy funay de dumo no munur waléy so gésala. ¹⁶ Atin ingat gom inok énda i ségétew begom waléy mékérésik i adat ne taloo no diguré noy Tuluse, loo bé rénigo Esawe bé do géyah. Non énda génulaa noy kuwagib ne tidew dob Tuluse. I kuwagibe ni kaan, non been i ofo. Endob fénbéléyén i kuwagib ne dob tuwaréy ne inok géama saén ségule. ¹⁷ Gétiga kom, tidew béno ménuyot de ké ongotéy boh ne dob Tulusey féfiyoné no. Endob éndaén fakayén, non fiyon fo ké kémérew, éndaén méfégalin i rénigo nuwe bé kékéluluk ne bé kuwagib ne inok gédoté no saén i kaamee.

¹⁸ I aguwo tome mangéy dob Tuluse, énda ségiléwén bé aguwoy de katufua tom do Judio. Non fénfégédét ro dob sébaane tuduk gito ro, sani tuduke féndawéti Sinai gonoy mérinoe aféy. Délémon diyo non bé mégéfole rawén brab émbagére réfuruh. ¹⁹ Atin bé béno, ménbéréh métanug i témburiwe brab métanug i kékéréh i Tuluse. Atin i de étew diyo, amun énggelingoo roy ni émbéréh, nongot roy éndaén damén émbéréhén ségule, ²⁰ non toow ro de fo ménggilak. Non ménbéréh mano, “Amuk wén i kémuwah bé tuduke ni, fiyon ayam, kailangan féléhuén ibéron batéw.” ²¹ Atin toow fo mékégilak i no gonon gito ro. Mélaw ménbéréh i Moisese mano, “Lémukubu bé kégilak guwe.”

²² Endob i betome, békén loo bé nan i kékégédét tome dob Tuluse. Non maak magéw tom dob tuduke Sion gonoy ingéd i méuyage Tulus. I ni ingéd féndawéti Jerusalem diyo dob lawayo, gonoy firoye ngibu télaki.

²³ Maak fégédét tom dob de sungu nga i Tuluse, sani de étew ménsluat i de dawéti ro dob lawayo. Diyo ro ménlimud toow fo moror. Atin fégédét tom dob Tuluse, sani kémukume bé kéluhanay de étew. Atin ménfégédét tom so dob de rémogor i de ménléhu do métintu étew, sani de fénwaléyén do

toow fo métintu dob lawayo. ²⁴ Atin ménfégédét tom so dob Jesuse, sani réménigowe bé mantuwe aguwon inok gétanggafay Tulusey de étew. Atin ménfégédét tom so dob dara Jesuse fénirik. Toow na fo fiyyo dara Jesuse bé dara Abele. Non i dara Jesuse been i tanda i kégédaw i Tuluse. Endob i dara Abele, been i tanda i kékukum i Tuluse.

²⁵ Mélaw ingat gom inok énda mika gom mégélingo bé kébérén i Tuluse. Non ménkukum i de énggéétah do étew ménika mégélingo bé Moisese sani sénarigoy Tuluse muret bé kébérén ne dob duniyae ni. Mélaw i betome so, amuk énda munur tom bé kébérén i Tuluse tidew dob lawayo, toow na fo énda gésélyah tom bé kékukum i Tuluse. ²⁶ Bé do gétah, ménkuyung i duniyae non ménbérén i Tuluse. Endob béléewe ni, wén i fasadén mano, "Kuyungé ku man ségule i duniyae brab lawaye so." ²⁷ Ay niy atag i ni kébérén: Mékédan i de éntingayén do mékuyung, sani de lénimbag i Tuluse. Mélaw i de éntingayén énda mékuyung ro énda mékédan ro.

²⁸ Mélaw fatut fésalamat tom dob Tuluse, non géahur tom dob kéféguléw i Tuluse énda mékuyungén taloo no mékédan. Fatut féngadafé tom i Tuluse loo bé kétaya nuwe de. Atin fatut basana tom i Tuluse brab mágilak tom mémélis bé de suguén. ²⁹ Non aféy i fégékukum i Tuluse.

13

¹ I betome do sédumon munur bé Kristowe, fatut fétausé tom i késégédaw tome. ² Katom lifotén i témayakufe bé de étew énda séna gélolo tom de dob de lawi tom. Wén i de étew tényakuf roy de étew énda séna gélolo ro bero, éndob i toowe, tényakuf roy de télaki, éndob énda gétiga ro de. ³ Atin kagom lifotén i de férisu. Fatut méuray i na gome bero maak begom soy de ménférisu diyo dob berowe. Ségiléw so bé de mérasay, fatut méuray i na gome bero maak begom soy kérasayan, brab fatut fagifat gom bero.

⁴ Atin fatut basana kom kéluhanan i késébawage. I de sébawag fatut énda sétayan ro bé de ségiyo. Non kukuméy Tulusey de étew sétayan ro saliyu bé bawag ruwe brab de bigaén.

⁵ Atin kagom fésubranén i kétaya kome bé kurtae. Fatut kasukudan gomén bé wéne dob begome. Non bénréh i Tuluse mano, "Enda tagaké ku begom, taloo no fédayáé ku begom." ⁶ Mélaw sabaf bé késarig tome bé Tuluse, fatut béréhé tom matom, "Kadnan i tétabangane begén. Mélaw énda mágilaku bé de étew brab kérigo ruwe begén."

⁷ Fégétédém gom i de énggéétah do odoron, sani de sénarigoy Tuluse muret bé kébérén ne dob begome. Fégitung gom i de fiyo adat ro brab de rigoné ro taman kéléhu ro. Iring gom i kéunur ruwe. ⁸ Non i Jesu Kristowe, énda émfégalino. Yamula ségiléw so tidew féganay taman béléewe ni, brab taman sa taman. ⁹ Atin kagom munur bé de ségiyo-giyo kétoro funa kom témerén munur bé toowe kétoro. I kégédaw i Tuluse féégété noy kéunur tome. Endob i kéodorone bé de sugu bé atiy de amaén énda géamaa tom de, énda fo féégété noy kéunur tome. I de étew odoro roy de ni do sugu, énda gétabanga no bero.

¹⁰ I betome do munur bé Kristowe, wén i tulak tom, sani Jesu Kristowe. Endob i de fadi i de Judio, sani de témulak séna dob lawie féngadafan dob Jerusalem, énda i kuwagib ro mama bé katome tulak. ¹¹ Gétiga tom amuk témulak i de Judio, i gérotore fadi i de Judio, muwit bé dara i ayame témulak mangéy dob Toowe fo Mékétéfu Sibéy inok irayén dob Tuluse inok kédané noy de sala. Endob i de lowoh i de ayam do fénléhu, métuwégi dob liyuy ingéde. ¹² Been i niy funa Jesuse ménléhu dob liyuy ingéde Jerusalem, inok kédané noy de sala i de étew bé dara ne inok mélénis ro dob adafay Tuluse. ¹³ Mélaw fatut mangéy tom dob liyuy ingéde inok géfégédét tom dob Beene. I atag i ni, fatut tagaké tom i adat i de Judio inok sémarig

tom saén bé Jesuse. Fatut rigoné tom i ni fiyon fo ké fémalané ro betom séréngan bé Kristowe. ¹⁴ Non énda i ingéd dob fantade ni gono tom bati taman sa taman. Yamula ongotongoté tom i tintuwe ingéd tom batio tom moso. ¹⁵ Mélaw fatut dayewé tom démoyun i Tuluse, atin fayagé tom i kéunur tome bé Jesuse. Non been i nan i maake kétulak tom bé Jesu Kristowe, sani fadi tome. ¹⁶ Atin kagom lifotén i rémigowe fiyo brab sétabang gom, non i ni adat maak tulak so emfésuwat bé Tuluse.

¹⁷ Fatut odor gom bé de sugu i de odoro kom do munur bé Kristowe. Non beroy de démoyun témulama bé kéunur gome inok minut mégét. Non wén moso i gai susinéy Tulusey de galbék ro ké fiyo taloo no énda. Atin amuk modor gom bé de sugu ro, moror ro gémalbék. Atin amuk énda modor gom bé de sugu ro, waléy tete i de fédew ro atin énda tabanga ro begom.

¹⁸ Fétaus gom i kédasala kome begey. Gétiga key énda i rénigo gey tete non téménlama gey rénigo fiyo sénga tékélid. ¹⁹ Atin ongoté ku dob begome dasala kom begén dob Tuluse inok géséfuleu magad mangéy dob begome.

²⁰ Ténébule i Tulusey Kadna tome Jesu Kristo. Atin amun ménléhu i Jesuse, i dara ne ménwaléy tanda i mantuwe aguwon rénigoy Tuluse inok tanggafé noy de étew. I ni aguwon énda mékédano taman sa taman. Atin sabaf bé kéléhu Jesuse maak Beeney toowe fo fiyo témalima begom do maak bili-bili. ²¹ I Tuluse fétanéké noy de fédew, irayén damén begom i kéluhanay de kailanga kom inok gérigono kom i kétaya nuwe. Atin tabanga Jesuse damén betom inok gérigono tom i funay Tuluse mésuwat. Médayew damén i Jesu Kristowe taman sa taman. Amen!

²² Do dumogu, ongoté ku begom bé fétingkél gom mégélingo bé ni sénulat

gu funay de fédew gom émbagér. Non énda métaah i sulat guwe ni begom. ²³ Méuyotu de ké gétiga kom i fantage bé dumotome Timoteo. Mémentangéyén tidew dob férisunone. Amuk magad damén i kégumah ne dini, géodor begén ké angéyé ku begom tukawén.

²⁴ Ségifa gom begey i kéluhanay de odoro kom do étew i Tuluse. Atin i de dumogom munur bati dob ingéde ni Italiya, ségifaé ro begom.

²⁵ Mégédaw damén i Tuluse begom kéluhanan.

I Sulat Santiagowe

Santiagoy dawét i lagéye séménulat bé ni sulat. Been i tuwaréy Jesu Kristowe. Sénulatén i ni sulat dob de kéluhanay de munur bé Jesuse.

Dob ni sulat, ténero Santiagowe bé fatut féténgténg i de étew i kéunur ruwe inok giton tintu ro fo munur. Ténoroén bé fatut ro rémigo fiyo brab métintu émféténgténg bé kéunur ruwe. Ténoroén bé amuk énda fiyoy de rigoné ro, énda i atag i kéunur ruwe.

¹ Begéney Santiagowe, sani suguéy Tuluse brab Kadnane Jesu Kristo. Sulata kuy kéluhanay de étew i Tuluse do ménbéragar dob de séségiyo-giyo do ingéd dob duniiae ni. Ségifaé ku begom kéluhanan.

² Do dumo gu munur bé Jesuse, oror gom amuk kérasayan gom bé médoowe do kétengkad begom. ³ Non gétiga kom amuk fédayday gom munur ké téngkadén i kéunur gome, waléy mélaw témingkél i fédew gome. ⁴ Atin fatut fo fetingkél gom inok waléy gom toow fo métintu brab énda i kulang dob kétintu gome. ⁵ Endob amuk wén i ségétew begom kulang sénay kégétiga nuwe bé fatute, ongot gom de dob Tuluse. Atin iraya no begom bé kégétigane non toow fo mégédaw i Tuluse brab méuyot fo témantu miray dob kéluhanane. ⁶ Atin amuk démasal gom mongot, fatut toow gom de fo munur bé gédoté kom i ongoté kome, kagom féreruwonén i de fédew gom. Non i étewe ruwo-ruwoy fédew ne, démoyun émfarin i itunga nuwe, ségiléw bé bagéle dob dogote magéw sabaf bé kékfanir i réfuruhe de. ⁷ I étewe loo bé ni, békénén fatut kémarrang bé iray i Kadnane dob beeney no ongoté no.

⁸ Non ruwo-ruwoy fédew ne, énda sémarigén bé Tuluse. Brab énda fo gétiga no de ké atiy toowe fo kéuyoto no rigoné no.

⁹ I de méskinan do munur bé Kris-towe, fatut ro moror non fégérotoréy Tuluse bero. ¹⁰ Atin i de kawasa do munur bé Kristowe, fatut ro so moror non fégéritadéy Tuluse bero. Non amuk méléhu i kawasawe, ségiléw saén bé kéléhu i de flores, non mékédan i tamuk ne dob beene. ¹¹ Non i de flores, amuk sémbang i térsange, toow fo méduf atin méléhu i de flores. Mégangu ro brab éndaén fiyoy falas ruwe. Loo bé niy kébinasay kawasawe étew bé lala ne fégéror gémalbék kémurta.

¹² Moror i étewe fédayday témingkél brab sémarig bé Tuluse dob gaiwe téngkadén. Non amuk gilid i kétengkade de, gédoté noy umule magufusa sani barase fénasad i Tuluse irayén dob de étew méimu bé Tuluse. ¹³ Atin amuk wén i ségétew ménsala sabaf bé kétengkade de, békén fatut bérhéno mano, “Tulus i témingkade begén inok rigoné kuy salae.” Non i Tuluse énda téngkadé noy de étew inok rémigo ro sala, atin énda i gétingkade bé Tuluse. ¹⁴ Endob i toowe, kéluhanay étewe métengkad ro amuk féfanangguwit ro bé de tete kétaya ro. ¹⁵ Tidéw béno, amuk modor ro bé de tete kétaya ro, mésala ro. Brab amuk démayday ro rémigo sala, méléhu ro. ¹⁶ Mélaw do gulaané ku do dumo gu, kagom fégitungén de ké fésalaéy Tulusey étewe, non békén toow i nan.

¹⁷ I kéluhanay iray i Tuluse, fiyo. Brab i kéluhanay toowe fiyo, tidéw dob Abaye Tulus, sani léménimbage bé kéluhanay rémendawe dob lawayo. I de ni do étingayén, émfarin i kéréndaw ruwe. Endob i Tuluse, énda émfarino. ¹⁸ Non been i niy kétaya nuwe, fénwaléyén betom do ngaén bé toowe kékéréhén, inok waléy tom do toow fo gérotor bé kéluhanay de étingayén do lénimbagén.

¹⁹ Do dumo gu, fégétédém gom i ni, kagom magad mékérit. Yamula fégélingo gom na métah, tidéw béno,

been nay no béréh gom. ²⁰ Kétayay Tuluse ké rémigo gom fiyo, éndob énda gérigo gom fiyo ké mékérít gom. ²¹ Mélaw tagak gom i de mékérésik do adat gom brab kagomén rémigo tete. Unuro kom i Tuluse brab rigo gom i kétaya nuwe. Enggélingoo komén i kékéréd i Tuluse. Atin béleewe ni, fatut munur gom bé kékéréd i Tuluse sani mémukase begom bé de sala gom.

²² Mélaw odoro kom i kékéréd i Tuluse. Buluk fégélingoé kom saén i kékéréd i Tuluse éndob énda rigoné kom de, fagakara kom saén i kagome lowoh. ²³ I étewe mégélingo saén bé kékéréd i Tuluse éndob énda odoro no de, ségiléw bé étewe téméngténg dob féngalungone, atin gito noy falas ne. ²⁴ Endob amuk énggilid gito noy falas ne atin magéw, atin tékédan, sonom so bénou mélifot bé falas ne. ²⁵ Endob i étewe toow fo féganadé no brab odoro noy kékéréd i Tuluse, békén saén fégélingoé no brab magad gélifoto no, gédoté noy de kéfiyonon tidew dob Tuluse bé kéluhanay de rigoné no. Atin i kékéréd i Tuluse, been i niy tintuwe kukuman énda i kulang de, mémukas bé de étew dob de sala ro.

²⁶ Amuk émbéréd i ségétéwe étew méngintulus kun, éndob énda fo démilaén tuko ké émbéréd, énda i atag i kékéngintulus ne, atin tugio noy kaane so lowoh. ²⁷ Dob karang i Tuluse, i toowe méngintulus do étew, tabangé roy de kérégénan libun do baléw, brab tabangé roy de kérégénan nga énda i do lukés ro. Atin i de étew do tintu fo méngintulus énda odoro roy de éntingayén do tete dob duniyae ni, inok énda waléy ro tete.

2

¹ Do dumou gu munur, séménarig gomén bé Jesu Kristowe barakatan Kadna tom. Mélaw énda fatutén ké wén i isu ramigo kom. ² Ufama, amuk sélimud gom méngadaf bé Tuluse atin wén i ruwo gétew étew gégumah. I ségétéwe de fiyoy kégal ne brab téménising bélowan. Atin i ségétéwe de méskinan brab ménkusi i kégal ne. ³ Atin amuk toow fo

fégadata kom saén i kawasawe de brab féésaré kom dob toowe fo fiyo ésaran, brab énda féésaré kom i miskinane de taloo no féésaré kom saén dob suduwe, énda fo fiyoy adat gome. ⁴ Amuk rénigo gom i ni, ménasala gom bé kéramig gome, atin tidew dob de tete kékéfítung gom i de ni kékukum gom.

⁵ Fégélingo gom do gulaané ku do dumou gu. Fénemili i Tulusey étewe méskinan inok waléy ro maak kawasa sabaf bé kékunur ruwe. Non i kékunur ruwe, been i kékawasa ruwe. Atin waléy ro so do kaan étew féguléwo no. Féguléwo no bero non been i niy fasad i Tuluse dob kéluhanay méimue bé Tuluse. ⁶ Endob i begome, siyawé kom i de méskinan. Ati de étew do énda mégédaw ro begom brab fégésé ro begom uwitén mangéy sékukum dob de kékédewan? Békén i de méskinan, yamula i de kawasa. ⁷ Been soy de niy de étew béréhé roy tete fantag bé fiyowe dawét Jesuse sani gefee betom.

⁸ Wén i toowe fo gérotor sugu gébasana tom dob Ménsulate Kékéréd i Tuluse mano, “Féimu go bé dumou muwe loo so bé kékéimu me bé kaame lowoh.” Amuk unuro kom, gérígono kom i fatute. ⁹ Endob amuk wén i isu ramigo kom atin basana kom saén i de étew bé de fiyo kégal ro, taloo no bé kedooy de kurta ro, ménasala gom. Non fénlis gom i kukumane niray Moisese. ¹⁰ Atin amuk énda odoro kom i sébaane sugu dob kukumane, maak énda so nodoro kom i kéluhanay de kukuman. ¹¹ Ufama, békén saén bénréh i Tuluse mano, “Kagom sétayan bé ségiyowe saliyu bé bawag gome.” Bénréhén so mano, “Kagom méméléhu.” Mélaw fiyon fo ké énda dufangé kom i bawag gome, éndob ménméléhu gom étew, énda so nunuro kom i kukumay Tuluse. ¹² Ingata kom i de rigoné kom brab de béréhé kom, non i Tuluse kukumé no begom bé kukuma nuwe fégéfukas bé de étew dob de sala ro. ¹³ Non énda méuray i nay Tuluse bé de étew énda méuray i na ruwe bé de dumou ro. Endob i de étew méuray i na ruwe bé de dumou ro, éndaén kailanga

roy mégilake bé kékukum i Tuluse.

I kéunure brab fiyowe galbék

14 Do dumo gu munur bé Jesuse énda i lantékén ké émbéréh i ségétéwe étew mano, "Munuru," éndob énda giton i kéunur ne dob de rigoné no. Enda toow i kéunur ne, mélaw énda séna mékédan i de salaén. **15** Ufama, amuk wén i ségétew munur, brab énggumah i de dumo no munur dob beene. Atin toow ro fo méskinan, kulang i de kégal ro brab énda i amaé ro. **16** Amuk bérhéno saén dob berowe mano, "Fyo damén i de fédew gom. Brab gégedot gom damén do kégal gom brab amaé kom," éndob énda fo niraya no bero tabang, énda i lanték i de kébéréhén. **17** Ségiléw bé nan i étewe bérhéno munur kun bé Jesuse, éndob énda fiyoy rigoné nuwe. Mélaw giton i énda toow i kéunur ne.

18 Amuk wén i émbéréh mano, "Fakay méfukas i étewe sabaf bé kéunur ne. Atin fakay so méfukas i étewe sabaf bé de fyo rigoné no." Endob ay niy késumbulo kuwe de. Enda fakay méfukas i étewe ké munur saén bé Jesuse atin énda fo fiyoy rigoné nuwe. Non i begéne, fégito guy kéunur guwe dob fiyowe rigoné ku.

19 Amuk wén i étew munur bé sébaan saén i Tuluse, fyo, éndob kulang i nan kéunur. Non fiyon i de saitan, munur ro so loo bé nan, atin lémukub ro bé kégilak ruwe de. **20** Toow fo dufang i étewe loo bé nan, mégitung kailangan saén i munure. Toroé ku begom bé énda foy lanték i kéunur i étewe ké énda so giton i de fyo rigoné no. **21** I katufua tome Abraham, ati funa nuwe ménwaléy métintu dob adafay Tuluse? Ménwaléy métintu dob adafay Tuluse sabaf bé rénigo nuwe, amun ménodor bé sugu i Tuluse tulaké no damén i nga ne Isak dob ahayane féngadafan. **22** Mélaw gésobuto tom énggéodor bé sugu i Tuluse sabaf bé kéunur ne. Mélaw fénggito no toow i kéunur ne bé rénigo nuwe. **23** Mélaw gétiga tom toow i Ménsulate Kébéréh i Tuluse mano, "I Abrahame ménunur bé Tuluse. Atin i Tuluse kénarangén

i Abrahame métintu sabaf bé kéunur ne." Mélaw i Abrahame féndawétén "Dumoy Tuluse". **24** Mélaw gétiga tom, i étewe waléy métintu dob adafay Tuluse sabaf so bé de rigoné no, békén saén sabaf bé kéunur ne.

25 Ségiléw so bé niy libune sun-dal féndawét Rahab. Non ménwaléy métintu dob adafay Tuluse sabaf bé fiyowe rénigo no. Non ténayakufén i de Judio do sénugu, tidew béo ténabanga no bero inok géféraréy ro mangéy bé ségiyowe aguwon.

26 I lowohe, amuk éndaén bati diyo i rémogor ne, ménléhu i nan lowoh. Ségiléw so bé ni, i kéunur i étewe énda gitono dob de fyo rigoné no, maak ménléhu i kéunur ne non békén toow.

3

I dilae

1 Do dumo gu, fyo ké énda médoo gom waléy téromo. Non i begeye do téromo, toow na fo méégét i kéfénginsaay Tuluse begey dob gaiwe kémukum moso. **2** I kéluhana tome do kéilawan, énda démoyun katabuwan i de rigoné tom. Amuk wén i étew gébéréh katabuwan sénga téklid, énda i gétebo de. Fakay géféguléwo noy lowoh ne non falan fiyoy de kébéréhén. **3** Ufama, i gefee bé kudae, amuk rigono no kakang i ba i kuda ne, gébalengo no fiyon udenén féayo no de. **4** Loo so bé niy dakéle barko féagéwéy émbagére réfuruh. I suwil i barkowe toow fo kloh, éndob been i niy usaréy kafitane bé barkowe fégéfanangguvitén de dob kétaya nuwe ayo no. **5** Atin ségiléw so bé niy dilae. Non fiyon fo ké toow fo kloh, géusaran fégéfabantug-bantug.

Ufama, i bukae talun métuwéy bé klohe saén aféy ké mélégéb. **6** Atin i dilae, mésut i médoowe gékélasi do tete, funay de itunga tom brab de fédew tom waléy so tete. I dila i étewe gétuwégo noy fédew ne, non i aféy i dilae tidew dob uleone emferno. **7** I kéilawane, géféguléwo noy kéluhanay de binatang, do kloh manok, do sédo, brab do ulé. Non gélayamay

kéilawaney de ni. ⁸ Endob énda i étew gélayama noy dila ne. I de dila tom toow fo gérigono roy tete brab énda méféguléwo no. Ségiléw bé bisawe non mékébinasa. ⁹ Usaré tom fégéfésalamat dob Kadna tome brab dob Abaye Tulus. Endob usaré tom so fégéfémula bé de dumo tom étew, sani de lénimbag miring bé Tuluse. ¹⁰ I fiyowe kéfésalamat brab i tete kékémula, ségiléw ro tidéw dob ba i étewe. Do dumo gu, énda fatut mérigo ni. ¹¹ Enda i fiyo wayég brab féla wayég ké sébaan saén i séfute ésuto ro. ¹² Atin do dumo gu, i sébaane kayéw énda géfégégonokén saliyu saén bé kaane onok. Enda géfégégonokén ruwo gékélasi onok, i sébaane de fiyo brab i sébaane de tete. Atin i séfute miray bé métimuse wayég énda géirayén bé fiyowe wayég énda métimusén.

¹³ Amuk wén i ségétew begom toow fo gétigan brab dakél i kégésobut ne fatut fégito no dob de fiyo rigoné no ula-ula. Atin fatut térfantad bé lala ne rémigo fiyo inok féténgtengén i kégétiga nuwe. ¹⁴ Endob amuk médaléw, taloo no métitung énda fatutén félangka-langka taloo no béréhé noy tugie fantag bé toowe kétoro. ¹⁵ I kégétigane loo bé nan békén tidéw dob lawayo. Yamula tidéw saén dob duniyae ni. Békén tidéw dob Rémogor i Tuluse, yamula tidéw dob Satanase. ¹⁶ Non i étewe médaléw brab métitung rigoné no soy médoowe gékélasi do tete brab fébukué noy de étew. ¹⁷ Endob i étewe wén i kégétiga no tidéw dob Tuluse, toow fo fiyoy adat ne. Atin mika sétiboh. Brab mégédaw bé de dumo no, énda kérít no bero. Tintu fo méuray i na nuwe bé de dumo no brab rigoné noy fiyowe dob berowe. Atin énda i isu ramigo no bé de étew brab énda ubo-ubo saén i de rigoné no. ¹⁸ I étewe kédané noy késétibohe, uwité noy de fiyo rigonén.

4

¹ Ati tidéwoy de késétiboh gom brab de késéédél gom? Tidéw dob de tete kétaya kom démoyun sétiboh bé de fiyo

kétaya kom dob de fédéw gom. ² Wén i do kétaya kom, éndob énda gédoté kom de. Mélaw méuyot gom méméléhu. Wén i do kéingara kom, éndob énda gédoté kom de. Mélaw méuyot gom séédél brab sétiboh. Atin i funa kome énda gégédot bé de kétaya kom, non énda ongoté kom de dob Tuluse. ³ Atin amuk mongot gom, énda gédoté kom de, non tete i funa kom de mongot. Non ménongot gom inok gédoté kom i de éntingayén fégérigo gom bé de tete kétaya kom. ⁴ Ségiléw gom bé ségétew libun wén i ségiyo tayané no saliyu bé bawag ne. Aw énda fo gésobuto kom de ké amuk séloyuk gom bé de tete éntingayén dob duniyae ni, sébanil gom bé Tuluse? Non i étewe méuyot rémigo tete, waléy sébanil bé Tuluse. ⁵ Kagom fégitungén de ké énda i lanték i Ménsulate Kébéréh i Tuluse mano, “I Rémogor i Tuluse bati dob betome toow fo médaléw.” Mélaw mika de fo ké wén i ségiyo kétaya tom saliyu bé Tuluse. ⁶ Endob toow fo mégédaw i Tuluse betom. Non wén soy Ménsulate Kébéréhén mano, “I Tuluse sébanil bé de étew félangka-langka, éndob mégédaw bé de étew térfantad.”

⁷ Mélaw odor gom bé kétayay Tuluse. Atin atuho kom i Satanase, atin mélaw méraréy tidéw dob begome. ⁸ Fégédét gom dob Tuluse, atin i Tuluse fégédét so dob begome. I de begom do ménasala do étew, tagak gom i de tete adat gom. I de begom do ubo-ubo saén do munur, félinis gom i de fédéw gom inok waléy gom tintu fo munur. ⁹ Fatut tete i de fédéw gom brab kérrew gom non bé de tete adat gom. Térén gom oror, fatut gom émbuku. ¹⁰ Fatut térfantad gom dob adafay Tuluse, atin fégérotoré no begom.

¹¹ Do dumo gu munur bé Jesuse, kagom sédowoy. I étewe dowoyé noy dumo nuwe brab kukumé noy dumo nuwe, maak dowoyé no brab kukumé no soy kitabe. Atin amuk kukumé noy kitabe, maak téfégérotoré bé Tuluse, atin mélaw

éndaén modorén bé kitabe. ¹² Endob Tulus saén i miraye bé kitabe brab Been saén i kémukume. Been saén i gébinasawe bé étewe brab Been soy gétabange de inok énda mébinasa no. Endob i betome, énda i kuwagib tom kémukum bé de dumo tom, non kéilawan tom saén.

¹³ Fégélingo gom begén, sani de begom do émbéréh makom, "Béleewe ni taloo no démo mangéy gey dob sébaane ingéd. Atin diyo bati gey ségébélantuwa inok émfébéléy gey brab gégédot gey médoo kurta." ¹⁴ Kagom émbéréh loo bé nan. Non énda gétiga kom i mérigowe dob begome bé démoe. Non i de kéilawan, ségiléw saén bé ménifise rawén giton brab magad méalfa. ¹⁵ Ay niy fatute béréhé kom, "Amuk kétayay Kadnane, taus tom méuyag brab rigoné tom i ni taloo no rigoné tom i nan." ¹⁶ Endob béléewe ni, félangka-langka gom brab fébantug-bantug gom. Enda fiyoy nan.

¹⁷ Amuk wén i étew gétiga noy fatute rigoné no, éndob énda rigoné no de, ménsala.

5

Fantag bé de kawasa

¹ I begome do kawasa étew, fégélingo gom begén. Fatut kéréw gom brab ruung gom sabaf bé de kérasay gom gégumah moso. ² Non i de balilaga do tamuk gom waléy do mérénah. Brab i de médoo do kégal gom amaéy de ifés. ³ Atin i de bélouwon brab do filak do nitong gom, waléy do tangisén. Brab i kétangisé ruwe fégito roy énda nusar gom i de kurta gom fégétabang bé de méskinan. Mélaw toow fo gétimal i kékukume begom. Non nitong gom i de médoo kurta gom taman dob tamfaday de gai. ⁴ Enda bénayada kom i de géménalbék dob fantad gome. Atin i de kurta énda féngébayad gom de, been i de niy usaréne fégétébo begom dob adafay Tuluse. Atin i de kétébo i de étew géménalbék dob fantad gome, énggelingooy toowe fo barakatan

Kadnan Tulus. ⁵ Toow gom fo kawasa brab fiyoy goho kome dob duniyae ni. Endob ségiléw gom bé de ayam do fénbobo inok sumbalién. Atin i begome fénbobo gom i lowoh gome. ⁶ Non kénukum gom brab fénléhu gom i de métintu do étew énda natuho ro begom.

⁷ Endob i begome do dumo gu, tingkél gom taman dob gaiwe séfule i Kadnane. Iring gom bé mohoke toow fo témingkél ongot-ongot bé gaiwe rémana inok témunoh i nohok ne atin gékétéwo no. ⁸ Ségiléw so bé begome non fatut tingkél gom. Fatut féégett gom i késarig gome non gédétén i gaiwe séfule i Kadnane.

⁹ Do dumo gu, kagom séséndit, inok énda kukuméy Tuluse begom. Enda mérayu i kémukume, éndaén mérugay i kégumah ne. ¹⁰ Do dumo gu, iring gom i de sénarigoy Kadnane muret bé kékéréh ne bé do gétah, non toow ro fo témingkél démayday munur fiyon fo ké fénrasay ro. ¹¹ Kénarang tom bero do toow fo moror non énggétingkél ro dob de gai do mérégén. Atin gétiga kom i fantage bé ségétéwe étew fénrasay Job bé do gétah. Toow fo témeningkél démayday munur fiyon fo ké toow fo ménrasay. Atin gétiga kom soy toowe fo kénéfiyoy Kadnane de amun énggilid ménrasay. Non i Kadnane toow de fo mégédaw brab méray i na nuwe de.

¹² Atin do dumo gu, ay niy toowe fo balilaga sugu gu begom. Amuk rémigo gom fasad, kagom sémafa. Kagom béréhén de makom, "Gitoy lawayo" taloo no "Gitoy fantade", taloo no udenén béréhén kom fégésafa gom. Sugatén i kékéréh gome, "Hoo" taloo no "Enda", inok énda kukuméy Tuluse begom sabaf bé ni kékéréh gom.

¹³ Amuk wén i ségétéw émbuku begom, fatut démasal. Amuk wén i ségétéw moror begom, fatut kémanta dayéwé noy Tuluse. ¹⁴ Amuk wén i ségétéw démérueen begom, fatut fétawagén i de odoroy de munur dob

gono kome, inok dasala ro brab lulawa ro nor bé lala ruwe mongot dob Kadnane. ¹⁵ Non amuk tintu ro fo munur, i Kadnane féadi-adiné noy déméruruune ni sabaf bé kédasal ruwe. Atin fésagaday Kadnaney de salaén. ¹⁶ Mélaw, fatut séfayag gom i de sala gom, brab sédasal gom dob Tuluse, inok adi-adi gom. Non toow fo barakatan i kédasal i métintuwe étew. ¹⁷ I Eliase bé do gétah, kéilawan so ségiléw bé betome. Atin amun ménbagér i kédasal ne mongot ké énda férana i Tuluse de, énda i rana bé méntéléwe gébélantuwa brab ném gétérésang kélungonon. ¹⁸ Tidéw béo, amun déménasal man mongot rana, fénrana i Tuluse brab i de nohok téménunoh ro dob fantade.

¹⁹ Do dumo gu, amuk wén i ségétew begom té nagakén i toowe kétoro, atin wén i ménféséfule de, ²⁰ ay niy fatute fégétédémé kom: I étewe énggébalengo noy fédew i étewe mén sala inok tagaké noy tetee aguwo no, toow fo té nabanga no inok énda mékukumén méléhu. Yamula fésagaday Tulusey de médo do salaén.

Santiago

I Sunguwe Sulat Pedrowe

Ay niy sunguwe bé de sénulat Pedro, sani ségetéwe bé de kuyug Jesus brab dumo no amun dini séna dob duniyae niy Jesuse. Sénulat Pedrowey ni sulat dob kéluhanay de munur bé Jesuse.

Amun sénulat Pedrowey ni, ménrasay i de munur sabaf bé kéunur ruwe. Mélaw sénulat Pedrowey ni émfébagér bé de fédew ro. Ténoroén bero bé barasay Tuluse bero dob lawayo amuk énda témérén ro munur. Mélaw ulanden ké mérasay ro dob duniyae ni.

¹ Begéney Pedrowe, sani séménulate bé ni. Begéney ségetéwe apostol Jesu Kristowe. Sémulatu mangéy dob de begom do fénemili i Tuluse, sani de begom do ménberagar dob de ingéd Ponto, Galasia, Kapadosia, Asia, brab Bitinia. Maak do iloh-iloh gom dob duniyae ni non i tintuwe ingéd gom diyo dob lawayo. ² Fénemili i Abaye Tulus begom sabaf bé kaane kétayan. Atin i Rémogor i Tuluse fénwaléyén begom do métintu inok modor gom bé de kétoro Jesu Kristo brab méfésagad gom sabaf bé kéléhu ne. Non maak ménfrikon gom bé dara ne funa kom mélinis.

Mégédaw i Tuluse damén begom brab irayén damén begom i métanéke fédew.

³ Fatut fésalamat tom bé Tuluse sani Tuluse brab Abay i Kadna tome Jesu Kristo. Non sabaf bé kégédaw ne betom, nirayén betom i mantuwe umul bé kétébule ne bé Jesu Kristowe. Mélaw wén soy inam tom tébule inok méuyag tom taman sa taman.

⁴ Atin ongot-ongoté tom mélaw i kégégédot tome bé de kéfyonon nitong i Tuluse betom dob lawayo énda mékédano taman sa taman, taloo no mébinasa taloo no mérénah taloo no mérénég. ⁵ Non bé kéunur tome, diyaganéy barakatane Tulus betom

inok géfégilido noy kéfukas ne betom moso dob géfuraye gai.

⁶ Mélaw fatut moror gom de, non fiyon fo ké tete i de fédew gom singkow saén sabaf bé de kérasay gom, ⁷ kailanga kom soy mérasayé béléewe ni inok métukawan i kébagér i kéunur gome dob de ni do gai. Ufama, i kéunur gome ségiléw bé bélwone. Non i bélwone métukawan dob aféye inok giton ké tintu fo bélwone taloo no békén. Ségiléw so bé niy kéunur gome. Non i kéunur gome métukawan bé de mérégén géagéwon inok giton ké tintu gom fo munur taloo no énda. Atin toow na fo balilaga i kéunur gome bé de bélwone non do mébinasa ro. Atin amuk tintu gom fo munur, médayéw gom de, brab mébantug gom de, brab mébasan gom de moso bé gaiwe séfule i Jesu Kristowe. ⁸ Fiyon fo ké énda énggitó gom i Jesuse, féimu gom de. Atin fiyon fo ké énda gito gom de béléewe ni, unur gom de. Atin sabaf bé ni, moror gom fo toow atin énda i fiyo kékérédé de émfégétigan bé kédakél i kéror gome de. ⁹ I funa kome toow de fo moror loo bé ni non kédanéy Tulusey de sala gom inok gédoté kom i umule magufusa sani ongot-ongoté kome sabaf bé kéunur gome.

¹⁰ I de sénarigoy Tuluse muret bé kékérédé ne bé do gétah, féngganad ro fo toow i kéfukas i Tuluse bé étewe. Atin nuret ro mélaw i fantage bé ni iray i Tuluse begom. ¹¹ Toow fo féngganad ro ké ati kédiron i gaiwe mérigoi ni kéfukas i Tuluse brab ati kétuma nuwe de. Non fénémanduo Rémogor Kristowe bero brab fénggétiga no bero bé férasayén i Kristowe, atin tidéw bénou médayéw i Kristowe fo toow. ¹² Atin i kéuret i de ni do sénarigoy Tuluse muret bé kékérédé ne, fénggésobutén bero bé i funa ruwe muret inok métabangan gom, békén bero. Non i kéuret ruwe fantag bé Kristowe, been i ni énggelingoo komén béléewe ni tidéw dob de témoro bé Fiyowe Uret. Atin i Rémogor i Tuluse, sani sénugue tidéw dob lawayo, fénémanduo noy de ni témoro. Atin fiyon foy de télaki,

méuyot ro de ké gésobuto roj ni kéuret ro.

¹³ Mélaw fatut fébagéré tom i kékégitung tome atin féfiyoné tom i kékégitung tome. Atin fatut ongotongoté tom i de kékifionon gédoté tom dob gaiwe séfule i Jesu Kristowe. ¹⁴ Atin non betom i de nga i Tuluse, fatut odoro tom i de suguén. Atin fatut so diguré tom i de tete adat tom loo bé de rénigo tom bé do gétah amun énda séna gétiga tom i toowe kétoro. ¹⁵ Bé kékluhanay de rigoné tom fatut métintu tom, miring bé kétintuy Tuluse sani ménémilie betom. ¹⁶ Non wén i Ménsulate Kékéréh i Tuluse mano, “Fatut toow fo métintu gom non toow fo métintu.”

¹⁷ Atin amuk démasal tom dob Tuluse, tawagé tom “Abay tom”, mélaw fatut basana tom fo toow i Tuluse bé lala tome méuyag dob duniyae ni. Non Beeney kékumume bé kékluhanay étewe sabaf bé de rigoné ro, non énda i isu ramigoy Tuluse. ¹⁸ Gétiga kom ké atiy fénggébayade niray i Tuluse inok kédané noy de tete adat gom énggédot gom tidew dob de katufua kom. Non i fénggékukas ne betom énda loo no bé de bélowan taloo no do filak do fakay mébinasa. ¹⁹ Yamula Kristoy fénggékukas ne betom. Beeney maake toow fo fiyo nati bili-bili fénléhu ténuak inok mécédan i de sala tom. Toow fo balilaga i ni kétulak. ²⁰ Amun énda séna lénimbag i Tulusey duniyae ni, fénémilién i Kristowe inok mérigoy ni. Atin dob de ni énggékfuray do gai ménangéy i Kristowe dini inok fukasé no betom dob de sala tom. ²¹ Atin sabaf bé Kristowe, ménwaléy tom do munur bé Tuluse, sani téménébulee bé Kristowe brab ménfédéyéwe de so. Atin mélaw Tulusey sarigo tome brab wén i inam tom bé kétébule i Tuluse betom moso.

²² Atin sabaf bé kékunur tome bé toowe kétoro, ménwaléy tom malinis dob adafay Tuluse atin ménwaléy tom tintu mécédaw bé de dumo tom munur bé Kristowe. Gido loo, fatut fo féégété tom i késégédaw tome. ²³ Non ménumah tom man ségule inok waléy tom do nga i Tuluse sabaf bé Kékéréh

ne. I ni kékéréh i Tuluse énda mécédan no taman sa taman brab miray umul magufusa. ²⁴ Non wén i Ménsulate Kékéréh i Tuluse mano, “I kékluhanay de kékluhanay ségiléw ro bé de kéroon, non méuyag ro singkow saén. I kékifioy de kékluhanay magad mécédan ségiléw bé de ulak i de kéroon magad mélalaay brab mélawa. ²⁵ Endob i kékéréh i Kadnane, énda mécédan no taman sa taman.” Atin i kékéréh i Kadnane, been i niy Fiyowe Uret nureté dob begome.

2

¹ Mélaw non ménumah tom man ségule, fatut tagaké tom i kékluhanay de tete rigoné tom. Katom témugi taloo no ubo-ubo saén i kékéngintulus tome, taloo no médaléw, taloo no féngirasé tom i de étew. ² Fatut iringé tom i de kloh nga do témudu séna, non betom i de étew do ménumah man ségule. Fatut méuyot tom mécélingo bé fiyowe kékéréh i Tuluse ségiléw bé klohe nga térumén témudu. Amuk rigoné tom i ni, i kékunur tome waléy dakél ségiléw bé kékéruk i klohe nga taman waléy tom do gétawan bé kékunur tome. ³ Non énggédot tom i kégédaw i Tuluse betom.

⁴ Odor gom bé Kadnane Jesus sani méuyage taman sa taman. I Jesuse ségiléw bé batéwe nikaay de rémigo lawi. Endob fiyon fo ké ménika i de étew de, fénémili i Tuluse fénggérigo no bé lawi ne non kénarang i Tuluse toow fo balilaga. ⁵ Atin i betome, méuyag tom so taman sa taman. Fatut modor tom bé Kristowe inok waléy tom so maak do batéw usaréy Tuluse fénggérigo no bé maake lawién féngadafay de étew de. Atin dob lawi ne ni, maak rigoné tom i galbék i fadi i Tuluse miray do tulak tayakuféy Tuluse. Atin i tulake iray tom, been i niy kékéngintulus tome. Atin i Jesu Kristowe, tabanga no betom mécintulus loo bé ni. ⁶ Non wén i Ménsulate Kékéréh i Tuluse mano, “Ménémiliu ségétew waléy mécélew ségiléw bé toowe fo balilaga batéw. Non maak rémigowu lawi dob ingéde Sion, atin

Beeney maake toow fo fiyo balilaga batéw fégérigo gu bé ni lawi. Atin i kéluhanay de munur dob Beene, énda gésénule ro bé késarig ruwe de.” ⁷ I ni méguléw, sani ni maak batéw, toow fo gulaané tom do munur de. Endob wén soy de étew énda munur ro de. Atin énggétumana roy ni Ménsulat Kébéréh i Tuluse mano, “I batéwe nikaay de rémigo lawi, ménwaléy na fo toow balilaga.” ⁸ Atin wén soy ni Ménsulat Kébéréh i Tuluse mano, “Been i niy batéwe émfébangkud bé de étew inok mélawu ro.” Atin i atag i ni, énggébangkud ro non énda ménunur ro bé kébéréh i Tuluse, non been i niy bénantak i Tuluse mérigo.

⁹ Endob i de betom, betom i de étew fénemili i Tuluse. Betomey de fadi i Datue Kristo. Betomey de étew i Tuluse. Been i méguléwe betom. Betomey de étew fénemili i Tuluse inok muret tom fantag bé de fiyo rigonéy Tuluse. Sénéngkat i Tuluse betom tidéw dob délémone mangéy dob kaane géfékaya toow fo fiyo. ¹⁰ Non bé do gétah, békén tom do étew i Tuluse, éndob béléewe ni ménwaléy tom do étewén. Bé do gétah, énda gétiga tom i fantage bé kégédaw i Tuluse, éndob béléewe ni énggédot tom fo toow i gédaw ne.

¹¹ Do gulaané ku do dumo gu, i duniyae ni békén tintu ingéd tom. Maak do iloh-iloh tom saén dini. Mélaw ongoté ku dob begome, kagom modor bé de tete kétayay de lowoh gom. I de ni do tete kétayay de lowoh tom maak sétiboh bé de rémogor tom méuyot modor dob Tuluse. ¹² Fatut toow fo métintuy de adat gom inok fiyon i de békén méngintulus do étew gito ro. Atin amuk téboé ro begom, i toowe, gétiga ro toow fo métintuy de adat gom. Atin mélaw gédayéwo roy Tuluse dob gaiy kégumah ne dini.

¹³ Fatut odoro tom i de sugu i de gémamak kukuman fiyon i toowe fo gérotor méguléw. Fatut rigoné tom i ni non been i niy kétayay Kadnane. ¹⁴ Fatut so odoro tom i de sugu i de gobernador. Non i toowe fo gérotor

méguléw i sémugue bero inok kukumé roy de rémigo tete atin inok dayéwé roy de rémigo fiyo. ¹⁵ Non méuyot i Tuluse de ké féantésén i de dufang do étew témbo betom, sani de émbéréh énda i lantékén. Non amuk gito roy de métintu rigoné tom, témérén ro démowoy betom. ¹⁶ Ménfukas tom dob kéodore bé kitabe tidéw dob Moisese. Mélaw fakay gérigono tom i kétaya tome. Gido loo, katom usarén i kéfukas tome fégésélyah tom rémigo tete. Yamula fatut odoro tom i kétayay Tuluse non betom i de sugu-sugué no. ¹⁷ Atin fatut fégadata tom i kéluhanay étewe. Atin fatut mégédaw tom bé kéluhanay de dumo tom munur bé Jésuse. Fatut féngadafé tom i Tuluse. Atin fatut fégadata tom soy toowe fo méguléw.

¹⁸ I begome do sugu-suguén, fatut odoro kom i de sugu i de amu gom, atin fatut fo fégadata kom bero toow. Atin békén saén dob de fiyo amu gom mégédaw begom. Yamula fégadata kom i kéluhanay de amu gom, fiyon fo ké dusa ro. ¹⁹ Non féfiyonéy Tulusey kéluhanay de étew témingkél bé kédusawe bero fiyon fo ké énda i rénigo ro tete, amuk témingkél ro sabaf bé késarig ruwe bé Tuluse. ²⁰ Endob amuk rémigo gom tete, fiyon fo ké tingkélo kom i de amu gom ké dusané ro begom sabaf bé kérigo gome tete, énda so médait gom gégedot bé barase. Endob amuk fédayaé kom bero ké dusané ro begom fiyon fo ké énda i rénigo gom tete, féfiyonéy Tuluse begom. ²¹ I Kristowe féndayaén soy kédusay de étew de inok kédané noy de sala tom. Atin fatut iringé tom. Non i funay Tuluse ménfénur betom inok iringé tom i Kristowe. ²² Non énda i sala rénigo Kristowe, atin énda soy sébaan tugi bénréhén. ²³ Atin amun fénéngiras i de étew i Kristowe, énda séménulién méngiras. Amun fénrasay ro, énda fénémulaén bero. Yamula sénarigén saén dob Tuluse, sani métintuwe kémukum. ²⁴ Ménkukum i Kristowe dob kruse noboén i de sala tom, inok tagaké tom i de tete rigoné

tom atin inok gérigo tom métintu. Mélaw ménwaléy tom métintu sabaf bé kékukume bé Kristowe. ²⁵ Bé do gétah, ségiléw tom bé de méntadin do bili-bili. Atin i Kadnane Jesus, ségiléw bé témalimae bé de bili-bili. Maak sénlédén betom atin amun énggit no betom, nuwitén betom mule mangéy dob Beene, sani magifate betom.

3

¹ Atin i de begom so do libun do bawagan, fatut odoro kom i de sugu i de bawag gom inok amuk wén sénay do énda munur bero bé kékérél i Tuluse, waléy ro géunur sabaf bé fiyowe adat gom. Enda kailanga kom ureton bero, ² non gito roy fiyowe adat gom brab kékéngintulus gome funa ro waléy munur. ³ Atin kagom saén féfiyonén i de falas gom loo bé de kékéfifiyo gom bé de buk gom, taloo no de ono gom, taloo no de kégal gom. ⁴ Yamula fatut féfiyo gom i de kékérél gom brab de rigoné kom inok métanék i de adat gom. Been i niy funay Tuluse mésuwat begom. Atin énda mérénég i métintuwe adat loo bé kérénég i fiyowe falas. ⁵ I de énggétah do fiyo libun séménarig ro dob Tuluse, fénfiyo roy de lowoh ro bé kéodor ruwe bé de sugu i de bawag ro. ⁶ Loo bé Sarahe, nodoro noy de sugu i bawag ne Abraham brab féndawétén “Amu”. Atin i de begom do libun béleewe ni, maak begom i de nga Sarah amuk iringé kom i de fiyo rénigo no brab énda mégilakén bé de udenén éntingayén.

⁷ Loo so bé begome do lagéy do bawagan, fatut talima gom i de bawag gom bé lala gome sétifon bero dob duniyae ni. Non gétiga kom i de karo lowoh toow na fo mélubay bé de katom de. Gido loo, ségiléw so bé betome, non nirayay Tuluse so bero bé umule magufusa. Mélaw fatut basana kom bero inok fégélingoéy Tulusey de kédasal gom.

⁸ Mélaw ay niy géfuraye bérélhé ku begom. Fatut féwaléy gom sébaan i de itunga kom brab fésétima kom i de

fédew gom. Fatut ségédaw gom non maak do sétuwaréy gom. Atin fatut séuray gom na brab térfantad gom. ⁹ Atin amuk wén i réménigo tete dob begome, kagom sémuli rémigo tete dob berowe. Amuk wén i ménémula begom, kagom sémuli mémula. Yamula ongot gom dob Tuluse féfiyoné no bero. Non amun fénunurén begom, fénasad i Tuluse féfiyoné no begom. ¹⁰ Non wén i Ménsulate Kékérél i Tuluse mano, “I de étew méuyot ro kékéfiyoy de goho ro brab méuyot ro moror, fatut bérélhé ro saén i fiyowe atin témérén ro témugi. ¹¹ Fatut tagakéroy de tete do adat ro atin mélubay ro rémigo bérélhé. Atin fatut rigoné roy kékéngintulus gagané ruwe inok énda mémérit i de étew de. ¹² Non bantayay Kadnaney de métintu do étew atin fégélingoé noy de kédasal ro. Endob diguré noy de rémigo tete.”

¹³ Amuk méméror gom rémigo bérélhé, énda i gésug-sug begom.

¹⁴ Gido loo, amuk mérásay gom sabaf bé kétintuy de adat gom, fatut moror gom de. Kagom mégilak bérélhé de kékéngintulus gagané ruwe inok énda mémérit i de étew de. ¹⁵ Yamula, fénfiyoy gom i Kristowe dob de fédew gom, atin unur gom Beeney Kadnane. Atin fatut démoyun gom témafay sénga tékélid inok amuk wén i méménginsaan begom fantag bérélhé, gétiga kom i kékéngintulus gagané ruwe inok énda mémérit i de étew de. ¹⁶ Endob amuk sémumbul gom, fatut félamat gom i kékérél gome atin basana kom i de étew méméngintulus. Atin sabaf bérélhé, gom i de kékéngintulus, fatut fétintuy gom i de adat gom inok énda waléy tete i de fédew gom. Fatut rigo gom i ni inok amuk wén i kékérél tete fantag bérélhé, mémala ro mélaw.

¹⁷ Amuk kétayay Tuluse kékéngintulus gagané ruwe inok énda méménginsaan begom, fakay so. Békén saén mérásay gom sabaf bérélhé, gétiga kom i kékéngintulus gagané ruwe inok énda mémérit i de étew de. ¹⁸ Non i Kristowe ménléhu inok fukasé no betom. Ménléhu ségule saén inok méméngintulus i de sala tom. Méméngintulus Kristowe, éndob ménléhu gémantino no betom do tete étew inok féwaléyé no

betom do étew i Tuluse. Fénléhu roy lowoh Jesuse, éndob énda énggéléléhu roy Ré mogor ne. ¹⁹ Atin non méuyag sénay Ré mogor ne, ménangéy dob de ré mogor do ménférisu atin nureto no bero. ²⁰ Been i de niy de ré mogor i de énggétah do étew énda ménodor ro bé Tuluse bé gaiwe téningkélo no bero bé de tete rigoné ro bé lala Noehe rémigo bé dakéle barko. Tidéw bénō, waléw gétew saén i éndae ménléné non énggéahur ro dob barkowe. Mélaw té nabangay Tuluse bero inok énda ménléné ro dob wayégo no. ²¹ Atin i wayége ni, maak anlung i wayége fégébautis betom funa tom ménfukas dob de sala tom. I atag i kékautise ni, békén kérauh bér lowohé inok ménkédan i luwéde. Yamula been i niy kéongot tome bér Tuluse bér kédané noy de sala tom inok malinis i de fédéw tom. Fakay i ni sabaf bér kétébule Jesu Kristowe. ²² Atin ménule i Jesuse mangéy dob lawayo inok diyo dob kuwonoy Tuluse, sani gonone toow fo basanan, atin ménkuléw bér kéluhanay de télik brab kéluhanay de étew do barakatan diyo brab de wén atura ro.

4

¹ Gétiga tom, amun dini sénay Kristowe dob duniyae ni, ménrasay bér kékédawéta nuwe. Mélaw fatut tom témafay bér kékérasay i de étew so betom. Non i de étew do mérasay éndaén méuyot ro mésala. ² Mélaw, tidéw bénō, taman méuyag gom séna dob duniyae ni, fatut odoro kom saén i kétayay Tuluse atin kagomén odoron i de tete kétayay de lowoh gom. ³ Non bér gétahé, ménrugayén i kétete i de adat gom ségiléw bér de tete rigonéy de békén mén gintulus. Non toow fo ménkérésik i de rénigo gom, brab tete i de kétayay de lowoh gom, brab ménolon gom, brab ménkémala-malay de rénigo gom dob de mén kolon do karagiya kom, brab fénéngadaf gom i de kéninontow funay Tuluse mérume. ⁴ Endob béléewe ni, mén gaif i de énda mén gintulus non éndaén mamung

gom bér de toow fo tete do ménkérésik rigoné ro. Atin mélaw fén gerasé ro begom. ⁵ Endob fétindégéy Tulusey séngae étew dob adafa nuwe inok ureté roy kéluhanay de rénigo ro. Non i Tuluse, Been i kémukume bér de méuyag étew brab de ménléhuén. Atin tafayén kémukum bénō. ⁶ I de étew do ménléhuén, mén-uret soy Fiyowe Uret dob berowe, inok fiyon fo kér ménkukum ro bér kéléhu ruwe ségiléw bér kéluhanay de kélawan, géunur ro so, atin méuyag mélaw i ré mogor ruwe ségiléw bér kétayay i Tuluse.

⁷ Gédétén i tamfaday duniyae. Mélaw fatut féfiyo gom i kékégitung gome fo toow inok fiyoy kédasal gome. ⁸ Atin ay niy toow fo mélaga féginau gu begom: Ségédaw gom fo toow. Non amuk ségédaw tom, magad saén i kékésagada tome bér de énggésala dob betome. ⁹ Atin fatut moror gom sétayakuf dob de lawi gom. ¹⁰ Atin i kéluhana kome, fatut usar gom i de kékfurungan niray i Tuluse begom. Fatut usar gom fégétabang gom bér de dumo gom munur. Non i funay Tuluse de méniray dob begome inok gétabanga kom i de ségiyo. ¹¹ Atin i de begom do muret, fatut uret gom i kékérén i Tuluse. Atin i de begom do téma bang, fatut usar gom i bagére niray i Tuluse begom inok dé moyun ménayéw i Tuluse de fénagéw dob Jesu Kristowe sabaf bér de tabang rigoné kom. Been damén i ménayéwe brab ménkuléwe taman sa taman. Amen!

¹² Do gulaané ku do dumo gu, kagom mén gaif sabaf bér ni toow fo démawé téméngkad begom béléewe ni. Non been i niy kailangane mérigo dob betome kéluhanan do munur bér Jesuse. ¹³ Kagom mén gaif de, yamula oror gom de non gétukidon gom bér kér asay Kristowe. Oror gom inok toow fo moror gom bér gaiwe séfule brab ménayéw moso. ¹⁴ Oror gom amuk wén i mén gerasé begom sabaf do begom i de kuyug Kristo. Non amuk mérigo ni, gétiga kom fénémanduoy barakatane Ré mogor be-

gom, sani Rémogor i Tuluse. ¹⁵ Enda damén mérigo no ké wén i mérasay begom sabaf bé de tete rigoné no loo bé méméléhue étew, taloo no ménakaw, taloo no rémigo bé de ségiyo tete rigonén, taloo no furaya fédewén i rigonéy de dumo no. ¹⁶ Endob amuk mérasay gom sabaf bé kéunur gome bé Kristowe, kagom mémalá de. Yamula fatut fésalamat gom dob Tuluse sabaf féndawét gom do munur bé Kristowe.

¹⁷ Enggumahén i gaiwe mériganayén kémukum i Tuluse. Atin kukumé noy de kaan do étew sani de betom. Atin amuk betom do étewén i sunguwe kukumé no, toow na fo géttimal i géfuraye kékukumén bé de étew énda munur ro bé Fiyowe Uret tidew dob Beene. ¹⁸ Non wén i Ménsulate Kébéréh i Tuluse mano, “Amuk mérégén i kéfukase bé de métintu do étew dob de sala ro, ati keey i mérigowe dob de tete étew énda méngintulus ro?” ¹⁹ Mélaw amuk mérasay gom sabaf been i niy kétayay Tuluse, sarig gom fo toow bé Tuluse, sani mésarigone léménimbag begom, atin rigo gom saén i fiyowe.

5

¹ I de begom do odoroy de munur, wén i ongoté kuwe dob begome, non i begéne ségétew so odoron. Enggitó guy kérasay Kristowe, atin médayéwu so séréngan de dob gaiwe séfule moso. ² Mélaw, ongoté ku dob begome, toow gom fo talima i de kuyug Jesus sénarig i Tuluse begom. Begom i de maak do témalima bé de bili-biliy Tuluse. Fatut méuyot gom témalima bero non méuyot gom modor bé kétayay Tuluse. Kagom rigonén de ké maak mífégés gom de saén. Yamula rigo gom i galbék gome tidew fo dob kéfiyoy fédew gome. Enda fiyo no ké been i sahud gomey funa kome rémigo bé ni galbék. ³ Kagom féguléwon i de ni do munur sénarigén dob begome. Yamula fanangguwit gom bero inok iringé roy adat gome. ⁴ Atin mélaw, amuk séfule i Kristowe, sani maake

gérotor témalima bé de bili-biliy Tuluse, gédoté kom i toowe fo fiyo baras gom énda mécédano taman sa taman.

⁵ Atin loo so bé ni, i begome do ménguwéd séna, fatut odoro kom i de sugu i de lukés. Atin fatut téritantad gom kéluhanan, inok gésétabang gom. Non wén i Ménsulate Kébéréh i Tuluse mano, “Sébanil i Tuluse bé de félangklangka do étew, éndob mégédaw bé de téritantad.” ⁶ Mélaw fatut téritantad gom dob adafay barakatane Tulus inok Beeney émfégérotore begom dob gaiwe kétaya no. ⁷ Atin kagom émbuku, yamula sarig gom i kéluhanay de bukué kom dob Tuluse, non fagifaté no begom.

⁸ Atin ingat gom brab féfiyo gom i de kéfégitung gom. Non i Satanase, sani sébanile betom, démoyun sémuugud ségiléw bé mérayare binatang sélédé noy ati géafasa nuwe betom inok amaé no. ⁹ Fatut féégét gom i de kéunur gom inok géatuho kom i Satanase. Non gétila kom i de dumot tom munur bé Kristowe do bati dob de séségiyo-giyo ingéd dob duniyae ni, fénrasayén so bero ségiléw bé begome. ¹⁰ Endob amuk mérasay gom singkow, féégétay Tulusey kéunur gome dob Beene. Atin fébagéré noy de fédew gom brab tabanga no begom bé kéluhanay de kailanga kom. I kéluhanay tabange begom, tidew dob Beene non mégédaw fo betom. Beeney émféunure betom bé Kristowe inok gédoté tom i umule magufusa. Bé no gai, séréngan tom moso médayéw bé Jesuse. ¹¹ Médayéw i Kadnane taman sa taman. Amen!

¹² Silbanoy témenabangane begén séménulat bé ni foko sulat mangéy dob begome. Beeney maake gésarigo ku tuwaréy gu sabaf bé Kristowe. I funa kuwe séménulat dob begome inok méégét i kéunur gome. Atin méuyotu de so émfégétigan begom bé toow i kétoro guwe fantag bé kégédaw i Tuluse. Mélaw kagom térenon i témayakufe de.

¹³ I de munur bati dob Babilonia ségifaé ro begom. Fénémili i Tuluse

so bero ségiléw bé begome. Atin i Markose ségifaé no so begom. Been i maake nga gu. ¹⁴ Fatut fégito gom i késégédaw gome ké séségifa gom.

I Tuluse irayén damén dob begome kéluhanan do munur bé Kristowey métanéke fédéw.

Pedro

I Géruwowe Sulat Pedrowe

Ay niy géruwowe sénulat Pedrowe, sani ségétewé bé de kuyug Jesus brab dumō no amun dini séna dob duniyae niy Jesuse. Sénulat Pedrowey ni sulat dob kéluhanay de munur bé Jesuse.

Dob ni sulat, fénigat Pedrowey de munur fantag bé de tugién témodo. Atin téneroén so bé tintu fo séfule i Jesuse, fiyon fo ké mérugay séna.

¹ I séménulate bé ni, been i begéné sani Simon Pedrowe ségétew sugusuqué Jesu Kristowe brab apostolén. Sémulatu mangéy dob begome do munur bé Jesu Kristowe. Beeney Tulus tome sani ménémukase betom dob de sala tom. Sabaf bé énda i ramigo no bé étewe, fénwaléyén begom do munur dob Beene ségiléw bé kékéwaléy ne begey do munur dob Beene.

² Toow fo damén mégédaw i Tuluse begom brab irayén damén begom i métanéke fédew sabaf bé kégéloro gome bé Tuluse brab Kadna tome Je-

³ I barakatane Tulus nirayén dob betomey kéluhanay kailanga tome inok fiyoy kékéngintulus tome bé lala tome séna méuyag dob duniyae ni. Fakay gérigono tom i de ni non gétiga tom i Jesu Kristowe, sani séménéngkate betom mangéy dob Beene inok géamung tom bé kífiono nuwe brab kégérotor ne. ⁴ Bé ni, nirayén betom i kéluhanay fiyowe do gérotor éntingayén fénasadén irayén, inok sabaf bé de ni, géséliyaha tom i de tete kétayay de lowoh tom fégébinasa bé de étew. Atin waléy i adat tome ségiléw bé adat i Tuluse. ⁵ Atin mélaw fatut rigoné tom taman gagane tom inok mééégét i kénur tome sabaf bé de fiyo rigoné tom. Atin i de ni do fiyo rigoné tom, fatut féégété tom bé kégésobut tome bé kétintuwe. ⁶ Atin i kégésobut tome de, fatut féégété tom bé de kékia tom bé de tete kétaya tom. Atin fatut féégété tom i ni bé

kéfedayday tome. Atin i kéfedayday tome, fatut féégété tom bé kéodor tome bé Tuluse. ⁷ Atin i kéodor tome bé Tuluse, fatut féégété tom bé késégédaw tome. Atin i késégédaw tome, fatut féégété tom bé kéimu tome bé de dumō tom. ⁸ Amuk tintu gérigono kom i de ni, minut fo médooy de rigoné kom sabaf bé kénur gome bé Kadna tome Jesu Kristo. ⁹ Endob amuk wén i ségétew munur békén loo bé niy adat ne, maak langafén i kékégitung ne non énda gésobuto noy toowe, atin énggelifoto noy kékéday de salaén funa no malinis i fédew ne.

¹⁰ Mélaw do dumō gu, fatut toow tom fo télamanén fégitoj kékemili i Tuluse betom brab kékéunur ne betom. Amuk rigoné tom i ni, énda fo fakayén ké tagaké tom i kénur tome dob Beene. ¹¹ Atin moror mélaw i Tuluse témayakuf betom dob kékégléw i Kadna tome Jesu Kristo, sani ménémukase betom dob de sala tom. Enda mékédan i kékégléw ne taman sa taman.

¹² Mélaw démoyun fo fégégtédém gu begom i de ni fiyon fo ké énggésobuto komén brab mééggétén i kénur gome bé toowe kétoro. ¹³ Non dob karang guwe de, fiyo fo ké fégégtédém gu begom i fantage bé de ni bé lala guwe séna méuyag dob duniyae ni. ¹⁴ Gétiga ku éndaén mérugay i kékuyag guwe dob duniyae ni, loo bé fénngéttigay Kadna tome Jesu Kristo begén. ¹⁵ Mélaw rigoné kuy kéluhanay gagane kuwe béléewe ni inok énda gélifoto kom i de ni kétoro gu, fiyon fo ké éndaén diniwu dob duniyae ni.

¹⁶ Toow foy kétoro geye begom fantag bé kégumah i Kadna tome Jesu Kristo. Békén do tutul saén nuret gey begom tidew dob de kagey saén kékégitung, non énggito gey i kéréndaw ne. ¹⁷ Diyo gey de bé gaiwe fénngitoy toowe fo barakatan Abay Tulus i kéréndaw Kristowe brab kégérotor ne brab ménbéréh mano, “Ay niy Nga guwe toow fo méimuu de, brab toow fo mésuwatu de.” ¹⁸ Enggélingoo key i ni kékéhéh tidew dob lawayo

amun diyo gey dob Beene dob uruk i mékétéfuwe tuduk.

¹⁹ Mélaw tintu fo gétiga key toow i kéuret i de énggéétah do sénarigoy Tuluse muret bé kébérén ne. Atin fatut fo unur gom de so, non i kéuret ruwe maak solo réméndaw dob délémone taman géfuwén. Atin amuk gumah i géfuwéne, réméndaw i solo mubode dob betome. Non i Kristowe maak Beeney solo mubode atin séfule mangéy dini moso. ²⁰ Atin ay niy toowe na fo gérotor féginau gu begom: I toowe, énda i ségétew étew gétoroo noy atag i de kébérén i de sénarigoy Tuluse dob Ménsulate Kébérén i Tuluse, amuk énda témabang i Tuluse de. ²¹ Non i kéuret i de sénarigoy Tuluse muret bé kébérén ne békén tidew dob kékéfitung i kéilawane saén. Yamula fénbérén i Tuluse bero dob kékémandu i Rémogor ne.

2

¹ Bé do gétah, wén i do étew do tugién do ubo-ubo sénarigoy Tuluse muret bé kébérén ne. Atin ségiléw so bé béléewe ni, wén soy tugién do témore do gumah séko dob begome. Toroé roy de tugi fégébinasa bé kéunur gome. Toroé roy békén kun Kadnan i Jesuse fiyon fo ké ménléhu i Jesuse inok kédané noy de sala ro. Mélaw métékow ro mékukum. ² Gido loo, médooy modore bé de mékérésik do adat ro. Atin sabaf mélaw bé ni, médooy méraréke bé toowe kétoro. Non i de étew, marok do dumo tom i de ni tugién témore. ³ I de ni do tugién do témore, ureté ro dob begomey de tugi do tutul tidew dob de karo saén itungan. Rigoné roy ni inok gégedot ro saén kurta, non do arumén ro fo toow. Endob ménrugayén i kétafayay Tuluse bé kékukum ne bero.

⁴ Non i Tuluse, énda féndayaén i de télaki do ménalsa, yamula nibérén bero dob emfernowo. Diyo ronén béri dob délémone nikét ro dob de sangkali, ongot-ongot ro taman dob gaiwe tintunén fo kémukum i Tuluse.

⁵ Atin énda so féndaya i Tulusey de énggéétah do étew do ménalsa.

Yamula fénléhuén i kéluhanay de étew do énda méngintulus fénagéwén dob dakéle dunuk. Enda i ségétew ténabangén bero saliyu bé Noehe, sani téménoroe bé tintuwe, brab de fitew gétew do dumo no. I kéluhanay de ségiyo étew ménléné ro. ⁶ Atin kénukum i Tuluse soy de étew ménbati dob de ingéd féndawét Sodom brab Gomora. Fénléhuén bero bé aféye taman métuwégo ro. Rénigo noy ni inok fégito noy kérigo nuwe bé de étew do énda méngintulus ro. ⁷ Atin i ségétewé lagéy féndawét Lot saén i ténabang i Tuluse inok énda méléhuén bé béo. Enda kénukum i Tuluse de non métintu étew brab ménika mamung bé de mékérésik rigonéy de étew do énda modor bé de sugu i Tuluse. I de tete rigoné ro ménwaléy tete i fédew Lote de. ⁸ Non ménstifon beroy Lote dob no ingéd atin énggitó noy de tete rénigo ro sénga fuweh brab énggelingoo noy de tete kébérén ro. Mélaw ménntete i fédew ne bé de tete adat ro, non métintuy beene. ⁹ Mélaw gétigay Kadnaney ati kétabang ne bé de étew do méngintulus inok énda mésala ro ké téngkadén ro. Atin gétiga no soy ati kédusawe bé de tete étew taman dob gaiwe tintu mékukum ro. ¹⁰ Atin toow na fo gétimal i kékukum i Tuluse bé de étew odoro roy de mékérésik do kétayay de lowoh ro atin mika ro bé aturay Tuluse.

I de ni do tugién do témore do énggélabito ku, do félangka-langka ro fo brab do émbaraw. Enda fégadata roy de barakatan do étew dob lawayo diyo. Yamula féngrasé ro bero. ¹¹ Atin fiyon i de télakiy Tuluse, do toow na fo barakatan bé de ni do tugién do témore, énda fo ménengiras ro témebo bé de ni do barakatan do étew dob lawayo dob adafay Kadnane. ¹² Endob i de ni do tugién do témore, énda mégilak ro rémigo tete non been i niy de adat ro, maak do mérayar ro binatang fatut fo kéfoén brab féléhuén. I de ni do étew féngrasé roy éndae gésobuto ro. Tintu fo féléhuén ro non ségiléw ro bé de mérayar do

binatang. ¹³ Atin médusa ro fo toow non déménusa ro bé de ségiyo étew. Méuyot ro fo rémigo bé de tete do mékérésik kétayay de lowoh ro fiyon ké fuweh. Fatut fo mémala gom séréngan bero mama non mékérésik foy de rigoné ro brab tugio ro begom bé lala ruwe séréngan begom mama. Been i funa kome médowoy. ¹⁴ I de ni do tugién do témore, amuk gégitro do udenén do libun, méuyot ro de fo lémamfa. Atin énda fo témérén ro rémigo sala. Fagakara roy de étew énda séna méégét i kéunur ruwe inok gésala ro. Atin i de ni do tugién do témore, toow ro fo do arumén. Mélaw toow fo kukuméy Tuluse bero. ¹⁵ Ténagak roy tintuwe aguwon atin maak do méntadin ro mélaw béléewe ni. Niring roy Balaame sani nga Basore. I Balaame ni, toow fo génulaa noy kurtae énggédotén bé de tete rénigo no. ¹⁶ Mélaw fénbéréh i Tulusey kuda Balaame maak ségétew étew gémélé de sabaf bé de salaen. Atin téménréni mélaw i Balaame rémigo bé de kédufanga no.

¹⁷ I de ni do tugién do témore, ségiléw ro bé de mériot do séfut. Ségiléw ro bé de rawén faniréy réfuruhe inok énda rémania ro dob de nohok. Ténafayay Tuluse bero gono ro toow fo délémon dob emfernowo. ¹⁸ Toow fo do félangka-langka. Maak do ménalém i de kébéréh ro, éndob énda foy atag i de kéuret ro. Médoo damén i de étew géfédew tagaké roy de tete adat ro brab sésuway ro damén bé de tete étew. Endob i de ni do tugién do témore, fénsala ro bero bé de tete kétayay de lowoh ro. ¹⁹ I de ni do tugién do témore, fasada roy de étew bé fakay ro kun méfukas dob kitabe ké modor ro bero non toroé roy fakay kun rigonén i kéluhanane. Endob i toowe, i de ni do tugién do témore maak riféy de tete adat bero funa ro mébinasa. Non i étewe, maak riféy de udenén éntingayén méguléwon de. ²⁰ Amuk wén i de étew géloy Kadna tome Jesu Kristo, sani mémukase betom, gétagaka roy de tete adat i de

étew dob duniiae ni fégébinasa bé de étew. Endob amuk séfuleo ro man ségule i de ni do tete adat atin waléy ro man maak do riféy salae, toow na fo gétimal i goho ruwe bé sunguwe de. ²¹ Toow na fo fiyo ké énda damén séna énggétiga roy métintuwe aguwon bé gétila ronén atin tagaké roy sugu i Tuluse fénngétila no bero. ²² Mélaw dob de ni do rigoné ro, giton toow i kébéréh i Tuluse mano, "I itue, séfuleo noy suwah ne atin amaé no man. Atin i babuye féndiyoh séfule so man mangéy témunu."

3

¹ Do gulaané ku do dumo gu, been i niy géruwowe sulat gu begom. Dob ni géruwo sulat gu, toow fo ténlama gu fénfégétédém begom i toowe inok fiyoy kénégitung gome. ² Non méuyotu de ké démoyun gétédémo kom i kébéréh i de énggétah do sénarigoy Tuluse muret bé kébéréh ne. Atin méuyotu de ké gétédémo kom i sugu i Kadna tome mémukas betom sani sugue niray gey do apostol dob begome. ³ Dob sunguwe, fatut gétila kom i ni: Dob de géfuray do gai, wén i do tete étew odoro ro saén i de tete kétaya ro, brab diyangkaé ro begom. ⁴ Béréhé ro begom maro, "Hon i gono Kristowe de? Aw békén ba fénasadén i séfule kun mangéy dob duniiae ni? Enda fo munur gey bé nan, non i de sungu do munur bé Kristowe, ménléhu ro nén. Tidéw bé kélémbage bé duniiae ni taman so béléewe ni, énda so ménfagalino." ⁵ Endob i de ni do étew, lénifot roy kélémbag i Tuluse bé fantade brab lawayo bé kébéréh ne saén. Atin lénimbag i Tulusey duniiae tidéw dob wayége brab tidéw dob kérara i wayége. ⁶ Atin béninasay Tuluse soy de étew méuyag bé gétahe bé wayége non féndunukén. ⁷ Atin fentaus i Tuluse soy duniiae ni bé kébéréh ne inok amuk gérumah i gaiy kékukum i Tuluse, binasané no bé aféyey ni duniya brab de békén do méngintulus do étew.

⁸ Endob i de begom do gu-laané ku do dumo gu, kagom lifotén i ni: Dob antaf fédew i Tuluse, i ségétérésangane maak séngibu gébélantuwa, atin i séngibuwe gébélantuwa maak ségétérésangan saén. ⁹ Mélaw énda toow i kéfégitung i de étew bé métana kun i kétumay Kadnane bé fasad ne séfule mangéy dini. Yamula tingkéloy Kadnane saén begom, non énda damén méuyotén kémukum fiyon ségétew. Yamula méuyot de ké tagakéy kéluhanay de étew i de sala ro.

¹⁰ Gido loo, i kégumah i gaiwe séfule i Kadnane ségiléw bé kégumah i ménakawe non métékow i kégumah ne énda gétigay de étew de. Atin bé bénó gai, tékow méalfa i lawaye bé lalae wén i toow fo mékégilak dégu. Atin i kéluhanay de éntingayén dob lawayo diyo, métuwégi brab mébinasa. Atin méalfa soy duniyae ni brab kéluhanay de éntingayén de. ¹¹ Atin non mébinasay kéluhanay de ni moso loo bé ni, fatut métintu tom atin modor tom bé kétayay Tuluse. ¹² Non ongot-ongoté tom i gaiwe kémukum i Tuluse. Mélaw fatut rigoné tom i tamay gagane tome inok magad gégumah. Bé bénó gai, métuwégi brab mébinasay lawayo diyo, atin mélagang i kéluhanay éntingayéne sabaf bé keéduf ne. ¹³ Endob i betome, ongot-ongoté tom i fénasad i Tuluse betom, sani mantuwe laway brab mantuwe duniya. Diyo bati i de métintu do étew.

¹⁴ Mélaw do dumo gu, i lala tome ongot-ongot bé nan gai, fatut fo rémigo tom saén fiyo inok énda i téboéy Tuluse betom, atin énda mélaw mékeritén betom. ¹⁵ Kagom lifotén i funay Tuluse témingkélon betom, non iraya no betom gai inok méfukas tom dob de sala tom. Been soy niy atag i sulat i gulaané tome dumo tom Pablo dob begome. Féngétigay Tuluse de. ¹⁶ Been i niy démoyune fégétiga no begom dob kéluhanay de sulatén fantag bé kékukum i Tuluse. Atin wén soy do dumo bé de kétoro dob de

sulatén toow fo mérégén gésobutan. Atin i de dumo do étew énda i gétigatiga ro, toroé roy békéne katabawan atag i de sulat Pablo. Loo so bé niy rénigo ruwe bé de ségyo do Ménsulat Kébéréh i Tuluse. Mélaw been i niy funa ruwe mébinasa.

¹⁷ Endob i de begom do dumo gu, gétiga komén i de ni. Mélaw ingat gom inok énda géunur gom bé de békén katabawan do kétoro i de étew do énda modor ro bé de sugu i Tuluse. Non amuk énda mingat gom, gésésuway gom bé toowe kétoro nunuro kom.

¹⁸ Fatut fo minut waléy méégét i kénéunur gome sabaf bé kétayakuf gome bé kégédaw i Tuluse brab kégétiga kome bé Kadna tome Jesu Kristo, sani mémukase betom dob de sala tom. Médayéw fo damén béléewe ni taman sa taman. Amen!

Pedro

I Sunguwe Sulat Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniyae niy Jesuse. Sénulat Juaney ni sulat dob de kéluhanay de munur bé Kristowe.

Dob ni sulat, ténero Juane bé fatut ségédaw i de munur bé Kristowe.

¹ Sulata key begom fantag bé Kristowe, sani miraye bé umule magufusa. Wénén i Kristowe tidéw féganay. I Beene tintu énggito gey, brab énggelingoo key i kékérén ne, atin énggékuwaha key i lowoh ne. ² Amun méntefégitoy Jesu Kristowe dob duniyae ni, énggito gey. Mélaw ureté key dob begomey fantage bé Beene. Been i fédawéténé “Umul Magufusa”. Been i dumoy Abaye Tulus atin ménwaléy kélawan méntefégitoy dob begeye. ³ Ureté key dob begomey fantage bé énggito geye brab énggelingoo keye inok géunur gom de so inok waléy tom sédumon sabaf bé késédumo tome bé Abaye Tulus brab Nga ne Jesu Kristo. ⁴ Sulaté key i ni inok toow fo méégét i kéoror tome de.

⁵ Ay niy kéurete bénréh i Nga i Tuluse begey atin bérhé key dob begome: I Tuluse maak Solo rémendaw, atin énda i délémon dob Beene. Non toow fo fiyoy Tuluse, énda i tete dob Beene. ⁶ Mélaw amuk bérhé tom dumoy tom i Tuluse, éndob tete sénay de adat tom, témugi tom. Témugi tom dob de kékérén tom brab dob de rigoné tom so. ⁷ Endob amuk fiyoy adat tome ségiléw bé kéfiyoy Tuluse, sédumon tom brab malinis tom dob adafay Tuluse non mékédan i séngae sala tom sabaf bé kéléhu Jesuse Nga i Tuluse dob kruse.

⁸ Amuk bérhé tom énda i sala tom, tugio tom saén i de lowoh tom, énda munur tom bé toowe kétoro.

⁹ Endob amuk fayagé tom i de sala tom dob Tuluse, fésagadé no betom bé de sala tom atin linisé no betom dob

kéluhanay de tete adat tom. Rigoné noy ni non i Beene métintu brab tu-mané noy fasad ne betom bé fésagadé no betom. ¹⁰ Endob amuk bérhé tom énda i sala tom, maak fédawété tom i Tuluse ségétew témugi, atin énda munur tom bé kékérén ne.

2

¹ I begome maak do gulaané ku do nga gu, sulaté kuy ni dob begome inok énda rémigo gom sala. Endob amuk wén i gésala betom, wén i métintuwe kéfédéwa tom dob adafay Tuluse, sani Jesu Kristowe. ² Atin i Jesu Kristowe ni, Beeney tulake fégékédan bé de sala tom. Atin békén saén i de katom do sala, éndob loo soy de sala i kéluhanay de kélawan.

³ Amuk modor tom bé de sugu i Tuluse, gétiga tom betom i de dumoy Tuluse. ⁴ Endob amuk wén i ségétew émbérén mano, “Begéney dumoy Tuluse”, éndob énda modorén bé de suguéen, toow fo tugién i ni étew brab énda munurén bé toowe kétoro. ⁵⁻⁶ Endob i étewé modor bé kékérén i Tuluse, tintu fo méégét i kéféimu ne bé Tuluse. Non i étewé bérhé no dumoy tuluse, fatut iringé noy adat Jesu Kristowe. Amuk rigoné tom i ni, gétiga tom dumoy Tuluse betom.

⁷ Do gulaané ku do dumoy gu, békén mantu sugu i ni sulaté ku dob begome. Yamula tafayén i ni sugu énggelingoo kom tidéw féganay. Been i niy sugue téneroén betom bé fatut tom ségédaw. ⁸ Gido loo, maak mantu séna niray Jesusey ni sugu dob betome. Atin i Kristowe brab begome modor gom bé ni sugu. Gétiga kuy ni non béléewe ni minutén mékédan i délémons atin rémendaw i tintuwe solo, sani Jesu Kristowe.

⁹ Amuk wén i ségétew étewé émbérén munur kun bé Jesu Kristowe, éndob mérarék bé dumoy nuwe, batí séna dob délémons, non énda tintu no munur.

¹⁰ Endob i étewé mégédaw bé dumoy nuwe munur, beeney tintuwe munur bé Kristowe. Atin énda i rigoné no funay dumoy nuwe gésala. ¹¹ Endob

i étewe mérarék bé dumo nuwe, énda toow i kéunur ne bé Jesu Kristowe atin maak magéw dob délémone. Enda gétiga noy ayo nuwe non maak langafén non énda munurén bé Jesu Kristowe.

¹² Do nga gu, sulata ku begom non ménfésagadén i de sala gom sabaf bé Kristowe. ¹³ I de begom do lukés, sulata ku begom non énggélolo gomén i Kristowe ménwénén tidéw féganay. I de begom do ménguwéd séna, sulata ku begom non ténabana komén i Satanase.

¹⁴ I de begom do nga, sulata ku begom non ménwaléy gom sédumon bé Abaye Tulus. I de begom do lukés, sulata ku begom non ménwaléy gom sédumon bé Kristowe, sani ménwéné néen tidéw féganay. I begome do ménguwéd do étew, sulata ku begom non émbagér i kéunur gome, atin énda mékédan i kóbéréh i Tuluse tidéw dob itunga kome, atin ténabana komén i Satanase.

¹⁵ Kagom féimuén i de tete do éntingayén taloo no do tete adat dob duniyae ni. Non amuk féimué kom i de tete do éntingayén dob fantade ni, énda féimué kom i Abaye Tuluse.

¹⁶ I kéléhanay de tete dob duniyae ni, békén tidéw dob Abaye Tulus. Yamula tidéw dob fantade niy tetee loo bé de tete kétayay de lowoh i de étew, brab de kéingar, brab de kékélangka-langka. ¹⁷ Endob i duniyae ni, méalfa moso, loo soy de tete do éntingayén kétayay de étew. Endob i de étew rigoné roy kétayay Tuluse, méuyag ro taman sa taman.

¹⁸ Do nga gu, gédétén i tamfadane. Enggelingoo komén i kégumah i ségitewé étew moso féndawét “Sébanil bé Kristowe”. Atin béléewe ni wénén i do énggumah do étew do sébanil bé Kristowe. Mélaw gétiga tomén gédétén i tamfadane. ¹⁹ I de ni do étew sébanil bé Kristowe, békén ro do tintu dumo tom munur bé Kristowe. Atin been i niy funa ruwe téménagak betom. Amuk do tintu ro do dumo tom, énda damén ténagak ro betom. Endob sabaf bé kétagak ruwe betom,

énggétiga tom békén ro do tintu dumo tom munur bé Kristowe.

²⁰ Endob i de begom, fénémanduo Kristowe begom bé Rémogor i Tuluse. Atin mélaw gétiga kom kéléhanan i toowe kétoro. ²¹ Mélaw i funa kuwe sémulatan begom békén sabaf bé énda gétiga kom i toowe kétoro. Yamula sabaf bé kégétiga kome de, atin gétiga kom soy énda i tugi dob toowe kétoro.

²² Ati mélaw i témugie? I témugie, beeney émbéréhe bé békén kun Kristoy Jesuse. Been i niy étewe tintu fo sébanil bé Kristowe non mika bé Abaye Tulus loo so bé Nga ne Jesus.

²³ I étewe mika bé Nga i Tuluse, mika so bé Abaye Tulus. Endob i étewe munur bé Nga i Tuluse, munur so bé Abaye Tulus.

²⁴ Mélaw, kagom témérén munur bé Urete énggelingoo komén bé do gétah. Non amuk énda témérén gom munur bé ni kétoro énggelingoo komén bé do gétah, gétaus gom sédumon bé Abaye Tulus brab Nga ne Jesu Kristo taman sa taman. ²⁵ Non been i niy umule magufusa fénasad Kristowe irayén betom.

²⁶ Sulata ku begom inok géingata kom i de étew télamané ro begom féunurén bé békéne toow kétoro.

²⁷ Endob i de begom, iraya Jesu Kristowe begom témantu bé Rémogor ne. Atin amuk bat i Rémogor ne dob de fédew gom, énda mélaw kailanga kom i témoroe begom. Non i Rémogor ney témoroe begom bé kéléhanane. Atin toroe noy toowe, békén i tugie. Mélaw odoro kom i kétoro i Rémogor ne, atin kagom tagakén i Kristowe.

²⁸ Mélaw do nga gu, kagom tagakén i Kristowe inok énda mégilak gom taloo no mémala gom de dob gaiwe séfule moso. ²⁹ Gétiga tomén métintuy Kristowe. Mélaw fatut gétiga kom soy kéléhanay de rémigo bé métintuwe, beroy de nga i Tuluse.

3

¹ Fégitung gom, i Abaye Tulus toow fo gulaané no betom! Non féndawétén betom do ngaén. Atin i toowe, ménwaléy tom mon do ngaén. I funay

de étew sébanil bé Tuluse énda gélolo ro betom do nga i Tuluse, non énda so gélolo roy Tuluse. ² Do gulaané ku do dumo gu, ménwaléy tomén do nga i Tuluse. Endob énda séna gétiga tom de ké ati moso i kewaléyo tome. Endob gétiga tom i ni: Amuk séfule i Kristowe, waléy tom loo bé Beene, non gito tom moso i tintuwe fo falasén. ³ Mélaw, i kéluhanay de ongot-ongot bé késéfule Kristowe, fatut démoyun ro rémigo fiyo loo bé kéfiyo Kristowe.

⁴ Amuk wén i ségétew réménigo sala, fénlisén i kukumay Tuluse, non i atag i salae, been i kéfélise bé kukumay Tuluse. ⁵ Gétiga komén ménwaléy kéilawan i Kristowe inok kédané noy de sala i de kéilawan. Atin énggétiga kom soy énda i sala Kristowe, fiyon sébaan. ⁶ Mélaw i kéluhanay de dumo Kristo, énda fakayén ké taus ro rémigo sala. Endob i étewe démoyun rémigo sala énda séna gélolo noy Kristowe brab énda séna munurén de.

⁷ Do nga gu, kagom fédayaén i de étew émféunur begom bé tugie kétoro. Ay niy toowe kétoro: I de étew rémigo ro fiyo, beroy de métintu do étew ségiléw bé kétintu Kristowe. ⁸ Endob i de étew démoyun rémigo sala, beroy de kuyug Satanase. Non i Satanase tidéwén féganay i kérigo nuwe sala. Atin i Nga i Tuluse ménangéy dob duniyae ni inok kédané noy tetee galbék Satanase.

⁹ I de étew ménwaléy do nga i Tuluse, énda démoyun ro rémigo sala non ménwaléy ro miring bé adat i Tuluse. Enda fakayén démoyun ro rémigo sala non Tulus i Abay ruwe. ¹⁰ Endob i de étew énda mégédaw ro bé dumo ruwe, békén beroy de nga i Tuluse. Been i niy fégéolonone bé de nga i Tuluse brab de nga Satanase.

¹¹ Fatut tom ségédaw. Been i niy kétoroe énggelingoo komén tidéw féganay. ¹² Enda fatutén iringé tom i étewe féndawé Kain. Non beeney ségétewé kuyug Satanase, atin fénléhuén i tuwaréy ne Abel. Atin

i funa nuwe ménméléhu bé tuwaréy ne non métintuy rigonéy tuwaréy ne, éndob i beene tete i kaane rigoné.

¹³ Mélaw do dumo gu, kagom mégaif de amuk mérarék begom i do étew sébanil bé Tuluse. ¹⁴ Gétiga tom i ni: I de kéilawan méuyag ro taman gégumah i gaiwe méléhu ro. Endob békénén loo bé niy betome, non énggédot tomén i umule magufusa. Mélaw fiyon fo ké méléhu tom dob duniyae ni, méuyag tom so dob lawayo. I funa tome gétigan bé ni non mégédaw tom bé dumo tome. Endob i de étew do énda mégédaw ro, méléhu ro fo toow.

¹⁵ Amuk wén i étew mérarék bé dumo nuwe, i ni étew ségétew ménméléhu étew dob kégéitung i Tuluse de. Atin gétiga tom i de méméléhu do étew énda séna énggédot roy umule magufusa. ¹⁶ I funa tome gétigan bé atag i “kégédawe” non féndaya Kristowey de étew ménméléhu de bé kégantino nuwe betom inok kédané noy de sala tom. Mélaw fatut iringé tom soy rénigo nuwe. Iray tom soy férénawa tome fégétabang tom bé de dumo tom.

¹⁷ Ufama, wén i ségétewé kawasa, atin gito noy dumo nuwe méskinan médoo foy kailanga nuwe. Endob amuk énda méuray i na nuwe de atin énda tabanga no de, giton énda tintu no méimu bé Tuluse. ¹⁸ Do nga gu, énda fatutén ké mégédaw tom saén dob de kékéréh tom saén. Non fatut fégito tom i kégédaw tome dob de fiyo rigoné tom. Been i niy tintuwe kégédaw.

¹⁹ Mélaw amuk rigoné tom i ni, gétiga tom bé betom i de étew i tintuwe Tulus. Atin éndaén mélaw mágilak tom bé Tuluse ké diyo tom dob adafa nuwe. ²⁰ Fiyon fo ké fégéitungé tom médait tom mécukum, gétiga tom mas na fo gétigan i Tuluse bé betome, non gétiga noy kéluhanane.

²¹ Mélaw, do gulaané ku do dumo gu, gétiga tom énda i funa tom mágilak, atin mélaw géfébaraw tom démasal dob beene. ²² Fiyon atiy ongoté tome dob Tuluse, irayén dob betome. Non odoro tom i de suguéen, atin rigoné tom i késuwata nuwe. ²³ Atin ay niy

sugu ne betom: Fatut munur tom bé Nga ne Jesu Kristo atin ségédaw tom loo bé sénugu Kristowe betom bé gétaho. ²⁴ I de étew modor bé de sugu i Tuluse, bati ro dob Tuluse, atin i Tuluse bati so dob de fédew ro. Atin gétiga tom bati i Tuluse dob de fédew tom non nirayén betom i Rémogor ne.

4

¹ Do gulaané ku do dumo gu, kagom munur bé kéluhanay de étew émbéréh ro fénemanduoy Rémogor i Tuluse kun bero. Yamula téngkad gom bero inok gétiga kom ké tidew dob Tulusey rémogore taloo no békén. Non wén i médo do étew ubo-ubo sénarigoy Tuluse muret bé kékéréh ne, atin ménangéy ro dob de médo do ingéd dob duniiae ni. ² Atin wén i fégélolonon de inok gétiga kom i tidéwoy rémogore de. Amuk fayagéy ségétewe étew i Jesu Kristowe ménwaléy kéilawan, Rémogor i Tuluse bé bénoy ménémanduone de. ³ Endob i de étew bérhéhé ro énda kun ménwaléy kéilawan i Jesuse, énda bati i Rémogor i Tuluse dob berowe. Yamula fénemanduoy rémogor i Ségétewe étew Sébanil bé Kristowe. Enggelingoo komén i kégumah ne, atin bérhéhé ku begom énggumahén dob duniiae ni béléewe ni.

⁴ Endob i de begom, do nga gu, begom i de étew i Tuluse. Atin ténabana kom i de ubo-ubo sénarigoy Tuluse. Non i Rémogor i Tuluse bati dob de fédew gom mas na barakatan bé Satanase bati dob de fédew i de tete étew. ⁵ I de ubo-ubo sénarigoy Tuluse, toroé roy tete. Atin i de tete étew dob duniiae ni fégélingoé ro bero non sébanil ro so bé Tuluse. ⁶ Endob i de betom, do étew i Tuluse betom. Atin i de étew gélolo roy Tuluse, fégélingoé roy kétoro tome. Endob i de békén do étew i Tuluse, énda fégélingoé ro betom. Mélaw been i niy fégélolonone bé de étew fémanduoy Rémogor i Tuluse sani témore bé towe, brab i de étew fémanduo Satanase sani de témore bétugie.

⁷ Do gulaané ku do dumo gu, fatut ségédaw tom non i kégédawe tidew dob Tuluse. I de étew mégédaw ro bé dumo ruwe, beroy de étew do ménwaléy do nga i Tuluse brab dumoy Tuluse bero. ⁸ Atin i de étew énda mégédaw ro, beroy de énda séna gégélo bél Tuluse, non mégédaw foy Tuluse. ⁹ Atin fénggitoy Tulusey kégédaw ne betom bé késugu ne bé buntunge Ngaén dob duniiae ni inok gédoté tom i umule magufusa sabaf bé Beene. ¹⁰ Mélaw ay niy tintuwe kégédaw: Békén ké betom i méngédawe bél Tuluse. Yamula, Tulus i méngédawe betom. Been i niy funa nuwe séménugu bél Nga ne dob duniiae ni inok féléhuén fégétulak inok émfésagad i de sala tom.

¹¹ Do gulaané ku do dumo gu, amuk loo bé nan i kédakél i kégédaw i Tuluse betom, fatut fo ségédaw tom so. ¹² Enda i ségétew énggítito bél Tuluse. Endob amuk ségédaw tom, bati i Tuluse dob de fédew tom, atin i kégédaw tome waléy toow fo dakél miring bél kaane kégédaw.

¹³ Atin i Tuluse nirayén i Rémogor ne dob betome. Been i niy funa tome gétiga tom bati tom dob Tuluse atin i Tuluse bati dob de fédew tom. ¹⁴ Atin i begeye do apostol, énggítito gey i Nga i Tuluse brab de rénigo no. Mélaw ureté key i fantage bél késugu i Tuluse bél Nga ne dob duniiae ni inok fukasé noy de kéilawan dob de sala ro. ¹⁵ I de étew fayagé roy Jesuse Nga i Tuluse, bati i Tuluse dob de fédew ro, atin bati ro dob Tuluse. ¹⁶ Atin gétiga tom mélaw toow fo mégédaw i Tuluse betom. Mélaw gésarig tom de.

Non i Tuluse toow fo mégédaw. Atin i de étew do mégédaw, bati ro dob Tuluse atin i Tuluse bati dob de fédew ro. ¹⁷ I Tuluse féwaléyé no tintu fo dakél i kégédaw tome inok énda mégilak tom bél gaiwe kémukum i Tuluse. Mélaw éndaén mégilak tom bél no gai, non ménwaléyén ségiléw i adat tome bél Kristowe. ¹⁸ Enda i funa tom mégilak non mégédaw i Tuluse betom. Amuk

toow fo mégédaw i Tuluse betom, mékedanén i funa tome mégilak. Non i funay de étew mégilak, been i kékukum i Tuluse. Mélaw i de étew mégilak, énda séna méégét i késarig ruwe bé kégédaw i Tuluse.

¹⁹ I funa tome méimu bé Tuluse non fénimu i Tuluse betom sungu.

²⁰ Amuk wén i étew émbéréh mano, "Féimué kuy Tuluse", éndob mérarék bé dumo nuwe, témugi. Non amuk énda féimué noy dumo nuwe gito no, ati kéfingé-fingé i kékéimu ne bé Tuluse énda gito no de? ²¹ Mélaw ay niy sugue niray Kristowe betom: I de étew féimué roy Tuluse, fatut féimu ro so bé de dumo ro étew.

5

¹ I de étew munur bé Jesuse Beeney Kristowe, sani fénemili i Tuluse méguléw, beroy de ménwaléy do nga i Tuluse. Atin i de étew féimué roy Abaye Tulus, féimué ro soy de dumo ro nga i Tuluse. ² Atin amuk féimué tom i Tuluse brab odoro tom i de suguéen, gétiga tom féimué tom soy de dumo tom do nga i Tuluse. ³ Non amuk féimué tom i Tuluse, odoro tom i de suguéen. Atin énda mérégén i kéodoro tome bé de suguéen. ⁴ Non kéluhana tomén do ménwaléyén do nga i Tuluse, gétabana tom i Satanase, sani méguléwe bé duniiae ni. Atin i funa tome gétabana tom i Satanase non bé kéunur tome bé Jesuse. ⁵ Ati de étew gétabana roy Satanase? I de étew saén munur bé Jesuse Nga i Tuluse.

⁶ I Jesu Kristowe sénugu i Tuluse mangéy dob duniiae ni. Gétiga tom i ni sabaf bé wayége brab dara ne. Non énda saén ménbautisén dob wayége, yamula réménanas soy dara ne amun ménkélabo dob kruse. Atin i Rémogor i Tuluse fégétiga no betom toow i de ni, non i Rémogor i Tuluse démoyun béréhé noy toowe saén. ⁷ Mélaw wén i télew émféféngintoow fantag bé Jesu Kristowe: ⁸ I sébaane de, been i Rémogor i Tuluse. Atin i sébaane de, been i kékautise bé Jesu Kristowe. Atin i sébaane de, been i kéranas i

dara Jesuse bé kéléhu ne. Atin falan séfagayun i de ni do télew. ⁹ Munur tom bé kéuret i de étew saén, éndob mas na gérotor i kéuret i Tuluse funa tom tintu fo fatut munur. Atin nuret i Tulusey Jesuse Ngaén. ¹⁰ Mélaw i de étew munur ro bé Nga i Tuluse, ménunur ro bé toow i kéuret i Tuluse. Endob i de étew énda munur ro bé Tuluse, maak fédawét roy Tuluse ségétew tugién. Non énda ménunur ro bé kékéreh i Tuluse fantag bé Nga ne. ¹¹ Atin ay niy toowe kétoro fantag bé Nga ne. Niray i Tuluse betom i umule magufusa tidéw dob Nga ne. ¹² I de étew ménwaléy do dumoy Nga i Tuluse, wén i umul ro magufusa. Endob i de étew énda ménwaléy ro do dumoy Nga i Tuluse, énda énggédot roy umule magufusa.

¹³ Sulaté kuy ni dob begome do munur bé Jesuse Nga i Tuluse inok gétiga kom wénén i kagom bé umule magufusa. ¹⁴ Enda mégilak tom démasal dob Tuluse non gétiga tom fégélingoé no betom amuk mongot tom bé ati kétaya nuwe irayén. ¹⁵ Gétiga tom démoyun fégélingoé no betom ké démasal tom mongot dob Beene. Atin mélaw gétiga tom irayén betom fiyon fo ké ati ongoté tome dob Beene.

¹⁶ Amuk wén i ségétew begom gito noy dumo nuwe énggésala, atin énda ménléhuén bé nan sala, fatut dasal gom dob Tuluse inok irayén i umule magufusa dob nan dumo gom. Béréhé ku begom i fantage bé de sala békén fégéléhu i étewe. Endob wén soy do sala funay de étew méléhu. Atin énda féginauné ku begom démasal fantag bé de ni. ¹⁷ I kéluhanay de tete rigonén, sala. Gido loo, wén i do sala énda méléhu i de étew de.

¹⁸ Gétiga tom i de étew do ménwaléy nga i Tuluse énda démoyun ro rémigo sala. Non i Jesuse Nga i Tuluse, diagané no bero inok énda géférígono Satanase bero tete.

¹⁹ Gétiga tom betom i de étew i Tuluse fiyon fo ké Satanas i méguléwe

bé kéluhanay de étew sébanil bé Tuluse
dob duniyae ni.

²⁰ Gétiga tom ménangéy i Nga
i Tuluse dob duniyae ni, atin
fénggésobutén betom inok gétiga tom
i toowe Tulus. Ménwaleý tom do
dumoy toowe Tulus brab Nga ne Jesu
Kristo. Been i niy tintuwe Tulus atin
tidéw dob Beeney umule magufusa.

²¹ Do nga gu, kagom féngadafén i de
kéninontow.

I Géruwowe Sulat Juane

Ay niy sébaane bé de sénulat Juan, sani ségétéwe kuyug Jesuse brab dumo no amun dini séna dob duniyae niy Jesuse.

Dob ni sulat, féningat Juaney kéluhanay de munur fantag bé de tugién témodo.

¹ Begéney lukése odoroy de munur bé Kristowe. Sémulatu mangéy dob beeme, sani libune fénemili i Tuluse brab dob de ngaém. Toow fo gulaané ku begom. Atin békén saén i begéney gémulaane begom, non i kéluhanay gétigane bé toowe kétoro gulaané ro so begom. ² I funa keye gémulaan begom non munur gey bé toowe kétoro, atin énda mécédan i kéunur geye de taman sa taman.

³ I Abaye Tulus brab Nga ne Jesu Kristo, mégédaw ro damén betom, atin méuray damén i na ruwe betom, atin iray ro damén i métanéke fédew dob betome. Mérigoi ni dob betome non munur tom bé toowe kétoro brab ségédaw tom fo toow.

⁴ Toowu fo moror non énggétiga kuy de dumo bé de ngaém munur ro bé toowe kétoro loo bé sénugu i Abaye Tulus betom. ⁵ Mélaw, Di, ongoté ku dob beeme bé fatut tom ségédaw. Békén mantuy ni sugu labité ku dob ni sulat. Yamula tafayén i ni sugu niray dob betome tidéw féganay. ⁶ Non amuk ségédaw tom, modor tom bé de sugu i Tuluse. Atin ay niy sugue nirayén betom bé féganaye: Fatut tom ségédaw.

⁷ Médooy de mégakar do témodo ménangéy dob de séségiyo-giyo do ingéd dob duniyae ni. Ténoro roy békén kun toow i Jesu Kristowe ménwaléy kéilawan. I de ni do étew témodoro bé ni, tintu ro fo tugién brab sébanil ro bé Kristowe. ⁸ Mélaw ingat gom inok énda mésinggula i kélugoté kome gémalbék. Atin mélaw gédoté kom i kéluhanay baras gome tidéw dob Tuluse.

⁹ I de étew témenagak bé toowe kétoro Jesu Kristowe atin ménunur bé ségiyowe kétoro, békén ro dumoy Tuluse. Endob i de taus munur bé toowe kétoro, beroy do dumoy Abaye Tulus brab Nga ne so. ¹⁰ Mélaw amuk wén i gégumah dob begome atin témodo bé ségiyowe kétoro bé kétoro Kristowe, kagom tayakufén de dob de lawi gom taloo no ségifaé kom. ¹¹ Non amuk ségifaé kom i nan étew, géamung gom bé de tete galbékén.

¹² Médoo na damén i de kétaya ku bérén hén dob begome, éndob énda méuyotu de sémulat. Yamula méuyotu damén mangéy témukaw begom inok gésétengaang tom séuret-uret brab géséoror tom fo toow.

¹³ I de nga i dumo muwe sétiman idéng libun fénemili i Tuluse, ségifaé ro so begom.

I Gétéléwe Sulat Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniyae niy Jesuse.

Sénulat Juaney ni sulat dob ségétéwe féndawét Gayo, sani ségétéwe so munur bé Jesuse.

¹ Begéney lukése odoroy de munur bé Kristowe. Sémulatu mangéy dob beeme, Gayo. Beemey toowe fo gu-laané ku dumo gu.

² Adih, démasalu dob Tuluse bé féfyoné no beem brab iraya no beem fiyo kégelowohon loo bé kéiray ne beem bé mégéte kéunur. ³ Toowu fo moror amun énggumah i de dumo to munur bé Kristowe atin nuret roy fantage bé kéfedayday me munur bé toowe kétoro, loo soy adate nodoro mo bé ni toow kétoro. ⁴ Toow fo dakél i kéroror guwe bé gélingoo kuy fantage bé kéodoroy de nga gu bé toowe kétoro. Been i funa kuwe moror bénii, non énggelingoo kuy fantage bé beeme.

⁵ Adih, i kétabanga muwe bé de dumo tom munur ménawet diyaan i fégéolonone bé toow i kéunur me. Non fiyon fo ké énda séna gélolo mo bero, tényakufém bero. ⁶ I de begey do munur bati dini, amun ménlimud gey méngintulus, nuret i de ni do étew i kégédaw me bero. Atin amuk géawét ro man diyaan, fiyo ké tabanga mo man bero loo bé fatute mésuwat i Tuluse de inok gétaus ro magéw. ⁷ Non i funa ruwe magéw inok légébé roy kétoro Kristowe. Atin énda tayakufé roy tabang i de étew do békén munur bé Kristowe. ⁸ Mélaw i betome do munur, fatut tabanga tom i de ni do étew inok géamung tom bé galbék ruwe lémégéb bé toowe kétoro.

⁹ Séménulatu sébaan foko sulat mangéy dob de munur diyaan, éndob énda féngélingo Deotrefesey kégéginau guwe. Méuyot de ké been saén i méguléwe bé de munur diyaan.

¹⁰ Atin amuk géangéyu diyaan, ureté ku beem i kéluhanay de rénigo no, brab kéluhanay de tete tugi bénréhén fantag bé begeye. Atin békén saén i ni, non amuk géawét diyaan i de dumo tom munur, énda fo tayakufé no bero. Atin gélée noy de fiyo étew méuyot témayakuf bero, atin énda féahuré no dob lawie féngadafan i de étew témayakuf bero.

¹¹ Adih, kago iringén i tetee adatén. Yamula iringém i fiyowe adat. I de étew rémigo fiyo, beroy de étew i Tuluse. Endob i de étew rémigo tete, beroy de énda séna géglolo bé Tuluse.

¹² I kéluhanay de étew émbéréh ro fiyo fantag bé Demetriowe. I métintuwe adatén i émféféngintoowe bé i beene, fiyo fo étew. Been soy niy funa keye de démayéw. Atin gétiga mo toow i kéuret geye.

¹³ Médoo fo damén i kéuyoto kuwe uretéen beem, éndob mikau de sémulat.

¹⁴ Méuyotu damén ké géségitó to bé magade ni inok gésétengaang to séuret-uret.

¹⁵ Métanék damén i fédéw me, I kéluhanay de dumo to dini ségifaé ro beem. Ségifaém so begén i kéluhanay de dumo to diyaan.

I Sulat Judase

Judas i dawét i sémenulate bé ni sulat, sani tuwaréy Jesu Kristowe. Sénulat Judasey ni sulat dob kéluhanay de munur bé Kristowe.

Dob ni sulat, féninat Judasey kéluhanay de munur fantag bé de tugién témore.

¹ Begéney Judase, sani dumo Santigowe sétiman idéng, brab sugusué Jesu Kristowe.

Sémulatu mangéy dob begome do étew fén-unur i Tuluse bé Jesuse. Begomey de étew kégédaway Abaye Tulus brab do diyagané Jesu Kristowe.

² Mégédaw damén i Tuluse begom, brab méuray damén i na nuwe begom, brab irayén damén begom i métanéke fédew.

³ Do gulaané ku do dumo gu, bé gétahe, i toowe fo kéuyotu ku sulaté ku dob begome, been i niy fantage bé kékufas Jesuse betom dob de salatom. Endob kailangan fo sulaté ku na métah i kékéginai guwe begom bé fatut fo fétaus gom i kékahu kome bé de étew méuyot mégalin bé toowe kétoro niray i Tuluse. Non sénarig i Tulusey kétoro ne dob betome do étewén. Atin kailangan énda fo méfagalino. ⁴ Kailangan fo féginauné ku begom lee non wén i do étew do békén méngintulus énggésławék betom, éndob sékémé ro saén. Fégaliné roy toowe kétoro fantag bé kégédaw i Tulus tome. Non toroé roy fakay kun i de étew do rémigo bé de ménrésik do adat loo bé de rigoné ro, non énda kémukum i Tuluse kun non toow saén mégédaw. Atin béréhé ro békén kun Kadna tom i Jesu Kristowe brab békén kun Jesus i máguléwe betom. Endob ménrugayén ménbéréh dob Ménsulate Kébéréh i Tulusey fantage bé kékukume bero.

⁵ Gétiga komén i kéluhanay de ni béréhé ku begom. Gido loo, fefégétédém gu begom i ni: Bé do gétah, ténangéy i Kadnaney de Judío

mésut tidéw Egipto, sani ingéde gono ro ménrifén. Endob amun énggésut ron, fénléhu i Kadnaney de dumobero sani do énda munur dob Beene. ⁶ Fégétédém gom i de télaki bé do gétah. Amun méntéfégérotor ro brab ténagak roy fatute gono ro, fén-angéy i Tuluse bero dob délémone brab nikétén bero bé sangkalie énda ménkédano taman sa taman. Atin diyo béleewe ni fénongotongot i Tuluse beroy gaiwe ménkukum ro fo toow. ⁷ Fégétédém gom i de étew ménbati dob Sodoma brab dob Gomorah brab dob de ingéd gédét diyo. Ségiléw i rénigo ruwe bé de ni do télaki, non tete i de adat ro atin ménwaléy ro bakla. Mélaw kénukum i Tuluse bero bé kékédiyo ne bero dob gonoy aféye taman sa taman inok émféingat bé de ségiyo étew kéké atiy mérigowe dob berowe kéké ségiléw i de rigoné ro.

⁸ Atin ségiléw so bé niy de tugién do témore. Rigoné roy de toow fo ménrésik dob de karo do lowoh, atin béréhé roy odoro ro saén i kékémandu i de téginéf ro. Endob mika ro modor bé de sugu i Tuluse atin féngrasé roy de barakatan do étew dob lawayo.

⁹ Fiyon foy toowe fo gérotor télakiy Tuluse féndawét Miguel, énda rénigo noy loowe bé ni. Bé do gétah amun ménléhu i Moisese, ménrésik i ro Miguele bero Satanase fantag bé ati isuwe bero gégédot bé bangkay Moisese. Endob énda fo ménfabaraw i Miguele méngras bé Satanase. Yamula ménbéréh saén mano, “Kadnan i gémélée beem.” ¹⁰ Endob i de ni do tugién do témore, féngrasé roy éndae gésobuto ro. Ségiléw ro bé de mérayar do binatang non énda i gétiga-tiga ro saliyu bé de tete adat ro funa ro ménbinasa.

¹¹ Ménkukum ro fo toow, non méniring ro bé adat Kaine, sani sunguwe ménméléhu bé gétaho. Atin méniring ro so bé adat Balaame, sani réménigowe bé békéne katabuwan. Non i de ni do tete témore, rémigo ro tete inok gégédot ro kurta. Niring ro soy adat Korehe non rénigo noy sébanile bé Tuluse funa ro ménbinasa.

¹² Amuk sélimud gom inok mama gom brab méngintulus gom, mamung ro begom. Maak do mémérésik bérétik, non rigone roy tete do kétaya ro saén atin énda mon mémala ro de. Rigoné ro saén i de karo kétayan. Ségiléw ro bé de rawén énda muwit ro rana, atin faniréy réfuruhe saén. Atin ségiléw ro so bé de kayéw énda mégonok ro ké gai ro damén mégonok. Maak do ménrandutén do kayéw do mégangu. ¹³ I de ni do tugién do téromo, ségiléw ro bé de dakél do bagél dob dogote ké wén i défuk, non i de tete do mémala do rigoné ro, maak do mémérésik buro-buro dob rotor i wayége. Ségiléw ro bé de gitoo énda modor ro dob fatute aguwo ro, non tagaké roy toowe kétoro. Mélaw ténafoy i Tulusey toowe fo délémon gono ro méféri su taman sa taman.

¹⁴ Atin i Enoke, sani géénéme katufuan tidew dob Adame, nuretéen i kékéréh i Tuluse sénarigén dob beene fantag bé de ni do étew mano, "Téngteng gom! Gégumah moso i Kadnane beroy firoye ngibu do télaki no, ¹⁵ inok susiné noy de rénigoy kéluhanay de étew. Atin kukumé noy de békén méngintulus do étew do ménsala non bé kéluhanay de tete rénigo ro brab kéluhanay de tete kékéréh ro bénréh ro sébanil bé Tuluse."

¹⁶ I de ni do tugién do téromo, démoyun ro butébutéed brab démowoy. Modor ro saén bé de tete kétaya ro. Atin do fébantug-bantug ro brab kémuwéy bé de étew inok mérigo saén i de karo kétayan.

¹⁷ Endob do dumo gu, fégétédém gom i bénréh i de apostol i Kadna tome Jesu Kristo begom fantag bé ati mérigowe dob de gai moso. ¹⁸ Bénréh ro begom maro, "Amuk gégumahén i tamfaday de gai, wén i do étew démiyangka begom. Been i niy de étew odoro roy de tete kétaya ro sébanil bé Tuluse." ¹⁹ Been i niy de étew émfésébanil begom. Odoro ro saén i de tete kétaya ro. Atin i Rémogor i Tuluse énda batien dob berowe. ²⁰ Endob i

de begom do dumo gu, fétaus gom i késétabang gome inok méégét i kénur gome bé kétoroe tidew dob Tuluse. Atin fédaya gom i barakatane Rémogor i Tuluse tétabangan begom démasal. ²¹ Atin fétaus gom i kétanggaf gome bé kégédaw i Tuluse bé lala gome ongot-ongot bé kériray Kadna tome Jesu Kristo betom bé umule magufusa sabaf bé kériray i na nuwe betom.

²² Atin fatut mégédaw gom bé de étew ruwo-ruwoy fédew ruwe munur. ²³ Tabanga kom i de ségiyo étew inok énda mékukum ro, maak fégayasé kom bero fégawitén tidew dob afeye. Atin fatut mégédaw gom bé de ségiyo étew. Endob fatut mérarék gom bé de mémérésik do adat ro atin ingat gom inok énda géiring gom bero.

²⁴ Toow tom fo fésalamat bé Tuluse. Beeney gétabange betom inok énda gésala tom, atin Been soy géuwite betom dob adafa nuwe. Atin bé béo, mémédan i de sala tom brab moror tom bé lala tome gérito bé réndaw ne. ²⁵ Dayéwé tom fo toow i Tuluse fénagéw dob Kadna tome Jesu Kristo. Tulusey mémukase betom dob de sala tom. Beeney barakatane méméléw atin kaan i kéluhanay aturane tidew féganay taman sa taman. Amen.

Judas

I Kéfégétiga Jesu Kristowe bé Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniyae niy Jesuse.

Sénulat Juaney ni sulat dob de fitew timan simbaan dob dakéle ingéd Asia. Dob ni sulat, nuret Juaney fantage bé ati fénténgténg i Tuluse dob beene dob téginéfe. Binuwaya i kédoonoy ni sulat atin fantag so bé ati mérigowé moso. Fénggétigay Tuluse bé Juane bé tabanay Tulusey Satanase moso atin rigoné noy mantuwe duniya brab laway gonoy de munur bé Kristowe bati sétifon bé Tuluse.

¹ Been i niy librowe fantag bé kéfégétiga Jesu Kristowe. I Tuluse sénarigén dob Beeney ni inok fégétiga no dob de sugu-suguéy Tuluse ké atiy mérigowé énda mérugayén tidéw béri. Fénggétiga Kristowey ni bé késugu ne bé de télaki no mangéy dob begéne, sani sugu-sugué nuwe féndawét Juan. ² Atin i begéne, sulaté kuy kéluhanay de énggitó gu. Mélaw i ni libro, been i niy kékéréh i Tuluse brab toowe kétoro Jesu Kristowe. ³ Toow fo moror i étewe masa bé ni libro, atin moror soy de mégélingo bé ni uret tidéw dob Tuluse atin modor bé ni kékéréh. Non éndaén mérugayén métuman i ni uret.

⁴⁻⁵ Begéney Juane, atin sulaté ku dob begomey de fitew lumfuk do munur dob de fitew timan ingéd dob sakuf i dakéle ingéd féndawét Asia.

I Tuluse brab Rémogor ne brab Jesu Kristowe, mégédaw ro damén begom atin irayén damén begom i métanéke fédew. I Tuluse, ménwénén tidéw féganay, atin wén so béleewe ni, atin énda mékdano taman sa taman. Atin i Rémogor i Tuluse bati dob adafay Tuluse atin wén i fitew fi-man barakatén. Atin i Jesu Kristowe, mésarigon i kékéréh ne. Beeney Nga i Tuluse loo soy sunguwe métébule

inok méuyag taman sa taman. Been soy méguléw bé kéluhanay de méguléw dob duniyae ni.

Mégédaw foy Jesuse betom. Atin fénukasén betom dob de sala tom bé kéléhu ne dob kruse. ⁶ Atin fénwaléyén betom do fadi, atin Been i méguléwe betom. Rigoné tom i galbék i fadie méngadaf bé Abay ne Tulus. Mégédaw damén i Jesu Kristowe atin méguléw damén taman sa taman. Amen!

⁷ Séfule moso i Jesu Kristowe giton gégumah dob de rawén. Atin gitoy kéluhanay de kéilawan, fiyon i de étew ménméléhu de bé do gétah. Atin i kéluhanay de étew dob duniyae ni, kémérew ro sabaf bé Beene. Mérigo damén. Amen.

⁸ I toowe fo barakatan Kadnán Tulus, wénén tidéw féganay, atin wén so béleewe ni, atin énda mékdano taman sa taman. Bénréh i Tuluse mano, "I Begéne Alfa brab Omega, sani féganayane brab tamanane."

⁹ Begéney Juane, sani ségétéwe dumo gom munur bé Jesu Kristowe. Téméninkélu bé kékérasaye begén ségiléw bé kéluhanay de étew féguléwo Jesu Kristowe. I Begéne, sabaf bé kékret guwe bé kékéréh i Tuluse brab kétoro guwe bé kékret Jesuse, fénangéyén begén fénbati maak férisu dob ni bungéd féndawét Patmos. ¹⁰ Wén i no sébaan gai kékéngadaf bé Kadnane, fénémanduoy Rémogor i Tuluse begén. Atin énggelingoo kuy métanuge béréh maak témburi tidéw dob ségang guwe. ¹¹ Ménbéréh mano, "Sulatém i énggitó muwe, atin féuwtém mangéy dob de ni do fitew lumfuk do munur Begén do bati dob Efeso, Esmirna, Pergamo, Tiatira, Sardis, Filadelfia, brab Laodisia."

¹² Tidéw béo méntékélidu inok téngténgé kuy ni émbéréh dob begéne. Atin énggitó guy fitéwe timan bélowan solo. ¹³ Atin wén i ségétéwe téménindég dob kérara i de fitew ni timan solo. I falas ne maak kéilawane. Métaah i kégal ne taman dob de sékéyén. Atin lénégétén i bélowane dob kuméng ne. ¹⁴ Toow fo fute i buk

ne maak fute safut, atin i de moto no maak rino aféy. ¹⁵ Atin i de sékéyén sémélínang maak galang métunag dob aféye. Atin i béréh ne maak érok samfaw. ¹⁶ Atin wén i fitéw timan gitoon génamak i kuwonone kémérén. Atin wén i sundang mésut dob ba ne maak dila. Atin i ni sundang, murém i de baén sébala-bala. Atin toow fo géfékaya i rangih ne maak téresang ké géutuh. ¹⁷ Amun énggito guy ni étew, méntéléngkébu dob adafa nuwe maak ménléhuun. Endob nahayén i kuwonone kémérén dob begéne atin ménbéréh mano, “Kago mégilak. Begéney féganayane brab tamanane. ¹⁸ Begéney méuyage. Ménléhuu, éndob méntébuleu, atin méuyagu taman sa taman. Wén i atura ku méguléw bé kéléhue brab gonoy de ménléhu. ¹⁹ Mélaw sultém i de énggito mo, sani de mérigo béléewe ni brab de mérigo moso. ²⁰ Béréhé ku beem i atag i de fitéw timan gitoon gito mo dob kuwonone kémér gu brab atag i de fitéw timan do bélodon solo. I de fitéw timan do gitoon, beroy de maak télaki bantaya roy de fitéw lumfuk do munur. Atin i de fitéw timan do solo, beroy de maak do fitéw lumfuk do munur.”

2

Efeso

¹ Atin féntaus Kristowey kékéréh ne mano, “Sulatém dob télaki Tuluse démiyaga bé de munur bati dob ingéde Efeso mamo, ‘Ay niy kékéréh Jesuse. Begéney gémamake bé de fitéw timan gitoon dob kuwonone kémér gu brab magéwe dob kérara i de fitéw timan bélodon solo. ² Gétiga kuy de rigoné kom, atin gétiga ku mégéror gom gémalbék brab gétiga kuy ketingkél gome. Atin gétiga ku so mika gom sélawék bé de tete étew. Atin ténengkad gom i de étew béréhé ro do apostol ro kun funa kom énggétigan bé békén ro do tintu apostol. Atin gétiga kom tugién i kétoro ruwe. ³ Atin gétiga ku so témingkél gom bé kékérasay i de étew begom sabaf bé kéunur gome Begén.

Atin fiyon fo ké mérásay gom, énda mékédan i kéunur gome. ⁴ Gido loo, wén i téboé ku begom. Béleewe ni, éndaén féimué kom Begén loo bé do gétah. ⁵ Fégétédém gom i sunguwe kímu gom Begén. Fatut gésénule gom brab tagak gom i de sala gom atin rigo gom fiyo loo bé do gétah. Non amuk énda rigoné kom i ni, mangéyu dob begome brab kédané kuy soloe tidéw dob gono nuwe. ⁶ Endob wén soy fiyo rénigo gom kétaya ku. Non ménkérít gom bé de tete rigoné de Nikolaita ségiléw bé kékérító kuwe bero.

⁷ “Kéluhana kom, fégélingo gom i kékéréh i Rémogor i Tuluse dob begome do munur.

“I de étew gétabana roy Satanase, iraya ku bero kuwagib mama bé onok i kayéwe miray bé umule magufusa, sani kayéwe dob bélodon fan-tad i Tuluse.”

Esmirna

⁸ Atin féntaus Kristowey kékéréh ne mano, “Sulatém dob télaki démiyaga bé de munur bati dob ingéde Esmirna mamo, ‘Ay niy kékéréh guwe. Begéney féganayane brab tamanane. Ménléhuu éndob méntébuleu. ⁹ Gétiga ku kérégénan gom. Gétiga ku méskinan gom. Gido loo, kawasa gom dob lawayo. Gétiga kuy de tete kékéréh fantag bé begome bénréh i de étew béréhé ro do Judio ro. Endob békén ro do tintu Judio, yamula do étew Satanas ro. ¹⁰ Kagom mégilak bé kékérasay begom énda mérugayén tidéw bén. I Satanase, téngkadé no begom bé kékérasay nuwe bé de dumo gom. Atin kérégénan gom bé foloe gétérésangan. Endob fatut fidayday gom bé kéunur gome Begén, fiyon fo ké féléhué ro begom. Atin iraya ku mélaw begom lakay, sani umule magufusa.

¹¹ “I kéluhana kome, fatut fégélingo gom i kékéréh i Rémogor i Tuluse begom do munur.

“I de étew gétabana roy Satanase, énda mékukum ro bé géruwowe kéléhu.”

Pergamo

¹² Atin féntaus Kristowey kékérén ne mano, "Sulatém dob télakiwe démiyaga bé de munur bati dob Pergamo mamo, 'Ay niy kékérén guwe, sani wéne sundangén murém i de baén sébala-bala. ¹³ Gétiga kuy Satanas i máguléwe bé ingéd gome, gido loo ménfédayday gom munur dob Begéne. Atin énda ténaagak gom i kéunur gome fiyon fo ké fénléhu roy Antipase sani mésarigone muret fantag bé Begéne. Fénléhu ro diyaan dob ingéde féngguléwo Satanase. ¹⁴ Gido loo, wén i de téboé ku begom. Non wén i do dumō begom modor bé kétoro Balaame bé do getah. Non i Balaame, téneroén i Balake émfésala bé de Judio bé kékéama ne bero bé amaéne ténuak dob de kéninontow. Brab téneroén bero bigaén. ¹⁵ Atin loo so bé ni, wén i do dumō begom modor bé kétoro i de Nikolaita. ¹⁶ Fatut gésénule gom brab tagak gom i de sala gom. Amuk énda, mangéyu dob begome énda mérugayén tidéw bénii brab tibohé ku begom bé sundange mésut dob ba guwe maak dila.

¹⁷ "I kéléhana kome, fatut fégélingo gom i kékérén i Rémogor i Tuluse dob de munur.

"Dob de étew gétabana roy Satanase, iray gu beroy amaéne féndawét mana nitong dob lawayo diyo. Atin iraya ku soy séngae ségétew bero bé futee batéw. Atin dob séngae sébaan batéw wén i ménssulate de mantu dawét énda i géglolo de saliyu bé étew gégédot bé ni batéw. Bero saén i de géglolo de."

Tiatira

¹⁸ Atin féntaus Kristowey kékérén ne mano, "Sulatém dob télakiwe Tuluse démiyaga bé de munur bati dob Tiatira mamo, 'Ay niy kékérén guwe, sani Nga i Tuluse. Mérino i de moto gu maak aféy atin sémelinang i de sékéy gu maak galang métunag dob aféye. ¹⁹ Gétiga kuy de rigoné kom, brab kégédaw gome, brab kéunur gome, brab de galbék gom, brab de kétéingkél gom. Atin gétiga ku so toow na fo

fiyoy de rigoné kom béléewe ni bé do gétah. ²⁰ Gido loo, wén i téboé ku begom. Wén i libune féndawét Jesebel, sani ménbéréhe been kun i sarigoy Tuluse muret. Atin féndaya gom i ni libun témo ro bér bigae dob de kuyug gu brab fénamaén bero bé de amaén ténuak dob adafay de kéninontow. ²¹ Téningkélo ku, brab niraya ku gai inok gésénule brab tagaké noy ni tete rigoné no. Endob mika fo témagak bé de ni do tete rigoné no. ²² Mélaw fédéruuné ku inok énda géétekén tidéw dob iro nuwe, loo soy de dumō no ménssibiga. Rigoné kuy ni béléewe ni, amuk énda tagaké roy de tete rigoné ro. ²³ Atin féléhué ku soy de kuyugén. Tidéw bénii, i de munur dob kéléhanay de ingéd, gétiga ro mélaw i Begéne, gétiga kuy kékégitung i kéléhanay de étew brab de kétaya ro. Atin iray gu moso i fatute dob séngae ségétew étew sabaf bé de rigoné no.

²⁴ "Endob médo gom dob Tiatira, énda ménodor gom bé ni tete kétoro. Atin énda gétiga kom i de féndawét do ménalém kétoro Satanase. Atin mélaw énda umana kuy kékérégéna kome. ²⁵ Endob fatut fééget gom i kéunur gome taman séfuleu. ²⁶ Atin dob de étew gétabana roy Satanase atin modor ro bér kétaya kuwe taman dob tamanane, iray gu beroy aturane máguléw bé de ingéd dob duniyae ni. ²⁷ Iray guy ni aturan non i Abay guwe Tulus nirayén so dob Begéne. Atin émbagér i kékégléw ruwe, atin énda i géatuh bero. ²⁸ Atin iray gu so dob berowey solo mubode.

²⁹ "I kéléhana kome fatut fégélingo gom i kékérén i Rémogor i Tuluse dob de munur."

3

Sardis

¹ Atin féntaus Kristowey kékérén ne mano, "Sulatém dob télakiwe démiyaga bé de munur bati dob Sardis mamo, 'Ay niy kékérén guwe, sani gémamake bé Rémogor i Tuluse wén i fitew timan barakatén brab do fitew timan gitoon. Gétiga kuy de rigoné kom. Atin

gétiga ku so médooy étewe émbéréh bé wén kun i umul gom magufusa. Endob énda toowén, non énda gitono dob de rigoné kom. ² Mélaw, tékénéal gom! Atin fébagér gom i kéunur gome, non amuk énda, mékedan. Non gétiga ku kulang sénay adat gome funay Tulus guwe énda mésuwatén. ³ Fégétédém gom i ténoroe nén begom brab nunuro kome nén bé do gétah. Odor gom de brab fatut gésénule gom atin tagak gom i de sala gom. Non amuk énda gésénule gom, mangéyu dob begome bé gaiwe énda karangé kom de, loo bé kégumah i ménakawe. ⁴ Endob wén soy do dumo begom dob Sardis, énda dénungiso roy de kégal ro, sani de énda ménamung dob de tete adat. Mélaw géodor gom Begén kémégal fute non médait gom de. ⁵ I kéluhanay de gétaban bé Satanase, fékégalé ku bero fute loo bé ni, atin énda kédané kuy de dawét ro tidew dob librowe sénulata ku bé de dawét i de étew gégédot bé umule magufusa. Atin béréhé ku dob téngaangay Abay guwe Tulus brab de télaki no, bé beroy de kuyug gu.

⁶ “ ‘Kéluhana kom, fatut fégélingo gom i kékéréh i Rémogor i Tuluse dob de munur.’ ”

Filadelfia

⁷ Atin féntaus Kristowey kékéréh ne mano, “Sulatém dob télakiwe démiyaga bé de munur bati dob Filadelfia mamo, ‘Ay niy kékéréh guwe, sani mékétéfuwe brab toowe. Wén i atura ku méguléw loo bé kékéulgéw Datu Dabide bé do gétah. Atin amuk féahuré kuy ségétéwe étew dob kékéulgéw guwe, énda i géalang de. Atin amuk énda féahuré kuy ségétéwe étew, énda i géféahur de. ⁸ Gétiga kuy de rigoné kom. Atin fiyon fo ké énda médooy gom, ménfedayday gom munur Begén brab ménodor gom bé kétoro guwe. Mélaw ungkaé kuy bengawane fingé dob begome inok géahur gom, atin énda i géfintu de. ⁹ I de étew do émbéréh do Judio ro kun, tugién ro non beroy de kuyug Satanas.

Félingkuwédé ku bero dob adafa kome, atin gétiga ro mélaw mágédawu begom. ¹⁰ Sabaf témeningkél gom loo bé sénugu guwe, diyagané ku begom inok énda gésugsug gom dob de mérégén do gai gégumah moso dob duniyae ni fégétengkad bé kéluhanay kélawane. ¹¹ Séfuleu énda mérugayén tidew béri. Lékafit gom dob toowe kétoro unuro kom inok énda métadin i barase iray gu begom. ¹² I de étew gétaban bé Satanase, féwaléyé ku bero do maak liley i lawi i Tuluse atin éndaén tagaké ro de. Atin sulaté ku dob berowey dawét i Tulus guwe, brab dawét i ingéd i Tuluse, sani mantuwe ingéd féndawét Jerusalem mélus moso tidew dob Tulus do lawayo. Atin sulaté ku so dob berowey mantuwe dawét gu.

¹³ “ ‘I kéluhaná kome, fatut fégélingo gom i kékéréh i Rémogor i Tuluse dob de munur.’ ”

Laodisea

¹⁴ Atin fentaus Kristowey kékéréh ne mano, “Sulatém dob télakiwe démiyaga bé de munur bati dob Laodisea mamo, ‘Ay niy kékéréh guwe, sani féndawéte “Amen” non toow i kékéréh guwe funay de étew gésarig. I Tuluse fénlimbagén Begén i kéluhanane. ¹⁵ Gétiga kuy de rigoné kom. Enda mon méduf gom brab énda mon mélégénéy gom, sani de békén kuyug gu taloo no sébanil Begén. Endob toow fo damén méuyotu de kékéréh gom taloo no mélégénéy gom. ¹⁶ Atin sabaf bé énda mon méduf gom taloo no mélégénéy gom, duraé ku begom tidew dob ba guwe. ¹⁷ Béréhé kom makom, “Kawasa gey, wén gey bé kéluhanay kailanga keye.” Endob i toowe, mékégédawgédaw gom, éndob énda gétiga kom de. Non sabaf bé kékulang i kéunur gome, maak do méskinan gom brab do félawas brab do langafén. ¹⁸ Mélaw féginauné ku begom, béléy gom bé fiyowe bélwon, sani tintuwe kéunur dob Begéne, inok waléy gom kawasa. Atin béléy gom so bé futee kégal sani métintuwe rigonén inok éndaén

maak félawas gom mémala. Atin béléy gom so bé uwa motowe inok gérito gom. ¹⁹ I de étew kégédawa ku, géléé ku brab fifité ku bero ké mésala ro. Mélaw fatut gésénule gom atin tagak gom i de sala gom. ²⁰ Fégélingo gom, diyou dob bengaway lawi gome témawag. Amuk wén i gégingo bé béréh guwe atin ungkaé noy fintue inok géahuru, mahuru atin sérénganu de mama. ²¹ Dob de étew gétabana roy Satanase, iray gu beroy kuwagibé mésar dob sékulo kuwe amuk mésaru néen méguléw, ségiléw bé kétaba kuwe brab keésar guwe dob sékuloy Abay guwe Tulus bé lala ne méguléw.

²² “I kéluhana kome, fatut fégélingo gom i kékéréh i Rémogor i Tuluse dob de munur.” Been i niy bénréh Kris-towe.

4

¹ Tidéw béno, wén man i fénggitoy Kadnane begén. Atin énggito guy fintue ménungka dob lawayo. Atin ménbéréh man i étewe ménbéréh dob begéne bé gétahe de. Atin ménbéréh man maak béréh témburi mano, “Enggon, nik go angéy dini, atin fégito gu beem i kailangane mérigo moso.” ² Sonom béno, fénagéw i Rémogor i Tuluse begén mangéy diyo. Atin diyo dob lawayo, wén i saray datue. Atin wén i étew de ménasar diyo. ³ Sémelinang i rangih ne loo bé de balilaga do batéw féndawéti haspe brab kornalina. Atin wén i mélunéwe béluntu loo bé falas i balilagae batéw féndawéti esmeralda géliwet dob sarane ni. ⁴ Atin wén soy ruwo folo bra fot sara datu géliwet bé ni saran. Atin diyo ménasar i ruwowe folo bra fot do lukés odoron. Kéménégal ro fute brab wén soy do bélownon do lakay diyo dob de uléw ro. ⁵ Atin tidéw dob sarane dob kérarae, mésut i kilote brab déguwe brab létee. Atin diyo dob adafay sarane ni, wén i do fitew timan mérino solo. Beroy de fitew rémogor i Tuluse. ⁶ Dob adafay sarane ni, wén i maake dogot maak féngalungan non toow fo métiyéw.

Atin wén i fot gétew barakatan étew géliwét bé sarane ni. Atin ménféno motoy de lowoh ro dob de saréwo ro brab dob de ségang ro. ⁷ I sunguwe de loo bé falas i binatange féndawéti leon. Atin i géruwowe de maak falas i tuduwe safi. Atin i gételéw ruwe maak falas i lagéye kéilawan i uléw ne, atin i géefot ruwe maak falas banug lémayang. ⁸ I séngae ségétew bé de ni fot gétew étew barakatan, wén i do néni timan dofafak ro, atin i de lowoh ro ménféno do moto fiyon i fantad i defafak ro. Atin fuweh na kélungonon, énda témérén ro kémanta maro, “Mékétéfu, méméketéfu, méméketéfuy barakatane Kadnan Tulus. Wénén i Tulus tidéw féganay, wén so béeewe, atin énda so mémédano taman sa taman.”

⁹ Atin i de ni do fot gétew do barakatan étew, kémanta ro dayewé ro brab bantugé ro brab fésalamat ro bé mén sare dob sarané ni, sani Tuluse méuyag taman sa taman. I lala ruwe rémigo bé ni, ¹⁰ i de ruwo folo bra fot gétew do lukés odoron méméduunsum ro dob adafay Tuluse, féngadafé roy Tuluse méuyag taman sa taman. Atin fédioyé roy de lakay ro dob adafay saray Tuluse ni, atin émbéréh ro maro, ¹¹ “Kadna key Tulus, Beem i médaite dayewén brab bantugén. Atin Beem i médaite méguléw brab bantugén. Non Beem i léménimbage bé kéluhanane, atin ménwén i kéluhanane béeewe ni sabaf saén bé kétaya muwe.”

5

¹ Tidéw man béno, énggito guy déniline sulat dob kuwonone kémér i mén sare dob saray Tuluse ni. Atin mémélibé bél sulate sébala-bala. Atin wén i fitew timan tandaén inok énda i géungka de. ² Tidéw béno, énggito guy barakatane télaki. Atin mémantanug fo toow i kékéréh ne mano, “Ati médaite kémédan bé de ni do tanda atin ungkaé noy ni sulat inok basané no?” ³ Endob énda i ségétew étew médait géungka de taloo no géténgténg dob bukag ne, fiyon dob

lawayo diyo taloo no dob fantade ni taloo no dob fantad i fantade. ⁴ Atin kéménrewu fo toow non énda i ségétew étew giton géungka bé ni sulat taloo no géténgténg dob bukag ne. ⁵ Tidew béno, i ségétewe bé de lukés odoron ménbérél dob begéne mano, "Kago kémérew. Téngténgém. I Jesuse, sani fédawéténé 'leon' séfu Judah, séfu Datu Dabid so. Beeney téménabanane bé Satanase atin wén mélaw i kuwagibén kémédan bé de fitew tanda atin ungkaé noy ni sulat."

⁶ Tidew béno, énggito guy Natiwe Bili-bili téménindég dob kérara i saray Tuluse ni. Atin sénliwétoy fote gétew étew barakatan brab do lukés odoron. Atin i Natiwe ni Bili-bili, énggito guy de falién fénggéléhuén bé do gétah. Atin wén i fitéwe sidungén brab fitew timan moto no, sani fitéwe rémogor i Tuluse fénuvitén dob kéluhanay de ingéd dob duniyae ni.

⁷ Atin i Natiwe ni Bili-bili, ménangéy fégédét brab éndotén i sulate ni dob kuwonone kémér i mén sare dob sarane ni. ⁸ Bé lala ne rémigo bé ni, i de fot ni gétew do barakatan étew brab de ruwo folo bra fot gétew do lukés odoron, méntédunsum ro dob adafay Natiwe ni Bili-bili. Atin i séngae ségétew bero, wén i génamakén baatén féndawét alpa, brab génamakén soy bélowone biléw ménfénou dukah, sani kédasal i de étew i Tuluse. ⁹ Atin kéménanta ro mantu kanta maro, "Beem i médaite médot bé sulate ni atin médait go kémédan bé de tanda. Non fénléhuén Beem, atin daraém i fégébélée bé de étew inok méfukas ro atin géséfule ro mangéy dob Tuluse tidew dob séngae tribo, dob séngae késébérél, brab dob séngae kélasi étew, brab dob séngae ingéd. ¹⁰ Fénguléwo mo bero brab fénwaléyém bero do fadi inok féngadafé roy Tulus geye. Atin fáféguléwé mo bero moso dob duniyae ni."

¹¹ Tidew béno, téngténg gu man ségule atin énggelingoo kuy bérél i de laksaén do télaki. Téménindég ro géliwét bé sarane ni brab de fot gétew do barakatan étew brab de

lukés odoron. ¹² Atin kéménanta ro toow fo métanug maro, "I Natiwe Bili-bili fénléhuén médait fo dayewén brab bantugén. Atin toow fo barakatan, brab toow fo gétigan, brab toow fo kawasa, brab toow fo émbagér." ¹³ Atin énggelingoo kuy kantay kéluhanay de étew dob lawayo brab dob fantade brab dob fantad i fantade brab dob dogote, brab kéluhanay de étew dob kéluhanay de gonon. Kémanta ro maro, "I Beene mésar dob saray Tuluse ni brab i Natiwe ni Bili-bili, médayew ro damén brab émbantug ro fo toow taman sa taman. Atin méguléw ro so taman sa taman." ¹⁴ Atin bang i de fot ni gétew do barakatan étew, "Amen!" Atin i de lukés odoron méntédunsum ro méngintulus.

6

Ide tanda

¹ Tidew béno, énggito guy Natiwe Bili-bili kédané noy sunguwe bé de fitew timan do tanda. Atin énggelingoo kuy ségétewe bé de fot gétew do barakatan étew ménbérél maak léte mano, "Enggon!" ² Atin amun téngténg gu, énggito guy futee kuda. Atin i étew de kéménuda, génamak bohor. Atin wén i ménirayan de lakay. Atin ménagéw ménangéy sétiboh inok tabané noy de kéilawan.

³ Tidew béno, kénday Natiwe Bili-biliy géruwowe bé de tanda dob sulate ni. Atin énggelingoo kuy bérél i géruwowe bé de barakatan do étew mano, "Enggon!" ⁴ Tidew béno, ménut i furowe kuda. Atin i étew de kéménuda, nirayan kuwagib ménanay bé késégirawe dob duniyae ni inok sétiboh i de étew brab séféléhu ro. Atin niray de soy dakéle sundang.

⁵ Tidew béno, kénday Natiwe Bili-biliy gétéléwe bé de tanda dob sulate ni. Atin énggelingoo kuy gétéléwe bé de barakatan do étew mano, "Enggon!" Atin amun téngténg gu, énggito guy mitame kuda. Atin i étew de kéménuda, génamak timbangán.
⁶ Atin wén i énggelingoo ku maak

béréh étew tidéw dob kérara i de fot ni barakatan do étew mano, "Gétéléw saén baad bé ségantange arinah i méléléye bé ségétérésangane sahud, atin ségantang faréy féndawét 'barley' saén i méléléye bé ségétérésangane sahud. Atin kagom singgulaén i nore taloo no arak."

⁷ Tidéw béno, i Natiwe Bili-bili kénda noy géfote tanda tidéw dob sulate ni. Atin énggelingoo kuy géfote barakatan étew mano, "Enggon!"

⁸ Atin amun ténéngteng gu, énggito guy mérégunire kuda. Atin i dawét i étewe de kéménuda "Kéléhu". Atin wén soy ségétéwe étew énggétundug de féndawét "Emferno". Niray beroy aturane méméléhu bé géfote baad bé de kéilawan dob duniyae ni. Féléhué ro bero dob késégirawe brab dob léngobe brab dob déruune brab dob de mérayar binatang.

⁹ Tidéw béno, i Natiwe Bili-bili kénda noy gélimowe bé de tanda tidéw dob sulate ni. Atin énggito guy de rémogor i de étew fénléhuén sabaf bé kéunur ruwe bé kékéréh i Tuluse brab kéuret ruwe fantag bé ni. Diyo ro dob fantad i ahayane tulakan. ¹⁰ Ménkes ro métanug maro, "Barakatan Kadnan, i Beeme mémétéfu go brab toow i kékéréh me. Kédiron nay kékukum me sémuli dob de tete étew dob duniyae ni sabaf bé kékéléhu ruwe begey?"

¹¹ Atin i séngae ségétew bero nirayan fute kégal. Atin wén i ménbéréhe dob berowe bé fatut témérén ro na singkow saén taman féléhuén nay kéluhanay de dumo ro do sugu-suguéy Tuluse kailangan féléhuén so loo bé berowe.

¹² Atin énggito guy Natiwe Bili-bili kédané noy génème bé de tanda. Tidéw béno, wén i toow fo ménbagér luba, atin i térsange ménwaléy mitam maak mitam safut. Atin i térsang kélungonone ménwaléy furo maak dara. ¹³ Atin i de gitoon ménlawu tidéw dob lawayo mangéy dob fantade maak do mata onok kayéw ménlawu bé kégérumpfak i émbagére de réfuru. ¹⁴ Atin i lawaye ménalfa maak sulat méndilin. Atin i kéluhanay de

tuduk brab de bungéd méntéfégalin ro tidéw dob de gono ro. ¹⁵ Tidéw béno, i de datu dob duniyae ni, brab de méguléw, brab de odoroy de sundalo, brab de kawasa, brab de mégatur, brab kéluhanay de étew fiyon fo ké do rifén taloo no do békén rifén, ménrékunéy ro dob de takub brab dob fantad i de batéw dob de tuduk. ¹⁶ Atin ménkes ro dob de tuduk brab dob de batéw maro, "Tamfurén gey inok énda gitoy étewe ménasar dob saray datue dob lawayo begey atin inok énda gégumah dob begeyey kékérít i Natiwe Bili-bili. ¹⁷ Non énggumahén i gaiwe kémukum ro, atin énda i géatuh bero."

7

¹ Tidéw béno, énggito guy fote télaki téménindég dob fote sugud i duniyae ni. Atin nalang roy fote réfuru. dob duniyae ni inok énda géiyuf ro dob fantade taloo no dob dogote taloo no dob de kayéw. ² Atin énggito guy ségiyowe télaki énggumah tidéw sébangan nuwitén i tanda i méuyage Tulus. Atin ténawagén métanug i de fot ni télaki sénarigoy Tuluse minasa bé fantade brab dogote. ³ Ménbéréh i ni télaki dob de dumo no télaki mano, "Kagom binasanén i fantade brab dogote brab de kayéw taman énda gétandaa tom i de rangih i de sugu-suguéy Tuluse." ⁴ Atin énggelingoo kuy kédooy de méntandaan, mératuh bra fot folo bra fot ngibu gétew. Atin falan ro tidéw dob kéluhanay triboy de Judio. ⁵ Atin folo bra ruwo ngibuy méntandaane tidéw dob de séfu Judah. Atin folo bra ruwo ngibuy tidéwe de dob de séfu Ruben. Atin folo bra ruwo ngibuy tidéwe de dob de séfu Gad.

⁶ Atin folo bra ruwo ngibuy tidéwe de dob de séfu Aser. Atin folo bra ruwo ngibuy tidéwe de dob de séfu Naftali. Atin folo bra ruwo ngibuy tidéwe de dob de séfu Manase. ⁷ Atin folo bra ruwo ngibuy tidéwe de dob de séfu Simeon. Atin folo bra ruwo ngibuy tidéwe de dob de séfu Lebi. Atin folo bra ruwo ngibuy tidéwe de dob de séfu Isakar. ⁸ Atin folo bra

ruwo ngibuy tidéwe de dob de séfu Sabulon. Atin folo bra ruwo ngibuy tidéwe de dob de séfu Jose. Atin folo bra ruwo ngibuy tidéwe de dob de séfu Benjamen.

⁹ Tidéw béno, énggito guy toowe fo dakél ménlimud do étew. Enda gébilangan ro non toow ro fo médoo. Tidéw ro dob kéluhanay de séségiyo-géyédo do étew, brab do tribo, brab do ingéd, brab do késébéréh. Atin téménindég ro dob adafay saray Tuluse ni brab dob adafay Natiwe ni Bili-bili. Atin kéménagal ro fute brab géménamak ro do dau bongo.

¹⁰ Atin ménbérélro métanug maro, "Dayéwé tom i Tulus tome ménasar dob sara nuwe, brab dayéwé tom i Natiwe ni Bili-bili non fukasé ro betom dob de sala tom." ¹¹ Atin i kéluhanay de téaki téménindég ro lémiwét bé saray Tuluse brab de lukés odoron brab de fot gétew do barakatan étew. Tidéw béno, ménédunsum ro dob adafay sarane méngadaf bé Tuluse. ¹² Ménbérélro maro, "Hoo, féngadafé tom i Tulus non médait dayéwén brab bantugén brab basanan brab fésalamatan. Beeney tintuwe gétigan brab barakatan, brab Beeney méguléwe. Médayéw damén taman sa taman. Amen!"

¹³ Tidéw béno, i ségitewé bé de lukés odoron fénénginsaa no begén mano, "Ati de ni do étew kéménagal fute, ati tidéwo ruwe de?"

¹⁴ Atin séménumbulu maku, "Idih. Endob i beeme, gétiga mo."

Atin ménbérél mano, "Beroy de étew tidéw dob dakélé kérégénon dob duniyae. Ténumak roy de kégal ro dob dara i Natiwe Bili-bili inok fute, sani kémédane bé de sala ro. ¹⁵ Been i niy funa ruwe téménindég dob adafay saray Tuluse brab diyo ro dob lawi i Tuluse fuweh na kélunganon rémigo bé kétayay Tuluse. Atin i Tuluse, sani ménasare dob sara nuwe, diyané no bero, non diyo dob berowe.

¹⁶ Atin éndaén mélayah ro taloo no térumén ro. Atin éndaén kéédufan ro bé térsange taloo no do ségyo na méduf. ¹⁷ Non i Natiwe Bili-bili dob

kérara i saray Tuluse, Beeney maake mantayan bero brab magifat bero. Atin fanangguvité no bero dob de séfut i wayége miray bé umule magufusa. Atin kédanéy Tulusey de kétete i de fédew ro inok éndaén kémérew ro."

8

¹ Atin amun kénday Natiwe Bilibiliy géfitéwe bé de tanda tidéw dob sulate ni mémentanék fo toow i lawayo bé rugay i ségréfae uras. ² Tidéw béno, énggito guy de fitew gétew téaki, sani de démyun témindég dob adafay Tuluse. Atin wén i ménirayan bero fitew timan témburi.

³ Atin wén man i ségiyowe téaki énggumah ménuwit bélwon fédégon dukah. Atin ménangéy dob ahayane tulakan brab téménindég dob sékulo nuwe. Atin niray dob beeney médoowe dukah inok sélawék no bé de kédasal i de munur. Atin tulaké no diyo dob bélwon tulakan dob adafay saray Tuluse. ⁴ Atin i bél i dukahe ni ménslawék bé kédasal i de munur, ménangéy rotor tidéw dob fégone de génamak i téaki ni téménindég dob adafay Tuluse.

⁵ Tidéw béno, i téaki ni, éndotén i fégone bé dukahe atin fénénoén bé barawe tidéw dob ahayane tulakan, atin nibérén dob duniyae. Atin léménéte brab déménagu brab kéménilot brab léménuba.

I de fitew témburi

⁶ Tidéw béno, i de fitew ni gétew téaki do wén i do témburi ro, téménafayron inok iyufé roy de témburi ro.

⁷ Atin amun iyuféy sunguwe téaki témburi nuwe, réménana yelo brab aféy ménslawék bé darae. Atin i gétéléwe baad bé duniyae méntruwé, loo soy gétéléwe baad bé de kayéw, loo soy kéluhanay de mélunéw do kéroon.

⁸ Tidéw béno, niyuf i gérubowe téaki kaane témburi. Atin ménlawu dob dogotey maake dakél tuduk ménrino bé aféye. Atin waléy dara i gétéléwe baad bé dogote. ⁹ Atin i gétéléwe baad bé de sédo brab do binatang dob dogote ménléhu ro.

Atin ménbinasa soy gétéléwe baad bé de barko.

¹⁰ Tidéw béno, niyuf i gétéléwe télakiy kaane témburi. Atin i dakéle gitoon ménrino maak félatut ménlawu tidéw dob lawayo mangéy dob gétéléwe baad i fulangiwe brab de séfut. ¹¹ I dawét i ni gitoon, “Féla”. Atin i gétéléwe baad bé de wayég ménwaléy féla. Atin médooy de étew ménléhu non énggéném ro bé ni wayég féla.

¹² Tidéw béno, niyuf i géfote télakiy kaane témburi. Atin téléd baad bé térésange brab térésang kélungonone brab de gitoon i ménbinasawe de. Mélaw téléd baad i ménkédane bé kégékaya ruwe. Atin déménlémon i gétéléwe baad bé fuwehe loo soy kélungone de.

¹³ Tidéw béno, bé lala guwe de séna téméngténg, énggelingoo kuy métanuge béréh i banuge lémayang dob kérara fuwehe mano, “Toow fo mékégédaw-gédaw i de étew dob duniiae ni amuk émbéréh sékoy téliséwe timan témburi iyuféy de ménnsama téléd gétew télaki!”

9

¹ Tidéw béno, niyuf i gélimowe télakiy kaane témburi. Atin énggito guy gitone, sani télakiwe ménlawu mangéy dob duniiae ni tidéw dob lawayo. Atin niray dob beeney gun-sie fégéungka bé toowe fo ménalém liyung. ² Atin nungkaén i liyunge ni. Sonom béno, ménnsut i béle loo bé bél i dakéle aféy. Atin déménlémon i duniiae non nalang i ébéley réndaw i térésange. ³ Atin ménnsut i de kasuk tidéw dob béle ni, atin météberagar ro dob fantade. Atin nirayén beroy toowe fo démawét kékeke maak sifitan. ⁴ Sénugu ro bé békén binasané roy de kéroon taloo no do kayéw taloo no do udenén do nohok. Géfédawéto ro saén i de étew énda métandaan i de rangih ro bé tanda i Tuluse. ⁵ Endob i de kasuk ni énda ténungkasén bero ké féléhué roy de ni do étew. Yamula, fédawéto ro saén bero taman méifus i limowe gétérésang kélungonon. Atin i kédawét i kékérasaya ruwe loo bé

kédawét i kékeke i de sifitan. ⁶ Atin bé no limo gétérésang kélungonon i de ni do étew toow fo mérasy, toow ron méuyot damén méléhu, éndob énda fo méléhu ro de.

⁷ I falas i de kasuk ni, maak do kuda kudaay de sundalo inok sétiboh. Atin wén i do maak do bélwon do lakay dob de uléw ro. Atin i de falas i de uléw ro maak do lagéy kéilawan. ⁸ I de buk ro maak do buk libun. Atin i de kifé ro loo bé kiféy de mérayar binatang féndawét do leon. ⁹ Atin i de kuméng ro métélibé béréh maake futow. Atin i béréh i defafak ro maak béréh i da médooy kalesa magayas mangéy sétiboh. ¹⁰ Atin i de igor ro maak igor i da sifitan non kêmeke ro. Atin been i ni de igor roy émfédawétonne béréh de étew bé rugay i limowe gétérésang kélungonon. ¹¹ Atin i datue méguléw bero, beeney télakiwe mungka béréh ménalém liyung. I dawét ne dob Hebreewe “Abadon”, atin dob Griegewe “Apolion”, I atag ne, “Beeney Minasawe”.

¹² Isunguwe kékérasayan ménngilidén. Atin wén sénay ruwo de énda séna ménrigo no.

¹³ Tidéw béno, niyuf i géénéme télakiy kaane témburi. Atin énggelingoo kuy émbéréhe tidéw dob fote sugud i bélwone ahayan tulakan dob adafay Tuluse. ¹⁴ Ménbéréh dob géénéme ni télaki wén i témburi no mano, “Tangéyém i de fot gétew télaki nikét dob dakéle wayég féndawét Eufrates.”

¹⁵ Tidéw béno, téngéyén i de fot ni gétew télaki. I de ni do télaki ténaay non bero bé gétahe inok féléhué roy gétéléwe baad bé kéilawane béléewe ni dob tintuwe ni gai. ¹⁶ Atin wén i ménbéréhe dob begéne béréh i kedooy de sundalo kéménuda ruwo ratuh laksa. ¹⁷ Atin dob ni fénggiton dob begéne, énggito guy de kuda brab de kéménuda de. I de ni do sundalo, wén i de futow fénggétéléréh béréh de kuméng ro. Furoy de falasén maak aféy brab gadung maak safiro, brab mérégurir maak asupre. Atin i de uléw i de ni do kuda maak do uléw leon. Atin mésut tidéw dob de ba

roy aféye brab béle brab asuprewe. ¹⁸ Atin fénléhu roy gétéléwe baad bé kéluhanay de kéilawan bé aféye brab béle brab asuprewe mésut tidéw dob de ba ro. ¹⁹ I de ni do kuda, dob de ba ro brab dob de igor roy bagér ruwe méméléhu. Non i de igor ro maak do ulé wén i do uléw ro émfédawéton bé de étew.

²⁰ Atin i de étew énda méléhu ro, énda gésénule ro bé kéfengadaf ruwe bé de bélwon, do filak, do galang, do batéw, brab do kayéw do rénigo ro do kéninontow. I de ni do éntingayén énda do gérito ro taloo no do gégeingo taloo no do géagéw. Atin i de ni étew énda so gésénule ro bé de kéfengadaf ro bé de saitan. ²¹ Enda so gésénule ro bé de kéféléhu ro, loo soy de kébéliya ro, loo soy de kébigaé ro, loo soy de kéfénakaw ro.

10

¹ Tidéw béno, énggito guy ségiyowe barakatan télaki ménlus tidéw dob lawayo. Kéménagal bé rawéne atin léniwét i béluntuwey uléw ne. Atin i rangih ne maak téresang, atin i de sékéyén maak liléy aféy. ² Atin wén i klohe sulat ménlin dob kémér ne. Atin fendiyoén i kuwonone sékéyén dob dogote, atin i biwonge de dob fantade. ³ Atin téménawag toow fo métanug maak béréh i de leon. Amun téménrén témawag, sénumbuloy fitéwe do métanug léte. ⁴ Amun téménrén ro, géfédew sulaté ku damén i de énggelingoo ku. Endob énggelingoo kuy émbéréhe tidéw dob lawayo mano, “Kago sulatén i kékéréh i de fitéw timan léte, non fatut sékémén saén.”

⁵ Tidéw béno, i télakiwe ni, sani énggito guwe téménindég dob dogote brab dob fantade, ténunggulén i kuwonone kémérén saréw dob lawayo. ⁶ Atin séménafa dob dawét i Tuluse méuyag taman sa taman, sani léménimbage bé lawaye brab kéluhanay de éntingayén de brab fantade brab kéluhanay de éntingayén de so brab dogote brab kéluhanay de éntingayén de so. Atin ménbéréh i

télakiwe ni mano, “Endaén i anggaén! ⁷ Endob amuk iyuféy géfitéwe télakiy témburi nuwe, féagéwéy Tulusey nékém ne bantakén, loo bé bénréh ne dob de sugu-suguén do sénarigo no muret bé gétaho.”

⁸ Tidéw béno, ménbéréh man begén i émbéréhe tidéw dob lawayo bé gétahe de mano, “Fégédét go dob télakiwe téménindég dob dogote brab dob fantade atin dotém i méniline sulat dob kémér ne.”

⁹ Mélaw ménfégédétu dob télakiwe ni atin nongot gu dob beene ké irayén begén i klohe ni sulat. Atin ménbéréh dob begéne mano, “Dotém atin amaém. Amuk amaé mo toow fo meh dob ba me maak téne, éndob waléy mélétis dob sur me.”

¹⁰ Tidéw béno, éndot guy klohe ni sulat dob kémér ne, atin nama gu. Amun diyoén dob ba guwe, toow fo meh maak téne. Endob amun énggelinuo kun, ménwaléy mélétis dob sur guwe. ¹¹ Tidéw béno, wén i ménbéréhe dob begéne mano, “Kailangan ureté mo man ségule i kékéréh i Tuluse fantag bé de médo do ingéd, brab de médo do kélasi étew, brab de klasi-klasi késébéréh, brab de datu.”

11

¹ Tidéw béno, wén i niraye begén fégétémbo maak tugé. Atin wén i ménbéréhe dob begéne mano, “Tindég go atin témbu moy lawi i Tuluse brab ahayane tulakan. Atin bilangém i de étew diyo dob lawi i Tuluse méngefudaf. ² Endob kago témbunén i de fésayawan non nirayén dob de békén Judio. Gédaa roy méméfuwe ingéd Jerusalem taman méifus i fote folo bra ruwo gétérésang kélunganon. ³ Atin sugué ku mangéy diyo muret i de ruwo gétew sénarigo ku. Kémégal ro do saku atin ureté roy kékéréh i Tuluse diyo taman méifus i séngibewe bra ruwo ratuh bra ném folo gétérésangan.”

⁴ Atin i de ni ruwo gétew muret, beroy de maak do ruwo timan kayéw féndawét Olibo, atin maak do ruwo ro

timan solo diyo dob adafay Kadnay fantade. ⁵ Atin amuk wén i témulama émfédawéton bero, mésut i aféye tidéw dob de ba ro brab binasané roy de sébanil bero. Mélaw atiy témulamawe bero minasa, féléhuén. ⁶ Wén i kuwagib ro malang bé ranae bé gaiwe muret ro bé kébérén i Tuluse. Wén soy kuwagib ro émféwaléy dara bé wayége. Wén soy kuwagib ro kémukum bé de étew bé de udenén do gékelasi fégédusa dob de udenén do gai kétaya ro. ⁷ Atin amuk gilidén muret i de ruwo ni gétew, sétiboh i nagawe bero, sani mésute tidéw dob liyunge. Atin tabana no bero brab géféléhu no bero. ⁸ Atin i de bangkay ro fédiyoén dob kalsaday dakéle ingéd, sani ingéd i Kadna ruwe ménléhu dob kruse. I ménaléme dawét i nan ingéd “Sodoma” taloo no “Egipto”. ⁹ Atin bé rugay i téliséwe gétérésangan bra géraraan, i de étew tidéw dob kéluhanay de ingéd brab do tribo brab do kélasi-kélassi késébérén i de étew, tuliké roy de ruwo ni timan bangkay, atin énda tungkasé ro de ké lébengén. ¹⁰ Atin i de étew dob duniyae ni, toow ro fo moror sabaf bé kélhéu i de ruwo ni gétew. Atin rémigo ro do karagiya atin séiray ro do éntingayén sabaf bé kéoror ruwe de. Non i de ni do ruwo gétew sénarigoy Tuluse muret bé kébérén ne ménférasay ro fo toow bé de étew dob duniyae ni. ¹¹ Endob amun ménifus i téliséwe gétérésangan bra géraraan, fénférénaway Tuluse bero inok tébule ro. Atin téménindég ro. Atin i kéluhanay de énggégito bero, toow ro fo ménggilak. ¹² Tidéw béo, i de ni do ruwo gétew sénarigoy Tuluse, énggelingoo roy métanuge émbérén dob berowe tidéw dob lawayo mano, “Enggomén, nik gom mangéy dob lawaye ni.” Atin bé lala i kéténgténg i de sébanil ni bero, déméniyat ro mangéy dob lawayo dob rawéne. ¹³ Sonom béo, léménuba toow fo émbagér. Atin i géfoloe baad bé no ingéd ménbinasa. Atin ménléhu i fitéwe ngibu étew bé lubae ni. Atin i de ségiyo do étew toow ro fo ménggilak,

atin dénayéw roy barakatane Tulus dob lawayo.

¹⁴ I gérubwé mékégédaw-gédaw gérigonon ménggilidén. Endob gérumah sékoy gétéléwe de.

¹⁵ Tidéw béo, i géfitéwe télaki niyufén i témburi nuwe. Atin wén i de métanug do émbérén tidéw dob lawayo maro, “I Kadna tome brab Kristo nuwe ménwaléy méguléw bé duniyae. Atin féguléwo no taman sa taman.” ¹⁶ Tidéw béo, i de ruwo folo bra fot gétew lukés odoron sani de ménstar dob de saray de datu dob adafay Tuluse, méntéduñsum ro méngadaf bé Tuluse. ¹⁷ Atin ménbérén ro maro, “Toow fo barakatan Kadnan Tulus, Beem i Tuluse bé féganayo atin Tulus go so béní. Fésalamat gey dob Beeme non nusarém i barakat me atin féngeganaya moy méguléwe bé duniyae. ¹⁸ I de étew do békén méngintulus, ménkérít ro toow non énggumahén i gaiwe kukumé mo bero. Atin kukumé moy de ménléhu do étew. Atin been soy niy gaiwe binasané moy de étew minasa bé duniyae ni.”

¹⁹ Tidéw béo, i lawi i Tuluse dob lawayo, ménungka. Atin i baule féguron bérén do ménusat fasad i Tuluse énggiton diyo. Tidéw béo, kéménilot brab léménéte brab déménégu brab léménuba brab réménana do dakél yelo.

12

¹ Tidéw béo, méntéfégito maake anlung i mérigowé moso mérigo dob lawayo. Wén i libune kéménégal téresang, atin ménutuh dob téresang kélunganone. Atin wén i lakay dob uléw ne fitéw i de gitoon de. ² Obor i ni libun brab gédétén kékumahan. Atin mélaw ménkes sabaf bé kédawét i kékéngéga ne.

³ Tidéw béo, wén man i ségiyowé ménrigo méntéfégito dob lawayo maak anlung. Wén i dakéle diwatwat furoy falas ne. Fitéw timan i uléw ne brab folo timan i sidung ne.

Atin wén i lakay dob séngae uléwén.
⁴ Atin i igor ne génuyudén i gétéléwe baad bé de gitoon brab nibérén dob duniyae. Atin diyo téménindég dob adafay libune ni gédét kéumahan inok amaé noy nga ne ké mumahén.
⁵ Tidéw béno, i libune ni énggáfégéngá nga lagéy. Beeney méguléwe bé kéluhanay de ingéd atin énda i géatuh bé kékéfugléw ne. Endob wén i ménafas bé ngae ni brab nuvitén mangéy dob Tulusó dob lawayo dob sara nuwe.
⁶ Atin i libune ni ménraréy mangéy dob gonone énda i étew de bati, dob sébaane gonon ténafey i Tuluse de. Diyo fagifatéy Tulusey ni libun bé séngibewe brab ruwo ratuh bra ném folo gétérésangan.

⁷ Tidéw béno, wén i gira dob lawayo. Atin i ségétéwe bé de télakiy Tuluse féndawét Miguel brab de kuyugén do télaki, ménsetiboh ro sébanil bé diwat-wate. Atin i diwat-wate ni brab de kaan télaki, ménatuh ro. ⁸ Endob ténaaban i diwat-wate ni brab de télaki no. Mélaw éndaén ténungkasén bero bati dob lawayo. ⁹ Atin i dakéle ni diwat-wat brab de télaki no nibérén bero tidéw dob lawayo. Beeney Satanase, sani saitane fénggakara noy kéluhanay de kéilawan bé kétéféwaléy ne ulé bé gétaho. Atin nibérén mangéy dob duniyae beroy de tete télaki no.

¹⁰ Tidéw béno, énggelingoo kuy métanuge béréh dob lawayo mano, “Béleewe ni métumanén i kékufas i Tuluse bé kéilawane. Béleewe ni fénggitoy Tulusey atura nuwe méguléw. Béleewe ni, i Kristoy Tuluse fénggitoy noy atura nuwe méguléw. Non i témboe bé de dumo gey fuweh na kélungonon, dénédélén tidéw dob lawayo. ¹¹ I de dumo gey ni, ténaaban roy Satanase bé dara i Natiwe Bilibili, atin sabaf bé towe kétoro nuret ro. Atin énda gulaané roy de karo do férénawa, yamula féndaya roy de étew méméléhu bero sabaf bé kéunur ruwe. ¹² Mélaw, i de begom do bati dob lawayo, oror gom. Endob i de begom do bati dob fantade brab dob dogote, mékégédaw-gédaw gom.

Non i Satanase ménlus mangéy dob begome. Atin toow fo mémérit, non gétiga no éndaén mérugay i gai nuwe rémigo tete.”

¹³ Atin i diwat-wate ni, amun énggétiga no nibérén mangéy dob duniyae, ménsetéta i libune ni méngéngá nga lagéy. ¹⁴ Endob nirayén dob libune niy ruwowefafak i dakéle banug inok lémayang mangéy dob gonone énda i étew de bati. Diyo fágifatéy Tuluse bé rugay i télewe bra géraraan gébélintuwa. Atin énda gésugsugén bé Satanase sani diwat-wate. ¹⁵ Tidéw béno, i diwat-wate ni fénésutén tidéw dob ba ney médoowe wayéy inok anuré noy libune ni dob dunuke. ¹⁶ Endob ténabangay fantadey ni libun atin kéménla brab néséfén i wayége. Mélaw énda ménggésug-sug i libune ni. ¹⁷ Tidéw béno, toow fo ménkérit i diwat-wate ni bé libune ni. Atin ménagéw brab ménangéy sétiboh dob de ségiyo nga i libune ni brab kéluhanay de modor bé de sugu i Tuluse brab de énda témérén munur bé towe kétoro Jesuse. ¹⁸ Atin i diwat-wate ni téménindég dob dénsaane.

13

¹ Tidéw béno, énggito guy nagawe géménaun tidéw dob dogote. Folo i sidung ne brab fitew i uléw ne. Atin wén i lakay dob séngae sidungén. Atin dob séngae uléwén wén i ménslate de mémémurka dawét. ² I nagawe ni énggito gu maak falas i mérayare binatang féndawét leopardo. Atin i de sékéyén maak sékéy i mérayare binatang féndawét oso. Atin i ba ne maak ba i mérayare binatang féndawét leon. Atin i diwat-wate nirayén dob beeney barakat ne brab atura nuwe méguléw. ³ Atin i sébaane bé de uléw i nagawe ni maak ménléhuén, éndob ménadi-adiy fali ne funa no damén méléhu. Atin i kéluhanay de étew ménggaif ro de atin ménfuray ro bé nagawe ni. ⁴ Atin i kéluhanay de étew fénéngadaf roy diwat-wate ni non nirayén dob nagawe niy atura nuwe

méguléw. Atin fénéngadaf ro soy nagaue maro, "Enda i ségiyo gérotor bé nagawe. Atin énda i géatuh de."

⁵ Atin i nagawe ni, féndaya i Tuluse ménfédayday émbéréh do toow fo tete brab do fégéfélangka-langka, méngiras bé Tuluse. Atin ténungkasén méguléw taman méifus i fote folo bra ruwo gétérésang kélungonon.

⁶ Atin fénémulaén i Tuluse brab dawét ne brab gonoy Tuluse bati brab kéluhanay de étew bati diyo dob lawayo. ⁷ Atin féndayaén so sétiboh sébanil bé de étew i Tuluse, atin féndayaén so ténabana no bero. Atin nirayén dob beeney aturane méguléw bé kéluhanay de étew tidéw dob de séségiyo-giyo do tribo brab do ingéd brab do késébéréh brab do étew. ⁸ Atin féngadaféy kéluhanay de étew bati dob duniyae ni, sani de étew énda ménsulat i de dawét ro dob librowe lénistanan bé de étew gégédot bé umule magufusa. Sénulatén i de dawét ro bé énda séna ménlimbag i duniyae de. Atin i fénléhue Nati Bili-bili, Been i gefee bé ni libro.

⁹ Fatut fégélingo gom kéluhanan i ni: ¹⁰ I de étew kailangan férisunén, waléy ro man méférisu. Atin i de étew kailangan féléhuén bé sundange, féléhuén ro bé sundange. Mélaw i de begom do étew i Tuluse, fatut fédayday gom sémarig bé Tuluse atin fetingkél gom dob gaiwe kérégénan gom.

¹¹ Tidéw béno, énggito guy géruwowe naga ménsut tidéw dob fantade. Ruwo timan i sidung ne maak do sidung bili-bili atin i kékéréh ne maak béréh diwat-wat. ¹² Atin i géruwowe ni naga, nusarén i aturay sunguwe naga méguléw dob adafa nuwe. Atin fénégésén i kéluhanay de étew dob duniyae méngadaf bé sunguwe naga, sani wéne falién géfédewén damén méléhu éndob ménadi-adi. ¹³ Atin i géruwowe ni naga, réménigo do médo do mékégaif. Léménawu aféy dob duniyae ni tidéw dob lawayo dob téngaangay kéluhanay de étew. ¹⁴ Atin énggáfégakara noy kéluhanay de étew dob duniyae ni sabaf bé

de mékégaif ténungkasén rigoné no dob adafay sunguwe naga. Tidéw béno, sénuguén i kéluhanay de étew dob duniyae ni rémigo kéninontow fégébantug bé sunguwe naga, sani ténibohe bé sundange éndob énda ménléhuén de. ¹⁵ Atin i géruwowe naga, ténungkas dob beeney mirayane férénawa bé kéninontow inok gébéréh i kéninontow i sunguwe ni naga brab inok géféléhuo roy kéluhanay de étew énda féngadafé ro de. ¹⁶ Atin i géruwowe ni naga, fénégésén i kéluhanay de étew, fiyon i de gérotor loo soy de gérifantad, brab de kawasa loo soy de méskinan, brab de rifén loo soy de békén do rifén, fénégésén bero férigo tanda dob de kuwonon do kémér ro taloo no dob de rangih ro. ¹⁷ Amuk énda méntandaan i ségétéwe, énda gébéléyén brab énda so géféléyén. Atin i ni tanda, been i dawét i sunguwe naga taloo no rumeroy dawét ne. ¹⁸ I de étew gésobut bé ni, bero saén i de féntilédtéd i Tuluse. Mélaw i de métileédtéd do étew, fakay gétinga roy atag i ni rumero non tanda i dawét i ségétéwe étew. Ném ratuh bra ném folo bra ném i ni rumero.

14

¹ Tidéw béno, énggito guy Natiwe Bili-bili téménindég dob tuduke féndawét Sion. Atin diyo dob Beeney mératuh bra fot folo bra fot ngibu étew. I de ni do étew, ménsulat dob rangih ruwey dawét i Natiwe ni Bili-bili brab Abay ne Tulus. ² Atin énggelingoo kuy émbéréhé tidéw dob lawayo maak érok dakél samfaw atin maak métanug léte. Atin i kékéréh ne maak béréh i de baat féndawét do alpa. ³ Atin i de mératuh bra fot folo bra fot ngibu do étew, téménindég ro dob adafay saray Tuluse bra de fot gétew do barakatan étew brab de lukés odoron. Atin kéménanta ro sébaan mantu kanta, sani kantawe énggétigay de ni do étew saén do mén-aun tidéw dob duniyae. ⁴ Beroy de lagéy do énda ménsala bé késétaya ruwe bé de ségiyo do libun saliyu bé

de bawag ro, non malinis i de adat ro. Atin furay ro bé Natiwe Bili-bili dob séngae ayo no. Beroy de mén-aun tidew dob de ségiyo do kéilawan inok beroy de sungu do niray dob Tuluse brab dob Natiwe Bili-bili. ⁵ Enda téménugi ro fiyon ségule. Enda i rénigo ro tete.

⁶ Tidew béno, énggito guy ségiyowe télaki lémayang dob toowe fo gérотор. Atin bé béno so, nureténi i Fiyowe Uret énda mékedano taman sa taman. Nureténi dob séségiyowe gékelasi do étew brab do tribu brab do késébéréh brab do ingéd. ⁷ Ménbéréh métanug mano, “Basana kom i Tuluse brab dayew gom. Non énggumahén i gaiwe kukumé noy de kéilawan. Féngadaf gom i Tuluse, sani réménigowé bé lawaye brab fantade brab dogote brab de séfut.”

⁸ Atin ménfuray i géruwowe télaki brab ménbéréh mano, “Ménbinasa néni. Ménbinasa néni i dakélé ingéd Babilonia. Fénolo noy kéluhanay de étew bé arak ne. Atin i ni arak, been i niy mékérésike adatén émfésala bé de ségiyo étew.”

⁹ Tidew béno, ménfuray i gétéléwe télaki. Ménbéréh mano, “I de étew méngadaf bé nagawe brab kéninontow ne, brab ménandaan i de rangih ro taloo no do kémér ro bé tanda i nagawe, ¹⁰ mékukum ro fo toow. Non mékérít fo toow i Tuluse bero. I de rémigo bé ni, ferasayé no bero bé aféye brab asuprewe dob adafay de télakiy Tuluse brab Natiwe Bili-bili. ¹¹ I aféye fégédusa bero, mégébel taman sa taman. Fuweh na kélungonon, énda téméré no démusá bé de étew méngadaf bé nagawe brab kéninontow ne, sani de étew ménandaan bé dawét ne.”

¹² Mélaw i de étew i Tuluse, sani de modor bé sugu i Tuluse brab de énda témérén munur bé Jesuse, fatut témingkél ro.

¹³ Tidew béno, énggelingoo kuy émbéréhe tidew dob lawayo mano, “Sulatém i ni: Moror i de munur bé Kadnane ké méléhu ro tidew béléewe ni.” “Non témérén ron gémalbék atin

gédoté roy barase sabaf bé de rénigo ro.”

¹⁴ Tidew béno, énggito guy futee rawén. Atin wén i ménasar de maak falas kéilawan. Wén i bélowan lakay dob uléw ne atin wén i génamakén murém sanggut. ¹⁵ Tidew béno, wén i ségiyowe télaki ménasut tidew dob lawi i Tuluse dob lawayo. Atin téménawag toow fo métanug dob étew ni ménasar dob rawéne mano, “Usarém i sanggute fégékétewém. Non énggumahén i gaiwe kémétew, togohén i duniiae.” ¹⁶ Tidew béno, i étew ni ménasar dob rawéne, sénayugén i sanggute dob duniiae. Atin kéntewén i duniiae.

¹⁷ Tidew béno, énggito guy ségiyowe télaki ménasut tidew dob lawi i Tuluse dob lawayo. Wén soy murém sanggut génamakén.

¹⁸ Tidew béno, i ségiyowe télaki, sani méguléwe bé aféye, ménagéw tidew dob ahayane tulakan. Ménkes métanug dob télakiwe géménamak murém sanggut mano, “Usarém i sanggut ma nan fégékélengém bé onok i nohoke féndawét ubas dob safade dob duniiae. Non togoh ron.” ¹⁹ Mélaw i télakiwe ni, sénayugén i sanggut ne dob duniiae, atin kénléngén i de ubas tidew dob safade atin nibérén dob kalute gonoy Tuluse kémérés bero non mékérít bé de ni do tete étew. ²⁰ Atin ménkérés i de ni do tete étew dob kalute dob liyuy ingéde. Atin ménasut i de dara ro maak dunuk gédét ruwo gémítroy kénélam ne atin téléc ratuh bra ruwo folo gékilomitroy kérayu ne.

15

¹ Tidew béno, énggito guy ségiyowe mékégaif ménrigo dob lawayo maak anlung. Wén i do fitew gétew do télaki ménasut fitew timan fégédusa bé de kéilawan. Been i niy de géfuray fégédusa non fégéfégilid bé kékérít i Tuluse.

² Atin énggito guy maake dogot maak féngalungan ménaslawék bé aféye. Atin énggito guy de étew

ténabana roy nagawe brab kéninontow ne. Beroy de énda méntandaan bé rumeroy dawét ne. Téménindég ro dob doror i dogote maak féngalungon. Génamak roy de baat féndawét alpa niray i Tuluse bero. ³ Kénanta roy kanta Moisese, sani ségétéwe sugu-suguéy Tuluse bé do gétah, sani kantay Natiwe Bili-bili maro, "Barakatan Kadnan Tulus, toow fo fiyo brab dakél i rénigo muwe! Beem i méguléwe bé kéluhanay de ingéd. Toow fo métintuy adat me brab toow. ⁴ I kéluhanay de étew basana ro Beem, Kadnan. Atin i kéluhanay de étew fayagé roy kégrerot me. Beem saén i mékétéfuwe. I kéluhanay de étew tidéw dob séngae ingéd, mangéy ro méngadaf dob Beeme. Non i kéluhanay de étew gétiga roy de métintu do rénigo mo."

⁵ Tidéw béo, énggito guy lawi i Tuluse dob lawayo ménungka. Atin diyo dob bukagey mékétéfuwe sibéy gonoy tanda i Tuluse. ⁶ Tidéw béo, i de fitéw gétew do télaki ménuwit bé de fitéw timan fégédusa, ménusut ro tidéw dob lawi i Tuluse ni. Kéménégal ro bé toowe fo malinis fute safut. Atin lénibéo ro bélwon i de kuméng ro. ⁷ Tidéw béo, i ségétéwe bé de barakatan do étew nirayén dob de fitéw gétew do télaki fitéwe timan bélwon biléw ménféno bé kékérít i Tuluse méuyag taman sa taman. ⁸ Atin i lawi i Tuluse ni ménféno bé béle tidéw dob kéréndaw i barakat i Tuluse, atin mélaw énda i géahur dob lawie taman gilid i de fitéw timan fégédusa nuwit i de fitéw gétew télaki.

16

I de fitéw timan biléw

¹ Tidéw béo, énggelingoo kuy métanuge émbéréh tidéw dob lawi i Tuluse dob de fitéw gétew do télaki mano, "Agéw gom atin luka gom dob duniyaey de fitéw timan do biléw ménféno bé kékérít i Tuluse."

² Atin i sunguwe télaki ménagéw brab lénukaén i biléw ne dob duniyae. Atin i toowe fo féde brab mékérésik do kéraing téménunoh dob kéluhanay de

étew do méntandaan bé nagawe brab de méngadaf bé kéninontow ne.

³ Atin i gérupwe télaki lénukaén soy kaane biléw dob dogote, atin i wayége ménwaléy maak dara i ménléhue étew. Atin ménléhu i kéluhanay de sédo brab de binatang dob dogote.

⁴ Tidéw béo, i gétéléwe télaki lénukaén i kaane biléw dob de séfut brab dob de wayége, atin ménwaléy ro dara. ⁵ Atin énggelingoo kuy béréh i télakiwe méguléw bé de wayége mano, "O mékétéfuwe Tulus, i Beeme ménwén gon tidéw féganay atin wén so béléewe ni, métintuy kékukum me. ⁶ I de tete ni étew, fénléhu roy de étewém brab de sénarigo mo muret. Mélaw féninémo mo bero dara. Médait ro mékukum loo bé ni." ⁷ Tidéw béo, énggelingoo kuy émbéréhe tidéw dob ahayane tulakan mano, "Barakatan Kadnan Tulus, métintuy kékukum me brab toow."

⁸ Tidéw béo, i géfote télaki lénukaén i kaane biléw dob térsange. Atin fentuwégen bé térsangey de étew sabaf bé kékédaf ne. ⁹ Atin méntruwégen i de étew sabaf bé kékédaf ne. Atin fénémula roy dawét i Tuluse, sani wéne aturan bé de ni fégédusa. Endob énda gésénule ro bé de sala ro brab énda dayéwé roy Tuluse.

¹⁰ Tidéw béo, i gélimwe télaki lénukaén i kaane biléw dob saray datue kay nagawe. Atin ménwaléy délémon i kékédawéta ruwe. ¹¹ Atin fénémula roy Tuluse dob lawayo sabaf bé kékédawéta ruwe brab de kéraing ro. Endob énda gésénule ro bé de tete adat ro.

¹² Tidéw béo, i géénéme télaki lénukaén i kaane biléw dob dakéle wayége féndawét Eufrates. Atin méntrikar i dakéle ni wayége inok wén i aguwoy de datu tidéw sébangan.

¹³ Tidéw béo, énggito guy téléléwe gétew tete rémogor maak do falas fak ménusut tidéw dob ba i diwat-wate brab dob ba i nagawe brab dob ba i ségétéwe ubo-ubo sénarigoy Tuluse

muret.¹⁴ Beroy de rémogor i de saitan do rémigo do mékégaif. Atin i de télew ni gétew do saitan ménangéy ro dob kéluhanay de datu dob duniyae ni inok limudé ro bero atin inok rémigo ro gira dob gaiwe kémukum i barakatane Tulus.

¹⁵⁻¹⁶ Bé béno gai, i de saitan limudé roy de datu dob gonone féndawét Armagedon dob késébéréhé Hebreo. Atin bang i Kadnane Jesus, "Fégélingo gom! Séfuleu bé gaiwe énda gékaranga kom de loo bé kégumah i ménakawe. Moror i de étew mingat brab témenafay ro kémégal bé kéongot-ongot ruwe bé késéfule guwe. Non énda félawas ro bé késéfule guwe funa ro mémalá."

¹⁷ Tidéw béno, i géfitéwe télaki lénukaén i kaane biléw dob kérara fuwehe. Atin wén i émbéréh métanug tidéw dob saray méguléwe dob lawi i Tuluse mano, "Enggilidén."

¹⁸ Atin kéménilot brab déménégu brab léménéte brab léménuba émbagér. Enda i ségiyo émbagér luba loo bé ni tidéw bé kélémbage bé kéilawane, non toow na fo gétimal i kébagér i ni luba. ¹⁹ Atin i dakéle ingéd Babilonia ménséfarak télew baad. Atin ménbinasay kéluhanay de ingéd dob duniyae ni. Non gétédémoy Tulusey ingéde Babilonia atin kukumé no sabaf bé kékérit ne de. ²⁰ Atin i kéluhanay de bungéd brab de tuduk ménalfa. ²¹ Atin ménlawu i de dakél do yelo dob de étew. Atin limo folo gékiloy kébégat i de yelo. Atin i de étew fénémula roy Tuluse sabaf bé de yelo non toow fo gétimal i kékérit ne.

17

¹ Tidéw béno, i ségétéwe bé de télaki ménuit bé de fitéw timan do biléw, ménangéy dob begéne brab ménbéréh mano, "Enggon, fégito gu beem i kékukume bé ménbantuge sundal, sani ingéde gédét dob médoowe do wayég. ² I de datu dob duniyae ni ménstayan de. Atin i de étew dob duniyae ni, fénésalaén bero bé mékérésike adatén."

³ Tidéw béno, i Rémodor i Tuluse toow fo fénémanduo no begén, atin

nuwit i télakiwe begén mangéy dob gonone énda i étew de bat. Diyo énggito guy libune kéménuda dob furowe naga. Wén i de mékémurka dawét ménusat dob kéluhanay lowoh i nagawe ni. Atin fitéw timan i uléw ne brab folo timan i sidung ne. ⁴ Atin i libune ni kéménagal furo brab ram-bayung. Atin ménggono do bélowan brab do perlas brab do ségiyo balilaga batéw. Atin génamakén i bélowan tabu ménfeno bé de mékérésik brab do mékémurka do éntingayén, sani galbek i sundale. ⁵ Atin ménusat dob rangih ney kébéréhe wén i ménbunéy atagén. I sulate ni mano, "I ménbantuge Babilonia, idéng i kéluhanay de sundal brab de mékérésik do étew dob duniyae ni." ⁶ Atin énggito guy ni libun ménolon sabaf bé kéném ne bé dara i de ménléhuén do munur bé Jesuse do ménléhu sabaf bé kéuret ruwe fantag bé kénur ruwe.

Amun énggito guy ni, toow fo ménngaifu de. ⁷ Atin i télakiwe ni ménenginsa dob begéne mano, "Sedek mègaif go? Fégétiga ku beem i ménbunéye atag i libune ni brab nagawe kénudaa no fitéw i uléw ne brab folo i sidung ne. ⁸ I nagawe énggito mo méuyag bé gétaho, éndob ménléhuén béleewe ni. Gido loo, mésut moso tidéw dob toowe fo ménalém liyung brab méninasa. Atin i de étew dob duniyae ni, sani de étew énda ménusat i de dawét ro dob librowe listanan bé de étew gégédot bé umule magufusa, mègaif ro ké gito roy nagawe ni. I ni libro ménusatén bé énda séna lénimbag i Tulusey duniyae de. Atin i nagawe ni méuyag bé gétaho, ménléhuén bén. Endob téfégito man moso."

⁹ Atin féntaus i télakiwey kébéréh ne mano, "Do gétigan saén do étew i gésobute bé ni: I atag i de fitéw timan uléw, been i de niy de fitéw timan burur gonoy ni libun mésar, sani de burur ténidégo ménbantuge ingéd. Atin i atag ne do fitéw gétew datu. ¹⁰ Atin i limowe bé de datu ni ménléhu ron. Atin i ségétéwe de méuyag méguléw bén. Atin i ségétéwe

de énda séna méguléwén. Amuk méguléw i géfitéwe ni datu, méguléw saén singkow. ¹¹ Atin i nagawe ni, sani méuyage bé gétaho éndob ménléhuén béní, beeney géwaléwe datu gétundug bé de sungu do fitew datu atin mébinasa moso.

¹² “Atin i de folo do sidung énggito mo, beroy de folo gétew do datu énda séna méguléw ro. Endob irayén beroy aturane méguléw bé rugay i ségurase saén beroy nagawe. ¹³ Atin i de folo ni gétew do datu, ségiléw i kétaya ruwe, atin iray roy bagér ruwe brab atura ruwe méguléw dob na-gawe ni. ¹⁴ Atin sétiboh ro sébanil bé Natiwe Bili-bili. Endob i Natiwe Bili-bili brab de fénémilién do kuyugén sani de fénunurén dob Beene brab de rémigo bé kétaya nuwe, tabana roy de ni do folo gétew do tete datu. Témaban i Natiwe Bili-bili non Beeney Kadnay de méguléw brab Beeney Datu i de datu.”

¹⁵ Atin ménbéréh man i téakiwe ni dob begéne mano, “I de wayég énggito mo, sani gonoy sundale ménasar, beroy de étew dob de séségiyo-giyo do ingéd brab do kélasi-klasi do étew brab do késbéréh. ¹⁶ Atin i de folo timan do sidung do énggito mo, brab nagawe, mérarék ro bé sundale ni. Atin nafas roy kéluhanay de éntingayé no. Atin tagaké roy sundale ni félawas. Atin amaé roy ungé ne brab tuwégé ro dob aféyey sama ruwe de. ¹⁷ Rigoné roy ni non fékéntayéy Tuluse beroy rémigowe de inok métuman i bantak ne. Mélaw sébaan saén i kégéitung ruwe, atin iray roy atura ruwe méguléw dob nagawe taman métuman i kékéréh i Tuluse.

¹⁸ “Atin i énggito muwe libun, beeney ménbantuge ingéd méguléw bé de datu dob duniiae ni.”

18

¹ Tidéw béo, énggito guy ségiyowe téaki ménlus tidéw dob lawayo. Wén i dakél atura no. Atin ménggékaya i kéluhanay sugud i duniiae bé késélinang ne. ² Atin ménkes i téakiwe

ni toow fo métanug mano, “Ménbinasa! Ménbinasay ménbantuge ingéd Babilonia. Ménwaléy béní batoy de saitan brab do tete do rémogor. Atin médo do gékelasi do tete brab mémérésik do kloh manok bati diyo. ³ Non fénalsaén i kéluhanay de étew bé mémérésike adatén, sani tetee kétayay lowoh ne. Atin i de datu dob duniiae ni ménamung ro bé de tete rigoné ro. Atin i de démagang ménwaléy ro kawasa sabaf bé de tete kétayay libune ni.”

⁴ Tidéw béo, énggelingoo kuy émbéréhe tidéw dob lawayo mano, “Enggomén do étew gu. Sut gom tidéw dob tete anan ingéd inok énda géamung gom bé de salaén. Mélaw énda mémukum gom séréngan de. ⁵ Non toow fo mèdooy de salaén maak ménuntud mangéy dob lawayo. Atin i Tuluse énggétédémo noy tetee adatén. ⁶ I kékérasay ne begom, fatut sulio kom ruwo takéf kékérasay de so. Féno gom i tabu ne ruwo gule bé inéméne toow fo féla loo bé féniném ne begom. ⁷ I kédoooy kékantug ne bé lowoh ne brab kékéfiyo nuwe bé lowoh ne bé gétahe, iring gom bé kékérasay gome de brab kékébuku gome de. Non énda téméré no félangka-langka mano, ‘Begéney baiwe, békénu baléw. Enda fakayén ké tete i fidéw guwe.’ ⁸ Sabaf bé ni kékéréhén, wén i gai moso tékow mérásay. Non mémukum bé déruune brab kékukue brab lénggobe. Atin métuwégo fo toow bé aféye non toow fo barakatan i Kadnane Tulus kémukum de.”

⁹ Atin i de datu dob duniiae ménamung bé de mémérésik rigoné no brab kékawaswe kétaya ro, kémérew ro, brab rémuung ro sabaf bé kékinasay ni ingéd amuk gito roy bél i aféye témuwégo de. ¹⁰ Ténlik ro tidéw dob mérayue non mémilak ro mémamung bé kékérasay ne. Atin béréhé ro maro, “Mékégédaw-gédaw i ménbantuge ingéd Babilonia. Séguéras saén i kékukume de.”

¹¹ Atin i de démagang kémérew ro so brab rémuung ro sabaf bé kékinasay

ni ingéd non énda i méléy bé de daganga ro. ¹² Endaén i méléy bé de bélowan do fébéléy ro brab do filak, brab do balilaga do batéw, brab do perlas, brab de fiyo fute brab do furo brab rambayung safut, brab do balilaga do mamut kayéw, brab do éntingayén do rénigo garing, brab do balilaga do kayéw, brab do galang, brab do futow, brab do marmol, ¹³ brab do kanela brab do ségiyo fégéfaninu, brab do dukah, brab do fégéfamut, brab do uwa, brab do arak, brab do nor, brab do arinah, brab do safi, brab do bili-bili, brab do kuda, brab do kalesa, brab do rifén, brab fiyon i de rémogor i de étew. ¹⁴ Atin ménbéréh i de démagang dob ingéde ni maro, “Endaén i kéluhanay de fiyo do éntingayén do kétaya mo. Atin ménkédanén i bantuga muwe brab kékawasa muwe. Atin éndaén géséfuleén mangéy dob beeme.” ¹⁵ Atin i de démagang do ménwaléy kawasa sabaf bé de kédagang ro, dob nan ingéd, tuliké roy de tidéw mérayu non mégilak ro méamung bé kérasayne. Kémérew ro rémuung. ¹⁶ Atin bérhéh ro maro, “Mékégédaw-gédaw i ménbantuge ni ingéd. Bé gétaho i de étew de kéménagal ro fiyo safut fute brab furo brab rambayung. Atin ménggono do bélowan brab balilaga do batéw brab do perlas. ¹⁷ Endob bé ségéurase saén méntékor ménkédan i kékawasa nuwe.”

Atin i kéluhanay de kafitan bé de barko brab de étew de ménda brab kéluhanay de gémalbék dob de barko, ténlik roy de tidéw mérayu. ¹⁸ Atin ménkes ro bé lala ruwe téméngténg bé bél i aféye témuwég bé ingéde ni maro, “Tidéw féganay, énda i ségiyo ménbantug ingéd loo bé ni!” ¹⁹ Atin rénigono ro réhuk i de uléw ro brab rémuung ro maro, “Mékégédaw-gédaw i ni ménbantug ingéd! Non sabaf bé kékawasa nuwe, waléy so kawasay de gefe barko. Endob bé ségéurase saén méntékor ménbinasay kéluhanane.”

²⁰ I de begom do étew bati dob lawayo, oror gom sabaf bé kébinasay

ni ingéd. I de begom do munur bé Jesuse, brab begom do apostol brab do sénarigoy Tuluse muret, oror gom. Non kénukum i Tulusey nan ingéd sabaf bé de tete rénigo no dob begome.

²¹ Tidéw béno, i barakatane télaki fénurutén i dakéle batéw brab nibérén dob dogote. Atin ménbéréh mano, “Loo bé niy kéibére bé ménbantuge ingéd Babilonia inok mébinasa. Endaén gito no non toowén fo ménbinasa. ²² Atin éndaén gélingoo no dob ni ingéd i béréh i de baat do alpa, do suling, brab do témburi. Atin éndaén giton i de fanday gémalbék dob ni ingéd fiyon udenén klasi fanday, atin éndaén gélingoon i béréh i gilingane. ²³ Endaén réméndaw i soloe dob ni ingéd. Atin éndaén i uyot dob ni ingéd. Bé do gétah, toow fo ménbantug i de démagang do étew. Atin i de béliyan bati diyo, énggégéfakara roy de étew dob séngae ingéd dob duniyae.”

²⁴ I funay ingéde Babilonia ménkukum, non fénléhuén i de étew sénarigoy Tuluse muret bé kéréh ne brab fénléhuén i de munur bé Jesuse. Atin i kéluhanay de étew fénléhuén dob duniyae ni ménléhu ro sabaf bé ni ingéd.

19

¹ Tidéw béno, énggélingoo kuy métanuge béréh i maake médoe étew ménlimud dob lawayo maro, “Dayéwé tom i Tuluse! Been i mémukase bé de étew, Beeney barakatane, Beeney ménbantuge. ² Métintu brab toow i kékukum ne. Kénukumén i ménbantuge sundal non fén salaén i kéluhanay de étew dob duniyae bé mékérésike adatén. Kénukum i Tuluse non fénléhuén i de sugu-sugué no.” ³ Atin ménkes ro man maro, “Dayéwé tom i Tuluse! Mégébél i aféye témuwég bé ni ingéd taman sa taman.” ⁴ Atin i de ruwo folo bra fot gétew lukés odoron brab de fot gétew do barakatan étew méntéduunsum ro méngadaf bé Tuluse ménasar dob sara nuwe. Atin ménbéréh ro maro, “Amen! Dayéwé tom i Tuluse.”

⁵ Tidéw béno, wén i ménbérhéhe tidéw dob saray Tuluse mano, “I kéluhana kome do sugu-suguéy Tuluse brab begome do masanan de, fiyon gérotor taloo no do gérifantad, fatut dayéwé kom.”

⁶ Tidéw béno, énggelingoo kuy béréh i maake dakél ménlimud do étew brab maake érok dakél samfaw brab maake métanug léte maro, “Dayéwé tom i Tuluse non Been saén i barakatane Kadnan Tulus méguléw betom. ⁷ Fatut moror tom. Fatut dayéwé tom i Tuluse sabaf bé kégérotor ne. Non énggumahén i gaiy uyot i Natiwe Bili-bili béleewe ni. Atin méntafayén i mawage bé Natiwe ni Bili-bili. ⁸ Kéménégal sémelinang malinis fute safut.” I atag i ni, been i niy de métintu rigonéy de munur bé Jesuse.

⁹ Tidéw béno, i télakiwe ni ménbérhéh dob begéne mano, “Sulatém i ni: Toow fo moror i de étew ménsgékat dob uyot i Natiwe Bili-bili.” Atin ménbérhéh man mano, “Been i niy toowe kébérhéh i Tuluse.”

¹⁰ Atin méntédunsumu dob adafa nuwe inok féngadafé kuy télakiwe ni. Endob ménbérhéh mano, “Kago féngadafén begén. Non dumo mo so begén sugu-suguéy Tuluse brab dumoy kéluhanay de munur bé kétoro Jesuse. Fatut Tulus saén i féngadafé muwe.” I funa nuwe ménbérhéh bé ni non ségiléw i kétoro Jesuse bé de sénarigoy Tuluse muret.

¹¹ Tidéw béno, énggito guy lawaye ménungka. Atin énggito guy futee kuda. Atin i dawét i étewé de kéménuda, “Sarigon” brab “Toow”. Métintuy kékukum ne, atin métintu soy késétiboh ne. ¹² I de moto no maak mérino aféy, atin médooy de lakay dob uléw ne. Atin wén i dawéte ménslat dob Beene, éndob énda i géétigan de saliyu saén bé Beene. ¹³ Atin i kégal ne maak nérém dob darae. Atin i dawét i ni étew, “Kébérhéh i Tuluse.” ¹⁴ Atin i de médooy do sundalo tidéw dob lawayo ménfuray ro bé ni étew. Kéménuda ro dob de fute kuda, atin kéménégal ro bé toowe fo malinis fute

safut. ¹⁵ Atin i sunguwe ni étew, wén i muréme sundang mésut tidéw dob ba ne fégétaba no bé kéluhanay de ingéd dob duniye ni. Atin féguléwo no bero atin énda i géatuh de. Atin fégito no bero yékkérit i barakatane Tulus non binasané no bero loo bé yékkérés i ségétewé étew bé de ubas. ¹⁶ Atin wén i ménslate dob kégal i étewé ni brab dob foo ne mano, “Datu i de datu, Kadnay de méguléw.”

¹⁷ Tidéw béno, énggito guy télakiwe téménindég dob kérara i téresange. Atin ménkes métanug dob kéluhanay de kloh manok lémayang dob fuwehe mano, “Enggomén. Sétimu gom inok géama gom bé kanduli i Tuluse. ¹⁸ Enggomén, ama gom bé ungé i de datu, brab de odoroy de sundalo, brab de sundalo de so, brab de kuda, brab de kéménuda de so, brab kéluhanay de étew fiyon do rifén loo soy de békén de, brab de gérotor de so, loo soy de gérifantad de.”

¹⁹ Tidéw béno, énggito guy nagawe brab de datu dob duniye ni brab de sundalo so. Ménslimud ro inok sétipoh ro sébanil bé étewé ni kéménuda fute brab de sundalo no tidéw dob lawayo. ²⁰ Atin kénéfo roy nagawe bero ubo-uboe sénarigoy Tuluse, sani rémigowe do mékégaif dob adafay nagawe ni. I de rénigo no do mékégaif, been i niy funay de étew ménfégakaran ménandaan bé tanda i nagawe, sani de étew méngeadaf bé kéninontow i nagawe ni. Atin i nagawe brab ubo-uboe sénarigoy Tuluse, ménibér ro méuyag séna dob ranawe aféy mérino bé asuprewe. ²¹ Atin i de sundalo ro, fénléhu ro bero bé sundange mésut tidéw dob ba i kéménudae fute. Tidéw béno, i de kloh manok, nama roy de ungé ro taman ménbésor ro.

20

I séngibu gébélantuwa

¹ Tidéw béno, énggito guy ségétewé télaki ménlus tidéw dob lawayo. Atin génamakén i dakélé sangkali brab susie bé ménaléme liyung. ² Atin kénéfoén i diwat-wate, sani ulée bé

gétaho sani saitane féndawét Satanas. Atin nikétén inok férисунé no bé séngibuwe gébélantuwa.³ Atin i télakiwe ni nibérén i Satanase dob liyunge atin kénandado no, atin ténlébén bé tanda. Mélaw éndaén géfagakara Satanasey de étew dob duniyae ni taman méifus i séngibuwe gébélantuwa. Tidéw béno, kailangan tangéyén man singkow.

⁴ Tidéw béno, énggito guy saray de méguléw, brab de étew de so ménasar. Atin niray dob berowey kuwagibe kémukum. Atin énggito gu soy de rémogor i de étew fénléhuén sabaf bé kéuret ruwe bé toowe tidéw dob Jesuse brab kékéréh i Tuluse. Enda fénengadaf roy nagawe taloo no kéninontow ne. Atin énda ménandaan i de rangih ro taloo no do kémér ro bé tanda i nagawe. Atin mémentebule ro brab méguléw ro séréngean bé Kristowe taman méifus i séngibuwe gébélantuwa.⁵ Been i niy sunguwe kétébule. I de dumo ro énda tébule ro taman énda gilid i séngibuwe gébélantuwa.⁶ Toow fo moror i de étew tébule dob sunguwe kétébule, atin féfiyonéy Tuluse bero. Enda géamung ro bé géruwowe kéléhu. Atin beroy de waléy do fadi i Tuluse brab Kristowe. Atin méguléw ro bero ro Kristo bé ni séngibu gébélantuwa.

⁷ Amuk gilid i ni séngibu gébélantuwa, tangéyén i Satanase tidéw dob kaane férissunon.⁸ Atin mangéy dob kéléhanay de ingéd dob duniyae inok géfagakara no bero, sani de ingéd féndawét Gog brab Magog. Atin i Satanase, limudé no bero inok sétiboh ro sébanil bé Tuluse. Atin toow ro fo médo loo bé kédooj de farék dob dénsaane.⁹ Atin ménbéragar ro dob duniyae atin lénangkat roy ingéde gulaanéy Tuluse gonoy de étewén bati. Endob ménlawu i aféye tidéw dob lawayo funa ro ménbinasa kéléhanan.¹⁰ Tidéw béno, i Satanase, sani magakarane bero, nibérén dob ranawé aféy brab asuprewe sani gonone nibéron bé nagawe brab ubo-uboe sénarigoy Tuluse bé gétahé. Atin dusanén ro fuweh na kélungonon

taman sa taman.

¹¹ Tidéw béno, énggito guy dakéle brab futee saray méguléwe. Atin énggito gu soy ménasare de diyo. Atin i fantade brab lawaye ménalfa ro dob téngaanga nuwe atin éndaén giton ro.¹² Atin énggito guy kéléhanay de ménléhu, do gérotor brab do gérifantad. Téménindég ro dob adafay sarane ni. Ménungka i de libro atin ménungka soy librowe lénistanan bé de étew gégedot bé umule magufusa. Atin i de ménléhu ménkukum ro loo bé de rénigo ro, sani ménaslate dob de libro.¹³ Tidéw béno, i de ménléhu do étew tidéw dob dogote ménasut ro, atin ménasut soy de ménléhu tidéw dob fantade brab tidéw dob gonoy de ménléhu. Atin kéléhana ro ménkukum sabaf bé de rénigo ro bé kéléhanay ruwe séna.¹⁴ Tidéw béno, i kéléhue brab gonoy de ménléhu, nibérén bero dob ranawé aféy, sani géruwowe kéléhu.¹⁵ Atin i kéléhanay de étew énda ménaslat i de dawét ro dob librowe listanan bé de étew gégedot bé umule magufusa nibérén so bero dob ranawé aféy.

21

I de mantu

¹ Tidéw béno, énggito guy mantuwe laway brab mantuwe fantad. Ménalfa i tafaye de loo soy dogote.² Atin énggito guy mécétéfuwe ingéd, sani mantuwe Jerusalem, ménlus tidéw dob lawayo tidéw dob Tuluse. Téménafay maak témérima libun kéménégal fiyo inok balaké noy témérime lagéy.³ Atin énggelingoo kuy métanuge béréh tidéw dob saray méguléwe ni mano, “Béleewe ni bati i Tuluse sétifon bé de kéilawan. Bati dob berowe atin beroy de étewén. Beeney dumo ruwe atin ménintulus ro dob Beene.⁴ Atin kédané noy de tete dob de fédéw ro inok éndaén kémérew ro. Atin éndaén i méléhu taloo no rémuung taloo no démwéti non ménkédanén i de éntingayén do tafayén.”

⁵ Tidéw béno, ménbéréh i ménasare dob saray Tuluse mano, “Béleewe ni, féantuné kuy kéléhanane.” Atin

ménbérél dob begéne mano, “Sulatém i ni non toow i ni kékérél brab gésarigon.” ⁶ Atin ménbérél mano mano, “Méntumanén. I Begéne Alfa brab Omega, sani féganayane brab tamanane. Iray gu dob de térumén do étew i wayége énda i bayadén tidew dob séfute wayég miray bé umule magufusa. ⁷ I de étew ténabana roy Satanase, waléyu Tulus ro atin waléy ro do nga gu. ⁸ Endob i de étew do talaw brab do ménwaléy sébanil Begén brab de réménigo do mékérésik brab do ménméléhu brab do béliyan brab do ménengadaf do kéninontow brab do téménugi, géangéy ro dob ranawe aféy brab asuprewe, sani gérubowe kéléhu.”

⁹ Atin i ségétéwe bé de fitew gétew do télaki ménuwit do fitew timan do biléw bé de géfuray do fégédusa, ménangéy dob begéne brab ménbérél mano, “Enggon, fégito gu beem i témérimawe libun, sani mawage bé Natiwe Bili-bili.” ¹⁰ Tidew béo, i Rémogor i Tuluse fénemanduo no begén atin nuwit i télakiwe ni begén mangéy dob uruk i gérotore tuduk. Atin fenténgtengén begén i ingéde Jerusalem, sani mékétéfuwe ingéd, bé lala ne mélus tidew dob lawayo tidew dob Tuluse. ¹¹ Sémelinang i ni ingéd non diyo i barakatane Tulus. Sémelinang loo bé balilagae batéw féndawét haspe toow fo métiyéw maak fénalungon. ¹² Atin wén i gérotore diding fénngélangkat bé ni ingéd. Atin folo bra ruwo timan i bengawa nuwe. Atin folo bra ruwo gétew i télakiwe mantay bé de bengawa no. Atin ménusat dob de fintuén i dawét i de folo bra ruwo triboy de Judio. ¹³ Atin téléc timan i fintue dob séngae sébaan bé de fot timan diding. Téléc i fingée de sébangan, atin téléc soy fingée de déligdigan. Atin téléc soy fingée de tégenon, brab téléc soy fingée de élédon. ¹⁴ Atin i de diding i ni ingéd rénigo dob rotor i foloe bra ruwo batéw. Atin diyo ménusat i dawét i foloe bra ruwo do apostol i

Natiwe Bili-bili.

¹⁵ Atin i télakiwe, sani ménbérél dob begéne, wén i bélwone fégétémbu no inok témbuné noy ni ingéd brab de bengawa no, brab de didingén fénngélangkat de. ¹⁶ Atin i ni ingéd ségiléw foy kédakél i kékuka ne bé kédakél i kétaaha nuwe. Non i télakiwe ni ténémbu noy ingéde ni bé bélwone fégétémbu no. Atin ruwo ngibu bra fot ratuh gékilometroy kétaah ne loo soy kékuka ne loo soy kégérotor ne. ¹⁷ Atin ténémbuy télakiwe ni soy didinge, atin ném folo gémitroy kégérotor ne dob kétémbuy kélawane de, been i niy nusar i télakiwe ni. ¹⁸ Bélwon i ni ingéd toow fo métiyéw maak fénalungon, atin dénidind haspe. ¹⁹ Atin wén i de toow fo balilaga do batéw fénfiyo bé de batéw fentindégon bé de diding ni. I sunguwe de fénfiyo bé haspewe, atin i gérubowe de bé safirowe, atin i gétéléwe de bé kalsedoniawe, atin i géefote de bé esmeraldawe. ²⁰ I gélimowe de bé onise, i généme de bé kornalinawe, i géfitéwe de bé krisolitowe, i géwaléwe de bé berile, i gésiyowe de bé topasyowe, i géfoloe de bé krisaprasowe, i géfoloe de bra sébaan bé hasintowe, atin i géfoloe de bra ruwo bé amatistawe. ²¹ Folo bra ruwo timan do perlas i fénngérigowe bé de ni do folo bra ruwo timan fintu. Sénga sébaan fintu, sébaan so perlas i fénngérigowe de. Atin bélwon i aguwone dob ni ingéd métiyéw maak fénalungon.

²² Enda gito guy lawi i Tuluse dob ni ingéd non dob séngae gonon, i kéluhanay de étew fénngadafé roy barakatane Kadnan Tulus brab Natiwe Bili-bili. ²³ Atin i ni ingéd, éndaén kailanga noy réndaw i térsange taloo no térsang kélungonon. Non réméndaw i barakatane Tuluse funa no géfekaya. Atin i Natiwe Bili-bili maak solo. ²⁴ Atin i de étew dob duniye ni, gégitoy ro sabaf bé ni réndaw. Atin i de datu dob duniye ni, uwité roy kékawasa ruwe mahur dob ni ingéd. ²⁵ Atin i

de béngawan dob ni ingéd, méungka ro sénga tékeliid. Enda méfintuén non énda i kélunganon diyo. ²⁶ Atin i de fiyo do éntingayén brab kékawasay kéluhanay de ingéd, féahurén dob ni ingéd. ²⁷ Endob énda i tete géahur de, taloo no do tugién do étew taloo no do étew do mékémalay de rigoné ro. I de géahur saén dob ni ingéd, beroy de étew ménlistay de dawét ro dob libroy Natiwe Bili-bili listanan bé de étew gégédot bé umule magufusa.

22

¹ Atin i télakiwe ni, fénggito no begén i dakéle wayég miray bé umule magufusa. Sémelinang maak kristal. Tidew i ni wayég dob saray Tuluse brab Natiwe Bili-bili. ² Atin mangéy dob kérara i aguwone dob ni ingéd. Atin wén i dakéle kayéw miray umul dob doror i wayége ni sébala-bala. Mégonok folo bra ruwo gule sénga ségébélantuwa. Ségule mégonok sénga ségétérésang kélunganon. Atin i de dau ro fégéuwa bé de étew dob duniyae. ³ Atin énda i éntingayén mémula bé Tuluse dob ni ingéd.

Atin i de saray Tuluse brab Natiwe Bili-bili diyo dob ni ingéd. ⁴ Atin gito roy falas ne atin dob de rangih ro ménusat i dawét ne. ⁵ Atin éndaén i kélunganon, mélaw éndaén kailanga roy soloe taloo no térsang non i Kadnane Tulus, Beeney solo ruwe. Atin méguléw ro taman sa taman.

⁶ Tidew béno, ménbéréh i télakiwe dob begéne mano, "Toow i ni kékéréh énggelingoo mo brab gésarigon. Atin i Kadnane Tulus, sani miraye bé Rémogor ne dob de étew sénarigo no muret bé kékéréh ne, sénuguén i télakiwe ni inok fégito no dob de sugu-sugué noy atiy mérigowe énda mérugayén tidew bénii."

⁷ Atin bang Jesuse, "Séfuleu énda mérugayén tidew bénii! Moror i de étew modor bé de kékéréh fénggétiga ku begom dob ni libro."

⁸ Atin i begéne Juan. Enggelingoo ku brab énggito guy de ni. Atin amun énggilid énggelingoo ku brab

énggito gu, méntédunsumu dob adafay télakiwe ni ménféténgténg begén bé de ni, inok féngadafé ku. ⁹ Endob ménbéréh dob begéne mano, "Kago féngadafén begén. Non i begéne dumomo so sugu-suguéy Tuluse, beroy kéluhanay de dumomo sénarigoy Tuluse muret, brab de modor bé de kékéréh dob ni libro. Féngadafém saén i Tuluse." ¹⁰ Atin ménbéréh man dob begéne mano, "Kago bunéyén i de ni kékéréh fénggétiga ku beem dob ni libro. Non gédétén métuman i kéluhanay de ni. ¹¹ I de tete étew, kailangan fétausé roy de tete rigoné ro. I de mékérésik do étew, kailangan fétausé roy de mékérésik do rigoné ro. Atin i de fiyo do étew, kailangan fétausé roy de fiyo rigoné ro. Atin i de étew rémigo bé kétayay Tuluse, kailangan fétausé ro."

¹² Atin bang Jesuse, "Séfuleu énda mérugayén tidew bénii! Atin uwité kuy de baras inok iray gu dob de étew médait gégédot de sabaf bé de rénigo ro. ¹³ I Begéne, Alfa brab Omega, sani féganayane brab tamanane."

¹⁴ Moror i de étew ténumak i de kégal ro inok malinis, sani de étew ménkédanén i de sala ro, non wén i kuwagib ro mama bé onok i kayéwe miray bé umule magufusa, atin géahur ron dob mantuwe ingéd. ¹⁵ Endob dob liyuy ingéde ni, diyo i de rémigo do mékérésik brab de béliyan brab de rémigo bé de tete kétayay de lowoh ro, brab de méméléhu, brab de ménadaf bé de kéninontow, brab de tugién, brab de rémigo bé békéne toow.

¹⁶ Atin ménbéréh i Jesuse mano, "Begéney Jesuse, atin fénuit guy télaki guwe mangéy dob begome inok fégétiga noy de ni dob de munur. Begéney séfu datu Dabide. Begéney géfekayae solo mubod."

¹⁷ I Rémogor i Tuluse brab i mawage bé Natiwe Bili-bili, ménbéréh ro maro, "Enggon!"

I kéluhanay de mágélingo bé ni, fatut émbéréh gom "Enggon!"

I kéluhanay de étew térumén, brab méuyot ro miném, fatut doté roy wayége énda i bayadén miray bé umule magufusa.

¹⁸ I begéne, Juan, féégété kuy kékéréh guwe dob begome do mégélingo bé ni libro fénggétiga ku begom. Amuk wén i mumanan bé de kékéréh dob ni libro, umanay Tulusey kékérit ne de bé de kékérit ménsulat dob ni libro. ¹⁹ Atin amuk wén i kémédan bé dumoy de kékéréh

dob ni libro fénggétiga ku begom, kédanéy Tulusey de kaan baad bé de onok tidéw dob kayéwe miray umul, brab kaane kuwagib bati dob mékétéfuwe ingéd sani de ménsulat dob ni libro.

²⁰ Atin i Jesuse, sani ménbéréhe toow i de ni, ménbéréh mano, “Hoo ba, séfuleu énda mérugayén tidéw béni.”

Amen. Enggon, Kadnan Jesus!

²¹ Mégédaw fo toow i Kadnane Jesus begom. Amen.